


Tangoa New Testament



The New Testament in the Tangoa Language of Vanuatu

Tangoa New Testament
The New Testament in the Tangoa Language of Vanuatu
Le Nouveau Testament dans la langue Tangoa de Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019
89356e5c-df58-558e-9b27-ae0321adb2df

Contents

Matthew	1
Mark	38
Luke	61
John	99
Acts	127
Romans	162
1 Corinthians	178
2 Corinthians	194
Galatians	205
Ephesians	211
Philippians	217
Colossians	221
1 Thessalonians	225
2 Thessalonians	229
1 Timothy	231
2 Timothy	236
Titus	240
Philemon	243
Hebrews	244
James	257
1 Peter	261
2 Peter	266
1 John	269
2 John	273
3 John	274
Jude	275
Revelation	277

Retiruhu Hin Iesu Kristo Matthew Mo Uli

Hin Puku Nike

Hin puku nike, Iesu mo vujangi sohen harahi, haratu mo vaia aulu na Vutivuti (5.1–7.28), nona usiisi (6.9–13), peresi na 'Leu Ruhu' (7.12) 'ha vaia isana tinapua sohen ka opoia vara la vaia isamim' la lo toho hin puku akerihi.

Matthew mo uli mamahuni na hija pin Iesu (1.1–17) mo vujangia vara enia natu haratu sei God mo retitauhi vara i pa tai isan Supe David, haratu i pa noa Tamlohi Jujuri.

Matthew mo uli na sava mo masese hin rani atu Tiapolo mo vaihite Iesu na jara hasetoho (4.1–11).

Titileu nike la lo toho hin puku akerihi purongo

1. Piri ruvu (13.24–30)
2. Tavtav Tavera (13.44)
3. Huʻutavila Tavera (13.45–46)
4. Tara Maji (13.47–50)
5. Tavtav Matea (13.52)
6. Volitisi Sasati Matea (18.23–35)
7. Tamlohi Isa Grape Matea (20.1–16)
8. Uluvou Mo Rua (21.28–31a)
9. La Haʻai Maevo Atu (25.1–12)

Matthew mo vujangia vara hinau tari la masese isan Iesu usuri na masalon God (1.22; 2.5, 15, 17, 23; 8.17; 12.17; 13.35; 21.4; 27.9). Matthew mo uli retileu atu non Iesu mata sile na vavahinau non nona tamlohi usuri mata vano na jara tari na varama (28.18–20).

Vujangi Hai Hin Puku Nike

1. Pin Iesu Peresi Na Nona Rani Vora (1.1–2.23)
2. Vujangi Non John Tamlohi Paptijo (3.1–12)
3. Paptijo Non Iesu Peresi Na Nona Rani Vaihite (3.13–4.11)
4. Iesu Mo Lo Toho Na Jara Tavera Matan Galilee (4.12–18.35)
5. Mo Malue Galilee Mo Sahe Jerusalem (19.1–20.34)
6. Isoiso Wik Non Iesu: Nona Mateia (21.1–27.66)
7. Iesu Mo Mele Mauri (28.1–20)

Pin Iesu (Lk 3.23–38)

¹ Reti nike mo vereuli na pin Iesu Kristo, mahapin Abraham enia Supe David.

² Abraham enia taman Isaac. Isaac enia taman Jacob, ale Jacob enia taman Judah tolu na voraina,

³ Judah enia taman Perez

peresi Zerach, ale tinara Tamar, Perez enia taman Hezron, ale Hezron enia taman Ram,

⁴ Ram enia taman Amminadab, Amminadab enia taman Nahshon,

ale Nahshon enia taman Salmon, ⁵ ale Salmon enia taman Boaz,

ale tinana Rahab, Boaz enia taman Obed,

ale tinana Ruth, ale Obed enia taman Jesse,

⁶ Jesse enia taman Supe David, Supe David enia taman Solomon,

ale tinana Bathshiba enia malepun Uriah sei,

⁷ Solomon enia taman Rehoboam. Rehoboam enia taman Abijah,

ale Abijah enia taman Asaph, ⁸ Asaph enia taman Jehoshaphat,

Jehoshaphat enia taman Joram, Joram enia pin Uziah,

⁹ ale Uziah enia taman Jotham, Jotham enia mahapin Ahaz,

ale Ahaz enia taman Hezekiah, ¹⁰ Hezekiah enia taman Manasseh,

Manasseh enia taman Amos, ale Amos enia taman Josiah,

¹¹ Josiah enia pin Jechoniah tolu na tahisana,

enira hasera purongo natu la pa lo mauri hin pongi atu

mara Babylon la tauri na tavtavuin Israel la lavira la vano Babylon. *2 Ki 24.14–15*

¹² Hitahun rani atu mara Babylon la lavira la vano,

ale pina mo vano sohen harihi: Jechoniah enia taman Shealtiel,

ale Shealtiel enia taman Zerabbabel, ¹³ Zerabbabel enia taman Abiud,

Abiud enia taman Eliakim, ale Eliakim enia taman Azor,

¹⁴ ale Azor enia taman Zadok, Zadok enia taman Achim,

ale Achim enia taman Eliud, ¹⁵ Eliud enia taman Eleazar,

Eleazar enia taman Matthan, ale Matthan enia taman Jacob,

¹⁶ ale Jacob enia taman Joseph, Joseph enia tuan Mary,

ale Iesu mo vora isan Mary, enia haratu la tovia Kristo.

¹⁷ Ale mo sohen natu, pin Abraham mo tikeli Supe David mo tikeli 14, ale pin Supe David mo tikeli rani atu la vano Babylon mo tikeli 14, ale pina hin rani atu tamlohi la vano Babylon mo tikeli na rani Kristo mo vora mo tikeli 14.

Pongi Vora Non Iesu (Lk 2.1–7)

¹⁸ Ale reti vora non Iesu nofa Křisto mo sohen harihi: Tinana Mary, la tapuhia vara i pa naroun Joseph, pani la sopo lo lahi pani o eři hitea vara Mary mo tau natuna moiso na suihan Tanume Tapu. ¹⁹ Joseph sei enia i pa tuan Mary, ale matan enia tamlohi vokevoke matea, mo sopo opoia vara i vai Mary i mahanuhanu, ale mo aleale malele vara i tinaihia, ale tea la pa sopo levosahia.

²⁰ Pani Joseph mo pa lo řomřomia, ale va-hatea purongo, angelo non Moli God matea mo pala isana na mavuho, ale mo vereea mara, “Joseph pin David, o sopo matahu vara o lavi Mary naroun. Hina rihirihī sei na lolona mo tai isan Tanume Tapu. ²¹ I pa vasusui na natirihī lamane matea, ale o pa tau na hijana vara Iesu matan enia i pa juri na nona tamlohi na nora hehe.” ²² La hinau nike, la masese matan vara i mařivisi na sava Moli God mo vereea isana přovet tuai sei mara,

²³ ‘Eh! Hařai maevo matea i pa pangepange, ale i pa vasusui na natuna lamane matea.

La pa tau na hijana vara Immanuel.’

Isa 7.14

Raramin hija atu enia, ‘God mo lo toho isařa’.

²⁴ Hitahuna Joseph mara mo turu, mo vai na sava angelo atu non Moli God mo lo vereea, ale mo lavia narouna, ²⁵ pani mo sopo juruvi peresia mo mai mo tikeli na rani mo vasusui na natuna lamane matea, ale mo tau na hijana vara Iesu.

2

Tamlohi Lelevosahi La Pala

¹ Ale nake, Iesu mo vora Bethlehem na jara tavera Judea na pongi Herod mo lo supe ea, ale mo sopo tuai, tamlohi lelevosahi mata vitusarasara hai matan Opae la mai Jerusalem, ² la lo usia lara, “Nene natirihī atu mo vora vara i pa Supe nona Jew? Kama hite na vitusarasarana hin rani atu mo vele atuvano Opae, ale kama mai vara kama lotua.”

³ Supe Herod mara mo rongo nora retiusia sei, enia tolu na tamlohi tari na lolon Jerusalem řomira la kaka matana. ⁴ Mo tovi na matavuhi matea nona moli nona přis peresi na tamlohi vujangi mata leu nona tamlohi, ale mo usia isara mara, “Sava jara natu, nořa Křisto i pa vora hinia?”

⁵ La řaramia lara, “Na vanuan Bethlehem na lolon Judea, matan přovet tuai matea mo ulia sohen harihi mara,

⁶ ‘Bethlehem sei na jara tavera atu Judah, engko ko aulu ko jeu la haratu la lo aulu Judah.

Tamlohi aulu matea i pa tai isam i pa tavui sipsip mata i kilau na noku tamlohi Israel.’” *Mic 5.2*

⁷ Moiso, Herod mo mele tovi řořoi na matavuhi matea peresi la tamlohi lelevosahi atu, matan vara i levosahi na rani tataholo la hite vitusarasara atu mo lo pala hinia. ⁸ Moiso Herod mo řulera la vano Bethlehem, ale mo vereea mara, “Ha vano, ha ale mamahuni natirihī atu, ale vara ka hitea, ha mai ha vereea hinia, ale enau sohen a pa vano a lotua.”

⁹ La tamlohi lelevosahi atu la rongo la reti atu non supe moiso la turu la vano. Ale, la mele hite pa vitusarasara atu la lo hitea Opae, mo tiromara mo vano tataholo hin jara atu natirihī atu mo lo toho ea. ¹⁰ La tamlohi lelevosahi atu lara la hite vitusarasara atu, la avulahi la uloulo tavera matana. ¹¹ Lara la unu hin ima atu la hite natirihī atu mo lo toho hinia peresi tinana Mary. La popovitoho isana, ale la lotua. La roi na nora tavgav, ale la sile na nora otori mata gold peresi la hasori řuhu atu frankincense peresi na myrrh isana. ¹² Pani God mo retiřořoahai isan la tamlohi lelevosahi atu na mavuho matea vara la sopo mele hilu la vano isan Herod. Ale la mule na jarara na malele tinapua.

La Rovoa La Sivo Egypt

¹³ La tamlohi lelevosahi atu lara la mule, vahatea purongo, angelo non Moli God matea mo pala isan Joseph na mavuho matea, mo vereea mara, “O turu! O lavi natirihī sei peresi tinana ha rovo ha sivo Egypt matan nakerihī Herod i pa ale natirihī sei vara i vilimateia. Ha lo toho atu Egypt i tikeli rani atu a pa mele vere kamim hinia vara ha eři mele hilu.” ¹⁴ Vahatea purongo, Joseph mo turu mo lavi natirihī atu peresi tinana la malue la sivo Egypt hin vutepongi atu, ¹⁵ moiso, Joseph mo lo toho Egypt mo tikeli na rani Herod mo mate. Hinau nike, mo masese sohen usuri na sava přovet la vereea tuai moiso lara Moli God mo vereea mara, ‘Na tovi nařihī natuku Egypt’. *Hos 11.1*

Herod Mo Lolokoru

¹⁶ Moiso, Herod mara mo hitevosahia vara la tamlohi lelevosahi atu la halua, ale mo lolokoru patuna, ale mo sile na retileu matea vara nona tamlohi vuro la vilimatei na pipi lamane tari sei taunira mo rua teni taunira mo sivo atano na lolon Bethlehem peresi na jara la toho řalhia, Herod mo vaia usuri rani atu la tamlohi lelevosahi atu la vereea. ¹⁷ Moiso, sava hinau přovet Jeremiah mo vereea mo masese sohen harihi mara,

¹⁸ ‘Na jara atu Ramah, tamlohi la lo tangi, ale la tangtang tavera,

Rachel mo lo tangisi na natuna, ale mo rohu vara tea i nanau isana matan natuna la mate.’ *Jer 31.15*

La Mele Hilu La Sinai Israel

¹⁹ Pani na rani Herod mo mate, Joseph mo pa lo toho Egypt, ale hin rani atu, angelo matea non Moli God mo pala isana na mavuho matea, ²⁰ angelo atu mo vereea mara, “O turu! O lavi natirihī sei peresi tinana ha sahe Israel, matan la haratu sei la lo vaihitea vara la vilimatei natirihī sei la pete mate moiso.” ²¹ Ale Joseph mo lavi natirihī atu peresi tinana la sahe Israel. ²² Pani mara mo rongoa vara nake natun Herod, Archelaus mo lo tauri na suiha na lolon Judea, mo matahu vara i vano atu, ale mo mele lavi na retiroafoahai na nona mavuho tinapua matea vara i sahe Galilee. ²³ Mo vano na taon tavera matea la tovia Nazareth, ale la tohoa atu vara sava p̄ovet la vereea tuai matan K̄risto i pa masese lara, ‘La pa tovia vara mara Nazareth’.

3

John Tamlohi Paptijo

(Mk 1.1–8; Lk 3.1–18; Jn 1.19–28)

¹ Hin rani atu John tamlohi paptijo mo pala mo tapulo retivujavujangi na jara hasetoho matan Judea. ² Mo vereea mara, “Ha posi na nomim hehe matan i pa sopo tuai suiha atu non God mo lo supe hinia i pa pala.” ³ Matan enia haratu sei p̄ovet Isaiah mo lo retireti hinia tuai sei mara, ‘Na jara hasetoho leona mo lo ulu mara:

Ha tatamahuni na malele na mapumim matan Moli God i pa hahau hinia.’ *Isa 40.3*

⁴ Ale rurun John la vaia na vulu camel, mo otioti na huri buluk; hana hinau enia hat-poha peresi na wai tau sugabag sei mo meji. ⁵ Hin rani atu la haratu la lo toho Jerusalem peresi na jara tari Judea, ale na jara falihī na wai Jordan la lo vano vara la hitea, ⁶ ale la taviti na nora hehe isana moiso John mo paptijo hinira na wai Jordan.

⁷ Pani John mara mo hitea vara Pharisee peresi na Sadducee matuvana la lo mai mata la paptijo, mo vereea isara mara,

“Kamim mata sasati! Hare mo retiroafoahai kamim vara ha rovo na aria tavera non God?” ⁸ Ha vai na nomim vavahinai i vujangia vara ka posi vararūhu na nomim hehe. ⁹ Ha sopo ŋomaulu vara, ‘Kamam kama juri matan tamamam Abraham!’ matan na vereea isamim, God i efi posi la vatu nike, la mai natun Abraham!

¹⁰ Matan nakerihī, God mo lo tauri na rita matea moiso vara i tai na wari pahai. Vipahai tari atu la sopo vua ŋuhu, i pa taijovira, ale i pa pulahira na lolo hapu.

¹¹ Enau na lo paptijo hin la haratu la posi mata nora hehe na wai, pani i pa sopo tuai tamlohi matea i pa mai mo aulu jea hiniau, ale enau na sopo tataholo vara a uli narihī na asi eve palona. Enia i pa paptijo hin kamim na Tanume Tapu peresi na hapu. ¹² Mo lo tauri na nona foko tavera na limana, ale i pa vasahi na nona jara ase na piri wit, ale i pa takonahi piri wit atu na nona pea, pani i pa suli na pahapaha piri wit na hapu sei tea i sopo efi vunia hin te rani.”

John Mo Paptijo Hin Iesu

(Mk 1.9–11; Lk 3.21–22)

¹³ Moiso Iesu mo tai Galilee mo vano na wai Jordan vara John i paptijo hinia. ¹⁴ Pani John mo vaihitea vara i horoa. Mo vereea mara, “Mata sava ko mai isaku mata paptijo? Mo mele tataholo vara engko o paptijo hiniau!”

¹⁵ Iesu mo ŋaramia mara, “Nake mo tataholo vara o tinarihia i vano sohena, matan vara ŋa efi vai vevuhi na malele hinai tari i tataholo la masese.”

¹⁶ Ale Iesu mara mo paptijo, mo lo maraha na wai, ale vahatea purongo tuka mo roi, moiso mo hite Tanumen God mo Tapu mo sinai atano mo tau isana sohena vomahe matea. ¹⁷ Ale vahatea leo matea mo reti na tuka mo vereea mara, “Harihi enia Natuku, na opoia mo tavera, ale na avulahi tavera hinia.”

4

Tiapolo Mo Vaihite Iesu

(Mk 1.12–13; Lk 4.1–13)

¹ Moiso, Tanume Tapu mo tiroman Iesu mo vano na jara hasetoho vara Tiapolo i vaihitea. ² Ale Iesu mo tapuhoro na hanhani mata rani mo ngavulu vati (40) peresi na pongi mo ngavulu vati, (40) moiso mo mate hana. ³ Tiapolo mo mai isan Iesu matan vara i vaihitea, ale mo vereea mara, “Vara engko Natun God, o vere la vatu sei la mai pereti.” ⁴ Pani Iesu mo ŋaramia mara, “Na Retiulia, God mo vereea mara, ‘Tamlohi i sopo efi mauri na pereti purongo, pani na reti tari God mo vereea.’” *Deut 8.3*

⁵ Moiso Tiapolo mo lavia mo sahe na taon tapu tavera sei Jerusalem, mo taua mo turu aulu na pingopingo Temple ea, ⁶ ale mo vereea isana mara, “Vara engko Natun God o kue, matan na Retiulia God mo vereea mara, ‘Mo retileu isana nona angelo matam, matan vara la pa tauriho na limara, ale o pa sopo efi vujahi na palom hin te vatu.’” *Psa 91.11–12*

⁷ Iesu mo ŋaramia mara, “La mele ulia na Retiulia God mo vereea mara, ‘O sopo vaihite nom Moli God.’”

Deut 6.16

⁸ Ale Tiapolo mo mele lavi Iesu mo sahe aulu na vutivuti matea mo aulu jea, ale mo vujangia na jara tari na varama supe la lo tauri na suiha hinira peresi na nora tavitav tavera sei tamlohi la lo hasahasora matara. ⁹ Tiapolo mo vereea isana mara, “Vara o popovitoiho isaku, ale o lotuau a pa sileho hin la hinau tari sei.”

¹⁰ Moiso, Iesu mo vereea isana mara, “Setan, o vano! Matan na Retiulia God mo vereea mara,

‘O pa lotu nom Moli God,
ale o volitusi isana hasena purongo!’ ”

Deut 6.13

¹¹ Moiso, Tiapolo mo tinarihi Iesu, ale vahatea purongo, angelo hai la mai isana Iesu la tuenia.

Iesu Mo Tapulo Vavahinau

(Mk 1.14–15; Lk 4.14–15)

¹² Nake Iesu mara mo rongoa vara la tau John na ima rilangi, mo mele hilu mo vano Galilee. ¹³ Ale mo tinarihi Nazareth mo vano mo lo toho Capernaum mariviti na tasi atu, na lolo jara matan Zebulun enia Naphtali, ¹⁴ matan vara retimangovi non pfovet Isaiiah sei mara,

¹⁵ ‘La haratu na jara Zebulun enia Naphtali, peresi la haratu na tavalun tasi atu, peresi la haratu telesivo na wai Jordan, peresi Galilee jara tamlohi rofoha la lo toho ea,

¹⁶ la tamlohi atu la lo toho hin rofoha tavera atu la hite na malarani tavera atu, ale merana mo sasarami la haratu

la lo toho na jara rofoha mata mateia.’
Isa 9.1–2

¹⁷ Hin rani atu Iesu mo tapulo vara i retivujavujangi mo vereea mara, “Ha posi na nomim hehe matan i pa sopo tuai, suiha atu non God sei mo supe hinia i pa pala.”

Iesu Mo Viʻoni Na Nona Tamlohi

(Mk 1.16–20; Lk 5.1–11)

¹⁸ Iesu mo lo hahau na pahisa tasin Galilee, mo hite na vorai mo rua Simon la tovia Peter enia tasina Andrew la lo tara na tasi atu matan enira tamlohi aleale maji.

¹⁹ Ale Iesu mo vereea mara, “Ha mai ha usuriau a pa vai kamim ha mai tamlohi aleale tamlohi.” ²⁰ Vahatea la tau na nora tara, ale la usuria.

²¹ Iesu mo mele vano makomo, mo hite na vorai mo rua, James enia John, natun Zebedee. La lo toho na boti matea peresi tamara Zebedee. La lo tulai na nora tara, ale Iesu mo tovara vara la usuria. ²² Vahatea la tinarihi tamara na boti, ale la usuri Iesu.

Vavahinau Non Iesu Galilee

(Lk 6.17–19)

²³ Iesu mo vano falihia na jara Galilee mo lo vujangi na ima lotu nona Jew, mo lo

retivujavujangi na Retiruhu matan mauri atu God mo aulu hinia isara. Iesu mo vai na tamlohi rojo peresi la haratu la majuejue mata rojoa la mele ruhu. ²⁴ Sorasoran Iesu mo vano na jara tari Syria. Tamlohi la lavi la haratu la rojo na rojoa matuvana la lo rongohaji na epera, hai la lo lavi na rani rilangi matan tanume sasati mo lo toho hinira, hai la rave, hai la papao, Iesu mo vai mamahuni na nora rojoa tari. ²⁵ Vao tavera la tai Galilee, Decapolis, Jerusalem, Judea, ale na tavalu wai Jordan mo vano, la lo usuria.

5

Iesu Mo Vujangi Aulu Na Vutivuti Matea
(Lk 6.20–23)

¹ Matan Iesu mo hite na vao tamlohi la lo takonahi hin jara atu, ale mo sahe na vutivuti atu, ale mara mo sakele ea, nona tamlohi usuri la mai isana. ² Moiso mo tapulo retireti mo vujangira mo vereea mara,

³ “Avulahi ruhu isan la haratu
la lo kilau isan God hasena
mata hinau tari, matan mauri atu God
mo supe hinia i pa nora.

⁴ Avulahi ruhu isan la haratu
la lo tangtangi matan God
i pa nanaura. *Isa 61.2*

⁵ Avulahi ruhu isan la haratu
la lo romatano matan God
i pa sile na varama isara. *Psa 37.11*

⁶ Avulahi ruhu isan la haratu
la lo marohati, ale la lo marohu
vara la vai na masalon God,
matan enia i pa tuenira
la vai na masalona,
enira la pa masu. *Isa 55.1–2*

⁷ Avulahi ruhu isan la haratu
la lo romopoi na tinapua
matan God i pa romopoiria.

⁸ Avulahi ruhu isan la haratu
mapura la vokevoke
matan la pa hite God. *Psa 24.3–4*

⁹ Avulahi ruhu isan la haratu
la lo tueni na tamlohi
vara la sari tamata
matan God i pa tovara natuna.

¹⁰ Avulahi ruhu isan la haratu
tamlohi la lo tipahira
mata nora posposi tataholo,
matan mauri atu
God mo aulu hinia i pa nora. *1Pe 3.14*

¹¹ Avulahi ruhu isamim
vara tamlohi la kali kamim
teni vara la tipahi kamim
teni la vere na retisasati
tinatinapua hin kamim
na retihaluhalu matan
kamim noku tamlohi. *1Pe 4.14*

¹² Ha uloulo, ha avulahi tavera
matan nomim otori na tuka

mo tavera mo sohena p̄ovet tuai sei tiroma tamlohi la lo tipahira.

2 Chron 36.16; Acts 7.52

Solo Peresi Na Malarani
(*Mk 9.50; Lk 14.34–35*)

¹³ Kamim ka sohena solo mata varama, pani vara mejina i tihai i pa mele lavi na mejina sohena sava? I pa sopo mele ruhu matan te hinau, ale la pa pulahi nañihia, ale tamlohi la pa hahau hinia. ¹⁴ Kamim ka sohena malarani mata varama. Vara te taon tavera i lo toho aulu na vutivuti i pa sopo eñi luhu. ¹⁵ Ale tamlohi la sopo tauhoro na lamu hin te tanga, pani la kehohia aulu vara i sile na merana isana tamlohi tari na lolo ima. ¹⁶ Ale sohen haratu, ha vai na maurimim i memera i fuhu matan vara tamlohi la pa hite na nomim vavahinau fuhu ka lo vaira, ale la pa tahe aulu na hijan Tamamim na tuka.

Vujangi Mata Leu

¹⁷ Ha sopo romromia vara na mai vara a lavi nañihi na leu teni sava p̄ovet la vereea. Na sopo mai vara a lavi nañihira, pani vara hinau tari la pa masese hinira. ¹⁸ Varañuhu na vere kamim hinia, i pa sopo te sope maki teni te reti hatea i eñi tihai na Leu non God vavano hinau tari hinia la masese tiroma moiso tuka peresi na varama la pa tihai. ¹⁹ Vara tea mo tope te retileu rihirihia matea na leu, ale mo lo vujangi na tinapua vara la vaia sohena, tamlohi atu i pa toho atano jea hin mauri atu God mo aulu hinia na tuka, pani vara tea mo lo ooloo na leu, ale mo lo vujangi na tinapua vara la ooloo na leu, tamlohi atu i pa lavi na hija aulu hin mauri atu God mo aulu hinia.

²⁰ Na vere kamim hinia, vara nomim posposi mo sopo tataholo varañuhu, i jue na posposi tataholo halu nona Pharisee peresi na tamlohi vujangi mata leu, ha pa sopo eñi unu hin mauri atu God mo aulu hinia.

Vujangi Mata Lolokoru

²¹ Ka rongo na sava la vereea isana tamlohi tuai lara, 'Ha sopo vilimatei na tamlohi. Vara tea mo vilimatei te tamlohi i pa turu na aria.'

Exo 20.13; Deut 5.17

²² Pani na vereea isamim, vara ka lolokoru peresi na voraimim matea, ka levosahia moiso vara ha pa turu na aria, ale vara ha kali te voraimim hatea, ka levosahia moiso vara ha pa turu na court tavera nona Jew, ale vara ha vere na voraimim matea vara mo rommate, ka levosahia moiso vara ha pa vano hin hapu atu na moruhapu.

²³ Ale matana, vara ka lo lavi na nomim silesilea vara ha pa taua na votavota mata malamalai, ale vara ka romromia vara voraimim matea mo lolokoru hin kamim matan ka vai te hinau matea, ²⁴ ale ha tau

na nomim silesilea atu na votavota mata malamalai, ale ha vano ha vai na tamata peresia tiroma, moiso ha pa mele mai vara ha sohai na nomim silesilea. ²⁵ Vara nomim meresahi mo opoia vara i tau kamim na court ha vaia i mai tapalamim matea vila na malele ka lo vano na court. Vara i vono i pa vai kamim ha vano na lima tamlohi aria, ale i pa tau kamim na lima tamlohi mata ima rilangi, ale i pa tau kamim na ima rilangi. ²⁶ Varañuhu, na vere kamim hinia, ha pa sopo eñi malue hin ima rilangi atu i tikeli na rani ha voli vevuhi na nomim ave ka vaira.

Vujangi Mata Lahi

²⁷ Ka rongo na sava la vereea moiso lara, 'O sopo juruvi peresi te hafai mo sopo naroum'.

Exo 20.14; Deut 5.18

²⁸ Pani na vere kamim hinia, vara tea mo kilau na hañai matea ale mo romusuri hinia, mapuna mo pete vaivaileu peresia moiso. ²⁹ Vara matua matam mo hite te hinau mo vaiho ko opoia vara o vai na hehe, o julai nañihia o pulahia. I pa mele ruhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu. ³⁰ Vara marau limam mo vaiho ko opoia vara o vai na hehe, o tai rotoa o pulahia. I pa mele ruhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu.

Vujangi Mata Rohu Na Naroum

(*Mt 19.9; Mk 10.11–12; Lk 16.18*)

³¹ La ulia moiso vara tea mo opoia vara i rohu hin narouna i pa eñi sile na certificate matea mata i rohu purongo hinia. ³² Pani enau na lo vere kamim hinia, vara mo sopo tataholo vara tea i rohu hin narouna matan te hinau, pani vara narouna mo vai na posposi viriu peresi na tamlohi tinapua, ale vara te tamlohi tinapua i lahi peresi na hañai sohen haratu, tamlohi atu mo vaivaileu peresia.

Vujangi Mata Retitauhi

³³ Ka rongoa la vereea isana piña tuai lara, 'O sopo tope na nom retitauhi, ale o pa turu na nom retitauhi ko vaia na hijan Moli'.

Num 30.2

³⁴ Pani enau na vere kamim hinia vara ha sopo vere na nomim retitauhi na hijan tuka matan tuka enia jara sakele mata suiha non God, ³⁵ ha sopo vere na nomim retitauhi na hijan varama matan varama enia jara palon God. Ha sopo vere na nomim retitauhi na hijan Jerusalem, matan haratu enia taon tavera non supe tavera atu. ³⁶ Ale ha sopo vere na nomim retitauhi na patumim matan ha sopo eñi vai te vulu hatea i lulu teni i viriha. ³⁷ Vara ha vere na nomim retitauhi ha vereea purongo vara 'io!' teni

‘mo vono!’ Ha sopo mele vere te hinau i aulu hin haratu matan hinau tinapua mo tai isan Tiapolo.

Vujangi Mata Kelekele
(Lk 6.29–30)

³⁸ Ka rongoa la vere a tuai moiso lara, ‘Mata matea mata matea’ ale ‘Huŋu matea mata huŋu matea’. *Exo 21.24; Lev 21.24*

³⁹ Pani nake enau na lo vere kamim hinia vara ha sopo kele haratu mo komo kamim. Vara tea i vojai na tavalu esem o mājinga hinia vara i mele vojai na tavalu esem tinapua. ⁴⁰ Vara tea mo reveho ko vano na court matan vara o sile na nom ruru isana, o silea peresi na nom ruru mata hamariri. ⁴¹ Vara te tamlohi vuro mo lo ngurunguru hiniho vara o sapele na nona tanga mata kilometre matea, o sapelea mata kilometre i rua. ⁴² Vara tea i usiho matan te nona opoia o silea, ale o sopo ŋohu vara tea mo opoi te nom hinau tako.

Opoi Nom Meresahi
(Lk 6.27–28, 32–36)

⁴³ Ka rongoa la vere moiso lara, ‘O opoi na tahisam!’ Ale lara, ‘O ŋohu na nom meresahi!’ *Lev 19.18*

⁴⁴ Pani enau na lo vere kamim hinia vara, ha opoi na nomim meresahi, ale ha usiisi matan la haratu la lo tipahi kamim, ⁴⁵ matan vara ha pa vai na vavahinau non la haratu la natun Tama varaŋuhu na tuka, matan enia mo vai na alo mo mera isana tamlohi ŋuhu peresi na tamlohi sasati, ale mo sile na usa isana tamlohi tataholo peresi na tamlohi lejileji. ⁴⁶ Matan vara ha lo opoi la haratu purongo sei la lo opoi kamim, ha pa sopo lavi na nomim otori isan God, ale la haratu la lo lavi na mania mata takis la lo opoi na tapalara purongo, ale ka hitea, la pa sopo lavi te volira matana. ⁴⁷ Ale vara ha lo retioloalo isana tapalamim purongo, ka sopo vai te hinau ŋuhu i jēu na tamlohi ŋoŋoha matan enira la lo retioloalo isana tapalara purongo sohemim. ⁴⁸ Ale matana, na lo vere a vara tarea ha pa vai na hina tataholo sohen Tamamim na tuka mo tataholo ŋuhu.”

6

Vujangi Mata Tueni

Ale Iesu mo mele vere a mara,
¹ “Vara ka vai na hina ŋuhu na naho tamlohi, ha sopo vaia matan vara tamlohi la pa hasohaso kamim matana, matan vara ha vaia sohena, Tamamim na tuka i pa sopo sile na otori isamim.

² Vara ka silesile isana tamlohi tilavono, ha sopo tiv na tavue matana. Hinau atu tamlohi tapnetano la lo opoia mo tavera vara la lo vaia na naho tamlohi na ima

lotu, ale na jingoima vara la pa hasohasora matana. Varaŋuhu, na vere a isamim, enira la pete lavi na volira moiso. ³ Ale vara ha sile te hinau isana tilavono, ha sopo vaia vara tinapua i levosahia, ⁴ matan vara sava ka silea na jara luhu, Tamamim mo lo hite na sava ka lo vaia na jara luhu, ale enia i pa sile na otori isamim matana.

Vujangi Mata Usiisi
(Lk 11.2–4)

⁵ Vara ka usiisi, ha sopo usiisi sohena tapnetano la lo vaia na ima lotu teni na jingoima vara tamlohi la pa hasohasora matana. Varaŋuhu, na vere a isamim, enira la pete lavi na volira moiso. ⁶ Pani engko vara ko usiisi o sivo na lolo ima o pelati na matarua, ale o usiisi isan Tamam tea i sopo hiteho. Tamam mo lo hite na sava ko lo vaia hin jara luhu atu, moiso o pa lavi na nom otori matana.

⁷ Ale vara ha usiisi ha sopo verevere vono sohena tamlohi ŋoŋoha. La lo romŋomia vara nora god la pa ŋaramira matan nora reti mo matuvana. ⁸ Matan haratu, ha sopo sohera matan Tamamim mo pete levosahi na nomim opoia moiso ka pa usia isana. ⁹ Ale ha usiisi sohen harihi:

God Tamamam na tuka,
kama opoia vara tamlohi tari
la sile na oloalo tavera isam
mata engko ko tapu,
¹⁰ kama opoia vara nom
suiha aulu mata supe i pala,
o vai na masalom na varama
i tataholo sohen ko lo vaia na tuka,
¹¹ o sile kamam na hanhani
matan nohorihī,
¹² o ŋomi kamam
mata nomam hehe,
sohen kama lo ŋomi
na hehe nona tamlohi tinapua,
¹³ o lavi naŋihī kamam na vaihite,
o juri kamam hin Tiapolo.

¹⁴ Matan vara ha ŋomi na tinapua na nora hehe la vaia isamim, Tamamim na tuka i pa ŋomi kamam mata nomim hehe. ¹⁵ Pani vara ha sopo ŋomi na tinapua, Tamamim i pa sopo ŋomi na nomim hehe.

Tapuhoro Na Hanhani Mata Usiisi

¹⁶ Na rani vara ka tapuhoro na hanhani ha sopo vai na nahomim la rara sohena tapnetano la lo vaia. Varaŋuhu, na vere a isamim, enira la pete lavi na volira moiso. ¹⁷ Pani vara ko tapuhoro na hanhani, o hoje na nahom, o paspasi na patum hin te makomo wel, ¹⁸ matan vara tinapua la pa sopo levosahia vara ko tapuhoro na hanhani mata usiisi, pani matan vara haratu mo sopo tea i eŋi hitea enia Tamam sei, enia hasena i pa hite na sava ko lo vaia na jara luhu, moiso i pa sile na nom otori matana.

Tavtav Na Tuka
(Lk 12.33–34)

¹⁹ Ha sopo takonahi na tavgav na varama, matan pepe peresi faeha la pa komora, ale tamlohi vavanaho la pa kauti na ima la unu vara la vanahora. ²⁰ Pani ha takonahi na nomim tavgav aulu na tuka matan pepe peresi na faeha la pa sopo eri komora, ale tamlohi vavanaho la pa sopo unu la vanahora, ²¹ matan mapum i pa lo toho tarea na jara nom tavgav mo lo toho ea.

Malarani
(Lk 11.34–36)

²² Matam enia mo sohena glas niro matea mata epem. Vara matam mo niro mo ruhu, memera i pa mafivisi na epem. ²³ Pani vara matam mo sovsoha, epem tari la pa rofoha. Vara malarani na lolom mo sopo malarani, pani mo rofoha, rofoha atu i pa tavera jea.

Mania
(Lk 16.13)

²⁴ Mo sopo tea i eri volitusi varafuhu isana tamlohi tavera tinapua i rua. I pa opoi matea i jeu haratu matea, teni i pa oloolo hin matea i jeu haratu matea. Ha pa sopo eri volitusi isan God na tavalu limam matea, ale na tavaluna tinapua ha volitusi isana mania! *

Romkaka
(Lk 12.22–31)

²⁵ Na vere kamim hinia vara ha sopo romkaka mata maurimim, ha sopo romkaka vara sava ha pa hania, teni ha pa inu te sava, teni ha pa rua na sava. Sohena sava mauri mo sopo jeu na hanhani, ale epemim mo sopo jeu na ruru? ²⁶ Ha to kilau sahe na maji avuavu na masapa! La sopo lalavo teni la vu na asitauni. La sopo takonahi na piri na ima piri, pani Tamamim na tuka mo lo kilaura. Sohena sava ka rom vara ka sopo ruhu jea i jeu na maji avuavu? ²⁷ Romkaka, i eri vai kamim ha mauri i mele peravu?

²⁸ Mo sopo ruhu vara ha lo romkaka mata nomim ruru. Ha kilau vano sohena sava pa vira jala la lo ulua. La sopo voko vara lakolako na epera. ²⁹ Pani na vere isamim vara supe Solomon peresi na nona tavgav tari peresi na nona ruru ruhu mo lo rura, la sopo ruhu sohen te vonara hatea. ³⁰ Vara God mo vai na hinau la ulua hasera na jara tavera la ruhu jea mata makomo rani purongo, pani pavuho la mate, ale la pulahira na hapu, pani ha lo levosahia, God i pa kilau mamahuni kamim i mele ruhu jea i jeu la vira jala sei. Mata sava nomim rasua mo rihirih purongo?

* 6:24: Matam nike enia mapum, vara mapum mo hehe o pa opoi na hinau mata rofoha, ale hina rofoha la pa taurilati na maurim tari.

³¹ Ha sopo romkaka vara, ‘fa pa hani te sava hinau?’ teni ‘fa pa inu na sava?’ teni ‘fa pa ru te sava?’ ³² Haratu sei la tamlohi rofoha la lo romkaka matan la hinau tari sei. Tamamim na tuka mo levosahi na hinau tari ka opoira. ³³ Pani ha ale mauri atu God mo aulu hinia tiroma peresi na nona posposi tataholo, ale hinau tari sei la pa nomim.

³⁴ Ha sopo romkaka matan pavuho, matan pavuho i pa hasena kilaua. Ale rani hatehateahi la pa lavi na nora hina rilangi hasera.

7

Ha Sopo Ari Na Tinapua
(Lk 6.37–38, 41–42)

¹ Ha sopo ari na tinapua matan vara God i pa sopo ari kamim. ² Na sava malele ka lo ari na tinapua hinia, la pa ari kamim hinia sohena, vara nomim aria mo puhoni isana tinapua, God i pa vaia sohena isamim. ³ Ko eri hitevosahi na utauta rihirih na matan voraim, pani mata sava ko sopo eri hitevosahi na masunga vipahai na matam? ⁴ Teni o pa eri vere isan voraim sohena sava vara, ‘Tapala o tinafihiau a lavi narihi na utauta rihirih matea na matam!’ pani ko sopo hitevosahi na masunga vipahai na matam hasem? ⁵ Engko tapnetano, o lavi narihi na masunga vipahai na matam hasem tiroma, matan vara o pa eri kilau i ruhu vara o lavi narihi na utauta rihirih na matan voraim.

⁶ Ha sopo sile na hina tapu non God isana viriu, matan enira la pa posi la hatsatihih, ale ha sopo sile na nomim huftavila isana poi, matan la pa lo varasihira purongo.

Usia, Alea, Rerengi
(Lk 11.9–13)

⁷ Ha usia, ale la pa silea isamim, ha alea, ale ha pa vileia, ha rerengi, ale pelati i pa roi isamim. ⁸ Haratu la usia la pa lavia, haratu la alea la pa vileia, ale la haratu la lo rerengi, pelati i pa roi isara. ⁹ Teni te vonamim i pa eri sile na vatu isan natuna vara mo usia na pereti? ¹⁰ Teni te vonamim i pa eri sile na mata isan natuna vara mo usia na maji tasi? ¹¹ Vara kamim tamlohi hehe ka levosahi na sava otori sei mo ruhu vara ha pa silea isana natumim, ka levosahia moiso vara posin Tamamim na tuka mo jeu na posposi tamlohi, ale i pa sile na otori ruhu isan la haratu la usia.

Leu Mata Opoia

¹² Ale matana, ha vaia isana tinapua sohena ka opoia vara la vaia isamim matan harihi mo mafivisi na Leu non God peresi na reti nona p’rovet tuai.

*Malele Mo Rua
(Lk 13.24)*

¹³ Ha unu na matarua rihirihī, matan vao tavera la lo unu na matarua tavera, ale la lo usuri na malele mo tavera sei mo lo vano na talai non God, ale i pa komora. ¹⁴ Pani matarua atu mata unu na malele mata mauri mo rihirihī, malelena mo rīlangi, ale tupu visaletē purongo la vileia.

*Pōvet Haluhalu
(Lk 6.43–45)*

¹⁵ Ha lo kilau mata pōvet haluhalu! La pa mai sohena tamlohi tuetuēni, pani na lolora la sohen viriu varavarahati matan la pa komo na nomim rasua. ¹⁶ Ha pa eri hitevosahira na nora vavahinau. Ha sopo eri vu na vua grape na talu kaulu teni vua fig na asi matemate. ¹⁷ Hin malele atu pahai ruhu tari la pa sile na vua ruhu, pani pahai sati i pa sile na vua sasati. ¹⁸ Pahai ruhu i sopo eri sile na vua sasati, ale pahai sati i sopo eri sile na vua ruhu. ¹⁹ Pahai tari sei la sile vua sasati la pa taijovira, ale la pulahira na hapu. ²⁰ Ha pa eri hitevosahi na pōvet haluhalu na nora vavahinau.

*Retiŋoaŋoahai Matea
(Lk 13.26–27)*

²¹ Mo sopo tamlohi tari sei la lo toviau lara, ‘Moli! Moli!’ la pa lavi mauri atu God mo aulu hinia, pani la haratu purongo sei la lo ooloo hin Tamaku na tuka la pa unu hinia. ²² Na rani mata aria, tamlohi matuvana la pa toviau vara, ‘Moli! Moli!’ La pa vere lara, ‘Kama lo retivujavujangi na hijam, ale na hijam kama lo titi na tanume sasati, ale kama lo vai na hina maŋurahi matuvana hinia.’ ²³ Pani a pa vere isara vara, ‘Kamim, ka sopo noku tamlohi! Ha malue, kamim ka tamlohi tope na leu!’

*Ima Mo Rua
(Lk 6.47–49)*

²⁴ Ale vara tea mo rongo na noku reti, ale mo vaira, mo sohena tamlohi lelevosahi matea sei mo voro na imana na vatu. ²⁵ Tavara mo jovi, ale wai mo tavei mo mai peresi na langi rīlangi la vili ima atu, pani mo sopo jovi matan mo voroa na vatu. ²⁶ Ale vara tea mo rongo na noku reti, pani mo sopo vaira, mo sohena tamlohi rongorongo vono matea sei mo voro na imana na oneone. ²⁷ Tavara mo jovi, ale wai mo tavei mo mai peresi na langi rīlangi la vili ima atu, ale ima atu mo jovi mo maroe.”

²⁸ Hin rani atu Iesu mo vere harihi mo isoiso, vao atu la maŋurahi tavera na nona vujangi, ²⁹ matan mo vujangira sohena tamlohi aulu matea, mo sopo sohena nora tamlohi vujangi mata leu.

8

*Tamlohi Lepros Matea
(Mk 1.40–45; Lk 5.12–16)*

¹ Hin rani atu Iesu mo lo sevuti na vutivuti atu, vao tavera jea la lo usuria. ² Ale hin rani atu tamlohi lepros matea mo mai mo papaohi isana mo vere lara, “Moli, vara o opoia, o eri vaiau a vokevoke na noku rojoo.”

³ Iesu mo sohai na limana moiso mo tikelia, ale mo vere lara, “Enau na opoia. O vokevoke!” Vahatea purongo lepros atu mo tihai. ⁴ Moiso Iesu mo vere isana mara, “O sopo vere hinia nika isan tea, pani o vano o hase vujangiho isana pris vara ko mele ruhu, ale o sile na hina silesilea sohen Moses mo retileu hinia matan vara tamlohi tari la pa levosahia vara engko ko vokevoke moiso.”

*Rasua Hin Iesu
(Lk 7.1–10; Jn 4.43–54)*

⁵ Ale Iesu mo pa lo unu na vanuan Capernaum, captain mata tamlohi vuro matea mo mai isana mo usia rīlangi isana, ⁶ mara, “Moli, o tuēniau, noku volitusi mo lo juruvi na ima, epena mo rira, mo lo lavi na rani rīlangi tavera.”

⁷ Moiso, Iesu mo vere isana mara, “A pa vano a vai na nona rojoo i tihai!”

⁸ Pani captain mata tamlohi vuro atu mo vere lara, “Moli, enau na sopo ruhu matan vara o unu na imaku, pani o vere lara purongo, ale noku volitusi i pa ruhu. ⁹ Matan enau sohem, na lo toho na ruhuruhi suiha aulu tinapua, ale la sileau na suiha vara a aulu na noku tamlohi vuro, vara a vere isan te hatea vara, ‘O vano!’ ale i pa vano, vara a vere isan te tinapua vara, ‘O mai!’ ale i pa mai, vara a vere isana noku volitusi vara, ‘O vai haranike!’ ale i pa vaia.”

¹⁰ Ale Iesu mara mo rongo hinia sei mo maŋurahi tavera, ale mo posi mo vere isan vao atu la lo usuria mara, “Varafuhu na vere isamim vara na sopo lo tapai te rasua sohen harihi na lolon Israel. ¹¹ Na vere lara, tamlohi matuvana na jara tari na varama la sopo Jew, la pa mai la sakele matavuhi na hanhani tavera peresi Abraham, Isaac enia Jacob hin mauri atu God mo aulu hinia. ¹² Pani tatua tahisan Abraham la pa pulahira na roŋoha tavera, la pa tangi, ale la pa naŋaŋofi na huŋura.”

¹³ Ale Iesu mo vere isan captain atu mara, “O eri vano na imam natu. Ale i pa masehe sohen ko rasua.” Vahatea nona volitusi mo mele ruhu.

*Mo Vaitihai Na Rojoo
(Mk 1.29–34; Lk 4.38–41)*

¹⁴ Iesu mo pa lo unu na iman Peter, ale mo hite vepalihan Peter mo lo juruvi na vata mo sereia. ¹⁵ Mo tauri na limana, ale seserei atu mo tihai moiso haʻai atu mo mele turu mo vai na hanhani hani Iesu.

¹⁶ Hin ravravi atu, tamlohi la lavi na tamlohi matuvana sei tanume sasati mo unu hinira la mai isan Iesu, ale mo reti purongo, ale nona reti atu mo titiu naʻihi na tanume sasati isara, ale mo vai na tamlohi rojo tari la ruhu. ¹⁷ Ale sava pʻovet Isaiah mo vereea moiso mo masese sei mara: ‘Mo lavi naʻihi na noʻa rojoa, ale mo vaiʻa ra ruhu.’ Isa 53.4

*Mauri Vara O Usuri Iesu
(Lk 9.57–62)*

¹⁸ Iesu mara mo hite na vao tavera atu la lo mai la lo turu porotia, ale mo vereea isana nona tamlohi vara la pa usuria la vano roto na tasin Galilee.

¹⁹ La sopo lo vano tamlohi vujangi mata leu matea mo mai isana mara, “Tija, a pa usuriho na sava jara o pa vano ea!”

²⁰ Iesu mo vereea isana mara, “Viriu jala nora jara juruvi la lo toho, ale maji avuavu taura la lo toho, pani Natun Tamlohi mo sopo te jara vara i lo toho ea.” Dan 7.14

²¹ Nona tamlohi usuri tinapua matea mara, “Tija, a pa mai, pani o tinaʻihia vara a tavuni tamaku tako.”

²² Pani Iesu mo vereea isana mara, “O usuria! Haratu la mate la pa tavuni na nora mate!”

*Mo Horo Na Langi Tavera
(Mk 4.35–41; Lk 8.22–25)*

²³ Ale Iesu mo pa lo vele hin boti atu, nona tamlohi usuri la usuria, ²⁴ ale hin rani atu la vano, ale langi tavera matea mo jovi hin tasi atu, ale mariviti suhusuhu la lo putehi na botira natu, pani Iesu mo lo juruvi, ²⁵ ale na nona tamlohi la vano isana la rohaia lara, “Tija! O juriʻa! Ra lo pute!”

²⁶ Pani Iesu mo vereea isara mara, “Ka matahu mata sava? Nomim rasua mo rihirihahi hajavua!” Ale mo turu mo reti rilangi isana langi peresi tasi atu vara la tamata, ale hinau tari la tamata.

²⁷ Ale la nona tamlohi atu la maʻurahi tavera hinia lara, “Sava tamlohi nahai sohena, matan langi peresi na tasi sohena la ooloo hinia?”

*Mara Gadara Na Taptap
(Mk 5.1–20; Lk 8.26–39)*

²⁸ Iesu mo hosu na tavalu tasi atu mariviti hin jara tavera atu Gadarene, ale hin jara atu tamlohi mo rua tanume sasati la lo toho hinira, la tai na taptap la mai isana. La tupra rua atu enira la putu, ale la lo vaisati na tamlohi, ale la vai na tamlohi la matahu matan vara la lo hahau hin jara atu. ²⁹ Ale vahatea

purongo, la ulo lara, “Natun God! Engko te nom sava isamam! Ko mai nakerihi matan vara o sile na talai isamam sei mo sopo lo ranina tataholo?”

³⁰ Vao poi tavera matea mo lo toho asau makomona hinira la lo susua, ³¹ ale la tanume sasati atu la usia rilangi isan Iesu lara, “Vara o tiu naʻihi kamam, o fule kamam kama unu hin vao poi atuvano!”

³² Ale Iesu mo vereea isara mara, “Ha vano!” Moiso la malue la vano la unu hin vao poi atu, ale vahatea purongo vao poi atu la maro la solesole la jovi na pesapesa atu la pute na tasi. ³³ Moiso tamlohi kilau na poi atu la maro la vano na taon tavera mariviti hin jara atu la vere na hinau tari la masese hin la tamlohi putu atu tanume sasati la lo toho hinira. ³⁴ Ale hin rani atu tamlohi tari na nora taon tavera atu la mai vara la tapai Iesu, ale lara la hitea la usia rilangi isana vara i malue na jarara.

9

*Tamlohi Papao Matea
(Mk 2.1–12; Lk 5.17–26)*

¹ Ale Iesu mo mele vele hin boti atu mo hilu mo vano roto na tasi mo hosu mariviti hin taon atu mo lo tohoa ea. ² Ale hin rani atu, tamlohi hai la lavi na tamlohi papao matea na epana la mai isana, ale Iesu mara mo hitevosahi na rasua nona tapalan tamlohi papao atu, mo vereea isana mara, “Natuku, romim i rilangi! Na romiho mata nom hehe.”

³ Ale hin rani atu, tamlohi vujangi mata leu hai la lo toho atu la lo hasera romromia na fomira lara, “Tamlohi akerihi mo lo vaia sohena enia God.”

⁴ Pani Iesu mo levosahi na sava la tamlohi sei la lo romromia, ale mo vereea mara, “Ka lo romhehe na mapumim mata sava?”

⁵ Sahara mo mele malum vara a vereea isan tamlohi papao nike? ‘Enau na romiho mata nom hehe!’ Teni vara a vereea vara, ‘O turu! O hahau!’ ⁶ Pani matan vara ha pa levosahia vara Natun Tamlohi mo lavi na suiha vara i romi na hehe nona tamlohi na varama, ha tapurongo!’ Ale Iesu mo vereea isan tamlohi papao atu mara, “Na vereho hinia, o turu, o viriviri na epam, ale o mule!”

⁷ Ale tamlohi papao atu mo turu mo mule. ⁸ Vao tamlohi atu lara la hitea, matahu mo sohonira, ale la tahe na hijan God matan enia mo sile na suiha sohen harihi isana tamlohi.

*Iesu Mo Tovi Matthew
(Mk 2.13–17; Lk 5.27–32)*

⁹ Iesu mo pa lo vano, mo hite na tamlohi matea mo lo lavi na mania mata takis mo lo sakele na jara mata voli na takis. Iesu mo

verea isana mara, “Eh! O mai o usuriau!” Ale Matthew mo turu, mo usuria.

¹⁰ Hitahu Iesu peresi na nona tamlohi usuri la lo sakele la lo hanhani na iman Matthew, ale hin rani atu tamlohi mata lavi na mania mata takis peresi na tamlohi hehe tinapua matuvana sohera la lo sakele la lo hanhani peresira. ¹¹ Pharisee atu lara la hitea, ale la usi na tamlohi usuri non Iesu lara, “Mata sava nomim tija mo lo hanhani matavuhi peresi la haratu la lo lavi na mania mata takis peresi la tamlohi hehe tinapua sei?”

¹² Pani Iesu mara mo rongoa mo vereea mara, “Haratu la sopo rojo la sopo opoi na doctor, pani la haratu la rojo la opoia. ¹³ Ha vano ha levosahi na Faramin Retiulia sei mo vereea vara, ‘Na sopo opoi na malamalai, pani na opoia vara ha romopoi na tinapua.’ Enau na sopo mai vara a tovi la haratu la tataholo moiso vara la mai noku tamlohi, pani na mai vara a tovi la haratu la hehe.” *Hos 6.6*

*Tapuhoro Na Hanhani
(Mk 2.18–22; Lk 5.33–39)*

¹⁴ Na rani matea tamlohi usuri non John tamlohi paptijo la mai isan Iesu la usia lara, “Mata sava kamam peresi na Pharisee na rani matuvana kama lo tau na rani mata tapuhoro na hanhani mata usiisi, pani nom tamlohi usuri la sopo tapuhoro na hanhani mata usiisi?”

¹⁵ Iesu mo Faramira mara, “Tavtavui tamlohi i pa lahi la sopo eri tapuhoro na hanhani mata usiisi hin rani atu la lo toho peresia. Pani vara nona mere-sahi la mai la lavi nafiha isara, ale hin rani atu natu la pa tapuhoro na hanhani mata usiisi.

Tavalu Ruru Paro

¹⁶ Te tamlohi i sopo eri lavi te tavalu ruru paro hatea i silivi na ruru tuai hinia. Vara i vaia sohen, tavalu ruru paro atu i pa vaia i mafari tavera i jeu haratu tiroma.

Waen Paro

¹⁷ Te tamlohi i sopo eri titisi na waen paro i sivo na jara waen la vaia na huri nani tuai matan waen paro atu i pa sosohi i fari jara waen atu, ale i pa komoa peresi waen atu matan i pa roro nafihi. Waen paro mo tataholo na jara waen la vaia na huri nani paro purongo matan vara jara waen atu la vaia na huri nani peresi waen atu la pa toho i ruhu i tuai.”

*Tamlohi La Tau Na Nora Rasua Hin Iesu
(Mk 5.21–43; Lk 8.40–56)*

¹⁸ Iesu mo pa lo vere harihi, ale vahatea tamlohi aulu matea mo mai isana, mo pa-paahi isana mo vereea mara, “Venatuku mo

mate nakerihi. O mai o tau na limam isana, ale i pa mele mauri.”

¹⁹ Iesu peresi na nona tamlohi usuri la turu la usuri tamlohi atu. ²⁰ La lo vano, ale vahatea hafai matea mo rojo na rojo nona hafai tauni mo sangavulu romana mo rua moiso mo mai na hafina mo tikeli na revurevu ruru non Iesu. ²¹ Mo lo vereea isana hasena mara, “Vara a eri tikeli na nona ruru purongo a pa mele ruhu.”

²² Ale Iesu mo posi isana mo hitea mo vereea mara, “Romim i filangi! Nom rasua mo vaiho ko mele ruhu.” Ale hafai atu mo mele ruhu vahatea purongo.

²³ Hin rani atu Iesu mara mo unu na iman pa tamlohi aulu atu, mo hite na tamlohi roro la lo roro na flute peresi na vao la lo tangangi, ²⁴ mo vereea mara, “Ha malue! Hafarihi sei mo sopo mate! Mo juruvi romaliho purongo!” Tamlohi tari atu la manaluluhi Iesu. ²⁵ Pani lara la sohai vao atu la sahe na jingoima moiso, Iesu mo unu mo vano na pahisa vatan hafarihi atu, mo tauri na limana, ale hafarihi atu mo turu. ²⁶ Ale sorasorahina mo vano falihi na jara tari atu.

Iesu Peresi Na Matavuso

²⁷ Moiso Iesu mo lo malue hin jara atu, ale tamlohi matavuso mo rua la lo usuria la lo ulo lara, “Mahapin Supe David, o romopoi kamam!”

²⁸ Ale Iesu mara mo unu na ima matea, la matavuso atu la mai isana. Iesu mo usira mara, “Ka rasua vara a pa eri vai kamim ha ruhu?”

La faramia lara, “He’e Moli.”

²⁹ Ale Iesu mo tikeli na matara mara, “Matan nomim rasua, i pa sohen isamim.”

³⁰ Ale la matavuso atu la kilau, pani Iesu mo retiroafoahaira vara la pa sopo mele vereea isan tea, ³¹ pani la malue la lo sorahia isana tamlohi tari sei la tapaira na jara tari atu.

Tamlohi Mengo Mo Retireti

³² Iesu peresi na nona tamlohi la pa lo vano, ale vahatea purongo tamlohi hai la lavi na mengo matea mo mai isana mo mengo matan tanume sasati matea mo lo toho hinia. ³³ Ale Iesu mara mo tiu nafihi tanume sasati atu hinia, mengo atu mo retireti. Vao tavera atu la mafurahi tavera la lo vereea lara, “Mo sopo lo te hiniau sohen harihi i malue Israel mo tikeli nake.”

³⁴ Pani Pharisee la vereea lara, “Tamlohi tavera nona tanume sasati mo silea na suiha vara i tiu nafihi na tanume sasati sohen harihi.”

Iesu Mo Romopouira

³⁵ Ale Iesu mo vano mo lo vujangi na nora ima lotu na taon tari peresi na vanua tari atu. Mo retivujavujangi na Retifuhu

hin mauri atu God mo aulu hinia isara, ale mo vai la haratu la rojo peresi la haratu la majuejue mata rojoa la mele ruhu. ³⁶ Hin rani atu Iesu mo hite la vao tamlohi atu, mo romopoirā matan romira la jovi la sohena natu mafua. La sohena sipsip mo sopo te tavuira. *Num 27.17*

³⁷ Mo vereā isana nona tamlohi usuri mara, “Vua asitauni mo tavera jea, pani tamlohi isa la tupu visalete purongo. ³⁸ Ha usi tamlohi tavera atu sei mo aulu na asitauni vara i rule te tamlohi isa la vano na isana vara la vu na vua asitauni!”

10

Tamlohi Usuri Non Iesu (Mk 3.13–19; Lk 6.12–16)

¹ Ale Iesu mo tovi na nona tamlohi usuri mo sangavulu romana mo rua, mo silera na suiha vara la eri tiu na tanume lumiha sasati, ale vara la eri vai la haratu la rojo peresi la haratu la maemaema mata rojoa la sopo mele rojo. ² Hija vahafule non Iesu mo sangavulu romana mo rua enira nahai:

Simon, haratu la tovia Peter,
tasina Andrew,
ale James enia John natun Zebedee,

³ Philip,
Bartholomew,
Thomas,

Matthew haratu mo lo lavi na mania mata takis,
ale James natun Alphaeus,
Thaddeus,

⁴ Simon mara Cana sei, enia tamlohi matea mata valum mata jarana,
ale Judas Iscariot, haratu mo lo turuposi hin Iesu.

Mo Rule Na Nona Tamlohi (Mk 6.7–13; Lk 9.1–6)

⁵ Iesu mo fule la tupu sangavulu romana mo rua atu, mo retileu mara, “Ha toho asau na jara tamlohi rofoha, ale ha sopo unu hin te taon non Samaria hatea, ⁶ ha vano isana tamlohin Israel purongo matan enira la sohena vao sipsip natu mafua matea, ⁷ ale ha vano ha retivujavujangi vara suiha atu non God mata supe i pa pala nohorihi. ⁸ Ha vai mamahuni la haratu la rojo, ha sauteterahi na mate, ha vai na tamlohi lepros la vokevoke, ha tiu narihi na tanume sasati, matan ka lavi purongoi na suiha vara ha eri vai na hinau, ale ha sopo lavi te volimim matana isan tea. ⁹ Ha sopo lavi te mania na nomim tanga korohi, ¹⁰ ha sopo lavi te tanga mata nomim hahau, teni te ruru teni sabat teni te tihonimim tinapua hatea matan mo tataholo vara tamlohi jara la pa lo kilau kamim tamlohi voko. ¹¹ Ale vara sava taon teni vanua ka unu hinia, ha usira hinia vara sava tamlohi enia tamlohi la lo romaulu

hinia, ale ha pa toho peresia i tikeli rani atu ha mele malue hin jara atu. ¹² Vara ha unu hin te ima, ha sile na nomim lefuhu hinira. ¹³ Vara ka avulahi hin ima atu, ha sopo tinarihi na nomim lefuhu mata tamata, i pa lo toho isara, pani vara i vono, ha mele lavi narihi na nomim lefuhu mata tamata isara. ¹⁴ Vara tea mo rohu hin kamim teni vara la sopo tapurongo na nomim retisohai, ha malue hin ima atu teni taon atu, ale ha safsafahi narihi na tangotango palomim isara. ¹⁵ Varafuhu na vereā isamim, aria non taon akერი i pa tavera i jeu na aria non Sodom enia Gomorrah. *Gen 19.24–28*

Rani Rilangi La Pa Mai (Mk 13.9–13; Lk 21.12–17)

¹⁶ Ale nake natu, na lo rule kamim sohena natu sipsip isana vao viriu jala, matan haratu, ha pa tamlohi patuha, ale ha sopo vai te hinau i sati isara. ¹⁷ Ha lo kilau matan tamlohi la pa reve kamim na court, ale la pa tamaji kamim na nora ima lotu. ¹⁸ La pa reve tahitahi kamim ha vano isana tamlohi aulu peresi na supe na jara tinatinapua matan vara la pa ari kamim matakū, ale i pa sile na masapa vara ha vereuli na nomim rasua hiniāu isana tamlohi rofoha. ¹⁹ Pani vara tea mo taurilati kamim ha sopo matahu vara ha pa vere na sava, teni ha pa vereā sohena sava, matan hin rani atu ha pa lavi na sava retireti ha pa vereā, ²⁰ matan i pa sopo kamim ha pa retireti, pani Tanume Tapu sei mo tai isan Tamamim na tuka i pa vere kamim na sava ha pa vereā. ²¹ Vorai i pa turuposi hin voraina vara i mate. Tama i pa turuposi hin natuna. Natuvarihī la pa rohu hin tamara peresi na tinara matan vara la taura na mate. ²² Tamlohi tari la pa tipahi kamim matan ka lo rasuau, pani haratu mo turu rilangi mo tikeli na isoisona i pa juri. ²³ Vara la tipahi kamim na taon matea ha rovo ha vano na taon tinapua mo mariviti isana. Varafuhu na vereā isamim, ha pa sopo lo isoiso ralihi na taon tari Israel, ale Natun Tamlohi i pa mele mai isamim.

²⁴ Tamlohi usuri la sopo aulu la jeu na nora tija, ale slev la sopo aulu la jeu na nora tamlohi tavera. ²⁵ Tamlohi usuri matea i pa avulahi vara i sohen nona tija, ale slev i sohen nona tamlohi tavera. Enau na patu tamlohi tavera mata ima, pani la vereā vara patu tamlohi mata ima enia Beelzebul sei supe nona tanume sasati, ha lo levosahia vara la pa retisati hin kamim noku tamlohi.

Ha Sopo Matahu (Lk 12.2–7)

²⁶ Ha sopo matahunira. Mo sopo te hina luhu vara i pa sopo malue na jara tavera, ale hina luhu tari la pa pala na jara tavera. ²⁷ Ha vere na sava na vereā isamim na rofoha ha vereā na malarani; ale ha pa

retivujavujangi na jara tavera na sava na varavaramasa hinia isamim.

²⁸ Ha sopo matahuni na tamlohi sei la pa tipahi kamim. La eri vilimatei na epemim, pani la pa sopo eri komo na maurimim. Pani ha matahuni God, matan enia i eri komo na maurimim peresi na tarapemim na moruhapu. ²⁹ Tamlohi tari la levosahia vara ha eri voli te vakarakara i rua na selen matea purongo. Pani mo sopo te hatelete vara i jovi na lepa Tamamim na tuka mo sopo levosahia. ³⁰ Ale Tamamim mo levosahia vara vulu mo visa la lo toho na patumim. ³¹ Matan haratu, ha sopo matahu. Kamim ka aulu na nahon God ka jeu na vakarakara matuvana.

Ha Sorahi Iesu
(Lk 12.8–9)

³² Ale vara tea i vereea na naho tamlohi vara enia noku tamlohi, ale enau sohena a pa vereea isan Tamaku na tuka vara enia noku. ³³ Pani vara tea i vereea vara mo rohu hinia na naho tamlohi, a pa vereea na nahon Tamaku na tuka vara tamlohi atu mo rohu hiniau.

Rani La Pa Sati
(Lk 12.51–53; 14.26–27)

³⁴ Ha sopo romromia vara enau na mai na varama vara a sile na tamata. Na sopo mai vara a sile na tamata, pani matan vara a ase na tamlohi. ³⁵ Matan na mai vara a vai na tamlohi i pa rohu hin tamana, ale venatuna i pa rohu hin tinana, ale narou natirihia i pa rohu hin tinan tuana. *Mic 7.6*

³⁶ Nomim meresahi la pa tai na lolo vaomim. ³⁷ Haratu mo opoi tamana teni tinana teni na natuna peresi na venatun mo jeuau, enia mo sopo tataholo vara i mai noku tamlohi usuri. ³⁸ Na vereea vara te mo sopo soloti na nona talopeilopei i usuriau, enia mo sopo tataholo vara i mai noku tamlohi usuri.

³⁹ Vara tea mo opoi na maurina enia i pa vaitihaia, ale vara tea mo rohu na maurina matakau, enia i pa vilei na mauri varafuhu.

Volvoli Matan Tuka
(Mk 9.41)

⁴⁰ Haratu mo avulahi vara i lavi kamim, enia mo lo laviau, ale haratu mo laviau mo lavi haratu mo lo ruleau. ⁴¹ Haratu mo hitevosahi na pfovet matea, ale mo avulahi mo lavia, enia i pa lavi na volina sohena pfovet matea. Haratu mo hitevosahi na tamlohi tataholo matea, ale mo avulahi mo lavia, enia i pa lavi na otori sohen tamlohi tataholo atu. ⁴² Ale haratu mo hitevosahi na noku tamlohi usuri matea, ale mo silea na hina rihirihia matea sohena paniken wai hamafifi matea isana, varafuhu na

verea isamim, enia i pa lavi na nona otori matana.”

11

John Tamlohi Paptijo
(Lk 7.18–35)

¹ Iesu mara mo lo retileu isan la nona tamlohi usuri atu mo sangavulu romana mo rua moiso, mo malue mo vano falihia na nora taon tavera la lo toho hin jara atu vara i vujangira ale i retivujavujangira.

² John mo lo toho na ima rilangi, ale mara mo rongo na sava Kristo mo lo vaira, mo rule na nona tamlohi usuri hai isana, ³ vara la usia isana lara, “Engko sei natu, haratu sei kama pa lo kilau matana, haratu sei God i pa rulea i sinai? Teni kama pa mele saovi matan te mele tinapua?”

⁴ Iesu mo faramira mara, “Ha vano ha vere John na sava ka rongoa, ale ka hitea. ⁵ Nake, matavuso la kilau, ale tamlohi papao la hahau, haratu lepros mo hitira la mele vokevoke, peropero la rongo, haratu la mate la turu na mauri, ale tilavono la lo rongo na Retiruhu. *Isa 61.1* ⁶ Vara la haratu la sopo romrua hiniau, la pa avulahi tavera.”

⁷ Ale la tamlohi atu la pa lo tapulo malue, ale Iesu mo sorahi John isan vao atu mara, “Hin rani atu ka lo vano vara ha hita John, ka vano hin urata hasetoho atu vara ha hite te hinau sohena talu ere sei mo sopo rilangi, ale langi mo serea mo lo hisuhisu teni mata sava? ⁸ Sava tamlohi natu, ka vano vara ha hitea? Ka hite tamlohi atu mo ru te ruru fuhu? Ka levosahia vara tamlohi sei la lo ru na ruru sohen haratu enira la tamlohi tavitav purongo sei la lo toho na ima supe. ⁹ Ka lo vano vara ha hite na sava? Te pfovet matea? Varafuhu enia pfovet matea, enjora, pani mo jeu na pfovet, ¹⁰ Retiulia mo retireti hin John mara, ‘O lo levosahia vara,

a pa rule na noku vahafule matea i tiroma hiniho vara i tamamahuni na hinau matam.’ *Mal 3.1*

¹¹ Varafuhu na vereea isamim, mo sopo lo tea i vora hin varama nika i jeu John tamlohi paptijo. Pani haratu enia tamlohi purongo hin la haratu la lavi mauri atu God mo aulu hinia, enia i pa aulu i jeu John na pongi hitahu. ¹² Mo tapulo na rani non John tamlohi paptijo mo tikeli nake, tamlohi hai la lo opoia vara la tauri na suiha vara la aulu, ale vara la vere na masalon God vara mo vano sohena sava hin varama nika, ale tamlohi sasahati sohena la lo vaihitea vara la taurilati suiha atu, ¹³ matan pfovet tari peresi na Leu non Moses la lo retimangovi tuai moiso mo tikeli na rani non John. Vara ha evia ha pa levosahia vara i pa pala sohena sava. ¹⁴ Ale vara ka avulahi vara ha

rasua, John enia Elijah, p̄rovet atu ka lo kilau matana,¹⁵ haratu mo efi rongovosahia, o tapurongo!

¹⁶ Kamim nakerihi ka sohena natuvarihī sei la lo vai na roro na jara maket, ale la lo uloulo isara lara, ¹⁷ 'Kama roro na pue tangtangi, pani ka sopo velu! Kama lavi na vete mata ōmi na tamlohi mate, pani ka sopo tangtangi!' ¹⁸ Na vere harihi matan John tamlohi paptijo mo sopo vano falihī vara i lo hanhani teni i lo inuinu peresi na tamlohi, pani ka vara, 'Tamlohi sei tanume sasati matea mo lo toho hiniā!' ¹⁹ Ale Natun Tamlohi mo lo hahau falihī mo lo hanhani mo lo inu peresi na tamlohi, ale ka vara, 'Tamlohi sei mo lo hanhani, ale mo lo inu hajavua. Enia tapala tamlohi la lo lavi na mania mata takis peresi la haratu la hehe.' Vara ha sopo efi hitevosahi na lelevosahi kama lo vaia nake, ha pa efi hitevosahia na vuana hitahu."

Tamlohi Matuvana La Sopo Rasu Iesu
(Lk 10.13–15)

²⁰ Ale Iesu mo tapulo hapuhi la taon atu sei mo lo vai na hina maŋurahi tavera hinira matan tamlohi hinira la rohu vara la tinafihi na nora hehe la mai isan God, Iesu mo vereā mara, ²¹ "Kamim tamlohin Chorazin, ha pa lavi na talai sasati tavera, ale kamim tamlohin Bethsaida sohena, ha pa lavi na talai sasati tavera! Matan, vara la hina maŋurahi nike na vaira isamim na nomim taon la pa lo malue na taon non Tyre peresi Sidon, tamlohira la pete posi tuai moiso la vano isan God, ale la vujangia hin posposi matan tuai sei, la lo ru na parat paki, ale la tau na patmakovi na patura. *Ezek 26.1–28.26*

²² Pani na vereā isamim, na rani mata aria tamlohin Tyre enia Sidon la pa malue i malum i jeu kamim. ²³ Ale kamim tamlohin Capernaum ka ōmi vara God i pa tahe kamim ha tikeli na tuka? Mo vono, ha pa sivo atano na varama mata mateia! Vara la hina maŋurahi atu sei la lo malue na nomim taon la pa lo malue na taon non Sodom, nake taon atu mo pa lo turu! *Gen 19.24–28*

²⁴ Pani na vereā isamim, na rani mata aria tamlohin Sodom la pa malue i malum i jeu kamim."

Ha Mai Isaku Ha Mapu
(Lk 10.21–22)

²⁵ Ale hin rani atu Iesu mo vereā mara, "Enau na hasohasoho, Tamaku, Moli non tuka peresi na varama, matan ko jarohi la hinau tari nike isana tamlohi lelevosahi mata varama peresi na tamlohi la lavi na lelevosahi mata varama, pani ko vujangia isana tamlohi purongo. ²⁶ He'e Tamaku, matan harihi mo lo usuri na nom masalo ōmŋuhu.

²⁷ Tamaku mo sileau na hinau tari, ale mo sopo tea, pani enia hasena purongo mo levosahi Natuna. Ale haratu purongo mo levosahi Tama, enia Natuna peresi la haratu Natuna mo opoia vara i vujangia isara.

²⁸ Vara ka malokoloko matan nomim tetehi mo puhoni hajavua, ha mai isaku, ale a pa tueni kamim, ha pa lavi na mapu varaŋuhu. ²⁹ Ha lavi na noku vujangi, ha lavia na maurimim, ale ha levosahi na malele isaku. Enau na malum, enau na ōmatano, ale ha pa lavi na mapu varaŋuhu isaku. *Jer 6.16*

³⁰ Noku vujangi mo sopo puhoni, noku vavahinau mo salesale purongo."

12

Retiusia Mata Sabbath
(Mk 2.23–28; Lk 6.1–5)

¹ Na rani mata Sabbath matea, Iesu mo lo hahau roto te isa wit. Ale nona tamlohi usuri la lo tapulo vesi roto na wit, ale la lo hanira. *Deut 23.25*

² Pani Pharisee lara la hitera, la vereā isan Iesu lara, "O to kilau vano, nom tamlohi usuri la lo vai na hinau matea mo sopo tataholo vara la vaia na Sabbath."

³ Iesu mo vereā isara mara, "Korong ka sopo lo evi na sava David peresi la haratu la lo toho peresia la vaia na rani la marohati. *1 Sam 21.1–6* ⁴ Ale sohena sava mo unu hin ima ruru atu la lo lotu God ea, ale mo hani na pereti sei mo sopo tataholo vara enia teni nona tamlohi vara la hania matan enia mata p̄ris hasera?

Lev 24.9

⁵ Teni korong ka sopo lo evi na Leu sohena sava na rani Sabbath, na lolo ima lotu, p̄ris na Temple la lo tope na Sabbath matan la sopo mapu matan la lo vai mamahuni na nora vavahinau, pani la pa sopo ori matana? *Num 28.9–10* ⁶ Na vereā isamim, matea mo lo toho peresi kamim mo tavera jea na Temple. ⁷ Ale vara ha pa lo levosahi na raramin hinau sei, 'Na opoi na posposi ōmopoi, mo sopo malamalai!' Ha pa sopo ari la haratu la sopo ori. *Hos 6.6*

⁸ Matan Natun Tamlohi enia Moli mata Sabbath."

Vujangi Mata Posposi Ruhu
(Mk 3.1–6; Lk 6.6–11)

⁹ Mo malue hin jara atu mo vano mo unu na nora ima lotu ea. ¹⁰ Ale tamlohi matea mo lo toho atu limana mo kuti. Ale la tamlohi atu la usia isana lara, "O pa tope na leu vara o vai mamahuni te tinapua na Sabbath teni mo vono?" La usia sohena matan vara la pa tuvaia hiniā. ¹¹ Iesu mo vereā isara mara, "Hare vonamim matea pulana sipsip matea mo jovi hin te koko na

Sabbath, i pa sopo tauria i sau nafihi? ¹² Ka levosahia vara tamlohi mo aulu jea mo jeu na sipsip. Ale matana, mo ruhu vara fa vai na hina ruhu na Sabbath.” ¹³ Moiso, mo vereea isan tamlohi atu mara, “O firahi na limam.” Ale tamlohi atu mo firahia, ale mo ruhu sohena tapala limana. ¹⁴ Pani Pharisee la malue atu la matavuhi na jara matea vara la aleale malele matan vara la pa vilimatei Iesu hinia.

Iesu — Volitusi Non God

¹⁵ Pani Iesu mo levosahi na sava la lo vaia, ale mo malue hin jara atu. Vao tavera la usuria, ale mo vai mamahuni vevuhira na nora rojoa, ¹⁶ ale mo ritelue va la sopo vereuli na sava nakonako mo lo vaira. ¹⁷ Harihi, enia matan vara reti sei pfovet Isaiah mo vereea vara la pa masese mara, ¹⁸ ‘O kilau vano!

Noku volitusi sei enia noku viŋoni, enia haratu na opoi jea sei mapuku mo avulahi tavera hinia.

A pa tau na Tanumeku hinia, ale enia i pa vereuli

na noku posposi tataholo isana tamlohi foŋoha.

Isa 42.1–4

¹⁹ I pa sopo vas teni i ulo filangi, teni la pa sopo rongo

na leona vara i lo hase tahea na malele tavera.

²⁰ Enia i pa malum, i pa sopo kame

te ere sei mo mahope moiso, teni i pa sopo vuni

te vara kandelii,

i tikeli pongi atu vara

i pa vaitataholoi na hinau tari,

²¹ ale tamlohi foŋoha tinatinapu tari la pa lo romtoho na hijana.’

Iesu Mo Jeu Tiapolo

(Mk 3.20–30; Lk 11.14–23; 12.10)

²² Moiso, tamlohi hai la lavi na tamlohi matea tanume sasati matea mo unu hinia mo vaia mo matavuso mo mengo, ale la lavia mo mai isana, ale mo vai mamahunia vara i eri retireti, ale mo eri kilau. ²³ Moiso tamlohi tari la maŋurahi tavera hinia lara, “Korong haranike natu, enia mahapin David sei, haratu God mo viŋonia mata juriŋa teni mo vono?”

²⁴ Pani Pharisee lara la rongoa lara, “Tamlohi akerihi mo lo titiu nafihi na tanume sasati na liman Beelzebul, supe nona tanume sasati tari!”

²⁵ Matan Iesu mo levosahi na fomira mo vereea isara mara,

“Vara na lolo jara matea supe la lo aseasehira hinia, i pa maroe, ale i pa sopo te taon tavera teni te vao ima vara i lo aseasehia hasena i pa eri turu. ²⁶ Ale vara Setan mo lo titiu nafihi na tanume sasati, enia mo

lo aseasehia hasena. Ale jara atu mo lo tauri na suiha hinia i pa turu sohena sava?

²⁷ Ale vara enau na lo titiu nafihi na tanume sasati na suiham Beelzebul, ale na suiham hare natu te nomim tamlohi usuri la lo titiu nafihi hinia? Matan mo sohena, enira la pa ari kamim. ²⁸ Pani matan enau na lo titiu nafihi na tanume sasati na suiham Tanumen God, ale mo faramia vara suiha atu non God mata supe mo pete pala isamim moiso. ²⁹ Ale sohena sava natu, tea i eri unu na iman te tamlohi suiha hatea vara i vanaho te nona hinahinau hinia, pani vara mo sopo liholatia tiroma? Ale vara i liholatia i pa eri tivesi vevuhi na imana. ³⁰ Haratu mo sopo turu peresiau, enia mo lo hasena vaia mo meresahi isaku, ale haratu mo sopo reve takonahi na tamlohi peresiau, enia mo lo levuti jalajalaira.

³¹ Matana, na lo vereea isamim vara hehe tari peresi na reti sati hin God tari, God i pa fomira, pani vara tea mo vere lejileji na Tanumena vara enia Tiapolo sohen ka lo vaia, God i pa sopo eri romia. ³² Ale haratu mo lo vere lejileji Natun Tamlohi, God i pa romia, pani haratu mo lo vere lejileji Tanume Tapu, enia, God i pa sopo eri romia nake teni hin na pongi mo lo mai.

Nom Reti Mo Pisuhiho

(Lk 6.43–45)

³³ Vipahai matea o eri hite usuria na namana, o vai vipahai atu i ruhu, namana i pa ruhu, o vai vipahai atu i sati, namana la pa sasati. ³⁴ Kamim natu mata sasati! Ha pa eri vere te hinau ruhu sohena sava matan kamim ka sasati, matan sava ka lo vereea mo vujangi na sava mo lo toho na mapumim. ³⁵ Tamlohi ruhu matea mo pa lo vai na hina ruhu mata nona posposi ruhuruhu, ale tamlohi sasati matea mo pa lo vai na hina sati mata nona posposi sasati. ³⁶ Na vereea isamim, na rani tavera mata aria, tamlohi tari la pa farami na nora reti rongorongono vono tari sei la verera moiso, ³⁷ matan sava retireti ka verera, la pa vujangia vara ka tataholo na nahon God, ale matan sava retireti ka verera, la pa vujangia vara ka hehe na nahon God.”

Matamata Non Jonah

(Mk 8.11–12; Lk 11.29–32)

³⁸ Moiso tatua tamlohi vujangi mata leu peresi na Pharisee, la faramia lara, “Tija, kama opoia vara kama hite te matamata maŋurahi isam!”

³⁹ Pani Iesu mo faramira mara,

“Tamlohi nake, enira tamlohi sasati, la vaivaileu peresi na tinapua mo lahi moiso, la lo ale na matamata, pani matamata atu a pa silea isara enia sohen matamata atu God mo vaia hin pfovet Jonah. ⁴⁰ Sohen Jonah mo lo toho na lolo pangen maji tavera

atu rani mo tolu peresi na vutepongi mo tolu, enau sohena, Natun Tamlohi, a pa toho na lolo lepa mata rani i tolu peresi na vutepongi i tolu. ⁴¹ Mara Nineveh la pa sauteterahi na rani aria tavera peresi pina nike, ale la pa vereea vara mo hehe, matan enira la posi na maurira mata retivujavujangi non Jonah, pani ka levosahia, matea mo aulu jea hin Jonah mo lo toho nike, pani ka sopo rasua. *Jonah 3.5* ⁴² Vesupe matan Sheba i pa sauteterahi na rani aria tavera peresi pina nike, ale i pa sile na talai isana, matan enia mo mai na jara asau na varama vara i tapurongo na reti lelevosahi non Solomon, ale nake matea mo aulu mo jeu Solomon mo lo toho nike. *1 Ki 10.1–10*

Posposi Tanume Sasati
(Lk 11.24–26)

⁴³ Hin rani atu vara te tanume lumiha mo malue hin te tamlohi, mo lo vano roto na jara mamasa vara i vilei te jara mapu, pani mara mo sopo vilei tea, ⁴⁴ mo vereea mara, 'A pa mele hilu, a vano na ima na tai ea'. Ale mara mo pala mo tapai ima atu mo vuruvuru, mo hitea vara la tivesia, ale la tau tataholoi na hinu tari na jarara. ⁴⁵ Ale nake, mo vano vara i lavi na tanume lumiha tupu limaravrua tinapua sei la mele sati la jeua. La mai, ale la unu, la lo toho atu. Na lo vereea vara i pa sati jea isan tamlohi atu i jeu tiroma. Ale i pa sohen haratu isan pina sasati nike, sei la lo fohu hiniau!"

Tinan Iesu Peresi Na Tasina
(Mk 3.31–35; Lk 8.19–21)

⁴⁶ Mara mo pa lo retireti isana tamlohi, ale vahatea purongo, tinana peresi na tasina la lo turu na jingo ima, la lo usia vara la efi retireti peresia, ⁴⁷ ale tea mo vereea isana mara, "O kilau vano sevano, tinam peresi na tasim la turu na jingo ima, la opoia vara la retireti peresiho."

⁴⁸ Pani Iesu mo farami tamlohi atu mara, "Hare natu, enia tinaku? Ale hare natu, enia tasiku?" ⁴⁹ Mo firahi na limana mo vano tataholo isana nona tamlohi usuri mo vereea mara, "La haranike, enira tinaku peresi na tasiku! ⁵⁰ Matan hare mo lo vai na masalon Tamaku na tuka enia tasiku, vetasiku, ale tinaku."

13

Tamlohi Hapořahi Matea
(Mk 4.1–9; Lk 8.4–8)

¹ Hitahu hin rani atu, Iesu mo malue na ima, ale mo sivo mo sakele na pahisa tasi. ² Ale matan vao tavera la mai la lo turu porotia, Iesu mo vele na boti matea mo sakele hinia, ale vao tari sei la lo turu na oneone. ³ Moiso mo verera na hinu matuvana na titileu mara, "Tamlohi hapořahi matea mo vano vara i hapořahi te piri. ⁴ Mo

pa lo hapořahi na piri, tatuara la jovi na malele, ale maji avuavu la mai la hani vevuhira. ⁵ Tatua piri la jovi na vatuvatu, lepa mo tavinvin purongo, ale la tuvu vahatea matan mo tavinvin, ⁶ pani alo mara mo vele mo sulira, ale la mahoa matan la sopo wariha. ⁷ Tatua piri tinapua la jovi na livuha vipahai ngařngariha, ale la vipahai ngařngariha atu la ulua la punira. ⁸ Tatua piri tinapua la jovi na lepa fuhu la namaha, hai la tikeli vaha ngavu sangavulu (100) hai vaha ngavulu limarave (60) hai vaha ngavulu tolu (30) hin haratu mo lo hapořahira tiroma. ⁹ Haratu mo peroha i tapurongo!"

Retusia Matan Titileu Atu
(Mk 4.10–12; Lk 8.9–10)

¹⁰ Nona tamlohi usuri la mai la vereea isana lara, "Mata sava ko lo retireti na titileu isara?"

¹¹ Moiso mo faramira mara, "Isamim God mo majinga vara ha pa levosahi na hina luhu matan mauri atu God mo aulu hinia, pani isara, mo sopo majinga. ¹² Matan isan haratu mo lavi te lelevosahi na mapuna, God i pa sile na lelevosahi i lo masurere isana, pani isan haratu mo sopo te lelevosahi na mapuna, sava hinu mo rongoa, i pa tihai. ¹³ Na lo retireti na titileu isara matan harihi, matan la lo hitea, pani la pa sopo rongovosahia, la lo rongoa, pani la pa peropero, ale la pa sopo levosahia. ¹⁴ Varařuhu, sava Isaiah mo reti mangovia hinia moiso mo masese hinira vara,

'Ha pa rongoa,
pani ha pa sopo efi levosahia,
ale ha pa hitea,
pani ha pa sopo efi rongovosahia.
¹⁵ Matan mapura la mai la praprasa,
perora la peroputu,
ale matara la pelati,

matan vara la pa sopo hite na matara,
teni rongoa na perora,
ale la rongovosahi na mapura
matan vara la efi posi la mai isaku
matan vara a vai mamahuni
na mapura na nora rojoo.' *Isa 6.9–10*

¹⁶ Pani la matamim sei, la avulahi tavera mata sava la efi hitea, ale peromim la efi rongovosahi na sava la lo rongoa. ¹⁷ Varařuhu na vereea isamim, tuai pfovet matuvana peresi na tamlohi tataholo la opoia vara la efi hite na sava ka lo hitea, pani la sopo hitea, ale vara la rongoa na sava ka lo rongoa, pani la sopo rongoa.

Iesu Mo Vereuli Titileu Atu
(Mk 4.13–20; Lk 8.11–15)

¹⁸ Ha tapurongo na farami titileu matan tamlohi hapořahi atu: ¹⁹ Vara tea mo rongoa na reti matan mauri atu God mo aulu hinia, pani mapuna mo sopo levosahia, ale

Tiapolo mo mai mo reve naʻihi na sava mo lavoa na mapuna. Haranike enia piri sei mo lavoa na malele. ²⁰ Hin haratu mo lavoa na lepa filangi, haranike enia haratu sei mo rongo na Retiʻuru, ale vahatea purongo mo lavia na avulahi, ²¹ pani matan mo sopo te nona jara turu, mo turu makomona purongo, ale vara rani filangi mo mai teni la tipahia mata Retiʻuru, vahatea purongo i pa rovo na nona rasua. ²² Hin haratu mo lavoa na livuha vipahai ngaʻngaʻihi, enia haratu mo rongo na Retiʻuru, pani masalo mauri peresi na romʻfomi tavgav mo turuhoro na Retiʻuru, ale mo sopo namaha. ²³ Pani hin haratu mo hapoʻahia na lepa ruhu, enia haratu mo rongo na Retiʻuru, ale mo rongovosahia. Enia mo namaha mo tavera, hin tea i pa tikeli vaha ngavu sangavulu (100x) hai mo tikeli vaha ngavulu limarave (60x) ale hai mo tikeli vaha ngavulu tolu (30x) hin haratu mo lo lavoa.”

Titileu Mata Pongi Hitahu

²⁴ Mo mele verera na titileu tinapua matea mara, “Mauri atu God mo aulu hinia, mo sohena tamlohi matea mo lo hapoʻahi na piri ruhu na lolo isana, ²⁵ pani na rani nona tamlohi voko la juruvi romaliho, nona meresahi mo mai mo hapoʻahi na piri ruvu hin isa wit atu moiso mo mele rovo.

²⁶ Ale lara la tuvuvu, ale la namaha ruvu sohena la pala.

²⁷ Moiso volitusi non tamlohi tavera mata ima la mai isana lara, “Tamlohi tavera, avei, kama rom vara ko hapoʻahi na piri ruhu purongo na isam, pani sohena sava natu, ruvu la tuvuvu hinia?”

²⁸ Ale mo vere isara mara, “Noku meresahi matea mo vai hinau sei.”

Ale nona volitusi lara, “Ale ko opoia vara kama vano kama saputira?”

²⁹ Pani mo vere mara, “Mo vono! Mo sopo ruhu vara ha saputira matan ha pa efi saputi na wit peresira. ³⁰ Ha tinarihira la ulua jara matea vavano i tikeli na rani asitauni. Na rani asitauni a pa vere na tamlohi asitauni vara la saputi na ruvu tiroma, ale la otira matan vara la pa sulira, pani la pa takonahi na wit na noku ima wit.”

Pira Paka

(Mk 4.30–32; Lk 13.18–21)

³¹ Mo mele vere na titileu tinapua matea isara mara, “Mauri atu God mo aulu hinia mo sohena piri paka matea sei tamlohi matea mo lavia mo hapoʻahi na isana. ³² Piri atu enia mo rihirihiri mo jeu na piri tari, pani vara mo ulua, mo mai mo tavera mo jeu na vipahai tari, ale maji avuavu na masapa la mai la vai na taura na rangaranga.”

³³ Mo mele vere na titileu tinapua matea isara mara, “Mauri atu God mo aulu hinia mo sohena isi sei haʻai matea mo lavia, ale mo hoia na flava vavano isi sei mo vaia mo sohi.”

Mo Vujangira Na Titileu

(Mk 4.33–34)

³⁴ Hinau tari nika, Iesu mo vere isan vao atu na titileu: varafuhu, mo sopo vere te hinau hatea isara vara mo sopo vere na titileu. ³⁵ Harihi mo marivisi na sava pʻovet la vere tuai sei vara,

‘A pa vujangi na tamlohi na titileu,

a pa vereuli na sava la luhu

na tapulo varama mo tikeli nake.’

Psa 78.2

³⁶ Ale mo malue hin vao atu mo unu na ima. Moiso nona tamlohi usuri la mai isana lara, “O te vere mamahuni kamam na titileu mata ruvu hin isa atu.”

³⁷ Iesu mo faramira mara, “Haratu mo lo hapoʻahi na piri ruhu enia Natun Tamlohi. ³⁸ Isa sei enia varama, moiso piri ruhu enia la haratu sei la lavi mauri atu God mo aulu hinia, ale ruvu atu enia la haratu sei la tamlohi non haratu mo sasati, ³⁹ ale meresahi atu mo lo hapoʻahira, enia Tiapolo. Asitauni enia pongi hitahu, ale tamlohi asitauni enira angelo.

⁴⁰ Sohena la saputi na ruvu, ale la sulira na hapu, i pa sohena na pongi hitahu.

⁴¹ Natun Tamlohi i pa rula na nona angelo, ale la pa lavi naʻihi na hinau tari sei la lo vai na tamlohi la hehe peresi la haratu tarea la lo tope na leu na lolo jara sei enia mo aulu hinia, ⁴² ale la pa pulahira la sulira hin jara atu mata hapu. Hin jara atu, la pa tangi, ale la pa ngaʻngaʻfori na huʻura na rongohaji tavera. ⁴³ Moiso haratu la tataholo la pa mera sohena alo hin mauri atu na suihan Tamara. Haratu la peroha, ha tapurongo!

Titileu Mata Tavtav Matea

⁴⁴ Mauri atu God mo aulu hinia mo sohena tavgav tavera matea, tamlohi matea mo jarohia na lepa matea, ale tamlohi tinapua matea mo tapaia, ale mo mele tavuhoroa. Moiso mo avulahi tavera, mo vano mo haʻehi vevuhi na nona hinahinau matan vara i efi voli lepa atu.

Huʻrutavila Ruhuru Matea

⁴⁵ Ale mele vahatea, mauri atu God mo aulu hinia mo sohena tamlohi aʻeʻaʻehi matea mo lo aleale huʻrutavila ruhu, ⁴⁶ ale enia mo vilei na huʻrutavila matea mo ruhuruhea, mo vano mo haʻehi vevuhi na nona hinahinau, ale mo volia nona.

Titileu Mata Tara Matea

⁴⁷ Ale mele vahatea, mauri atu God mo aulu hinia mo sohena tara sei la pulahia na tasi, ale maji tinatinapua tari la kali hinia.

⁴⁸ Mara mo maʻiivi, tamlohi la reve hosohia, ale la sakele la viʻoni naʻihi na hina ruhu la sohonira na tanga, pani haratu la sati la pulahira. ⁴⁹ I pa sohena na pongi hitahu. Angelo la pa mai la asehi la haratu la sasati hin la haratu la tataholo, ⁵⁰ ale la pa pulahira na jara mata hapu. Hin jara atu, la pa tangi, ale la pa hatihati na huʻura.

⁵¹ Ka lo rongovosahi la hinau sei?”

La ʻaramia lara, “He’e.”

⁵² Ale mo vereea isara mara, “Ale matana, tamlohi vujangi mata leu tari sei la lavi na lelevosahi mata usuri mauri atu God mo aulu hinia, enira la pa sohena tamlohi tavera mata ima matea sei mo lavi naʻihi na nona tavitav vara i vujangira isana tamlohi, hina paro peresi na hina tuai.”

Mara Nazareth La Rohu Hinia

(Mk 6.1–6; Lk 4.16–30)

⁵³ Iesu mara mo isoiso hin la titileu atu, mo malue hin jara atu, ⁵⁴ mo mai na jarana mo vujangira na nora ima lotu, ale la maʻurahi hinia lara, “Tamlohi nike, mo lavi na nona lelevosahi epu, mo pa lavi na suiha vara i vai na hina ruhuʻuru epu? ⁵⁵ Pani enia mo sopo natun tamlohi tapatu atu? Ale tinana la tovia Mary, ale tasina sei, James, Joseph, Simon peresi Judas. ⁵⁶ Ale vetasina tari la lo toho peresiʻa nike, sava jara natu, tamlohi nike mo pa lavi na suiha vara i vai la hinau sei hinia?”

⁵⁷ Ale la lo rohu hinia, pani Iesu mo vereea isara mara, “Pʻrovet matea i pa sopo efi lavi na ooloo la jarana teni na lolo imana.”

⁵⁸ Ale mo sopo vai te hina ruhuʻuru matuvana ea matan la sopo rasua.

14

John Tamlohi Paptijo Mo Mate

(Mk 6.14–29; Lk 9.7–9)

¹ Hin rani atu supe rihirihi Herod, mo rongo na roroan Iesu, ² ale mo vereea isana nona volitusi mara, “Haranike enia John tamlohi paptijo sei! Enia mo mele sauteterahi na mateia, ale mo efi vai la hina maʻurahi sei matana.” ³ Matan Herod natu, mo tauri John, ale mo pesia, ale mo taua na ima ʻilangi matan narouna Herodias, naroun tasina Philip, ⁴ matan John mo lo vereea isana mara, “Mo sopo tataholo vara o lavia naroum.” ⁵ Hina purongo vara mo opoia vara i vilimateia, mo matahuni na tamlohi matan enira la rasua vara John enia pʻrovet matea.

⁶ Pani na rani pongi vora non Herod mo mai, venatun Herodias mo velu na naho vao ea mo vai Herod mo avulahi tavera, ⁷ matana, enia mo vai na retitauhi ʻilangi matea vara i pa silea na sava hinau mo usia isana. ⁸ Tinan haʻarihi atu mo retireti patuna, ale haʻarihi atu mo vereea mara,

“O silea na patun John tamlohi paptijo na pusa peleti.” ⁹ Supe Herod mo rongo mo sati, pani matan nona retitauhi na naho vao, mo retileu vara la vaia. ¹⁰ Mo ʻule na nona tamlohi la tai roto na ʻalou John na ima ʻilangi, ¹¹ ale la lavi na patuna na peleti matea la silea isan haʻarihi atu, ale mo lavia vano isan tinana. ¹² Tamlohi usuri non John la mai la lavi na tarapena, ale la tavunia, ale la vano la vereea isan Iesu.

Mo Vahani Na Vao Tamlohi

(Mk 6.30–44; Lk 9.10–17; Jn 6.1–14)

¹³ Iesu mara mo rongoa, mo malue mo vano mo vele na boti matea, mo vano na jara hasetoho matea vara i lo toho hasena. Pani na rani vao tamlohi lara la rongoa la malue na vanuara la hahau alea. ¹⁴ Mara mo sahe na jarauta, mo hite na vao tavera matea, ale mo romopoirā, ale mo vai mamahuni na nora tamlohi rojōa.

¹⁵ Ale mo lo ravravi nona tamlohi usuri la mai isana la vereea lara, “Jara nike, enia jara hasetoho matea, ale pongi mo lo mai. O ʻule vao sei la vano hin te vanua vara la voli te hara hinau matara hasera.”

¹⁶ Pani Iesu mo vereea mara, “Mo vono, la lo toho, kamim ha vahanira.”

¹⁷ La vereea isana lara, “Kama lo lavi na pereti mo lima purongo peresi na maji mo rua.”

¹⁸ Ale mo vereea isara mara, “Ha lavira la mai isaku.” ¹⁹ Ale mo retileu isan la vao atu vara la sakele na ruvuʻuvu, ale mo lavi la pereti atu mo lima peresi la maji atu mo rua, mo taʻa sahe aulu na tuka mo hasohaso God, ale mo vere meje matara, ale mo tope la pereti atu mo silea isana nona tamlohi usuri, ale nona tamlohi usuri la silea isan la vao atu. ²⁰ Tamlohi tari la hanhani la masu. La sohoni na sopo hanhani na tanga mo sangavulu ʻomana mo rua la maʻiivi. ²¹ Ale la haratu la lo hanhani enira mariviti i tikeli tari vaha lima (5,000) haratu la sopo evi na haʻai peresi na natuvarihī.

Iesu Mo Hahau Na Pusa Tasi

(Mk 6.45–52; Jn 6.15–21)

²² Vahatea purongo, mo aji na nona tamlohi usuri vara la vano tiroa hinia na tavul tasi, ale mo ʻule vao atu la vano karahi. ²³ Ale Iesu mara mo ʻule vao atu la vano moiso, mo vele sahe na vitutivi matan vara i usiisi enia hasena. Ravravi mo mai enia hasena mo lo toho atu, ²⁴ pani botira nakerihi mo vano asau moiso na jarauta, suhusuhu la lo vilia matan la lo songahi na langi.

²⁵ Ale majou rani mo lo vele, Iesu mo mai isara, mo hahau na pusa tasi. ²⁶ Pani na rani nona tamlohi usuri lara la hitea mo lo hahau na pusa tasi, la have na matara mo

tatavera lara, “Eh, tanume matea!” la ulo na tangi matan la matahu.

²⁷ Pani vahatea purongo Iesu mo reti isara mara, “Ha romfilangi! Enausei, ha sopo matahu!”

²⁸ Moiso Peter mo faramia mara, “Tija, vara engko sei, o retileu isaku vara a mai isan na pusa tasi.”

²⁹ Iesu mo vereia mara, “O mai!” Ale Peter mo malue na boti mo hahau na pusa tasi mo lo vano isan Iesu.

³⁰ Pani mara mo hite na langi mo sere filangi, ale mo matahu, mo tapulo marun na tasi, mo ulo mara, “Tija, o juriau!”

³¹ Vahatea purongo Iesu mo sohahi na limana, ale mo tauria, mo vereia isana mara, “Engko nom rasu mo rihirihahi hajavua, mata sava ko rom rua?” ³² Ale lara la mele vele na boti, langi atu mo moti.

³³ Haratu la lo toho na boti la lotua lara, “Vararuhu, engko Natun God!”

Tamlohi Rojo Gennesaret
(Mk 6.53–56)

³⁴ Ale lara la vano na tavalu tasi, la hoso na jara Gennesaret. ³⁵ Ale tamlohi hin jara atu lara la hitevosahia, la sohahi na reti mo falihahi jara atu vara la lavi na nora tamlohi rojoa tari la mai isana, ³⁶ ale la usia filangi vara la pa tikeli purongoi na pingo nona ruru. Ale enira mo isoiso atu sei la tikelia la ruhu.

15

Vujangi Nona Vajiahara
(Mk 7.1–13)

¹ Moiso, Pharisee peresi na tamlohi vujangi mata leu la mai isan Iesu la tai Jerusalem lara, ² “Mata sava nom tamlohi usuri la lo tope na posposi nona vajiaha matan tuai? Matan enira la sopo hoje na limara tiroma moiso la pa hanhani.”

³ Iesu mo faramira mara, “Ale mata sava ka lo tope na retileu non God matan ka lo usuri na posposi tamlohi? ⁴ Matan God mo retileu mara, ‘O ooloo hin tamam peresi tinam!’ Ale mara, ‘Hare mo reti sati hin tamana teni tinana, i pa mate matana.’ *Exo 20.12; Exo 21.17* ⁵ Pani ka vereia kara, ‘Mo tataholo vara tea i vereia isan tamana enia tinana vara sava tuetueni vara i efi silea isara, mo pete silea isan God moiso.’ ⁶ Ale enia mo sopo sile na ooloo isan tamana matan haratu. Ale matan ka lo usuri na posposi tamlohi, ka rohu na reti non God. ⁷ Kamim tamlohi tapnetano! Isaiiah mo retimangovi vararuhu hin kamim na rani mo vereia mara,

⁸ ‘La tamlohi nike, la lo ooloo hiniau na hurira purongo, pani mapura la lo toho asau hiniau;

⁹ la lo vai vono na nora lotu, la lo vujangi na nora retileu lara retileu non God.’” *Isa 29.13*

Tamlohi La Lumiha Mata Hehe
(Mk 7.14–23)

¹⁰ Ale Iesu mo tovi vao atu la mai isana mo vereia isara mara, “Ha tapurongo, ale ha levosahia! ¹¹ Sava mo unu na jingom mo sopo vaiho o lumiha, pani sava mo malue na jingom, enia mo vaiho ko lumiha.”

¹² Moiso nona tamlohi usuri la mai isana la vereia lara, “Avei, ko sopo levosahia vara Pharisee la rongom mo sati na sava ko lo vereia?”

¹³ Mo faramira mara, “Vipahahi tari haratu Tamaku na tuka mo sopo lavora i pa saputi nafihira. ¹⁴ Ha sopo sahara vano isara. Enira la matavuso. La lo tiroma na tamlohi, pani la matavuso. Vara matavuso i tiroma na matavuso, la pa jovi hin te moru.”

¹⁵ Pani Peter mo vereia isana mara, “O to vere mamahuni titileu sei isamam.”

¹⁶ Ale mo faramia mara, “Kamim sohena, ka sopo lo levosahi? ¹⁷ Ka sopo levosahia vara sava ka hania mo unu na pangemim, ale ka mele hoti hinia? ¹⁸ Pani reti mo lo malue na jingo mo tapulo malue na mapu tamlohi, ale harihi mo vai na tamlohi mo lumiha. ¹⁹ Matan hinau sohen harihi la lo malue na mapu tamlohi: romfomi sasati, vilimatei, vaivaileu peresi na tinapua mo lahi moiso, posposi lumiha, vavanaho, tuetueni halu, reti sati na hija tamlohi. ²⁰ La hinau sei la vai na tamlohi mo lumiha. Pani vara tea i hanhani peresi na limana mo sopo hojea, mo sopo vaia i lumiha.”

Rasua Non Harai Mara Cana
(Mk 7.24–30)

²¹ Ale Iesu mo malue hin jara atu, mo vano na jara tavera matan Tyre enia Sidon. ²² Ale vahatea hin jara atu, harai mara Cana matea mo pala mo lo tangi mara, “O romopoiiau Moli, mahapin David! Tanume sasati matea mo sohoni venatuku mo vai komokomoa!”

²³ Pani mo sopo faramia hin te reti hatea. Ale nona tamlohi usuri la mai la usia filangi isana lara, “O rulea i malue matan mo lo tangi usurifa.”

²⁴ Mo faramia mara, “Haratu mo ruleau, mo ruleau purongo mata sipsip matan Israel sei la jalio.”

²⁵ Pani harai atu mo mai mo papaohi na nahona mara, “Moli, o tueniau.”

²⁶ Ale Iesu mo faramia mara, “Mo sopo tataholo vara tea i lavi narihahi na pereti hana natuvarihahi i silea isana viriu.”*

* 15:26: Jew la tovi na tamlohi fofoha ‘viriu’.

²⁷ Haʻrai atu mara, “He’e Moli, pani viriu la lo hani na utauta pereti sei la lo jovjovi na tep non nora tamlohi taverna.”

²⁸ Moiso Iesu mo faramia mara, “Na vere, engko haʻrai matea, nom rasua mo taverna jea. I pa sohena sohen ko opoia.” Ale vahatea purongo, venatuna mo ruhu.

Rojoa Nona Tamlohi La Tihai

²⁹ Iesu mo mele vano mo hahau na pahisa tasin Galilee. Mo sahe aulu na vutivuti, ale mo lo sakele ea. ³⁰ Moiso vao taverna mo marivi la mai isana peresi na tamlohi hariju, matavuso, tamlohi papao, la haratu la mengo, ale vao matuvana tinapua, ale la taura na palona, moiso mo vai mamahunira, ³¹ ale vao atu romira mo sopo sakele matan mo vai na mengo la retireti, haratu la papao la ruhu, haratu la hariju la hahau, ale matavuso la kilau moiso vao atu la maʻurahi taverna matana, ale la sile na hasohaso isan God matan Israel.

Mo Vahani Na Vao Taverna (Mk 8.1–10)

³² Moiso Iesu mo tovi na nona tamlohi usuri la mai isana ale mara, “Enau na romopoi la vao nike, matan la lo toho peresiau mata rani mo tolu moiso, ale mo sopo te hara hinau, ale na sopo opoia vara a rulara la mule marohati, vara i vono la pa matemate na malelera.”

³³ Ale nona tamlohi usuri la vere isana lara, “Ra pa eri lavi te pereti i tataholo hin vao taverna nike na jara hasetoho sohen harihi epu?”

³⁴ Moiso Iesu mara, “Ka lo lavi na pereti mo visa?”

Lara, “Mo limaravrua peresi na maji vavarahi mo visalet purongo.”

³⁵ Moiso mo vere vao atu vara la saksakele na lepa, ³⁶ ale mo lavi la pereti atu mo limaravrua peresi na maji moiso, mo vere meje isan God, ale mo topera, ale mo silera isana nona tamlohi usuri, ale tamlohi usuri la silera isan la vao atu.

³⁷ Ale enira mo isoiso la hanhahi na masu. Moiso la sohoni na sope hanhahi na tanga mo limaravrua la marivi. ³⁸ Evi tamlohi purongo la hanhahi mo tikeli tari vaha vati (4,000) la sopo evi na haʻrai peresi na natuvarahi. ³⁹ Moiso hitahun haratu, mo rula la vao atu la mlemle, mo vele na boti matea, ale mo vano na jara Magadan.

16

La Opoi Na Matamata (Mk 8.11–13; Lk 12.54–56)

¹ Ale Pharisee peresi na Sadducee la mai isana vara la vaihitea. La usia vara i vujan-gira hin te matamata taverna matan na tuka.

² Iesu mo faramira mara, “Vara mo ravravi, kara ‘Taro i pa ruhu matan telangi

mo hahara!’ ³ Ale na falavuhu, ‘Taro i pa sati nohorih matan telangi mo hahara, ale mo fofoha!’ Ka lo levosahia vara taro i pa sohena sava matan ka lo kilau na masapa, pani ka sopo eri hitevosahi na matamata matan rani nike ka lo toho hinia? ⁴ Pina sasati nike, mo tamlohi vaivaileu, mo lo aleale matamata, pani i pa sopo lavi te matamata tinapua, pani matamata sei mo mase isan Jonah tuai.” Moiso mo malue isara mo vano.

Pharisee Peresi Na Sadducee (Mk 8.14–21)

⁵ Nona tamlohi usuri lara la kakau na tavalu tasi, la pa romromia vara la sopo lavi te pereti. ⁶ Ale Iesu mo vere isara mara, “Ha sopo romaliho vara ha lo kilau mata isi sasati nona Pharisee peresi na Sadducee.”

⁷ Moiso la tapulo sorahia isara hasera lara, “Eh, korong mo pa vere matan enfa ra sopo lavi te pereti teni?”

⁸ Pani Iesu mo levosahi na sava la lo vere, ale mo vere mara, “Kamim akerihi, nomim rasu mo rihirih hajavua. Mata sava ka lo sorahia isamim hasemim vara mo sopo te pereti? ⁹ Ka sopo lo levosahia? Ka mele romaliho hin la pereti atu mo lima matan vao atu mo tari vaha lima (5,000) ale ka sohoni na sope hanhahi na tanga mo visa hin rani atu? ¹⁰ Teni ka romaliho hin pereti atu mo limaravrua matan vao atu mo tari vaha vati (4,000) ale tanga mo visa ka lavia isara? ¹¹ Mo sohena sava natu, ka sopo levosahia vara enau na sopo retireti na pereti? Ha lo kilau na isi nona Pharisee peresi na Sadducee.”

¹² Ale la pa levosahia natu, vara mo sopo vere vara la lo kilau mata isi mata pereti, pani mata vujangi nona Pharisee peresi na Sadducee.

Iesu Enia Hare (Mk 8.27–30; Lk 9.18–21)

¹³ Ale na rani Iesu mo mai na jara matan Caesarea Philippi, mo usi na nona tamlohi usuri mara, “Kamim ka lo rong na tamlohi la lo vere vara Natun Tamlohi enia hare?”

¹⁴ Moiso lara, “Hai la lo vere vara John tamlohi paptijo, tatuara lara Elijah, ale hai lara Jeremiah teni vonan la poret atu matea.”

¹⁵ Mo vere isara mara, “Pani kamim ka lo vere vara enau hare?”

¹⁶ Simon Peter mo faramia mara, “Engko natu pa Kristo atu, Natun God sei mo mauri!”

¹⁷ Ale Iesu mo faramia mara, “Simon natun Jonah, God mo leruhu hiniho matan mo sopo tea hin varama nike i vujangia isam, pani Tamaku na tuka hasena mo vujangia isam. ¹⁸ Ale na vere isam, engko Peter sei faramin hijam enia vatu, ale hin

pulo vatu nike, a pa voro noku vao kaleisia, hina purongo vara suiha non varama mata mateia mo filangi, pani i pa sopo efi turuhoroa. ¹⁹ A pa sileho na kia matan mauri atu God mo aulu hinia, ale sava hinau ko horoa na varama, God na tuka mo horoa moiso, ale sava hinau ko tinafihia na varama, God na tuka mo tinafihia moiso.” ²⁰ Moiso, mo retileu isana nona tamlohi usuri vara la sopo sorahia isan tea vara enia natu, Křisto atu.

Iesu Mo Vere Na Nona Mate
(Mk 8.31–9.1; Lk 9.22–27)

²¹ Mo tapulo hin rani atu natu, Iesu mo tapulo vujangi na nona tamlohi usuri hinia vara enia i pa vano Jerusalem, ale i pa lavi na rongohaji isana tamlohi aulu peresi na moli nona prīs peresi na tamlohi vujangi mata leu, ale la pa vilimateia, ale hitahu na hatolu rani i pa mele turu.

²² Ale Peter mo tauri na limana mo revea vano hasena, mo reti filangi isana mara, “Moli, mo vono! Hinau atu i pa sopo efi masese isam!”

²³ Pani Iesu mo posi mo vereia isan Peter mara, “Setan, na sopo opoia vara a hiteho! Engko ko lo turuhoroau, matan engko ko sopo tau na fomim na hinahinau non God, pani na hinahinau nona tamlohi.”

²⁴ Moiso Iesu mo vereia isana nona tamlohi usuri mara, “Vara tea mo opoia vara i usuriau, i pa horo na masalona hasena, i lavi na nona talopeilopei, ale i usuriau.*

²⁵ Matan haratu mo opoi na maurina mo tavera jea, i pa vaitihaia, pani haratu mo rohu na maurina matakau, enia i pa tapai mauri varaŕuhu atu. ²⁶ Sava hinau mo fuhu isan te tamlohi vara i lavi na hinau tari na varama, pani i vaitihai na maurina? Teni sava hinau natu, tamlohi i efi silea vara i mele lavi na maurina? ²⁷ Matan Natun Tamlohi i pa mai peresi na nona angelo na hasohason Tamana, moise i pa voli tataholoi na tamlohi hatehateahi mata sava mo vaia na varama. *Psa 62.12; Rom 2.6*

²⁸ Varaŕuhu na vereia isamim, tatuamim la lo turu nike nakerihi, la pa sopo efi mate vavano la hite Natun Tamlohi i mai na nona suiha mata Supe.”

17

Epen Iesu Mo Posi
(Mk 9.2–13; Lk 9.28–36)

¹ Ale mele rani mo limarave tinapua mo vano moiso, Iesu mo lavi Peter, James peresi tasina John, mo tiromara la vele sahe aulu na vutivuti tavera matea la toho

hasera. ² Ale epen Iesu mo mai mo tinapua na nahora, nahona mo mera sohena alo, rurunu la lulu sohena malarani, ³ ale vahatea purongo, la hite Moses enia Elijah la pala la lo retireti peresi Iesu. ⁴ Moiso Peter mo vereia isan Iesu mara, “Tija, mo fuhu matan ŕa lo toho nike, vara ko opoia a pa vai te ima ruru i tolu akerihi, matea nom, matea non Moses, ale matea non Elijah.”

⁵ Mo pa lo retireti, ale vahatea purongo telangi mera matea mo hovira, moiso leo matea mo malue hin telangi atu mara, “Har- ihi enia Natuku fuhufuhu, na opoia mo tavera jea, ha tapurongo isana!” ⁶ Nona tamlohi usuri lara la rongo leo sei, la jovi na nahora na matahu tavera.

⁷ Pani Iesu mo mai mo tikelira mo vereia mara, “Ha turu, ha sopo matahu!” ⁸ Ale na rani la taŕa sahe la sopo mele hite tea, pani la hite Iesu hasena. ⁹ Ale la pa lo sevuti na vutivuti, Iesu mo retileu isara mara, “Ha sopo vere na sava ka hitea vavano i tikeli na rani Natun Tamlohi i mele turu na mateia.”

¹⁰ Ale tamlohi usuri la usia lara, “Ale mata sava tamlohi vujangi mata leu la lo vereia vara Elijah i pa mai tiroma?”

¹¹ Mo ŕaramira mara, “Elijah i pa mai, ale i pa tau mamahuni na hinau tari. ¹² Pani na vereia isamim vara Elijah mo pete pala moiso, ale la sopo hitevosahia, pani la vai masalora isana. Ale sohen haratu la pa sile na rani filangi isan Natun Tamlohi.” ¹³ Ale tamlohi usuri la pa rongovosahia natu, vara mo lo verera hin John tamlohi paptijo.

Uluvou Matea
(Mk 9.14–29; Lk 9.37–43a)

¹⁴ Ale lara la lo sevuti la mai isan vao atu, tamlohi matea mo mai isan Iesu mo papaohi na nahona, ¹⁵ mo vereia mara, “Moli, o fomopoi hin natuku matan enia mo lo matemate, ale tarea mo lo lavi na rongohaji tavera matan hin te rani mo lo jovi na hapu teni wai. ¹⁶ Na pete lavia mo mai isana nom tamlohi usuri moiso, pani la sopo efi vai mamahunia.”

¹⁷ Ale Iesu mo ŕaramia mara, “Kamim mo sopo te nomim rasu hatea, kamim pina lejileji matea, a pa mele toho peresi kamim rani i visa? Na sopo levosahia vara a pa lavi na puhon nomim hinau i tikeli pangisa? O lavia i mai isaku!” ¹⁸ Ale Iesu mo reti filangi isan tanume sasati atu, ale mo malue hinia, ale vahatea purongo natuna mo fuhu.

¹⁹ Moiso hitahu, tamlohi usuri la mai na tavaluna la usia lara, “Mata sava kama sopo efi levuti naŕihia?”

²⁰ Mo vereia isara mara, “Matan nomim rasua mo rihirihia! Varaŕuhu na vereia

* **16:24:** talopeilopei: Iesu mo vereia vara tamlohi rasua sei la sopo avulahi vara la turu rilangi na rani tamlohi la rohu hinira matan la lo usuri Iesu teni la lavi na rani filangi matan la lo ololo na nona reti, enira la sopo efi vereia vara enira nona tamlohi.

isamim, vara nomim rasua mo filangi so-hena piri paka matea, ha pa efi vereia isan vutivuti nike, vara 'O juhati o vano sevano!' Ale i pa juha. Ale sava natu, vara ha pa sopo efi vaia?

²¹ Ususi peresi na posposi tapuhoro na hanhani purongo i pa efi levuti nafihi na tanume sasati sohen harihi i malue."

Retireti Mata Nona Mateia
(Mk 9.30-32; Lk 9.43b-45)

²² Ale na rani la pa lo pulutahi Galilee, Iesu mo vereia isara mara, "Natun Tamlohi mariviti vara la turuposi hinia natu vara i vano na lima tamlohi,²³ ale la pa vilimateia, moiso i pa mele turu na hatolu rani." Ale la rongo mo sati tavera matana.

²⁴ Na rani la kakau Capernaum, haratu la lo lavi na makomo mania mata takis mata nora Temple la mai isan Peter lara, "Nom tija i pa voli na takis teni mo vono?"

²⁵ Ale Peter mo faramira mara, "He'e." Ale mo lo unu na ima, ale Iesu mo retireti tiroma isana mara, "Romim mo sohena sava Simon? Supe mata varama la lo lavi na takis isan hare? Isana natura teni isana tamlohi tinapua?"*

²⁶ Ale na rani Simon mo vereia mara, "Isana tinapua!" Iesu mo vereia isana mara, "Ale vara sohen haratu, natura la mater i na takis. ²⁷ Pani matan vara fa sopo komo na fomira, o sivo na tasi, o pulahi na nom asi revereve, ale sava maji mo kali hinia tiroma, o roi na vavana, ale o pa hite na mania matea mo tataholo mata voli takis nofa enra rua."

18

Hare Mo Aulu Jea
(Mk 9.33-37; Lk 9.46-48)

¹ Hin rani atu tamlohi usuri la mai isan Iesu lara, "Hare natu, enia i pa aulu jea hin mauri atu God mo aulu hinia?"

² Moiso mo tovi na natirih i matea vara i mai isana, ale mo turuhia na livuhara, ³ moiso mara, "Varafuhu na vereia isamim, vara ha sopo posi mai sohen natirih i nike, ha pa sopo efi levosahi mauri atu God mo aulu hinia. ⁴ Hare mo hase taua atano sohen natirih i nike, enia mo aulu jea hin mauri atu God mo aulu hinia. ⁵ Hare mo lavi te natirih i sohen harihi na hijaku, enia mo lo laviau, ⁶ pani vara tea mo vaitihai na rasua non te vonan la natuvarih i nike la rasuau, i pa mele fuhu jea isana vara la pesi te vat tavera na falona la putehia na tasi puaha.

Vaihite La Pa Mai
(Mk 9.42-48; Lk 17.1-2)

⁷ Rani sasati i pa jovi na varama matan rasua i pa tihai. Matan tarea hina vaihite

* **17:25:** Tamlohi hai la fomfomia vara natura nike, enira natun supe tataholo, ale la haratu la tamlohi tinapua enira la sopo vaon supe atu.

la pa lo mai, pani rani sasati isan haratu mo lo vaitihai na rasua nona tinapua. ⁸ Ale vara limam teni palom mo vaiho ko vano na hehe, o tai nafihi o pulahia. Mo mele fuhu jea vara o unu hin mauri atu o papao teni o hariju, mo jeu haratu vara la pulahiho peresi na limam mo rua teni palom mo rua hin hapu atu mo sopo te isoisona. ⁹ Ale vara matam mo vaiho ko lo vano na hehe, o julai nafihi o pulahia. Mo mele fuhu jea vara o unu hin mauri atu peresi na matam matelete, mo jeu haratu vara la pulahiho peresi na matam mo rua o vano hin hapu atu mo sopo te isoisona na moruhapu.

Sipsip Atu Mo Jalio Na Malele
(Lk 15.3-7)

¹⁰ Ha lo kilau ha sopo hitehilehi te vonan la natuvarih i nike, matan na vereia isamim vara tarea na tuka, nora angelo, la haratu la lo kilaura, Tamaku na tuka mo tinafihiha vara la efi turu na nahona matara.

Tavui Sipsip Matea

¹¹ Matan Natun Tamlohi mo mai vara i juri la haratu la jalio. ¹² Ale nomim kilakilau mo sohena sava? Vara tamlohi matea pulana sipsip mo ngav sangavulu (100) ale matea mo jalio, i pa sopo tau la haratu mo ngavulu limaravati mo limaravati (99) na pahisa vutivuti atu tako ale i ale haratu mo jalio teni i vono? ¹³ Ale vara mo tapaia, varafuhu na vereia isamim, mo avulahi tavera matana, mo jeu la haratu mo ngavulu limaravati mo limaravati sei la sopo jalio. ¹⁴ Mo sohena natu, mo sopo masalom Tamaku na tuka vara rasua non te vonan la natuvarih i nike i vano hina purongo.

Vara Tea Mo Hehe
(Lk 17.3)

¹⁵ Vara voraim mo vai te hehe isam, o vano o vere na nona hehe isana kamim rua hasemim. Vara mo tapurongo isam, voraim i pa mele tapalam. ¹⁶ Pani vara mo fohu vara i tapurongo, o lavi te hatea teni tupra rua tinapua la vano peresiho matan vara o pa efi turu na nora vereulia. *Deut 19.15* ¹⁷ Ale vara mo fohu vara i tapurongo hinira, o pa vereia isana vao kalesia. Ale vara mo fohu vara i tapurongo isana vao kalesia sohen tiroma, ale i pa sohena tamlohi fofoha isamim, ale ha fohu hinia sohena tamlohi fofoha matea teni haratu mo lo lavi na takis.

Tinarihia Teni Horoa

¹⁸ Varafuhu na vereia isamim, sava kamim kalesia ka lo horoa na varama, God na tuka mo horoa moiso, ale sava

ka tinarihia na varama, God na tuka mo tinarihia moiso.

¹⁹ Na mele vereia isamim vara te tupra rua na varama la majinga hin te hinau la usia, Tamaku na tuka i pa vaia sohena isara. ²⁰ Matan, vara te tupra rua teni tupu tolu la lo pulutahi na hijaku, enau na lo toho peresira.”

Romi Na Tinapua

²¹ Moiso Peter mo mai isana mo vereia mara, “Tija, vara voraiku mo vai na hehe isaku, a pa romi voraiku vaha visa? Vaha limaravrua teni mo vono?” ²² Iesu mo vereia isana mara, “O pa sopo romia vaha limaravrua (7x) purongo, pani vaha ngavulu limaravrua vaha limaravrua (70x7).” *Gen 4.24*

²³ Matan harihi, mauri atu God mo aulu hinia mo sohena supe matea mo opoia vara i tau mamahuni na ave non nona slev. ²⁴ Na rani mo tapulo tau mamahuni na ave, la lavi vonara matea mo mai isana, mo ave na mania matea mo tataholo na voli tamlohi mata rani mo tari vaha sangavulu (10,000). ²⁵ Ale matan i pa sopo eri voli narihia, nona tamlohi tavera mo retileu hinia vara la harehia peresi narouna tolu na natuna peresi na nona hinau tari vara i spai na nona mania hinia. ²⁶ Ale slev atu mo jovi na pauna, mo tangi mara, ‘O romperavu isaku, ale a pa voli vevuhi na noku ave tari isam!’ ²⁷ Ale tamlohi tavera non slev atu mo fomopoa, mo tinarihia vara i vano purongo, ale mo tinarihi na nona ave.

²⁸ Pani na rani pa slev atu mara mo malue, mo vano mo tapai na slev tinapua matea non tamlohi tavera atu, ale slev sei mo ave isana na mania mo tataholo na voli tamlohi matea mata rani mo ngav sangavulu (100) mo taurilatia, mo tapulo punia mara, ‘O voli na nom ave isaku!’ ²⁹ Ale slev atu mo jovi na pauna mo tangi isana mara, ‘O romperavu isaku, a pa voli narihi na noku ave isam.’ ³⁰ Pa slev atu, mo rohu hinia, ale mo vano mo taua na ima rilangi vara i lo toho atu i tikeli rani atu i voli narihi vevuhi na nona ave.

³¹ Na rani la tapalan slev atu lara la hite na sava mo vaia, la rongo mo sati tavera, la vano la vereuli na hinau tari isan nora tamlohi tavera atu. ³² Moiso nona tamlohi tavera mo tovi pa slev atu mo mai isana, mo vereia isana mara, ‘Engko ko slev sasati matea ko putu tataholo. Na tinarihi vevuhi na nom ave matan ko usia mo rilangi isaku. ³³ Ale ko sopo eri rompoi na tapalan slev sohen enau na fomopoiho?” ³⁴ Moiso nona tamlohi tavera atu mo lolokoru patuna, mo silea mo vano isana tamlohi ima rilangi vara i toho atu vavano i voli narihi vevuhi na nona ave. ³⁵ Tamaku na tuka i

pa vaia sohen harihi isamim isoisoi vara ha sopo romi vararuhu na voraimim peresi na vevoraimim na mapumim.”

19

Vujangi Mata Lahi (Mk 10.1–12)

¹ Ale Iesu mara mo vere la hinau atu mo isoisoi, mo malue Galilee mo unu na jara matan Judea na tavalu vano wai Jordan. ² Ale vao tavera la lo usuria, ale mo vai mamahuni na nora rojoea.

³ Pharisee la mai isana vara la vaihitea lara, “Mo tataholo usuri na leu vara tea i efi tipahi narouna matan te hinau?”

⁴ Pani Iesu mo raramira mara, “Ka sopo lo evia vara haratu mo vaira na pongi tiroma mo vaira lamane peresi na ha'ai.

Gen 1.27; 5.2

⁵ Ale mo vereia mara, ‘Ale matana, tamlohi i pa tinarihi tamana enia tinana, ale i so'otahi isan narouna, ale la pa epe matea?’ *Gen 2.24*

⁶ Ale matana, la pa sopo mele tamlohi mo rua, pani epe matea purongo. Ale sava God mo so'otahia jara matea, te tamlohi i pa sopo mele asehia.”

⁷ La vereia isana lara, “Mata sava natu, Moses mo retileu vara tea i eri sile na pepa mata rohu hin narouna matan vara i tipahi narouna?” *Deut 24.1–4; Mt 5.31*

⁸ Mo vereia isara mara, “Moses mo tinarihia vara ha pa eri tipahi na naroumim matan mapumim tamlohi hin Israel la rilangi, pani na pongi tiroma mo sopo sohena. ⁹ Ale na lo vereia isamim vara tea mo tipahi narouna, pani mo sopo matan te hinau tinapua, pani mata mo vaivaileu peresi te tinapua, ale vara haratu mo tipahia mo lahi na tinapua, enia mo vaivaileu peresi ha'ai atu.”

¹⁰ Nona tamlohi usuri la vereia isana lara, “Vara mo sohena natu, isana tamlohi matea peresi narouna, i pa mele ruhu jea vara tea i sopo lahi.”

¹¹ Pani mo vereia isara mara, “Mo sopo tamlohi tari sei la pa eri lavi reti sei, pani haratu purongo sei God mo tinarihira vara la lavi reti sei. ¹² Matan, te tamlohi la vora la povota moiso, ale tea tamlohi la votaira, ale tea la sopo lahi matan la hase tapuhira matan mauri atu God mo aulu hinia. Haratu mo efi lavi reti nike, i lavia.”

Natuvarihia La Mai Isana

(Mk 10.13–16; Lk 18.15–17)

¹³ Ale tamlohi la lavi na natura la mai isana vara i tau na limana isara i usiusi matara, pani tamlohi usuri la reti rilangi isara, ¹⁴ pani Iesu mara, “Ha tinarihi na natuvarihia la mai isaku, ha sopo horora matan la haratu la sohera la pa lavi mauri

atu God mo aulu hinia.”¹⁵ Ale mo leʻuhū hinira mo tau na limana hinira moiso mo malue hin jara atu.

Tamlohi Tavitav Matea
(*Mk 10.17–31; Lk 18.18–30*)

¹⁶ Ale hin rani atu, tamlohi matea mo mai isana mara, “Tija, sava hina ʻuhū natu, vara a vaia a pa lavi na mauri tui matana?”

¹⁷ Ale Iesu mo vereā isana mara, “Mata sava ko lo usiau na sava mo ʻuhū? God purongo enia mo ʻuhū. Vara ko opoia vara o lavi na mauri, o toho usuri na retileu.”

¹⁸ Ale mo usia isana mara, “Sahara nakonako?”

Iesu mo vereā mara, “O sopo vilimatei na tamlohi, o sopo vaivaileu peresi na tinapua mo lahi, o sopo vavanaho, o sopo tuetuēni na halu non tea,¹⁹ o ololo hin tamam enia tinam moiso’, *Deut 5.16* ale ‘O opoi na tinapua sohen ko lo opoiho hasem.’” *Lev 19.18*

²⁰ Uluvou atu mo vereā mara, “La hinau tari sei na lo vaira moiso, pani sava natu, na sopo lo vaia?”

²¹ Iesu mo vere isana mara, “Vara o pa tataholo i ʻuhū, o vano, o hafehi vevuhi na nom tavitav, ale o sile na volina isana tamlohi tilavono, ale o pa lavi na tavitav na tuka; ale o mai, o usuriau.”²² Pa tamlohi atu mara mo rongō retireti atu, mo malue, ʻomina mo sati matan nona tavitav mo tavera jea.

²³ Moiso Iesu mo vereā isana nona tamlohi usuri mara, “Varafuhu na vereā isamim, mo filangi jea vara tamlohi tavitav matea i efi lavi mauri atu God mo aulu hinia.”²⁴ A mele vereā isamim, vara i pa mele malum jea isana camel matea vara i majoʻole na koko niteli, mo jeu na tamlohi tavitav matea vara i efi lavi mauri atu God mo aulu hinia.”

²⁵ Tamlohi usuri lara la rongō reti sei, la maʻurahi tavera lara, “Hare natu, i pa efi juri?”*

²⁶ Pani Iesu mo kilau vano isara mara, “Isana tamlohi hinau atu i pa sopo te malelena, pani isan God hinau tari la maleleha.”

²⁷ Moiso Peter mo ʻaramia mara, “Ko hitea, kamam kama tinarihi vevuhi na nomam hinau tari, ale kama usuriho. Sava natu, i pa nomam?”

²⁸ Ale Iesu mo vereā isara mara, “Varafuhu na vereā isamim, hin varama paro atu vara Natun Tamlohi i sakele na nona jara sakele mata suiha merana mo tavera jea, kamim haratu ka lo usuriau ha pa sakele na jara sakele mata suiha mo sangavulu ʻomana mo rua, ha pa ari la

tavitavin Israel atu mo sangavulu ʻomana mo rua.”²⁹ Ale tamlohi tari sei la malue la tau na imara, teni voraira, teni vevoraira, teni tamara, teni tinara, teni natura, teni nora lepa mata hijaku, God i pa silera la pa mele lavia vaha ngav sangavulu (*100x*) hin haratu la taua, ale la pa lavi na mauri tui hitahu,³⁰ pani tamlohi matuvana nake sei la lo aulu, la pa sopo aulu hin pongi atu mo lo mai, pani la haratu la sopo aulu nake, la pa aulu.”

20

Tamlohi Isa Grape

Ale Iesu mo lo vereā mara,

¹ “Ale mauri atu God mo aulu hinia mo sohen harihi: tamlohi tavera mata ima matea mo malue na ʻalavuhō jea matea vara i aleale tamlohi voko mata nona isa grape.”² Ale tamlohi voko la majinga vara la pa voko mata volvoli mata rani matea, moiso mo ʻulera la vano na nona isa grape.

³ Ale na matan alo mo limaravati na ʻalavuhō mo malue mo vano mo hite te tamlohi la lo toho purongo na jara maket,⁴ ale mo vereā isara mara, ‘Eh, kamim sohena, ha sivo na isa grape, ale a pa sile na sava mo tataholo vara ha pa lavia.’⁵ Moiso la malue la vano hin isa atu. Ale tamlohi atu mo mele aleale tamlohi sohen tiroma; mo mele malue na livuha rani tataholo, ale mo mele malue na matan alo mo tolu na ravravi atu.⁶ Ale na matan alo mo tikeli mo lima na ravravi hin rani atu, mo malue mo vano mo tapai te tamlohi la lo toho purongo, ale mo vereā isara mara, ‘Eh, mata sava ka lo turu purongo nike mo tikeli nakerihi?’

⁷ La vereā isana lara, ‘Mo sopo tea i usi kamam vara kama voko nona.’ Mo vereā isara mara, ‘Kamim sohena, ha vano na isa grape.’ Ale la vano.⁸ Ale na ravravi jea mo vereā isan nona patu tamlohi vara i tovi na tamlohi voko vara i silera na volira, ale vara i tapulo hin la haratu la pa voko hitahu, ale i sahe i tikeli la haratu la lo voko tiroma. *Lev 19.13; Deut 24.15*

⁹ Ale na rani la haratu mo tovara vara la voko na matan alo mo lima na ravravi la mai, mo silera hatehateahi na volira mo tataholo mata voli rani matea.¹⁰ Moiso na rani la haratu mo tovara tiroma na ʻalavuhō mata voko la mai, la lo ʻomfomia vara la pa lavi na mania i jeura, pani enira hatehateahi sohena, la lavi na volira mo tataholo mata voli rani matea.¹¹ Lara la lo lavia, la lo retireti vavarihi hin tamlohi tavera atu mata ima,¹² lara, ‘La haranike la pa mai hitahu la voko mata aoa matelete purongo,

* **19:25:** Tamlohi hin pongi atu la lo ʻomfomia lara God mo leʻuhū hin na tamlohi sei la tavitav, matan enira la tavitav. La hutura hin reti sei Iesu mo vereā matan enia mo vujangia vara i pa filangi jea vara tea i lavi mauri atu God mo aulu hinia.

ale ko volira sohemam sei, kama slev nom na alo tavera mo tikeli nakerihi.’

¹³ Pani mo ʔarami na vonara matea mara, ‘Tapala, na sopo vai te hinai i sati isam. Ko sopo majinga peresiau na volim mata rani matea teni mo vono?’ ¹⁴ O lavi na sava enia nom, ale o vano. Enau na opoia vara a sile na sava na silea isam i vano isan la haranike la pa voko hitahu. ¹⁵ Ko hitea mo sopo tataholo vara a vai na sava na noku mania sohen na opoia? Teni ko mereimerei matan posiku mo ʔuhu?’ ”

¹⁶ Ale Iesu mo mele vereea mara, “Vao atu nake sei la lo aulu, la pa sopo aulu hin pongi atu mo lo mai, pani la haratu la sopo aulu, la pa aulu.”

Mo Vere Na Nona Mateia

(Mk 10.32–34; Lk 18.31–34)

¹⁷ Ale na rani Iesu mo pa lo sahe Jerusalem, mo tovi la nona tamlohi usuri atu mo sangavulu ʔomana mo rua mo tovera vano na tavul malele, ale mo vereea isara mara, ¹⁸ “Ka hitea, ʔa lo sahe Jerusalem. Ale la pa turuposi hin Natun Tamlohi i pa vano na lima moli nona ʔʔis peresi na tamlohi vujangi mata leu, ale la pa sile na talai isana vara i mate, ¹⁹ ale la pa silea isana tamlohi ʔoʔoha vara la pa kerehia, ale la rupia na asi maja, ale vara la vosaea na talopeilopei, ale na hatolu rani i pa mele turu na mateia.”

Retiusia Matea

(Mk 10.35–45)

²⁰ Ale tinan la natun Zebedee, James enia John, mo mai isana tolu na natuna, ale mo papaohi na nahona vara i usia hin te hinai. ²¹ Ale Iesu mo vereea isana mara, “Ko opoi na sava?” Mo ʔaramia mara, “Na opoia vara la natuku nike mo rua la sakele na pahisam vara ko tauri na nom suiha, matea na matuam, ale matea na maraum.”

²² Iesu mo ʔaramira mara, “Kamim ka sopo levosahi na sava ka lo usia. Ha eʔi lavi na rani ʔilangi a pa lavia?”

La ʔaramia lara, “Enjora, kama eʔi lavia.”

²³ Mo vereea isara mara, “Ha pa lavi na sava a pa lavi, pani matan vara ha pa sakele na matuaku teni na marauku, enia mo sopo noku vara a pa majinga hinia, pani enia non la haratu sei, Tamaku mo tatamahunia matara moiso.”

²⁴ Ale na rani la tupu sangavulu tinapua atu lara la rongoa, la lolokoru hin la vorai atu mo rua. ²⁵ Pani Iesu mo tovera la mai isana, ale mo vereea mara, “Ka levosahia vara tamlohi aulu hin la haratu la tamlohi ʔoʔoha, la opoia tavera vara la pa lo aulu na nora tamlohi, ale ka levosahia sohena sava nora tamlohi tatavera la lo roro na nora suiha hinira. ²⁶ I pa sopo sohena isamim, pani hare mo opoia vara i aulu jea hin

kamim mo isoiso, enia i pa nomim volitusi, ²⁷ ale haratu mo opoia vara i pa tiromamim, enia i pa nomim slev, ²⁸ mo sohena natu, Natun Tamlohi mo sopo sinai vara tamlohi la volitusi isana, mo vono, mo sinai vara enia i volitusi, ale vara i sile na maurina vara i volituhu na matuvana.”

Tamlohi Matavuso Mo Rua

(Mk 10.46–52; Lk 18.35–43)

²⁹ Ale lara la lo malue Jericho, vao tavera matea la usuria. ³⁰ Ale hin rani atu tamlohi matavuso mo rua la lo sakele na pahisa malele, ale lara la rongoa vara Iesu mo lo hahau na malele mariviti atu, la ulu aulu lara, “Moli, o ʔomopoi kamam, Natun David!” ³¹ Vao atu la merusahira vara la toho malum, pani la mele ulu aulu mo tavera jea lara, “Moli, o ʔomopoi kamam, Natun David!”

³² Iesu mo turu, ale mo tovera la mai isana mara, “Ka opoi vara a vai na sava isamim?”

³³ La vereea isana lara, “Moli, kama opoia vara matamam la kilau.” ³⁴ Moiso Iesu mo ʔomopoi, mo tikeli na matara, ale vahatea purongo la eʔi hite, ale la usuria.

21

Iesu Mo Unu Jerusalem

(Mk 11.1–11; Lk 19.28–38; Jn 12.12–19)

¹ Ale lara la lo mai mariviti hin Jerusalem, la kakau taon sei Bethphage na pahisa Vuti talu Olive, moiso Iesu mo ʔule na tamlohi usuri mo rua, ² mo vereea isara mara, “Ha vano hin vanua aturihi, ale vara ka lo unu ha pa hite na donki matea peresi natuna la lasira ea. Ha uli naʔihira, ale ha lavira la mai isaku. ³ Ale, vara tea mo vere te hinai isamim matana, ha pa vereea vara, ‘Nomam tamlohi tavera mo opoira!’ ale vahatea i pa ʔulera la mai.” ⁴ Harihi sei, mo malue sohena matan vara sava hinai ʔrovot mo vereea moiso i pa masese sei mara,

⁵ ‘Ha vereea isan la haratu la lo toho Zion vara:

Nomim Supe mo lo mai isamim, mo ʔommalum, ale mo lo sakele na donki matea, ale ha kilau vano, donki sei mo lo sakele hinia enia natu donki matea!’ *Zec 9.9*

⁶ Ale la tamlohi usuri atu mo rua la vano la vai na sava Iesu mo vereea isara moiso.

⁷ La lavi donki atu peresi na natuna, la tatavu na haʔin la donki atu na nora ruru hai, ale Iesu mo sakele hinira, ⁸ moiso, la vao tavera atu la vuʔangi na nora ruru na malele tavera atu, ale tatuara la tai na pere vipahai la vuʔangira hin malele atu. ⁹ Ale vao tavera atu la vano tiroma hinia peresi la haratu la lo usuria, la lo uloulo tavera lara, “Hasohaso God, matan natun David!”

“Ale lefuhu hinia sei

mo lo mai na hijan Moli God! ”

Psa 118.26

“Hasohaso i sahe isan God na tuka sei mo aulu jea!”

¹⁰ Ale na rani mo unu Jerusalem tamlohi tari hin taon tavera atu la hutura hinia, la lo vereea lara, “Hare nahai?”

¹¹ Ale vao tavera atu lara, “Tamlohi nike, enia p̄ovet Iesu, mara Nazareth hin Galilee.”

Iesu Mo Unu Na Temple

(Mk 11.15–19; Lk 19.45–48; Jn 2.13–22)

¹² Ale Iesu mo unu na Temple, moiso mo levuti la haratu la lo afeafehi peresi la haratu la lo volvoli na lolo Temple, moiso mo tipovi na tepel non la haratu la lo jenjen mania peresi na jara sakele non la haratu la lo harehi na vomahe.

¹³ Mo vereea isara mara, “Retiulia mo vereea vara, ‘Imaku la pa tovia ima usiusi.’ Pani kamim ka vaia mo mai jara luhu non la haratu sei la tatamahu moiso mata vili na tamlohi mata vavanaho.”

Isa 56.7; Jer 7.11

¹⁴ Moiso matavuso peresi na tamlohi papao la mai isana na lolo Temple, ale mo vai mamahunira. ¹⁵ Pani moli mata p̄ris peresi na hite na hina maʔurahi fuhufuhu mo lo vaira moiso, ale lara la mele rongo na natuvarihia la lo ulo aulu na Temple lara, “Hasohaso isan Natun David!” tamlohi tatavera atu la lolokoru. ¹⁶ Ale la vereea isana lara, “Ko rongo na sava la lo vereea?” Ale Iesu mo vereea isara mara, “He’e! Kamim ka sopo lo evia na Retiulia hin te rani vara, ‘God engko ko tatamahu na nom hasohaso vara i pa malue na jingo natuvarihia peresi na pipi?’ ”

Psa 8.2

¹⁷ Hitahun haratu, mo malue isara, mo malue Jerusalem mo vano na taon matan Bethany, ale mo juruvi atu.

Vipahai Fig Matea

(Mk 11.12–14, 20–24)

¹⁸ Na ʔalavuhu, mo lo hilu vano Jerusalem, ale mo rongo mo marohati. ¹⁹ Ale mo hite na pulo fig matea na pahisa malele, mo vano mariviti, pani mo sopo hite te vuana hinia, pani rauna purongo. Ale mo reti isana mara, “O pa sopo efi mele lavi te vuam hin te rani!” Ale vahatea purongo pulo fig atu mo mahoa.

²⁰ Na rani tamlohi usuri lara la hitea, la hutura lara, “Eh, mo sohena sava natu, pulo fig nike mo mahoa vahatelete purongo?”

²¹ Moiso Iesu mo ʔaramira mara, “Varaʔuhu na vereea isamim, vara te nomim rasua, ale ha sopo ʔom rua, kamim ha pa efi vaia sohen harihi na vaia isan pulo fig nike, ale ha pa efi vereea isan vutivuti nike, vara,

‘O hase sauho aulu, o pulahiho na lolo tasi!’ Ale i pa masese. ²² Ale sava ka lo usia na usiusi, ha pa lavia, vara te nomim rasua.”

Retiusia Mata Suiha Non Iesu

(Mk 11.27–33; Lk 20.1–8)

²³ Iesu mo unu na Temple, ale mara mo lo vujangi na tamlohi, moli mata p̄ris peresi na tamlohi aulu matan Jerusalem la mai isana vara la usi te retiusia isana lara, “Ko lo vai la hinau nike na suihan hare? Hare mo sileho hin suiha sei?”

²⁴ Iesu mo ʔaramira mara, “Enau sohena a pa usi kamim na retiusia matea, ale vara ha ʔaramiaiu, enau sohena a pa vereulia vara sava suiha nahai na lo vai la hinau sei hinia. ²⁵ Suiha atu John mo lo paptijo hinia mo tai epu? Mo tai na tuka, teni isana tamlohi?”

Ale la lo sorasorahia isara lara, “Vara ʔa vereea vara, ‘Mo tai na tuka!’ i pa vereea isaʔa vara, ‘Mata sava ka sopo rasua?’ ²⁶ Pani vara ʔa vereea vara, ‘Mo tai isana tamlohi purongo!’ vao nike la pa paruʔa matan enira la vereea vara John enia p̄ovet varaʔuhu matea non God.”

²⁷ Ale matana, la ʔarami Iesu lara, “Kama sopo levosahia.”

Ale Iesu mo vereea isara mara, “Enau sohena, a pa sopo vereuli kamim hinia vara sava suiha natu, na lo vai la hinau sei hinia.

²⁸ Ha to ʔomʔomia, tamlohi matea natuna mo rua. Ale mo vereea isan matea tiroma mara, ‘Natuku, o pa vano o voko na isa grape nohorihia.’

²⁹ Ale uluvou atu mo ʔaramia mara, ‘Na rohu!’ pani hitahu mo posi na ʔomina, ale mo vano.

³⁰ Ale mo mele vano isan natuna tinapua atu, mo vereea sohena. Ale mo ʔaramia mara, ‘A pa vano tatal!’ pani mo pa sopo vano. ³¹ Sahara hin la haratu mo rua mo vai na masalon tamana?”

Lara, “Haratu tiroma.”

Iesu mo vereea isara mara, “Enjora, varaʔuhu na vereea isamim, haratu la lo lavi na takis peresi na haʔai malele, la pa lavi mauri atu God mo aulu hinia tiroma hin kamim. ³² Matan John mo pala isamim mo vujangi na malele posposi tataholo non God, ale ka sopo rasua, pani haratu la lo lavi na takis peresi na haʔai malele la rasua. Hina purongo vara ka hitea, ka rohu vara ha posi na ʔomimim vara ha rasu.

Tamlohi Isa Sasati

(Mk 12.1–12; Lk 20.9–19)

³³ Ha mele tapurongo na titileu tinapua. Tamlohi tavera mata ima matea mo lavo na isa grape matea. Mo tiu na woʔa matea ʔalihia, ale mo heli na koko varavarasi grape matea, ale mo voro na ima aulu matea mata kilakilau, ale mo opoia vara tea

la pakaia, ale tamlohi hai la pakaia, moiso enia mo vano na jara tinapua matea mo vano asau. ³⁴ Ale taro asitauni mo lo mai mariviti, mo rüle na nona slev la vano isan la tamlohi atu la lo pakai isa atu vara la lavi na fungana. ³⁵ La tamlohi atu la tauri na nona slev, la tamaji matea, la vilimatei matea, ale la parumatei matea. ³⁶ Tamlohi tavera atu mo mele rüle na slev tinapua, evira mo jeu la haratu tiroma. Ale la tamlohi atu la vaia isara sohen la lo vaia tiroma.

³⁷ Na isoisona, mo rüle natuna mo vano isara mara, 'Korong la pa ooloo hin natuku!'

³⁸ Pani na rani la tamlohi atu lara la hite natuna, la vereia isara hasera lara, 'Nona korohi nakerihi. Ha mai, ra vilia, ale ra pa lavi na koruna.' ³⁹ Ale la tauria la pulahi nafihia hin isa atu, ale la vilimateia atu.

⁴⁰ Ale na usi kamim hinia vara na rani tamlohi isa atu i mele pala, i pa vai na sava isan la tamlohi atu la lo pakai na isana?"

⁴¹ La farami Iesu lara, "I pa vilimatei la tamlohi sasati atu na malele rilangi matea, ale i pa mele tinafhia isana tamlohi tinapua vara la pa pakai matana, ale la pa silea na vuana na rani asitauni."

⁴² Iesu mo vereia isara mara, "Enjora, ka sopo lo evi hinau nike na Retitapu hin te rani?"

'Vatu atu tamlohi voro ima la lo tipahia, enia mo mai tapulo pulo vatu mata ima, haranike Moli God mo vaia, ale mo ruhu jea matan ra efi hitea.'

Psa 118.22-23

⁴³ Matana, na lo vereia isamim, jara ooloo atu ka lo turu hinia isan God sei mo supe mo aulu hin kamim Jew hasemim purongo hinia, God i pa lavi nafihia ooloo sei isamim, i pa silea isana mara jara tinatinapua sei la pa vua na vua ruhu sei God mo opoia. ⁴⁴ Ale haratu mo lo tialahalaha hin vatu atu, vatu atu i pa putputia, ale vara vatu atu mo jovi hin tea i pa lomolomoa.'

⁴⁵ Na rani moli mata pris peresi na Pharisee lara la rongo titileu atu, la rongovosahia vahatea vara mo lo verera. ⁴⁶ Pani hina purongo vara la lo aleale malele vara la taurilatia hinia, la matahuni la vao atu matan vao atu la rasua vara enia pfovet matea.

22

Hanhani Tavera Nona Supe Matea (Lk 14.15-24)

¹ Ale Iesu mo mele vere na titileu hai isara mara, ² "Ale mauri atu God mo aulu hinia mo sohen harihi: Supe matea mo tatamahu na hanhani tavera matea mata lahi non natuna, ³ ale mo rüle na nona slev vara la vano la tovi la haratu sei la lo usira moiso vara la pa mai na hanhani tavera mata lahi sei, pani la rohu vara la

mai. ⁴ Ale mo mele rüle te slev tinapua, ale mo vereia isara mara, 'Ha vano isan la haratu ra usira tiroma, ha vereia isara vara la mai natu, matan na tatamahuni na noku hanhani moiso, ale ka hitea, la vili na pulaku buluk hai peresi na natu buluk hai sei la favisvis ruhu, hinau tari mo tatamahu moiso, ha mai na hanhani tavera mata lahi.' ⁵ Pani la sopo tapurongo isara, ale la malue, matea mo vano na isana, matea mo vano na nona stoa, ⁶ ale la hina tinapua atu la taurilati na nona slev la vailehilehira, ale la vilimateira.

⁷ Ale supe atu mo lolokoru, mo rüle na nona tamlohi vuro, ale la vano la vili la tamlohi atu la sopo juri, ale la suli jovjovi na nora taon tavera. ⁸ Ale mo vereia isana nona slev mara, 'Hanhani tavera mata lahi mo tatamahu moiso, pani haratu ra usira tiroma la sopo ruhu. ⁹ Ale matana, ha vano na malele tavera, ha usi na sava tamlohi ka tapaira ea vara la mai na hanhani tavera mata lahi.'

¹⁰ Moiso la slev atu la vano na malele, ale la tovi matavuhi na tamlohi sasati, peresi na tamlohi ruhu, haratu la tapaira, ale ima lahi atu mo marivi na tamlohi atu la lo usira. ¹¹ Pani na rani supe mo mai vara i hite la tamlohi atu la lo usira, mo hite na tamlohi matea atu mo sopo te nona ruru tataholo mata lahi. ¹² Ale mo vereia isana mara, 'Tapala, ko pa unu nike sohen sava matan mo sopo te nom ruru mata lahi?' Ale tamlohi atu nona hapu mo mate. ¹³ Moiso supe atu mo vereia isana nona slev mara, 'Ha pesi pulutahi na palona peresi na limana, ha pulahia hin jara rofoha atu mata talai. Hin jara atu la pa tangangi, ale la pa ngarngarori na hurura mata rongohaji ea.' ¹⁴ Matan God mo tovi na tamlohi matuvana, pani mo vifoni na tupu visalete purongo."

Voli Na Takis

(Mk 12.13-17; Lk 20.20-26)

¹⁵ Moiso Pharisee la vano la hatihia vara la pa vaihitea vara Iesu i kali hin te nona reti. ¹⁶ Ale la rüle na nora tamlohi usuri peresi na tamlohi non supe Herod la vano isana lara, "Tija kama levosahia vara engko ko lo varafuhu, ale ko lo vujangi na malele varafuhu mo usuri na masalon God mo tataholo, ale ko sopo romromi na fomi tamlohi purongo matan ko sopo tametame tea. ¹⁷ O to vere kamam hinia nakerihi vara mo tataholo vara tamlohi la voli na takis isana supe nona mara Rome teni mo vono?"

¹⁸ Pani matan Iesu mo levosahi na nora posposi vaisatihu na tinapua, mo vereia mara, "Kamim tapnetano, ka lo vaihiteau mata sava? ¹⁹ Ha to sileau hin te selen mata takis hatea." Ale la silea na selen mata takis matea. ²⁰ Moiso Iesu mo vereia isara mara,

“Ale ha to verea, niniun harepu peresi na hijana nahai?”

²¹ Lara, “Supe nona mara Rome.”

Ale mo verea isara mara, “Ale vara mo sohena, ha sile na hinau non supe nona mara Rome isan supe nona mara Rome, ale hinau non God isan God.” ²² Lara la rongoa sohena sava mo faramira sei mo fuhufuhu jea, la hutura hinia, ale la malue la rovo hinia.

Mauri Na Pongi Hitahu

(Mk 12.18–27; Lk 20.27–40)

²³ Rani atu mo pa lo vano, ale Sadducee la mai isana. Vao sei la verea vara mo sopo te sauteterahi, ale la usia na retiusia matea, ²⁴ lara, “Tija, Moses mara, ‘Vara te tamlohi mo mate mo sopo te natuna, tasina i pa lavi narouna mata i korohi te natun tavaina.’

Deut 25.5 ²⁵ Ale vorai mo limaravrua la lo toho nike isamam, ale vora tiroma mo lahi, ale mo mate, pani mo sopo te natuna. Vora usuria mo lavi narouna. ²⁶ Ale mo sohena isan nona vora usuria atu peresi na hatolura, mo sivo mo tikeli na halimaravruara. ²⁷ Hitahura, haʻai atu mo mate. ²⁸ Ale, hin pongi atu tamlohi la pa sauteterahi hinia, matan enira mo isoiso la lahi hin haʻai atu, i pa naroun sahara hinira?”

²⁹ Ale Iesu mo faramira mara, “Romimim mo sopo tataholo, matan ka sopo levosahi na Retitapu teni na suihan God. ³⁰ Matan na pongi hitahu na sauteterahi la pa sopo lahi teni la pa tulatulahi, pani la pa sohena angelo na tuka. ³¹ Ale hin vujangi sei mata sauteterahi, ka sopo lo evi na sava God mo verea isamim? ³² ‘Enau God non Abraham, God non Isaac, ale God non Jacob!’ God mo sopo verea vara enia God non la haratu la mate, pani non la haratu la mauri.” *Exo 3.6*

³³ Ale vao tavera atu lara la rongo na nona vujangi, la maʻurahi tavera hinia.

Retileu Mo Aulu Jea

(Mk 12.28–34; Lk 10.25–28)

³⁴ Pani Pharisee lara la rongoa vara Iesu mo vuni na hapu non la vao Sadducee atu, Pharisee la pulutahi, ale la mai isana. ³⁵ Ale vonara matea, enia tamlohi lelevosahi mata leu matea, ale mo usia na retiusia matea vara i vaihitea mara, ³⁶ “Tija, sava retileu natu, mo aulu mo jeu na retileu tari na Leu?”

³⁷ Ale Iesu mo verea isana mara, “ ‘O pa opoi Moli nom God vevuhi na mapum, na maurim, ale na nom fomfomi tari.’ *Deut 6.5* ³⁸ Harihi natu, enia retileu atu mo aulu jea mo tiromara. ³⁹ Haruana mo sohen harihi, ‘O opoi na tahisam sohen ko lo opoiho hasem’.

Lev 19.18

⁴⁰ Hin la retileu atu mo rua, vujangi tari mata Leu non Moses peresi na pʻovet la lo turu hinira.”

Natun David Enia Hare

(Mk 12.35–37; Lk 20.41–44)

⁴¹ Ale hin rani atu Pharisee la pa lo pulutahi jara matea, Iesu mo usira na retiusia matea, ⁴² mara, “Ha to vereau na romimim hin Kʻristo? Enia mahapin hare?”

Ale la verea isana lara, “Enia mahapin David.”

⁴³ Mo verea isara mara, “Mo sohena sava natu, David, na suihan Tanume fuhu mo tovia Moli mara,

⁴⁴ ‘Moli God mo verea isan noku Moli:

O sakele na matuaku na jara oloolo nike, i tikeli pongi atu a tau na nom meresahi na ruhuruhu palom.’

Psa 110.1

⁴⁵ Vara David mo tovia Moli, mo sohena sava natu, enia natun David?” ⁴⁶ Ale, te vonara hatea mo sopo eʻfi faramia hin te reti hatea, ale mo tapulo hin rani atu, mo sopo tea i fomʻrilingi vara i mele usi te retiusia isana.

23

Aria Mata Pongi Hitahu

(Mk 12.38–40; Lk 11.37–52; 20.45–47)

¹ Ale Iesu mo verea isan la vao atu peresi na nona tamlohi usuri mara,

² “Tamlohi vujangi mata leu peresi na Pharisee, enira natu, la haratu la lo vujangi na malele Retiulia sei Moses mo ulia vara mo lo vere na sava, ³ matana, mo fuhu vara ha vai na hinau tari la verea isamim, ale ha turu hinira, pani ha sopo vai na sava la lo vaira, matan la sopo vai na sava la lo retivu-javujangi hinira. ⁴ La lo opoia hajavua vara la tau na hinau puhoni na mauri tamlohi, pani la rohu vara la juhata na pulora vara la tuenira.

⁵ Hinau la lo vaira la vaira matan vara tamlohi la pa eʻfi hitera, sohen la lo vai na nora sope puku mata Retiulia sei la lo lasira na patura la mele tavera, ale la vai na nora revurevu ruru la mele peravu jea. *Deut 6.8* ⁶ Ale la opoia vara la lo sakele na jara sakele nona tamlohi tatavera na hanhani tavera, ale na jara sakele nona tamlohi aulu na lolo ima lotu, ⁷ ale la opoi na rani tamlohi la tovira vara ‘tija’ ale la opoi na rani tamlohi la sile na retioloolo isara na jara maket. ⁸ Pani kamim ha pa sopo lavi na hija tija matan nomim Tija enia matelete, ale kamim vorai peresi na vevorai. ⁹ Ale ha sopo tovi te tamlohi na varama, ‘Tama’ matan Tamamim enia matelete purongo na tuka. ¹⁰ Sohen haratu ha sopo lavi na hija ‘tija’ matan nomim Tija enia Kʻristo. ¹¹ Haratu mo aulu jea hin kamim, enia i pa

nomim volitusi. ¹² Haratu mo hase tahea sahe aulu hin kamim, God i pa taua sivo atano, haratu mo hase taua sivo atano, God i pa tahea sahe aulu.

¹³ Rani řilangi tavera i pa mai isamim tamlohi vujangi mata leu peresi kamim Pharisee, kamim ka tapnetano, matan ka lo pelatihoro na malele vara tamlohi la sopo eri lavi mauri atu God mo aulu hinia. Matan kamim hasemim ka sopo unu, ale ka lo turuhoro la haratu la opoia vara la unu hinia. ¹⁴⁻¹⁵ Rani řilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano, matan ka lo hahau rotoroto na jara peresi na tasi vara ha vai te tamlohi hatea mo sopo mahapin Abraham i lavi na nomim rasua, ale na rani mo mai sohena vonamim matea, ka vaia mo mai natu moruhapu matea mo mele sati jea mo jeu kamim.

¹⁶ Rani řilangi tavera i pa mai isamim ka tamlohi tatavera matavuso, ka lo vujangia kara, vara tea mo vere na nona retitauhi na hija Temple, ka vereea vara enia hina purongo, pani vara tea mo vere na nona retitauhi na gold mata Temple, haratu i pa mele fuhu vara i taurilati na nona retitauhi. ¹⁷ Ka matavuso rongorongono vono! Sava mo aulu jea? Gold teni Temple atu sei mo lo vai na gold mo tapu? ¹⁸ Ale ka lo vereea vara, vara tea mo vere na nona retitauhi na hija jara silesilea isan God, kara enia hina purongo, pani vara tea mo vere na nona retitauhi na nona silesilea, i pa mele fuhu vara i taurilati na nona retitauhi. ¹⁹ Ka tamlohi matavuso! Sava mo aulu jea? Silesilea teni jara silesilea atu sei mo lo vai na silesilea mo tapu? ²⁰ Ale haratu mo vere na nona retitauhi na hija jara silesilea, mo lo retitauhi na hinau tari hinia. ²¹ Moiso haratu mo lo vere na nona retitauhi na hija Temple, mo retitauhi na hijana peresi God atu mo lo toho hinia. ²² Ale haratu mo retitauhi hin tuka, mo lo retitauhi na jara sakele mata suiha non God peresi God sei mo lo sakele ea. *Isa 66.1*

²³ Rani řilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano. Kamim ka avulahi vara ha lo sile na nomim tithe na hinau sohena: solat, oke peresi na watakres, pani ka lo kilau purongoi na hinau aulu mata leu sohena: aria tataholo, řomopoia peresi na vai vevuhi na nomim retitauhi tarea. Ha vai la harihi la sopo aulu jea, pani ha sopo řomaliho hin la haratu la mele aulu jea na nahon God. *Lev 27.30*

²⁴ Ka tamlohi tatavera matavuso! Ka lo spuni nařihi na hina varihi la sati, pani ka lo řolomi jarohi na hina tavera la sasati!

²⁵ Rani řilangi tavera i pa mai isamim, tamlohi vujangi mata leu, peresi kamim

Pharisee. Kamim ka tapnetano, matan ka lo hoje na pahisa paniken peresi na peleti, pani na lolona mo mařivi na posposi hanmarua peresi posposi řomřomi hasemim. ²⁶ Ka Pharisee matavuso! Ha hoje na lolona paniken peresi na peleti tiroma matan vara pahisara la pa vokevoke.

²⁷ Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan kamim ka sohena ima taptap laem lulu, pani lolona mo mařivi na sui tamlohi peresi na lumira. ²⁸ Ale kamim sohena, la hite kamim sohen ka vokevoke, pani ka mařivi na tapnetano peresi na vaivaileu.

²⁹ Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan ka voro na ima taptap nona přovet, ale ka lakolako na taptap tamlohi tataholo na storera la ulia na tapura, ³⁰ kara, 'Vara kama pa lo toho na pongi non la nomam tata, kama pa sopo tuenira vara la vili na přovet.'

³¹ Ale matana, ka lo vereulia vara kamim ka natun la tamlohi atu la lo vili na přovet. ³² Ha vai mařivisi na sava tamamim la tapulona, ³³ ka sohena mata! Ka natu mata sasati. Ha pa juri kamim sohena sava na talai mata moruhapu? ³⁴ Matan haratu, a pa řule te přovet peresi te tamlohi lelevosahi tolu na tamlohi vujangi mata leu, tatuara ha pa vilimateira na talopeilopei, ale tatuara ha pa rupira na asi maja na nomim ima lotu, ale ha pa tipahira na taon tavera tari la pa vano ea, ³⁵ matan haratu i pa sohen harihi: kamim ha pa lavi na talai mata řae tari nona přovet tuai mo tapulo na řaen Abel, tamlohi tataholo atu, mo tikeli na řaen Zechariah natun Barachiah, haratu ka livia na livuha jara tapu na lolona Temple peresi na jara mata silesilea atu. *Gen 4.8; 2 Chron 24.20-21*

³⁶ Varařuhu na vereea isamim, la talai sei la pa pala isan pina nike."

Iesu Mo Tangisi Jerusalem (Lk 13.34-35)

Iesu mo mele vereea mara,

³⁷ "Jerusalem o Jerusalem, taon tavera sei tamlohi tatavera la lo vilimatei na přovet hinia, ale la lo parumatei la haratu God mo řulera isana. Ko sopo levosahia vara vaha visa moiso na opoia vara a hohovi na natum, sohena tina toa mo lo hohovi na natuna na ruhuru hapana, pani kamim tamlohi tatavera hinia ka rohu! ³⁸ Ko hitea, imam nike, i pa mai sohena jara hasetoho matea. *Jer 22.5*

³⁹ Matan na vereea isamim, ha pa sopo mele hiteau vavano i tikeli rani atu ha pa vereea vara, 'Leřuhu hin haratu mo lo mai na hijan Moli God!.' *Psa 118.26*

24

Temple I Pa Maroe (Mk 13.1–2; Lk 21.5–6)

¹ Hitahu, Iesu mara mo lo malue na Temple non Jerusalem, nona tamlohi usuri la mai isana vara la vereea vara la ima tavera atu la ruhu sohena sava. ² Pani Iesu mo raramira mara, “Ka hite la ima tari akerihi? Vara ruhu na vereea isamim vara i pa sopo te vatu hatea i pa lo toho aulu na vatu tinapua sei vara la pa sopo atu jovjovira!”

Rani Rilangi Tavera (Mk 13.3–13; Lk 21.7–19)

³ Hitahuna, Iesu mo lo sakele na vuti talu Olive, ale nona tamlohi usuri la mai fofo isana, la vereea lara, “O to vere kamam hinia vara sava matamata natu, kama pa lo kilau matana, vara kama pa levosahia vara nom mele mai peresi na pongi hitahu mo pala.”

⁴ Iesu mo raramira mara, “Ha lo kilau ha sopo tinafihi tea i halu kamim, ⁵ matan tamlohi matuvana la pa mai na hijaku la pa vereea vara enira natu pa Křisto atu, la pa tikau leji na tamlohi matuvana. ⁶ Ale ha pa rongo na vuro peresi na sorosarahi vuro, pani ha sopo matahu matan harihi natu, i pa mai tiroma, pani pongi hitahu mo sopo lo pala. ⁷ Mara jara tavera tinatinapu la pa meresahi hinira, ale supe matea i pa meresahi na supe tinapua. Marua tavera i pa mai, ale mihi i pa hisuhi na jara matuvana. ⁸ La hinau tari sei la sohena tapulo rongohaji na epe hafai vara i lavilavi.

⁹ Ale la pa tauri kamim ha vano na rani rilangi sati, la pa vilimatei kamim. Tamlohi tari na jara tavera na varama la pa hite-satihi kamim mata hijaku. ¹⁰ Vao tavera la pa tinafihi na nora rasua hin rani atu, ale la pa turuturuposi hinira, la pa hitesasati-hira. ¹¹ Ale pŕovet haluhalu matuvana la pa pala, la pa tikau leji na tamlohi matuvana. ¹² Ale matan vaivaileu i pa tavera jea, opoia nona tamlohi matuvana la pa tihai. ¹³ Pani harepu mo lo turu rilangi mo tikeli na pongi hitahu, i pa juri. ¹⁴ Ale tamlohi la pa retivujavujangi na Reti ruhu matan mauri atu God mo aulu hinia isana mara jara tinatinapua na varama matan vara la pa levosahia, moiso pongi hitahu i pa pala.

Hina Sasati Na Lolo Temple (Mk 13.14–23; Lk 21.20–24)

¹⁵ Vara ha hite hina lumiha sei God mo rohu hinia, haratu sei pŕovet Daniel mo lo vereea tuai moiso, vara mo turu na jara tapu na lolo Temple, hare mo lo evi reti nike i levosahi na faramina, Dan

^{9.27} ¹⁶ mo ruhu vara la haratu la lo toho Judea la rovo la sahe na vutivuti. ¹⁷ Mo ruhu vara haratu mo lo toho aulu na pusa imana i pa sopo sevuti sivo na lolona vara i lavi nafihi na nona hinahinau hinia, ¹⁸ Ale mo ruhu vara haratu mo lo voko na isa i pa sopo posi vara i ale na nona jaket. ¹⁹ I pa rani rilangi isana hafai sei la pangepange peresi la haratu la pa lo vasusui na nora pipi hin rani atu! ²⁰ Ha usiusi isan God vara nomim rovorovo i pa sopo jovi na taro hamariri teni na rani Sabbath. ²¹ Mo sopo lo te rani sohen rani rilangi tavera atu, mo tapulo na pongi tiroma mo tikeli nake, ale i pa sopo mele tea sohena hin te rani. Dan 12.1

²² Ale vara God i sopo lo vai la rani rilangi atu evira la mele vejuveju, i pa sopo te tamlohi hatea i pa mauri. Pani matan la haratu God mo viŕonira, enia i pa vai la rani atu evira la mele vejuveju.

²³ Moiso vara tea mo vereea mara, ‘Ha kilau mai nike! Křisto atu enia nahai, teni enia natu, sevano’ — mo vono, ha sopo rasua. ²⁴ Matan křisto haluhalu peresi na pŕovet haluhalu la pa pala, ale la pa vai na matamata tavera peresi na hinau maŕurahi, matan vara la vaihitea vara la eri tikau leji la haratu Moli mo viŕonira. ²⁵ Ka hitea, mo sopo lo ranina tataholo pani na lo vere kamim hinia moiso.

²⁶ Ale vara la vereea isamim lara, ‘Ha kilau vano, enia natuvano na jara tano koru!’ — ha sopo vano atu! Teni vara la vereea lara, ‘Ha kilau mai nike, enia nahai mo lo toho na lolo ima nike!’ — ha sopo rasua! ²⁷ Matan rani mata mele mai non Natun Tamlohi i pa mera sohena vaha sei mo vilasi, merana mo tai Opae mo sivo Marino. ²⁸ Vara ko hite na karai la lo avu vano hin te jara, o pa levosahia vara te pahai mo mena atu.*

Rani Atu Natun Tamlohi I Pa Mele Mai Hinia

(Mk 13.24–27; Lk 21.25–28)

²⁹ La hinau rilangi atu vara la vano moiso, ‘Vahatea purongo mera alo i pa tihai, vitu i pa sopo mele sile na memerana, vitusarasara la pa jovjovi na masapa, ale God i pa hutehi na suiha tari na tuka’.

Isa 13.10; Joel 2.10

³⁰ Ale matamata matan Natun Tamlohi i pa pala na masapa aulu, ale tavitavi tari mata varama la pa tangi mata matahu, moiso la pa hite Natun Tamlohi i pa lo mai na telangi matan tuka na nona suiha peresi na merana tavera. Dan 7.13; Zec 12.10–14 ³¹ I pa fule na nona angelo na tiv tavera

* **24:28:** Iesu mo vere na hija maji avuavu sei ‘vulture’. Enia posina mo sohena karai pani enira tamlohi mata ale na hinau mo mate mo ranga moiso. v. 28 Translesen tinapua matea: Vara ko hite na vulture la lo takonahi jara matea, o pa levosahia vara te hinau mo mate atu, ale sohen haratu, vara o hite la matamata sei la malue usuri na noku reti, o pa levosahia vara i pa sopo tuai Natun Tamlohi i pa mele pala.

mata trumpet matea, moiso la pa takonahi la haratu mo viŋonira ƒalihi na varama na jara tari na masapa aulu na varama.

*Vujangi Mata Vipahai Fig
(Mk 13.28–31; Lk 21.29–33)*

³² Ha lo levosahi na titileu mata vipahai fig: na rani rangana la lo sasaƒira, ha pa levosahia vara taro mamasa mo lo mai. ³³ Ale kamim sohena, vara ha hite la hinai nike, na lo vereea isamim la lo tapulo masese, ha pa levosahia vara Natun Tamlohi mo lo mai mariviti moiso, mo lo turu na matarua. ³⁴ Varaƒuhu na vereea isamim, vara pina nike sei mo lo mauri hin rani atu, la pa sopo eƒi tihai, vavano la hinai nike, la masese vevuhi tiroma. ³⁵ Tuka enia varama la pa tihai, pani noku reti la pa sopo eƒi tihai hin te rani.

*Tea Mo Sopo Levosahia
(Mk 13.32–37; Lk 17.26–30, 34–36)*

³⁶ Pani rani atu tea i pa sopo eƒi levosahia vara enia sava rani teni aoa natu. Mo sopo te angelo na tuka, teni Natuna, pani Tama hasena purongo mo levosahia.

³⁷ Hin rani atu Natun Tamlohi i pa mele mai, i pa sohena rani non Noah. *Gen 6.5–8*

³⁸ Matan sohen hin pongi atu tuai wai tavera mo sopo lo lolovi na varama, tamlohi la lo vai na hanhahi tavera, ale la lo vai na lahi, la lo tulatulah vavano Noah mo unu na Ark. ³⁹ Ale tamlohi la sopo levosahi na sava i pa mai mo sinai wai tatave tavera atu mo mai mo tivesi vevuhira. I pa sohen haratu hin pongi atu Natun Tamlohi i pa mele mai hinia. *Gen 7.6–24*

⁴⁰ Hin pongi atu, tamlohi mo rua la pa lo voko na isa, la pa lavi naƒihi matea, matea i pa lo toho. ⁴¹ Ale haƒai mo rua la pa lo visi na flaua, la pa lavi naƒihi matea, matea i pa lo toho. ⁴² Ale matan haratu, ha tatamahu! Ka sopo levosahia vara sava rani natu, nomim Moli i pa mele mai hinia.

⁴³ Ale ha lo levosahi hinai akerihi, vara tamlohi tavera mata ima matea i pa lo levosahi na sava aoa na vutepongi sei vara tamlohi vavanaho i pa mai hinia, i pa lo kilau, ale i pa sopo tinaƒihia vara i unu na imana. ⁴⁴ Ale matan haratu, kamim sohena ha tatamahu, matan ha pa sopo levosahi aoa atu Natun Tamlohi i pa mele mai hinia.

*Hare Enia Tamlohi Lelevosahi?
(Lk 12.35–48)*

⁴⁵ Harepu natu, enia sohen volitusi lelevosahi matea, ale mo lo ƒomturu ƒilangi tarea, vara nona tamlohi tavera mo viŋonia vara i lo kilau na vao volitusi na imana matan vara i sile na hara hinai isara na rani tataholo? ⁴⁶ Avulahi tavera isan volitusi atu mo lo vai na sava nona tamlohi tavera mo vereea hin rani atu vara i

mele mai. ⁴⁷ Varaƒuhu, na vereea isamim, tamlohi tavera atu i pa taua i aulu na nona hinahinau tari. ⁴⁸ Pani vara volitusi sasati matea mo lo hase ƒomƒomia vara, ‘Noku tamlohi tavera i pa sopo mai vila sei!’ ⁴⁹ Moiso mo tapulo tamaji na tatuana volitusi tinapua, ale mo lo hanhahi, ale mo inu peresi la haratu la lo sasaƒuhu. ⁵⁰ Nona tamlohi tavera atu i pa pala na rani teni aoa sei volitusi atu mo sopo levosahia vara i pa pala hinia, ⁵¹ ale i pa tai rotoa i taua peresi na tapnetano. Hin jara atu la pa tangtangi, ale la pa ngaƒngaƒori na huƒura mata rongohaji.”

25

Haƒai Maevo Mo Sangavulu

Iesu mo vereea mara,

¹ “Hin pongi atu, mauri atu God mo aulu hinia i pa sohen haƒai maevo mo sangavulu sei la lavi na nora lamu potele la vano vara la tapai na tamlohi i pa lahi. ² Mo lima hinira la rongorongo vono, ale mo lima la lelevosahi. ³ Matan la haratu la rongorongo vono lara la lavi na nora lamu potele, la sopo lavi te wel matara, ⁴ pani la haratu la lelevosahi la lavi na potele wel peresi na nora lamu potele. ⁵ Ale tamlohi vara i pa lahi mo sopo mai vila, ale la haƒai maevo tari atu la tapulo peka, ale la juruvi. ⁶ Pani na livuha vutepongi la rongo na leo matea mo ulo mara, ‘Tamlohi i pa lahi nahai. Ha mai ha tapania.’

⁷ Ale la haƒai maevo atu la kilau, ale la tai naƒihi na korukoru pingo ruru na nora lamu potele vara lamu la mele memera i ƒuhu. ⁸ Pani la haratu la rongorongo vono, la vereea isan la haratu la lelevosahi lara, ‘Ha sile te nomim wel makomona isamam matan nomam lamu potele la lo tapulo mate.’

⁹ Pani la haratu la lelevosahi la ƒaramira lara, ‘Wel mo sopo tataholo hiniƒa mo isoiso. Ha vano na stoa ha voli te nomim!’

¹⁰ Ale la pa lo vano vara la voli tea, tamlohi vara i pa lahi mo pala, ale la haratu la lo tatamahu la usuria la vano na hanhahi lahi, ale la pelatihoro na matarua. ¹¹ Mo sopo tuai la haƒai maevo tinapua atu la pala lara, ‘Tamlohi tavera! Tamlohi tavera, o roi isamam!’

¹² Pani mo ƒaramira mara, ‘Varaƒuhu na vereea isamim, na sopo levosahi kamim.’”

¹³ Iesu mo mele vereea mara, “Matan hinai atu ha tatamahu, matan ka sopo levosahia vara sava rani teni aoa Natun Tamlohi i pa mele mai hinia.”

*Slev Mo Tolu
(Lk 19.11–27)*

¹⁴ Mo mele vereea mara, “I pa sohena tamlohi matea mo vano na nona hahau matea.

Mo tovi na nona slev, ale mo tau na nona hinahinau na limara. ¹⁵ Isan matea, mo silea na selen mo lima. Selen matea hinira, mo tataholo mata voli tamlohi matea mata voko mata rani i tari vahatea (1,000). Ale isan matea mo sile na selen mo rua, ale isan matea mo sile na selen matea. Mo silea isara mo tataholo na nora eŕia, moiso mo malue mo vano na nona hahau. ¹⁶ Haratu mo lo sile na selen mo lima isana tiroma, mo vano vahatea mo voko peresia, ale mo mele tikeli na selen mo lima tinapua. ¹⁷ Haratu mo lo lavi na selen mo rua mo sohenā mo mele tikeli na selen mo rua tinapua. ¹⁸ Pani haratu sei mo lo lavi na selen matea, mo vano mo heli na koko matea na lepa mo tavuni jarohi mania atu non nona tamlohi tavera.

¹⁹ Rani matuvana la vano moiso, ale tamlohi tavera non la slev atu mo mele hilu vara i levosahia vara la vai na sava hin la mania atu. ²⁰ Ale haratu mo lo lavi na selen mo lima mo juha mai isana, mo lavi na selen mo lima tinapua hin la haratu mo lo lavira tiroma mo vereā mara, 'Tamlohi tavera, ko sileau na selen mo lima; ale na mele vai na selen mo lima tinapua.' ²¹ Ale nona tamlohi tavera mo vereā isana mara, 'Ko vai na voko ŕuhu. Ko ŕomturu ŕilangi na nom makomo hināu, ale nake a pa tauho o aulu na hināu mo maŕivi. O unu na avulahi tavera non nom tamlohi tavera.'

²² Ale haratu mo lo lavi na selen mo rua mo juha mai isana, mo lavi na selen mo rua tinapua hin la haratu mo lo lavira tiroma mo vereā mara, 'Tamlohi tavera, ko sileau na selen mo rua; ale na mele vai na selen mo rua tinapua.'

²³ Ale nona tamlohi tavera mo vereā isana mara, 'Ko vai na voko ŕuhu. Ko ŕomturu ŕilangi na nom makomo hināu, ale nake a pa tauho o aulu na hināu mo maŕivi. O unu na avulahi tavera non nom tamlohi tavera.'

²⁴ Ale haratu mo lo lavi na selen matea mo juha mai isana mo vereā mara, 'Tamlohi tavera, na levosahia vara engko tamlohi ŕilangi matea, ko lo lavi na vua pahai engko ko sopo lavoa. Ko lo takonahi na wit na jara engko ko sopo hapoŕahi tea ea, ²⁵ ale na matahu, na vano na jarohi na nom mania na lepa. Nahai, o mele lavi na sava enia nom.'

²⁶ Pani nona tamlohi tavera mo ŕaramia mara, 'Engko tamlohi sasati, ko slev maloko vari. Ko ŕomi vara enāu tamlohi ŕilangi matea, ale na lo lavi na vua pahai na sopo lavoa, ale na lo takonahi na wit na jara na sopo hapoŕahi tea ea? ²⁷ Vara mo sohenā, i pa mele ŕuhu jea vara o lo tau na mania isana tamlohi bank matan vara a mele pala a pa eŕi lavi na noku mania peresi haratu makomona bank i pa mele silea aulu na

noku mania.' ²⁸ Ale mo vereā isan te nona slev tinapua mara, 'Ha lavi naŕihi selen atu isana, ha silea isan haratu mo lavi na selen mo sangavulu, ²⁹ matan isan la haratu la lavi te hināu, la pa mele silera hin te hināu, ale i pa masurere isana. Pani isan haratu mo lekoleko, sava enia nona tiroma i pa lavi naŕihia. ³⁰ Ale ha pulahi slev atu mo sopo ŕuhu hin te hināu hatea i vano na jara ŕoŕoha. Hin jara atu la pa tangangi, ale la pa ngaŕngaŕori na huŕura mata hajhaji ea.'

Aria Tavera Mo Lo Mai

³¹ Na rani vara Natun Tamlohi i mai na nona sasarami peresi na angelo tari, hin rani atu natu i pa sakele na nona jara sakele mata suiha nona Supe. ³² Mara jara tinatinapua na varama la pa turu na nahona moiso i pa asera hatehateahi sohenā tavui sipsip matea mo lo ase na pulana sipsip na nani. ³³ Ale i pa tau na sipsip na matuana, ale nani na marauna. ³⁴ Ale i pa vereā isan la haratu na matuana vara, 'Ha mai, kamim sei Tamaku mo leŕuhu hin kamim! Ha lavi mauri atu God mo aulu hinia sei mo tau mamahunia matamim tuai tiroma moiso mo pa vai na varama. ³⁵ Matan na marohati ka sileau na hanhani, na maŕohu ka sileau na inu, enāu na vinano matea ka toviau na imamim, ³⁶ mo sopo te noku ruru ka sileau na ruru, na rojo ka mai ka rohiau, na lo toho na ima ŕilangi, ale ka mai ka hiteau.'

³⁷ Moiso la tamlohi tataholo atu la pa ŕaramia vara, 'Moli, nangisa kama hiteho ko marohati, ale kama vahaniho, teni ko maŕohu, ale kama sileho na wai? ³⁸ Ale nangisa natu, kama pa hiteho ko vinano, ale kama toviau na imamim, teni ko malamala, ale kama ruruho? ³⁹ Ale nangisa natu, kama hiteho ko rojo teni ko lo toho na ima ŕilangi, ale kama rohiho?'

⁴⁰ Ale Supe i pa ŕaramia, vara 'Varaŕuhu na vereā isamim, na rani ko vaia te hināu mo ŕuhu isan te voraiku teni te vevorai rihirihī hatea, ko lo vaia isaku.'

⁴¹ Ale i pa vereā isan la haratu na marauna vara, 'Ha malue na nahoku, kamim ka lo toho na ruhuruho lesati, ha unu na hapu matan tui tui atu na tatamahunia matan Tiapolo peresi na nona angelo sati, ⁴² matan na marohati, pani ka sopo sileau hin te hanhani, na maŕohu, pani ka sopo sileau hin te wai, ⁴³ enāu na vinano matea, pani ka sopo toviau na imamim, enāu na malamala, pani ka sopo ruruau, na rojo, ale ka sopo mai vara ha rohiau, ale na lo toho na ima ŕilangi, pani ka sopo mai isaku.'

⁴⁴ Ale enira sohenā la pa ŕaramia vara, 'Moli, nangisa natu, kama hiteho ko marohati, teni ko maŕohu, teni ko vinano matea, teni ko malamala, teni ko rojo teni ko lo toho na ima ŕilangi, ale kama sopo tueniho?'

⁴⁵ Ale i pa faramira vara, ‘Varaʻuhu na vereia isamim, matan ka sopo vai te hinau fuhu isan te voraiuku rihirihia hatea ka sopo vaia isaku.’ ⁴⁶ Ale la haratu, la pa vano la unu na talai matan tui tui, pani la haratu la tataholo la pa unu na mauri tui.’ ” *Dan 12.2*

26

La Opoia Vara Iesu I Mate

(*Mk 14.1–2; Lk 22.1–2; Jn 11.45–53*)

¹ Iesu mara mo vereia la hinau sei moiso mo vereia isana nona tamlohi usuri mara, ² “Ka levosahia vara rani mo rua mo lo toho moiso rani Passover i pa mai, ale la pa sile Natun Tamlohi vara la vosaea na talopeilopei.”

Exo 12.1–27

³ Hin rani atu moli mata pris peresi na tamlohi aulu nona tamlohi la pulutahi na ima tavera non pris aulu sei, hijana Caiaphas, ⁴ ale la hatihia jara matea vara la pa taurilati Iesu na malele halu vara la vilia.

⁵ Pani la vereia lara, “I pa sopo na livuha hanhani Passover, matan vara i vono, tamlohi la pa lolokoru tavera, ale ʻa sopo eʻi vaira la toho malum.”

Haʻai Matea Mo Sile Na Oloolo Tavera Isan Iesu

(*Mk 14.3–9; Jn 12.1–8*)

⁶ Ale hin rani atu Iesu mo lo toho Bethany na iman Simon, tamlohi lepros matea, ⁷ Iesu mo pa lo sakele na tepel ea, ale haʻai matea mo mai isana, mo lo tauri na potele hasori matea la tovia alabaster, volina mo tavera jea, ale mo rengia na patuna. ⁸ Nona tamlohi usuri lara la hitea la lolokoru lara, “Mata sava mo lo surei komokomoa? ⁹ Matan hinau sei o eʻi haʻehia mata mania tavera, ale o silea isana tilavono.”

¹⁰ Pani Iesu mo levosahi na sava la lo vereia, ale mo vereia isara mara, “Mata sava ka lo ari haʻai niki? Enia mo vai na hinau fuhufuhu matea isaku. ¹¹ Matan tilavono la pa lo toho peresi kamim tarea, pani enau a pa sopo toho peresi kamim tarea. *Deut 15.11*

¹² Enia mo surei hasori niki na epeku matan vara i tatamahuni na epeku mata noku tavuni. ¹³ Varaʻuhu na vereia isamim, sava jara Retiʻuhu la pa sorahia ea na varama, la pa sorahi na sava mo vaia vara tamlohi la pa mele romfomia.”

Judas Mo Turuposi Hin Iesu

(*Mk 14.10–11; Lk 22.3–6*)

¹⁴ Ale vonan la tupu sangavulu romana mo rua atu hijana Judas Iscariot mo vano isana moli mata pris, ¹⁵ mo vereia mara, “Ha pa sile na sava isaku vara a taua na limamim?” Ale la vuti la silea na silver selen mo ngavulu tolu. *Zec 11.12*

¹⁶ Moiso, mo tapulo hin rani atu mo tapulo aleale masapa vara i turuposi hinia.

Hanhani Mata Passover

(*Mk 14.12–21; Lk 22.7–13; Jn 13.21–30*)

¹⁷ Na rani tiroma mata hanhani tavera mata pereti mo sopo te isi hinia, tamlohi usuri la mai isan Iesu lara, “Ko opoia vara kama pa tatamahu epu vara o pa hani na Passover ea?”

¹⁸ Mo vereia mara, “Ha unu na taon tavera, ale ha hite na tamlohi matea, ale ha vereia isana vara, “Tija mo vereia mara, noku rani mo mai mariviti, a pa hani na hanhani mata Passover peresi na noku tamlohi usuri na imam.’” ¹⁹ Ale nona tamlohi usuri la vaia sohana mo vereia isara, ale la tatamahuni na hanhani Passover.

²⁰ Ale na ravravi mo sakele na tepel peresi la tamlohi usuri tupu sangavulu romana mo rua atu. ²¹ Ale la pa lo hanhani mo vereia mara, “Varaʻuhu na vereia isamim, vonamim matea i pa turuposi hiniau.”

²² La rongo mo sati, ale la tapulo vereia isana enira hatehateahi lara, “Tija, enau teni mo vono?”

²³ Mo faramia mara, “Matea mo lo seri na pereti peresia na pesin matea, i pa turuposi hiniau. *Psa 41.9*

²⁴ Natun Tamlohi i pa vano na malele mata matea sohen la ulia na Retiulia matana, pani rani rilangi tavera isan haratu mo lo turuposi hin Natun Tamlohi. I pa mele fuhu jea isana vara tamlohi atu i sopo vora.”

²⁵ Judas haratu sei i pa turuposi hinia mo faramia mara, “Tija, korong enau teni mo vono?”

Iesu mo vereia isana mara, “Engko ko hase vereho moiso.”

Isoison Hanhani Tavera Atu

(*Mk 14.22–26; Lk 22.14–23; 1Co 11.23–25*)

²⁶ Ale lara la lo hanhani, Iesu mo lavi na pereti mo topea mo vere meje isan God matana, ale mo silea isana nona tamlohi usuri, ale mara, “Ha lavia, ha hania, enia epeku.” ²⁷ Ale mo tauri na paniken matea, mara mo vere meje isan God, mo silea isara mara, “Ha inu hinia, kamim mo isoiso, ²⁸ matan harihi enia faeku mata retitauhi God mo vaia matan vara faeku i pa roro matan vara i romi na hehe nona tamlohi matuvana. *Exo 24.8; Jer 31.31–34*

²⁹ Na vere kamim hinia, enau a pa sopo mele inu waen niki i tikeli pongi atu a pa mele inua peresi kamim hin mauri atu Tamaku mo supe hinia.” ³⁰ Lara la lalavete na vete matea moiso la malue la sahe na Vuti talu Olive.

Retitauhi Non Peter

(*Mk 14.27–31; Lk 22.31–34; Jn 13.36–38*)

³¹ Ale Iesu mo vereea isara mara, “Kamim mo isoiso ha pa rovo hiniu nohorihina vutepongi. Matan la ulia na Retiulia moiso vara,

‘A pa vilijovi na tavui sipsip
ale sipsip la pa rovorovo.’ *Zec 13.7*

³² Pani hitahu na noku sauteterahi, a pa vano tiroma hin kamim Galilee.” *Mt 28.16*

³³ Peter mo faramia mara, “Vara enira mo isoiso la rovo hiniho, enau a pa sopo eri rovo hiniho.”

³⁴ Iesu mo vereea mara, “Varafuhu na vereea isam, hin vutepongi akerihina purongo, engko o pa vunvuniau vaha tolu, tiroma moiso toa vari i pa tarere.”

³⁵ Peter mo vereea isana mara, “Vara a pa mate peresiho, a pa sopo vunvuniho!” Nona tamlohi usuri mo isoiso la vereea sohena.

Iesu Mo Usiusi

(Mk 14.32–42; Lk 22.39–46)

³⁶ Moiso, Iesu mo vano peresira na jara matea hijana Gethsemane, ale mo vereea isana nona tamlohi usuri mara, “Ha sakele nike tako, a pa vano sevano a usiusi.”

³⁷ Moiso mo lavi Peter peresi la natun Zebedee atu mo rua John enia James, ale mo tapulo rongo mo sati, ale romina mo sopo sakele. ³⁸ Ale mo vereea isara mara, “Mapuku mo rongo mo sati tavera vara i mate. Ha lo toho nike, ha lo kilau peresiau.”

³⁹ Mo mele juha vano makomona, ale mo popovitoho na nahona na lepa, ale mo usiusi mara, “Tamaku, vara mo tataholo, o narihi rani rilangi nike isaku, pani o sopo usuri na masaloku, o usuri na masalom purongo.” ⁴⁰ Moiso mo mele mai isana nona tamlohi usuri mo hitera la juruvi romaliho. Mo vereea isan Peter mara, “Kamim, ka sopo eri kilau peresiau mata aoa matea purongo? ⁴¹ Ha kilau, ha usiusi vara ha pa sopo eri jovi na rani vaihite sei la lo mai isamim, romimim mo fuhu, pani na suihamim purongo ha sopo eri vaira.”

⁴² Mo mele sahe haruana vara i usiusi mara, “Tamaku, vara o sopo narihi paniken akerihina vavano a inua, o usuri na masalom.” ⁴³ Ale mo mele mai isara mo hitera la juruvi romaliho matan matara la puhoni.

⁴⁴ Ale mo mele malue isara, mo vano mo mele usiusi hatoluna, mo mele vereea la retireti atu tiroma mo lo verera. ⁴⁵ Moiso mo mai isana nona tamlohi usuri mo vereea isara mara, “Ha pa juruvi, ale ha mapu hin te rani tinapua. Ka hitea, mariviti vara la turuposi hin Natun Tamlohi natu, ale i pa vano na lima tamlohi hehe. ⁴⁶ Ha turu, ra lo vano! Ka hitea, tamlohi atu mo lo turuposi hiniu mo lo mai mariviti.”

La Taurilati Iesu

(Mk 14.43–50; Lk 22.47–53; Jn 18.3–12)

⁴⁷ Mo pa lo retireti, Judas mo pala, vonan la tupu sangavulu fomana mo rua atu matea peresi na vao tavera matea la tai isan moli mata pris peresi na nora tamlohi aulu, ale la lo lavi na sita vuro peresi na maja.

⁴⁸ Tamlohi turuposi atu mo pete verera na matamata matea moiso mara, “Haratu a pa pungosia, enia natu tamlohi atu; ha pa taurilatia.” ⁴⁹ Ale mo mai isan Iesu vahatea mara, “Tija, mo fuhu!” Ale mo pungosia.

⁵⁰ Iesu mo vereea isana mara, “Tapala, o vai na sava ko mai vara o vaia.” Moiso la mai isana la tauria vara la taurilatia. ⁵¹ Ale vahatea purongo, vonan la haratu matea mo lo toho peresi Iesu mo firahi na limana, mo reve narihi na nona sita vuro, ale mo langa na tavalu pero slev nona pris aulu.

⁵² Moiso Iesu mo vereea isana mara, “O mele tau na nom sita na jarana. Matan haratu la lo lavi na sita vuro la pa mate na sita vuro. ⁵³ Ka sopo levosahia vara a eri tovi isan Tamaku vara i rule na angelo i jeu 72,000, ale vahatea purongo la pa tingifa? ⁵⁴ Pani sohena sava natu, hinau la pa masese sohena Retitapu mo vereea vara i sohena?”

⁵⁵ Hin rani atu Iesu mo vereea isan vao atu mara, “Ka mai peresi na sita vuro peresi na maja sohena vara ka lo vano mata taurilati na tamlohi sasati matea? Tarea na lo sakele na lolo Temple na lo vujangi, pani ka sopo tauriau! ⁵⁶ Pani la hinau sei la pala sohena matan vara Retitapu nona pfovet tuai la pa masese.” Moiso nona tamlohi usuri tari la malue la rovo hiniu.

Mo Turu Na Naho Tamlohi Tatavera

(Mk 14.53–65; Lk 22.54–55, 63–71; Jn 18.13–14, 19–24)

⁵⁷ Ale la haratu sei la lo taurilati Iesu la tiroma hiniu mo vano na iman Caiaphas, enia pris aulu, tamlohi vujangi mata leu peresi na nora tamlohi aulu la lo takonahi hin jara atu. ⁵⁸ Ale Peter mo lo usuria asau makomona, mo vano mo tikeli na rope iman pris aulu atu, ale mo unu na lolona, ale mo lo sakele peresi na tamlohi kilau atu matan vara i pa hite na isoisona.

⁵⁹ Ale moli mata pris peresi na tamlohi tari tinapua mata council la lo aleale tamlohi vara la pa vere te retireti halu na sava Iesu mo lo vaia moiso matan vara la pa eri vilimateia matara, ⁶⁰ pani mo sopo tea, hina purongo vara tamlohi halu mo marivi la turu na nahora. Hitahuna, mo rua la pala mai, ⁶¹ lara, “Tamlohi akerihina mo vereea mara, ‘Enau a eri komo na Temple non God, ale a mele voroa na rani i tolu purongo.’”

⁶² Ale pris aulu atu mo turu sahe mara, “O pa faramia teni mo vono? Sava nahai la tamlohi nike, la lo retivuhesia matam?” ⁶³ Pani Iesu mo lo turu tapanono. Ale pris

aulu mo vereia isana mara, “Na usiho vara o retitauhi hin God mauri vara o vere kamam hinia vara engko natu, Kristo atu Natun God?”

⁶⁴ Iesu mo vereia isana mara, “Engko ko pete vereia moiso, pani na vereia isam vara i pa sopo tuai o pa hite Natun Tamlohi i sakele na matua suiha na tuka, ale mo lo mai na telangi matan tuka.” *Dan 7.13*

⁶⁵ Moiso pris aulu mo fari na nona ruru mara, “Mo lo vaia sohena enia God. Ra sopo mele opoi te tamlohi tuetuenu tinapua, ka pete rongo na nona reti hehe hin God nakerihi moiso. *Lev 24.16* ⁶⁶ Nomim aria i pa vano sohena sava?”

La faramia lara, “Mo tataholo vara i mate.”

⁶⁷ Moiso la litovi na nahona, la tuhia, ale hai la vojahia, *Isa 50.6* ⁶⁸ lara, “O reti mangovi isamam Kristo, hare natu, mo tuhiho?”

Peter Mo Vunvuni Iesu

(*Mk 14.66–72; Lk 22.56–62; Jn 18.15–18, 25–27*)

⁶⁹ Hinau atu mo lo vano, ale Peter mo lo sakele na jingoima na lolon ropen ima atu, ale slev ha'ai matea mo sinai isana mara, “Engko sohena, ko lo toho peresi Iesu mara Galilee atu!”

⁷⁰ Pani mo vunvunia na nahon vao atu mara, “Enau na sopo levosahi na sava ko lo vereia.”

⁷¹ Ale mara mo malue na matarua atu slev ha'ai tinapua matea mo hitea mo vereia isan la haratu la lo turu mariviti isana mara, “Tamlohi nike, mo lo toho peresi Iesu mara Nazareth.”

⁷² Ale mele vahatea mo vunvunia na retitauhi matea mara, “Na sopo halu, na sopo levosahi tamlohi sei.”

⁷³ Ale mo sopo tuai la haratu la lo turu ea la mai isan Peter lara, “Enjora, engko vonara matea matan leom mo vereuliho.”

⁷⁴ Ale mo tapulo lesati hinia hasena moiso mo retitauhi mara, “Na sopo levosahi tamlohi sei.” Ale vahatea purongo toa vari matea mo tarere.

⁷⁵ Moiso Peter mo mele romfomi na retireti non Iesu, “Toa i sopo lo tarere o pa vunvunia vaha tolu.” Ale mo malue hin jara atu mo tangi romina mo sati tavera.

27

La Lavia Mo Vano Isan Pilate

(*Mk 15.1; Lk 23.1–2; Jn 18.28–32*)

¹ Mo mele rani sahe na falavuhou jea, moli mata pris tari peresi na tamlohi aulu nona tamlohi la pulutahi vara la vai nora romfomi tavera vara la pa tau Iesu na mateia. ² Ale la lihoa la tiroma hinia mo

malue la taua na liman Pontius Pilate, tamlohi tavera matan Rome sei mo lo aulu hin Israel.

Judas Mo Mate

(*Acts 1.18–19*)

³ Moiso Judas, haratu sei mo lo turuposi hinia mara mo hitea vara la pa sile na talai tavera isan Iesu, mo posi na romina, ale mo mele lavi la silver selen atu mo ngavulu tolu mo hilu mo vano isana moli mata pris peresi na tamlohi aulu, ⁴ mara, “Na vai na hehe matan na turuposi na fae vokevoke.”

Lara, “Kama sopo opoia vara kama levosahia, enia nom hiniau.” ⁵ Ale mo pulahi la silver selen atu la sivo na lolo Temple, mo malue mo vano mo lihoa hasena. ⁶ Pani moli mata pris la lavi la silver selen atu lara, “Vara fa mele taura na jara mania na Temple i pa tope na leu matan mania akerihi enia mania mata fae.” ⁷ Ale la matavuhi la hatihia vara la pa lavi mania atu, la voli na lepa matea la tovia ‘Lepa non Potter’ matan vara la pa lo tavuni na tamlohi la sopo Jew hinia. ⁸ Matana, lepa atu la tovi ‘Lepa mata Rae’ mo tikeli nake. ⁹ Ale sava reti pfovet Jeremiah mo vereia mo masese mara, ‘Ale la lavi na silver selen mo ngavulu tolu (30), voli mauri sei tatua natun Israel la hatihia vara mo tataholo hinia, ¹⁰ ale la silera mata voli lepa non Potter sohen Moli God mo retileu hiniau.’ *Zec 11.12–13*

Pilate Mo Tapai Iesu

(*Mk 15.2–5; Lk 23.3–5; Jn 18.33–38*)

¹¹ Moiso Iesu mo turu na nahon tamlohi tavera matan Rome, ale tamlohi tavera atu mo usia isana mara, “Engko natu, Supe nona Jew?”

Iesu mara, “Engko ko pete vereia moiso.”

¹² Pani moli mata pris peresi na vajiahara sei la aulu lara la tuvaia hin te hiniau, Iesu mo sopo faramira. ¹³ Moiso Pilate mo vereia isana mara, “Ko sopo rongo na hiniau matuvana sei la lo retivuhesia matam?” ¹⁴ Pani Iesu mo sopo faramia, mo sopo farami te tuvai hatelete, ale tamlohi tavera atu mo ma'urahi tavera matana.

La Taua Vara I Mate

(*Mk 15.6–15; Lk 23.13–26; Jn 18.39–19.16*)

¹⁵ Hin rani atu, tarea na hanhani tavera, tamlohi tavera atu mo lo juri na tamlohi matea na ima rilangi mo lo toho isana vao atu vara sava tamlohi vao atu mo opoia vara i pa juria. ¹⁶ Ale hin rani atu tamlohi sasati matea la levosahi mamahunia hijana Barabbas mo lo toho na ima rilangi. ¹⁷ Ale la tamlohi tavera atu lara la pulutahi moiso, Pilate mo vereia isara mara, “Ka opoia vara a teri hare, Barabbas teni Iesu sei la tovia

Kristo?" ¹⁸ Mo vere haratu matan mo lev-osahia moiso vara la tau Iesu na limana mata nora mereimerei purongo.

¹⁹ Mo sopo haratu purongo, pani na rani mo pa lo sakele na nona jara sakele mata aria, narouna mo sohai na retisohai matea isana mara, "O sopo tikeli tamlohi voke-voke sei, matan fomiku mo sopo sakele matan noku mamavuhō hīnia nahapani mo sasati."

²⁰ Ale moli mata p̄ris peresi na vajiahara sei la aulu la haluhalu vao atu vara la usi Barabbas vara la pa komo Iesu. ²¹ Tamlohi tavera atu mo mele vere isara mara, "Sahara hinira mo rua ka opoia vara a juria nomim?"

Ale lara, "Barabbas!"

²² Pilate mo vere isara mara, "Vara sohena a pa vai na sava isan Iesu haratu la tovia K̄risto?"

Enira mo isoiso lara, "Vosaea na talopeilopei!"

²³ Ale mo vere mara, "Mata sava? Mo vai na sava hina sati?"

Pani la mele ngara lara, "Ha vosaea na talopeilopei!"

²⁴ Ale na rani Pilate mo hitea vara i pa sopo efi jeu na fomira, ale mara mo hitea vara tamlohi la tapulo lolokoru moiso pani mo hitea vara i pa sopo efi vaira la toho malum, mo lavi na wai, ale mo javulahi na limana na nahon vao atu mo vere mara, "Enau na vokevoke na faen tamlohi nike: enia nomim hinau." *Deut 21.6–9*

²⁵ Tamlohi tari hin vao atu la raramia lara, "Raena i pa toho hin kamam peresi na natumam!"

²⁶ Moiso mo vai Barabbas mo materī usuri na fomira, ale nona tamlohi vuro la rupi Iesu na asi maja, moiso la lavia vara la vosaea na talopeilopei.

Tamlohi Vuro La Vaivai Iesu

(*Mk 15.16–21; Jn 19.2–3*)

²⁷ Moiso tamlohi vuro non tamlohi tavera atu la lavi Iesu mo sivo na jara tavera matea na lolo patu ima non tamlohi tavera atu, ale la tovi matavuhi na tamlohi vuro matuvana la mai la turu na nahona, ²⁸ ale la nafihi na nona ruru, la rua na ruru peravu matea majhina mo perpel, ²⁹ ale la viriviri na fongorongo matea la vaia na kaulu la taua na patuna, ale la tau na mavuro matea na matua limana, ale la popovitoho na nahona la lo vaivaia lara, "Ha kilaua! Supe nona Jew." ³⁰ Moiso la litovia la lavi nafihi mavuro atu, ale la lo hamaji na patuna hīnia.

La Vosaea Na Talopeilopei

(*Mk 15.22–32; Lk 23.27–43; Jn 19.17–27*)

³¹ Ale lara la vaivaia mo isoiso, la nafihi pa ruru peravu atu la mele rua na nona

ruru, ale la tiroma hīnia vara la vano la vosaea na talopeilopei. ³² La pa lo malue na malele, ale tamlohi vuro la tapai na tamlohi matea Simon mara Cyrene. La ngurunguru hīnia vara i lavi na talopeilopei non Iesu. ³³ Moiso na rani la kakau na jara matea hijana Golgotha, — raramin Golgotha enia Jara Sui Patu Tamlohi ³⁴ la sile Iesu na waen la hohoia peresi na hinau matea mo hohona vara i inua, pani mara mo inu mo rongoa mo fohu vara i inua. *Psa 69.21*

³⁵ Ale lara la vosaea na talopeilopei moiso, la asehi na nona ruru isara na nora roro matea. *Psa 22.18*

³⁶ Moiso la sakele la lo kilaua la lo saovia hin jara atu. ³⁷ La vosae na retiarīa matea aulu na patuna mo vere mara,

Haranike nahai enia Iesu

Supe nona Jew

³⁸ Hin rani atu la vosae na tamlohi vili na tamlohi mata vavanaho mo rua tinapua na talopeilopei peresia, matea na matuana ale matea na marauna. ³⁹ Ale la haratu la lo hahau roto jara atu la lo vaivaia, la lo pulapulahi na patura isana *Psa 22.7; 109.25* ⁴⁰ lara, "Engko sei vara o pa komo na Temple, ale a pa mele voroa na rani i tolu purongo, o hasem juriho! Vara engko Natun God, o sevuti hin talopeilopei sei!" *Mt 26.61; Jn 2.19*

⁴¹ Ale moli mata p̄ris peresi na tamlohi vujangi mata leu peresi na tamlohi aulu sohena la vaivaia lara, ⁴² "Mo lo juri na tamlohi tinapua: mo sopo efi juria hasena. Enia Supe non Israel, fa hitea vara i sevuti nakerihi na talopeilopei, ale fa pa efi rasua. ⁴³ Enia mo tau na nona rasu hin God, mo ruhu vara God i pa juria nakerihi vara na masalona, matan mo lo vere mara, 'Enau Natun God.'" *Psa 22.8*

⁴⁴ Ale la tamlohi mata vili na tamlohi mata vavanaho atu sohena la vaivaia hin malele atu.

Iesu Mo Mate

(*Mk 15.33–41; Lk 23.44–49; Jn 19.28–30*)

⁴⁵ Ale na livuha rani fofoha tavera matea mo tavuni na jara tari mo tikeli na matan alo mo tolu na ravravi. ⁴⁶ mariviti na matan alo mo tolu na ravravi, Iesu mo ulo aulu na leo filangi matea mara, "Eli, Eli, lema sabatani?" Raramina, 'Noku God, noku God, mata sava ko rovo hīniau?' *Psa 22.1*

⁴⁷ Ale tamlohi hai la lo turu mariviti atu la rongoa lara, "Tamlohi nike, mo lo tovi Elijah." ⁴⁸ Ale vahatea purongo, vonara matea mo maro vano mo lavi na tavalu ruru matea la fuunia na waen hohona, ale mo sohaia na mavuro mo sahe isana vara i inua. *Psa 69.21*

⁴⁹ Pani tatuara lara, “O lo saovi tako, ʻa pa hitea vara Elijah i pa sinai i juria teni i vono!”

⁵⁰ Ale Iesu mo mele ulo rilangi na leo tavera matea, ale maromaronā mo isoiso.

⁵¹ Ale vahatea purongo, ruru tavera atu na lolo Temple mo mafari mo rua mo tapulo aulu mo tikeli atano. Ale lepa mo hisu, ale vatu la mavua. *Exo 26.31–33*

⁵² Ale taptap la roi moiso, ale tapuhi matuvana non God sei la mate moiso la mele turu, ⁵³ ale la malue na tapura hitahu na sauteterahi non Iesu, ale la unu Jerusalem la pala isana tamlohi matuvana ea.

⁵⁴ Na rani captain mata tamlohi vuro peresi la haratu la lo kilau saovi Iesu, lara la hite na mihi, ale sava mo masese, la maʻurahi tavera jea lara, “Varaʻuhū, tamlohi nike, enia Natun God!”

⁵⁵ Hin rani atu, haʻfai matuvana sei la tai Galilee la lo usuri Iesu la lo tuenia la lo turu asau la lo kilau. ⁵⁶ Mary Magdalene peresi Mary tinan James enia Joseph, ale tinan la natun Zebedee, James enia John, la lo toho hin vao atu.

La Tau Iesu Na Tapuna

(Mk 15.42–47; Lk 23.50–56; Jn 19.38–42)

⁵⁷ Mo lo ravravi tamlohi taptav matea mo tai Arimathea mo mai hijana Joseph, enia sohena tamlohi usuri non Iesu matea. ⁵⁸ Enia mo vano mo hite Pilate mo usia vara i eʻfi lavi na tarapen Iesu. Ale Pilate mo retileu vara la silea isana. ⁵⁹ Moiso Joseph mo lavi tarape atu, mo leputia na ruru lulu matea mo vokevoke, ⁶⁰ ale mo taua na tapuna paro sei mo taia na vatu. Mo kuresi horo na vatu tavera matea na mataruan tapu atu, ale mo mele vano. ⁶¹ Mary tinapua atu peresi Mary Magdalene la lo toho atu la lo sakele na tavalu taptap.

⁶² Mo mele rani sahe, hin rani atu mo usuri na rani mata Tatamahu mata Passover, moli mata pʻris peresi na Pharisee la pulutahi na nahon Pilate. ⁶³ Ale lara, “Tamlohi tavera, kama romʻromia vara tamlohi halu atu mo vereā na rani mo pa lo mauri mara, ‘Rani i tolu i vano moiso, a pa mele turu’.” ⁶⁴ Matana, o retileu vara la turuhoro na tapuna i tikeli na hatolu rani, vara i vono, nona tamlohi usuri la pa vano la vanaho na tarapena, ale la pa vereā isana tamlohi vara, ‘Mo mele turu na nona mateia.’ Ale halu atu hitahu i pa mele sati jea i jeu haratu tiroma.”

⁶⁵ Pilate mo vereā isara mara, “Kamim nomim tamlohi kilau hai, ha vano ha kilau mamahunia sohena ha eʻfi vaia.” ⁶⁶ Ale la vano la kaluti horo na vatu mataruan taptap atu, ale la tau na tamlohi kilau la lo kilaua.

28

Iesu Mo Mele Mauri

(Mk 16.1–8; Lk 24.1–12; Jn 20.1–10)

¹ Sabbath mo isoiso, ale mariviti vara i rani na ʻalavuhu na Sunday, ale Mary Magdalene peresi Mary tinapua atu matea la vano vara la hitea na tapuna. ² Vahatea purongo mihi tavera matea mo vili na jara, ale angelo non Moli God matea mo sevuti na tuka. Mo kuresi naʻrihi vatu atu, ale mo lo sakele aulu hinia. ³ Angelo atu mo memera sohena vaha, ale nona ruru mo lulu sohena katen. ⁴ Pa la tamlohi kilau atu la savaravara na matahu la jovi na lepa sohen la mate.

⁵ Angelo atu mo vereā isan la haʻfai atu mara, “Ha sopo matahu! Na levosahia vara ka lo ale Iesu, haratu la vosaea na talopeilopei. ⁶ Enia mo sopo toho nike. God mo sauteterahia moiso, mo mele mauri, mo sohen haratu Iesu mo vereā vara i pa sohena. Ha mai, ha hite na jara sei la tau na tarapena ea. ⁷ Ha vila, ha vere na nona tamlohi usuri vara mo turu na mateia mo mele mauri, ale ha levosahia vara enia mo lo vano tiroma Galilee hin kamim. Ha vano atu, ha pa hitea ea. Hināu nike natu, na sinai vara a vereā isamim.”

⁸ Pa la haʻfai la matahu, pani la avulahi tavera na rani la malue na tapuna, la maro vila vara la vano la vereā isana nona tamlohi usuri. ⁹ Vahatea purongo Iesu mo tapaira mo sile na retioloolo isara. La vano mariviti isana, la popovitoho la tauri na palona, la lotua. ¹⁰ Moiso Iesu mo vereā mara, “Ha sopo matahu! Ha vere na noku tamlohi usuri vara la vano Galilee. La pa hiteau atu.”

Retireti Nona Tamlohi Kilau

¹¹ Na rani la haʻfai atu la pa lo toho na malelera, ka levosahia, tamlohi vuro hai sei la lo kilau na tapuna, la vano la unu Jerusalem. La vere na hināu tari sei la masese isana moli mata pʻris. ¹² Ale matana, moli mata pʻris lara la pulutahi peresi na vajiahara sei la aulu, la hatihia vara la pa sile te mania tavera luhu isana tamlohi vuro. ¹³ La vereā isana tamlohi vuro lara, “Ha vereā isana tamlohi tari vara tamlohi usuri non Iesu la mai na vutepongi la vanaho na tarapena na rani ka lo juruvi. ¹⁴ Vara nomim tamlohi tavera i rongō hināu nike, kamam kama pa retireti isana. Romimim i sopo kaka hinia.” ¹⁵ Ale pa la tamlohi vuro atu la lavi pa mania atu la vaia sohen la vereā isara. Ale Jew matuvana la pa lo vujangi na tatuara hin sorasarahina atu mo tikeli nake.

Nona Tamlohi Usuri La Hitea

(*Mk 16.14–18; Lk 24.36–49; Jn 20.19–23; Acts 1.6–8*)

¹⁶ Ale la tamlohi usuri tupu sangavulu ōmana matea atu non Iesu, la sahe na vutivuti matea Galilee, jara atu natu, Iesu mo vereā vara i pa tapaira ea. ¹⁷ Ale lara la hitea, la lotua. Pani tatuara la lo ōm rua.

¹⁸ Iesu mo mai isara, ale mo vereā mara, “God mo sileau na suiha tari vara a aulu na tuka peresi na varama. ¹⁹ Ha vano isana mara jara tinatinapua na varama, ale ha vujangira vara la mai noku tamlohi usuri. Ha paptijo hinira na hijan Tama, Natuna peresi na Tanume Tapu, ²⁰ moiso ha vujan-gira vara la taurilati na hināu tari sei na vereā isamim moiso, ale ha lo levosahia, enāu a pa toho peresi kamim tarea i tikeli na isoison pongi nike!”

Retiruhu Hin Iesu Krīsto Mark Mo Uliā Puku Nike

Tamlohi hai la lo romromia lara John Mark natu mo ulia, hara sei Paul mo lavia hitahu na nona tiroma hahau (Acts 12.25). Mo ulia na sava vavahinau Iesu mo lo vaira: Tiroma Iesu mo viromi tamlohi mo vati vara la usuria (1.16–20), moiso mo pa tapulo vai na hina maŕurahi, mo titu nafihi na tanume sasati na tamlohi matea (1.21–28), mo tueni vepalihan Peter (1.30–31), vao tamlohi rojōa (1.32–34), peresi na tamlohi lepros matea (1.40–45), Iesu mo vai na hināu tari nika na suihan God.

Haratu la lo tiroma na Jew la rohu hin Iesu mata nona retireti (2.2–3.6), ale la aleale malele vara la pa vilimateia hinia (11.18). Tanume sasati na hitevosahi na suihana, la levosahia vara enia Natun God tataholo, pani Iesu mo reti horora vara la sopo mele vereā isana tamlohi hin rani atu.

Ra eŕi hitea vara romromi tavera non Mark enia vara Iesu enia tamlohi matea mo lavi na rani rilangi matan enia Jujuri atu sei God mo fulea mo sinai na varama, enia Natuna tataholo (8.31–33; 9.30–31; 10.33–34), Tamlohi atu Provet Daniel mo lo vereā tuai jea moiso (Dan 7.14).

Hinahinau Hin Puku Akerihi

1. Reti Hin John Tamlohi Paptijo (1.1–8)
2. Paptijo Non Iesu, Tiapolo Mo Vaihitea (1.9–13)
3. Iesu Hin Galilee (1.14–9.50)
4. Iesu Mo Sahe Jerusalem (10.1–52)
5. Isoiso Rani Non Iesu (11.1–15.47)
6. Iesu Mo Mele Mauri (16.1–8)
7. Iesu Mo Pala (16.9–20)

John Tamlohi Paptijo

(Mt 3.1–12; Lk 3.1–18; Jn 1.19–28)

¹ Harihi enia tapulo Retiruhu hin Iesu Krīsto, Natun God.

² Sohen provet Isaiah mo ulia mara, 'Eh! Ko hitea? Na lo fule na noku vahaŕule vara i tiroma hiniho, i pa vai na malele la tataholo matam.'
Mal 3.1

³ 'Na jara hasetoho leona mo lo ulo mara: Ha vasahi na malelen Moli God! Ha tano na malelena i tataholo.'

Isa 40.3

⁴ Ale John mo pala, mo lo paptijo na tamlohi na jara hasetoho matan Judea, mo lo retivujavujangi isana tamlohi vara la lavi na paptijo mata posi na hehe matan vara Moli i romira. ⁵ Ale tamlohi tari na lolon Judea peresi Jerusalem, la lo vano vara la hite John, ale enia mo lo paptijo hin la haratu la

lo taviti na nora hehe na wai Jordan. ⁶ John mo ru na ruru la vaia na vulu camel, ale mo otioi na huri buluk; hana hināu enia hatpoha peresi na tau sugabag sei waina mo meji. *2 Ki 1.8*

⁷ Ale mo lo retivujavujangi mara, "Tamlohi matea i pa mai hitahu hinia mo aulu mo jeuau, enāu na sopo tataholo vara a rautoho a lavi nafihi na asi eve palona.

⁸ Enāu na lo paptijo hin kamim na wai purongo, pani enia i pa paptijo hin kamim na Tanume Tapu."

John Mo Paptijo Hin Iesu

(Mt 3.13–17; Lk 3.21–22)

⁹ Hin rani atu Iesu mo tai Nazareth na jara Galilee, mo mai atu ale John mo paptijo hinia na wai Jordan. ¹⁰ Iesu mara mo malue na lolo wai, vahatea purongo tuka mo roi, ale John mo hite Tanume Tapu mo sinai atano sohena vomahe matea, ale mo tatau hin Iesu. ¹¹ Leon God na tuka mo reti mara, "Engko Natuku ruhuŕuhu, enāu na opoiho mo tavera jea, na avulahi tavera hiniho."

Tiapolo Mo Vaihitea Iesu

(Mt 4.1–11; Lk 4.1–13)

¹² Vahatea purongo, Tanume Tapu mo tiroma hin Iesu vara i sahe na jara hasetoho. ¹³ Iesu mo lo toho atu mata rani mo ngavulu vati, Setan mo lo vaihitea. Iesu mo lo toho peresi na maji jala hin jara atu, ale angelo non God la lo matahia.

Iesu Mo Tapulo Vavahinau

(Mt 4.12–17; Lk 4.14–15)

¹⁴ Mo sopo tuai, Supe Herod mo taurilati John, mo taua na ima rilangi. Ale hitahuna, Iesu mo sivo Galilee, mo lo retivujavujangi na Retiruhu non God mara, ¹⁵ "Rani tataholo atu God mo lo viromia mo mai moiso! Mauri atu God mo aulu hinia mo lo mai mariviti. Ha posi na nomim hehe, ale ha rasu Retiruhu nika!"

Mo Tovi Na Nona Tamlohi Mo Vati

(Mt 4.18–22; Lk 5.1–11)

¹⁶ Na rani matea, Iesu mo lo hahau usuri na pahisa tasin Galilee, mo hite Simon enia tasina Andrew, la lo pulahi na tara matea na tasi matan enira tamlohi aleale maji. ¹⁷ Ale mo vereā isara mara, "Ha mai ha usuriau. Enāu a pa vai kamim ha mai tamlohi aleale tamlohi." ¹⁸ Vahatea purongo, la tinafihi na nora tara la usuria.

¹⁹ Iesu mo mele hahau mo vano makomona, mo hite James natun Zebedee, enia tasina John la lo sakele na lolo botira, la lo tulai na nora tara. ²⁰ Iesu mo tovara ale vahatea purongo la tinarihi tamara Zebedee na lolo botira peresi na nona volitusi ale la usuria.

Tanume Sasati La Levosahi Iesu

(Lk 4.31–37)

²¹ Iesu tolu la tupu vati atu la sahe Capernaum, ale na Sabbath mo unu na ima lotu nona Jew, ale mo lo vujangira. ²² La haratu la lo tapurongo isana, la maŕurahi tamera na nona vujangi, matan mo sopo vujangira sohena nora tamlohi vujangi mata leu matea pani sohena tamlohi matea nona vujangi mo sopo te retiusia matana.

²³ Hin rani atu tamlohi matea tanume lumiha sasati matea mo lo toho hinia mo lo toho atu hin ima lotu atu, ale mo ulo isan Iesu mara, ²⁴ “Iesu mara Nazareth, ko opoia vara o vai na sava isamam? Ko mai vara o komo kamam teni! Enau na levosahia vara engko hare, engko haratu mo tapu non God!”

²⁵ Pani Iesu mo savurahia mara, “Ha! O toho malum! O malue isana nakerihi!” ²⁶ Ale tanume lumiha sasati atu mo hisuhi rilangi na epen tamlohi atu moiso mo ulo aulu mo malue hinia.

²⁷ Tamlohi tari hin ima lotu atu la maŕurahi, ale la lo ususira hasera hinia lara, “Avei, sava nahai? Vujangi paro matea peresi na suiha vahatea mo pala! Ka hitea mo retileu isana tanume lumiha sasati, ale vahatea purongo la ooloo hinia.” ²⁸ Ale vahatea purongo retin la nona suiha atu mo ŕalihi na jara tari Galilee.

Vepalihan Peter

(Mt 8.14–17; Lk 4.38–41)

²⁹ Ale Iesu mo malue hin ima lotu atu, mo vano mo unu na iman Simon enia Andrew, enia tolu James enia John. ³⁰ Ale vepalihan Simon mo lo juruvi na vatana matan mo sereia mo tamera, ale la vereia isan Iesu. ³¹ Moiso Iesu mo mai mo tauri na limana mo saua mo sakele, ale seserei atu mo rovo hinia, ale mo tapulo tatamahuni na hara hinau.

³² Na ravravin rani atu, tamlohi la lavi na tamlohi rojo tari peresi la haratu tanume sasati la lo toho hinira la mai isan Iesu. ³³ Tamlohi tari hin taon tamera atu la takonahi na mataruan ima atu. ³⁴ Ale Iesu mo vai tihai na rojona nona tamlohi matuvana, ale mo titiu naŕihi na tanume sasati matuvana. Mo sopo sile te masapa vara te tanume sasati i eŕi retireti matan enira la levosahia vara enia hare.

Iesu Mo Retivujavujangi Galilee

³⁵ Na ŕalavuho jea mo pa lo ŕoŕoha, Iesu mo turu mo vano hasena na jara hasetoho matea vara i ususi ea. ³⁶ Ale Simon tolu la haratu la lo toho peresia la kilau alea, ³⁷ ale la tapania la vereia isana lara, “Eh! Tamlohi tari la lo aleho.”

³⁸ Pani Iesu mo ŕamira mara, “Ra malue! Ra vano hin te vanua tinapua matan vara a eŕi retivujavujangi na Retifuhu isara

sohena, matan enau na tai na tuka na sinai na varama matan hinau atu natu.”

³⁹ Iesu mo unu role na jara tari Galilee, mo lo retivujavujangi na nora ima lotu, ale mo lo titiu naŕihi na tanume sasati.

Tamlohi Lepros Matea

(Mt 8.1–4; Lk 5.12–16)

⁴⁰ Tamlohi lepros matea mo mai isan Iesu, mo papaohi isana mo usia ŕilangi mara, “Vara o opoia, o eŕi vaiiau a mele vokevoke.”

⁴¹ Iesu mo ŕomopoia mo tamera, ale mo tau na limana hinia mara, “Na opoia. O mele vokevoke!” ⁴² Vahatea purongo, lepros atu mo tihai, ale mo mele vokevoke. ⁴³ Moiso Iesu mo reti ŕilangi isana, ale mo ŕulea vano mara, ⁴⁴ “O tapurongo! O sopo vere te hinau isan tea, pani o vano o hase vujangiho isana pŕis, ale o sile na nom otori sohen Moses mo retileu hinia matan vara la eŕi hitea vara ko mele vokevoke.” *Lev 14.1–32*

⁴⁵ Pani mo turu mo vano mo lo sorahia, ale nona sorasora mo vano ŕalihi, ale mo vaia Iesu i sopo eŕi mele unu hin te taon tamlohi la sopo levosahia, pani mo lo toho na jara hasetoho ale tamlohi la lo mai na jara tari vara la tapania atu.

2

Iesu Mo Romi Na Hehe

(Mt 9.1–8; Lk 5.17–26)

¹ Te rani la vano moiso Iesu mo mele vano Capernaum, ale mo sopo tuai tamlohi lo la vereia lara mo mele mai na ima moiso. ² Vila ruhu purongo mo sopo mele te masapa na lolo ima teni na mataruana. Ale Iesu mo lo retivujavujangi na reti non God isara. ³ Ale, tamlohi tupu vati la ali na tamlohi papao matea mo mai. ⁴ Ale matan la sopo eŕi vano mariviti isana, la sahe aulu na pusa ima, la vai na marole matea mo sivo tataholo hinia, ale la tuhu pa tamlohi papao atu na epana mo sivo na nahon Iesu. ⁵ Iesu mara mo hite na rasua hin hinau atu la lo vaia, mo vereia isan tamlohi papao atu mara, “Natuku, na ŕomi na nom hehe.”

⁶ Pani tamlohi vujangi mata leu hai la lo sakele atu, la lo verevera isara hasera lara, ⁷ “Mata sava tamlohi nike mo lo retireti sohen haratu? Mo lo vaia sohena enia God. God hasena i eŕi ŕomi na hehe.”

⁸ Ale Iesu mara mo levosahia vara la lo ususira hinia isara hasera ale, mo vereia isara mara, “Mata sava ka lo ŕomŕomi na hinau sohena? ⁹ Sava hinau mo mele malum vara a vereia isan tamlohi papao nike, ‘Na ŕomi na nom hehe!’ teni a vereia vara, ‘O turu! O viriviri na epam, o hahau!’ ¹⁰ Pani matan vara ha pa levosahia vara Natun Tamlohi mo lavi na suiha vara i ŕomi na hehe nona tamlohi na varama,

ha tapurongo na sava a pa vereae!” Moiso Iesu mo vereae isan tamlohi papao atu mara, ¹¹ “O turu, o lavi na epam, o mule!”

¹² Tamlohi papao atu mo turu vahatea, mo lavi na epana ale mo hahau mo malue na nahora, ale mo vaira enira mo isoiso la mafurahi ale la tahe na hijan God lara, “Hare mo pete hite te hinau sohen harihi moiso?”

Iesu Mo Tovi Matthew

(Mt 9.9–13; Lk 5.27–32)

¹³ Iesu mo mele sivo na pahisa tasi, ale tamlohi tari la lo mai isana, ale mo lo vujangira. ¹⁴ Ale mara mo lo hahau atu mo hite Levi natun Alphaeus mo lo sakele na jara mata lavi na takis, ale mo vereae isana mara, “O usuriau!” Levi mo turu vahatea, mo usuria.

¹⁵ Hin vutepongi atu na iman Levi, Iesu mo lo hanhani peresi na tamlohi matuvana mata lavi na takis peresi na tamlohi hehe tolu na nona tamlohi usuri, matan tamlohi matuvana sohera la lo usuri Iesu. ¹⁶ Pani tamlohi vujangi mata leu peresi na Pharisee lara la hite Iesu mo lo hanhani peresi na tamlohi hehe tolu na tamlohi mata lavi na takis, la vere isana nona tamlohi usuri, lara, “Mata sava mo lo hanhani peresi na tamlohi mata lavi na takis tolu na tamlohi hehe?”

¹⁷ Ale Iesu mara mo rongoa mo vereae isara mara, “La haratu epera la lo fuhu la sopo opoi na doctor; pani la haratu la rojo purongo. Na sopo mai vara a tovi na tamlohi tataholo pani la haratu la hehe.”

Tapuhoro Na Hanhani

(Mt 9.14–17; Lk 5.33–39)

¹⁸ Hin rani atu, tamlohi usuri non John tamlohi paptijo peresi na Pharisee la tapuhoro na hanhani mata usiasi. Tamlohi hai la mai isan Iesu, la usia lara, “Mata sava tamlohi usuri non John peresi la haratu la lo usuri na Pharisee la lo tapuhoro na hanhani mata usiasi, pani nom tamlohi usuri la sopo tapuhoro na hanhani?”

¹⁹ Ale Iesu mo vereae isara mara, “Ka romfomia vara la tamlohi atu sei la mai na lahi la pa tapuhoro na hanhani vara tamlohi lahi mo lo toho peresira? Vara tamlohi lahi mo lo toho peresira, la sopo efi tapuhoro na hanhani. ²⁰ Pani rani matea mo lo mai vara la pa lavi nafihina na tamlohi lahi isara. Hin rani atu natu, la pa tapuhoro na hanhani.”

Hina Tuai Peresi Na Hina Paro

Iesu mo mele vereae mara, ²¹ “Te tamlohi i sopo efi lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i mafari tavera i jeu haratu tiroma. ²² Te tamlohi i sopo efi titisi na waen paro i sivo na jara

waen la vaia na huri nani tuai matan waen paro atu i pa sosohi i fari jara waen atu, ale i pa komoa peresi waen atu matan i pa roro nafihina. Waen paro mo tataholo na jara waen la vaia na huri nani paro purongo.”

Moli Mata Sabbath

(Mt 12.1–8; Lk 6.1–5)

²³ Na Sabbath matea, Iesu mo lo hahau role na isa wit matea tolu na nona tamlohi usuri, ale la lo tapulo vesi roto na pere wit. ²⁴ Ale Pharisee la vereae isan Iesu lara, “Eh! Mata sava la lo vai na hinau matea mo sopo tataholo vara la vaia na Sabbath?”

²⁵ Ale Iesu mo vereae isara mara, “Avei, korong ka sopo lo evi na sava supe David tolu na nona tamlohi la vaia hin rani atu la vejuveju ale la marohati, ²⁶ ale sohena sava mo unu na Iman God na rani non Abiathar enia mo lo pris aulu, moiso mo lavi pereti atu sei mo tapu pris hasera la eri hania. David mo hania, ale mo silea isan la haratu la lo toho peresia?” *Lev 24.9*

²⁷ Ale mo vereae isara mara, “God mo tau na Sabbath vara i tueni na tamlohi, mo sopo taua vara tamlohi la lo toho mata Sabbath. ²⁸ Matan haratu, Natun Tamlohi enia mo Moli mata Sabbath.”

3

Tamlohi Lima Kuti Matea

(Mt 12.9–14; Lk 6.6–11)

¹ Na Sabbath tinapua matea, Iesu mo mele unu na ima lotu nona Jew matea, ale tamlohi lima kuti matea mo lo toho atu. ² Ale meresahi non Iesu la lo kilau Iesu vara i pa vai mamahuni tamlohi atu na Sabbath teni, matan vara la pa tuvaia matana. ³ Iesu mo vereae isan tamlohi lima kuti atu mara, “O mai nike!” ⁴ Ale mo vereae isara mara, “Na Sabbath, mo tataholo vara fa tueni na tamlohi teni vara fa komo tea? Mo tataholo vara fa juri te mauri teni fa vilia?” Pani la rohu vara la faramia. ⁵ Iesu mo kilau falihira na lolokoru, matan mapura mo rilangi, ale mo vereae isan tamlohi lima kuti atu mara, “O firahi na limam.” Tamlohi atu mo vaia sohena ale limana atu mo mele ruhu. ⁶ Pa la Pharisee atu la malue vahatea, la vano la tovi takonahi na tamlohi la lo usuri supe Herod, ale la aleale malele matan vara la pa vilimatei Iesu hinia.

Tamlohi Matuvana La Usuria

⁷ Iesu tolu na nona tamlohi usuri la malue, la sivo na tasin Galilee, ale vao tavera matea mo usuria. La tai Galilee, Judea, ⁸ Jerusalem, Idumaea, hai la tai na tavalu wai Jordan, ale na jara falihina Tyre enia Sidon. Vao tavera atu lara la rongo la hinau atu Iesu mo lo vaira, la mai isana.

⁹ Ale hin jara atu Iesu mo vereae na nona tamlohi usuri vara la tau mamahuni te boti

hatea matana matan vao tavera atu, vara i vono la pa tohoia, ¹⁰ matan Iesu mo vai tihai na rojoa nona tamlohi matuvana moiso, mo vai la haratu la rojo la lo vartohoi falihia vara la tikelia. ¹¹ Ale tanume lumiha sasati na tamlohi lara la hitea, la jovi sivo na nahona la ngara lara, “Engko Natun God!” ¹² Pani Iesu mo reti filangi isara vara la sopo vereulia vara enia hare.

Mo Viřoni Na Nona Tamlohi Usuri
(Mt 10.1–4; Lk 6.12–16)

¹³ Moiso, Iesu mo sahe aulu na vutivuti matea, ale mo tovi la haratu mo opoira, ale la mai isana. ¹⁴ Ale mo viřoni na tupu sangavulu řomana mo rua sei mo tovira vara la vaharule, matan vara i pa řulera la vano isana tamlohi mata retivujavujangira, ¹⁵ ale mo silera na suiha mata titiu nařihi na tanume sasati. ¹⁶ Mo viřoni la tupu sangavulu řomana mo rua atu sohen harihi:

Simon sei Iesu mo tau na hijana vara Peter.

¹⁷ James enia John natun Zebedee, Iesu mo silera na hija vara Boanerges' řaramina, ‘Natu Piri’ matan jingora mo lo tupali tarea.

¹⁸ Andrew,

Phillip,

Bartholomew,

Matthew,

Thomas,

James natun Alphaeus,

Thaddeus,

Simon mara Cana enia tamlohi matea mata valum mata jarana,

¹⁹ ale Judas Iscariot, haratu mo lo turu-posi hinia.

Suiha Non Iesu

(Mt 12.22–32; Lk 11.14–23; 12.10)

²⁰ Moiso Iesu mo mele vano hin ima atu mo lo toho hinia. Mo sopo tuai vao tavera la mele mai la takonahi, ale la vaia mo sopo te masapa vara la eři hanhahi. ²¹ Tavtavuın Iesu lara la rongoa, la vano vara la taurilatia matan la lo veree lara, “Hara sei, řomina mo tihai sei!”

²² Ale tamlohi vujangi mata leu sei la tai Jerusalem la lo veree lara, “Tamlohi sei, supe nona tanume sasati sei Beelzebul mo sohonua, ale mo lo titiu nařihi na tanume sasati na suihana!”

²³ Pani Iesu mo tovira mai isana ale mo veree mara, “Mo sohena sava natu Setan i eři mele levuti nařihi Setan? ²⁴ Jara tari sei supe la lo aseasehira hinira hasera la pa maroi, ale i pa sopo te taon tavera teni te vao ima vara i lo aseasehia hasena i pa eři turu. ²⁵ Vara vao ima matea i lo levuti na vaona, tamlohi hinia la pa eři toho řuhu sohena sava? ²⁶ Ale Setan peresi na vaona vara la lo levlevutira hasera purongo, suihan Setan

i pa turu sohena sava matan suihana i pa isoiso. ²⁷ Ka hitea? Vara tamlohi matea mo opoia vara i unu na ima tamlohi suiha matea mata i vanaho te nona hinahinai, i pa lavi te asi hatea i pesi tamlohi suiha atu tako, moiso i pa lavi na nona hinahinai.

²⁸ Vararuhu, na veree isamim vara hehe tari tamlohi la lo vaira teni na nora retisas-ati hin God, God i pa řomira. ²⁹ Pani hare mo lo vere lejileji Tanume Tapu, enia, God i pa sopo eři řomia hin te rani.” ³⁰ Iesu mo lo verera hin la hinai sei matan la lo veree vara tanume sasati lumiha matea mo lo toho hinia.

Vaon Iesu La Alea

(Mt 12.46–50; Lk 8.19–21)

³¹ Tinan Iesu peresi na voraina la pala hin ima atu, la lo turu na jingoima ale la sohai na reti sivo isan Iesu vara i mai i hitera.

³² Vao matea mo lo sakele řalihi Iesu ale la veree isan Iesu lara, “Eh! Tinam peresi na voraim peresi na vevoraim la lo toho na jingoima la lo aleho!”

³³ Pani Iesu mo řaramira mara, “Tinaku enia hare? Voraiku enira hare?” ³⁴ Mo kilau řalihi la haratu la lo sakele řalihi mara, “Ka hitea? Tinaku peresi na voraiku enira nahai! ³⁵ Sava tamlohi mo lo vai na masalon God, enia voraiku teni vetasiku teni tinaku.”

4

Tamlohi Isa Matea

(Mt 13.1–9; Lk 8.4–8)

¹ Na rani tinapua matea, Iesu mo lo vujangi na tamlohi na pahisa tasin Galilee. Hin rani atu vao tamlohi la lo mai la lo turu porotia. Ale matana, mo vele na boti matea mo lo sale hin tasi atu, ale mo sakele hinia. Vao tavera atu la lo toho na jarauta na pahisa tasi. ² Iesu mo lo vujangira na titileu matuvana, ale mo lo vujangira mara,

³ “Ha tapurongo! Tamlohi hapořahi matea mo malue mo vano vara i hapořahi na pulana piri wit. ⁴ Mo lo hapořahira, pani hai la jovi na malele tavera, maji avuavu la mai la hani vevuhira. ⁵ Hai la jovi na vatuvatu, uluara la vila, matan tano mo sopo tavera. ⁶ Pani alo mara mo vele, la wit atu la nunu la mate mata warira la sopo sivo atano jea. ⁷ Hai la jovi na urata, pani urata atu mo rovira mo punira ale la sopo vua. ⁸ Pani hai la jovi na tano řuhu, hin tano řuhu atu la ulua. La ulua la vai na vuara, hai namara mo ngavulu tolu (30), hai mo ngavulu limarave (60), hai mo ngavulu sangavulu (100)!”

⁹ Iesu mo mele veree mara, “Haratu mo eři rongovosahia, o tapurongo!”

Mata Sava Mo Vere Na Titileu

(Mt 13.10–17; Lk 8.9–10)

¹⁰ Hitahuna, mara mo lo toho enia hasena, tamlohi hai peresi la nona tamlohi usuri tupu sangavulu romana mo rua atu la usia hin la titileu atu.

¹¹ Ale Iesu mo vereia isara mara, “God mo majin maori atu God mo aulu hinia, pani na lo vere la hinau nika na titileu vara a jarohira isana vinano, ¹² matan vara Retiulia i masese sei mara,

‘La pa hite na sava na lo vaia,

pani la pa sopo eri hitevosahia.

La pa rongo na noku reti,

pani la pa sopo eri rongovosahia.

Matan, vara i vono,

la pa posi mai isaku ale a pa romira na nora hehe.’”

Isa 6.9–10

Raramin Titileu Atu

(Mt 13.18–23; Lk 8.11–15)

¹³ Iesu mo vereia isara mara, “Ka sopo rongovosahi titileu akerihi? Vara mo vono, sohena sava natu ha pa eri levosahi vevuhi na titileu tinapua? ¹⁴ Tamlohi hapoahira na piri mo hapoahira na reti non God. ¹⁵ Ale la haratu la jovi na malele tavera, hin rani atu tamlohi la rongora, Setan mo mai vahatea purongo ale mo lavi nafihi la reti atu sei la lo toho na mapura. ¹⁶ La haratu la lo jovi na vatuvatu, enira la haratu sei lara la rongo na reti non God, la lavia vahatea purongo na avulahi. ¹⁷ Pani mo sopo te warira ale reti non God mo lo toho mata makomo rani purongo. Ale vara rani rilangi la mai teni tamlohi la turuleji hinira mata reti non God, la jovi nafihi vahatea purongo. ¹⁸ Ale la haratu la lo jovi na urata, enira la haratu sei la lo rongo na reti non God, ¹⁹ pani romkaka mata varama peresi na tadvav haluhalu ale masalora mata hinau tinatinapu mo unu hinira mo puni pa reti atu la lo lavia, ale mo sopo eri vua. ²⁰ Ale la haratu la lo jovi na tano ruhu, enira la haratu sei la lo rongo na reti non God, ale la lavia na maurira ale la avulahi hinia. Mo vua mo tikeli mo ngavulu tolu (30), hai mo ngavulu limarave (60), ale hai la tikeli mo ngavulu sangavulu (100).”

Titileu Mata Hinau Sei La Luhu *(Lk 8.16–18)*

²¹ Iesu mo mele vereia isara mara, “Ka rom vara mo tataholo vara tea mo hasahi te lamu ale i taua na ruhuruhun te tanga teni te vata pani mo sopo na jara sakele mata lamu?”

²² Hinau tari la lo luhu, la pa pala na jara tavera. Ale mo sopo te hinau luhu hatea vara i pa sopo pala na jara tavera. ²³ Vara tea te perona, i lo rongo na noku reti!”

Ha Tapurongo Mamahu

²⁴ Iesu mo mele vereia isara mara, “Ha tapurongo na noku retireti i ruhu matan vara nomim lelevosahi i pa ulua i tavera.

²⁵ Haratu mo lo vaihitea vara i levosahi na noku reti, enia i pa eri mele levosahia i tavera i mafivi jea. Pani haratu mo sopo tapurongo i ruhu, sava mo lo toho isana moiso la pa lavi nafihia isana.”

Titileu Mata Piri

²⁶ Iesu mo mele vereia mara, “Mauri atu God mo aulu hinia mo sohena piri vipahai tamlohi mo hapoahira na lepa. ²⁷ Vara mo hapoahira moiso, i pa sopo eri mele vai te hinau hinira. Tamlohi atu mo lo juruvi ale mo lo mele kilau na rani hatehateahi, ale piri atu mo tupali ale mo ulua pani tamlohi atu mo sopo levosahia vara mo pa sohena sohena sava. ²⁸ Lepa atu hasena mo vai la piri atu la ulua. Tiroma la juliha, ale lahora la peravu, ale mo sopo tuai la vira, la vua. ²⁹ Pani vara vuana la mena, tamlohi atu i pa vura na sita matan nora asitauni natu.”

Titileu Mata Piri Paka

(Mt 13.31–32; Lk 13.18–19)

³⁰ Iesu mo mele vereia mara, “A pa tovongi na sava hin mauri atu God mo aulu hinia, teni sava titileu natu i pa tataholo vara a vereulia hinia? ³¹ Mo sohena piri paka matea vara la lavoa na lepa, mo rihirihii mo jeu na piri pahai tari. ³² Pani vara mo ulua mo tavera mo jeu na vipahai tinatinapua tari, ale mo sohai na rangaranga tavera matan vara maji avuavu la eri vai na taura na malumaluna.”*

Mo Vujangira Na Titileu Mata Sava

(Mt 13.34–35)

³³ Iesu mo lo vujangi na nona reti na titileu matuvana sohen harihi, matan vara la pa rongovosahira usuri na nora lelevosahi. ³⁴ Iesu mo lo vujangi na vao tamlohi na titileu purongo, pani hitahu vara mo lo toho hasena peresi na nona tamlohi usuri, mo pa lo vereuli na raramira isara.

Iesu Mo Horo Na Langi Tavera

(Mt 8.23–27; Lk 8.22–25)

³⁵ Iesu mo lo toho hin boti atu, ale alo mara mo pa lo sivo vara i tihai, mo vereia isara mara, “Ra sua roto tasi nika, fa vano na tavaluna.” ³⁶ La tinarihi vao atu ale la vano, pani mo sopo enira hasera purongo, boti tinapua hai sohena la lo usurira. ³⁷ Mo sopo tuai langi tavera matea mo sere, mo vai na suhusuhu la lo kamekame sivo na lolo boti, ale tungu mo lo mafivi.

³⁸ Pani Iesu mo lo juruvi na elunga matea na pulo boti. Ale nona tamlohi la rohaia

* 4:32: piri paka: Iesu mo vere na piri mustard, enia piri matea mo varihii jea.

lara, “Tija! Ko sopo levosahia vara ʔa pa pute!”

³⁹ Iesu mo kilau ale mo reti ʔilangi isan langi atu, ale mo vereea isan tasi atu mara, “Ha isoiso! Ha toho malum!” Vahatea purongo langi atu mo moti, ale tasi tavera atu mo tamata mo tamata. ⁴⁰ Iesu mo vereea isara mara, “Ka matahu tavera sohena mata sava? Mo sopo lo te nomim rasua teni?”

⁴¹ Ale matahu tavera mo sohonira ale la lo vereea isara hasera lara, “Avei, sava tamlohi nahai? Mo reti purongo ale langi peresi na tasi la ooloo hinia!”

5

Mara Gerasenes Matea (Mt 8.28–34; Lk 8.26–39)

¹ Iesu peresi na nona tamlohi la hoso na jara Gerasenes. ² Lara la hoso na jarauta hin jara atu, tamlohi matea tanume lumiha sasati matuvana la lo toho hinia mo malue na taptap, mo sinai mo tapaia. ³ Tamlohi nike mo lo toho na taptap, ale tea i sopo eʔi pesia hin te asi teni te jen. ⁴ Hina purongo vara la pesi na limana peresi na palona na jen teni te aen, mo rotorotora mo kamekamera. Tea i sopo eʔi vaia i toho malum. ⁵ Na rani peresi na vutepongi hatehateahi, mo lo ulo ʔalihi na taptap peresi na vutivuti atu, ale mo lo tangi mo lo hasena tai na epena na vatu.

⁶ Ale mara mo hite Iesu mo pa lo toho asau, mo maro vano isana mo jovi papaohi na nahona. ⁷ Ale mo tangi na leo tavera matea mara, “Iesu Natun God Aulu Jea, engko te nom sava isaku? Na usiho na hijan God vara o sopo vailejilejiau!” ⁸ Mo pa vereea sohena matan Iesu mo lo vereea isana mara, “Tanume lumiha sasati, o malue isan tamlohi nike nakerihi!”

⁹ Iesu mo usia mara, “Eh, engko hijam hare?”

Tanume sasati atu mo ʔaramia mara, “Hijaku enia Legion, matan kamam kama vao tavera jea!” ¹⁰ Tanume sasati atu mo usia ʔilangi isan Iesu vara i sopo levuti nafihiara na jara Gerasenes.

¹¹ Ale vao tavera mata poi matea la lo susua na pahisan vuti atu. ¹² Ale tanume sasati atu la usia ʔilangi isan Iesu lara, “O ʔule kamam kama vano isana poi, o tinaʔihi kamam kama unu hinira.” ¹³ Ale Iesu mo tinaʔihira. La tanume lumiha sasati atu la malue isan pa tamlohi atu, la vano la unu isan la poi atu, evira korong mo tikeli tari vaha rua (2000). Ale vao poi atu la solesole usuri pesapesa atu la jovi sivo na tasi ale la pute enira mo isoiso.

¹⁴ Tavuin la poi atu la rovo la sahe la vereea na lolon taon tavera atu peresi na jara ʔalihi ea. Ale tamlohi la maro la mai vara la hitea vara sava natu mo masese atu. ¹⁵ Ale la mai

isan Iesu, pani lara la hite pa tamlohi atu sei tanume sasati la lo sohonira mo lo sakele ea ale mo ru na ruru, ale ʔomina mo mele ruhu moiso, matahu mo sohonira. ¹⁶ Ale la haratu sei la lo hite na sava mo masese la sorahi na sava mo masese isan tamlohi atu sei tanume sasati la lo toho hinia peresi la poi atu. ¹⁷ Ale la tapulo usia ʔilangi isan Iesu vara i malue na jarara.

¹⁸ Iesu mo pa lo vele na boti, pa tamlohi atu sei tanume sasati la lo sohonira mo usia ʔilangi isan Iesu vara i pa usuria. ¹⁹ Pani Iesu mo sopo tinaʔihia pani mo vereea isana mara, “O mule, o vano isana tapalam ale o vereea na sava Moli God mo vaia matam, ale sohena sava mo ʔomopoiho mo tavera jea.” ²⁰ Ale pa tamlohi atu mo mele hilu ale mo tapulo vereuli na sava Iesu mo vaia matana hin la taon atu mo sangavulu sei la tovia Decapolis. Ale tamlohi tari la maʔurahi tavera hinia.

Venatun Jairus

(Mt 9.18–26; Lk 8.40–56)

²¹ Ale Iesu mara mo mele hilu mo hoso na tavalun tasi atu, vao tamlohi tavera jea matea la mai la turu ʔalihi na pahisa tasi. ²² Tamlohi tavera matea na ima lotu nona tavtavuin Israel hin jara atu hijana Jairus, mo mai mara mo hite Iesu mo papaohi sivo na palona. ²³ Jairus mo usia ʔilangi isana mara, “Venatuku rihirihia, i sopo tuai i pa mate. O mai o tau na limam hinia matan vara i mele ruhu ale i mauri.”

²⁴ Ale Iesu mo usuria. Ale vao tavera matea la lo usuria la lo tiatia hinira. ²⁵ Ale haʔai matea mo lo toho hin vao atu. Ale mo rojo na rojoa nona haʔai mata tauni mo sangavulu ʔomana mo rua moiso. ²⁶ Mo jalahi na mania tavera isana doctor matuvana moiso, ale la doctor atu la sopo eʔi tuenia, la sopo vaia i ruhu pani mo mele sati jea. ²⁷ Mo rongo na tamlohi la lo sorahi Iesu ale mo mai na haʔin Iesu hin vao atu mo tikeli na pingopingo nona ruru. ²⁸ Matan romina mara, “Vara a eʔi tikeli purongoi na nona ruru, noku rojoa i pa tihai!” ²⁹ Ale vahatea purongo ʔae atu sei mo lo maro mo mamasa, ale mo rongovosahia na epena vara nona rojoa mo tihai.

³⁰ Ale Iesu sohena mo rongovosahia vara suiha mo malue hinia, ale mo posi vahatea isan vao atu ale mara, “Hare mo tikeli na noku ruru?”

³¹ Nona tamlohi usuri la vereea lara, “Ko pa usia vara hare mo tikeliho sohena sava, ko sopo hitea vara vao nike la lo tiatia isam?”

³² Ale Iesu mo kilau ʔalihiara vara i vileia vara hare natu, mo tikelia. ³³ Pani haʔai atu sei mo levosahi na sava mo lo masese isana

mo mai isan Iesu na matahu, mo popovito-
toho na palona ale mo verea na hinau tari.
34 Iesu mo verea isana mara, “Venatuku,
nom rasua mo vaiho ko mele fuhu. O vano
na tamata ale nom rojoa i pa tihai jeju.”

35 Iesu mo pa lo retireti isana hafai atu,
tamlohi hai la tai na iman Jairus la mai la
verea isan Jairus lara, “Venatum mo mate
moiso, o sopo mele usi tamlohi vujangi vara
i mai.”

36 Pani Iesu mara mo rongo na sava la lo
verea mo verea isan Jairus mara, “O sopo
matahu! O rasuau!” 37 Ale Iesu mo sopo
tinafihiha vara tea i usuria pani Peter enia
James peresi John tasin James. 38 La vano la
pala na iman tamlohi tavera mata ima lotu
nona Jew atu, ale Iesu mo hite na tamlohi
la lo tangtangi, la lo tangi aulu, la lo vai
na vavaore tavera. 39 Ale Iesu mara mo
unu mo verea isara mara, “Mata sava ka lo
vai na vavaore tavera, ale ka lo tangtangi?
Hafarihi nike mo sopo mate, mo juruvi
romaliho purongo.”

40 Ale tamlohi la manaluluhi Iesu, pani
mo fulera enira mo isoiso la malue. Ale
mo lavi taman hafarihi atu peresi tinana
peresi na nona tamlohi usuri la unu sivo
na jara hafarihi atu mo lo toho ea. 41 Iesu
mo tauri na liman hafarihi atu mo verea
mara, “Talitha kumi!” Ale faramin reti
nike enia ‘Venatuku, o turu!’ 42 Ale vahatea
purongo hafarihi atu sei taunina mo san-
gavulu romana mo rua mo mele turu ale
mo tapulo hahau. Ale mafurahi tavera mo
sohoni tamana peresi tinana peresi na nona
tamlohi usuri. 43 Iesu mo verea isara mo
isoiso vara la sopo mele sorahia isan tea, ale
mo verea isara vara la silea hin te hinau i
hania.

6

Mara Nazareth La Rohu Hin Iesu (Mt 13.53–58; Lk 4.16–30)

1 Ale Iesu peresi na nona tamlohi usuri
la malue hin jara atu la mai na nona taon,
Nazareth. 2 Na Sabbath matea Iesu mo
tapulo vujangi na ima lotu ea, ale vao tam-
lohi la rongo na nona vujangi la mafurahi
tavaera lara, “Tamlohi nike mo pa lavi la
hinau nike epu? Ale nona lelevosahi mo
pa tai epu? La hinau mafurahi nike la pa
pala na limana sohena sava? 3 Mo sopo pa
tamlohi voro ima nahai teni, natun Mary
ale vorain James, Jose, Judas peresi Simon?
Mo sopo vetasina nahai la lo toho peresiha?”
La rongo mo sati matan mo lo vai la hinau
sei.

4 Pani Iesu mo verea isara mara, “Tamlohi
jara tinapua la pa sile na oloolo isana pfovet
matea, pani i pa sopo eri lavi te oloolo na
jarana tataholo teni na naho tahisana teni
na naho voraina.”

5 Iesu mo sopo vai te matamata tavera
isana tahisana, pani mo tau na limana na
tamlohi rojoa tupu visaletete purongo, ale
nora rojoa la tihai. 6 Iesu mo mafurahi
matan la sopo rasua.

Tamlohi Usuri La Malue (Mt 10.5–15; Lk 9.1–6)

Moiso mo vano na jara tinatinapua mo lo
vujangi na tamlohi ea. 7 Mo tovi la tamlohi
atu tupu sangavulu romana mo rua la mai
isana, ale mo fulera la vano mo ruarua, ale
mo silera na suiha vara la titiu nafihhi na
tanume lumiha sasati na tamlohi. 8 Iesu mo
verea isara vara la sopo lavi te hinau na
nora hahau sohena hanhani teni te tanga,
teni te mania, pani tihonira purongo. 9 La
pa ru na sabat pani la pa sopo mele lavi
te harua rurura tinapua. 10 Iesu mo verea
isara mara, “Sava ima ka lo toho hinia hin te
vanua, ha lo toho atu i tikeli rani atu ka mele
malue hin vanua atu. 11 Pani vara te vanua
la rohu hin kamim teni la sopo tapurongo
isamim, ha sarsarhi nafihhi na tangotango
palomim hin jara atu vara i vujangia vara
God i pa arira.”

12 Ale la malue la vano la retivujavujangi
na tamlohi vara la posi na hehe. 13 La titiu
nafihhi na tanume sasati matuvana, ale la
tau na wel na patu tamlohi rojoa matuvana
ale nora rojoa la tihai.

John Tamlohi Paptijo Mo Mate (Mt 14.1–12; Lk 9.7–9)

14 Hin rani atu, supe Herod Antipas mo
rongo na sorasora hin Iesu, matan tamlohi
tari la lo sorahia. Hai la verea lara, “John
tamlohi paptijo mo mele turu na mateia.
Hinau atu natu mo vaia mo suiha vara i
efi vai la matamata sei.” 15 Pani hai la
verea lara Iesu enia Elijah, ale hai la verea
lara enia pfovet matea matan tuai. 16 Pani
Herod mara mo rongoa mo verea mara,
“John tamlohi paptijo! Pani enau natu na
tai nafihhi na patuna, varafuhu mo mele
turu na mateia!”

17 Matan Herod natu sei mo fule na tam-
lohi vuro vara la taurilati John, ale la pesia
na ima filangi vara i vai Herodias, naroun
tasina Philip i avulahi matan Herod mo
lavia sohena narouna. 18 Matan John mo
lo verea isan Herod mara, “Usuri na leu
mo sopo tataholo vara o lavi naroun tasim
sohena naroun.”

19 Ale Herodias mo lo vaihitea vara i vil-
imatei John, pani i sopo eri vaia hasena.
20 Matan Herod mo matahuni John matan
mo levosahia vara John enia tamlohi tata-
holo matea mo tapu ale Herod mo lo
matahia. Hina purongo vara John mo lo
vaia mo lo romkaka tavera, enia mo opoia
vara i lo tapurongo na retireti non John.

²¹ Pani Herodias mo hite na masapa matea na hanhani tavera mata pongi vora non Herod. Herod mo usi na nona tamlohi aulu peresi na nona tamlohi tatavera mata vuro ale la haratu la lo aulu Galilee la mai hinia. ²² Matan venatuna sei hijana Herodias mo unu mo velu ale mo vai Herod peresi la haratu la lo toho atu la avulahi tavera. Ale Herod mo vere isan venatuna mara, “O usiau hin te hinau ko opoia, ale a pa silea isam.” ²³ Ale Herod mo retitauhi mara, “A pa sileho na sava hinau ko usia, hina purongo vara i tikeli na sope jara na lo aulu hinira.”

²⁴ Moiso mo malue mo vano isan tinana mo usia mara, “Nana, a pa usi na sava isana?”

Ale tinana mara, “Na opoi na patun John tamlohi paptijo!”

²⁵ Ale vahatea purongo mo mele unu mo vere isan Herod mara, “Na opoia vara o sileau nakerihi na patun John tamlohi paptijo hin te peleti hatea!”

²⁶ Herod mo rongo mo sati tavera matana. Pani mo mahanuhanu vara i tope na nona retitauhi sei mo vaia na nahon la haratu la lo toho atu. ²⁷ Ale vahatea purongo mo rüle na nona tamlohi mata vilimatei na tamlohi matea vara i tai roto na patun John. Tamlohi atu mo vano na ima rilingi ale mo tai roto na patuna, ²⁸ moiso, mo lavi na patuna na peleti matea mo silea isan haʻai atu. Ale haʻai atu mo lavia mo silea isan tinana. ²⁹ Tamlohi usuri non John lara la rongoa, la mai la lavi na tarapena, ale la taua na papa vatuu matea.

*Vao Tavera La Lo Usuri Iesu
(Mt 14.13–21; Lk 9.10–17; Jn 6.1–14)*

³⁰ Pa la tamlohi usuri atu Iesu mo lo rülera la mele mai ale la vere vevuhi na sava la lo vaira ale la lo vujangira. ³¹ Ale Iesu mo vere isara mara, “Ra malue hin vao nike ʻa vano hin te jara hasetoho ʻa mapu makomona tako.” Matan tamlohi mo maʻrivi la lo mai ale la lo vano ale mo sopo te masapa vara la eʻri hanhani. ³² Ale la vele na boti matea la vano na jara hasetoho matea enira hasera. ³³ Pani vao tavera mata taon matuvana la hitera la lo vano, ale la maro usurira na jarauta, ale la kakau tiroma hin jara atu la pa hoso ea. ³⁴ Iesu mara mo hoso mo hite na vao tavera matea, ale mo romopoirā matan la sohena sipsip mo sopo te tavuira. Ale mo tapulo vujangira na hinau matuvana.

³⁵ Ale mo sivo moiso, ale nona tamlohi usuri la mai isana lara, “Moli jara hasetoho nahai, ale nake mo pongi moiso. ³⁶ O rülera la vano rālihi jara nike ale na vanua vara la voli te hara hinau.”

³⁷ Pani Iesu mo ʻaramira mara, “Kamim purongo ha vahanira!”

Pani lara, “Voli tamlohi mata rani ngavulu sangavulu rua mo sopo lo navu mata i voli te pereti vara i vahani vao tamlohi nike.”

³⁸ Iesu mo usira mara, “Ha vano ha hitea vara ka lo lavi na hanhani mo visa.”

La mele mai lara, “Pereti mo lima peresi na maji mo rua.” ³⁹ Moiso Iesu mo retileu vara la sakele na vao na talu rüvu. ⁴⁰ Ale la sakele na vao mo tikeli mo ngavulu lima (50) teni mo ngavulu sangavulu (100).

⁴¹ “Moiso, Iesu mo lavi pa pereti atu mo lima peresi pa la maji atu mo rua mo taʻa sahe na tuka mo vere meje isan God matara moiso mo topera mo silera isana nona tamlohi usuri vara la asera isana vao tamlohi hatehateahi atu. ⁴² Enira mo isoiso la hanhani ale la masu mo rühu. ⁴³ La sohoni na tanga mo sangavulu romana mo rua na mesin la pereti atu mo lima peresi la maji atu mo rua. ⁴⁴ Evi tamlohi purongo sei la lo hani pereti atu mo tikeli mo tari vaha lima (5000).

*Mo Hahau Na Pusa Tasi
(Mt 14.22–33; Jn 6.15–17)*

⁴⁵ Vahatea purongo atu Iesu mo vere na nona tamlohi usuri vara la vele na boti la vano tiroma na tavalu tasi na vanuan Bethsaida, ale Iesu mo lo rüle la vao atu vara la mule. ⁴⁶ Moiso, enia mo malue isara mo sahe aulu na vuti vara i ususi.

⁴⁷ Pongi mo mai ale pa boti mo lo toho na livuha tasi moiso, ale Iesu hasena mo lo toho na jarauta. ⁴⁸ Ale mo hitera la lo vai-hitea rilingi vara la suahia boti atu matan la lo songahi na langi. Na toa tarere mo hahau na pusa tasi mo mai isara. Mo vano sohena vara i jeura, ⁴⁹ pani lara la hitea mo lo hahau na pusa tasi, la romi vara nunua matea, ale la uloulo ⁵⁰ matan enira mo isoiso la hitea ale la matahu tavera. Pani vahatea purongo Iesu mo retireti isara mara, “Ha sopo matahu, enau sei!” ⁵¹ Ale mo vele sivo na lolo boti peresira, ale vahatea purongo langi atu mo moti. Ale la maʻurahi tavera. ⁵² Pani la sopo lo hitevosahia vara Iesu enia hare, hina purongo na matamata sei Iesu mo lo vaia na suihana hin la maji atu peresi la pereti atu matan mapura la rilingi mata la rasua.

*Tamlohi Rojoo Matuvana Gennesaret
(Mt 14.34–36)*

⁵³ Iesu tolu na nona tamlohi lara la vano roto na tasi la pala Gennesaret la sahe la hoso, ⁵⁴ ale lara la sevuti hin boti atu, vila rühu purongo tamlohi hin jara atu la hitevosahi Iesu. ⁵⁵ La maro la vano na jara tari rālihi jara atu la lavi na tamlohi rojoo na epara la mai isana na sava jara la rongoa

vara mo lo toho ea. ⁵⁶ Ale na sava jara Iesu mo pala hinia, hina purongo vara hin te vanua, teni te taon tavera, teni na ima hasetoho, tamlohi la lavi na nora tamlohi rojoa la taura na jara maket, ale la lo usia rilangi isana vara la eri tikeli na pingo nona ruru purongo. Ale tamlohi tari sei la tikelia, nora rojoa la tihai.

7

Vujangi Mata Mapu Tamlohi (Mt 15.1–9)

¹ Na rani matea Pharisee peresi na tamlohi vujangi mata leu, la tai Jerusalem la mai isan Iesu. ² La mai ale la hitea vara tatua nona tamlohi usuri la lo hanhani pani la sopo hoje na limara tiroma sohena Leu non Moses mo vere. ³ Matan Pharisee peresi na Jew tari, la sopo eri hanhani vara la sopo javulahi na limara tiroma, matan la lo usuri na posposi nona vajiaha matan tuai. ⁴ Ale la pa sopo eri hani te hinau la lavia na maket vara la sopo javulahi na limara tiroma. Hinau akerihi enia vonan la leu atu matuvana sei la lo usurira, sohena posposi mata hoje na paniken teni peleti teni jilivi teni pesin. ⁵ Ale Pharisee peresi na tamlohi vujangi mata leu la usia isan Iesu lara, “Mata sava nom tamlohi usuri la sopo usuri na posposi nona vajiaha matan tuai, matan la lo hanhani peresi na lumi limara?”

⁶ Iesu mo faramira mara, “Kamim tamlohi tapnetano, Isaiah mo retimangovi varafuhu hin kamim sei hin haratu mo vere mara,

⁷ La tamlohi nika la lo oloolo hiniau na nora retireti purongo,
pani nora romfomi mo pa lo toho asau hiniau.

Nora lotu enia lotulotu vono purongo,
ale la lo vere lara nora retileu enia retileu non God.’ *Isa 29.13*

⁸ Ka lo romfomi purongo na leu non God, ale ka lo usuri na vujangi nona tamlohi purongo.”

⁹ Ale mo vere mara, “Kamim ka rohu na retileu non God matan vara ha pa taurilati na nomim posposi matan tuai. ¹⁰ Matan Moses mo ulia na leu mara, ‘O oloolo hin tinam enia tamam!’ ale ‘Vara te tamlohi i retisatasi hin tinana teni tamana ha vilimateia!’ *Exo 20.12; Lev 20.9; Deut 5.16*

¹¹ Pani kamim ka lo vere vara mo tataholo purongo vara tamlohi la sopo tueni na tamara teni tinara na nora vejuveju, ale ka lo vere kara, ‘Mo vono, a pa taurilati na mania na retitauhi hinia moiso vara a pa silea isan God.’* ¹² Ale Ka lo horoa vara i sopo eri tueni tamana enia tinana. ¹³ Ka lo

vai na leu non God mo lo mai hina purongo na nomim posposi matan tuai sei la silea isamim. Ale mele hinau matuvana sohena ka lo vaira.”

Hinau Mo Vai Na Lumiha (Mt 15.10–20)

¹⁴ Ale Iesu mo mele tovi na tamlohi la mele mai isana, ale mo vere mara, “Kamim mo isoiso ha tapurongo i fuhu isaku, ale ha lo levosahi na noku reti. ¹⁵ Mo sopo te hinau hatea vara ha hania i sivo na lolomim i eri vai kamim ha lumiha na nahon God. Pani la hinau sasati sei la lo malue na mapumim, enira natu la lo vai kamim ka lumiha na nahon God.”

¹⁶⁻¹⁷ Moiso Iesu mo unu na ima matea vara i tinafihi vao tamlohi atu, ale nona tamlohi usuri la usi na faramin titileu atu isana. ¹⁸ Iesu mo vere isara mara, “Kamim sohena, ka sopo rongvosahia? Ka sopo lo hitevosahia vara sava tamlohi la hania i sopo eri vaira la lumiha na nahon God. ¹⁹ Hanhani mo sopo sivo na mapumim. Mo sivo na pangemim purongo moiso mo mele malue.” Hin retireti akerihi Iesu mo lo vere vara hanhani tari la fuhu purongo.

²⁰ Ale Iesu mo mele vere mara, “Sava mo lo malue na mapu tamlohi, enia natu i eri vai na tamlohi i lumiha na nahon God. ²¹ Matan sava mo lo malue na mapu tamlohi enia: romfomi hehe, posposi viriu, vavanaho, vilimatei na tamlohi, ²² vaivaileu peresi na tinapua mo lahi moiso, hanmarua, lejileji, haluhalu, posposi maji, mafivi na mereimere, retireren, fomaulu, peresi na posposi rongorongono vono. ²³ La hinau sasati nika natu, la lo malue na mapu tamlohi, ale la vaia mo lumiha na nahon God.”

Tanume Sasati Matea (Mt 15.21–28)

²⁴ Iesu mo malue Galilee mo vano na jara matan Tyre enia Sidon. Ale mo unu na ima matea mo sopo opoia vara tea i levosahia, pani mo sopo eri luhu. ²⁵ Pani mo sopo tuai hafai matea sei venatuna tanume lumiha sasati matea mo sohonia, mo rongoa ale mo mai isana mo jovi na palona. ²⁶ Hafai atu enia hafai rofoha matea mara Syria Phonecia. Ale mo usia rilangi vara i titiu nafihi tanume sasati atu isan venatuna. ²⁷ Ale Iesu mo vere isana mara, “Ha tinafihi na natuvarihia la hanhani tiroma, matan mo sopo tataholo vara a lavi na hara pereti a pulahia isana viriu!”

²⁸ Pani pa hafai mo farami Iesu mara, “Ko varafuhu Moli, pani viriu sei la lo toho na ruhuruhu tep la lo hani na utauta hanhani hana natuvarihia sei la lo jovi sivo na lepa!”

* 7:11: hinau la retitauhi: vara i mania teni silesilea.

²⁹ Moiso Iesu mara, “Nom farami mo ruhu jea! O vano, tanume sasati atu mo malue hin venatum moiso!” ³⁰ Hafai atu mo turu mo mule, ale mo hite venatuna mo lo juruvi malum na vatana, ale tanume sasati atu mo malue isana moiso.

Peropero Matea

³¹ Iesu mo malue Tyre ale mo hahau vano na taon matan Sidon ale mo sivo na tasin Galilee, hin jara atu sei la lo tovia Decapolis. ³² Ale tamlohi la lavi na tamlohi matea mo mengo ale mo peropero mo mai isana, ale la usia filangi isana vara i tau na limana hinia. ³³ Iesu mo lavi tamlohi atu mo vano hasena hin vao atu, mo tau na varangona na lolo perona, moiso mo lito sivo na varangona, ale mo tikeli na memen tamlohi atu na litona. ³⁴ Iesu mo tafa sahe aulu na tuka, ale mo mapsoro mo vereea na leora mara, “Ephphatha!” Ale faramina enia ‘O roi!’ ³⁵ Vahatea purongo perona mo roi, ale memena mo retireti mo mera.

³⁶ Iesu mo vereea filangi isara vara la sopo sorahi hinau atu isan te tamlohi, pani mara mo vereea mo filangi enira sohena la opoia mo tavera jea vara la vereulia. ³⁷ Matan la mafurahi tavera ale la lo vereea lara, “Hinau tari mo lo vaira la rufuruhu hahavua. Hina purongo vara la peropero mo vaira la rongo, teni vara la mengo mo vaira la retireti.”

8

Iesu Mo Vahani Na Tamlohi (Mt 15.32–39)

¹ Hin la rani atu, vao tavera matea mo mele toho peresi Iesu, ale mo sopo te hara hinau. Iesu mo tovi na nona tamlohi usuri la mai isana, ale mo vereea isara mara, ² “Enau na fomopoi vao nike matan enira la lo toho peresiaua mata rani mo tolu moiso, ale mo sopo te hanhahi vara la pa hania. ³ Vara a rulara la mule marohati, la pa talekoleko na malele matan tatuara la tai asau rove.”

⁴ Nona tamlohi usuri lara, “Pani fa pa vahani la tamlohi nike sohena sava hin jara hasetoho nike?”

⁵ Iesu mo usia isara mara, “Ka lo lavi na pereti mo visa?” Lara, “Mo limaravrua!”

⁶ Ale Iesu mo vere vao atu vara la sakele, moiso mo lavi la pereti atu mo limaravrua mo vere meje isan God matara, mo topera ale mo silera isana nona tamlohi usuri vara la aseasera isan vao atu, ale la vaia sohena. ⁷ Ale la vilei na maji vavarihi mo visalet purongo, ale Iesu mo vere meje matara ale mo vereea isana nona tamlohi usuri vara la aseasera isan vao atu.

⁸ Tamlohi tari la hanhahi vavano la masu. Hitahu nona tamlohi usuri la sohoni na

sope hanhahi na tanga mo limaravrua. ⁹ Evi tamlohi korong mo tikeli tari vaha vati (4000). Ale lara la hanhahi moiso Iesu mo rulara la mule. ¹⁰ Hitahu Iesu mo vele na boti matea peresi na nona tamlohi usuri la vano na jara matan Dalmanutha.

Pharisee La Usi Na Matamata (Mt 16.1–4)

¹¹ Pharisee lara la rongoa vara Iesu mo pala atu, la mai vara la usi arearea hin te hinau, la opoia vara i vai te matamata matan na tuka vara i vujangia vara enia hare.

¹² Pani Iesu mara mo rongoa mo mapsoro ale mara, “Kamim ka lo usi na matamata mata sava? Vara ruhu na vereea isamim vara enau a pa sopo vai te matamata vara kamim pin tamlohi nake ha pa hitea.” ¹³ Iesu mo malue isara ale mo vele hin pa boti atu, mo mele varo roto tasi atu.

Hehe Nona Pharisee (Mt 16.5–12)

¹⁴ Pani nona tamlohi usuri la fomaliho vara la lavi te pereti, ale la lo toho peresi na pereti matelete purongo na lolo boti. ¹⁵ Ale la pa lo vano roto tasi atu, Iesu mo reti roafoahaira mara, “Ha lo kilau mata isi nona Pharisee peresi Herod!”

¹⁶ Nona tamlohi usuri lara la rongoa la romi vara mo lo vereea sohena matan la sopo lavi te pereti. ¹⁷ Pani Iesu mo levosahi na sava mo lo toho na fomira, ale mo vereea isara mara, “Mata sava ka lo sorahia vara ka sopo lavi te pereti? Ka sopo lo levosahia? Korong fomimim la pelati. ¹⁸ Matamim la vuso? Teni ka peropero? Ka sopo mele fomomi na sava na lo vaira tiroma?” ¹⁹ Hin rani atu sei na lo ase na pereti mo lima isan la tamlohi atu mo tari vaha lima (5000), ale tanga sope hanhahi mo visa ka pa mele takonahira?”

La faramia lara, “Kama sohoni na tanga mo sangavulu fomana mo rua.” ²⁰ Ale mo mele vereea mara, “Hin rani atu na vahani na tamlohi mo tari vaha vati (4000) na pereti mo limaravrua, ale tanga mo visa ka pa mele takonahira?”

Lara, “Mo limaravrua.”

²¹ Iesu mo mele vereea isara mara, “Ka lo levosahi na sava na lo vereea teni mo vono?”

Tamlohi Vuso Matea

²² Iesu peresi na nona tamlohi usuri lara la pala Bethsaida, tamlohi hai la lavi na tamlohi vuso matea la mai isana, ale la usia filangi isana vara i tikelia na limana. ²³ Ale Iesu mo tauri na liman tamlohi atu mo tiroma hinia la malue hin vanua atu. Ale mara mo litovi na matana, ale mo tau na limana hinia moiso mo usia isana mara, “Ko hite te hinau?”

²⁴ Tamlohi atu mo kilakilau falihi ale mara, “Na hite na tamlohi, pani la sohena vipahai la lo hahau falihi.”

²⁵ Ale Iesu mo mele tau na limana na matana, moiso tamlohi atu mara mo mele roi na matana mo efi hite na hinau tari la memera. ²⁶ Iesu mo vereea isana mara, “O mule, pani o sopo hahau na vanua.”

Iesu Enia Krīsto

(Mt 16.13–20; Lk 9.18–21)

²⁷ Iesu peresi na nona tamlohi usuri la malue Galilee ale la sahe na vanua sei la lo toho na jara matan Caesarea Philippi. La pa lo hahau Iesu mo usi na nona tamlohi usuri mara, “Ka rongo na tamlohi la lo vereea vara enau hare?”

²⁸ La faramia lara, “Tamlohi hai la vereea vara engko John tamlohi paptijo, hai la vereea vara engko Elijah. Hai la lo vereea vara engko p̄rovet matea.”

²⁹ Moiso Iesu mo pete usia isara mara, “Pani kamim, ka lo vereea kara enau hare?”

Peter mo faramia mara, “Engko natu pa Krīsto atu!” ³⁰ Ale Iesu mo vereea filangi isara vara la sopo mele vereea isan tea vara enia hare.

Mo Retireti Na Nona Mateia

(Mt 16.21–28; Lk 9.22–27)

³¹ Iesu mo tapulo vereea isara mara Natun Tamlohi i pa lavi na rani filangi na hinau matuvana. Ale tamlohi aulu matan Israel peresi na p̄ris aulu, peresi na tamlohi vujangi mata leu la pa fohu hinia, ale la pa vilimateia, pani i pa mele turu na hatolu rani. ³² Mara mo lo vere la hinau atu sohena, Peter mo lavi Iesu mo vano hasena, ale mo reti filangi isana vara i sopo retireti sohen haratu.

³³ Pani Iesu mo posi mo kilau vano isana nona tamlohi usuri, mo reti filangi isan Peter mo vereea mara, “O rovo isaku Setan. Romfomi atu mo tai isana tamlohi, mo sopo tai isan God.”

³⁴ Ale Iesu mo tovi la vao atu peresi na nona tamlohi usuri vara la mai isana, ale mo vereea mara, “Vara te vonamim hatea mo opoia vara i usuriau, o vaihitea vara o fomaliho na masalom moiso o soloti na nom talopeilopei ale o usuriau!” ³⁵ Matan sava tamlohi vara mo opoia vara juri na maurina, i pa vaitihaia, pani hare vara mo vaitihai na maurina matakū peresi na Retifuhu i pa juri na maurina. ³⁶ Sava hinau mo fuhu hinia vara o lavi na hinau tari matan varama nike, pani o pa vaitihai na maurim? ³⁷ Sava hinau natu, o pa efi vaia vara o efi volituhu na maurim hinia?

³⁸ Matan sava tamlohi vara mo mahenuhanu hiniau peresi na noku retireti hin pina vaivaileu nike sei mo lejileji, enia sohena Natun Tamlohi i pa sopo avulahi

hinia hin rani atu i pa mai peresi na nona angelo tapu peresi na mera tavera non Tamana.”

9

¹ Iesu mo mele vereea isara mara, “Varafuhu na vereea isamim vara tatuamim sei la lo turu nakerihi, la pa sopo lo mate la pa hite mauri atu God mo aulu hinia i mai na suihana tavera.”

Epen Iesu Mo Posi

(Mt 17.14–21; Lk 9.28–36)

² Rani mo limarave la vano moiso, ale Iesu mo lavi Peter, James peresi John, la sahe aulu na vutivuti enira hasera. Hin rani atu la hite na epen Iesu mo posi, ³ ale la hite na nona ruru la mera hajavua, la lulu tinapua, la jeu na hinau lulu tari nike na varama. ⁴ Moiso la hite p̄rovet Elijah enia Moses la pala ale la lo sorosora peresi Iesu. ⁵ Peter mo vereea isan Iesu mara, “Moli, mo fuhu matan kama lo toho akerihi. Mo fuhu fa vai te tent i tolu akerihi, matea nom, matea non Moses ale matea non p̄rovet Elijah.” ⁶ Matan Peter mo sopo levosahia vara i pa vere na sava matan la matahu hajavua.

⁷ Ale telangi matea mo mai mo hohovira, moiso la rongo na leo matea mo malue hinia mara, “Harihi enia Natuku sei na opoia mo tavera jea. Ha tapurongo isana!” ⁸ Vahatea purongo la pa ale Moses enia Elijah pani la tihai, pani la hite Iesu hasena mo pa lo toho atu. ⁹ Ale lara la lo sevuti na vutivuti, Iesu mo reti horora vara la sopo mele vereea na sava la hitea isan te tamlohi vavano Natun Tamlohi i mele mauri na mateia. ¹⁰ Ale la sopo mele vereea isan tea, pani la lo usia vara faramin reti sei vara i pa mele turu na mateia enia sava.

Elijah I Pa Mele Mai

¹¹ Ale la usia isana lara, “Mata sava natu, tamlohi vujangi mata leu la vereea lara, ‘Elijah i pa mai tiroma?’ ”

¹² Iesu mo faramira mara, “Varafuhu, Elijah i pa mai tiroma vara i vai tataholo na hinau tari. Pani mata sava natu la ulia na Retiulia vara Natun Tamlohi i pa lavi na filangi ale la pa vailejleja na nora hitefesi?” ¹³ Pani na vereea isamim vara Elijah mo pete mai moiso, ale tamlohi la vailejleja usuri na masalora sohena Retitapu mo lo vereea.”

Iesu Mo Tueni Na Uluvou Matea

(Mt 17.14–20; Lk 9.37–43a)

¹⁴ Iesu peresi la tupu tolu atu, lara la mele sevuti sivo na pulon vuti atu, la hite na tapalara tamlohi usuri peresi na vao tavera matea la lo turu falihira, ale la hite na tamlohi vujangi mata leu hai la lo vasvasi peresira. ¹⁵ Ale la vao tamlohi atu lara la

hite Iesu la hutura hinia, ale vahatea la avulahi la maro vano isana.

¹⁶ Iesu mo usi na nona tamlohi mara, “Eh! Kamim ka lo vauriuri na sava?”

¹⁷ Vonara matea mo vereea isan Iesu mara, “Tija, na lavi natuku na mai isam matan tanume mata mengo mo lo toho isana. ¹⁸ Vara mo vaia, mo lo pulahia atano na lepa, ale epena la lo rira mo lo hatihati na huřuna moiso jingona mo lo valval. Ale na usia isana nom tamlohi usuri vara la titiu nařihi tanume sasati nike, pani la sopo eri vaia.”

¹⁹ Iesu mo řaramira mara, “Kamim nomim rasua mo sohena sava! A pa toho peresi kamim i tikeli pangisa? A pa tueni kamim i tikeli pangisa? Ha lavi uluvou atu i mai isaku!”

²⁰ Moiso la lavi uluvou atu mo mai isana, ale tanume sasati atu mara mo hite Iesu, mo tuatuahi pa uluvou atu mo jovi atano na lepa, ale mo lo makurekure, moiso valval jingona mo lo malue.

²¹ Iesu mo usia isan tamana mara, “Tanume sasati nike mo tapulo vaia nangisa?”

Ale tamana mo řaramia mara, “Na rani mo lo natirihia. ²² Hin te rani mo vaia mo jovi na hapu teni na wai vara i vilimateia. Pani vara o eri vai te hinai, o řomopoi kamam, o tueni kamam.”

²³ Iesu mara, “Ko vereea vara a eri vaia! Vara te nom rasua o eri vai na hinai tari!”

²⁴ Vahatea tamana mo řaramia mara, “Na rasua, pani o nařihi na noku řomkaka!”

²⁵ Ale Iesu mara mo hite na vao matea la lo maro la mai vara la pa turu porotia matana, mo reti řilangi isan tanume lumihia sasati atu mara, “Tanume mengo, na vereea isam vara o malue isan uluvou sei nakerihi! O sopo mele unu hinia hin te rani!” ²⁶ Tanume sasati atu mo ulo sasati, mo mele tuatuahia mo jovi sivo atano moiso mo malue hinia. Tamlohi la hitea sohena vara uluvou atu mo mate moiso, ale lara, “Eh, mo mate!” ²⁷ Pani Iesu mo sau, ale mo mele turu.

²⁸ Ale hitahu Iesu mara mo mele unu hin ima atu, nona tamlohi usuri la usia lara, “Mata sava natu, kamam kama sopo eri titiu nařihi tanume sasati atu?”

²⁹ Ale Iesu mo vereea isara mara, “Tanume sasati sohen haratu, ususi purongo i eri titiu nařihia.”

Iesu Mara I Pa Mate

(Mt 17.22–23; Lk 9.43b–45)

³⁰ Iesu peresi na nona tamlohi la malue hin jara atu, ale la hahau roto na jara Galilee, matan hin rani atu Iesu mo sopo opoia vara tea i levosahia vara mo lo toho atu. ³¹ Matan mo opoia vara i vujangi

na nona tamlohi usuri hasera. Mo mele vereea isara mara, “Tamlohi la pa turuposi hin Natun Tamlohi, ale la pa taua na lima tamlohi vara la vilimateia. Pani na hatolu rani i pa mele turu na mateia.” ³² Pani la sopo rongovosahi na sava hinai mo lo vereea isara, ale la matahu vara la usi na řarami nona retireti.

Hare Mo Aulu

(Mt 18.1–5; Lk 9.46–48)

³³ Lara la kakau Capernaum, ale la unu na ima matea mata la pa toho hinia. Iesu mo usia isara mara, “Sava natu, ka lo sorahia na malele?” ³⁴ Pani la sopo řaramia matan la lo vauriuri vara hare natu mo aulu jea hinira. ³⁵ Ale Iesu mo sakele mo tovi la tupu sangavulu řomana mo rua atu la mai isana mara, “Vara tea mo opoia vara i aulu i jeu na tinapua, enia i pa hasena taua atano i jeu na volitusi nona tamlohi tari.”

³⁶ Moiso Iesu mo lavi na natirihia matea hin vao atu ale mo taua na livuhara. Moiso mo tulia mara, ³⁷ “Vara tea mo lavi te natirihia sohen haranike na hijaku, enia mo lo laviau. Ale vara tea mo laviau, mo sopo laviau haseku, pani mo lo lavi Tamaku sei mo lo řuleau sohena.”

Vavahinau Na Hijan Iesu

(Lk 9.49–50)

³⁸ John mo vereea isan Iesu mara, “Tija, kama hite na tamlohi matea mo lo titiu nařihi na tanume sasati na hijam, pani kama horoa vara i isoiso matan enia mo sopo tatuafa.” ³⁹ Pani Iesu mo vereea isara mara, “Ha sopo horoa, matan i pa sopo te tamlohi hatea vara mo lo vai na matamata tavera na hijaku i eri mele verelejelejiu hin te rani. ⁴⁰ Matan la haratu la sopo turuleji hiniřa, enira nořa. ⁴¹ Varařuhu na vereea isamim, vara tea mo sile te paniken wai hamařiri isamim matan ka tamlohi non Kristo, varařuhu enia i pa lavi na otori matana!”

Ha Lo Kilau Mata Posposi Hehe

(Mt 18.6–9; Lk 17.1–2)

⁴² “Pani vara tea mo vai na natirihia matea sohen harihi sei mo rasuau i jovi na hehe, i pa mele řuhu jea vara la lasi te vatu tavera na řalona, ale la putehia na tasi puaha. ⁴³ Vara limam mo lo vaiho ko lo vai na hehe, o tai nařihia! I pa mele řuhu jea vara o lavi mauri atu na tuka peresi te limam hatelete purongo, mo jeu haratu vara o pa vano na hapu mata moruhapu sei mo sopo eri mate peresi na limam mo rua! ^{44–45} Vara palom mo lo vaiho ko lo vai na hehe, o tai nařihia! I pa mele řuhu jea vara o unu hin mauri atu na tuka peresi te palom hatelete purongo, mo jeu haratu vara la pulahiho peresi na palom mo rua na moruhapu. ^{46–47} Vara

matam mo lo vaiho ko lo vai na hehe, o hoti nañihia! Mo mele fūhu jea vara o unu hin mauri atu God mo aulu hinia peresi te matam hatelete purongo, mo jeu haratu vara la pulahiho peresi na matam mo rua na moruhapu. ⁴⁸ 'Hin jara atu hulesira la sopo efi mate, ale hapu mo sopo mate hin te rani.'

Isa 66.24

⁴⁹ Matan God i pa tau na hapu mata rani filangi na mauri tamlohi tari, matan vara i hani nañihia na hehe na maurira sohena solo mo lo vai na mit mo sopo ranga. ⁵⁰ Solo mo fūhu, pani vara mejina mo tihai, ha pa efi vaia i mele meji sohena sava? Ha taurilati na fomimim mata fōhu na hehe, ale ha toho na tamata peresi kamim hatehateahi!"

10

Vujangi Mata Lahi (Mt 19.1–12; Lk 16.18)

¹ Ale Iesu mo malue Capernaum, mo sivo na jara matan Judea, ale mo vano na tavalu wai Jordan na jara Opae hinia. Hin jara atu vao tamlohi la mele mai isana sohen tarea, ale mo lo vujangira sohen tarea.

² Pharisee hai la mai isana la vaihitea hin retusia akerihi lara, "Tamlohi i pa tope na leu vara mo rohu hin narouna teni mo vono?"

³ Iesu mo řaramira mara, "Leu non Moses mo vereva vara sava?"

⁴ La tamlohi atu la vereva lara, "Moses mo majinga hinia mara i pa uli na certificate matea matana, moiso i pa efi rule nañihia i vano."

Deut 24.1–4; Mt 5.31

⁵ Pani Iesu mo řaramira mara, "Moses mo pa uli leu atu matan patumim mo filangi.

⁶ Pani na pongi tiroma sei God mo vai na varama, 'Mo vai na lamane peresi na hañai.' *Gen 1.27; 5.2*

⁷ Mata hinau atu natu, tamlohi matea i pa sořotahi isan narouna, i pa malue isan tamana enia tinana. ⁸ La tupra rua atu la pa mai epe matelete purongo.' Matan la sopo mele mo rua, pani la pa matea, *Gen 2.24* ⁹ i pa sopo te tamlohi hatea i efi mele tauhasehira matan God mo sořotahira la mai matea moiso.' ¹⁰ Ale hitahuna, Iesu mara mo lo toho hasena na ima peresi na nona tamlohi usuri, ale la mele usia hin pa vujangi atu. ¹¹ Ale Iesu mo vereva isara mara, "Vara te tamlohi mo rohu hin narouna, moiso mo mele lavi na hañai tinapua, enia mo lo vaivaileu peresi hañai atu. ¹² Ale vara te hañai mo fōhu hin tuana, moiso mo mele lahi isana tamlohi tinapua, enia mo lo vaivaileu peresi tamlohi atu."

Iesu Mo Leřuhu Na Natuvarihia (Mt 19.13–15; Lk 18.15–17)

¹³ Na rani tinapua, tamlohi hai la lavi na natura la mai isan Iesu matan vara i tau na

limana hinira, ale i leřuhu hinira, pani nona tamlohi usuri la lo horora. ¹⁴ Pani Iesu mara mo hitea mo lolokoru hinira, ale mo vereva isara mara, "Ha tinañihia na natuvarihia la mai isaku, ha sopo horora matan mauri atu God mo aulu hinia, enia nona la haratu sei la sohera. ¹⁵ Varařuhu na vereva isamim vara te tamlohi mo sopo efi lavi mauri atu God mo aulu hinia sohen natirihia nika, enia i pa sopo efi unu hin mauri atu hin te rani." ¹⁶ Moiso Iesu mo tuli na natuvarihia na limana, ale mo tau na limana aulu na patura mo leřuhu hinira.

Tamlohi Tavtav Matea (Mt 19.16–30; Lk 18.18–30)

¹⁷ Na rani matea, Iesu mo pa tapulo vara i mele vano na nona hahau matea na jara tinapua matea, uluvou matea mo maro mo mai ale mo papaohi isan Iesu mo usia mara, "Tija fūhufūhu, a pa vai na sava natu vara a lavi na mauri tui hinia?"

¹⁸ Iesu mo vereva mara, "Mata sava ko vereva vara na fūhu? God hasena mo fūhu. ¹⁹ Engko ko levosahi na leu, 'O sopo vili-mateia na tamlohi, o sopo vaivaileu peresi na tinapua mo lahi moiso, o sopo vavanaho, o sopo halu, o sopo retihalu hin tahisam, o sopo vai te halu mata vavanaho, moiso o ololo hin tamam enia tinam.'" *Exo 20.12–16; Deut 5.16–20*

²⁰ Uluvou atu mo vereva mara, "Tija, la leu tari atu na lo usurira na pa lo natirihia mo sinai mo kakau nake."

²¹ Iesu mo kilau tataholo isan tamlohi atu na opoia, ale mo vereva isana mara, "Ko pa lo vejuveju na hinau matea. O vano o hañehi vevuhi na nom hinau tari, ale o sile na maniana isana tilavono, ale o pa lavi na tadvav na tuka. Moiso, o pa mai, o usuriau!" ²² Pa tamlohi atu fomina mo jovi mata sava Iesu mo vereva isana, matan enia tamlohi tadvav matea.

Vujangi Mata Suihan God

²³ Iesu mo kilau řalihia, ale mo vereva isana nona tamlohi usuri mara, "I pa filangi isan la haratu la tadvav vara la unu hin mauri atu God mo aulu hinia." ²⁴ Nona tamlohi usuri la mařurahi na nona reti matan la lo fomfomia lara God mo leřuhu na tamlohi tadvav. Iesu mo mele vereva isara mara, "Natuvarihia, mo filangi jea vara tea i efi unu hin mauri atu God mo aulu hinia! ²⁵ Mo mele malum jea vara camel i unu na koko niteli matea mo jeu haratu vara tamlohi tadvav matea i efi unu hin mauri atu God mo aulu hinia."

²⁶ Nona tamlohi la mařurahi tavera hinia, ale la lo ususira hinia lara, "Hare natu, i pa efi juri?"

²⁷ Iesu mo kilau tatahoro isara mara, “Hinau tamlohi la sopo efi vaia, God i efi vaia. Matan God i efi vai na hinau tari.”

²⁸ Moiso Peter mo tapulo vere a isan Iesu mara, “Kama tinarihi na hinau tari vara kama usuriho!”

²⁹ Ale Iesu mara, “Varafuhu, na vere a isamim, vara tea mo tinarihi na imana, teni tasina teni vetasina, teni tamama teni tinana teni te natuna, teni jarana, ale mo tinarihira matakū teni mata Retiruhu, ³⁰ enia i pa mele lavia nika nake na varama i vaha ngavulu sangavulu (100) na imana, na voraina peresi na vetasina, tinana, peresi na natuna teni jarana, ale i pa lavi na rani filangi na lima tamlohi, pani na pongi hitahu i pa lavi na mauri tui. ³¹ Pani la haratu sei la lo romfomia vara enira la aulu na tamlohi nake, la pa atano jea, ale la haratu sei la lo atano nake, la pa aulu hinira.”

*Iesu Mo Mele Vere a Vara I Pa Mate
(Mt 20.17–19; Lk 18.31–34)*

³² Ale lara la lo vano na malele vara la sahe Jerusalem, Iesu mo lo vano tiroma, ale la haratu na harina la marurahi na nona reti, ale la tupu sangavulu romana mo rua atu la matahu matan Iesu mo mele tapulo vere na sava i pa masese isana Jerusalem. ³³ Mo vere a isara mara, “Ka hitea, ra lo sahe Jerusalem nahai, pani i pa sopo tuai la pa tau Natun Tamlohi na lima moli mata p̄fis peresi na tamlohi vujangi mata leu, ale la pa silea na talai vara i mate, moiso la pa taua na lima mara Rome. ³⁴ La pa retikerekerehia, la pa litovia, la pa rupia na asi maja, ale la pa vilimateia. Pani na hatolu rani i pa mele turu na mateia.”

*Vujangi Mata Volitusi
(Mt 20.20–28)*

³⁵ Ale James enia John natun Zebedee, la mai isan Iesu la vere a isana lara, “Tija, kama opoi na hinau matea vara o pa vaia matamam.” ³⁶ Iesu mara, “Ka opoia vara a vai na sava matamam?”

³⁷ La vere a lara, “Kamam kama opoia vara kama pa sakele na pahisam na nom rani suiha. Matea na matuam, ale matea na maraum.”

³⁸ Ale Iesu vere a isara mara, “Ka sopo levosahi na sava hinau ka lo usia. Kamim ha efi inu hin paniken atu mata rani filangi sei a pa inu hinia? Kamim ha efi lavi paptijo atu mata rongohaji sei a pa lavia?”

³⁹ La faramia lara, “Kama efi vaia.”

Ale Iesu mo vere a isara mara, “Ha pa inu hin paniken atu sei a pa inu hinia, ale ha pa lavi paptijo atu sei a pa lavia, ⁴⁰ pani mo sopo noku hinau vara a pa vere a vara hare natu i pa sakele na matuaku teni na marauku. God Tama mo tatamahuni la jara

atu moiso matan la haratu sei mo viŋonira moiso.”

Haratu Mo Aulu Varafuhu

⁴¹ La tupu sangavulu tinapua atu lara la rongo hinau atu la lolokoru hin James enia John. ⁴² Ale matana, Iesu mo tovi matavuhira mai isana mo vere a isara mara, “Ka levosahia vara la haratu la lo aulu na tamlohi rofoha la lo romromira hasera purongo, ale la lo vailehilehi na tamlohi la lo toho na ruhuruhura. ⁴³ Pani i pa sopo sohen haratu isamim. Vara te vonamim mo opoia vara i aulu hin kamim, enia i pa mai sohana nomim volitusi. ⁴⁴ Ale vara tea mo opoia vara i tiroma, enia i pa mai sohana slev nona tamlohi tari. ⁴⁵ Matan hina purongo vara enau na Natun Tamlohi, na sopo mai vara tamlohi la volitusi isaku. Pani na mai vara a volitusi, ale vara a hase sile na mauriku vara i volituhu na tamlohi matuvana.”

*Iesu Mo Tueni Bartimaeus
(Mt 20.29–34; Lk 18.35–43)*

⁴⁶ La kakau Jericho, ale hitahu Iesu mara mo pa lo malue Jericho tolu na nona tamlohi usuri peresi na vao tavera matea, tamlohi matavuso matea hijana Bartimaeus natun Timaeus, mo lo sakele na pahisa malele, ale mo lo usi na mania isana tamlohi. ⁴⁷ Ale mara mo rongoa vara Iesu mara Nazareth mo lo hahau hin jara atu, mo tapulo tangi aulu mara, “Iesu, natun Supe David, o romopoiau!”

⁴⁸ Pani tamlohi matuvana la merusahia lara i toho malum, pani mo mele ulo aulu jea mara, “Natun Supe David, o romopoiau!”

⁴⁹ Iesu mara mo rongoa mo turu atu, mo vere a isara mara, “Ha vere a i mai isaku!”

Ale tamlohi la tovi matavuso atu lara, “Eh, romim i sopo sati! O turu! Iesu mo toviho.” ⁵⁰ Mo pulahi narihi na nona ruru hamariri, mo vai vilavila mo mai isan Iesu.

⁵¹ Iesu mo usia mara, “Ko opoi na sava vara a vaia isam?”

Matavuso atu mo farami Iesu mara, “Tija, na opoia vara a efi kilau.”

⁵² Ale Iesu mara, “O vano! Nom rasua mo vaiho ko fuhu moiso.”

Ale vahatea purongo matana la kilau, moiso mo usuri Iesu na malele.

11

Iesu Mo Unu Jerusalem

(Mt 21.1–11; Lk 19.28–40; Jn 12.12–19)

¹ Iesu tolu na nona tamlohi usuri la lo usuri na malele mo sahe Jerusalem, ale la mai na vanua matan Bethphage peresi Bethany na pahisa vutivuti sei la tovia Vuti talu Olive. Iesu mo rule na nona tamlohi usuri mo rua vara la vano tiroma hinira.

² Mo vereea mara, “Ha vano hin vanua aturahi ale ha unu hinia, ale ha pa hite na natu donki matea la lihoa. Tea mo sopo lo sakele hinia hin te rani. Ha uli na asina, ale ha lavia i mai isaku. ³ Vara tea mo usi kamim vara, ‘Ka lo vai na sava?’ ha vereea vara, ‘Moli mo opoia, ale i pa mele sohaia i mai nohorihī.’”

⁴ La vano hin vanua atu, moiso la hite natu donki atu mo lo toho na pahisa malele la lihoa na jingoima ima matea, ale la uli na asina. ⁵ Pani tamlohi hai sei la lo turu atu la usira lara, “Mata sava ka lo uli na asin natu donki sei?” ⁶ La faramira sohen Iesu mo vereea isara moiso, ale la tamlohi atu la tinafihia vara la lavi natu donki atu i vano. ⁷ La lavia mo mai, la vuʻangi na nora ruru aulu na haʻin natu donki atu, ale Iesu mo sahe mo sakele hinia.

⁸ Tamlohi matuvana la vuʻangi na nora ruru na malele, ale hai la lo tai na rau pahai na pahisa malele la vuʻangira na malele vara natu donki atu i pa hahau hinia. ⁹ Tamlohi hai la lo hahau tiroma, hai la lo hitahu, ale Iesu mo lo toho na livuhara, ale la lo uloulo tavera lara,

“Hasohaso God!” *Psa 118.25*

Ale “Leʻruhu isan haratu sei mo lo mai na hijan Moli God”. *Psa 118.26*

¹⁰ “Avulahi tavera mo lo mai mata rani suiha non tamaʻa Supe David mo pala.”

“Hasohaso God aulu na tuka sei mo aulu jea!”

¹¹ Iesu mo unu Jerusalem, ale mo unu na rope Temple. Ale mara mo vano ʻalilihi mo hite na hinau tari moiso, ale matan pongi mo mai mariviti moiso mo malue mo vano Bethany peresi la nona tamlohi atu mo san-gavulu fomana mo rua.

Mo Lesati Na Vipahai Fig Matea
(*Mt 21.18–19*)

¹² Na harua rani na ʻalavuhu, la malue Bethany ale la lo vano, Iesu mo marohati. ¹³ Mo hite na vipahai fig matea mo lo turu asau na pahisa malele, ale mo hahau mo vano hinia vara i hitea vara te vuana, pani mo sopo te vuana, mo lo rauha purongo matan mo sopo lo taro mata i vua. ¹⁴ Iesu mo reti isan vipahai atu mara, “I pa sopo mele tea i eʻi mele hani te vuam hin te rani.” Ale nona tamlohi usuri la rongo reti atu mo lo vereea isana.

Iesu Mo Levutira Na Temple
(*Mt 21.12–17; Lk 19.45–48; Jn 2.13–22*)

¹⁵ La vano la mele tikeli Jerusalem moiso Iesu mo unu na rope Temple, mo tapulo le-vuti la haratu sei la lo haʻehi na hinahinai peresi la haratu sei la lo voli na nora hinahinai. Iesu mo tarasahi na tep non la haratu la lo jeni na mania nona tamlohi

sei la mai Jerusalem. Mo vano mo toho roiroi na palapala non la haratu la lo haʻehi na vomahe. ¹⁶ Mo horo la haratu sei la opoia vara la lavi na nora hinahinai mata haʻehira na lolo ropen Temple atu. ¹⁷ Ale Iesu mo vujangira mo vereea isara mara, “Ka sopo lo levosahi na sava la ulia na Retiulia sei mo vereea vara,

‘Imaku enia ima mata ususi nona tamlohi tari na varama.’ *Isa 56.7*

Pani nake ka vaia mo mai sohena, ‘Papa tamlohi vili tamlohi mata mania matea.’” *Jer 7.11*

¹⁸ Pʻis aulu peresi na tamlohi vujangi mata leu lara la rongo na sava Iesu mo vaira na Temple, la tapulo aleale malele vara la vilimateia hinia. Pani la matahuni Iesu matan tamlohi tari la lo maʻurahi tavera na nona vujangi. ¹⁹ Na ravravi Iesu enia tolu na nona tamlohi usuri la mele malue Jerusalem.

Pa Vipahai Fig Atu Mo Koru
(*Mt 21.20–22*)

²⁰ Na ʻalavuhu tinapua, lara la mele vano maʻfiviti hin pa vipahai fig atu, la hite na rauna la menumenu, ale lahona peresi na warina la koru moiso. ²¹ Peter mo mele fomfomi pa reti atu non Iesu sei mo vereea isan vipahai atu, ale mara, “Tija, o to kilau vano! Pa fig atu ko lo lesati hinia mo koru moiso.”

²² Moiso Iesu mo faramia mara, “Ha tau na nomim rasua hin God! ²³ Varaʻuhu na vereea isamim, vara tea nona rasua mo filangi, ale mo sopo fomkaka hinia, i eʻi vereea isan vuti tavera akerihi vara, ‘O hase taheho o sahe aulu, ale o pulahiho sivo na tasi tavera!’ ale i pa oloulo hinia! ²⁴ Ha tapurongo isaku! Na vereea vara sava hinai ka usia na nomim ususi, vara ka rasua mo filangi i pa sohena. ^{25–26} Pani vara ka lo ususi, ha romi na hehe nona tinapua sei la vaia isamim, ha fomira tiroma, matan vara Tamamim na tuka sohena i eʻi fomni na nomim hehe.”

Tamlohi Tavera La Mai Isan Iesu
(*Mt 21.23–27; Lk 20.1–8*)

²⁷ Iesu peresi na nona tamlohi usuri la mele unu Jerusalem, ale lara la lo hahau na lolo rope Temple, pʻis aulu tolu na tamlohi vujangi mata leu peresi na tamlohi aulu tinapua hai la mai isana, moiso la reti isana lara, ²⁸ “Sava suiha natu ko lo vai la hinai nika hinia teni hare mo sileho na suiha matana?”

²⁹ Iesu mo vereea isara mara, “A pa usi kamim na retiusia matea, ale vara ha faramiau, enau a pa vere kamim hinia vara na lavi na suiha isan hare natu na lo vai la hinai nika hinia. ³⁰ Ha to vereau hinia,

paptijo non John mo tai isan God teni isana tamlohi?"

³¹ Ale la lo hasera sorasorahia lara, "Vara ƀa vereea vara enia mo tai isan God, i pa usiƀa vara, 'Mata sava natu, ka sopo rasu John?' ³² Pani vara ƀa vereea vara enia mo tai isana tamlohi, la vao nike la pa lo lolokoru hiniƀa." La lo vereea matan la matahu vara la pa vai la vao tamlohi atu la lolokoru ale la sopo eƀi mele vaira la toho malum, matan la vao atu la rasua vara John enia pƀovet varaƀuhu matea. ³³ Matan haratu, la tamlohi tatavera atu la ƀarami Iesu lara, "Kama sopo levosahia."

Ale Iesu mo vereea isara mara, "Enau sohena, a pa sopo vere kamim hinia vara sava suiha natu, na lo vavahinau hinia."

12

Vujangi Mata Tamlohi Sasati

(Mt 21.33–46; Lk 20.9–19)

¹ Ale na lolo rope Temple Iesu mo tapulo vujangi na titileu isara mara, "Tamlohi tavera matea mo lavo na isa mata grape matea. Mo vai na ropena, mo voro na jara mata lavi naƀihi na waena hinia. Mo voro na ima aulu matea mata kilau na isana. Ale mo sile isana atu vara tamlohi lalavo tinapua la pakaia, ale la lalavo hinia. Moiso pa tamlohi tavera atu mo vano na jara tinapua mata i tohoa ea. *Isa 5.1–2*

² Taro mata vua grape la mena, ale pa tamlohi tavera atu mo ƀule na nona volitusi matea mo vano vara i lavi na fungana vuara. ³ Pani pa la tamlohi atu la tauri pa volitusi, la hamajia, moiso la ƀulea mo vano lekoleko.

⁴ Tamlohi tavera atu mo mele ƀule na volitusi tinapua matea. Mo vano, pani la hamajia na patuna, ale la vaimahanuhanu hinia.

⁵ Tamlohi tavera atu mo mele ƀule na volitusi tinapua matea. Pani la vilimateia. Tamlohi tavera atu mo mele ƀule te nona volitusi tinapua matuvana, pani hai la hamajira, ale hai la vilimateira vavano, ⁶ tamlohi tavera atu mo hitea vara natuna tataholo purongo mo pa lo toho. Enia mo opoia mo tavera jea, ale mo ƀomƀomia mara, 'Na levosahia vara a ƀule natuku i sivo, la pa oloolo hinia.'

⁷ Pani pa la tamlohi sasati atu la lo revererera isara hasera lara, 'Natuna tataholo nakerihi mo lo mai, vara ƀa vilimateia, ƀa pa lavi na koruna tari!' ⁸ La tauria, ale la vilimateia moiso la pulahia mo sahe na jingoiman rope atu."

⁹ Iesu mo usia isara mara, "Ka ƀom vara tamlohi tavera atu i pa vai na sava? A vereea tataholo isamim, i pa sinai i vilimateira enira mo isoiso, ale i pa sile isa atu isana tamlohi tinapua vara la mele pakaia.

¹⁰ Varaƀuhu, ka sopo lo evi hinau nike na Retiulia?

'Vatu atu tamlohi voro ima la lo tipahia, enia mo mai tapulo pulo vatu mata ima.

¹¹ Hinau atu Moli God hasena mo vaita.

Kama hitea vara mo ruhu jea.' "

Psa 118.22–23

¹² Tamlohi tatavera non Jew la opoia vara la taurilatia matan la hitevosahia vara Iesu mo lo vere titileu atu matan vara i pisuhira, pani la matahu vara la tauria matan la vao atu. Matan haratu, la malue atu, ale la rovo.

Ha Voli Na Takis

(Mt 22.15–22; Lk 20.20–26)

¹³ Ale la ƀule na Pharisee hai peresi na tamlohi hai non Herod Antipas la vano isan Iesu matan vara la vaihitea vara i ori hin te nona retireti. ¹⁴ Ale la mai isana la vereea lara, "Tija, kama levosahia vara engko ko lo varaƀuhu, ale ko sopo tametame na ƀomƀomi nona tamlohi, matan ko sopo usuri na kilakilau nona tamlohi isana tamlohi aulu, pani engko ko lo vujangi na malele tataholo non God usuri na reti-varaƀuhu.

Nomam retiusia isam nahai, mo tataholo vara tavtavuin Israel la voli na takis isana supe nona mara Rome teni mo vono? Ra pa silea teni i toho?" ¹⁵ Pani Iesu mo levosahi na nora tapnetano, ale mo vereea isara mara, "Mata sava ka lo vaihitea sohena? Ha lavi te selen hatea i mai isaku a hitea." ¹⁶ Ale la lavi matea la silea isana moiso mo usia isara mara, "Niniun hare nahai, ale hijan hare nahai la ulia hin selen nike?"

Lara, "Nahon supe nona mara Rome."

¹⁷ Ale Iesu mo vereea isara mara, "Ale ha sile na hinau non supe nona mara Rome isan supe nona mara Rome, ale hinau non God isan God."

Ale lara la rongo mo ƀaramira sohena, la maƀurahi tavera hinia.

Vujangi Mata Sauteterahi Na Mateia

(Mt 22.23–33; Lk 20.27–40)

¹⁸ Ale Sadducee hai la mai isan Iesu, enira vao matea na Jew sei la sopo rasua vara God i pa sauteterahi na tamlohi na mateia. La mai isana la usia na retiusia matea lara, ¹⁹ "Tija, Moses mo ulia mara vara tamlohi lahi matea mo mate, pani narouna mo sopo vasusu, tasina i pa lavi na malepuna i mai narouna matan vara haƀai atu i eƀi lavi te natun tavaina. *Deut 25.5*

²⁰ Tuai, vorai mo limaravrua la lo toho. Ale vora tiroma mo lavi na haƀai matea, pani mo sopo lo te natuna, ale mo mate.

²¹ Vora usuria mo pete lavi haƀai atu, pani enia sohena mo mate, mo sopo te natuna. Hatolura mo pete lavia, ale mo mate mo sopo te natuna. ²² Mo sohena mo tikeli na vora hitahu, ale enira mo isoiso la mate.

Haʻrai atu sohena mo mate, pani mo sopo te natuna. ²³ O to vere kamam hinia vara haʻrai atu i pa naroun hare na pongi sauteterahi matan enia mo lahi isan la vorai atu enira mo isoiso.”

²⁴ Iesu mo vere isara mara, “Nomim ʻromʻfomi mo sopo tataholo, matan ka sopo levosahi mamahuni na Retitapu teni na sui-han God! ²⁵ Matan hin rani atu tamlohi la pa mele turu na mateia, la pa sopo mele lahi, pani la pa sohena angelo na tuka. ²⁶ Pani hin vujangi sei mata sauteterahi na mateia, korong ka sopo lo evia matan vipahai ri-hirihī atu sei Moses mo hite na hapu mo lo hani hinia? God mo vere isan Moses mara, ‘Enau God non Abraham, God non Isaac, ale God non Jacob.’ *Exo 3.6*

²⁷ God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri. Kamim ka jalio mo tavera.”

*Retileu Atu Mo Jeu Na Tinapua
(Mt 22.34–40; Lk 10.25–28)*

²⁸ Ale hin rani atu tamlohi vujangi mata leu matea mo mai mo lo tapurongo na vauriuri nona Sadducee, ale mo rongo sohena sava Iesu mo faramira sei mo ruhu jea, ale mo usi Iesu hinia mara, “Sava leu natu mo aulu mo jeu na leu tari?”

²⁹ Iesu mo faramia mara, “Leu atu mo aulu mo jeu na leu tari enia vara, ‘Israel, ha tapurongo! Moli noʻra God, enia Moli matelete. ³⁰ O pa opoi Moli nom God vevuhi na mapum, na maurim, na romim, peresi na suiham.’ *Deut 6.4–5*

³¹ Ale haruana enia nahai, ‘O opoi na tahisam sohen ko lo opoiho hasem.’ Moiso mo sopo mele te leu tinapua i aulu i jeu la leu sei mo rua.” *Lev 19.18*

³² Tamlohi vujangi mata leu atu mo vere mara, “Tija, ko varafuhu vara God enia matelete purongo, ale mo sopo mele te tinapua. ³³ Ale mo tataholo vara ʻra opoi vevuhia na mapuʻfa, na ʻromiʻfa, na suihaʻra, ale vara ʻra opoia na tahisaʻra sohena ʻra lo opoiʻra haseʻra. La leu akerihī la aulu la jeu na maji tari mata malamalai ʻra lo sulira na noʻfa silesilea isan God usuri na leu.” *Hos 6.6*

³⁴ Iesu mara mo hitevosahi na lelevosahi non tamlohi akerihī, mo vere isana mara, “Engko ko lo toho mariviti moiso hin mauri atu God mo aulu hinia.”

Ale hitahun haratu, mo sopo te vonara hatea i mele opoia vara i usia hin te retusia hatea.

*Kristo Enia Natun God
(Mt 22.41–46; Lk 20.41–44)*

³⁵ Na rani tinapua Iesu mo lo vujangi na tamlohi na lolo rope Temple, mo lo vere isara mara, “Sohena sava natu, tamlohi vujangi mata leu la lo vere vara Kristo enia

natun Supe David? ³⁶ Na lo usia sohena matan tuai David mo retireti na suihan Tanume Tapu mo vere mara, ‘Moli God mo vere isan noku Moli mara:

O sakele na matuaku,
o lo sasaovi i mai i tikeli
a tau na nom meresahi
na ruhuruhu palom.’ *Psa 110.1*

³⁷ David sohena mo tovia ‘Moli’. Vara mo sohen haratu, sohena sava natu, Kristo enia natun David?”

Ale vao tavera atu la avulahi tavera vara la lo tapurongo na nona vujangi.

*Vujangi Mata Posposi Aulu
(Mt 23.1–36; Lk 20.45–47)*

³⁸ Iesu mo lo vujangira mara, “Ha lo kilau na tamlohi vujangi mata leu. Matan la lo opoia vara tamlohi la hitera la lo hahau peresi na nora ruru peravu, ale la opoia vara tamlohi la lo popovitoho isara na jara maket. ³⁹ La opoia vara la lo sakele nahonaho tarea na lolo ima lotu teni na rani matan te hanhani tavera. ⁴⁰ Ale la lo haluhalu na haʻrai malepu mata voli nafihi na imara na volina makomona purongo, pani la lo tatavu horo na nora posposi sasati na usiuri peravu na naho tamlohi. Matan hinaiu atu, nora talai i pa mele tavera jea.”

*Malepu Tilavono Matea
(Lk 21.1–4)*

⁴¹ Iesu mo lo sakele mariviti na jara silesilea na Temple. Ale mo lo kilau na vao tamlohi la lo tau na nora mania. Tamlohi tadvav matuvana la tau na mania tavera hinia. ⁴² Mo sopo tuai mo hite na malepu tilavono matea mo mai, ale mo tau na nona mania, selen mo rua purongo. ⁴³ Iesu mo tovi na nona tamlohi usuri la mai isana mara, “Varafuhu na vere isamim, malepu tilavono nike, mo taua mo jeu na tamlohi tinapua tari sei la lo tau na nora silesilea nike. ⁴⁴ Matan la haratu sei la silea mo tavera pani la levosahia vara nora tadvav tavera mo pa lo toho. Pani malepu tilavono nike mo sile vevuhi na sava mo lo toho mata maurina.”

13

*Hinaiu La Pa Masese Hitahu
(Mt 24.1–2; Lk 21.5–6)*

¹ Iesu mo pa lo malue na Temple, ale nona tamlohi usuri matea mo vere isana mara, “Tija, o to kilau vano sevano hin la vatu tavera sevano la voro na roro ima hinira, ale o to kilau la ima tavera sevano!”

² Ale Iesu mo vere isana mara, “Ko lo hite ima tavera nike? I pa sopo te vatu hatea i pa lo toho aulu na vatu tinapua vara la pa sopo atu jovjovira.”

Rani Rilangi La Pa Mai
(Mt 24.3–14; Lk 21.7–19)

³ Ale hitahu, Iesu mara mo lo sakele na pahisa Vuti talu Olive mo lo kilau sivo na Temple, Peter, James, John enia Andrew la mai fofo hasera, ale la usia lara, ⁴ “O to vere kamam hinia, la hinau sei la pa masese pangisa? Ale sava matamata atu i pa mai tiroma vara kama pa levosahi mamahunia vara i sopo tuai natu la hinau tari natu la pa masese?”

⁵ Iesu mo vere isara mara, “Ha lo kilau i ruhu! Mo sopo ruhu vara tea i halu kamim. ⁶ Matuvana la pa mai na hijaku. La pa vere vara, ‘Enau natu, tamlohi atu!’ ale la pa halu na tamlohi matuvana. ⁷ Ale vara ka rongo te vuro teni sorasora mata vuro, romim i sopo kaka hin la hinau sei la pa mai tiroma, pani mo sopo isoisona. ⁸ Mara jara tavera tinatinapu la pa lo meresahi hinira, ale supe matea i pa meresahi na supe tinapua. Ale mihi i pa hisuhi na tatua jara na varama. Tamlohi la pa marohati na marua. Pani la hinau sei enira tapulona purongo. La hinau tari sei la sohena tapulo rongohaji na epe haʻai vara i lavilavi. ⁹ Ha lo kilau! Tamlohi la pa tauri kamim la pa ari kamim. La pa hamaji kamim na ima lotu. Ha pa turu na naho tamlohi aulu nona gavman peresi na naho supe matakau. Enia i pa masapamim matea vara ha eri vere isara vara enau hare. ¹⁰ Retiruhu atu la pa retivujavujangia na jara tari na varama tiroma, moiso isoisona i pa mai. ¹¹ Ale vara la lavi kamim la vai kamim ka turu na nahora vara la vaihite kamim, ha sopo romkaka na sava ha pa vere, pani ha pa vere na sava God i pa silea isamim, matan i pa sopo kamim ka lo retireti pani Tanumen God hin kamim.

¹² Vorai matea i pa turuposi hin voraina vara i mate. Tama i pa turuposi hin natuna. Natuvarihia la pa turuposi na tamara peresi na tinara la pa vaira tamlohi la vilimateira. ¹³ Tamlohi tari la pa rohu hin kamim matakau. Pani haratu mo turu rilangi mo tikeli na isoisona i pa juri.

Hina Lumihia Matea Na Lolo Temple
(Mt 24.15–21; Lk 21.20–24)

¹⁴ Rani matea i pa mai ha pa hite hina lumihia atu God mo lo rohu hinia i pa turu na jara tapu na lolo Temple. *Dan 9.27; 11.31; 12.11* Hare mo evi harihi, i lo lelevosahi na raramina! Hin rani atu, i pa ruhu vara tamlohi hin Judea la rovo la sahe na vutivuti.

¹⁵ I pa ruhu vara haratu mo lo toho na pusa ima, i sopo mele unu na lolo ima vara i lavi te hinau hinia, ¹⁶ ale i pa ruhu vara haratu mo lo voko na isana i sopo mele posi

i sivo mata i lavi na nona ruru na lepa. *Lk 17.31*

¹⁷ Hin rani atu, i pa rilangi jea isana haʻai mo tau natuna, teni te haʻai mo lo vasusui te natuna. ¹⁸ Ha usiusi vara rani atu i pa sopo masese na taro hamariri.

¹⁹ Rani sati tavera atu i pa jeu na rani sati tamlohi la lo hitera mo tapulo hin rani atu God mo vai na varama mo tikeli nake i pa sopo mele te rani sasati i sohena hin te rani. *Dan 12.1; Rev 7.14*

²⁰ Vara Moli God i sopo vai rani rilangi atu i vejuveju, i pa sopo tea i eri juri, pani mata nona tapuhi, la haratu sei mo vifonira i pa vai rani atu i vejuveju.

²¹ Hin rani atu, vara tea mo vere isamim vara, ‘Ha kilau nike, Kristo nahai!’ Teni tea i pa vere vara, ‘Ko hitea, enia nahai!’ Pani ha sopo rasura. ²² Matan kristo haluhalu peresi na tamlohi tapu haluhalu la pa mai. La pa vai na matamata tavera. La pa vaihite la tamlohi atu God mo vifonira moiso vara la tinarihi na nora rasua. ²³ Ha lo kilau! Enau na lo vere kamim hinia tiroma moiso.

Natun Tamlohi I Pa Mai
(Mt 24.29–31; Lk 21.25–28)

²⁴ Moiso hitahu hin rani sasati atu, ‘Alo i pa rofoha, ale vitu i pa sopo mele sile na merana.’

Isa 13.10

²⁵ ‘Vitusarasara la pa jovjovi na masapa, ale suiha tari na masapa la pa hisu.’ *Isa 34.4; Joel 2.10*

²⁶ Hitahuna natu, tamlohi tari la pa hite na Natun Tamlohi mo lo mai na telangi na suiha tavera peresi na merana tavera.

Dan 7.13

²⁷ Natun Tamlohi i pa rule na nona angelo la vano ralihi na varama vara la takonahi na nona tapuhi na jara tari na varama, ale aulu na masapa.

Tea Mo Sopo Levosahia
(Mt 24.32–35; Lk 21.29–33)

²⁸ Ha levosahi na posi vipahai fig sei julina la mai la malum, ale mo tivu, ka levosahia vara rani mata hulihuli mo pala.

²⁹ I pa sohena na pongi hitahu vara ka hite na hinau tari sei na lo vere kamim hinira moiso. Ha pa levosahia vara i sopo tuai Natun Tamlohi i pa pala. ³⁰ Varafuhu na vere isamim, pina akerihi nake i pa sopo lo mate vevuhi vavano la hinau tari akerihi la pa masese. ³¹ Tuka enia varama la pa tihai, pani noku reti la pa toho jejeu.

Ha Tatamahu Tarea
(Mt 24.36–44)

³² Mo sopo tea i levosahi rani tataholo atu teni matan alo matana, angelo na tuka sohena, la sopo levosahia teni Natun Tamlohi. God Tama hasena mo levosahia. ³³ Ha

lo kilau! Ha sopo juruvi! Matan ka sopo levosahia vara pongi atu i pa pala pangisa!

³⁴ I pa sohena tamlohi matea mo vano na nona hahau matea na jara tinapua matea, ale mo tau na imana na lima nona volitusi, ale la lo vai na nora vavahinau hatehateahi hinia. Ale mo vere haratu mo lo kilau na pelati mara, 'O lo kilau tarea mata noku mele pala!' ³⁵ Matan haratu, ha lo kilau! Matan ka sopo levosahia vara tamlohin ima sei i pa mele pala pangisa, i efi pala na ravravi teni na livuha pongi, teni na toa tarere teni na falavuhu, ha lo kilau! ³⁶ Mo sopo ruhu vara ha hutu kamim na nona pala, ale i vilei kamim ka lo juruvi. ³⁷ Sava na vere kamim hinia, na vere isamim kamim isoiso, ha lo kilau i ruhu mata nona rani pala!"

14

Jew La Aleale Malele Mata Taurilatia Hinia

(Mt 26.1-5; Lk 22.1-2; Jn 11.45-53)

¹ Rani mo rua mo lo toho vara i tikeli na pongi rani Passover peresi rani atu la lo hani na pereti hinia sei mo sopo te isi hinia. Pris aulu peresi na tamlohi vujangi mata leu la lo aleale malele vara la pa tauri luhu Iesu hinia vara la vilimateia. *Exo 12.1-27*

² Matan lara, "Ra sopo eri vaia hin rani tavera sei matan tamlohi la pa levutiŕa."

Haŕai Matea Mo Rengi Na Hasori Hin Iesu

(Mt 26.6-13; Jn 12.1-8)

³ Iesu mo pa lo toho Bethany na iman Simon, tuai enia tamlohi lepros matea, ale lara la pa lo hanhani na tep, haŕai matea mo sinai isana, mo lavi na potele hasori matea la vaia na lepa hijana alabaster, hasori ruhu mo lo toho na lolona la tovia nard ponana mo ruhu ale volina mo aulu jea. Haŕai atu mo lavia mo kosahi na ŕalo potelena, ale mo rengia na patun Iesu. ⁴ Tamlohi hai la lo toho atu la rongo mo sati matana, la lo vere isara hasera lara, "Mata sava mo rengi komokomoi hasori sei sohena? ⁵ Volina mo sohena voli voko nona tamlohi matea mata tauni matea! Vara i haŕehia i pa efi sile na volina isana tilavono." La savurahi haŕai atu.

⁶ Pani Iesu mo vere mara, "Eh, ha tinaŕihi haŕai sei. Mo lo vai na hina ruhu matea isaku. ⁷ Tamlohi tilavono la pa lo toho tarea isamim, ale vara ka opoia ha pa efi tuenira. Pani enau, a pa sopo toho tarea isamim. ⁸ Haŕai nike mo vai na sava i efi vaia isaku. Mo rengi na hasori na epeku mo vaia mo tatamahu mata noku tavuni mata noku mateia. ⁹ Varafuhu na vere isamim, sava hinau haŕai nike mo vaia isaku la pa sorahia na jara tari na varama

mata ŕomŕomia vara la vere na Retiŕuhu matakū."

Judas Mo Turuposi Hin Iesu

(Mt 26.14-16; Lk 22.3-6)

¹⁰ Judas Iscariot, vonan la tupu sangavulu ŕomana mo rua atu matea, mo vano isana pris aulu nona tavtavuin Israel, matan vara i tau Iesu na limara. ¹¹ Pris aulu la avulahi jea matana, ale la retitauhi vara la pa voli Judas matana. Judas mo tapulo aleale masapa vara i pa sile Iesu i vano isara hinia.

Hanhani Passover

(Mt 26.17-25; Lk 22.7-14, 21-23; Jn 13.21-30)

¹² Na rani tiroma mata pereti sei mo sopo te isi hinia sei la lo sile na natu sipsip mata Passover sohen malamalai hinia, tamlohi usuri non Iesu la vere isana lara, "Eh! Ko opoia vara kama pa tatamahu mata hani na Passover epu?"

¹³ Mo rule na nona tamlohi usuri tupra rua, mo vere isara mara, "Ha vano ha unu Jerusalem, ale ha pa hite na tamlohi matea mo lo soloti na jara wai tavera matea, ale ha usuria. ¹⁴ Ale sava ima i pa unu hinia, ha vere na tamlohin ima atu vara, "Tija mo usia mara, sava jara ko tatamahunia moiso matakū vara a pa hani na Passover hinia peresi na noku tamlohi?" ¹⁵ I pa vujangi kamim na jara matea mo lo toho aulu hin ima atu. Mo tatamahuni na hinau tari moiso. Ha tatamahuni na haŕa hinau ea." ¹⁶ La tamlohi usuri tupra rua atu la malue la sivo hin taon tavera atu, ale hinau tari mo masese sohena Iesu mo vere, ale la tatamahuni na hanhani mata Passover ea.

Hare I Pa Turuposi

¹⁷ Ale mara mo ravravi, Iesu mo sahe hin ima atu peresi la tupu sangavulu ŕomana mo rua atu. ¹⁸ La sakele ŕalihi na tep la lo hanhani, ale Iesu mara, "Varafuhu, vonamim matea i pa turuposi hiniu, enia vonamim matea sei mo lo hanhani peresiau nakerihi." *Psa 41.9*

¹⁹ Nona tamlohi la tapulo rongo mo sati, ale enira hatehateahi la lo usia isana lara, "Hare, enau teni mo vono?"

²⁰ Iesu mo vere mara, "Vonamim matea la tupu sangavulu ŕomana mo rua, ale enia mo lo seseri peresiau nakerihi. ²¹ Matan Natun Tamlohi i pa vano sohena Retiulia mo vere moiso matana. Pani rani sasati tavera isan tamlohi atu sei mo turuposi hiniu. I pa mele ruhu jea vara i sopo vora."

Retitauhi Paro

(Mt 26.26-30; Lk 22.14-23; 1Co 11.23-25)

²² La pa lo hanhani, Iesu mo lavi na pereti, mo vere meje matana, mo topea mo silea

isana nona tamlohi ale mara, “Ha lavia. Harihi enia epeku!”

²³ Mo mele lavi na paniken waen, mo vere meje isan God matana, moiso mo silea isara, ale enira isoiso la inua hinia. ²⁴ Moiso, mo vere isara mara, “Harihi enia ʔaeku sei i pa roro mata tamlohi matuvana matan vara i vai na retitauhi paro non God peresi na nona tamlohi i turu. *Jer 31.31–34*

²⁵ Varaʔuhu na vere isamim, a pa sopo efi mele inu te waen i tikeli rani atu a pa mele inua peresi kamim hin mauri atu God mo aulu hinia.” ²⁶ La lalavete na vete matea moiso, la malue la sahe na Vuti talu Olive.

Peter I Pa Vunvuni Iesu

(*Mt 26.31–35; Lk 22.31–34; Jn 13.36–38*)

²⁷ Na malele Iesu mo vere isara mara, “Kamim mo isoiso ha pa rovo hiniau, matan Retiulia non God mo vere mara, ‘A pa vili na tavui sipsip.

Sipsip la pa rovo.’ *Zec 13.7*

²⁸ Pani hitahu vara na mele turu na mateia, a pa vano tiroma hin kamim Galilee.”

²⁹ Peter mo vere isana mara, “Hina purongo vara enira mo isoiso la rovo hiniho, enau i vono!”

³⁰ Iesu mo vere isan Peter mara, “Varaʔuhu na vere isam, o pa vunvuniau vaha tolu nohorihina na vutepongi, moiso toa i pa tarere vaha rua.”

³¹ Pani Peter mo reti ʔilangi mara, “Vara a pa mate peresiho, i pa sohena! A pa sopo efi vunvuniho!” Enira mo isoiso la vere sohena.

Mo Usiusi Gethsemane

(*Mt 26.36–46; Lk 22.39–46*)

³² La sahe na jara la tovia Gethsemane, Iesu mo vere isana nona tamlohi usuri mara, “Ha lo sakele nike tako. Enau a sahe a usiusi.” ³³ Mo lavi Peter, James, John la vano peresia, ale mo tapulo rongo mo sati tavera jea, ale ʔomina mo sopo sakele. ³⁴ Ale mo vere isara mara, “Romiku mo jovi tavera vara a mate matana. Ha lo toho peresia, ha sopo juruvi!”

³⁵ Mo mele vano makomona, mo jovi sivo na lepa mo usiusi isan God mara vara te malele tinapua, i pa sopo vano hin nona rani ʔilangi nike. ³⁶ Ale Iesu mara, “Tata! Tamaku! Ko efi vai na hiniau tari. O lavi nafihi na noku rani ʔilangi nike, pani o sopo vaia sohena masaloku, pani sohena masalom.”

³⁷ Mo mele sinai mo hite Peter la juruvi ʔomalihio. Mo vere isan Peter mara, “Simon, varaʔuhu ko lo juruvi? O sopo efi kilau peresia matan te matan alo hatelete purongo? ³⁸ Ha lo kilau! Ha lo usiusi, matan vara ha pa sopo jovi na vaihite. Tanumemim mo opoia vara i oloolo, pani masalomim mo ʔilangi jea.”

³⁹ Moiso, mo mele sahe vara i usiusi, mo mele vere la nona reti atu tiroma. ⁴⁰ Mo mele sinai, mo mele vileia vara la mele juruvi moiso, ale matan matara mo puhoni, la sopo efi ʔaramia.

⁴¹ Iesu mara mo mele mai hatoluna, mo vere isara mara, “Varaʔuhu ka pa lo juruvi, ka pa lo mapu? Mo isoiso natu, la tau Natun Tamlohi na lima tamlohi hehe natu. ⁴² Ha turu! Ra vano! Ka hitea, noku meresahi mo lo mai moiso.”

La Taurilati Iesu

(*Mt 26.47–56; Lk 22.47–53; Jn 18.1–11*)

⁴³ Iesu mo pa lo retireti Judas vonan la tupu sangavulu ʔomana mo rua atu matea mo pala isara peresi na vao tavera matea, la mai la lo lavi na sita mata valum peresi na nalnal. Pris aulu peresi na tamlohi vujangi mata leu peresi na vajiahara natu la ʔulera la mai isan Iesu. ⁴⁴ Ale tamlohi atu mo lo turuposi hinia mo verera na matamata matea isara moiso mara, “Tamlohi atu a pa pungosia, enia tamlohi atu natu. Ha tauria, ha lavia i vano.”

⁴⁵ Judas mo kakau jara atu, mo vano isan Iesu mo vere mara, “Tija.” Ale mo pungosia. ⁴⁶ Ale la tamlohi atu la mai la tauri Iesu. ⁴⁷ Pani vonara matea sei mo lo turu atu mo lavi na nona sita vuro mo langai nafihi na pero volitusi non pris aulu.

⁴⁸ Iesu mo vere isara mara, “Ka mai peresi na sita peresi na nalnal sohena vara enau tamlohi vili tamlohi mata vavanaho matea? ⁴⁹ Tarea na lo toho peresi kamim na lolo Temple na lo vujangi, pani ka sopo tauriau. Pani i pa sohen harihi matan vara Retiulia i pa masese matakau.”

⁵⁰ Nona tamlohi la malue isana, ale la rovo. ⁵¹ Uluvou matea mo lo usuri Iesu, enia mo lavolavo purongo, ale la tauria. ⁵² Pani la lo taurilati na nona ruru purongo, ale mo tinaʔihira mo rovo malamala.

Iman Pris Aulu

(*Mt 26.57–68; Lk 22.54–55, 63–71; Jn 18.13–14, 19–24*)

⁵³ La lavi Iesu mo vano na iman pris aulu. Ale moli nona pris tari peresi na vajiahara peresi na tamlohi vujangi mata leu la matavuhi jara matea. ⁵⁴ Ale Peter mo lo usuri Iesu asau makomona mo sivo vahatea na lolo ropen iman pris aulu atu. Mo lo sakele peresi la tamlohi kilau matan ima atu, la lo marijo na hapu.

⁵⁵ Moli nona pris peresi la tamlohi tari mata council Aulu, la lo aleale tamlohi vara i vereuli te hiniau hin Iesu matan vara la pa vilimateia matana, pani la sopo vilei tea. ⁵⁶ Tamlohi matuvana la vai na retihalu hinia, pani nora retihalu la sopo matea. ⁵⁷ Hai la turu sahe la retihalu hinia lara, ⁵⁸ “Kama rongoa mo vere mara, ‘Enau a pa

viliroi Temple nike sei tamlohi la vaia na limara, moiso na rani i tolu purongo a pa mele voroa na hina tinapua sei tamlohi la sopo voroa na limara.’”⁵⁹ Pani mo sohen tiroma, nora fomfomi mo sopo matea.

⁶⁰ Moiso nora pris aulu mo turu na livuhara, mo vere a isan Iesu mara, “Mo sopo te nom retireti vara o vere a matan la retireti nike? Sava nahai, la tamlohi nike la lo vereulia matam?”⁶¹ Pani Iesu mo sopo langati na jingona, ale mo sopo faramia. Pris aulu atu mo mele usia vahatea mara, “Engko natu Kristo atu, Natun God teni mo vono?”

⁶² Iesu mo faramia mara, “Enau natu, ale ha pa hite Natun Tamlohi i pa sakele na tavalu liman God na jara mata suiha, ale ha pa hite Natun Tamlohi i mele mai na telangi matan tuka.” *Dan 7.13*

⁶³ Ale pris aulu mara mo rongoa sohen, mo hasena fari na nona ruru, ale mo vere a mara, “Mata sava ra pa lo mele aleale retireti vara ra pa tuvaia hinia? Enia hasena mo vere a!”⁶⁴ Ka pete rongo sohen sava mo vere a moiso vara enia God. Ha pa vai na sava?” Enira mo isoia la vere a lara i mate.

⁶⁵ Hai la tapulo litovia, hai la tatavuhoro na nahona la tutuhia, ale la usia isana lara, “Vara engko proveň matea, o to vere a vara hare natu mo tutuhiho?” Ale tamlohi kilau sohen lara la lavia mo vano la tutuhia.

Peter Mo Vunvuni Iesu

(Mt 26.69–75; Lk 22.56–62; Jn 18.15–18, 25–27)

⁶⁶ Hinau atu mo lo masese, Peter mo lo toho atano na lolo rope matan ima atu na jingoima. Ale volitusi harai matea non pris aulu mo mai,⁶⁷ mara mo hite Peter mo lo marijo, mo lo kilau mamahunia, ale mara, “Engko vonara matea ko lo usuri Iesu mara Nazareth!”

⁶⁸ Pani Peter mo vunvunia, ale mara, “Na sopo levosahia teni a levosahi na sava ko lo vere a.” Mo malue atu mo vano mo turu na mataruan rope atu, ale toa mo tarere.

⁶⁹ Pa harai atu mo mele hite Peter mo lo turu atu ale mo vere a isana tamlohi mara, “Tamlohi aturihi enia vonara matea!”

⁷⁰ Peter mo mele vunvunia.

Ale tamlohi hai la lo turu atu la vere a isan Peter lara, “Varafuhu engko vonara matea matan engko mara Galilee!”

⁷¹ Pani Peter mo tapulo lesati hinia hasena, mo varakali ale mo vere a mara, “Na sopo levosahi tamlohi nike ka lo vere a.”

⁷² Ale vahatea purongo, toa mo tarere haruana. Peter mo mele fomfomi na reti non Iesu sei mara, “Engko o pa vunvuniau vaha tolu, moiso toa i pa tarere vaha rua.” Moiso fomin Peter mo jovi tavera, ale mo tangi tavera.

15

Iesu Enia Pilate

(Mt 27.1–2, 11–14; Lk 23.1–5; Jn 18.28–38)

¹ Na řalavuhō jea, moli mata pris peresi na vajiahara tolu na tamlohi vujangi mata leu peresi na tamlohi mata council tari la matavuhi vara la vai te fomfomi. La lasi Iesu la lavia mo vano la taua na liman Pilate, tamlohi aulu nona gavman matan Rome.

² Ale Pilate mo usia mara, “Engko Supe nona Jew?”

Iesu mo vere a mara, “He'e, mo sohen ko vere a.”

³ Moli nona pris la tuvaia na retireti matuvana. ⁴ Pilate mo mele usi Iesu vahatea mara, “Mata sava ko sopo talaira? Ko hitea, la lo tuvaiho na hina sati matuvana!”⁵ Pani Iesu mo sopo mele faramia, ale Pilate mo mařurahi jea.

Pilate Mo Ari Iesu

(Mt 27.15–26; Lk 23.13–25; Jn 18.39–19.16)

⁶ Tarea na hanhani tavera mata Passover, Pilate mo lo teri na tamlohi matea na ima řilangi sei enira la opoia. ⁷ Vonara matea hin la haratu la lo toho na ima řilangi hin rani atu, hijana Barabbas. Enia mo lo toho atu matan mo vilimateia na tamlohi matea na rani la turu mata valum mata jarara. ⁸ Vao atu la mai isan Pilate ale la usia vara i mele vaia sohen tarea mo lo vaia isara. ⁹ Ale Pilate mo usia isara mara, “Ka opoia vara a tinarihi Supe nona Jew nike teni mo vono?”¹⁰ Matan Pilate mo levosahia vara la pa lavi Iesu mo mai isana mata nora mereimerei purongo. ¹¹ Pani moli nona pris la haluhala na tamlohi mata usi Pilate vara i teri Barabbas na jaran Iesu. ¹² Ale Pilate mo mele usia isara vahatea mara, “Vara i sohen, a pa vai na sava hin tamlohi nike sei ka lo tovia vara enia Supe nona Jew?”

¹³ La mele ngara lara, “O vosaea na talopeilopei!”

¹⁴ Pilate mo mele usira hinia mara, “Sava hinau natu mo vaia mo sati?”

Pani la mele ngara mo řilangi jea lara, “O vosaea na talopeilopei!”

¹⁵ Ale matan Pilate mo opoia vara i vai vao atu i avulahi, mo teri Barabbas sohen la usia. Ale mo retileu vara la rupi Iesu, moiso mo taua na lima tamlohi vuro nona mara Rome vara la vosaea na talopeilopei.

La Vailejeji Iesu

(Mt 27.27–30; Jn 19.2–3)

¹⁶ La tamlohi vuro atu la tiroma hin Iesu la unu na lolo nora patu ima mata vuro non Pilate. La tovi vevuhi na vao tamlohi vuro la mai na jara matea. ¹⁷ La mai la rua na ruru perpel matea, ale la viriviri na

asi ngarngariha matea sohena rongorongo nona supe, ale la taua na patuna. ¹⁸ La tapulo salute isana la lo vereea lara, “Tamlohi tavera, engko Supe nona Jew!” ¹⁹ La lo tamaji na patuna na apo matea. La lo litovia, ale la lo popovitoho isana sohena vara la lo lotua. ²⁰ Lara la kerehia moiso la mele lavi narhihi pa ruru perpel atu isana, ale la mele rurua na nona ruru. Ale la tiroma hinia la vano vara la vosaea na talopeilopei.

Simon Mara Cyrene Matea Mo Tueni Iesu

²¹ Ale mara Cyrene matea, hijana Simon, enia tamana Alexander enia Rufus, mo pa lo tai purongo asau ōve na jara vutivuti mo lo sinai na malele, ale la ngurunguru hinia vara i soloti na talopeilopei non Iesu.

La Vosae Iesu Na Talopeilopei

(Mt 27.31–44; Lk 23.27–43; Jn 19.17–27)

²² La lavi Iesu mo sahe hin jara atu sei la tovia ‘Golgotha’, faramin hija sei enia ‘Jara Sui Patu Tamlohi’. ²³ La vaihitea vara la sile na waen la hoihoia peresi na myrrh, pani mo ōhu hinia. ²⁴ La vosae Iesu na talopeilopei, moiso la tamlohi vuro atu la roro mata nona ruru na taes matan vara la vileia vara hare natu i pa lavi na sava nona ruru. *Psa 22.18*

²⁵ Matan alo mo limaravati na ōlavuho natu la vosaea na talopeilopei hinia. ²⁶ La uli na reti matea mata nona aria na tavalu tatea matea la vosaea aulu na patuna mo vereea vara,

Supe Nona Jew

²⁷ La vosae na tamlohi vili na tamlohi mata vavanaho tupra rua na tavalun Iesu. Matea na matuana, ale matea na marauna. *Isa 53.12*

²⁸⁻²⁹ Tamlohi sei la lo hahau hin malele atu la lo taŋa sahe la lo kerehia, ale la lo pulapulahia na patura, la lo vereea lara, “Ko vara, vara o pa vilijovjovi na Temple, ale o efi mele voroa rani i tolu?” *Psa 22.7; 109.25* ³⁰ Vara mo sohena, o hasem juriho o sevuti hin talopeilopei sei!”

³¹ Moli nona pŋis peresi na tamlohi vujangi mata leu sohena la lo vaivaia isara hasera lara, “Mo lo juri na tamlohi tinapua, pani enia i sopo efi hase juria!” ³² Vara engko Kŋristo, Supe non Israel, o sevuti na talopeilopei nakerihi matan vara kama pa hitea ale kama rasuho!” La tamlohi atu sei la vosaea na pahisan Iesu sohena, la lo kerehia.

Iesu Mo Mate

(Mt 27.45–56; Lk 23.44–49; Jn 19.28–30)

³³ Na livuha rani, ōŋoha tavera mo jovi mo tavuni na jara tari, mo lo toho mo tikeli na matan alo mo tolu na ravravi.

³⁴ Na matan alo mo tolu, Iesu mo tangi na ulo tavera matea mara, “Eloe, eloe, lema sabatani?” Raramina reti sei enia ‘Noku God, noku God, mata sava ko posi na nahom isaku?’ *Psa 22.1*

³⁵ Tamlohi hai la lo turu atu lara lo rongoa, lara, “Ka hitea! Mo lo tovi Elijah!”

³⁶ Tamlohi matea mo maro mo vano mo lavi na tavalu ruru matea la ŋuŋunia na waen hohona mo pesia na apo matea, ale mo sohaia sahe isan Iesu vara i inua. Vonara matea mara, “Tako, ŋa pa hitea vara Elijah i pa mai i lavi narhihia na talopeilopei i sivo atano teni i vono.” *Psa 69.21*

³⁷ Iesu mo mele ulo tavera vahatea, ale maromaronu mo isoiso. ³⁸ Ruru tavera atu mo lo toho horo na Jara Tapu atu na lolo Temple mo mafari hasena tavaluna mo rua, mo mafari mo tapulo aulu mo sivo atano. ³⁹ Moiso captain mata tamlohi vuro atu sei mo lo turu tataholo na nahon Iesu, mara mo hitea sohena sava mo mate mo vereea mara, “Varafuhu, tamlohi nike enia Natun God tataholo!”

⁴⁰ Haŋai hai la lo turu asau makomona la lo kilau vano na talopeilopei. La haŋai sei la tupu tolu, Mary Magdalene, Salome, Mary tinan uluvou sei James peresi Jose. ⁴¹ La haŋai sei la lo usuri Iesu na rani mo lo toho Galilee, ale la lo kilaua. Vao haŋai matuvana sohena, enira tolu natu la lo usuria la sinai Jerusalem.

Joseph Mo Tavunia

(Mt 27.57–61; Lk 23.50–56; Jn 19.38–42)

⁴² La hinau sei la masee na Friday ravravi, enia rani mata tatamahu mata nora Sabbath. ⁴³ Joseph mara Arimathea, enia tamlohi aulu matea mata nora council tavera, ale enia matea sei mo lo kilau toho matan mauri atu God mo aulu hinia vara i pala. Ale ŋomina mo filangi mo mai mo turu na nahon Pilate mo usia vara i lavi na tarapen Iesu. ⁴⁴ Pilate mo rongoa vara Iesu mo mate vila, moiso mo maŋurahi tavera matana. Pilate mo tovi na nona captain mata tamlohi vuro matea, mo usia mara, “Varafuhu, Iesu mo pete mate moiso?” ⁴⁵ Captain atu mo vere Pilate hinia mara varafuhu mo mate moiso. Pilate mo veree isan Joseph mara i efi lavi na tarapen Iesu. ⁴⁶ Joseph mo vano mo voli na ruru lulu matea. Mo juri na tarapen Iesu aulu na talopeilopei mo sivo atano. Mo leputia na ruru. Mo lavi na tarapen Iesu mo taua na papa vatu matea enia mo taia. Mo tai na pelatina vatu tavera matea vara matarua. ⁴⁷ Mary Magdalene enia Mary tinan Jose la hite jara atu la tau na tarapen Iesu ea.

16

Iesu Mo Mele Turu Na Mateia

(Mt 28.1–8; Lk 24.1–12; Jn 20.1–10)

¹ Saturday na ravravi jea na isoison rani mapu atu, Mary Magdalene, Mary tinan James enia Salome, la vano la voli te hasori ruhu vara la pa vano la taua na tarapen Iesu vara i mele rani sahe. ² Sunday falavuhō jea alo mo pa lo tapulo vele purongo, la vano hin papa vatu atu. ³ La pa lo vano la lo verevera isara lara, “Hare i pa tuenira vara i kuresi nafihi vatu atu na mataruan papa atu?” ⁴ Ale lara la taʻa sahe aulu, la hite vatu tavera atu la pete kuresi nafihi moiso. ⁵ La sahe la unu hin papa atu ale la hite na uluvou matea, mo ru na ruru lulu mo lo sakele na matuana, ale la hutura hinia. ⁶ Ale mo vereea isara mara, “Ha sopo matahu! Ka lo ale Iesu mara Nazareth haratu sei la vosaea na talopeilopei? Mo turu na mateia moiso, enia mo sopo toho nike. Ha to hite na jara sei la taua hinia. ⁷ Pani ha vano ha vereea isana nona tamlohi usuri peresi Peter, ha verera vara Iesu mo vano Galilee tiroma hin kamim moiso. Ha vano ha pa hitea ea sohen mo lo vereea isamim tiroma moiso.”

⁸ La haʻai atu lara la malue la rovo hin papa atu matan matahu mo sohonira ale la savaravara. La sopo vere te hinau isan tea matan la matahu.

e Tiroma Isoison Mark –

(Mt 28.9–10; Jn 20.11–18)

Ale la vere vevuhi na hinau tari isan Peter peresi na tapalana. Hitahuna Iesu mo rulara la vano na varama, la vano Opae mo sivo mo tikeli Marino, la lavi nona Retiruhu tapu mata juri sei mo lo sile na mauri tui sei i sopo efi tihai hin te rani. Amen.

e Harua Isoison Mark –

Mary Magdalene

⁹ Iesu mo mele turu na Sunday na falavuhō jea, ale Mary Magdalene natu enia haʻai tiroma mo hitea, enia natu Iesu mo titiu nafihi na tanume sasati mo limaravrua isana. ¹⁰ Hitahu Mary mo vano mo vereea isana nona tamlohi usuri sei la lo rongo mo sati ale la lo tangisia. ¹¹ Pani lara la rongoa vara Mary mo hite Iesu mo mele mauri, la sopo rasua.

Nona Tamlohi Mo Rua La Hite Iesu

(Lk 24.13–35)

¹² Hitahun la hinau atu Iesu mo mele pala isana tupra rua sei la lo hahau mata jara tinapua matea, pani la sopo hitevosahia matan mo posi na nahona. ¹³ Hitahuna lara la hitevosahia la mele hilu vilavila la sahe vara la vereea isana tatuara, pani tea i sopo rasura.

Iesu Mo Turu Na Livuhara

(Mt 28.16–20; Lk 24.36–49; Jn 20.19–23; Acts 1.6–8)

¹⁴ Hitahuna Iesu mo pala isan la tupu sangavulu romana matea atu lara la lo hahani. Ale mo reti rilangi isara matan mo sopo te nora rasua, ale mata romira mo rilangi jea. Mo reti rilangi sohena matan la sopo rasu la haratu sei la hitea vara mo mele mauri.

¹⁵ Ale mo vereea isara mara, “Ha vano na jara tari na varama, ale ha vereuli na noku Retiruhu isana tamlohi tari. ¹⁶ Sava tamlohi mo rasua ale mo paptijo, God i pa juria, pani haratu mo sopo rasua, God i pa aria. ¹⁷ God i pa sile la matamata tavera akerihi natu i usuri la haratu la rasuau: na hijaku la pa efi titiu nafihi na tanume sasati, ale la pa efi retireti na leo paro tinapua, ¹⁸ ale la pa tauri na mata sasati jea na limara, ale vara la inu te wai mata vilimatei na tamlohi la pa sopo efi mate matana. La pa tau na limara na tamlohi rojoa moiso ale nora rojoa i tihai.”

Iesu Mo Sahe Aulu Na Tuka

(Lk 24.50–53; Acts 1.9–11)

¹⁹ Iesu mara mo vere la hinau atu isara mo isoiso, God mo lavi nafihi mo sahe aulu na tuka, ale mo sakele na jara mata suiha na matuan God. ²⁰ Ale nona tamlohi usuri la vano la retivujavujangi na jara hatehateahi. Moli Iesu mo lo tuenira na nora vavahinau, ale mo vujangia vara nora reti mo tai isana na matamata matuvana.

Retiruhu Hin Iesu Kristo
Luke
Mo Ulia
Puku Nike

Opoia non God enia mata tamlohi tari! Iesu mo mai na varama matan enia Jujuri nona tamlohi tari. Vujangi hai o eri hitera hin puku nike purongo, te hinau sohen harihi Luke mo ulia: Mara Samaria matea (10.25–37), Sipsip mo jalio (15.1–7), Uluvou atu mo jalio (15.11–32). Luke mo vereulia vara Iesu mo lo toho na iman Zacchaeus (19.1–10), ale mo uli retitauhi atu sei Iesu mo lo silea isan tamlohi sasati atu na talopeilopei (23.39–43).

Luke mo vere na vavahinau non Tanume Tapu mo jeu na tinapua. Mo ulia mara Tanume Tapu mo lo toho peresi John Tamlohi Paptijo na rani mo vora (1.15), isan Mary (1.35), ale sohen sava Iesu mo usuria (4.1, 14, 18; 10.21), Iesu mo vujangia vara Tanumen God enia otori atu mo jeu na tinapua God i pa silea isana tamlohi (11.13).

Luke mo ulia vara Iesu mo lo romromi na tilavono, mo sile na Retiruhu non God isara (4.18; 7.22), la pa lavi na hina fuhuruhu isana (6.20), God mo usi na tilavono na nona hanhani tavera (14.13, 21), tilavono atu Lazarus mo sahe na tuka peresi na angelo (16.20, 22), ale Iesu mo retileu vara nona tamlohi usuri la lo sile na mania isana tilavono (12.33).

Luke mo vereulia mata sava mo uli puku nike ale mara, “enau sohen na usuri mamahuni la hinau sei mo tapulo na tapulona, matan vara o pa eri levosahi mamahunia vara la hinau sei la vujangihio hinira moiso la vararuhu.” (1.3–4) Luke mo vujangia vara Iesu mo usi na rani mo opoi na tueni non God: hin rani atu mo paptijo (3.21), hin rani atu mo viŋoni na nona tamlohi usuri (6.12), mo usi matan retiusia atu lara enia hare (9.18), hin rani atu mariviti i mate (23.34, 46), ale nona vujangi mata usi (11.5–9; 18.1–8, 9–14), ale vara nona tamlohi la pa sile na mania isana tilavono (12.33). Luke mo opoia vara tamlohi la levosahi mamahunia vara Iesu mo mele turu na mateia, mo ulia vara Iesu mo hani te maji hin rani atu matan enia tamlohi matea mo sopo nunua tamlohi purongo (24.42–43).

Hin puku nike

1. Mata sava Luke mo uli puku nike (1.1–4)
2. Rani vora non Iesu, John tamlohi paptijo mo pala (1.5–2.52)
3. Retisohai non John tamlohi paptijo (3.1–20)

4. Paptijo peresi na vaihite non Iesu (3.21–4.13)
5. Vavahinau non Iesu Galilee (4.14–9.50)
6. Iesu mo malue Galilee mo sahe Jerusalem (9.51–19.27)
7. Isoiso wik non Iesu: Nona mateia (19.28–23.56)
8. Iesu mo mele mauri (24.1–12)
9. Iesu mo pala, mo sahe na tuka (24.13–53)

Reti Tiroma Non Luke

¹ Enau Luke, na uli reti nike isam tamlohi tavera Theophilus. Tamlohi matuvana la vaihitea vara la uli na sorasora mata sava mo masese isaŋa mo tikeli nake, ² sohen la sorasora atu fa lavia isan la haratu enira la hitea na matara, ale enira la volitusi mata reti non God mo tapulo na tapulona. ³ Ale matana, enau sohen, mo tataholo vara a uli na hinau tari sei la masese na tapulona mo sinai nake isam tamlohi tavera fuhuruhu Theophilus, matan enau sohen na usuri mamahuni la hinau sei mo tapulo na tapulona, ⁴ matan vara o pa eri levosahi mamahunia vara la hinau sei la lo vujangihio hinira moiso la vararuhu.

Angelo Gabriel Mo Pala

⁵ Na rani non Herod supe non Judea, pris matea hijana Zechariah enia mo tai na vao pris non Abijah, ale narouna sohen, enia mahapin Aaron, hijana Elizabeth. ⁶ Ale la tupra rua sei maurira la tataholo mo fuhu na nahon God. La lo oloolo mamahu na nona retileu peresi na leu tari, ale tea i sopo eri tuvaira hin te hinau. ⁷ Pani mo sopo te natura matan Elizabeth mo aroaro, ale la vajiaha moiso.

⁸ Na rani matea, hinau matea mo masese isana hin rani atu mo lo voko peresi na nona vao pris na Temple non God. ⁹ Vao pris atu la viŋonia usuri na nora posposi mata viŋoni sohen la lo vaia tarea vara i unu na Temple non Moli vara i suli na hasori ea. ¹⁰ Ale rani tataholo mata suli na hasori mo mai, vao tavera mata lotu la lo pulutahi mata usi na jingoima.

¹¹ Zechariah mo lo toho atu, ale angelo non Moli matea mo pala isana, mo turu na matua votavota mata suli na hasori. ¹² Zechariah mara mo hite angelo atu mo hutua, ale matahu tavera mo sohonua. ¹³ Pani angelo atu mo vere isana mara, “Zechariah, o sopo matahu! Nom usi God mo rongoa moiso, ale naroum Elizabeth i pa vasusui na natum lamane matea, ale o pa tau na hijana vara John. ¹⁴ Ale i pa vaiho o avulahi, o avulahi tavera jea, ale tamlohi matuvana sohen, la pa avulahi na nona rani vora, ¹⁵ matan God i pa silea na vavahinau matea mo aulu jea. I pa sopo

inu na waen teni te wai rilangi tinapua hin rani, ale Tanume Tapu i pa mařivisia i tapulo na lolo pangen tinana. ¹⁶ Ale enia i pa posi na natun Israel matuvana la mele mai isan Moli nora God. ¹⁷ Ale enia i pa vano tiroma hin Moli hin suiha atu Tanumen God mo silea isan přovet Elijah, matan vara i posi na řomřomi nona tama vara la řomřomi na natura, ale la haratu la sopo oloolo hin God la usuri na posposi nona tamlohi tataholo, matan vara i vai na vao tamlohi matea la tatamahu matan Moli.”

Mal 4.5

¹⁸ Ale Zechariah mo vereia isan angelo atu mara, “Avei, sohena sava natu a pa eri levosahia vara i pa sohen ko lo vereia? Matan enau na vajiaha moiso, ale taunin narouku mo jeu na rani mata nona tatape moiso.”

¹⁹ Ale angelo atu mo řaramia mara, “Enau Gabriel, haratu sei mo lo turu na nahon God, ale God mo řuleau vara a sinai isam vara a vereho hin retiruhu nike. ²⁰ Ale nakerihi, o pa mengo, o sopo eři vere te reti vavano i tikeli rani atu i masese matan ko sopo rasu na noku reti, sei la pa masese na ranira tataholo.”

²¹ Ale vao tamlohi la lo saovi Zechariah na jingoima, ale la lo řomřomia vara mo pa lo toma na lolo Temple. ²² Ale mara mo malue, mo sopo eři retireti isara, ale la hitevosahia vara God mo vujanga na hinau matea na lolo Temple, ale mo lo vai na matamata nakonako isara, ale mo sopo eři retireti.

²³ Ale nona rani mata vavahinau mo isoiso, ale mo mele mule. ²⁴ Hitahun la rani atu, narouna Elizabeth mo tau natuna, ale mo luhu mata vitu mo lima mara, ²⁵ “Moli mo řomřuhu isaku, mo lavi nařihi na noku mahanuhanu mata aroaro na tamlohi.”

Retisohai Matan Iesu

²⁶ Elizabeth mo epe puhoni mata vitu mo limarave moiso, ale God mo řule pa angelo atu, Gabriel vara i sivo Nazareth, vanua matea hin Galilee, ²⁷ mo sivo isana hařai maevo matea hijana Mary. La tauhoroa moiso vara i pa lahi vano isana tamlohi matea hijana Joseph, enia mahapin Supe David matea. ²⁸ Gabriel mo pala isana mara, “Raniřuhu isam, engko hařai matea God mo řomřuhu isam mo tavera jea! Moli mo lo toho peresiho.” ²⁹ Pani Mary, řomina mo tuturahi hajavua hin retireti atu, ale mo vaihitea vara i levosahi na řaramin retioloolo atu. ³⁰ Ale angelo atu mo vereia isana mara, “O sopo matahu! Mary, matan na masalon God mo opoia vara i řuhu isam. ³¹ Ale mo tapulo nake, o pa tau natum, ale o pa tape na lamane matea, ale o pa tau na hijana vara Iesu. ³² Enia i pa tamlohi aulu jea, ale la pa tovia Natun God, sei mo aulu jea. Ale Moli God i pa silea na suiha nona

supe non tamana Supe David. ³³ Enia i pa tauri na suiha vara i aulu na vaon Israel tui tui, ale i pa sopo te isoiso rani mata nona tauri na suiha.”

³⁴ Mary mo usia isan angelo atu mara, “Hinau atu i pa mai sohena sava, matan enau hařai maevo matea?”

³⁵ Angelo atu mo řaramia mara, “Tanume Tapu i pa mai hiniho, ale suihan God Aulu jea i pa hohoviho; ale matana, natirih sei i pa vora i pa tapu, la pa tovia — Natun God. ³⁶ Ale ko levosahia vara tahisam Elizabeth na nona vajiaha enia sohena, mo tau natuna lamane matea, ale vitu akერიhi enia nona halimarave vitu isana hařai matea la vereia vara enia hařai aroaro matea! ³⁷ Matan mo sopo te hinau hatea i řilangi jea vara God i sopo eři vaia.”

³⁸ Ale Mary mara, “Varařuhu enau hařai slev non God purongo. Na opoia vara hinau atu i mai isaku sohena ko vereia.” Ale angelo atu mo mele malue mo vano.

Mary Mo Rohi Elizabeth

³⁹ Hitahun rani atu, Mary mo vele sahe na jara vutivuti, mo sivo vila na taon matea na lolon jara matan Judea. ⁴⁰ Mo unu na iman Zechariah, ale mo vere na retioloolo isan Elizabeth. ⁴¹ Ale Elizabeth mara mo rongo na retioloolo non Mary, pipi atu na lolona mo hisu, ale Tanume Tapu mo mařivisi Elizabeth, ⁴² mo vereia aulu mara, “Avulahi tavera jea isam mo jeu na hařai tinapua. God mo leřuhu hin natirih sei mo lo toho na lolom. ⁴³ Ale enau hare vara tinan noku Moli i eri mai vara i rohiau? ⁴⁴ Matan, vahatea purongo atu sei nara na rongo na nom retioloolo, pipi nike, na loloku mo hisu na avulahi. ⁴⁵ Avulahi tavera isam matan ko rasu Moli vara i pa vai na sava mo vereia isam!”

Vete Hasohaso Non Mary

⁴⁶ Ale Mary mo vereia mara,

“Na řomiku na hasohaso

God mo tavera jea,

⁴⁷ ale mauriku mo avulahi tavera hin God noku Jujuri,

⁴⁸ matan mo kilau mai isaku nona hařai volitusi atano,

ale mo tapulo nake,

mahapi tari la pa vereia vara avulahi tavera mo mai isaku,

⁴⁹ matan haratu sei mo řilangi jea mo vai na hinau tavera isaku, ale hijana mo tapu.

⁵⁰ Ale nona řomopoia

mo vano isana mahapi tari, isan la haratu sei la lo sile na oloolo tavera isana.

⁵¹ Enia mo vujangi na nona suiha, mo leputi jalajalai la haratu la mangisi na mapura.

- ⁵² Mo lavi narihi la haratu
la lo tauri na suiha nona supe, ale mo
tahe la haratu romira la atano la sahe
aulu.
- ⁵³ Mo sohoni la haratu
la marohati na hina fuhu,
pani mo fule narihi la haratu la tavitav
la vano lekoleko.
- ⁵⁴ Mo tueni nona volitusi Israel, usuri na
nona retitauhi mata nona romopoia
hinira,
- ⁵⁵ matan mo retitauhi
vara i pa romopoi isan Abraham peresi
na tania na rani tui tui.”
- ⁵⁶ Mary mo lo toho atu isan Elizabeth
mata vitu mo tolu, moiso mo pa mele mule
vano na jarana.

John Tamlohi Paptijo Mo Vora

- ⁵⁷ Ale vitu non Elizabeth mo asi vara i
lavlavi, ale mo vasusui na nona pipi lamane
matea. ⁵⁸ Ale tavitavuina peresi na tahisana
la rongoa vara Moli mo romfuhu tavera
jea isana, ale la avulahi peresia. ⁵⁹ Ale na
halimaravtolu rani la mai vara la vai na
nona taiʻalihi. Tatuara la lo opoia vara la
tau na hijana vara Zechariah vara i lavi
na hijan tamana, ⁶⁰ pani tinana mo vere
mara, “Mo vono, enia hijana John.”

- ⁶¹ Ale la vere isan Elizabeth lara, “Mo
sopo te tavitavuim hijana i sohen haratu!”
⁶² Ale la vai na matamata hai isan tamana
na limara vara sava hija natu, enia mo
opoia vara i silea isana. ⁶³ Ale Zechariah mo
usia vara la lavi te hinau mata uluhi hinia
i mai isana, ale la maʻurahi tavera matan
mo ulia mara, “Hijana enia John.” ⁶⁴ Ale
vahatea purongo memena mo mele materi,
ale mo retireti mo hasohaso God.

- ⁶⁵ Tahisara tari la hutura, ale la matahu,
ale sorasora atu mo falihi vevuhi na jara
tari na jara vutivuti Judea. ⁶⁶ Ale tamlohi
tari sei la rongora la sopo levosahia vara
natirihitu atu i pa sava tamlohi pavuhonu
matan liman Moli mo lo toho hinia.

Tanumen God Mo Maʻivisi Zechariah

- ⁶⁷ Ale tamana, Zechariah, Tanume Tapu
mo maʻivisia, ale mo retimangovi mara,
⁶⁸ “Hasohaso tavera isan Moli God matan
Israel,
matan nake mo rohi na nona tamlohi
vara i jurira,
⁶⁹ God mo sileʻa na Tamlohi Jujuri matea
mo suiha tavera mo tai na iman nona
volitusi supe David,
⁷⁰ sohena nona pʻovet tapu tuai la vere
⁷¹ lara vara i pa jurifa isana noʻa meresahi,
ale na liman la haratu sei la foʻhu
hiniʻa.
⁷² Mo maʻivisi na nona retitauhi tapu sei
vara i pa romi na nomam pua,
⁷³ retitauhi atu mo silea

- isan tamaʻa Abraham vara i pa vaia,
⁷⁴ ale vara i jurifa isana noʻa meresahi, ale
i pa tuenifa vara fa volitusi isana i
sopo te matahu isafa,
⁷⁵ na mauri tapu mo tataholo na nahona
mata noʻa rani tari.
⁷⁶ Ale engko natuku, la pa toviho pʻovet non
haratu mo aulu jea; matan engko o pa
vano tiroma hin Moli,
mata vai mamahuni na malelena,
⁷⁷ o pa vere na tamlohi sohena sava God i pa
jurira matan i pa romi na nora hehe.
⁷⁸ matan noʻa God enia God
mata romi na tamlohi na nona
romfuhu,
matan mai non nona Jujuri mo sohena
alo mo vele aulu mo sinai isafa na
tuka,
⁷⁹ vara i mera isan la haratu
la lo toho na foʻroha,
ale na liman mateia,
matan vara i tiromaʻa
na malele mata tamata.”

John Tamlohi Paptijo Mo Ulua

- ⁸⁰ Ale pa natirihitu atu mo ulua, ale Tanume
Tapu na maurina mo suiha, ale mo lo toho
na tano koru mo tikeli na rani mata nona
pala na naho tamlohin Israel.

2

Iesu Mo Vora

(Mt 1.18–25)

- ¹ Hin pongi atu, supe nona mara Rome,
enia Augustus, ale mo vere mara la evi
vevuhi na tamlohi falihi na jara tari sei
enia mo lo tauri na suiha hinira na varama.
² Harihi enia tiroma evi na tamlohi hin
pongi atu Quirinius, tamlohi aulu matea
mara Rome mo lo aulu hin Syria. ³ Ale,
tamlohi tari la vano na jarara tataholo vara
la pa sile na hijara ea. ⁴ Ale Joseph mo malue
Galilee na taon matan Nazareth mo sahe na
taon non pin supe David sei Bethlehem na
jara matan Judea, matan enia tahisan supe
David, ⁵ vara i tau na hijana peresi Mary,
hafai atu sei mo tauhoroa moiso mata lahi,
ale mo tau natuna.

- ⁶ Ale hin pongi atu la pa lo toho atu, nona
rani mo mai vara i lavilavi. ⁷ Ale mo vasui
natuna vora tiroma lamane matea. Mo lep-
uti mamahunia na ruru, ale mo taua sivo na
puhoro ruvu hana maji palovati, matan mo
sopo te mele masapa na lolon ima malele
atu nona tamlohi la lo hahau.

Tavui Sipsip La Hite Na Angelo

- ⁸ Hin vutepongi atu, hin jara atu, na
pahisan taon atu, tavui sipsip hai la lo toho
saovi na pulara sipsip na jara fuvufuvu
tavaera. ⁹ Ale la pa hutura purongo, angelo
non God matea mo pala isara, ale meran
God mo merasahira, ale matahu mo sohoni

vevuhi na epera. ¹⁰ Angelo atu mo vereia isara mara, “Ha sopo matahu, matan enau na lavi na retiŕuhu mata avulahi tavera matea vara a silea isamim sei i pa nona tamlohi tari. ¹¹ Matan, nakerihi, natirihia matea mo vora isamim na taon non supe David, enia Kristo sei i pa juri na tamlohi, nofa Moli. ¹² Ha pa efi hitevosahia sohen harihi: ha pa hite na pipi matea, la leputia na ruru la taua mo lo juruvi na puhoro ŕuvu hana maji palovati.”

¹³ Ale, la pa hutura, vao angelo vuro na tuka la pala vahatea na haŕin pa angelo atu, ale la lo hasohaso God lara,

¹⁴ “Hasohaso i sahe isan God na jarana aulu jea na tuka!

Ale na varama, tamata i pa toho isan la haratu God mo avulahi hinira.”

¹⁵ Na rani la angelo atu la malue isara la sahe na tuka, la tavui sipsip atu la lo verevera isara lara, “Ale ŕa vano, ŕa vano Bethlehem vara ŕa hite hiniau sei Moli God mo lo vereŕa hinia.”

¹⁶ La tamlohi atu la vano vilavila la tapai Mary enia Joseph, ale pa natirihia atu mo lo juruvi na ŕuvu na puhoro matea. ¹⁷ Lara la hitea, la vereuli na sava pa angelo atu mo lo vereia isara matan natirihia atu. ¹⁸ Ale tamlohi tari sei la rongo la retireti atu, la maŕurahi tavera na sava la tavui sipsip atu la vereia isara. ¹⁹ Pani Mary mo tau mamahuni la hiniau nike na ŕomina, ale mo lo ŕomromira. ²⁰ Ale pa la tavui sipsip atu la mele hilu vano isana pulara sipsip, la lo tahe na hijan God, ale la sile na hasohaso isana mata sava la rongoa, ale sava la hitea sohen la vereia isara.

La Tau Na Hijan Iesu

²¹ Mo kakau na halimaravtolu rani, vara i lavi na nona taifalihu, ale la tau na hijana vara Iesu, hija atu sei angelo atu mo lo silea tiroma moiso Mary mo pa tau natuna.

La Lavi Iesu Vano Na Temple

²² Ale mo kakau na rani mata malamalai matan vara i vai Joseph enia Mary la vokevoke usuri na Leu non Moses, la lavia mo sahe Jerusalem mata silea isan Moli God ²³ sohen la ulia na leu non Moli God lara,

‘Lamane vora tiroma tari sei la malue na pangen tinara tiroma, enira la tapuhi non Moli God.’ *Exo 13.2–12*

²⁴ Ale la sile na malamalai usuri na sava leu non Moli God mo vereia vara la vaia, ‘vomahe i rua teni te wepe i rua.’

Lev 12.2–8

Simon Mo Hite Iesu

²⁵ Ale hin pongi atu, mara Jerusalem matea, hijana Simon, enia tamlohi tataholo matea, ale ŕomina mo filangi mata lotu tarea. Mo lo kilau matan Jujuri non Israel,

ale Tanume Tapu mo maŕivisia. ²⁶ Tanume Tapu mo vujangia hinia moiso vara i pa sopo mate vavano i tikeli pongi atu i hite Kristo non Moli God. ²⁷ Ale Tanume Tapu mo vai na ŕomina vara i vano na lolu Temple, ale na rani taman Iesu enia tinana la lavia mo sinai matan vara la vai na posposi sei leu mo opoia, ²⁸ mo tulia, ale mo sile na hasohaso isan God mara,

²⁹ “Moli God, nake natu, na levosahia moiso vara o efi majinga hiniau nom volitusi,

vara a mate na tamata matan nom reti-tauhi isaku mo masese,

³⁰ matan matakau mo hite na nom Jujuri moiso,

³¹ ko tatamahunia mata tamlohi tari,

³² enia malarani matea mata vuhesi God isana tamlohi ŕoŕoŕa tari, ale mata hasohaso nona nom tamlohin Israel.”

³³ Taman Iesu enia tinana la maŕurahi tavera na sava mo vereia matana. ³⁴ Ale Simon mo leŕuhu hinira, ale mo vereia isan tinana Mary mara, “God mo viŕoni natirihia nike, vara i pa vai na tamlohi matuvana Israel la jovi, ale i pa tahe na tamlohi matuvana hinia, enia i pa matamata matea tamlohi la pa verelejeleja, ³⁵ matan vara ŕomŕomi nona tamlohi matuvana la pa mavuhesi, ale ko hitea, sita vuro i pa hoti na maurim tataholo.”

Provet Haŕai Sei Anna

³⁶ Provet haŕai matea mo lo toho atu hijana Anna, venatun Phanuel tavgavin Asher. Enia mo vajiaha sasati moiso, mo lo toho peresi tuana mata tauni mo limaravrua purongo hin la rani atu mo pa lo haŕai maevo, ³⁷ moiso mo lo toho sohen haŕai malepu matea mo tikeli na taunina mo ngavulu limaravtolu mo vati (84). Enia mo sopo lo malue hin Temple atu, mo lo lotu God na nona tapuhoro na hanhani peresi na nona usiusi tarea na rani peresi na vutepongi. ³⁸ Ale mo sinai tataholo hinira atu, ale mo tapulo vere meje isan God. Mo retireti matan natirihia atu isan la haratu sei la lo kilau toho matan rani atu vara God i pa volituhu Jerusalem hitea.

Joseph Enia Mary La Mele Mule

³⁹ Ale na rani Joseph enia Mary la vai vevuhi na sava leu non God mo opoia, la mele vano na jarara Galilee, na nora taon matan Nazareth. ⁴⁰ Natirihia atu mo ulua, mo mai mo filangi, ale ŕomina mo maŕivi na lelevosahi. Ale ŕomŕuhu non God mo lo toho isana.

Iesu Mo Uluvou Mo Sahe Na Temple

⁴¹ Na tauni hatehateahi tamana enia tinana la lo sahe Jerusalem mata Hanhani

atu mo lo vaira, Herod mo tau John na ima rilangi.

John Mo Paptijo Hin Iesu
(Mt 3.13–17; Mk 1.9–11)

²¹ Pani hin pongi atu John mo sopo lo toho na ima rilangi, tamlohi tari la lavi na paptijo, ale John mo paptijo hin Iesu. Ale Iesu mo pa lo ususi, tuka mo maroi, ²² ale Tanume Tapu mo sinai atano sohena vomaha matea, ale mo tau hinia; ale leon matea mo tai na tuka mara, “Engko Natuku ruhuruhu jea, enau na avulahi tavera jea hiniho.”

Pina Iesu Tuai
(Mt 1.1–17)

²³ Taunin Iesu mařiviti i ngavulu tolu (30) moiso mo pa tapulo na nona vavahinau.

Iesu la vereea vara enia natun Joseph,

Joseph, enia natun Heli,

²⁴ Heli, enia natun Matthat,

Matthat, enia natun Levi,

Levi, enia natun Melchi,

Melchi, enia natun Jannai,

Jannai, enia natun Joseph,

²⁵ Joseph, enia natun Mattathias,

Mattathias, enia natun Amos,

Amos, enia natun Nahum,

Nahum, enia natun Esli,

Esli, enia natun Naggai,

²⁶ Naggai, enia natun Maath,

Maath, enia natun Mattathias,

Mattathias, enia natun Semein,

Semein, enia natun Josech,

Josech, enia natun Joda,

²⁷ Joda, enia natun Joanan,

Joanan, enia natun Rhesa,

Rhesa, enia natun Zerabbabel,

Zerabbabel, enia natun Shealtiel,

Shealtiel, enia natun Neri,

²⁸ Neri, enia natun Melchi,

Melchi, enia natun Addi,

Addi, enia natun Cosam,

Cosam, enia natun Elmadam,

Elmadam, enia natun Er,

²⁹ Er, enia natun Joshua,

Joshua, enia natun Eliezer,

Eliezer, enia natun Jorim,

Jorim, enia natun Matthat,

Matthat, enia natun Levi,

³⁰ Levi, enia natun Simeon,

Simeon, enia natun Judah,

Judah, enia natun Joseph,

Joseph, enia natun Jonam,

Jonam, enia natun Eliakim,

³¹ Eliakim, enia natun Melea,

Melea, enia natun Menna,

Menna, enia natun Mattatha,

Mattatha, enia natun Nathan,

Nathan, enia natun David,

³² David, enia natun Jesse,

Jesse, enia natun Obed,

Obed, enia natun Boaz,

Boaz, enia natun Sala,

Sala, enia natun Nahshon,

³³ Nahshon, enia natun Amminadab,

Amminadab, enia natun Admin,

Admin, enia natun Arni,

Arni, enia natun Hezron,

Hezron, enia natun Perez,

Perez, enia natun Judah,

³⁴ Judah, enia natun Jacob,

Jacob, enia natun Isaac,

Isaac, enia natun Abraham,

Abraham, enia natun Terah,

Terah, enia natun Nahor,

³⁵ Nahor, enia natun Serug,

Serug, enia natun Reu,

Reu, enia natun Peleg,

Peleg, enia natun Eber,

Eber, enia natun Shelah,

³⁶ Shelah, enia natun Cainan,

Cainan, enia natun Arphaxad,

Arphaxad, enia natun Shem,

Shem, enia natun Noah,

Noah, enia natun Lamech,

³⁷ Lamech, enia natun Methuselah,

Methuselah, enia natun Enoch,

Enoch, enia natun Jared,

Jared, enia natun Mahalaleel,

Mahalaleel, enia natun Cainan,

³⁸ Cainan, enia natun Enos,

Enos, enia natun Seth,

Seth, enia natun Adam,

Adam, enia natun God.

4

Tiapolo Mo Vaihite Iesu
(Mt 4.1–11; Mk 1.12–13)

¹ Ale Tanume Tapu mo mařivisi Iesu, ale Iesu mo malue na wai Jordan, ale Tanume Tapu mo tiroma hinia mo vano na jara tano koru. ² Tiapolo mo vaihite Iesu atu mata rani mo ngavulu vati. Hin la rani atu, Iesu mo sopo hani te hinau hatea, ale rani atu la isoiso Iesu mo marohati jea.

³ Tiapolo mo vereea isana mara, “Vara engko Natun God, o vere vatu sei i mai pereti!”

⁴ Iesu mo faramia mara, “Retiulia mo vereea vara, ‘Tamlohi i pa sopo mauri na pereti purongo!’” *Deut 8.3*

⁵ Ale Tiapolo mo lavi Iesu mo sahe aulu na masapa, ale vahatea purongo, mo vujangia na jara tari na varama sei supe la lo tauri na suiha hinira, ⁶ ale mo vereea isana mara, “A pa sileho na nora suiha peresi na nora hasohaso, matan hinau tari sei la lo toho na limaku, ale a eři silera isan hare na opoia. ⁷ Vara o lotuau purongo, hinau tari sei la pa nom!”

⁸ Ale Iesu mo faramia mara, “Retiulia mo vereea vara, ‘O pa lotu Moli nom God,

ale o pa volitusi isana hasena! ”

Deut 6.13

⁹ Ale Tiapolo mo lavi Iesu mo taua aulu na pusa Temple, ale mo vereea isana mara, “Vara engko Natun God, o kue! ¹⁰ matan Retiulia mo vereea vara,

‘God i pa retileu isana nona angelo vara la pa lo kilau mamahuniho,

¹¹ ale la pa tauriho na limara matan

vara o sopo vujahi na palom hin te vatu.’ ”

Psa 91.11–12

¹² Iesu mo faramia mara, “Retiulia mo vereea vara, ‘O pa sopo vaihite Moli nom God!’ ”

Deut 6.16

¹³ Ale na rani Tiapolo mo isoiso na nona vaihite isan Iesu, mo malue mo vano, pani mo lo kilau matan te masapa ruhu tinapua.

Iesu Mo Tapulo Vujangi Na Tamlohi Galilee

(Mt 4.12–17; Mk 1.14–15)

¹⁴ Iesu mo mele vano Galilee na suihan Tanume Tapu, ale sorasorahina mo falihi jara atu. ¹⁵ Mo vujangi na tamlohi na nora ima lotu, ale tamlohi tari la hasohasoa.

La Turuleji Hin Iesu

(Mt 13.53–58; Mk 6.1–6)

¹⁶ Ale Iesu mo pala Nazareth, jara atu sei mo ulua ea. Ale sohena mo lo vaia tarea mo vano na nora ima lotu na Sabbath, ale mo turu na naho tamlohi mata i evi na Retiulia, ¹⁷ ale la silea hin viriviri pepa atu sei Isaiah mo lo ulia, mo vuhesia ale mo vano hin jara atu sei mo opoia vara i evia, ale mo vereea mara,

¹⁸ “Tanumen Moli mo lo toho hiniua matan enia mo vifoniau vara a vereuli na Retifuhu isana tilavono.

Mo fuleau vara a vere na materi isan la haratu la lo taurilatira,

ale vara a vai na tamlohi matavuso la kilau,

ale vara a teri la haratu la lo toho na ruhuruhu tamlohi sasati,

¹⁹ ale vara a vereulia vara nake enia pongi fomfuhu non Moli.” *Isa 61.1–2a*

²⁰ Ale Iesu mo mele viriviri pepa atu, mo silea isan tamlohi atu mo lo silea isana, ale mo sakele. Tamlohi tari na lolon ima lotu atu matara la lo toho hinia, ²¹ ale mo tapulo vereea isara mara, “Nahapani natu Retitapu nike mo pa masese na peromim.”

²² Ale tamlohi tari la hasohasoa, la mafurahi na retifuhu mo lo verera, ale la vereea lara, “Avei, tamlohi nike enia natun Joseph teni!”

²³ Ale Iesu mo vereea isara mara, “Na levosahi mamahunia vara ha pa vereau hin titileu sei mo vereea vara, ‘Doctor, o hase vai mamahuniho!’ Ha pa vereea vara, ‘Sava hina mafurahi kama rongoa vara ko lo vaia Capernaum, o vaia nike na jaram sohena!’ ”

²⁴ Ale mo vereea isara mara, “Varafuhu na vereea isamim, vara mo sopo te pfovet hatea i efi lavi na fomfuhu nona tamlohi na vanuana.

²⁵ Pani, na varafuhu hin haratu na vereea vara, ‘Malepu matuvana Israel la lo toho na rani non Elijah, hin rani atu usa mo sopo jovi mata tauni mo tolu vitu mo limarave, ale marua tavera mo voroi Israel, ²⁶ ale God mo sopo rule Elijah i vano isan te vonara, pani isana hafai malepu matea mo lo toho Zarephath na jara Sidon. ²⁷ Ale tamlohi lep-ros matuvana hin Israel la lo toho na rani non Elisha, God mo sopo vai mamahuni te vonara hatea pani Naaman purongo mara Syria matea.’ ”

²⁸ Ale lara la rongoa la hinou atu Iesu mo lo verera, tamlohi tari na lolon ima lotu la lolokoru patura. ²⁹ La turu la titiua vara i malue hin taon atu, ale la lavia mo vano na tavalu taon matan vara la pa pulahia na pesapesan vutivutu atu sei la voro na nora taon hinia. ³⁰ Pani Iesu mo hahau roto na livuhara mo vano.

Iesu Mo Titiu Nafihi Na Tanume Sati

(Mk 1.21–28)

³¹ Ale Iesu mo sahe Capernaum, taon tavera matea Galilee. Mo lo vujangira na Sabbath, ³² ale la haratu la rongoa la mafurahi tavera na nona vujangi, matan nona reti mo suiha.

³³ Na lolon ima lotu atu tamlohi matea, tanume lumiha sasati matea mo lo toho hinia, mo ulo aulu filangi mara, ³⁴ “Aaah! Ko mai isamam mata sava, Iesu mara Nazareth? Ko mai vara o komo kamam? Na levosahia vara engko hare — haratu mo tapu non God!”

³⁵ Pani Iesu mo merusahia mara, “O sopo retireti! O malue isan tamlohi sei!” Ale tanume sasati atu mo safihi tamlohi atu sivo atano na livuhan vao atu, ale mo malue hinia, pani mo sopo komo te epena.

³⁶ Tamlohi tari la mafurahi matana, ale la lo hase vereverea isara lara, “Eh! Sava reti nahai? Matan na suiha nona retileu purongo, mo titiu nafihina na tanume lumiha sasati la malue!” ³⁷ Ale sorasorahina mo vano falihi na jara tari ea.

Iesu Mo Tueni Na Tamlohi Matuvana

(Mt 8.14–17; Mk 1.29–34)

³⁸ Ale hitahun haratu, Iesu mo turu mo malue na ima lotu, mo vano na iman Simon Peter mo unu hinia. Hin rani atu vepalihan Peter mo rojo na seserei filangi matea, ale la usi Iesu matana vara i tuenia. ³⁹ Iesu mo turu na pahisa vatana, mo kilau sivo isana, ale mo rule nafihina seserei atu, ale seserei atu mo malue isana, ale vahatea purongo mo turu mo tapulo tatamahuni na hara hinou.

⁴⁰ Alo mo lo tapulo majo, ale la haratu te tahisara la rojo na rojia tinatinapua la lavira la mai isan Iesu, ale mo tau na limana hinira hatehateahi mo isoiso, ale nora rojia la tihai. ⁴¹ Ale tanume sasati sohena la malue isana tamlohi matuvana la ulo lara, “Engko Natun God!” Pani Iesu mo merusahira, ale mo sopo tinafihira vara la vere te hinau, matan la levosahia vara enia natu pa Kristo atu.

Iesu Mo Retivujavujangi

⁴² Ale na rani tinapua na falavuho, Iesu mo malue mo vano na jara hasetoho matea. Ale tamlohi la alea la mai isana, la opoia vara i lo toho peresira tako, ⁴³ pani Iesu mo vere isana mara, “A pa vano na taon tinatinapua vara a retivujavujangi hin mauri atu God mo aulu hinia isara sohena na vaia isamim, matan God mo řuleau matana.” ⁴⁴ Ale mo malue mo vano řalihhi na jara Judea mo lo retivujavujangi na nora ima lotu.

5

Mo Tovi Na Nona Tamlohi Usuri

(Mt 4.18–22; Mk 1.16–20)

¹ Na rani matea, Iesu mo lo turu na pahisa tasin Galilee, vao tamlohi matuvana la lo turu porotia mata tapurongo na reti non God, ² ale mo hite na boti mo rua la sere-tahira na oneone, mo hite na tamlohin la boti atu la lo turu na jarauta, la lo hoje na nora tara. ³ Iesu mo vele na vonan la boti atu matea sei enia botin Simon Peter, mo usia vara i sohai nařihia makomona na jarauta. Ale Iesu mo sakele na boti mo vujangi pa vao tamlohi atu.

⁴ Mara mo isoiso na nona retireti isara, mo vere isan Simon mara, “Eh, o sohai nařihia i sivo na jara puaha, ale ha tuhu na nomim tara mata tarai te maji.”

⁵ Moiso, Simon mo řaramia mara, “Tamlohi tavera, kama kalvono vutepongi jarohi, ale kama sopo tikeli tea, pani matan ko vere, a pa tuhu na tara.” ⁶ Ale lara la vaia sohena, la řalihhi na takonahi maji, ale nora tara la tapulo mafari. ⁷ La alovi na tapalara hin boti tinapua atu vara la mai la tuenira, ale la mai la sohoni la boti atu mo rua, mariviti vara la pute.

⁸ Pani Simon Peter mara mo hite hinau atu mo jovi sivo mo papaohi na paun Iesu mara, “O malue isaku Moli! Matan enau na tamlohi hehe matea!” ⁹ Matan Simon Peter enira tolu la haratu la lo toho peresia la mařurahi tavera na maji la tikelira, ¹⁰ ale James enia John sohena, enira natun Zebedee sei la tapalan Simon Peter na bisnis mata aleale maji.

Ale Iesu mo vere isan Simon mara, “O sopo matahu! Mo tapulo nake, engko o pa

tamlohi tara tamlohi!” ¹¹ Ale lara la tahe na botira sahe na jarauta, la tinafihhi na hinau tari nora mata botira, ale la usuri Iesu.

Tamlohi Lepros Matea

(Mt 8.1–4; Mk 1.40–45)

¹² Ale na rani matea Iesu mo lo toho na taon tavera matea atu, tamlohi matea mo mai isana lepros mo hati vevuhi na epena, ale mara mo hite Iesu, mo jovi na nahona, mo tangi isan Iesu mara, “Moli, vara o maringa, o eři vaiau a vokevoke.”

¹³ Moiso Iesu mo řirahi na limana mo tikelia mara, “Ale a vaia! O vokevoke!” Vahatea purongo lepros atu mo tinafihia. ¹⁴ Iesu mo vere isana vara i sopo mele vere isan tea, pani mo vere mara, “O vano o hase vujangiho isan te pñis hatea, ale o sile te silesilea hatea mata nom vokevoke usuri na sava Moses mo retileu hinia, matan vara i eři vere vara engko ko mele ruhu.” ¹⁵ Pani nake natu sorasorahina mo mele tavera jea mo vano asau, ale vao tavera la lo mai vara la tapurongo na nona retireti, ale mo vai na nora rojia la tihai. ¹⁶ Pani tarea Iesu mo lo vano hasena na jara hasetoho mata ususi.

Tamlohi Hariju Matea

(Mt 9.1–8; Mk 2.1–12)

¹⁷ Ale na rani matea hin la rani atu, Iesu mo lo vujangi, Pharisee peresi na tamlohi vujangi mata leu, la lo sakele mariviti atu, enira la tai na vanua tari matan Galilee, Judea peresi Jerusalem. Ale suiha tavera non God mata titiu nařihhi na rojia mo lo toho hinia. ¹⁸ Tamlohi la hutura matan tamlohi hai la lo lavi na tamlohi rojia matea na epa matea, epena tari la mate, ale la lo aleale malele vara la lavia i unu sivo na nahon Iesu. ¹⁹ Pani la sopo hite te malele vara la pa unu hinia, la vele sahe aulu na pusa ima la řole na masapa matea, ale la tuhua na epana mo sivo atano na livuha vao tataholo na nahon Iesu. ²⁰ Ale Iesu mara mo hite na nora rasua, mo vere isan tamlohi rojia atu mara, “Tapala, na řomiho mata nom hehe.”

²¹ Ale tamlohi vujangi mata leu peresi na Pharisee la tapulo ususira lara, “Sava tamlohi nahai mo lo vaia sohena enia God? God hasena i eři řomi na hehe!”

²² Iesu mo levosahi na řomira ale mo řaramira mara, “Mata sava řomimim mo lo sati na sava na vere? ²³ Sava natu, mo mele malum jea? Vara a vere isan tamlohi hariju nike vara, ‘Na řomi na nom hehe!’ teni ‘O turu! O hahau!’ ²⁴ Pani matan vara ha eři levosahia vara Natun Tamlohi mo lavi na suiha mata řomi na hehe na varama, ha tapurongo na sava a pa vere!” Moiso Iesu mo vere isan tamlohi hariju atu mara, “Na vere isam, o turu, o lavi na epam, ale o mule!”

²⁵ Vahatea purongo, mo turu na nahora, mo lavi na epana mo mule, ale mo lo hasohaso God. ²⁶ Maʻurahi tavera mo taurilatira, ale enira mo isoiso la hasohaso God, matahu mo sohonira lara, “Na vereaa! Mele hina maʻurahi tinatinapua nahai fa lo hitera nakerihi!”

Iesu Mo Viʻoni Matthew
(Mt 9.9–13; Mk 2.13–17)

²⁷ Hitahuni haratu, Iesu mo malue mo vano, ale mo hite na tamlohi mata lavi na takis matea, hijana Levi, mo lo sakele na jarana, ale mo vereaa isana mara, “O usuriau!” ²⁸ Ale mo turu, mo tinafihi vevuhi na nona voko tari mo usuri Iesu.

²⁹ Moiso, Levi mo vai na hanhani tavera matea non Iesu na imana, ale takonahi tamlohi mata lavi na takis peresi na tamlohi tinapua hai la lo hanhani peresira na tep atu. ³⁰ Ale Pharisee peresi na nora tamlohi vujangi mata leu hai la lo ngutungutu isana nona tamlohi usuri lara, “Mata sava ka lo hanhani ale ka lo inu peresi na tamlohi mata lavi na takis peresi na tamlohi hehe?”

³¹ Ale Iesu mo ʻaramira mara, “Haratu la sopo rojo la sopo opoi na doctor, pani haratu purongo sei la rojo. ³² Na sopo sinai matan vara a tovi la haratu la tataholo la posi, pani mata tamlohi hehe.”

Tapuhoro Na Hanhani
(Mt 9.14–17; Mk 2.18–22)

³³ Pharisee la vereaa isana lara, “Tamlohi usuri non John tamlohi paptijo la lo tapuhoro na hanhani hin te rani mata ususi, ale tamlohi usuri nona Pharisee la lo vaia sohana, pani nom la lo hanhani la lo inu!”

³⁴ Iesu mo ʻaramira mara, “Ha eri vai na tamlohi ka tovira mata mai na hanhani lahi la tapuhoro na hanhani vara tamlohi lahi mo lo toho peresira? ³⁵ Pani rani mo lo mai vara la pa lavi naʻihi na tamlohi lahi isara, ale la pa tapuhoro na hanhani hin la rani atu natu.”

Ruru Tuai Peresi Na Ruru Paro

³⁶ Iesu mo mele verera na titileu matea mara, “Mo sopo tea i ʻari te nona ruru paro vara i lavi tavalu ruru atu i silivi horo na maʻari ruru tuai matea hinia. Vara i vaia sohana, i pa ʻari ruru paro atu, ale tavalu ruru paro atu i pa sopo eri soro i fuhu hin ruru tuai atu.

Waen Tuai — Waen Paro

³⁷ Ale mo sopo tea i tisi na waen paro i sivo na huri waen tuai. Vara i vaia sohana, waen paro atu i pa vali i sohi i kosahi huri waen tuai atu sei mo masa moiso, ale waen atu i pa roro naʻihi, ale huri atu i pa sopo mele fuhu matan te hinau. ³⁸ Pani ha pa tisi na waen paro na lolu huri waen paro

purongo matan mo malum. ³⁹ Ale mo sopo tea vara i lo inu na waen tuai i opoi na waen paro, matan i pa vereaa vara, “Waen tuai mo meji.”

6

Iesu Enia Supe Mata Sabbath
(Mt 12.1–8; Mk 2.23–28)

¹ Na Sabbath matea, Iesu mo pa lo hahau roto na isa wit matea, ale nona tamlohi usuri la vesi roto na perera hai, ale la savasavahira na limara, moiso la hanira.

² Pani tatua Pharisee lara, “Eh! Mata sava ka lo vai na hinau matea mo sopo tataholo vara ha vaia na Sabbath?”

³ Iesu mo ʻaramira mara, “Ka sopo lo evi na sava David mo vaia hin rani atu mo marohati, enia peresi la haratu la lo toho peresia? ⁴ Ka evia ka hitea sohana sava mo unu na Tabernacle non God mo lavi na pereti tapu, pereti atu pʻis hasera la eri hania, ale David mo hania mo silea isana tatuana la hania sohana.” ⁵ Ale Iesu mo vere isara mara, “Natun Tamlohi, enia Moli mata Sabbath.”

Tamlohi Matea Tavalu Limana Mo Rihirihiri

(Mt 12.9–14; Mk 3.1–6)

⁶ Na Sabbath tinapua matea, Iesu mo unu na lolu ima lotu, ale mo lo vujangi. Tamlohi matea mo lo toho atu matua limana mo rihirihiri. ⁷ Ale tamlohi vujangi mata leu peresi na Pharisee la lo kilau Iesu vara i pa titiu naʻihi na rojo na Sabbath teni mo vono, matan vara la eri vilei te hinau mata pisuhia hinia. ⁸ Pani hina purongo vara Iesu mo levosahi na ʻomira, mo vereaa isan tamlohi lima rihirihiri atu mara, “O mai o turu akerihi!” Ale tamlohi atu mo turu mo vano isana. ⁹ Ale Iesu mo vereaa isara mara, “Na lo usi kamim vara mo tataholo vara o vai na hina fuhu na Sabbath, teni vara o sile na rongohaji isan tea na Sabbath, teni vara o juri na mauri, teni vara o komoa?” ¹⁰ Mo kilau ʻalihira mo isoiso, moiso mo vereaa isan tamlohi atu mara, “O ʻirahi na limam!” Ale pa tamlohi atu mo vaia sohana, ale limana mo mele fuhu vevuhi. ¹¹ Pani la Pharisee atu la lolokoru patura, la lo ususira hinia lara, sava natu la pa eri vaia isan Iesu.

Iesu Mo Viʻoni Na Nona Vahaʻule
(Mt 10.1–4; Mk 3.13–19)

¹² Hin la rani atu Iesu mo malue isara, mo sahe aulu na vutivuti mata ususi, mo ususi rani isan God. ¹³ Ale na ʻalavahu mo tovi na nona tamlohi usuri, ale mo viʻoni na tupu sangavulu ʻomana mo rua hinira, enira mo tovira vahaʻule;

¹⁴ Simon sei Iesu mo tau na hijana vara Peter,

tasina Andrew,
 ale James enia John,
 Philip,
 Bartholomew,
¹⁵ Matthew,
 Thomas,
 James natun Alphaeus,
 Simon sei, enia tamlohi matea
 mata valum mata jarana,
¹⁶ ale Judas natun James,
 ale Judas Iscariot sei
 mo lo turuposi hin Iesu.

Iesu Mo Vujangi Na Tamlohi
 (Mt 4.23–25)

¹⁷ Ale Iesu mo sevuti mo sinai atano pere-sira, ale la turu na mavalolo matea. Ale vao nona tamlohi usuri tolu na vao tamlohi tinapua tavera jea matea la takonahi moiso, la tai na jara tari Judea, Jerusalem ale na pahisa tasi Tyre peresi Sidon, ¹⁸ sei la mai vara la rongo na nona retireti, ale matan vara i titiu narihi na nora rojoa. Ale la haratu sei tanume lumiha sasati mo lo vaira, Iesu mo vaira la mele ruhu. ¹⁹ Ale enira mo isoiso la lo vaihitea vara la tikeli Iesu matan suiha tavera mo lo malue isana mo lo titiu narihi na nora rojoa tari.

Avulahi Atu God I Pa Silea
 (Mt 5.1–12)

²⁰ Iesu mo taʻa sahe isana nona tamlohi usuri mo vereea mara,

“Avulahi isamim sei ka tilavono,
 matan mauri atu God mo aulu
 hinia enia nomim.

²¹ Avulahi isamim sei ka lo marohati
 nake, matan ha pa masu.
 Avulahi isamim sei ka lo tangi
 nake, matan ha pa mana.

²² Avulahi isamim na rani sei
 tamlohi la ruhu hin kamim,
 teni la lo horo kamim,
 teni la lo veresatihi kamim,
 teni la lo vereleji kamim,
 matan ka tamlohi non
 Natun Tamlohi.

²³ Hin la pongi atu ha pa avulahi tavera,
 ale ha kuekue na avulahi, matan ka lev-
 osahia vara nomim otori na tuka mo tavera
 jea; matan tuai tamara la vaia sohena moiso
 isana pʻrovet.

Rani Sasati God I Pa Silea

²⁴ Pani rani sasati isamim sei ka tavitav,
 matan ka lavi na volimim moiso.

²⁵ Rani sasati isamim sei ka lo mana nake,
 matan ha pa tangtangi ale ha tangi.

²⁶ Rani sasati isamim na rani tamlohi
 la vere na retireti ruhu matamim,
 matan tuai tamara la vaia sohena
 moiso isana pʻrovet haluhalu.

O Opoi Na Nom Meresahi
 (Mt 5.38–48; 7.12a)

²⁷ Pani na vereea isamim nakerihi ka lo tapurongo vara ha opoi na nomim meresahi, ha vai na hina ruhu isan haratu mo ruhu hin kamim. ²⁸ Ha leʻruhu hin la haratu la lesati hin kamim, ha usiusi matan la haratu la lo vailehilehi kamim. ²⁹ Isan haratu mo vojahi na esem, o tinarihia i mele vojahi na tavalu esem. Ale haratu mo reve narihi na nom ruru hamariri, o sopo horoa vara mo opoia vara i reve narihi na nom ruru. ³⁰ O silea isana tamlohi tari sei la usia rilangi isam, ale isan haratu mo reve narihi na nom hinau, o sopo ngurunguru hinia vara i mele sileho hinia. ³¹ Ale sava ka opoia vara tamlohi la vaia isamim, ha vaia sohena isara.

³² Vara ha opoi la haratu la lo opoi kamim purongo, ka fom vara God i pa avulahi hin kamim? Matan tamlohi hehe sohena, la lo opoi la haratu la opoira. ³³ Ale vara ha lo vai na hina ruhu isan la haratu la lo vai na hina ruhu isamim purongo, ka fom vara God i pa avulahi hin kamim? Matan tamlohi hehe sohena la lo vaia sohena. ³⁴ Ale vara ha lo sile na mania isan la haratu sei ko levosahia vara la pa mele spaia, ka fom vara God i pa avulahi hin kamim? Matan tamlohi hehe sohena, la lo sile na mania isana tamlohi hehe matan vara la pa mele lavi na spaina tataholo.

³⁵ Pani ha opoi na nomim meresahi, ale ha vai na hina ruhu, ha sile na mania vara tea mo usia, ha sopo fomfomia vara ha pa mele lavi na spaina. Matan nomim otori i pa tavera jea, ale kamim ha pa natun haratu mo aulu jea, matan enia mo ruhu isan la haratu mo sopo te vere meje isara, peresi la haratu la sasati. ³⁶ Ha fomopoia sohena Tamamim mo lo fomopoia.

Ha Sopo Ari Na Tinapua
 (Mt 7.1–5)

³⁷ Ha isoiso na nomim ari na tamlohi tinapua, ale God i pa sopo ari kamim, ale ha isoiso na nomim sile na talai isana tamlohi tinapua, ale God i pa sopo sile na talai isamim, ha romi na tinapua, ale God i pa romi kamim, ³⁸ ha silesile, ale God i pa sile purongoia isamim, i pa silea i tavera jea i jeu na fomimim, i pa sarihia, i hutehutehia, ale i lo masurere. Vara ka silea sohena sava, i pa mele silea sohena isamim.”

O Hase Kilau Na Maurim

³⁹ Iesu mo mele verera na titulea matea mara, “Matavuso matea i efi tiroma na matavuso tinapua? Ra levosahia vara la pa jovi hin te koko. ⁴⁰ Tamlohi usuri matea mo sopo aulu na nona tamlohi vujangi, pani vara i levosahi vevuhi na sava mo lo vujan-gia, i pa sohen nona tamlohi vujangi atu.

⁴¹ Mata sava ko efi hitevosahi na utauta tapea rihirihī na matan voraim matea, pani ko sopo efi hitevosahi na laho pahai na matam? ⁴² Mo sohena sava natu ko efi vereā isan voraim vara, ‘A efi nafihi utauta tapea rihirihī sei na matam!’ pani ko sopo hitevosahi na laho pahai na matam hasem? Ko tapnetano! O nafihi na laho pahai na matam hasem tiroma, ale o pa efi kilau i memera matan vara o efi lanafihi na utauta tapea rihirihī na matan voraim.

Vua Vipahai
(Mt 7.21–27; 12.34b, 35)

⁴³ Mo sopo te pulo vipahai fuhu hatea i efi sile na vua sasati, teni te pulo vipahai sasati i efi sile na vua fuhu, ⁴⁴ matan, pulo vipahai hatehateahi o efi hitevosahira na vuara. Matan la sopo vu na fig na pahai ngaŋgaŋaŋiha, teni la sopo vu na grape na asikauli. ⁴⁵ Tamlohi fuhu, hina fuhuruhu na mapuna i pa sile na hina fuhu, tamlohi sasati, hina sasati na mapuna i pa sile na hina sasati. Matan sava mo tavera na mapu tamlohi, haratu natu i pa malue na jingona.

Tamlohi Voro Ima Mo Rua
(Mt 7.24–27)

⁴⁶ Mata sava ka lo toviau vara, ‘Moli! Moli!’ pani ka sopo vai na sava na vereā isamim? ⁴⁷ Sava tamlohi mo mai isaku, mo rongo na noku reti ale mo vaira, a pa vujangia isamim vara enia mo sohena sava: ⁴⁸ Enia mo sohena tamlohi matea mo lo voro na ima matea, mo heli na moru mo sivo atano na vatu matan vara i tau na pulo ima hinia. Ale na rani wai tavei mara mo vele, mo sari ima atu, pani mo sopo efi hisuhia matan mo voro mamahunia. ⁴⁹ Pani haratu mo rongoa pani mo sopo vaia, mo sohena tamlohi matea mo voro na ima na lepa purongo, ale mo sopo te pulona fuhu. Ale wai tavei mara mo vele mo saria, vahatea purongo ima atu mo jovi, ale nona jovi atu mo tavera jea.”

7

Volitusi Matea Mo Mele Ruhu
(Mt 8.5–13; Jn 4.43–54)

¹ Hitahun la nona titileu atu mo vereā isana tamlohi, mo mele unu Capernaum. ² Ale slev matea nona captain mata tamlohi vuro nona mara Rome matea mo rojo, mariviti vara i mate. Tamlohi tavera atu mo opoi volitusi atu mo tavera jea. ³ Ale pa captain atu mara mo rongo te hināu matan Iesu, mo fule na vajiaha Jew hai la vano isana vara la usia vara i efi mai vara i titiu nafihi na rojōa non nona volitusi atu. ⁴ Ale la mai isan Iesu, la lo usia filangi isana lara, “Tamlohi tavera sei enia tamlohi fuhu matea, mo tataholo vara o tuenia, ⁵ matan

enia mo opoi na noŋa tamlohi, ale enia natu mo voro na nomam ima lotu.”

⁶ Ale Iesu mo usurira. Mo pa lo mai mariviti na ima, ale pa captain atu mo fule na tapalana hai la mai isana, la lo lavi na nona reti ale lara, “Moli, o sopo kalvono purongo, matan enāu mo sopo tataholo vara o efi unu na imaku. ⁷ Matan haratu, na sopo hitea vara i tataholo vara enāu haseku a mai a usia isam. Pani vara o sile te reti hatea purongo, na levosahia vara noku volitusi i pa mele fuhu. ⁸ Matan enāu sohena, enāu tamlohi matea na lo toho na ruhuruhu suiha tamlohi tinapua matea, ale tamlohi vuro hai la lo toho na ruhuruhu suiaku: vara a vereā isan matea vara, ‘O vano!’ i pa vano, ale isana tinapua vara, ‘O mai!’ i pa mai, ale vara a vereā isan noku volitusi vara, ‘O vai haratu!’ i pa vaia.”

⁹ Iesu mara mo rongo la reti atu, mo marurahi tavera hin tamlohi atu, ale mo posi vano isan vao atu sei la lo usuria, mo vereā isara mara, “Varafuhu, na vereā vara na sopo lo tapai te tamlohi nike Israel i lavi na rasua sohen tamlohi nike!” ¹⁰ Ale na rani la haratu sei tamlohi tavera atu mo lo rulera isan Iesu la mele hilu vano na imana, la hitea vara pa volitusi atu mo pete fuhu moiso.

Uluvou Matea Mo Turu Na Mateia

¹¹ Mo sopo tuai usuri haratu, Iesu mo vano na taon matea hijana Nain, ale nona tamlohi usuri peresi na vao tavera matea la lo usuria. ¹² Mara mo lo mai mariviti na mataruan taon atu, ale la hutura na tamlohi la lo alu na tamlohi mate matea, mo lo malue na taon, enia vorahese non tinana, ale haŋai atu enia malepu matea. Vao tamlohi matan taon atu la lo usuria. ¹³ Ale mara mo hite haŋai atu, Iesu mo fomopoa, ale mo vereā isana mara, “O sopo tangi!” ¹⁴ Ale mo vano na vatan tamlohi mate atu, mara mo tau na limana hinia, la haratu la lo alia la turu vahatea. Ale mo vereā mara, “Uluvou, o turu.” ¹⁵ Moiso, tamlohi mate atu mo sakele, ale mo tapulo retireti, moiso Iesu mo silea isan tinana.

¹⁶ Matahu mo sohoni na tamlohi tari, ale la hasohaso God lara, “Provet aulu matea mo lo turu na livuhara!” ale lara, “God mo rohi na nona tamlohi!” ¹⁷ Ale sorasorahina sei, mo vano asau mo falihi na jara Judea peresi na jara tari falihia.

John Tamlohi Paptijo
(Mt 11.1–19)

¹⁸ Tamlohi usuri non John tamlohi paptijo, la sorahi la hināu tari sei isana. Moiso John ¹⁹ mo tovi na vonara mo rua la mai isana matan vara i rulera la vano isan Moli vara la usia isana vara, “Engko natu haratu

sei i pa mai, teni kama pa lo mele kilau matan te tinapua?"

²⁰ Ale lara la kau isan Iesu lara, "John tamlohi paptijo mo fule kamam kama mai isam mara, 'Engko natu haratu sei i pa mai, teni kama pa lo mele kilau matan te tinapua?'"

²¹ Hin aoa atu, Iesu mo titiu nafihi na rojoa na tamlohi matuvana, ale mo titiu nafihi na tanume sasati matuvana, ale isan la haratu la matavuso mo vaira vara la efi kilau. ²² Ale Iesu mo faramira mara, "Ha vano ha vere John na sava ka hitea, ale ka rongoa: matavuso la mele kilau, tamlohi papao la hahau, tamlohi lepros la vokevoke, peropero la rongo, haratu la mate la mauri, ale la haratu la tilavono la rongo na Retiruhu. ²³ Ale avulahi isan la haratu la pa sopo rohu hiniau hin te rani."

²⁴ Na rani vahafulu non John la mele hilu vano, Iesu mo tapulo retireti isan vao atu matan John mara, "Ka vano na jara tano koru vara ha hite na sava ea? Apo matea langi mo lo serea ea? ²⁵ Pani sava natu ka vano vara ha efi hitea ea? Tamlohi matea mo ru na ruru ruhu matea ea? Ka levosahia vara la haratu la lo ru na ruru ruhu jea, la lo toho na jara Supe tavera purongo. ²⁶ Sava natu ka opoia vara ha hitea ea? Provet matea? Varafuhu, pani na vereea isamim vara enia mo jeu na p'rovet. ²⁷ Sava la ulia tuai matana mo vereea vara, 'Ha kilau nike! Na lo fule na noku vahafulu na nahom,

vara i vai na malelem i roi.' *Mal 3.1*

²⁸ Varafuhu na vere isamim vara la haratu la vora isana hafai, mo sopo tea i eri lavi na ololo i jeu John, pani haratu mo hitahu hin mauri atu God mo aulu hinia, enia mo aulu jea mo jeu John."

²⁹ Na rani tamlohi tari peresi na tamlohi mata lavi na takis la rongo reti nike, la majinga vara sava God mo vaia mo tataholo, matan enira la lavi na paptijo non John moiso, ³⁰ pani Pharisee peresi na tamlohi vujangi mata leu, la rohu na masalon God matara, matan la sopo lavi na nona paptijo.

³¹ Iesu mo mele vereea mara, "Na sopo levosahia vara a pa vereea vara tamlohi matan nake la sohena sava? ³² La sohena natuvarihhi la lo sakele na jara maket la lo uloulo isara hasera lara, 'Kama roro na vete mata lahi, pani ka rohu vara ha velu; ale kama lalavete na vete mata fomsati matea, pani ka sopo tangi.' ³³ Matan John tamlohi paptijo mo mai, mo tapuhoro na pereti peresi na waen, ale kara, 'Tanume sasati mo lo toho hinia!' ³⁴ Ale Natun Tamlohi mo mai, mo hanhani ale mo inu, ale kara, 'Ha to kilaua! Hanhani jea matea, tamlohi drong matea, enia mo tapala peresi na tamlohi la lo lavi na takis peresi na tamlohi hehe!'" ³⁵ Pani o pa eri hitevosahia

vara malele lelevosahi non God mo tataholo mata vuana fuhu."

Opoia Tavera

³⁶ Ale Pharisee matea mo usi Iesu vara i hanhani peresia, ale mo vano mo unu na iman Pharisee atu mo sakele na tep. ³⁷ Ale atu, hafai malele matea hin taon atu mo levosahia vara Iesu mo lo hanhani na iman Pharisee atu, ale mo lavi na potele matea la vaia na alabaster, hasori ruhu mo lo toho hinia, ³⁸ mo turu na hafina ale mo papaohi mo lo tangi na palona, ale mo tapulo kamoti na wai matana sei la jovi na palona na vuluna, ale mo lo pungosi na palona, mo rengi na hasori hinira.

³⁹ Pa Pharisee atu sei mo lo usia vara i vano na imana mara mo hite hinai atu, mo vereea isana hasena mara, "Vara tamlohi nike enia p'rovet matea, i pa levosahia vara sava hafai nahai mo lo tikelia, matan enia hafai hehe matea."

⁴⁰ Ale Iesu mo farami tamlohi atu mara, "Simon, na opoia vara a vereho na hinai matea."

Ale mo faramia mara, "Tija, o vereea."

⁴¹ Iesu mara, "Tamlohi matea, tamlohi la lo usi na mania isana moiso la pa mele spaia, tupra rua la ave na mania isana. Matea mo ave na denarii mo ngavulu sangavulu lima, matea mo ave na ngavulu lima. ⁴² Na rani la sopo efi mele spaia, tamlohi atu mo fomira mo fomaliho hinia. Ale, sahara hinira i pa opoi tamlohi atu i tavera jea?"

⁴³ Simon mo faramia mara, "Korong haratu sei nona ave isana mo tavera jea." Ale Iesu mo vereea isana mara, "Nom kilak-ilau mo tataholo." ⁴⁴ Moiso mo posi vano isan hafai atu, ale mo vereea isan Simon mara, "Ko hite hafai nike? Na unu na imam, ko sopo sileau hin te wai vara a hoje na paloku hinia, pani enia mo hoje na paloku na wai matana, ale mo kamotira na vuluna.

⁴⁵ Ko sopo pungosiau, pani mo tapulo hin haratu mo unu, mo sopo lo mapu mata pungosi na paloku. ⁴⁶ Ko sopo rengi na wel na patuku, pani enia mo rengi na hasori ruhu jea na paloku. ⁴⁷ Matan harihi, na vereea isam, varafuhu nona hehe mo matuvana, pani na fomira moiso matan nona opoia mo tavera jea. Pani haratu nona hehe mo sopo mafivi jea, nona opoia mo sopo tavera." ⁴⁸ Ale mo vereea isan hafai atu mara, "Na fomihio mata nom hehe."

⁴⁹ Ale la haratu la lo sakele peresia na tep, la tapulo verevereea isara hasera lara, "Sava tamlohi nahai, matan mo hitea vara i eri romi na hehe?"

⁵⁰ Mo vereea isan hafai atu mara, "Nom rasua mo jurihio; o vano o toho na tamata."

8

Haʻrai La Usuri Iesu

¹ Hitahun haratu Iesu mo lo vano toho na taon tavera peresi na vanua. Mo lo retivu-javujangi ale mo lo sile na Retifuhu matan mauri atu God mo aulu hinia. Ale la nona tamlohi atu mo sangavulu romana mo rua la lo toho peresia, ² ale peresi na haʻrai hai sei Iesu mo lo titiu narihi na tanume sasati isara peresi na nora rojoa: Mary la tovia Magdalene, enia natu, tanume sasati mo limaravrua la malue isana, ³ peresi Joanna, naroun Chuza, patu tamlohi mata kilau na iman supe Herod, peresi Susanna, enira peresi na vao matuvana tinapua la lo tueni Iesu peresi na nona tamlohi na nora tavitav purongo.

Tamlohi Lavo Na Piri
(Mt 13.1–9; Mk 4.1–9)

⁴ Ale na rani vao tavera la lo tapulo takonahi, ale tamlohi mata taon tari la lo mai isana, moiso Iesu mo vere na titileu matea mara, ⁵ “Tamlohi hapofahi piri matea mo vano vara i hapofahi na piri. Mo lo hapofahi na piri mo lo vano, tatauara la jovi na malele, ale tamlohi la varasi kosakosahira, ale maji avuavu la hanira. ⁶ Tatua piri la jovi na vatuvatu, ale na rani la ulua la mele mahoa matan mo sopo te heu i tike-lira. ⁷ Ale tatua piri la jovi na livuha vipahai ngaʻngaʻriha, ale vipahai ngaʻngaʻriha la punira. ⁸ Ale tatua piri la jovi na lepa fuhu, ale la ulua la vua la namaha mo vaha ngavu sangavulu hin la haratu mo lo hapofahira tiroma. Haratu mo eri rongovosahia, o tapurongo!”

Mo Sile Na Titileu Mata Sava
(Mt 13.10–17; Mk 4.10–12)

⁹ Ale na rani nona tamlohi usuri lara la usia na faramin titileu atu, ¹⁰ mo vereaa mara, “Isamim God mo tinarihia vara ha pa levosahi na hina luhu matan mauri atu God mo aulu hinia, pani isana tamlohi tinapua enia mo lo toho na titileu matan vara Retitapu i pa masese:

‘La hite na sava na lo vaia
pani la pa sopo hitevosahia,
la pa rongo na sava na lo vereaa,
pani la pa sopo rongovosahia.’ Isa 6.9

Titileu Atu

(Mt 13.18–23; Mk 4.13–20)

¹¹ Ale faramin titileu atu enia nahai: Piri atu enia reti non God. ¹² La haratu na malele enira la haratu la rongoa moiso, ale Tiapolo mo mai, mo lanarihi reti atu na mapura matan vara la pa sopo eri rasua, ale vara la eri juri hinia. ¹³ La haratu na vatuvatu enira la haratu la rongo reti atu, la lavia na avulahi. Pani mo sopo te warira, la rasua mata makomo rani purongo, ale

na rani vaihite, la jovi. ¹⁴ La haratu la jovi na livuha vipahai ngaʻngaʻriha enira la haratu la rongo reti atu pani lara la vano, romkaka peresi na rom tavitav peresi na masalo tamlohi mo punira, ale vuara la sopo jea. ¹⁵ Pani la haratu la jovi na lepa fuhu, enira la haratu la rongo reti atu, ale la tauria mo rilangi na mapura fuhu na posposi varaʻfuhu, ale la vua peresi na romperavu.

I Pa Sopo Te Hinai Eri Luhu
(Mk 4.21–25)

¹⁶ Mo sopo te tamlohi vara i hasahi na nona lamu matea ale i povia hin te baket teni i taua na ruhuruhu vata matea, mo vono. Pani i pa kehoia aulu na jarana matan vara tea la unu na imana la pa hite na merana. ¹⁷ Matan i pa sopo te hinai hatea i eri luhu vara i pa sopo pala, teni te hina luhu vara i pa sopo pala na jara tavera. ¹⁸ Ha lo levosahi na sava ka lo rongoa, matan isan haratu mo lavia, i pa mele lavia i tavera jea, ale isan haratu mo sopo te nona, hina purongo vara sava mo romfomia vara mo lavi moiso, la pa lanarihia isana.”

Tasin Peresi Na Vetasin Iesu
(Mt 12.46–50; Mk 3.31–35)

¹⁹ Ale tinana peresi na tasina la mai isana, pani la sopo eri mai mariviti isana matan vao tavera atu. ²⁰ Hai la vereaa isana lara, “Tinam tolu na tasim la lo turu na jingoima, la opoia vara la hiteho.”

²¹ Pani Iesu mo faramira mara, “Tinaku peresi na tasiku enira la haratu sei la rongo na reti non God ale la vaia.”

Iesu Mo Savurahi Na Langi
(Mt 8.23–27; Mk 4.35–41)

²² Na rani matea mo vele na boti matea tolu na nona tamlohi usuri, ale mo vereaa isara mara, “Ra vano tavalu vano na tavalu tasin Galilee.” Ale la malue, ²³ ale la pa lo vano, ale Iesu mo juruvi romaliho. Ale langi tavera matea mo jovi hin tasi atu, botira mo lo utua, mariviti la pute.

²⁴ Ale nona tamlohi la vano la rohaia lara, “Moli, Moli, ʻra lo tapulo tihai!” Ale mo turu mo reti savurahi langi atu peresi la leputi tavera atu ale la isoiso mo tamata. ²⁵ Mo vereaa isara mara, “Nomim rasua mo lo toho epu?” Ale la matahu la mafurahi tavera hinia, la lo vereverea isara lara, “Sava tamlohi nahai? Enia mo reti purongo isana langi peresi na tasi, ale la oloolo hinia!”

Tanume Sasati Na Mara Gerasenes Matea

(Mt 8.28–34; Mk 5.1–20)

²⁶ Hitahun haratu la hapahapan la vano na jara mara Gerasenes, jara atu enia mo lo toho na tavalun Galilee. ²⁷ Iesu mara mo sevuti na jarauta, tamlohi matea

tanume sasati la lo toho hinia mo pala isana. Tuai moiso tamlohi atu mo lo malamala purongo, ale mo sopo toho na lolon te ima pani tarea mo lo toho na jara taptap. ²⁸ Ale pa tamlohi atu mara mo hite Iesu, mo ulu aulu, ale mo mai mo jovi na nahon Iesu mo vereia na leo tavera matea mara, “Engko te nom sava isaku, Iesu Natun God Aulu Jea? Na tangi isam, aah! O sopo vailejilejiau!” ²⁹ Matan mo retileu isan tanume lumiha sasati atu vara i malue hin tamlohi atu. Matan rani mo visa moiso tanume sasati atu mo lo sohonu tamlohi atu. Tamlohi la taurilatia ale la tau na jen na limana peresi na palona, pani mo lo roto la jen atu, ale tanume sasati atu mo tiroma hinia mo lo vano na jara hasetoho.

³⁰ Iesu mo usia isana mara, “Hijam hare?” Ale mo vereia mara, “Legion!” Hija atu mo vereia matan tanume sasati matuvana jea la lo toho hin tamlohi atu. ³¹ Ale tanume sasati la tangi isana vara i pa sopo retileu isara vara la sivo hin koko tavera jea atu sei mo sivo atano jea na lolo varama mata mateia. ³² Hin jara atu vao poi matea la lo hanhani na pahisa vutivuti atu, ale la tanume sasati atu la tangi isana vara i tinarihira la unu hinira, ale mo tinarihira. ³³ Ale la tanume sasati atu la malue hin tamlohi atu la unu hin pa vao poi atu, moiso vao poi atu la maro sevuti hin pesapesa atu la jovi sivo na tasi la pute.

³⁴ Ale tamlohi kilau la poi atu lara la hite hinau atu mo masee, la rovo ale la sorahia na taon tavera peresi na jara řalihi atu. ³⁵ Ale moiso tamlohi la vano vara la hite na sava mo masee, ale la kau isan Iesu la tapai pa tamlohi atu sei tanume sasati la lo malue hinia moiso mo lo sakele na palon Iesu, mo ruru ale řomina mo řuhu moiso, ale la matahu. ³⁶ Ale la haratu sei la lo hite hinau atu la vereia isara sohena sava tanume sasati la malue hin tamlohi atu. ³⁷ Ale tamlohi tari řalihi hin jara atu Gerasenes la usia vara i malue isara, matan matahu tavera mo sohonira. Ale mo mele vele hin pa boti atu ale mo mele hilu. ³⁸ Pa tamlohi atu sei tanume sasati la lo malue isana, mo usia řilangi vara i usuria, pani Iesu mo řulea mara, ³⁹ “O mule, ale o vereuli na sava God mo vaia matam.” Ale mo vano, mo retivujavujangi na jara tari hin taon tavera atu na sava Iesu mo vaia matana.

*God Mo Lo Kilau Mata Rasua
(Mt 9.18–26; Mk 5.21–43)*

⁴⁰ Ale na rani Iesu mo mele hilu, pa vao tamlohi atu la avulahi matan la lo saovia.

⁴¹ Ale hin jara atu, tamlohi matea hijana Jairus mo mai isana, enia tamlohi aulu hin ima lotu atu. Ale mo jovi na palon Iesu mo tangi isana vara i mai na imana, ⁴² matan

venatuna vorahese matea, taunina mo sangavulu řomana mo rua, mariviti i mate.

Ale Iesu mo lo vano, tamlohi la lo tia-tia hinia. ⁴³ Ale hařai matea, rojo nona hařai mo lo toho mo tuai isana mata tauni mo sangavulu řomana mo rua moiso, hina purongo vara mo jalahi vevuhi na nona mania isana Doctor, mo sopo tea i efi vai mamahunia. ⁴⁴ Mo mai na hařin Iesu, ale mo tikeli na revrevu nona ruru, ale vahatea purongo nona rojo mo isoiso.

⁴⁵ Ale Iesu mara, “Hare natu mo tikeliau?”

Tamlohi tari lara enira mo vono, ale Peter mara, “Moli, vao nike la porotihio, la lo tiatia isam!”

⁴⁶ Pani Iesu mara, “Tamlohi matea mo tikeliau, matan na rongovosahia vara suiha mo malue isaku.” ⁴⁷ Ale na rani hařai atu mo hitea vara i sopo efi mele luhu, mo mai isana mo savaravara, mo jovi na nahona, ale mo vereulia na naho tamlohi vara mata sava natu mo tikelia, ale sohena sava Iesu mo vai na nona rojoa mo tihai vahatea purongo. ⁴⁸ Ale Iesu mo vereia isana mara, “Venatuku, nom rasua mo vaiho ko řuhu; o vano peresi na tamata.”

⁴⁹ Na rani mo pa lo retireti, volitusi matea na iman tamlohi aulu atu mo mai isan tamlohi aulu atu mara, “Venatum mo tihai moiso; o sopo mele vereia isan Tija sei.”

⁵⁰ Pani Iesu mara mo rongu hinau atu mo vereia isana mara, “O sopo matahu; o rasuau purongo ale venatum i pa řuhu.”

⁵¹ Ale na rani mo mai mo kau na iman pa tamlohi aulu atu, mo sopo tinarihia vara tea i unu peresia, pani Peter purongo enia John, James, peresi taman hařarihi atu enia tinana. ⁵² Ale tamlohi la lo tangi, ale la lo tangtangi matana, pani Iesu mo vereia mara, “Ha sopo tangi matan enia mo sopo mate, pani mo lo juruvi purongo.”

⁵³ Ale la manaluluhia matan la levosahia vara enia mo mate moiso. ⁵⁴ Pani mo tauri na limana mo tovia mara, “Natrihi, o turu!” ⁵⁵ Ale maurina mo mele unu hinia, ale mo turu vahatea. Iesu mo vereia isara vara la silea hin te hinau vara i hania. ⁵⁶ Ale tamana enia tinana la mařurahi tavera, pani mo vereia isara vara la sopo mele vere te tamlohi hatea na sava mo masee.

9

*Iesu Mo Rule Na Nona Vahařule
(Mt 10.5–15; Mk 6.7–13)*

¹ Ale mo tovi la tupu sangavulu řomana mo rua atu la mai jara matea, ale mo silera na suiha vara la aulu na tanume sasati tari, ale vara la efi vai na rojoa la tihai, ² ale mo řulera la vano vara la retivujavujangi hin mauri atu God mo aulu hinia, ale vara la vai mamahuni na tamlohi na nora rojoa. ³ Ale Iesu mo vereia isara mara, “Ha

vano lekoleko na malelemim, ha sopo lavi te tihonimim teni te tanga, teni te pereti, teni te mania, ale ha sopo lavi te ruru i rua. ⁴ Ale sava ima ka unu hinia, ha lo toho atu i tikeli na rani ka opoia vara ha mele malue hin taon atu. ⁵ Ale sava jara la ōhū vara la lavi kamim, vara ka malue hin taon atu, ha safsafhi nāhihi na tangotango palomim sohena matamata matea matan God mo tipahira.”

⁶ Nona tamlohi la malue la vano na vanua tari, la retivujavujangi na Retifuhu, la vai na rojoa la tihai na jara tari la vano ea.

Supe Herod Antipas Mo Romikaka
(Mt 14.1–12; Mk 6.14–29)

⁷ Hin rani atu, Herod Antipas natun supe Herod mo lo tamlohi aulu hin Judea, ale mo rongo la hināu atu la lo masese, ōmina mo sopo sakele matan hai la lo vereā lara John tamlohi Paptijo mo mele turu na mateia, ⁸ ale hai lara Elijah mo mele pala, hai tināpua isara lara pŕovet matan tuai matea mo mele turu.

⁹ Herod mara, “Enau na tairoto na patun John moiso, pani sava tamlohi nahai sei na lo rongo na sorasorahina?” Ale Herod mo opoia vara i hitea.

Mo Vahani Na Vao Tavera Matea
(Mt 14.13–21; Mk 6.30–44; Jn 6.1–14)

¹⁰ Na rani vaharule non Iesu la mele pala, la vere na hināu tari la vaira isana. Ale mo lavira la malue la vano hasera na taon matea la tovia Bethsaida. ¹¹ La vao atu lara la levosahia, la usuria ale mo avulahi hinira mo vujangira hin mauri atu God mo aulu hinia, ale mo vai na rojoa non la haratu la rojo la tihai. ¹² Ravravi mo lo sivo, ale la tupu sangavulu ōmana mo rua atu la mai la vereā isana lara, “O ŕule vao nike la vano la aleale hara hināu peresi na nora jara juruvi na vanua tari hin jara tavera nike, matan ŕa lo toho na jara hasetoho nahai.”

¹³ Pani mo vereā isara mara, “Kamim natu ha silera hin te hināu vara la hania.”

Lara, “Kama lo lavi na pereti mo lima peresi na maji mo rua purongo, avei ko lo vereā vara kama pa vano mata voli te hināu han la tamlohi tari nike?” ¹⁴ Matan evi tamlohi purongo korong mo tikeli tari vaha lima (5000) Iesu mo vereā isana nona tamlohi usuri mara, “Ha vaira la sakele tamlohi mariviti i ngavulu lima na vao matea.” ¹⁵ Ale la vaia sohena, la vaira enira mo isoiso la sakele. ¹⁶ Ale Iesu mo lavi la pereti atu mo lima peresi la maji atu mo rua, mo tafa sahe aulu na tuka mo leŕuhu hinira, moiso mo tope la pereti atu mo silea isana nona tamlohi usuri vara la taua na nahon la vao atu. ¹⁷ Ale tamlohi tari la hanhani la masu. Ale la takonahi na sope

hanhani, la sohonia na tanga mo sangavulu ōmana mo rua.

Iesu Enia Kŕisto
(Mt 16.13–19; Mk 8.27–29)

¹⁸ Na rani tināpua matea, Iesu mo lo ususi enia hasena, ale nona tamlohi usuri la lo toho atu, ale mo usia isara mara, “La vao nike la lo vereā lara enau hare?”

¹⁹ Ale la ŕaramia lara, “John tamlohi paptijo. Pani hai lara Elijah, ale tatuara lara pŕovet matea matan tuai mo mele turu.”

²⁰ Moiso mo vereā isara mara, “Pani kamim kara enau hare?” Ale Peter mo ŕaramia mara, “Engko Kŕisto non God!”

²¹ Ale mo horora vara la sopo mele vere hināu atu isan te tināpua hatea, ²² mara, “Natun tamlohi i pa lavi na rongohaji na hināu matuvana, ale tamlohi aulu hin Israel peresi na Moli mata pŕis tolu na tamlohi vujangi mata leu, la pa ōhū hinia, la pa vilimateia, ale na hatolu rani i pa mele turu na mateia.”

²³ Ale mo vereā isara mo isoiso mara, “Vara tea mo opoia vara i usuriau, i ōhū na masalona, ale i soloti na nona talopeilopei tarea ale i usuriau. ²⁴ Matan sava tamlohi mo opoia vara i hase juri na maurina, maurina i pa tihai; pani sava tamlohi mo vaitihai na masalona matakū, i pa juri na maurina. ²⁵ Matan sava mo ŕuhu isana tamlohi matea vara i lavi vevuhi na hināu tari na varama, pani hitahu maurina i pa tihai? ²⁶ Matan hare mo mahanuhanu hināu peresi na noku reti, Natun Tamlohi i pa mahanuhanu hinia hin rani atu vara i mai na hasohasona tolu na hasohasona Tama peresi na angelo tapu. ²⁷ Pani vararūhu na vereā isamim, vara tatuamim la lo turu nakerihi akerihi la pa sopo hite na mate vavano la hite mauri atu God mo aulu hinia i pala.”

La Hite Na Hasohasona Iesu
(Mt 17.1–8; Mk 9.2–8)

²⁸ Ale korong rani mo limaravtolu mo vano moiso hin la nona retireti atu, Iesu mo lavi Peter, John peresi James la sahe aulu na vutivuti mata ususi. ²⁹ Ale mo lo ususi, nahona mo posi, ale nona ruru merara la ŕilangi jea mata kilaura. ³⁰ Eh! Tamlohi mo rua la lo retireti peresia, Moses enia Elijah, ³¹ la pala na hasohaso tavera la lo sorahia na nona malue sei i pa masese Jerusalem i pa sopo tuai.

³² Ale Peter tolu na tapalana sei la lo toho peresia la malokoloko sati na juruvi, pani mara la hite na hasohasona peresi na tamlohi mo rua la lo turu peresia matara mo ŕilangi. ³³ Ale la tamlohi atu lara la lo malue isana, Peter mo vereā isan Iesu mara, “Tamlohi tavera, mo ŕuhu jea matan kama lo turu akerihi nakerihi. Mo ŕuhu vara kama turuhi te tent i tolu akerihi, nom

matea, matea non Moses, ale matea non Elijah!” Pani Peter mo sopo levosahi na sava mo lo vereea. ³⁴ Mo pa lo vere la hinau sei, telangi matea mo jovi tataholo isara, ale matahu tavera mo sohonira matan telangi atu mo hovira.

³⁵ Ale leo matea mo malue hin telangi atu mara, “Haranike enia Natuku, haratu na viŕonia; ha tapurongo isana!” ³⁶ Leo atu mara mo reti mo isoiso, Iesu hasena mo pa lo toho atu. Ale la nona tamlohi usuri atu la sopo mele vereveveea, ale la sopo vere na sava la hitea isan tea hin la rani atu.

Natun Tamlohi Matea

(Mt 17.14–21; Mk 9.14–29)

³⁷ Mo mele rani sahe, lara la sevuti hin vituviti atu moiso, vao tavera matea mo tapaira. ³⁸ Ale moiso, tamlohi matea hin vao atu mo ulo mara, “Tija, na usia rilangi isam vara o mai o hite natuku matan enia vorahese. ³⁹ Tanume sasati matea mo sohononia, ale vahatea purongo mo ngara. Mo lo tuatuaŕhia vavano valval jingona mo lo malue; mo lohiloŕhi na epena tari, mo rohu vara i malue hinia. ⁴⁰ Na usia rilangi isana nom tamlohi usuri vara la pa titiu naŕihia, pani la sopo efi vaia!”

⁴¹ Iesu mo faramia mara, “Kamim mo sopo te nomim rasua, ka pina lejileji, na sopo levosahia vara a pa toho i tikeli pangisa isamim natu ha pa rongovosahi. O lavi natum i mai!” ⁴² Mo pa lo mai, tanume lumiha sasati atu mo mele vujahia sivo na lepa, ale mo tuatuaŕhia. Pani Iesu mo savurahi tanume sasati atu, ale mo vai na epena tari la mele ruhu, moiso mo silea isan tamana. ⁴³ Ale tamlohi tari la maŕurahi tavera na suiha tavera non God.

Iesu Mo Mele Retireti Vara I Pa Mate

(Mt 17.22–23; Mk 9.30–32)

Pani la pa lo maŕurahi na hinau tari sei mo lo vaira, Iesu mo vereea isana nona tamlohi usuri mara, ⁴⁴ “Ha lo levosahi na sava a pa vereea isamim: i pa sopo tuai la pa tau Natun Tamlohi na lima tamlohi.” ⁴⁵ Pani la sopo levosahi nona reti sei, God mo jorohia isara matan vara la pa sopo efi rongovosahia, pani la matahu vara la usia na faramin reti atu.

Hare Mo Aulu Mo Jeu Na Tinapua

(Mt 18.1–5; Mk 9.33–37)

⁴⁶ Mo sopo tuai vauriuri matea mo malue isara vara hare isara enia mo aulu jea. ⁴⁷ Pani Iesu mo levosahi na ŕomira, mo turu mo lavi na natirihia matea mo taua na pahisana, ⁴⁸ ale mo vereea isara mara, “Vara tea mo lavi te natirihia sohen harihi na hijaku, enia mo laviau. Ale sava tamlohi mo laviau mo lavi haratu mo lo ruleau. Matan

haratu mo atano jea hin kamim, enia natu mo aulu jea.”

Hare Enia Tapalan Iesu?

(Mk 9.38–40)

⁴⁹ John mo faramia mara, “Moli, kama hite na tamlohi matea mo lo titiu naŕihia na tanume sasati na hijam, ale kama vaihitea vara kama horoa matan enia mo sopo vonamam matea.”

⁵⁰ Pani Iesu mo vereea isana mara, “Ha sopo horoa, matan haratu mo sopo mere-sahi isamim enia tatuamim.”

Mara Samaria La Tipahi Iesu

⁵¹ Rani mo lo mai mariviti vara i sahe na tuka, Iesu mo tau na ŕomina vara i sahe Jerusalem. ⁵² Ale mo rule na tamlohi hai la vano tiroma hinia, ale la vano la unu na vanua matea nona mara Samaria matan vara la pa tatamahu matana. ⁵³ Pani la tamlohi atu la rohu hinia matan mo tau na ŕomina vara i sahe Jerusalem. ⁵⁴ Ale nona tamlohi usuri sei James enia John lara la rongoa lara, “Moli, ko opoia vara kama usi na hapu na tuka i jovi sivo i sulira?” ⁵⁵ Pani Iesu mo posi mo reti isara. ⁵⁶ Ale la malue la vano na vanua tinapua.

Hare I Pa Usuri Iesu

(Mt 8.19–22)

⁵⁷ La pa lo vano na malele, ale tamlohi matea mo vereea isana mara, “A pa usuriho vano na sava jara ko vano ea.”

⁵⁸ Ale Iesu mo vereea isana mara, “Viriu jala enira nora jara juruvi mo lo toho, maji avuavu enira taura, pani Natun Tamlohi mo sopo te nona jara juruvi.”

⁵⁹ Isana tinapua mo vereea mara, “O usuriau!”

Pani tamlohi atu mara, “Moli, o tinaŕihiau a vano a tavuni tamaku tako.”

⁶⁰ Ale Iesu mo vereea isana mara, “O tinaŕihia la haratu la mate la tavuni na nora mate. Pani engko, o vano, o retivujavujangi mauri atu God mo aulu hinia.”

⁶¹ Ale mele tamlohi tinapua matea mo vereea mara, “A pa usuriho Moli, pani o tinaŕihia vara a vano a tulahi na tahisaku tako.”

⁶² Iesu mo vereea isana mara, “Haratu mo sopo tau na ŕomina i rilangi vara i tikeli na isoisona, mo sopo tataholo vara i unu hin mauri atu God mo aulu hinia.”

1 Ki 19.19–21

10

Vavahinau Nona Tamlohi Usuri

¹ Hitahun haratu, Moli mo viŕoni na tupu ngavulu limaravrua mo rua tinapua (72), ale mo ŕulera la vano tiroma hinia, la vano mo rua rua na taon tari peresi na jara sei i pa vano ea i pa sopo tuai. ² Ale Iesu

mo vereā isara mara, “Vua asitauni mo marivi hajavua pani tamlohi voko enira tupu visalete purongo. Matana, ha usiisi isan Moli mata asitauni vara i fūle na tamlohi voko la vano mata vu na nona asitauni.³ Ha vano na malelemim; ha lo levosahia vara na lo fūle kamim ka lo vano sohena natu sipsip na livuha viriu jala.⁴ Ha sopo lavi te tanga korohi, teni te tanga, teni te sabat, ale ha sopo sile na retioloolo isan tea na malele.

⁵ Sava ima ka unu hinia, tiroma ha vereā vara, ‘Tamata i pa toho hin ima akerihi!’

⁶ Ale vara tea hin ima atu mo avulahi hin kamim, nomim leruhu i pa lo toho isana, pani vara mo vono, i pa mele hilu mai isamim.⁷ Ale ha lo toho hin ima atu purongo, ale ha lavi na sava la silea mata inua peresi na hanhani, matan mo tataholo vara tamlohi voko i lavi na volina. Ha lo juruvi na ima matea purongo.

⁸ Vara ka unu na taon matea, ale la lavi kamim, ha hani na sava la taua na nahomim.⁹ Ha vai na nora rojoa la tihai, ale ha vereā isara vara, ‘Mauri atu God mo aulu hinia mo mai mariviti isamim moiso.’¹⁰ Pani vara ka unu na taon matea, ale la ōhu hin kamim, ha sivo na nora malele tavera, ale ha vereā vara,¹¹ ‘Kama sarsarhi nafihi na tangotango nomim taon na palomam sohena matamata matea na nahomim matan ka ōhu hin kamam, ale matana, God i pa ōhu hin kamim. Ha lo levosahia vara mauri atu God mo aulu hinia mo lo mai mariviti.’¹² Varaŕuhu na vereā isamim, vara talai non Sodom i pa sopo rilangi i tikeli na talai nona taon sohen harihi na rani mata aria.

*Tamlohi Matuvana Israel La Sopo Rasua
(Mt 11.20–24)*

¹³ Rani sasati isam Chorazin! Rani sasati isam Bethsaida! Matan vara la hina maŕurahi nike sei la vaira isamim la pa lo vaira hin Tyre enia Sidon, enira la pete posi moiso tuai, la ru na paraparati paki, ale la vuluvului na patmakovi moiso mata nora hehe.¹⁴ Pani talai non Tyre enia Sidon i pa sopo rilangi i tikeli na nomim talai na rani mata aria.¹⁵ Ale engko Capernaum, ko ōm vara God i pa taheho o sahe na tuka? I pa tauho sivo atano na varama mata mateia!

¹⁶ Haratu sei mo tapurongo isamim mo tapurongo isaku, ale haratu mo ōhu hin kamim mo ōhu hinia; ale haratu mo ōhu hinia mo ōhu hin haratu sei mo lo ŕuleau.”

¹⁷ Hitahu la tupu ngavulu limaravrua mo rua atu la mele hilu mai isan Iesu na avulahi lara, “Moli, tanume sasati sohena, la ooloo hin kamam mata hijam!”¹⁸ Ale Iesu mo vereā isara mara, “Na hite Setan

mo jovi sivo atano sohena vaha na masapa mo sari na varama.¹⁹ Ha lo levosahia vara na sile kamim na suiha vara ha varasi na mata peresi na novu lepa peresi na suiha tari tinatinapua non Setan matan ha pa aulu hinira mo isoiso, ale i pa sopo te hinau hatelete hinira i efi komo kamim.²⁰ Varaŕuhu, pani ha sopo avulahi matan tanume sasati la ooloo hin kamim; pani ha avulahi matan God mo uli na hijamim moiso na tuka!”

*Iesu Mo Vere Meje Isan God Tama
(Mt 11.25–27; 13.16–17)*

²¹ Na ranin hinau atu, Iesu mo avulahi na suihan Tanume Tapu ale mara, “Na vere meje isam Tama, Moli matan tuka peresi na varama, matan ko jarohi la hinau nike isana tamlohi levosahi peresi na tamlohi rongovosahi, ale ko vujangira isana natuvarihii purongo. Varaŕuhu Tama, ko avulahi hinia matan mo usuri na masalom ŕuhufuhu!”

²² Tamaku mo sileau na hinau tari, ale mo sopo tea i levosahia vara Natuna enia hare pani Tama purongo, ale mo sopo tea i levosahi Tama pani Natuna purongo peresi na sava tamlohi Natuna mo viŕonia vara i vujangia isana.”

²³ Moiso mo posi vano isana nona tamlohi usuri mo varavaramasa isara mara, “Avulahi isamim matan ka hite na sava ka lo hitea.²⁴ Varaŕuhu na vereā isamim, pŕovet peresi na supe matuvana la lo kilau vara la hite na sava ka lo hitea, ale vara la rongo na sava ka lo rongoa, pani la sopo rongoa.”

Retileu Atu Mo Aulu Jea

²⁵ Ale na rani matea tamlohi levosahi mata leu matea mo turu vara i vaihite Iesu na retiusia matea sohen harihi, “Tija, a pa vai na sava natu, vara a lavi na mauri tui hinia?”

²⁶ Iesu mo vereā isana mara, “La uli na sava na Leu? Na nom kilakilau mo vereā sohena sava?”

²⁷ Ale mo ŕaramia mara, “‘O opoi Moli nom God vevuhi na mapum, na maurim, na suiham peresi na ŕomim’;
Deut 6.5 ale, ‘O opoi na tahisam sohen ko lo opoiho hasem’.”
Lev 19.18

²⁸ Moiso, Iesu mo vereā isana mara, “Ko vereā mo tataholo. O vaia sohena, ale o pa mauri matana.”

Hare Enia Tahisaku?

²⁹ Tamlohi atu mo opoia vara i hasena vaia i tataholo na nahon Iesu, ale mo vereā isan Iesu mara, “Ale, hare enia tahisaku?”

³⁰ Iesu mo ŕaramia mara, “Ale na rani matea tamlohi matea mo tai Jerusalem mo lo sivo Jericho, ale tamlohi vili na tamlohi mata vavanaho hai la tauria la ŕari nafihi na nona ruru, la lavi nafihi na nona mania,

moiso la vilia la pulahia na malele mariviti i mate, ale la malue.

³¹ Ale mo sopo tuai pris matea mo lo sevuti hin malele atu mo hitea, pani mara mo hite tamlohi atu mo hahau pahipahi hinia. ³² Ale sohen haratu purongo, tamlohi voko na Temple matea na vaon Levi mara mo mai hin jara atu mo hitea, ale mo hahau pahipahi hinia. ³³ Pani hitahu, mara Samaria matea na nona hahau mo mai hin jara atu, ale mara mo hitea mo romopoa. ³⁴ Mo rautoho na pahisana, mo rengi na wel peresi na waen na matara maja, ale mo pesira, moiso mo taua aulu na hafi pulana donki, ale mo lingia mo mai na ima mapu matea, mo lo kilaua atu. ³⁵ Mele rani sahe tamlohi atu mo sile na tamlohin ima mapu atu na mania mo tataholo mata voko mata rani mo rua mara, 'O lo kilaua, ale sava hinau ko jalahia matana, a pa mele spaia na rani na mele pala nike.'

³⁶ Ale Iesu mo usia isana mara, "Na romim, sava tamlohi natu hin la haratu mo tolu enia tahisan tamlohi atu sei tamlohi vili na tamlohi mata vavanaho la tauria?"

³⁷ Moiso pa tamlohi atu mo faramia mara, "Haratu mo romopoa."

Ale Iesu mo vereia isana mara, "O vano o vaia sohena."

Martha Enia Mary

³⁸ Ale na malelera la lo vano Jerusalem, Iesu mo unu na vanua matea, ale harai matea hijana Martha mo avulahi vara i unu na imana. ³⁹ Ale vetasina matea hijana Mary, mo sakele na palon Moli mo lo tapurongo na nona vujangi. ⁴⁰ Pani Martha mo tiatia na nona tatamahu, ale mo mai isan Iesu mara, "Moli, ko sopo romiaiu matan vetasiku mo rovo hinia, ale enau haseku purongo na lo tatamahu? O vereia isana vara i mai i tueniau!"

⁴¹ Pani Moli mo faramia mara, "Martha, Martha engko ko romkaka na hinau matuvana, ⁴² pani hinau matea mo aulu jea. Mary mo vifoni na sava mo mele fuhu jea sei tea i pa sopo efi lavi narihia isana."

11

Vujangi Mata Ususi (Mt 6.9–15; 7.7–11)

¹ Ale Iesu mo lo ususi na jara matea, ale mara mo isoiso, nona tamlohi usuri matea mo vereia isana mara, "Moli, o vujangi kamam mata ususi sohen John tamlohi pap-tijo mo lo vujangi na nona tamlohi usuri hinia."

² Ale Iesu mo vereia isara mara, "Vara ka ususi, ha vereia vara:

God Tama, kama opoia vara tamlohi tari la sile na oloolo tavera isam matan engko ko tapu.

Kama opoia vara nom suiha aulu mata supe i pala.

³ O sile kamam na hanhani matan nohorihhi, ⁴ O romi kamam matan nomam hehe sohena kama lo romi na hehe nona tinapua isamam.

O lavi narihii kamam na hina vaihite."

⁵ Ale mo vereia isara mara, "Ra levosahia vara, vara te tapalam mo mai isam na livuha vutepongi ale mo vereia isam vara, 'Tapala, o efi sileau hin te pereti i tolu, ale a pa mele spaia, ⁶ matan tapalaku matea mo pa pala purongo na nona hahau, ale mo sopo te sope hanhani vara a silea isana.' ⁷ Ale na lolo ima o pa ulo isan tapalam na jingoima vara, 'O sopo vaore, matarua mo pelati ale natuku la lo juruvi peresiau na vata. A sopo efi turu vara a sileho hin te hinau.' ⁸ Varafuhu na vereia isamim, hina purongo vara enia tapalam matea, o pa sopo efi turu vara o silea hin te hinau hatea, pani o pa turu vara o sile na sava mo opoia matan mo lo ajihio matana.

⁹ Varafuhu na vereia isamim, ha usia, ale i pa mai isamim; ha alea, ale ha pa lavutia; ha ferengi, ale i pa roi isamim. ¹⁰ Matan tamlohi tari sei la usia la lavia, ale haratu mo alea, mo lavutia, ale isan haratu mo lo ferengi, pelati i pa roi.

¹¹ Ale sava tama isamim, vara natuna mo usia na maji matea, i pa turu i sile na mata sasati matea isana, pani mo sopo maji sei mo usia? ¹² Teni vara mo usia hin te esile toa, i pa turu i silea na novu lepa? ¹³ Vara kamim sei ka sasati jea, pani ka levosahia sohena sava vara ha sile na otori fuhufuhu isana natumim, ha lo levosahia vara God Tama na tuka i pa sile na hinau mo fuhufuhu jea sohena Tanume Tapu, isan la haratu la usia!"

Beelzebul Enia Setan

(Mt 12.22–30; Mk 3.20–27)

¹⁴ Na rani matea Iesu mo titiu narihi na tanume sasati matea sei mo vai na tamlohi matea mo mengo. Pa tanume sasati mara mo malue, pa mengo atu mo retireti, ale tamlohi la mafurahi tavera. ¹⁵ Pani tatuara lara, "Enia mo lo titiu narihi na tanume sasati na hijan Beelzebul, tamlohi tavera nona tanume sasati!" ¹⁶ Ale tatuara, matan la opoia vara la vaihitea, la ajia vara i vai te matamata mafurahi hatea i tai na tuka.

¹⁷ Pani matan Iesu mo levosahi na romira mo vereia isara mara, "Jara supe tari sei la patumasa na lolora la pa puru, ale patumasa na lolo ima matea i pa aseasera la jovi.

¹⁸ Ale, vara Setan sohena mo lo hase valum isana hasena matan enia mo vaiiau na efi titiu narihi na nona tanume sasati, nona suiha mata supe i pa turu sohena sava? ¹⁹ Ale, vara na lo titiu narihi na tanume

sasati na hijan Beelzebul, hare natu mo lo tueni na natumim na rani la lo titiu nafihi na tanume sasati? Matan haratu, enira natu la pa nomim tamlohi aria. ²⁰ Pani vara na lo titiu nafihi na tanume sasati na suihan God, ka levosahia vara mauri atu God mo aulu hinia mo pala isamim. ²¹ Vara tamlohi suiha matea sei mo tatamahu mata valum, enia mo lo matahi na imana tavera, nona tavgav la pa lo toho i ruhu. ²² Pani vara tea mo mele suiha mo jeua mo mai mo valum peresia, ale mo jeua, enia i pa lavi nafihi na nona hinahinau mata vuro sei mo lo tau na nona rasua hinira, ale i pa ase na nona tavgav.

²³ Haratu mo sopo turu peresia enia mo lo turuleji hiniau, ale haratu mo sopo vilevilei peresia mo lo levuti jalajalai.

Vujangi Mata Tanume Sasati
(Mt 12.43–45)

²⁴ Vara te tanume lumiha sasati mo malue na tamlohi matea, mo vano falihi na jara hasetoho mo lo aleale nona jara mapu, ale mara mo sopo hite tea mo vereea mara, ‘A pa mele vano na imaku sei na tai ea!’ ²⁵ Ale, mara mo mele mai mo hite imana atu la tivesia, ale la vai mamahunia. ²⁶ Moiso, mo mele vano mo lavi na tanume lumiha sasati mo limaravrua tinapua sei la sati la jeua, ale la unu hin ima atu ale la lo toho hinia. Ale hitahu, maurin tamlohi atu i pa sati i jeu tiroma.”

²⁷ Iesu mo pa lo vere la hinau nike, haŕai matea hin vao atu mo ulo isana mara, “Avulahi isan haŕai atu mo tapeho ale mo kilauho!”

²⁸ Iesu mo faramia mara, “Avulahi i pa mele ruhu jea isan la haratu la rongo na reti non God ale la hahau hinira.”

Matamata Non Jonah
(Mt 12.38–42; Mk 8.12)

²⁹ Ale vao atu mara mo lo tavera jea Iesu mo tapulo vereea isara mara, “Pina nike enia pina sasati matea. Mo lo ale na matamata, pani i pa sopo eri hite te matamata pani matamata non Jonah purongo. ³⁰ Matan sohen Jonah enia matamata matea isana mara Nineveh, Natun Tamlohi sohena isan pina nike. ³¹ Ale Vesupe non Sheba i pa turu na rani aria peresi na tamlohin pina nike nake, ale i pa vereea vara talai non pina akerihi mo tataholo, matan enia mo tai na jara asau rove mo sinai vara i tapurongo na lelevosahi non Solomon; pani hinau matea mo mele aulu jea hin Solomon mo lo toho nike. ³² La tamlohi atu matan Nineveh la pa turu na rani aria peresi pina nike nake, ale la pa vereea vara talai non pina nike mo tataholo, matan enira la posi mata retivu-javujangi non Jonah; pani tamlohi matea mo aulu jea hin Jonah mo lo toho nike nake.

Malarani Na Maurim
(Mt 5.15; 6.22–23)

³³ Mo sopo te tamlohi i hasahi na lamu, vara i taua na jara jarohi matea na lolo ima, teni i taua na ruhuruhun te tanga; pani i pa kehoia na jarana matan vara la haratu la unu na ima la pa hite na merana. ³⁴ Matam enia lamu mata epem. Vara matam mo lo ruhu, epem tari la lo marivi na mera; pani vara matam mo sati, epem tari la pa marivi na roŕoha. ³⁵ Matan haratu, o lo kilau mamahu vara sava ko lo rom vara enia mera na lolom mo sopo mera varaŕuhu pani roŕoha. ³⁶ Pani vara epem tari mo marivi na mera, ale mo sopo te roŕoha hinia, i pa mera vevuhi sohena sasarami lamu matea sei mo lo sileho na merana.”

Iesu Mo Retiŕoaŕoaŕohaira
(Mt 23.1–36; Mk 12.38–40; Lk 20.45–47)

³⁷ Iesu mo pa lo retireti, ale Pharisee matea mo usia vara i vano na imana i hanhahi peresia, ale mo vano mo sakele na jara hanhahi. ³⁸ Pharisee atu mo hutua matan Iesu mo sopo javula tiroma vara i pa hanhahi. ³⁹ Ale Moli mo vereea isana mara, “Kamim Pharisee ka lo hoje na paniken peresi na peleti na haŕina, pani na lolomim ka marivi na hanmarua peresi na posposi sasati jea. ⁴⁰ Kamim ka rongorongono! Haratu sei mo lo vai na haŕina enia mo vai na lolona. ⁴¹ Pani ha sile na silesilea na avulahi isan la haratu la vejuveju, ale ha pa vokevoke vevuhi na maurimim tari.

⁴² Pani rani sasati isamim Pharisee! Matan ka lo sile na sangavulu solat, oke peresi na pere pahai tari, ale ka lo romfomi purongo na hinau mo aulu na nahon God sohena nomim ariari, ale ka sopo opoi God. Pani i pa mele ruhu jea vara ha vaira enira mo isoiso.

⁴³ Rani sasati isamim Pharisee! Matan ka opoi na jara sakele nona tamlohi aulu na lolo ima lotu, ale ka opoi vara tamlohi la lo sile na retioloolo isamim na jara maket. ⁴⁴ Rani sasati isamim Pharisee! Matan kamim, ka sohena taptap sei tamlohi la sopo levosahia vara enira taptap, ale tamlohi la hahau aulu hinira pani la sopo levosahia, ale mo vaira la lumiha matana.”

⁴⁵ Tamlohi lelevosahi mata leu matea hin la haratu la lo turu atu mo faramia mara, “Tija, sava ko lo vereea ko vai mahanuhanu hin kamam sohera!”

⁴⁶ Ale Iesu mara, “Rani sasati sohena isamim tamlohi lelevosahi mata leu! Matan ka tau na tetehi puhoni isana tamlohi la sopo eri lavira, ale te vonamim hatea mo sopo vai te hinau hatelete vara i tuenira. ⁴⁷ Rani sasati isamim! Matan ka voro na matamata mata romfomi na pŕoŕvet sei tamamim la vilira. ⁴⁸ Matan haratu,

kamim ka nora tuetueni ale ka majinga na sava tamamim la vaira, matan enira la vilira ale kamim ka vai na matamata mata romfomira na tapura. ⁴⁹Matan haratu, God na nona levosahi mo vereea mara, 'A pa rule te p̄rovet peresi na vahafule isara, la pa vilimatei te tatuara ale la tipahi te tatuara.'

⁵⁰Matana, fae p̄rovet tari sei mo roro mo tapulo na rani vavahinau hin varama nike, God i pa taua na liman pina nike nake, ⁵¹mo tapulo na faen Abel mo tikeli na raen Zechariah, hara sei mo mate na livuha votavota peresi na jara tapu na Temple. Varafuhu na vereea isamim, God i pa sile na talai tavera isan pina nike nake.

⁵²Rani sasati isamim tamlohi levosahi mata leu! Matan ka lo turuhoro na malele tamlohi vara la efi levosahi God, ale kamim sohena ka sopo levosahi God, ale ka lo turuhoro na tamlohi sei la opoia vara la levosahi God."

⁵³Ale Iesu mara mo malue hin jara atu, Pharisee peresi na tamlohi vujangi mata leu, la tapulo area rilangi, la jinea vara i mele vere te hinau matuvana, ⁵⁴la lo sasaovi rofo matana vara la efi tuvaia hin te hinau i pa vereea.

12

Posposi Tapnetano

¹Iesu mo pa lo vano makomona, ale vao tamlohi matuvana la lo takonahi la tiatia hajavua la lo tapulo turu aulu hinira hasera, ale Iesu mo tapulo vereea isana nona tamlohi usuri mara, "Ha lo kilau mata isi nona Pharisee, isi sei enia posposi tapnetano. ²Mo sopo te hinau vara la jarohia i pa sopo pala, teni te hina luhu vara la pa sopo levosahia. ³Matan haratu, sava ka vereea na rofoha, la pa rongoa na malarani, ale sava ka varavaramasa hinia na jara luhu, la pa vereulia na jara tavera.

Retiroafoahai Matea (Mt 10.28–31)

⁴La tapalaku, varafuhu na vereea isamim vara ha sopo matahuni la haratu la lo vilimatei na epemim, pani hitahu la sopo efi mele vai te hinau tinapua. ⁵Pani a pa retiroafoahai kamim hin haratu vara ha pa matahunia: ha matahuni God sei matan enia mo lo tauri na suiha vara i vilimatei kamim, ale i efi pulahi kamim na moruhapu. Enia natu ha pa matahunia!

⁶Tamlohi tari nike isara la levosahia vara ha efi voli te vakarakara i lima na selen mo rua purongo, pani God mo sopo romaliho hin te hatelete. ⁷Vulumim hatehateahi na patumim sohena, God mo sopo romaliho hin te hatelete. Ha sopo matahu matan kamim ka mele aulu jea na vakarakara matuvana na nahon God.

Ha Sorahi Iesu Isana Tinapua (Mt 10.32–33; 12.32)

⁸Ale na vereea isamim vara te vonamim hatea i vereea vara enia noku na naho tamlohi, Natun Tamlohi sohena i pa vereea vara enia nona na naho angelo non God, ⁹pani haratu mo vunvunia vara enia noku na naho tamlohi, enau a pa vunvunia vara enia noku na naho angelo non God. ¹⁰Ale tamlohi tari sei la lo veresatihi Natun Tamlohi, God i pa romira, pani haratu mo veresatihi Tanume Tapu, God i pa sopo romia.

¹¹Ale na rani vara tamlohi la lavi kamim na lolo nora ima lotu, teni na naho tamlohi aulu peresi la haratu la lo tauri na suiha, ha sopo romkaka vara ha pa paramira sohena sava teni vara ha pa vereea na sava, ¹²matan Tanume Tapu i pa vujangi na sava ha pa vereea hin rani atu."

Haratu La Sopo Romromi God

¹³Tamlohi matea hin vao atu mo vereea isana mara, "Tija, o vereea isan vorauku vara i ase na korun tamamam peresiau." ¹⁴Pani Iesu mo vereea isana mara, "Tapala, na sopo sinai matan vara a ari teni a ase na nomim hinahinau." ¹⁵Ale Iesu mo vereea isara mara, "Ha lo kilau, ha toho asau na posposi tari mata marohati na hinau mo sopo te nomim, matan mauri varafuhu enia mo sopo na sava nakonako ka lo lavira."

¹⁶Ale mo vereea na titileu matea isara mara, "Tamlohi tadvav matea, isana la jea la matuvana hajavua i sopo efi vaira, ¹⁷ale mo lo hase romromia mara, 'A pa vai na sava natu, matan mo sopo te jara vara a pa tau mamahuni la vua isaku nike hinia?" ¹⁸Ale mara, 'Ale! Na levosahi na hinau matea a pa vaia, a pa kauti narihi la noku pea nike, ale a mele vorora la mele tavera jea, ale a pa takonahi na vua isaku peresi na noku hinahinau hinira. ¹⁹Ale a pa vereea isaku haseku vara, 'Engko nom hinau ruhu mo mafivi, ko takonahira la efi toho mata tauni matuvana: o mapu, o hanhani, o inu ale o avulahi.'

²⁰Pani God mo vereea isana mara, "Tamlohi rongorongo vono! Hin vutepongi ak-erihii purongo, a pa narihi na maurim, ale la hinau sei ko lo tatamahunira la pa sopo ruhu matan te hinau isam.'

²¹I pa sohena isan haratu sei mo lo takonahi na nona tadvav mata masalona, pani mo sopo romromia vara i tapala ruhu peresi God."

Ha Sopo Romkaka (Mt 6.25–34)

²²Ale Iesu mo vereea isana nona tamlohi usuri mara, "Matan haratu, na vereea isamim, ha sopo romkaka mata maurimim vara sava ha pa hania, teni na epemim vara sava ha pa rua. ²³Matan mauri mo aulu jea,

mo jeu na hanhani, ale epeimim mo aulu jea, mo jeu na ruru. ²⁴ Ha to ʔomʔomi na maji avuavu, enira la sopo lavo teni la sopo vu, ale mo sopo te nora jara tatamahu teni te pea, pani God mo lo vahanira. Ka levosahia vara na nahon God kamim ka mele aulu jea na maji avuavu! ²⁵ Ale sava tamlohi isamim na nona ʔomkaka i eʔi vai na maurina i mele peravu matan te aoa hatea? ²⁶ Ale vara ha sopo eʔi vai te hina rihirihi hatea sohen haratu, mata sava natu ka lo ʔomkaka na hinau tari?

²⁷ Ha to ʔomʔomi na lili wai sohena sava la lo ulua, la sopo voko, la sopo tulai na nora ruru, pani na vereea isamim vara ruru fuhufuhu non Solomon na nona tavgava, la sopo fuhu sohena ruru non te lili wai hatea. ²⁸ Pani vara God mo ru na ruvuvuvu matan nahapani purongo, pani pavuho mo mahoa, ale la pulahia na hapu, mo sohena sava, ka ʔom vara God i pa sopo ruru kamim? Kamim akerihi, nomim rasua mo rihirihi hajavua! ²⁹ Ale ha sopo ale na sava ha pa hania teni na sava ha pa inua, teni ha lo ʔomkaka. ³⁰ Matan la haratu la sopo levosahi God la lo ale la hinau atu, pani Tamamim mo levosahia vara ka opoira. ³¹ Pani ha ale mauri atu sei God mo lo silea sei enia mo supe hinia, ale enia i pa sile na hinau tinapua sei ka opoira peresia isamim.

*Hinau Atu Na Tuka
(Mt 6.19–21)*

³² Natuvarihhi, ha sopo matahu, matan Tamamim enia mo avulahi tavera vara i sile kamim hin mauri atu enia mo supe hinia. ³³ Ha haʔehi na nomim hinahinau, ale ha silesile isan la haratu la vejuveju hin te hinau. Ha vai na nomim tanga korohi sei la pa sopo eʔi ʔovo hin te rani la maʔivi na tavgava matan tuka sei la pa lo toho tui tui ea. Mo sopo te tamlohi vavanaho ea teni te majmaj vara i eʔi komora atu. ³⁴ Matan sava jara nomim tavgava la lo toho ea, mapumim sohena la pa lo toho atu.

*Ha Tatamahu Tarea
(Mt 24.45–51)*

³⁵ Ha tatamahu matan Moli, ale ha vai na nomim lamu la lo hani, ³⁶ ale ha sohena tamlohi sei la lo saovi nora moli vara i pa mele mule na hanhani lahi matea matan vara la eʔi roi na matarua isana vahatea na rani mo pala ale mo ʔerengi. ³⁷ Avulahi tavera isana volitusi tari vara nora moli mo tapaira la pa lo kilau na rani mo pala. Varafuhu na vereea isamim vara na nona avulahi tavera, moli atu i pa ru na ruru nona volitusi, ale i verera vara la sakele na jara hanhani, moiso i pa lavi na hara hinau i silea isara. ³⁸ Vara mo pala na livuha vutepongi teni na toa tarere ale mo tapaira

la pa lo kilau, la volitusi atu la pa avulahi tavera.

³⁹ Pani ha lo levosahi harihi: vara moli mata ima i pa lo levosahia vara sava rani tataholo tamlohi vavanaho i pa pala hinia, i pa sopo malue na imana vara tamlohi vavanaho i eʔi unu na imana. ⁴⁰ Kamim sohena, ha lo tatamahu, matan Natun Tamlohi i pa mai na rani ka ʔom vara i pa sopo mai hinia.”

⁴¹ Ale Peter mara, “Moli, ko lo vere titileu nike nomam purongo teni nona tamlohi tari?”

⁴² Ale Moli mo vereea mara, “Hare natu enia patu tamlohi lelevosahi matea sei mo lo turu ʔilangi tarea mata kilau na iman nona moli? Ale nona moli mo taua mo aulu na imana matan vara i vahani na nona volitusi mata imana na rani hanhani tataholo. ⁴³ Avulahi tavera isan volitusi atu vara nona moli mo tapaia mo lo vaia sohena na rani mo pala. ⁴⁴ Varafuhu na vereea isamim vara moli atu i pa tau volitusi atu i aulu na nona hinahinau tari. ⁴⁵ Pani vara volitusi atu mo hase vereea isana vara, ‘Noku moli mo sopo mai vila!’ Ale mo tapulo tamaji na volitusi haʔai peresi na lamane, ale mo hanhani ale mo inu mo drong, ⁴⁶ moli non volitusi atu i pa pala na rani mo sopo ʔom vara i pa pala hinia na aoa matea mo sopo levosahia, moiso i pa sile na talai tavera jea isana, ale i pa taua peresi la haratu la sopo fuhu. ⁴⁷ Ale sava volitusi sei mo levosahi na masalon nona moli pani mo sopo tatamahu teni mo sopo vavahinau usuri na masalon nona moli, enia i pa lavi na talai ʔilangi.

⁴⁸ Pani isan volitusi sei mo sopo levosahia vara mo vai na hinau mo sopo tataholo, nona talai i pa sopo ʔilangi. Isana tamlohi tari sei God mo tau na hinau matuvana na limara, God mo lo kilau mata hinau matuvana jea la pa tai isara.

*Patumasa Matan Rasua Hin Iesu
(Mt 10.34–36)*

⁴⁹ Na sinai vara a pulahi na hapu na varama mata ase na tamlohi vara hare i pa toho jejeu, ale na opoia jea vara mo lo tapulo hani moiso. ⁵⁰ A pa lavi na paptijo sasati matea mo lo toho na nahoku, ale enia tetehi puhoni matea moiso isaku, ale i pa sohena i tikeli rani atu na lavi vevuhia. ⁵¹ Ka ʔom vara na sinai matan vara a sile na tamata na varama? Mo vono, pani vara a sile na patumasa. ⁵² Matan mo tapulo nakerihi mo lo vano, vao ima matea tamlohi mo lima la pa patumasa, mo tolu la pa meresahi hin mo rua, ale mo rua la pa meresahi hin mo tolu. ⁵³ La pa patumasa, tamana i pa meresahi isan natuna, natuna isan tamana, ale tinana i pa meresahi isan venatuna, ale venatuna

isan tinana, haʻfai i pa meresahi isan tinan tinana, ale tinan tuana isan naroun natuna.”

Ha Hitevosahi Na Hinau Non God
(Mt 16.2–3; 5.25–26)

⁵⁴ Ale Iesu mo vereia isan vao atu mara, “Vara ka hite na telangi matea mo lo vele Marino, ka vereia vahatea vara, ‘Usa matea mo lo mai.’ Ale mo pala sohena. ⁵⁵ Ale vara ka hite na langin tahuna mo lo sere kara, ‘Alo i pa tutuni sati!’ Ale mo pala sohena. ⁵⁶ Ka tapnetano! Ka levosahia vara ha eri vereia vara i pa sohena sava na sava ka lo hitera na varama peresi na masapa, pani mata sava natu, ka sopo eri vereia vara sava rani nahai ʻa lo toho hinia nake?”

⁵⁷ Ale mata sava natu ka sopo eri hase hitevosahi na sava mo tataholo? ⁵⁸ Vara ko lo vano na court, ale i pa mele ruhu vara o tapai haratu mo lo tau kamim na court na malele tako, ale o vaihitea vara o vai tataholoi hinau atu peresia tiroma; vara i vono, o pa turu na nahon tamlohi aria, ale i pa ariho o vano na lima tamlohi ima ʻilangi, ale i pa tauho na ima ʻilangi. ⁵⁹ Varafuhu na vereia isam, o pa sopo eri malue vavano o voli vevuhi na nom ave tari.”

13

¹ Hin pongi atu, tamlohi hai la lo toho atu, la vereia isan Iesu lara Pilate mo vilimatei na mara Galilee hai hin rani atu la lo sile na nora malamalai na Temple, ale ʻaera mo hoi peresi na rae nora malamalai. ² Ale mo ʻaramia mara, “Ka rom vara la mara Galilee atu la hehe mo jeu na mara Galilee tinapua matan la lavi na mateia sohena teni mo vono? ³ Mo vono, pani na vereia isamim vara ha sopo posi, kamim mo isoiso ha pa tihai sohera. ⁴ Teni la tupu sangavulu romana mo limaravtolu atu sei taoa matan Siloam mo jovi mo vilimateira, ka rom vara enira la hehe mo jeu na tamlohi tari tinatnapua sei la lo toho Jerusalem? ⁵ Mo vono, pani na vereia isamim, vara ha sopo posi, kamim sohena ha pa tihai sohera.”

Vipahai Pulo Fig Matea

⁶ Ale Iesu mo vere ititeu akerihi mara, “Tamlohi matea mo lavo na pulo fig matea na isana, ale mo mai mo aleale vuana pani mo sopo hite tea. ⁷ Ale mo vereia isan nona tamlohi voko mata isa mara, ‘Ko hitea, na mai tauni mo tolu moiso vara a hite te naman pulo fig akerihi ale na sopo hite tea. O tai jovia. Mo lo turuhoro na jara purongo.’

⁸ Ale mo ʻaramia mara, ‘Tamlohi tavera, o mele tinarihia hin tauni akerihi, a pa heli ʻalihia, ale a pa tau na te buluk i ʻalihia. ⁹ Ale tavalu tauni korong i pa vua, vara i sohena mo ruhu, pani vara mo vono, o eri tai jovia.’”

Iesu Mo Vavahinau Na Sabbath

¹⁰ Na rani matea Iesu mo lo vujangi na ima lotu matea atu na Sabbath. ¹¹ Ale haʻfai matea tanume sasati matea mo vai na haʻfina mo hoho mata tauni mo sangavulu romana limaravtolu. Haʻfina mo hoho ale i sopo eri turu tataholo. ¹² Na rani Iesu mo hitea, mo usia mo mai isana, mo vereia isana mara, “Haʻfai, engko ko materi na nom rojoa.” ¹³ Ale mo tau na limana hinia; ale vahatea purongo haʻfina mo tataholo, ale haʻfai atu mo hasohaso God.

¹⁴ Pani patu tamlohi mata ima lotu atu mo lolokoru matan Iesu mo vai na rojoa mo tihai na Sabbath, ale mo vereia isana tamlohi mara, “Rani mo limarave la lo toho mata vavahinau hinira. Ha sinai hin la rani atu matan vara i vai na nomim rojoa la tihai, mo sopo na rani Sabbath.”

¹⁵ Moiso Moli mo ʻaramia mara, “Kamim ka tapnetano! Na levosahia vara kamim hatehateahi ka lo uli narihi na pulamim buluk teni donki na nora jaru juruvi hin te Sabbath, ale ka lavia vano vara i inu te wai. ¹⁶ Ale ka romi vara mo tataholo teni mo vono vara haʻfai akerihi venatun Abraham matea sei Setan mo lihoa mata tauni mo sangavulu romana limaravtolu moiso, vara i eri materi na nona rani ʻilangi na Sabbath?” ¹⁷ Ale mara mo lo vere la hinau atu, nona meresahi tari la mahanuhanu, ale tamlohi mo isoiso la avulahi na hina ruhu ruhu tari sei mo lo vaira.

Vujangi Mata Piri Paka

(Mt 13.31–33; Mk 4.30–32)

¹⁸ Moiso Iesu mo vereia mara, “Mauri atu God mo aulu hinia mo sohena sava? A pa vereia vara mo sohena sava hinau? ¹⁹ Mo sohena piri paka matea tamlohi matea mo lavia mo pulahia purongo, ale mo ulua mo mai vipahai tavera matea; ale maji avuavu la lo vai na taura na rangarangana.”

Vujangi Mata Isi

²⁰ Ale mo mele vereia mara, “A pa mele vereia vara mauri atu God mo aulu hinia mo sohena sava hinau? ²¹ Enia mo sohena makomo isi sei haʻfai matea mo lavia mo hoia na paki flaua matea vavano isi mo vaia mo sosohi vevuhi.”

Hare I Pa Juri

(Mt 7.13–14, 21–23)

²² Iesu na nona hahau mo unu role na taon peresi na vanua mo lo vujangi, ale mo hahau mo lo vano Jerusalem. ²³ Ale tamlohi matea mo vereia isana mara, “Moli, la haratu sei la pa juri, enira i pa tupu visaletu purongo?” Ale mo vereia isara mara, ²⁴ “Ha vaihitea vara ha eri unu hin matarua rihirihia atu. Matan na vereia, vao tavera la pa opoia vara la unu pani la pa sopo eri vaia. ²⁵ Na rani tamlohi tavera

mata ima mo turu mo pelati na matarua, ale kamim na jingoima ka tapulo ferengi na pelati kara, ‘Moli, o roi isamam!’ Ale i pa farami kamim vara, ‘Na sopo levosahia vara ka tai epu!’²⁶ Moiso ha pa tapulo vereea isana vara, ‘Pani kamam kama lo hanhani, ale kama lo inu peresiho, ale engko ko lo vujangi na malele tavera na nomam taon.’²⁷ Pani i pa vereea vara, ‘Na vereea isamim, na sopo levosahia vara ka tai epu! Ha malue na nahoku, kamim tamlohi lejileji!’

²⁸ Na jara talai, la pa tangtangi ale la pa naʻnaʻori na huʻura na rani la hite Abraham, Isaac, Jacob peresi na pʻrovet tari hin mauri atu God mo aulu hinia, pani kamim ka hase horo kamim hinia. ²⁹ Ale tamlohi la pa tai Opae, Marino, Tahuna peresi Auta, ale la pa sakele na jara hanhani hin mauri atu God mo aulu hinia, ale la pulahi kamim. ³⁰ Ale ha lo levosahia vara, tatuara sei la lo hitahu nake, la pa tiroma, ale tatuara la lo tiroma nake, la pa hitahu.”

Iesu Mo Tangi Matan Jerusalem

³¹ Tataholo hin rani atu, Pharisee hai la mai la vereea isana lara, “O rovo nike, matan Herod mo opoia vara i vilimateiho.”

³² Ale Iesu mo vereea isara mara, “Ha vano ha vereea isan pusi atu vara, ‘O levosahia vara nohorihiperesi pavuho enau a pa titiu naʻrihi na tanume sasati, ale a pa vai na rojoa la tihai, ale na hatolu rani a pa isoiso na maleleku. ³³ Hina purongo, a pa vano na maleleku nohorihiperesi pongi tolu, matan i pa sopo tataholo vara pʻrovet matea i mate na jingoiman Jerusalem!’

Iesu Mo Tangisi Jerusalem (Mt 23.37-39)

³⁴ Jerusalem, o Jerusalem, taon tavera sei mo vilimatei na pʻrovet, ale mo paru la haratu God mo ʻrulaera isana. Vaha visa moiso na opoia vara a takonahi na natum jara matea sohena toa haʻrai matea mo hovi na natuna na ruhuru hapana, pani ko ʻrohu! ³⁵ O lo levosahia vara imam mo puru! Ale na vereea isam vara engko o pa sopo mele hiteau i tikeli rani atu o pa vereea vara, ‘Avulahi isan haratu mo lo mai na hijan Moli!’ ” *Psa 118.26*

14

Iesu Mo Vai Na Rojoa La Tihai

¹ Na Sabbath matea, Iesu mo vano na ima tamlohi aulu matea na vao Pharisee, ale la tamlohi atu la lo kilau ʻroʻroia. ² Ale tamlohi purapura matea mo lo toho atu na nahon Iesu. ³ Iesu mo usi na Pharisee peresi na tamlohi lelevosahi mata leu mara, “Mo tataholo vara tea i vai na rojoa i tihai na Sabbath teni mo vono?” ⁴ Pani la sakele tapnono. Moiso Iesu mo tauri tamlohi atu mo vai na nona rojoa mo tihai, ale mo ʻrulaera

mo vano. ⁵ Moiso mo usia isara mara, “Vara te vonamim hatea te natuna teni pulana buluk hatea mo jovi sivo atano hin te moru wel matea na rani Sabbath matea; hare natu i pa sopo reve naʻrihia vila?” ⁶ Ale enira la sopo eʻri farami la hinou nike.

Vujangi Mata Posposi Romatano

⁷ Ale Iesu mo vereea na titileu matea isan la haratu sei la usira la mai atu, matan mo hitea sohena sava la lo hase viʻroni na jara sakele ʻruhu atu na tep, ale mo vereea isara mara, ⁸ “Na rani tamlohi matea mo usiho vara o mai na hanhani lahi, o sopo sakele na jara ʻruhu tako, matan ko sopo levosahia vara tamlohi lahi atu mo usi te tamlohi aulu tinapua mo aulu hiniho teni mo vono, ⁹ ale haratu mo lo usi kamim tuprua sei i pa mai isam i vereea vara, ‘O sile na masapan isan tamlohi akerihii!’ Ale o pa mahanuanuho o sivo na jara sakele atano.

¹⁰ Pani vara la usiho, o vano o sakele na jara sakele nona tamlohi purongo tiroma, matan vara tamlohi lahi atu vara i mai isam i vereea vara, ‘Tapala, o juha o sahe na jara matea mo mele ʻruhu!’ Moiso, matan haratu o pa lavi na ooloo na naho tamlohi tari sei la lo sakele hin jara hanhani atu peresiho. ¹¹ Matan tamlohi tari sei la hase taura aulu, God i pa taura atano, haratu mo hase taua atano, God i pa taua aulu.”

¹² Iesu mo mele vereea isan tamlohin ima atu mara, “Vara o vai na hanhani teni te hanhani tavera hatea, o sopo usi te tapalam teni te voraim, teni te tahisam teni la haratu la tadvav sei la lo toho mariviti isam, matan enira la pa mele usiho na imara matan vara la mele vaia sohena isam. ¹³ Pani vara o vai na hanhani tavera, o usi na tamlohi tilavono, haratu la kuti, haratu la papao peresi na matavuso, ¹⁴ ale God i pa leʻruhu hiniho matan enira la sopo eʻri mele spaia. God i pa volioho na rani mata sauteterahi na tamlohi tataholo.”

Hanhani Tavera Nona Supe Matea (Mt 22.1-10)

¹⁵ Moiso, tamlohi matea mo lo sakele peresi Iesu hin tep atu, mara mo rongo la hinou nike, mo vereea isan Iesu mara, “Avulahi isana tamlohi tari sei la pa hani pereti atu hin mauri atu God mo aulu hinia!”

¹⁶ Pani Iesu mo vereea isana mara, “Na rani matea tamlohi tavera matea mo vai na hanhani tavera matea, ale mo usi na tamlohi matuvana la mai hinia. ¹⁷ Ale hin rani mata hanhani tavera atu mo ʻrulaera na nona volitusi isan la haratu mo usira moiso vara i vereea isara vara, ‘Ha mai matan hinou tari la tatamahu moiso!’ ¹⁸ Pani enira mo isoiso la tapulo posi na romira. Tiromara mo vereea isana mara, ‘Na voli na lepa matea, ale a pa vano vara a hitea. O vereea vara a

pa sopo mai.’¹⁹ Ale mele tinapua mo vereea mara, ‘Na voli na buluk mo sangavulu, ale a pa vano vara a lo kilau usurira. O vereea vara a pa sopo mai.’²⁰ Ale mele tinapua mo vereea mara, ‘Na pa lahi na narouku matea, ale matan haratu a sopo eri mai.’

²¹ Ale volitusi atu mo mai mo vere la hinau sei isan nona tamlohi tavera. Moiso tamlohi tavera atu mata ima mo lolokoru, ale mo vereea isan nona volitusi mara, ‘O vano vila na malele tavera peresi na malele vavarihi hin taon tavera nike, ale o lavi la haratu la tilavono, haratu la kuti, haratu la matavuso peresi la haratu la papao.’²² Ale volitusi atu mo vereea mara, ‘Tamlohi tavera, sava ko retileu hinia na vaia moiso, ale masapa mo pa lo toho na lolo ima.’²³ Ale tamlohi tavera atu mo vereea isan nona volitusi atu mara, ‘O vano asau na malele tavera peresi na pahisa malele, ale o haluhalu na tamlohi tari vara la mai la unu, matan na opoia vara imaku i maʻivi.’²⁴ Matan na vereea isamim, i pa sopo te vonan te tamlohi atu na lo usira tiroma moiso vara la pa eri hatiforo hin te hinau hatea hin noku hanhani tavera nike.’”

*Ha Opoi God Ale Ha Usuri Iesu
(Mt 10.37–38)*

²⁵ Tataholo hin rani atu, vao tavera la lo toho peresia, ale Iesu mo posi mai isara mo vereea isara mara,²⁶ “Vara tea mo mai isaku, pani mo sopo rohu hin tamana peresi tinana peresi na natuna, peresi na voraina peresi na vevoraina, teni mo sopo rohu na maurina hasena, enia i pa sopo eri mai noku tamlohi usuri.²⁷ Sava tamlohi mo sopo soloti na nona talopeilopei ale i usuriau, enia i pa sopo eri mai noku tamlohi usuri.

²⁸ Matan sava tamlohi isamim natu, vara mo opoia vara i voro na ima aulu matea mata kilau vano asau, mo sopo sakele tiroma matan vara i evia vara nona mania mo tataholo mata i eri voro vevuhi ima aulu atu mata kilau vano asau teni mo vono?²⁹ Vara i vono, vara mo tau na pulona, pani mo sopo eri voro vevuhia, tamlohi tari sei la hitea la pa lo kerehia matana,³⁰ lara, ‘Tamlohi akerihi mo tapulo voro, pani mo sopo eri vaia vevuhia!’

³¹ Teni, sava supe natu, mo vano vara i vai na vuro peresi na supe tinapua matea, mo sopo sakele tiroma matan vara i hitea vara la nona tamlohi vuro atu tupu tari vaha sangavulu (10,000) vara la filangi mata la turuhoro supe atu sei mo lo mai peresi na nona tamlohi vuro tupu tari vaha sangavulu rua (20,000).

³² Vara mo vono, i pa fule te tamlohi la vano isan nona meresahi atu vara mo pa lo toho asau vara la usia hin te malele mata i sari tamata.³³ Matan haratu, te vonamim i sopo eri mai noku tamlohi usuri vara mo sopo tinafihi na nona hinahinau tari.

*Solo Peresi Na Malarani
(Mt 5.13; Mk 9.50)*

³⁴ Niu la saoroia enia mo fuhu, pani vara mo sopo mele te ngaʻpulu hinia, ngaʻpulu i pa mele sivo hinia sohana sava?³⁵ Jamana mo sopo mele fuhu mata favoa peresi te hinau. La pa pulahia purongo. Haratu mo eri rongvosahia, o tapurongo!”

15

*Sipsip Atu Mo Jalio
(Mt 18.12–14)*

¹ Moiso tamlohi lavi na mania mata takis peresi na tamlohi hehe, la lo mai isana vara la rongoa.² Pani Pharisee peresi na tamlohi vujangi mata Leu la lo reti vavarihi lara, “Tamlohi akerihi mo lo pulutahi peresi na tamlohi hehe, ale mo lo hanhani peresira.”

³ Ale Iesu mo verera hin titileu akerihi mara,⁴ “Hare isamim, vara pulana sipsip mo tikeli mo ngavulu sangavulu (100) vara matea mo jalio, mo sopo mele vano vara i alea? I pa tinafihi la haratu mo ngavulu limaravati mo limaravati (99) la lo hanhani na jara tavera vavano i mele lavuti pa haratu mo lo tihai.⁵ Ale mara mo hitea, i pa solotia na pilina na avulahi.⁶ Vara mo pala na imana, i pa tovi na tapalana peresi na tahisana la pulutahi peresia, ale i vereea vara, ‘Ha avulahi peresiau matan na mele lavuti pa pulaku sipsip atu mo lo tihai.’⁷ Ale i pa sohen haratu natu, tuka i pa avulahi jea hin haratu matea sei mo mele posi, mo jeu la haratu mo ngavulu limaravati mo limaravati (99) sei la tataholo la sopo jalio na malelera.

Harai Matea Mo Ale Na Selen

⁸ Teni sava hafai vara nona selen mo sangavulu, pani mo vaitihai matea, mo sopo hasahi na lamu vara i tivesi na imana i alea vavano i lavutia?⁹ Ale vara mo lavutia, i pa tovi na tapalana peresi na tahisana la pulutahi peresia, ale mo vereea mara, ‘Ha avulahi peresiau matan na mele lavuti pa selen atu sei na lo vaitihaia!’¹⁰ Ale na vereea isamim, vara i pa sohen haratu natu, avulahi tavera mo lo toho na naho angelo non God matan tamlohi hehe atu sei mo mele posi na nona hehe.”

Natun Tamlohi Tavera Mo Jalio

¹¹ Ale Iesu mo mele vereea isara mara, “Tamlohi matea natuna mo rua.¹² Ale vora

* 15:8: selen: selen matea mo tataholo na volvoli mata rani matea, la selen akerihi enira oso puhoro mata nona lahi.

hitahu mo vereia isan tamana mara, 'Tata, o sileau hin korum atu sei enia fungaku.' Ale tamana mo ase na koruna isara tupra rua.

¹³ Mo sopo tuai, vora hitahu atu mo takonahi na nona hinahinau tari, ale mo vano vara i hitehite jara, ale mo jalahi vevuhi na nona tavitav na posposi rongorongono vono. ¹⁴ Ale mara mo jalahi vevuhi na nona mania, marua tavera matea mo pala hin jara tavera atu, ale mo vejuveju. ¹⁵ Ale mo vano mo voko isana tamlohi matea hin jara atu, ale tamlohi tavera atu mo fulea vara i vano na isana i vahani na pulana poi.

¹⁶ Ale mo marohati mo tikeli na makina vahatea, ale mo opoia vara i hani te hanhahi sei mo lo silea isana poi, pani tea mo sopo silea hin te hanhahi. ¹⁷ Pani romina mara mo mele mai, mo hase vereia isana mara, 'Tamlohi voko tari non tamaku, hara hinau mo mafivi savulevule, pani enau na lo marohati mate nike. ¹⁸ A pa vano isan tamaku ale a vereia isana vara, 'Tata, na hehe isan tuka peresiho. ¹⁹ Na sopo mele tataholo vara o toviau natum. O vaiua sohena nom volitusi matea.'

²⁰ Ale mo turu mo mele vano isan tamana. Pani mo pa lo toho asau, ale tamana mo hitea ale mo romia, ale mo maro vano isana mo rahoa, ale mo pungosia. ²¹ Moiso, natirihahi atu mo vereia isan tamana mara, 'Tata, na hehe isan tuka peresiho. Na sopo mele tataholo vara o toviau natum.'

²² Pani tamana mo vereia isana nona volitusi mara, 'Ha lavi na noku ruru peravu fuhufuhu jea i mai ha rua hinia, ale ha tau te ring hatea na varangona, ale sabat na palona. ²³ Ale ha lavi na natu buluk favisvisi atu sei fa lo kilau mamahunia ha vilia, ale fa hania fa avulahi. ²⁴ Matan natuku nike mo mate moiso, ale mo mele mauri, mo jalio, ale na mele lavutia! Ale la tapulo vai na hanhahi tavera na avulahi.

²⁵ Ale natuna vora tiroma mo lo toho na isa, ale mara mo lo mai mariviti na ima mo rongo na vete, ale la lo velu, ²⁶ moiso mo tovi na volitusi matea ale mo usia mara, 'Ka lo vai na sava sei?' ²⁷ Ale mo vereia isana mara, 'Tasim mo mele pala, ale tamam mo vili pa natu buluk favisvisi atu sei fa lo kilau mamahunia matan mo mele pala mo lo ruhu.'

²⁸ Pani mo lolokoru, ale mo fohu vara i unu na ima. Tamana mo malue mo sinai mo usia vara i unu, ²⁹ pani mo farami tamana mara, 'Ko hitea, la takonahi tauni nike enau na lo voko mate nom sohena slev matea, ale na sopo lo tope na nom retileu hin te rani, pani ko sopo sileau hin te natu nani hatelete matan vara a efi avulahi hinia peresi na tapalaku. ³⁰ Pani natum akerihi mara mo

pala, haratu sei mo lo jalahi vevuhi na korum na hafai malele, ale ko vili pa natu buluk favisvisi atu sei ko lo kilau mamahunia, matana.'

³¹ Ale tamana mo vereia isan natuna atu mara, 'Natuku, engko ko lo toho peresiau tarea, ale hinau tari noku enira nom. ³² Mo tataholo vara fa vai na hanhahi fa avulahi matana, matan tasim nike mo mate pani mo mele mauri; mo jalio ale na mele lavutia.'

16

Patu Tamlohi Lelevosahi Matea

¹ Iesu mo mele vereia isana nona tamlohi usuri mara, 'Na rani matea tamlohi tavitav matea, mo rongoa vara nona patu tamlohi sei mo lo kilau na nona hinahinau, mo lo roro purongo na nona hinahinau. ² Ale mo tovi pa nona patu tamlohi atu, ale mo vereia isana mara, 'Sava nahai na lo rongoa matam? O sileau na nom puku mata kilau na mania matan engko ko isoiso sohena patu tamlohi.'

³ Ale patu tamlohi atu mo hase vereia isana mara, 'A pa vai na sava, matan noku tamlohi tavera mo tau nafihiau sohena patu tamlohi matea? Enau na sopo rilafilangi vara a efi heli na lepa, ale na mahanuhanu vara a usi na tuetueni. ⁴ Ale, na levosahi na sava a pa vaia nake, matan vara i tau nafihiau ale tamlohi la pa avulahi mata laviau na imara.'

⁵ Ale, mo tovi vevuhi la haratu la lo ave isan nona tamlohi tavera la mai matea matea. Ale mo vereia isan haratu tiroma mara, 'Nom ave isan noku tamlohi tavera mo visa?' ⁶ Mara, 'Na ave na litre wel, mo tari vaha tolu (3,000).' Ale mo vereia isana mara, 'Ale o jarai nafihahi na nom ave, ale o ulia vara ko ave mo tari vaha hatea mo ngavulu sangavulu lima (1,500).'

⁷ Ale mo vereia isana tinapua mara, 'Nom ave mo visa?' Ale mo vereia mara, 'Na ave na piri wit, kilo mo tari vaha ngavulu tolu (30,000).' Ale mo vereia isana mara, 'Ale o jarai nafihahi na nom ave, ale o ulia vara ko ave na piri wit, kilo mo tari vaha ngavulu rua mo vati (24,000).'

⁸ Ale tamlohi tavera atu mo hitea vara nona patu tamlohi atu mo patuha na sava mo vaia, hina purongo vara mo lejileji. Matan tamlohi hin varama nike, enira la patuha na nora bisnis la lo vaira peresi na tamlohi tinapua na varama, mo jeu la haratu la natun malarani. ⁹ Ale na lo vereia isamim, vara ha vai na nomim hinahinau nike na varama la tueni na tinapua ale ha tapala peresira. Hin malele nike, vara nomim hansohai hin varama nike mo isoiso, pa la tapalamim atu na tuka la pa avulahi hin kamim.

¹⁰ Haratu mo efi turu rilangi na hinau rihirih purongo, i pa turu rilangi na hinau matuvana, ale haratu mo lejileji na hinau rihirih matea purongo, i pa lejileji na hinau matuvana. ¹¹ Ale vara ka sopo efi turu rilangi na tavgav matan varama nike, hare i pa efi tau na tavgav varafuhu na limamim? ¹² Ale vara ka sopo efi turu rilangi na hinau nona tinapua, hare i pa efi tau te hinau na limamim vara nomim?

¹³ Tea i sopo efi volitusi isana tamlohi tavera i rua, matan i pa opoi matea, ale i rohu hin matea, teni i pa volitusi isan matea, ale i hitelehilehi matea. Ha sopo efi volitusi isan God peresi na mania.”

Te Vujangi Non Iesu

(Mt 11.12–13; 5.31–32; Mk 10.11–12)

¹⁴ Pharisee la opoi na mania, ale la haratu la lo toho atu, lara la rongo la hinau sei, la kerehia. ¹⁵ Ale Iesu mo vereia isara mara, “Kamim ka la tamlohi atu sei la lo vai tata-holoira hasera na nahom tamlohi, pani God mo levosahi na mapumim. Matan sava tamlohi la lo romromia vara la aulu, enira hina niketa na nahon God.

¹⁶ Leu non Moses peresi na sava pfovet la vereia la lo turu mo kakau na rani non John tamlohi paptijo, ale mo tapulo atu mo mai nake. Retifuhu matan mauri atu God mo aulu hinia, la lo retivujavujangi hinia, ale la lo ngurunguru na tamlohi vara la unu hinia. ¹⁷ Pani i pa mele malum vara tuka peresi na varama la tihai, mo jeu haratu vara tea i jarai narihi te sope leta hatea na lolo leu, ale suihana i mai hina purongo.

¹⁸ Tamlohi tari sei la rohu hin naroura, ale la lahi na tinapua la vaivaileu, ale haratu sei mo lahi na harai lahi matea mo rovo hin tuana, mo vaivaileu.”

Tamlohi Tavgav Enia Lazarus

¹⁹ Iesu mara, “Na rani matea tamlohi tavgav matea tarea mo lo ru na perpel peresi na ruru lulu malum, ale mo lo hani na hanhani fuhu tarea. ²⁰ Ale na nona matarua, tamlohi la tau na tamlohi tilavono matea mo solasola vevuhi na epena hijana Lazarus, ²¹ mara mo lo toho atu tarea mo opoia vara i efi hani te sope hanhani na jara hanhani non tamlohi tavgav atu, pani mo vono. Aulu hin haratu, viriu la lo mai la lo famesi na solana. ²² Hitahu pa tamlohi tilavono atu mo mate, ale angelo la lavi nafihia vara i toho peresi Abraham. Pa tamlohi tavgav atu sohena mo mate, ale la tavunia, ²³ ale enia mo sivo na jara talai na varama mata mateia, ale na nona rongohaji tavera, ale mo kilau vano mo hite Abraham enia Lazarus la lo turu asau hinia.

²⁴ Ale mo ulo mara, ‘Pua Abraham, o romopoiu, ale o fule Lazarus vara i vano i weti na pisuna na vai, ale i mai i taua

na memeku vara i hamaifia, matan na lo rongohaji hajavua na pepe hapu nike.’

²⁵ Pani Abraham mara, ‘Natuku, o to romromia, na maurim, ko lo lavi na hinau fuhuruhu, pani Lazarus, mo lo lavi na hinau mo sati, pani nake enia mo lo nanau nike, ale engko ko lo lavi na rongohaji.

²⁶ Ale mo sopo haratu purongo, pani masapa tavera matea mo lo toho na livuhara, ale mo sopo te malele vara tea nike i efi vano sei isam, teni tea sei i efi mai nike isamam.’

²⁷ Ale mara, ‘Vara sohena, na lo tangi isam vara o fulea i sivo na iman tamaku ²⁸ matan enau tasiku mo lima, ale vara i retiifoahaira. Vara i vono, enira sohena la pa sinai hin jara nike mata vailejileji na tamlohi.

²⁹ Pani Abraham mara, ‘Retiulia non Moses peresi na pfovet la lo toho isara moiso; mo tataholo vara la tapurongo isara.’ ³⁰ Ale mara, ‘Mo vono, pua Abraham, vara tea i tai nike na varama mata mateia i sivo isara, la pa posi.’ ³¹ Abraham mo vereia isana mara, ‘Vara la sopo tapurongo isan Moses peresi na pfovet, la pa sopo efi rasu tea vara i mele turu na varama mata mateia.’”

17

Vujangi Mata Romi Na Tinapua

(Mt 18.6–7, 21–22; Mk 9.42)

¹ Ale Iesu mo vereia isana nona tamlohi usuri mara, “Hinai vaihite mata hehe la pa lo mai tarea, pani rani sasati isan haratu mo lo lavira la mai. ² I pa mele fuhu jea isana, vara la liho te vatv tavera na ralonaa, ale la pulahia na lolo tasi puaha. Matan i pa mele sati jea isana, vara i vai te vonan la natuvarih nike la hehe. ³ Ha hase kilau mamahuni kamim! Vara voraim mo hehe, o reti isana, ale vara mo posi o romia, ⁴ ale vara mo hehe isam vaha limaravrua na rani matea, ale mo mele mai isam vaha limaravrua mo vereia isam mara, ‘Na posi!’ o pa romia.”

⁵ Nona vahaRULE la vereia isan Moli Iesu lara, “O vai na nomam rasu i tavera!”

⁶ Ale Moli Iesu mara, “Hina purongo vara nomim rasu mo sohena piri paka matea purongo, ha efi vereia isan pulo hatapola nike vara, ‘O hase saputiho, o sivo o lavoho na tasi!’ Ale i pa ooloo hin kamim.

⁷ Sava nomim slev matea vara mo isoiso na nona voko na isa teni mo lo kilau na sip-sip, i pa mai vara i sakele vahatea mata hanhani? ⁸ Ka levosahia vara i pa tatamahuni na hinai hani nona tamlohi tavera, ale i volitusi isana tako, moiso natu i pa hani na hana hinai. ⁹ Ale mo sopo te hinai vara nona tamlohi tavera mo sopo vere meje

isana, matan enia mo lo vai na sava mo tataholo vara i pa vaia. ¹⁰ Mo sohena purongo, vara ka lo oloolo hiniau, mo tataholo vara ha vereha vara, 'Mo sopo tataholo vara kama lavi na hasohaso isam. Kamam volitusi sei kama lo vai na sava mo tataholo purongo vara kama vaira.' "

Tamlohi Lepros Mo Sangavulu

¹¹ Na malelena mo lo vano Jerusalem, mo hahau na livuhan Samaria enia Galilee. ¹² Mara mo lo unu na vanua matea, tamlohi lepros mo sangavulu la lo turu asau, ¹³ la ulo lara, "Iesu, tamlohi tavera, o romi kamam!"

¹⁴ Mara mo hitera, mo vereha isara mara, "Ha vano, ha vujangi kamim isana p'ris." Na rani la pa lo vano, lepros atu mo tihai na epera.

¹⁵ Moiso vonara matea mara mo hitea vara mo vokevoke, mo mele hilu isan Iesu mo lo ulo aulu mo lo hasohaso God. ¹⁶ Mo jovi na nahona sivo na palon Iesu mo vere meje isan Iesu mata sava mo vaia isana, tamlohi akerihi enia mara Samaria matea.

¹⁷ Iesu mo usia isana mara, "Avei, na rom vara kamim tupu sangavulu? Tupu limaravati la haipu?" ¹⁸ Tavasau akerihi hasena purongo mo mele hilu vara i sile na hasohaso isan God?" ¹⁹ Ale Iesu mo vereha isan tamlohi atu mara, "O turu, o vano. Nom rasua mo vaiho ko ruhu."

Mauri Atu God Mo Supe Hinia

(Mt 24.23–28, 37–41)

²⁰ Na rani matea Pharisee la usi Iesu lara mauri atu God mo aulu hinia i pa mai pangisa. Ale Iesu mo faramira mara, "Mauri atu God mo aulu hinia i pa sopo mai na matamata tavera vara ha eri hitera, ²¹ teni ha pa eri vereha vara, 'Ha kilau mai, enia nahai!' teni 'Enia sevano!' matan mauri atu God mo aulu hinia mo lo toho na livuhamim."

²² Ale mo vereha isana nona tamlohi usuri mara, "Pongi matea mo lo mai ha pa marohati vara ha hite te rani hatea non Natun Tamlohi, pani ha pa sopo eri hitea. ²³ Ale tamlohi la pa vereha isamim vara, 'Ha kilau vano, enia sevano!' teni 'Ha kilau mai, enia nahai!' Pani ha sopo malue teni ha usurira. ²⁴ Matan sohena vaha mo vilasi na tavalu masapa mo vano na tavaluna, i pa sohena natu isan Natun Tamlohi na nona rani. ²⁵ Pani tiromana enia i pa lavi na rani rilangi matuvana, ale pina nike nake la pa tipahia.

²⁶ Sava mo masese na pongi non Noah i pa sohena na rani non Natun Tamlohi. ²⁷ Tuai tamlohi la lo hanhani, la lo inu, la lo lahi, ale la lo silesilera mata lahi mo tikeli rani

atu Noah mo unu na aka. Ale wai tatave mo maro ale mauri tamlohi tari la sopo juri.

²⁸ I pa sohena natu, sohen na pongi non Lot, tamlohi la lo hanhani, la lo inu, la lo volvoli, la lo afearehi, la lo lalavo ale la lo voro na ima — ²⁹ pani hin rani atu Lot mara mo malue Sodom, hapu peresi na vatu tutuni mata volkeno mo jovi na tuka sivo isara, ale enira mo isoiso la mate. ³⁰ Ale i pa sohen haratu natu na rani Natun Tamlohi i pala. ³¹ Hin rani atu, vara tea mo lo toho na jingoima, ale vara te nona hinahinau la lo toho na lolo ima, i pa sopo sivo vara i tau mamahunira, ale i pa sohena isan haratu mo lo toho na isa, i pa sopo posi vara i sivo na ima. ³² Ha to romromi naroun Lot! ³³ Sava tamlohi mo opoia vara i hase juri na maurina, i pa vaitihaia, pani sava tamlohi mo vaitihai na maurina, i pa taurilatia. ³⁴ Na vereha isamim vara, hin vutepongi atu tamlohi mo rua la pa lo juruvi na vara matea, ale la pa lavi narhi matea, matea purongo i pa lo toho atu. ³⁵ Ha'ai i rua la pa lo pete kosakosahi na piri wit jara matea, ale la pa lavi narhi matea, ale matea purongo i pa lo toho atu."

³⁶⁻³⁷ Moiso nona tamlohi usuri la usia lara, "Moli la hinu sei la pa masese epu?" Mo faramira mara, "Vara ko hite na karai la lo avu vano hin te jara, o pa levosahia vara pahai matea mo mena atu."*

18

Ha'ai Malepu Matea

¹ Ale Iesu mo vere na titileu matea isara vara i vujangira vara la pa lo usiusi tarea, ale vara romira la sopo jovi na sava la usia.

² Mo vereha mara, "Na taon tavera matea, tamlohi aria matea mo lo toho ea, mo sopo matahuni God teni vara i sile na oloolo isan te tamlohi tinapua hatea. ³ Ale ha'ai malepu matea sohena mo lo toho atu, mo lo mai tarea mo lo usia isana mara 'O sile na talai mo tataholo vara noku meresahi i lavia.' ⁴ Tiroma mo lo rohu hinia, pani hitahu mo hase vereha isana mara, 'Hina purongo vara na sopo matahuni God teni a sile na oloolo isan tea, ⁵ pani matan ha'ai malepu akerihi tarea mo lo areau mo sopo te isoisona, a pa silea na sava mo lo usia matan vara i sopo mele hotiau hinia.' "

⁶ Ale Moli mo mele vereha mara, "Ha tapurongo na sava tamlohi ari hehe atu mo lo vereha. ⁷ Ale ka rom vara God i pa sopo eri sile na sava sei nona tapuhi la lo usia isana tarea? ⁸ Na vereha isamim, enia i pa sile na talai mo tataholo vara nora meresahi la lavia i vila purongo. Hina purongo hin

* **17:36-37:** karai: farami reti hin sope jara rihirihia akerihi enia vara pongi hitahu mo mai mariviti, vara tamlohi la hite la hinu sei la pala, la pa eri hitevosahia i ruhu vara i pa sopo tuai, Natun Tamlohi (Iesu) i pa mele pala hin varama nike.

haratu, vara Natun Tamlohi i mele mai, i pa vilei te rasua na varama teni i vono?"

Pharisee Peresi Na Tamlohi Hehe Matea

⁹ Ale mo mele vere titileu akerihi isan la haratu sei la lo hase fomfomia vara enira la tataholo na nahon God, ale la lo hitelehilehi na tinapua: ¹⁰ "Tamlohi mo rua la lo toho na lolo Temple, ale la lo usiusi, matea enia Pharisee matea, ale haratu matea enia tamlohi mata lavi na mania mata takis matea. ¹¹ Pharisee atu mo turu atu mo lo hase usiusi matana hasena mara, 'God, na vere meje isam matan enau na sopo sohena tamlohi tinapua, haratu la lo ngurunguru mata mania, haratu la hehe, haratu la lo vaivaileu peresi na tinapua mo lahi moiso, teni sohen tamlohi mata lavi na mania mata takis akerihi. ¹² Enau na tapuhoro na hahani vaha rua na wik matea; tarea na lo sile na sangavulu hinau tari na lo lavira.'

¹³ Pani tamlohi mata lavi na mania mata takis atu mo turu asau, mo sopo efi tahe na matana i kilau sahe na tuka, pani mo vilivila na fumana mo vere mara, 'God, o fomopoiu, enau tamlohi hehe matea!' ¹⁴ Varafuhu na vere isamim vara tamlohi akerihi mo mele mule mo tataholo na nahon God, pani mo sopo haratu matea. Matan tamlohi tari sei la lo hase tahera, God i pa taura la sivo atano, pani haratu mo hase tau atano God i pa tahea sahe aulu."

Iesu Mo Leruhu Na Natuvarihia

(Mt 19.13–15; Mk 10.13–16)

¹⁵ Na rani matea, tama natuvarihia hai peresi na tinara la lavi na natura la mai isan Iesu vara i tau na limana hinira, ale i leruhu hinira. Pani nona tamlohi usuri la tapulo horora. ¹⁶ Pani Iesu mo tovira vara la mai isana, ale mo vere isana nona tamlohi usuri mara, "Ha tinafihi na natuvarihia la mai isaku, ha sopo horora! Matan mauri atu God mo aulu hinia enia nona tamlohi sohen la harihi. ¹⁷ Varafuhu na vere isamim, vara sava tamlohi mo sopo lavi mauri atu God mo aulu hinia sohena natirihia matea, i pa sopo efi unu hinia hin te rani."

Tamlohi Tavitav Matea

(Mt 19.16–30; Mk 10.17–31)

¹⁸ Ale na rani matea tamlohi aulu matea mo usia isana mara, "Tija ruhu, a pa vai na sava natu vara a efi lavi na mauri tui hinia?"

¹⁹ Ale Iesu mo vere isana mara, "Mata sava ko toviau ruhu? God hasena mo ruhu, mo sopo mele te tamlohi tinapua i ruhu. ²⁰ Ko levosahi na retileu, 'O sopo vaivaileu peresi na tinapua mo lahi moiso, o sopo vilimatei, o sopo vavanaho, o sopo tuetuenu na halu, o oloolo hin tamam enia tinam'." *Exo 20.12; Deut 5.16*

²¹ Ale tamlohi aulu atu mo vere mara, "La hinau tari sei na tapulo vaira na pa lo uluvou purongo."

²² Iesu mara mo rongoa, mo vere isana mara, "Hinau matea ko vejuveju hinia. O afehi vevuhi na nom hinahinau, ale o ase isana tilavono, ale hitahu tavitav na tuka i pa nom; ale o mai o usuriau!" ²³ Pani tamlohi atu mara mo rongo la hinau sei mo rongo mo sati tavera, matan enia tamlohi tavitav tavera matea.

²⁴ Iesu mara mo hitea vara mo rongo mo sati, mo vere mara, "Mo filangi hajavua vara tamlohi tavitav la unu hin mauri atu God mo aulu hinia! ²⁵ A pa vere vara mo mele malum jea vara camel matea i unu na koko niteli matea, mo jeu haratu vara tamlohi tavitav matea i unu hin mauri atu God supe hinia."

²⁶ Ale la haratu la lo rongo la reti atu lara, "Avei, vara mo sohena, sava tamlohi natu i pa efi juri?"

²⁷ Pani mo vere isara mara, "Sava tamlohi la sopo eri vaira, God i efi vaira."

²⁸ Ale Peter mara, "Ko hitea, kama tinafihi vevuhi na imamam ale kama usuriho."

²⁹ Ale Iesu mo vere isana mara, "Varafuhu na vere isamim, mo sopo te tamlohi hatea vara i tinafihi na imana, teni narouna, teni te voraina, teni tamana enia tinana, teni natuna matan mauri atu God mo aulu hinia, ³⁰ vara God i pa sopo volia nake na varama, i jeu na sava mo tinafihi moiso, ale hitahu i pa lavi na mauri tui hin pongi atu mo lo mai."

Iesu Mo Sorahi Na Nona Mateia

(Mt 20.17–19; Mk 10.32–34)

³¹ Ale Iesu mo tovi matavuhia la nona tupu sangavulu romana mo rua atu, ale mo vere isara mara, "Ka levosahia vara fa lo sahe Jerusalem. Ale hinau tari sei pfovet la ulia matan Natun Tamlohi la pa masese atu. ³² Matan la pa silea i vano na liman la haratu la tamlohi rofoha, ale la pa kerehia, la pa vai na hina mahanuhanu isana, ale la litovia. ³³ Ale la pa rupia na asi maja, moiso la pa vilimateia, ale na hatolu rani i pa mele turu."

³⁴ Pani la sopo levosahi te hinau hatea sei mo lo vere isara. La reti atu God mo jarohira isara, ale la sopo rongovosahi na sava mo lo vere.

Matavuso Matea Mo Tovi Iesu

(Mt 20.29–34; Mk 10.46–52)

³⁵ Mara mo lo mai mariviti Jericho, tamlohi matavuso matea mo lo sakele na pahisa malele, mo lo usi na tuetuenu. ³⁶ Ale mara mo rongo na roroa vao tamlohi la lo hahau na pahisana, mo usia mara sava natu. ³⁷ La vere isana lara, "Iesu mara Nazareth

mo lo hahau roto jara nike.”³⁸ Ale mo ulo aulu mara, “Iesu, natun supe David, o romopoiiau!”³⁹ Ale la haratu la lo toho na nahona, la reti isana lara i toho malum. Pani mo mele ulo aulu mo rilangi jea mara, “Natun David, o romopoiiau!”

⁴⁰ Ale Iesu mo turu mo retileu mara la lavia i mai isana. Ale mara mo mai mariviti isana, mo usia isana mara,⁴¹ “Ko opoi vara a vai na sava isam?”

Mo vereia mara, “Moli, o tinafihia vara a mele kilau.”

⁴² Ale Iesu mo vereia isana mara, “O mele kilau, nom rasua mo vaiho ko ruhu.”⁴³ Ale vahatea purongo, mo mele kilau, ale mo usuria mo lo tahe na hijan God. Ale tamlohi tari lara la hitea, enira sohena la hasohaso God.

19

Iesu Enia Zacchaeus

¹ Iesu mo unu Jericho, ale mo lo vano vara i hahau roto jara atu. ² Hin jara atu tamlohi matea hijana Zacchaeus, enia patu tamlohi matea mata lavi na mania mata takis, ale enia mo tadvav. ³ Enia mo lo vaihitea vara i hite Iesu, matan enia pejulana matea purongo, ale vao atu la lo turuhoroa. ⁴ Ale matana, mo maro mo vano tiroma mo vele aulu na pulo sycamore matea vara i eri hitea, matan i pa sopo tuai Iesu i pa hahau hin malele atu.

⁵ Ale Iesu mara mo tikeli jara atu, mo taʻa sahe, ale mo vereia isana mara, “Zacchaeus, o vila. O sevuti matan a pa toho na imam nohorihhi.”

⁶ Ale mo jurete vilavila sivo atano, ale mo avulahi tavera vara i lavia. ⁷ Ale tamlohi lara la hitea, la reti vavarihi lara, “Eh, mo lo vano vara i toho na ima tamlohi hehe matea.”

⁸ Ale Zacchaeus mo turu na naho tamlohi atu mo vereia isan Moli mara, “Ko hitea Moli, nakerihhi a pa sile na sope noku hinahinau isana tilavono. Ale vara na halu tea hin te hinai, a pa mele silea isana i aulu vaha vati!”

⁹ Ale Iesu mo vereia isana mara, “Nahapani, juri mo mai hin ima nike, matan enia sohena enia natun Abraham matea. ¹⁰ Matan Natun Tamlohi mo sinai vara i ale la haratu la jalio ale i jurira.”

Volitusi Mo Sangavulu (Mt 25.14-30)

¹¹ Tamlohi lara la lo tapurongo hin la hinai nike, ale matan Iesu mo lo mai mariviti Jerusalem, mo tapulo vere na titileu matea isara, matan la lo romromia lara mariviti vara God i turu na suihana natu,

¹² matan haratu mo vereia isara mara, “Tamlohi aulu matea mo vano na jara asau tinapua matea, vara i tauri na suiha mata supe ea, ale mara i pa mele mai. ¹³ Pani tiromana, mo tovi na nona volitusi tupu sangavulu vara la mai isana, ale mo silera na selen mo tataholo na volvoli mata rani voko mo ngavulu sangavulu

(100) isara hatehateahi, ale mo vereia isara mara, ‘Ha lavi mania akerihhi; ha vavahinau peresia i tikeli rani atu vara a mele pala.’ ¹⁴ Pani nona tamlohi la rohu hinia, moiso la rule na tamlohi hai la lo usuria vara la vere vara, ‘Kama sopo opoia vara tamlohi nike i supe hin kamam.’

¹⁵ Pani pa tamlohi aulu atu, mo vano mo tauri na suiha hin jara tinapua atu, moiso mo mele hilu mai na jarana. Ale mo tovi la nona volitusi atu, sei mo lo silera na mania matan mo opoia vara i levosahia vara la vai na sava hin mania atu mo lo silea isara. Mo opoia vara i levosahia vara la mele lavi na mania mo visa aulu hin haratu mo lo silea isara. ¹⁶ Tiromara mo mai, mo turu na nahona mo vereia mara, ‘Moli na nom mania na mele vai mo vaha sangavulu tinapua hinia.’ ¹⁷ Ale mo vereia isana mara, ‘Ko vaia mo ruhu jea, ko volitusi ruhu matea. Matan ko kilau mamahuni hinai rihirihhi sei na taua na limam; ale a pa tauho vara o pa aulu na taon tavera i sangavulu.’

¹⁸ Harua tamlohi mo mai, mo vereia mara, ‘Tamlohi tavera, na nom mania na mele vai mo vaha lima tinapua hinia.’ ¹⁹ Ale supe atu mo vereia isana mara, ‘Ale engko o pa aulu na taon tavera i lima.’

²⁰ Moiso mele volitusi tinapua matea mo mai mo vereia mara, ‘Tamlohi tavera, nom mania nahai. Na jarohi mamahunia na tavalu ruru matea vara i lo toho ruhu hinia. ²¹ Matan na matahuniho matan engko tamlohi rilangi matea. Matan ko lo lavi na hinai tamlohi tinapua mo lo taua, ale ko lo vu na isa engko ko sopo lavaoa.’

²² Supe atu mo vereia isana mara, ‘Engko volitusi lejileji sati matea! A pa ariho usuri na nom retireti. Ko levosahia moiso vara enai tamlohi rilangi matea, ale vara na lo lavi na hinai tamlohi tinapua mo lo taua, ale na lo vu na isa na sopo lavaoa. ²³ Mata sava ko sopo tau na noku mania na bank matan vara a mele mai a efi lavi noku mania sei peresi haratu bank mo lo vaia noku?’ ²⁴ Ale mo vereia isan la nona volitusi atu sei la lo turu mariviti atu mara, ‘Ha lavi nafihi na mania isana, ha silea isan haratu mo lavi mo sangavulu!’

²⁵ Pani la vereia isana lara, ‘Pani enia mo lavi mo sangavulu moiso!’

²⁶ Supe atu mo vereia mara, ‘Na vereia isamim vara tamlohi tari sei la lo tauri te hinai moiso, la pa mele silea isara i aulu

hin haratu la lo tauria tiroma. Pani isan la haratu la sopo tauri te hinau, la pa lavi nafihi na sava la lo taurira moiso. ²⁷ Pani isan la noku meresahi nike, sei la fohu vara a nora supe; ha lavira la mai nike, ale ha vilimateira na nahoku.’”

Iesu Mo Unu Jerusalem

(Mt 21.1–11; Mk 11.1–11; Jn 12.12–19)

²⁸ Ale Iesu mara mo vere la hinau atu mo isoiso, mo mele vano na malelena, mo vele mo sahe Jerusalem. ²⁹ Iesu mara mo pa lo mai mariviti na taon matan Bethphage enia Bethany hin vutivuti atu sei la tovia Vuti talu Olive, mo fule na nona tamlohi usuri mo rua la vano la tiroma hinira, ³⁰ mara, “Ha vano, ha unu hin vanua sei na nahomim, ale vara ka lo unu, ha pa hite na natu donki matea la pesia mo lo turu atu; tea mo sopo lo vele i sakele hinia hin te rani. Ha uli nafihi ale ha lavia i mai. ³¹ Vara tea mo usia vara, ‘Mata sava ka lo uli nafihi?’ Ha pa vere sohen harihi vara, ‘Moli mo opoia.’” ³² Ale la vano la tapai natu donki atu sohen Iesu mo lo vere isara. ³³ Ale la pa lo uli nafihi, tavuina mo usia isara mara, “Mata sava ka lo uli nafihi natu donki sei?” ³⁴ Ale lara, “Moli mo opoia.” ³⁵ Ale la lavia mo mai isan Iesu, ale la vufangi na nora ruru taverna na hafina, ale la vai Iesu mo sakele hinia. ³⁶ Ale mara mo lo hahau hinia mo lo vano, la pulahi na nora ruru na malele. ³⁷ Ale Iesu mara mo lo mai mariviti hin jara atu na malele mo lo tapulo sevuti na Vuti talu Olive, vao nona tamlohi usuri la tapulo lalavete, ale la lo hasohaso God na leo taverna matea, mata sava vavahinau mata suiha la hitera moiso lara, ³⁸ “Avulahi isan supe atu mo lo mai na hijan Moli. Tamata i toho na tuka ale oloolo taverna i vano isan God Aulu Jea!” ³⁹ Pani tatua Pharisee hin vao atu la vere isan Iesu lara, “Tija, o reti isana nom tamlohi usuri mata sava la lo vere.” ⁴⁰ Iesu mo faramira mara, “Varafuhu na vere isamim, vara la toho malum, la vatu nike, la pa ulo aulu!”

⁴¹ Iesu mara mo pa lo mai mariviti ale mo hite taon taverna atu Jerusalem, mo tangisia, ⁴² mara, “Tahisaku, vara o pa lo levosahi na nom rohi hin rani akerihi, o pa hite na tamata, pani nakerihi, God mo vusohi na matam moiso. ⁴³ Matan i pa sopo tuai nomim meresahi la pa voro na voʻa ralihiho, matan vara la pa piruho na jara tari.

⁴⁴ La pa viliroiroiho, engko peresi na natum vahatea na lolo ropem, la pa ase vevuhi na vatu voʻam tari matan ko sopo hitevosahi na rani God mo rohiho.”

⁴⁵ Moiso, Iesu mo unu na rope Temple, ale mo lo tapulo levuti nafihi la haratu la lo areafehi hinia, ⁴⁶ ale mo vere isara mara,

“La ulia vara, ‘Imaku enia ima mata ususi’, Isa 56.7 pani kamim ka vaia mo mai ‘jara luhu nona tamlohi vili na tamlohi mata vavanaho matea.’”

Jer 7.11

⁴⁷ Hitahun haratu, na rani hatehateahi Iesu mo lo vujangi na lolo Temple. Tamlohi aulu nona pris, tamlohi vujangi mata leu peresi na patu tamlohi tinapua hai, la aleale malele vara la vilimateia hinia, ⁴⁸ pani la sopo hite te malele matan tamlohi tari la pa lo marohati hajavua mata nona retireti.

20

Suihan Iesu Mo Tai Epu

(Mt 21.12–17; Mk 11.15–19; Jn 2.13–22)

¹ Na rani matea, Iesu mo pa lo vujangi na tamlohi na lolo Temple na retivujavujangi mata Retiruhu, ale tamlohi aulu nona pris peresi na tamlohi vujangi mata leu, peresi na vajahan Israel la mai isana, ² ale la vere isana lara, “O to vere kamam hinia, vara sava suiha nahai, ko lo vai la hinau nike hinia, teni ko lo vai la hinau nike na suihan hare?” ³ Mo faramira mara, “Enau sohena, a pa usi kamim na retiusia matea, ale ha to vere isaku vara ⁴ paptijo non John mo tai na tuka teni isana tamlohi?” ⁵ Moiso la sorasorahia isara lara, “Vara fa vere vara, ‘Mo tai na tuka!’ enia i pa vere vara ‘Mata sava ka sopo rasua?’” ⁶ Pani vara fa vere vara, ‘Isana tamlohi!’ tamlohi tari la pa parumateifa matan la rom vara John enia pfovet matea.” ⁷ Ale matana la faramia lara, “Kama sopo levosahia vara mo tai epu.”

⁸ Ale Iesu mo vere isara mara, “Vara sohena, enau sohena a pa sopo efi vere kamim hinia vara na lo vai la hinau nike na suihan hare.”

Titileu Mata Tamlohi Isa Sasati

(Mt 21.33–46; Mk 12.1–12)

⁹ Ale, Iesu mo tapulo vere na tamlohi hin titileu akerihi mara, “Tamlohi taverna matea mo lavo na isa grape matea, ale tamlohi la lo pakaia isana. Ale enia mo vano na jara tinapua mo toho mo peravu ea. ¹⁰ Na rani asitauni mo mai, mo fule na nona volitusi matea mo vano vara i lavi te vua asitauni isara. Pani la tamlohi atu la tamajia, ale la fulea mo vano lekoleko. ¹¹ Ale tamlohi taverna atu mo mele fule na volitusi tinapua matea, pani la mele tamajia la vaileljeja, ale la mele fulea mo vano lekoleko. ¹² Ale tamlohi taverna atu, mo mele fule na hatolura. Enia sohena la vili kitkitia, ale la tipahia. ¹³ Pa tamlohi taverna matan isa grape atu mara, ‘A pa vai na sava natu? Na levosahia, a pa fule natuku fuhufuhu nike; korong la pa oloolo hinia.’” ¹⁴ Pani la tamlohi atu lara la hitea la hase vere isara lara, ‘Avei korong natuna nahai, fa

vilimateia matan koruna i pa nofa.’¹⁵ Ale la pulahi narihia hin isa atu ale la vilimateia.” Ale Iesu mo usira mara, “Ka levosahia vara tamlohi tavera matan isa grape atu i pa vai na sava isan la tamlohi atu?”¹⁶ I pa mai i vaikomokomora, ale i mele sile isa grape sei isan te tamlohi tinapua.” La tamlohi tavera atu lara la rongo la reti atu lara, “I pa sopo sohen haratu!”

¹⁷ Pani Iesu mo kilau vano tataholo isara mo vereea mara, “Vara mo vono, faramin reti sei la ulia tuai enia sava lara, ‘Vatu atu, tamlohi voro na ima la tipahia mo mai pulo vatu atu mata ima?’ *Psa 118.22*

¹⁸ Tamlohi tari vara la tialahalaha hin vatu atu, vatu atu i pa putputira, ale vara i jovi hin tea i pa lomolomoa.”

¹⁹ Tamlohi vujangi mata leu peresi na tamlohi aulu nona pris la aleale malele vara la taurilatia hin rani atu purongo, matan la rongovosahia vara Iesu mo lo vereea titileu atu matara, pani la matahuni na tamlohi.

Iesu Mo Voli Na Takis
(*Mt 22.15–22; Mk 12.13–17*)

²⁰ Moiso la lo kilau fofohia, ale la rule hai vara la usuri fofohia la lo tiasia vara i vere te hinai la eri taurilatia matana, ale la eri taua na lima tamlohi aulu matan Rome matana.²¹ Matan haratu, la usia lara, “Tija, kama levosahia vara nom reti peresi na nom vujangi la tataholo, ale ko sopo tametame tea, pani tarea ko lo vujangi na malele varafuhu non God.²² Kama opoia vara kama usiho na retusia matea. Mo tataholo vara kama sile na takis isan Supe nona mara Rome teni mo vono?”²³ Pani Iesu mo levosahi na nora halu, ale mo vereea isara mara,²⁴ “Ha vujangiau hin te selen hatea mata takis. Niniun hare nakerihi, ale sava uliuli nahai hinia?” Lara, “Non Supe nona mara Rome.”²⁵ Iesu mo vereea isara, “Vara sohena, ha sile Supe nona mara Rome na sava enia nona, ale isan God na sava enia non God.”²⁶ Ale la tamlohi atu la sopo eri pisuhia hin te hinai mo lo vereea na naho tamlohi, pani la mafurahi tavera na nona rarami reti, ale la lo turu tapanono.

Sauteterahi Na Mateia
(*Mt 22.23–33; Mk 12.18–27*)

²⁷ Sadducee hai la mai isana, enira vao matea la sopo rasua vara God i pa sauteterahi na tamlohi,²⁸ ale la usi na retusia matea isana lara, “Tija, Moses mo ulia mara vara vorai tamlohi matea mo mate, enia narouna matea pani mo sopo te natuna, tamlohi atu i pa lavi na malepun voraina ale i pa tape te natun voraina.²⁹ Ale na rani matea, vorai mo limaravrua la lo toho. Vora tiroma mo lavi na narouna matea, ale mo mate mo sopo te natuna.³⁰ Ale vora

usuria mo pete lavia,³¹ moiso hatolura mo mele lavia, ale la tupu limaravrua atu la mate enira mo isoiso, pani la sopo tape te natuvarihia.³² Hitahuna hafai atu mo mate.³³ Hin rani atu vara God i sauteterahi na tamlohi, hafai atu i pa naroun hare? O to vereea isamam, matan enira tupu limaravrua la lahi hinia!”

³⁴ Ale Iesu mo vereea isara mara, “Nake na varama, tamlohi la lo lahi, ale la lo sile na hafai mata lahi,³⁵ pani la haratu God mo hitea vara la tataholo mata turu na sauteterahi na mateia mata unu hin pongi atu mo lo mai, enira la pa sopo lahi teni tea i pa sopo silera mata lahi,³⁶ matan la pa sopo eri mele mate hin te rani matan enira la pa sohena angelo, la natun God matan enira la natun sauteterahi atu.³⁷ Pani usuri romfomi atu sei vara tamlohi la pa mele turu na mateia teni mo vono, Moses sohena mo ulia na Retiulia, sei mo vereea hin rani atu God mo retireti isana hin vipahai atu mo lo pepe, Moses mo tovi Moli God mara, ‘God non Abraham, God non Isaac ale God non Jacob’.³⁸ *Exo 3.6*

³⁸ God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri.”

³⁹ Moiso tatua tamlohi vujangi mata leu la raramia lara, “Tija, ko vereea ko varafuhu.”⁴⁰ Mo sopo te vonara hatea i mele opoia vara i usia hin te retusia hatea.

Kristo Enia Natun Hare
(*Mt 22.41–46; Mk 12.35–37*)

⁴¹ Pani Iesu mo mele vereea isara mara, “Mo sohena sava natu la pa vereea vara Kristo enia natun supe David?”⁴² Matan David hasena mo vereea na puku non psalms mara,

‘Moli God mo vereea isan noku Moli mara:

O sakele na matuaku,⁴³ vavano a vai na nom meresahi la mai la toho na ruhuruhu palom.’ *Psa 110.1*

⁴⁴ David mo tovia Moli, sohena sava natu enia mo pa natuna?”

⁴⁵ Ale na peron vao atu la lo tapurongo mo vereea isana nona tamlohi usuri mara,⁴⁶ “Ha lo kilau mata tamlohi vujangi mata leu, sei la lo opoia vara la lo hahau ralihi peresi na ruru peravu mata haphahapa, ale la opoia vara la lo lavi na retioloolo na naho tamlohi na jara maket, ale la opoi na jara sakele la taura mata tamlohi aulu na ima lotu, ale la opoia vara la lo sakele na jara sakele nona tamlohi sei la tovara mata mai na hanhani tavera,⁴⁷ ale ha lo kilau mata nora halu sei la lo lavi narihi na hinahinai tari nona hafai malepu hinia, ale la lo tavuhoro na nora vavahinai na ususi peravu. La pa lavi na talai tavera i jeu na tinapua.”

21

Silesilea Nona Malepu Matea (Mk 12.41–44)

¹ Iesu mo kilau vano mo hite na tamlohi tavitav, la lo tau na nora silesilea na jara silesilea na lolo Temple. ² Ale mo hite na haʻai malepu tilavono matea, mo tau na selen mo rua. ³ Ale mo vereea mara, “Varafuhu na vereea isamim, haʻai malepu tilavono nike mo taua mo jeu na tamlohi tavitav mo isoiso. ⁴ Matan sava la silea mo malue na nora tavitav tavera, pani sava enia mo silea, mo malue na nona tilavono, mo tau vevuhi na sava sei vara i pa efi tueni na maurina.”

Temple I Pa Maroe (Mt 24.1–2; Mk 13.1–2)

⁵ Ale, la pa lo vereveea vara Temple atu mo ruhu sohena sava, ale sohena sava la tau mamahuni na vatu ruhuʻuruhi hini, ale sohena sava tamlohi hai la sile na silesilea ruhuʻuruhi mata lakolako hini, ale Iesu mo vereea isara mara, ⁶ “La hinai sei ka lo hitera, pongi matea mo lo mai vara i pa sopo mele te vatu hatea, i lo sakele aulu na vatu tinapua sei matan la pa atu jovjovira.”

Rani Rilangi La Pa Mai (Mt 24.3–14; Mk 13.3–13)

⁷ Ale la usia isana lara, “Tija, pangisa natu la hinai sei la pa masese, ale sava mata-mata natu i pa vujangia vara mariviti natu vara la hinai atu la pa masese?” ⁸ Ale mo vereea mara, “Ha sopo tinarihia vara tea i tikauleji kamim! Matan tamlohi matuvana la pa mai na hijaku lara, ‘Enau natu, Kʻristo!’ ale ‘Nake natu nona rani pala mo lo mai mariviti!’ Pani ha sopo usurira! ⁹ Ale vara ka rongo vara jara tavera la lo vai na vuro, ale vara la lo vuro na lolo jarara hasera, ha sopo matahu matan la hinai atu, la pa masese tiroma, ale pongi hitahu, i pa sopo mai vahatea.”

¹⁰ Iesu mo mele vereea isara mara, “Mara jara tavera tinatinapu la pa meresahi hinira, ale supe matea i pa meresahi na supe tinapua. ¹¹ Mihi tavera la pa hisu na jara tinatinapua, ale marua peresi na rojoa tavera la pa vili na jara tinatinapua. Ale ha pa hite na hinai matahu tavera peresi na matamata tavera aulu na masapa. ¹² Pani tiroma, hin la hinai nike, tamlohi la pa taurilati kamim, ale la pa tipahi kamim, la pa sile kamim isan la haratu la lo kilau na ima lotu peresi na ima rilangi, ale la pa lavi kamim la turuhi kamim na naho supe peresi na patu tamlohi, matan ka lo lavi na hijaku. ¹³ Enia masapa matea vara ha pa efi vereuliau na naho tamlohi. ¹⁴ Ha lo levosahia nake vara, ha sopo matahu vara ha pa ʻaramira sohena sava, ¹⁵ matan enau a pa sile kamim na reti tataholo, vara ha

pa verera isana nomim meresahi, ale la pa sopo efi ʻaramira teni la efi vereea vara ka lo halu. ¹⁶ Tamamim peresi na tinamim, voraimim, tahisamim peresi na tapalamim, enira sohena, la pa tau te vonamim vara la pa vilimateira. ¹⁷ Tamlohi tari la pa rohu hin kamim mata hijaku. ¹⁸ Pani te vulumim hatea na patumim i pa sopo efi tihai purongo. ¹⁹ Mauri tui i pa nomim mata nomim turu rilangi.

Jerusalem I Pa Jovi Na Lima Tamlohi Roʻoaha

(Mt 24.15–21; Mk 13.14–19)

²⁰ Pani vara ka hite na tamlohi vuro la ralihi Jerusalem, ka levosahia vara nona pongi maroi mo pala natu. ²¹ Ale la haratu la lo toho Judea, la pa rovo la sahe na vutivuti, ale la haratu la lo toho na lolon taon tavera atu la malue, ale ha pa horo la haratu la lo toho ralihi taon tavera atu vara la sopo unu hini, ²² matan harihi, enira rani mata talai tavera matan vara sava la ulira moiso la pa masese. ²³ I pa mele sati jea isana haʻai sei la epe puhoni, teni la haratu la pa lo susui na natura. Matan rani sasati tavera na varama peresi na lolokoru tavera non God mata hehe, i pa jovi isan la tamlohi nike.

Natun Tamlohi Mo Mele Mai

²⁴ La pa vilimateira na sita vuro, ale la pa tiroma hinira sohena slev la vano na jara tinatinapua na varama. Ale la haratu la tamlohi roʻoaha, la pa varasi Jerusalem i tikeli isoiso rani atu sei God mo taua na limara moiso.

Hin Rani Atu Iesu I Pa Mele Pala (Mt 24.29–31; Mk 13.24–27)

²⁵ Ale matamata la pa pala na alo, na vitu peresi na vitusarasara. Ale na varama, tamlohi na jara tinatinapua la pa romkaka tavera mata roroa tasi peresi na loloputuna. ²⁶ Tamlohi la pa matemate mata nora matahu peresi na sava la levosahia vara la pa masese usuri na hinai la pa mai na varama, matan suiha la lo tauri na tuka peresi na masapa la pa malue na jarara. ²⁷ Moiso natu tamlohi tari la pa hite Natun Tamlohi i pala na telangi na suihana peresi na merana tavera. ²⁸ Ale vara la hinai atu la lo lavi na jara, ha turu tataholo ha tara sahe aulu matan nomim jujuri mo lo mai mariviti.”

Titileu Matea Mata Vipahai Fig (Mt 24.32–35; Mk 13.28–31)

²⁹ Moiso, Iesu mo verera na titileu matea mara, “Ha kilau usuri na pulo fig peresi na pulo pahai tari tinatinapua, ³⁰ vara la tapulo sohai na perera ka hitevosahia vara taro alo mo lo mai mariviti moiso. ³¹ Ale mo sohena purongo, vara ka hite la hinai sei la lo mai, ka levosahia vara mauri atu God mo aulu

hinia, mo lo mai mariviti. ³² Varaʻuhu na vereea isamim vara pina nike i pa sopo lo tihai vevuhi vavano hinau tari la masese. ³³ Tuka peresi varama la pa tihai, pani noku retireti la pa sopo eʻi tihai.

³⁴ Pani ha lo kilau! Mo sopo fuhu vara a tapai kamim ka lo toho purongo, teni ka lo drong, teni nomim fomkaka la lo taurilati kamim. Ha sopo tinafihia vara pongi atu i pala isamim i saʻumahi kamim. ³⁵ Matan i pa saʻumahi na tamlohi tari la lo toho na varama. ³⁶ Pani tarea ha lo kilau, ha lo usiisi vara ha pa eʻi jelu hin la hinau tari sei la pa masese, ale ha pa eʻi turu na nahon Natun Tamlohi.”

³⁷ Rani tarea, Iesu mo lo vano mo lo vujangi na lolo Temple; moiso na ravravi mo lo hilu mo lo sahe na Vuti talu Olive, ale mo lo toho ea na vutepongi. ³⁸ Ale na falavuhu jea, tamlohi tari la lo mai isana na Temple vara la tapurongo isana.

22

Judas Mo Turuposi Hin Iesu

(Mt 26.1–5, 14, 16; Mk 14.1–2, 10–11; Jn 11.45–53)

¹ Hanhani tavera mata pereti atu mo sopo te isi hinia mo lo mai, haratu la tovia Passover. ² Ale tamlohi aulu nona pʻris peresi na tamlohi vujangi mata leu, la lo aleale malele vara la pa vilimatei Iesu hinia, matan la matahu vara la vaia na naho tamlohi.

³ Ale Setan mo sohoni Judas Iscariot, vonara matea hin la tupu sangavulu romana mo rua atu. ⁴ Mo malue mo vano mo sorasora peresi na tamlohi aulu nona pʻris peresi na patu police mata Temple. Matan la pa vereea vara i pa turuposi hinia sohena sava matan vara i pa taua na limara. ⁵ Ale la avulahi, la hatihia vara la pa sile te mania isana. ⁶ Ale matana mo majinga hinia, moiso mo aleale masapa vara i pa turuposi hinia, vara i eʻi taua na limara hin te jara, mo sopo te vao tamlohi hinia.

Isoiso Hanhani Non Iesu

(Mt 26.17–25; Mk 14.12–21; Jn 13.21–30)

⁷ Moiso rani mata pereti sei mo sopo te isi hinia mo pala, enia rani atu la lo sile na natu sipsip mata Passover sohena malamalai isan God. ⁸ Matana, Iesu mo rule Peter enia John mara, “Ha vano ha tatamahu mata noʻa hanhani mata Passover vara fa eʻi hania.”

⁹ La usia isana lara, “Ko opoia vara kama pa tatamahunia epu?”

¹⁰ Mo vereea isara mara, “Ha tapurongo, vara ka lo unu na taon tavera, ha pa tapai na tamlohi matea mo lo utu na jara wai tavera matea. Ha usuria ha unu hin ima atu enia mo unu hinia, ¹¹ ale ha vereea

isan tamlohi tavera mata ima atu vara, “Tija mo vereea isam mara, “Nene jara mata matavuhi na imam sei vara a eʻi hani na hanhani mata Passover peresi na noku tamlohi usuri ea?” ¹² Ale i pa vujangi kamim na jara tavera matea aulu na imana sei mo tatamahunia moiso, ha tatamahu atu.” ¹³ Ale la malue la vano la hitea mo tataholo sohen mo vereea isara, ale la tatamahu mata Passover atu.

Hanhani Mata Passover Atu

(Mt 26.26–30; Mk 14.22–26; 1Co 11.23–25)

¹⁴ Ale aoa matan hanhani atu mo tataholo, Iesu mo sakele na jara hanhani na tep moiso, ale nona vahaʻule la lo toho peresia. ¹⁵ Ale mo vereea isara mara, “Na opoia mo tavera jea vara a hani Passover nike peresi kamim, moiso a pa lavi na rongohaji tavera. ¹⁶ Matan na vereea isamim, vara a pa sopo mele hania vavano i tikeli rani atu hinau tari la masese hin mauri atu God mo aulu hinia.” ¹⁷ Ale mo lavi na paniken matea ale mara mo vere meje moiso mo vereea mara, “Ha lavia, ha aseaa isamim ha inua. ¹⁸ Matan na vereea isamim, vara a pa sopo mele inu waen akერიhi vavano i tikeli rani atu, mauri atu God mo aulu hinia i mai.”

¹⁹ Moiso, mo lavi na pereti, ale mara mo vere meje moiso, mo topetopea mo silea isara mara, “Harihi enia epeku sei na silea matamim. Ha lo vaia sohena mata romfomiau hinia.” ²⁰ Ale lara la hanhani moiso, mo mele vaia sohena hin paniken waen atu mara, “Paniken nike, na lo sureia matamim, enia retitauhi paro sei na lo vaia na faeku.

²¹ Pani ha tapurongo, haratu sei i pa turuposi hinia, mo lo sahara na hanhani na tep peresiau nakerihi. ²² Matan Natun Tamlohi i pa vano i usuri na masalon God, pani rani sasati isan haratu sei mo turuposi hinia.”

²³ Moiso, enira mo isoiso la tapulo usiisi isara hatehateahi vara sava tamlohi isara natu i pa vai hinau atu.

²⁴ Pani mo sopo tuai, vauriuri matea mo malue isara vara hare natu enia i pa aulu hin mauri atu God mo aulu hinia. ²⁵ Ale Iesu mo vereea isara mara, “Hin varama nike supe nona tamlohi foʻoaha la aulu na nora tamlohi peresi la haratu suiha mo lo toho na limara, ale la lo retileu isara tarea vara la vai na masalora, pani hina purongo vara la lo toho na ruhuruhura, la lo tovera lara ‘Tuetueni nona tamlohi’.” ²⁶ Pani i pa sopo sohena isamim: haratu enia mo opoia vara i aulu i jeu na tinapua, i pa hase taua atano sohena vora hitahu matea, ale haratu mo opoia vara i tiroma na tamlohi, i pa mai i lo volitusi. ²⁷ Hare natu enia tamlohi tavera? Haratu mo sakele na tep teni haratu mo

volitusi isana? Enia haratu mo sakele na tep. Pani enau na lo mai isamim sohena volitusi matea.

²⁸ Kamim natu, ka lo toho peresiau na noku rani rilangi. ²⁹ Matan haratu, na lo silea isamim sohena Tamaku mo silea isaku vara, ha pa aulu sohena supe, ³⁰ matan vara ha pa hanhani ale ha inu na noku tep na rani vara na lo tauri na suiha, ale ha pa sakele na jara sakele nona supe mata ari la tavitavi tupu sangavulu romana mo rua atu non Israel.

Rani Vaihite La Pa Mai

(Mt 26.31–35; Mk 14.27–31; Jn 13.36–38)

³¹ Simon, Simon, o lo levosahia vara Setan mo usia rilangi vara i pa laviho matan vara i hutehutehiho sohena tamlohi mo lo asehi na piri wit, ³² pani na usiisi moiso matam matan vara non rasua i pa sopo jovi, ale hin rani atu sei ko mele posi, o pa tueni na voraim vara la turu rilangi.”

³³ Peter mo vereia isana mara, “Moli, enau na tatamahu vara a vano peresihoni na ima rilangi, teni a mate matam.”

³⁴ Iesu mo vereia mara, “Varafuhu na vereia isam Peter, toa i sopo lo tarere nohorihoni vavano, i tikeli rani atu ko vuvununia vaha tolu vara ko sopo levosahia.”

³⁵ Ale Iesu mo vereia isara mara, “Hin rani atu sei na rule kamim ka vano ka sopo lavi te tanga korohi teni te tanga, teni te sabat — ka vejuveju hin te hinau teni mo vono?”

Lara, “Mo vono.”

³⁶ Mo vereia isara mara, “Pani nake natu, haratu vara te nona tanga korohi teni te tanga i pa lavia. Ale haratu mo sopo lo te nona sita vuro, i pa afehi na nona ruru hamariri, ale i voli te hatea. ³⁷ Matan na vereia isamim vara Retitapu niki i pa masehe hinia sei mo vara, ‘La evia peresi la haratu la lo tope na leu’. Matan sava la ulia matakuni i pa masehe.”

³⁸ Ale la vereia lara, “Eh Moli, sita vuro mo rua nahai moiso!”

Ale mo vereia mara, “Mo isoiso natu.”

Iesu Mo Usiisi

(Mt 26.36–46; Mk 14.32–42)

³⁹ Ale mo malue hin ima atu mo mele vano na Vuti talu Olive sohoni mo lo vaia tarea, ale nona tamlohi usuri la usuria. ⁴⁰ Ale mara mo kakau jara atu mo vereia isara mara, “Ha usiisi matan vara ha pa sopo jovi na vaihite.” ⁴¹ Ale mo hahau vano makomona, mo papaohi atano, ale mo usiisi ⁴² mara, “Tata, vara ko opoia, o efi lavi narihi na noku rani rilangi nakerihi, pani o sopo vai na masaloku, pani o vai na masalom purongo.” ⁴³ Ale angelo matea mo pala isana mo tuenia vara i mele rilangi. ⁴⁴ Ale na nona rom savi tavera mo usiisi mo mele rilangi jea; ale masmasuna mo

hoi peresi na fae mo tuturu sivo na lepa. ⁴⁵ Ale mo mele turu na nona usiisi mo mai isana nona tamlohi usuri, mo hitera la juruvi romaliho, matan la malokoloko tavera, matan romira mo savi na sava i pa masehe, ⁴⁶ ale mo vereia isara mara, “Ka lo juruvi mata sava? Ha turu, ha usiisi matan vara ha pa sopo jovi na vaihite.”

La Taurilati Iesu

(Mt 26.47–56; Mk 14.43–50; Jn 18.3–11)

⁴⁷ Ale Iesu mo pa lo retireti, vao tavera matea mo pala, ale pa tamlohi atu sei la tovia Judas, enia vonara matea hin la tupu sangavulu romana mo rua atu, mo lo tiroma hin vao atu, mo mai mariviti isan Iesu vara i pungosia, ⁴⁸ pani Iesu mo vereia isana mara, “Judas, o pa turuposi hin Natun Tamlohi na pungosi matea?” ⁴⁹ Ale la haratu la lo toho falihia, lara la hitevosahi na sava i pa masehe lara, “Avei Moli, fa taira na sita vuro teni mo vono?” ⁵⁰ Ale vonara matea mo langa narihi na peron volitusi non pris aulu. ⁵¹ Pani Iesu mara, “Ha isoiso!” ale mo tikeli na perona, ale mo mele sofoa vano na patuna. ⁵² Moiso, Iesu mo vereia isana tamlohi aulu nona pris peresi na police mata Temple, peresi na vajahara sei la mai matana mara, “Ka mai peresi na sita vuro peresi na maja sohoni ka lo vano mata taurilati na tamlohi vili na tamlohi mata vavanaho matea? ⁵³ Tarea na lo toho peresi kamim na lolo Temple pani ka sopo taurilatiau. Pani nakerihi enia nomim rani peresi na rani non suiha romo.”

Peter Mo Vuvununi Iesu

(Mt 26.57–58, 67–75; Mk 14.53–54, 66–72; Jn 18.12–18, 25–27)

⁵⁴ Moiso la taurilatiau, la tiroma hinia la malue la vano na iman pris aulu, ale Peter mo lo usurira asau makomona. ⁵⁵ Ale lara la vai na hapu matea na livuha jara na lolon rope ima atu moiso, la sakele falihia ale Peter mo vano mo sakele peresira. ⁵⁶ Moiso, volitusi hafarihi matea mara mo hite Peter mo lo sakele atu, mo mele kilau mamahunia mara, “Tamlohi niki sohena, mo lo toho peresi Iesu.” ⁵⁷ Pani Peter mo vuvununia mara, “Ha’fai, na sopo levosahia.” ⁵⁸ Ale moiso, tamlohi tinapua matea mo hitea mo mele vereia mara, “Engko vonara matea.” Pani Peter mo vereia mara, “Tapala, enau mo vono.” ⁵⁹ Ale korong mele aoa matea mo vano moiso, tamlohi tinapua matea mo mele vereia mara, “Varafuhu sei, tamlohi niki enia mo lo toho peresia, matan enia mara Galilee matea.” ⁶⁰ Pani Peter mara, “Tapala, na sopo levosahi na sava ko lo vereia.” Ale mo pa lo vereia toa mo tarere. ⁶¹ Ale Moli mo posi mo kilau vano isan Peter, ale Peter mo mele romfomi na sava Moli mo vereia isana mara, “Toa i sopo lo

tarere, o pa vunvuniau vaha tolu.” ⁶² Ale mo malue mo sahe na jingoima mo tangi huruhuru.

⁶³ Ale la haratu la lo taurilati Iesu la tama-jia, ale la lo kerehia. ⁶⁴ La pesihoro na matana ale la lo usia hinia lara, “O to retimangovi! Hare natu mo tutuiho?” ⁶⁵ Ale la mele vere na hinau sati tinapua matuvana isana, ale la lo kalia.

Iesu Mo Turu Na Naho Pulutahi Tavera
(Mt 26.59–66; Mk 14.55–64; Jn 18.19–24)

⁶⁶ Mara mo rani sahe, matavuhi nona vajahara la pulutahi peresi na tamlohi aulu nona pris peresi na tamlohi vujangi mata leu. Ale la haratu la lo taurilatia la tiroma hinia mo vano isan nora matavuhi atu, ale la vereia isana lara, ⁶⁷ “Vara engko natu, Kristo atu, o vereia isamam!” Pani mo vereia isara mara, “Vara a vereia isamim, ha pa sopo rasua, ⁶⁸ ale vara a usi kamim hin te retiusia, ha pa sopo faramiau. ⁶⁹ Pani mo tapulo nake natu, Natun Tamlohi i pa sakele na tavalu suihan God.” *Psa 110.1*

⁷⁰ Ale matana, enira mo isoiso lara, “Engko natun God teni mo vono?” Moiso mo vereia isara mara, “Ka pete vereia moiso, enau natu.” ⁷¹ Moiso, la vereia lara, “Ra pa mele opoi na sava vereulia tinapua! Ra rongoa mo pete hase vereia moiso vara enia Natun God.”

23

Iesu Mo Turu Na Nahon Pilate
(Mt 27.1–2, 11–14; Mk 15.1–5; Jn 18.28–38)

¹ Pilate enira mo isoiso la turu, ale la lavi Iesu mo vano isan Pilate. ² La tapulo tuvaia lara, “Kama hite tamlohi nike mo lo tikauleji na nomam tamlohi, ale mo lo horo kamam vara kama sopo sile te takis isan supe matan Rome, ale enia mo lo vereia vara enia natu, Kristo, supe atu sei i pa mai.” ³ Ale Pilate mo usia isana mara, “Engko Supe nona Jew?” Ale mo faramia mara, “Engko ko vereia moiso.” ⁴ Moiso Pilate mo vereia isana tamlohi aulu nona pris peresi vao tavera atu mara, “Na sopo vilei te hehe hin tamlohi nike.” ⁵ Pani la vereia toho hinia mo filangi lara, “Enia mo vai na tamlohi la lo usuri na romina, mo vujangira na jara tari Judea mo tapulo Galilee mo sinai mo kau nike.”

⁶ Pilate mara mo rongoa sohena, mo usia mara enia mara Galilee matea teni. ⁷ Ale Pilate mara mo levosahia vara Iesu mo tai na jara Galilee mo lo toho na ruhuruhun Herod, mo rulea mo vano isana matan mo lo toho Jerusalem hin rani atu. ⁸ Na rani Herod mara mo hite Iesu, mo avulahi tavera matan tuai moiso, mo opoia vara i hitea matan mo lo rongoa na sorasarahina,

ale mo lo romtau vara i pa hite Iesu i vai te matamata. ⁹ Ale mo usia na retiusia mo usia mo tuai, pani Iesu mo sopo faramira. ¹⁰ Tamlohi aulu nona pris peresi na tamlohi vujangi mata leu la lo turu na pahisana, la lo tuvaia mo filangi. ¹¹ Ale Herod peresi na nona tamlohi vuro, la vaisatihia na nora retireti, ale la kerehia. Moiso la rua na ruru rufuhuru, la rulea mo mele vano isan Pilate. ¹² Hin rani atu purongo, Herod mo tapala peresi Pilate. Pani tiroma enira tupra rua la meresahi.

La Taua Vara I Pa Mate

(Mt 27.15–26; Mk 15.6–15; Jn 18.39–19.16)

¹³ Moiso Pilate mo tovi matavuhi na tamlohi aulu nona pris peresi na tamlohi aulu non Israel peresi na tamlohi, ¹⁴ ale mo vereia isara mara, “Ka lavi tamlohi nike mo mai isaku, ale ka vereia vara enia mo lo tikauleji na tamlohi. Ale nara na kilau usuri na sava ka lo vereia matana moiso, ale ha levosahia vara na sopo vileia vara tamlohi nike mo ori hin te hinau hatea sei ka lo tuvaia hinia. ¹⁵ Herod sohena, mo sopo vilei te hinau, matan enia mo mele rulea mai isafa. Ka hitea, mo sopo vai te hinau vara i pa mate matana. ¹⁶ Matana, a pa sile na talai matea isana, moiso a pa tinarihia vara i vano.”

^{17–18} Pani la ulo enira mo isoiso vahatea lara, “O vilimatei tamlohi sei! Ale o sile Barabbas isamam!”

¹⁹ Barabbas enia tamlohi matea la pulahia na ima filangi matan mo lo tiroma na tamlohi mata valum hin taon tavera atu, ale matan mo lo vilimatei na tamlohi. ²⁰ Pilate mo mele sile na retireti isara matan mo opoia vara i tinarihi Iesu, ²¹ pani la lo ulu toho lara, “Ha vosaea na talopeilopei! Ha vosaea na talopeilopei!” ²² Ale Pilate mo mele sile na nona hatolu reti isara mara, “Mata sava? Mo vai na sava mo sati? Enau na sopo vilei te hinau vara i pa mate matana. Ale matana, a pa sile na talai matea isana moiso a tinarihia vara i vano.” ²³ Pani la lo ulu toho isana la lo usia lara la vosaea na talopeilopei. Ale nora reti mo vili na reti non Pilate. ²⁴ Matana, Pilate mo tinarihia vara sava la usia i pa sohena. ²⁵ Matan la usia, mo tinarihi pa tamlohi atu sei mo lo taua na ima filangi matan mo lo tiroma na tamlohi mata valum, ale matan enia mo lo vilimatei na tamlohi, pani mo sile Iesu vara i vano na masalora.

La Vosae Iesu Na Talopeilopei

(Mt 27.31–44; Mk 15.21–32; Jn 19.17–27)

²⁶ Ale la pa lo tiroma hinia mo lo malue, la taurilati na tamlohi matea hijana Simon mara Cyrene, enia mo tai asau fove na jara vutivuti, ale la tau na talopeilopei isana matan vara i solotia, ale mo usuri Iesu.

²⁷ Ale vao tavera jea nona tamlohi peresi na hafai la lo tangisia, la lo tangtangi, ale la lo usuria. ²⁸ Pani Iesu mo vereea isara mara, “La venatun Jerusalem, ha sopo tangisiau, pani ha tangisi kamim hasemim peresi na natumim. ²⁹ Matan ha lo levosahia vara rani matea mo lo mai sei la pa vereea vara, ‘Avulahi isana hafai aroaro, ale isan haratu la sopo tatape, ale isan la haratu la sopo lo vasusu hin te rani.’ ³⁰ Hin rani atu, ‘Tamlohi la pa tangi isana vutivutilara — ha jovjovi isamam! Ale isana pesapesa la pa vereea lara — ha tavuni kamam!’

Hos 10.8

³¹ Matan vara, vara la vai la hinau nike na rani ruhu sei vipahai la lo ulua mo ruhu, i pa sohena sava hin rani atu mo koru?”

³² Tamlohi tinapua mo rua sei la tamlohi sasati, la tiromara la vano matan vara la pa vilimateira peresi Iesu. ³³ Ale lara la kakau jara atu sei la tovia ‘Sui Patu Tamlohi’ la vosaea hin jara atu na talopeilopei peresi la tamlohi sasati atu, matea na matuana, ale matea na marauna.

³⁴ Ale Iesu mara, “Tata, o romira matan la sopo levosahi na sava la lo vaia!” Ale tamlohi vuro atu la vai na roro matea mata hitea vara hare natu i pa lavi te nona ruru. *Psa 22.18*

³⁵ Tamlohi la lo turu atu, la lo kilaua, pani tamlohi aulu natu la lo kerehia lara, “Enia mo juri na tinapua! I to hase juria vara enia natu, Kristo non God, hara sei God mo vifonia!” ³⁶ Tamlohi vuro atu sohena la lo kerehia, la mai isana la sile na waen hohona isana vara i inua, ³⁷ ale lara, “Vara engko Supe nona Jew, o hase juriho!” ³⁸ La uli na uliuli matea la taua aulu hinia, mo vereea vara,

Harihi Enia Supe Nona Jew

³⁹ Vonara matea hin la tamlohi sasati mo rua atu, la lo sevu na pahisana, mo kerehi Iesu mara, “Engko Kristo atu teni mo vono? O hase juriho, ale o juri kamam!” ⁴⁰ Pani tamlohi sasati tinapua atu matea mo merusahia mara, “Eh, ko sopo matahuni God? Ko sopo levosahia vara enfa ra lo toho na ruhuruhu talai nike peresia?” ⁴¹ Enfa mo tataholo vara ra lavia, matan enfa ra lavi na volvoli tataholo mata nofa vavahinau, pani tamlohi nike mo sopo vai te hina sati.” ⁴² Ale mo vereea isan Iesu mara, “Iesu, o lo romromiaiu hin rani atu vara ko tauri na nom suiha mata supe.” ⁴³ Ale Iesu mo vereea isana mara, “Varafuhu, na vereea isam, engko o pa toho peresiau hin jara avulahi atu Paradise nohorih.”

Iesu Mo Mate

(Mt 27.45–56; Mk 15.33–41; Jn 19.28–30)

⁴⁴ Matan alo mo sangavulu romana mo rua na rani tavera, ale rofoha tavera mo tahavuni jara tavera atu mo tikeli na matan alo mo tolu na ravravi ⁴⁵ matan mera alo mo tihai. Ale ruru tavera atu mo lo horo na jara tapu mo tapu jea na lolo Temple, mo mafari mo rua. ⁴⁶ Moiso Iesu mo ulo aulu mara, “Tata, na tau na mauriku na limam!” Mara mo vereea moiso maromaronana mo isoiso. ⁴⁷ Ale captain mata tamlohi vuro mara mo hite la hinau sei la lo masese, mo hasohaso God mo vereea mara, “Varafuhu. Tamlohi nike mo sopo vai te hina sati hatea.” ⁴⁸ Ale vao tamlohi tari atu sei la lo pulutahi mata hite hinau akerihi, lara la hite la hinau sei la masese, la mule peresi na tangtangi tavera. ⁴⁹ Ale tapalana tari, peresi la hafai atu sei la tapulo usuria Galilee, la lo turu asau makomona, la lo kilau la hinau akerihi.

La Tavuni Na Tarapen Iesu

(Mt 27.45–56; Mk 15.33–41; Jn 19.28–30)

⁵⁰ Ale tamlohi matea hijana Joseph mo lo toho atu, mo tai na taon nona Jew la tovia Arimathea. Enia vonara matea na lolo council tavera non Israel, pani enia tamlohi ruhu matea posina mo tataholo, ⁵¹ ale enia mo sopo avulahi na sava la hatihia teni na sava la vaira, enia mo tai Arimathea na jaran Judea, ale enia mo lo kilau matan rani atu God i pa tauri na suiha hinia. ⁵² Tamlohi atu mo vano vara i hite Pilate matan vara i usi na tarapen Iesu. ⁵³ Mo juria sivo atano, ale mo viriviria na ruru lulu ruhu matea mata mate, ale mo taua na taptap matea la taia na pesapesa, ale mo sopo lo te tarape i juruvi hinia hin te rani. ⁵⁴ Rani atu enia Rani mata Tatamahu nona Jew, ale mariviti Sabbath i tapulo. ⁵⁵ La hafai sei la lo usuria la tai Galilee la usuria vara la hitea vara la pa taua na sava taptap, ale la pa hitea vara la pa tau na tarapena sohena sava. ⁵⁶ Moiso, la mele mule, ale la tatamahuni na lai ponaha ruhu peresi na hasori mata taua na tarapena.

Na Sabbath la mapu usuri na retileu non Moses.

24

Sauteterahi Non Iesu

(Mt 28.1–10; Mk 16.1–8; Jn 20.1–10)

¹ Pani na Sunday na falavuho jea, pa la hafai atu la vano na taptap, la lavi na lai ponaha ruhu sei la tatamahunira moiso. ² Ale lara la kau na taptap la hite vatu tavera atu mata matarua la kuresi narihia moiso, ³ pani lara la unu la sopo hite na tarapen Moli Iesu, ⁴ romira mo pa lo tihai, ale la pa hutura purongo, tamlohi mo rua la lo turu na pahisara, nora ruru la memera tavera. ⁵ Ale la matahu tavera, la popovi na la hora atano na lepa, ale la tamlohi atu la

veera isara lara, “Mata sava ka lo ale na tamlohi mauri na jara mate? ⁶Enia mo sopo toho nike, pani mo mele turu moiso. Ka lo romfomi na sava mo veera isamim hin rani atu mo pa lo toho Galilee, ⁷mara Natun Tamlohi i pa vano na lima tamlohi sasati matan vara la pa vosaea na talopeilopei, ale i pa mele turu na hatolu rani.” ⁸Ale la pa mele romfomi na nona retireti, ⁹ale la malue na taptap la vano la vere na hinau tari isan la tupu sangavulu romana matea atu, peresi la haratu la lo toho peresira. ¹⁰Ale Mary Magdalene, Joanna, Mary tinan James peresi na hafai tinapua hai sei la lo toho peresira, enira natu la vere la hinau sei isan la vahafule atu. ¹¹Pani la rongoa sohena sorasora rongorongo vono matea, ale la sopo rasura.

Iesu Na Malele Emmaus

¹²Pani Peter mo turu mo maro mo vano na taptap, mo riorio sivo mo hite na tavalu ruru lulu purongo la pa lo toho atu, ale mo mele mule mo mafurahi taverna na sava mo masese.

*Iesu Mo Pala Isana Tamlohi Mo Rua
(Mk 16.12–13)*

¹³Tataholo hin rani atu, tamlohi mo rua isara, la lo vano na vanuan Emmaus, mariviti kilometre i sangavulu romana matea hin Jerusalem. ¹⁴Ale la lo sorahi na hinau tari sei la masese Jerusalem. ¹⁵La pa lo retireti la lo sorahia, Iesu mo mai mo hahau peresira. ¹⁶Pani la sopo hitevosahia matan God mo horora. ¹⁷Ale mo veera isara mara, “Avei, sava sei ka lo sorahia na nomim hahau?”

La turu vahatea ale nahora mo vujangia vara romira mo sati.

¹⁸Ale vonara matea, hijana Cleopas mo faramia mara, “Avei, korong engko hasem purongo sei ko rohi Jerusalem, ale ko sopo levosahi na sava mo masese hin la rani akerihi sei la vano moiso?”

¹⁹Ale Iesu mo veera isara mara, “Sava hinau natu?”

Ale la veera isana lara, “Hinai la vaia isan Iesu mara Nazareth, enia poret sei nona retireti peresi na sui hana la fuhufuhu jea na nahon God, peresi na tamlohi tari. ²⁰Ale sohena sava nomam tamlohi aulu nona pris peresi na tamlohi aulu la taua na liman Pilate, vara i sile na talai isana mata mate, ale la vosaea na talopeilopei. ²¹Pani kama lo romtoho vara enia natu, haratu sei i pa juri Israel. Pani mo sopo haratu purongo, nahapani enia hatolu rani usuri la hinai sei la masese. ²²Ale aulu hin haratu, nomam hafai hai, la vai kamam kama mafurahi jea. Enira la lo toho na tapuna na falavuho jea. ²³Ale lara la sopo hite na tarapena, ale la mele hilu mai, la veera isamam vara la

hite na angelo hai, ale la veera isara vara mo mele mauri. ²⁴Tatuamam la rongoa la vano na tapuna vara la hitea, ale la hitea mo tataholo sohen haratu la hafai atu la lo veera, ale la hitea varafuhu tarapen Iesu mo tihai.”

²⁵Ale Iesu mo veera isara mara, “Ka tamlohi rongorongo vono! Mapumim la rilangi mata rasu na hinai tari poret la veera moiso! ²⁶Mo mera purongo na sava la ulia lara Kristo i pa lavi na rongohaji tiroma, moiso i pa lavi na hasohasona taverna.” ²⁷Ale Iesu mo tapulo vereuli na hinai tari sei Moses peresi na poret la ulira na jara tari na Retitapu sei la vereulia vara maurina i pa sohena sava.

²⁸Ale lara la lo mai mariviti hin vanua atu sei la lo hahau matana, Iesu mo lo hahau o hitea sohena vara i pa jeu vanua atu, ²⁹pani la veera rilangi isana lara, “O lo toho peresi kamam matan mo ravravi moiso, ale alo mo sakele na vuti moiso.” Ale mo usurira, mo lo toho peresira. ³⁰La sakele na tep, ale mo lavi na pereti mo lefuhu hinia, mo topea, moiso mo silea isara. ³¹Ale vahatea purongo, matara la roi la hitevosahia, ale mo tihai isara. ³²La veera isara hasera lara, “Varafuhu sei matan mapuŋa la avulahi jea na rani Iesu mo lo retireti peresira na malele sei mo vai na Retiulia la roi isara?” ³³Ale la turu vahatea la hilu, la mele vano Jerusalem, la tapai la tupu sangavulu romana matea atu peresi la haratu la lo toho peresira la lo pulutahi na jara matea. ³⁴Ale la veera isan la tupu rua atu lara, “Varafuhu, Moli mo mele turu, mo pala isan Simon Peter moiso!” ³⁵Moiso la tupu rua atu la pete vere na sava mo masese na malele, ale sohena sava la pa hitevosahia na rani mo tope na pereti.

Vavahinai Non Nona Tamlohi Usuri

(Mt 28.16–20; Mk 16.14–18; Jn 20.19–23;

Acts 1.6–8)

³⁶La pa lo sorahi la hinai sei, Iesu mo turu na livuhara, mo veera isara mara, “Tamata i toho isamim!” ³⁷Pani la hutura hinia, la matahu taverna matan la rom vara la hite na tanume matea. ³⁸Moiso mo veera isara mara, “Ka matahu mata sava? Ale romkaka mo malue na mapumim mata sava?” ³⁹Ha hite na limaku peresi na paloku vara enau varafuhu nahai. Ha tikeliau, ale ha levosahia, matan tanume mo sopo te epena soheku sohen ka lo hitea.” ⁴⁰Ale mara mo veera moiso, mo vujangi na limana peresi na palona isara. ⁴¹Ale la sopo lo rasu na sava la hitera matan la mafurahi taverna hinia, ale mo veera isara mara, “Avei, te hanhani nike?” ⁴²Ale la silea na tavalu maji matea mo noha na wai tutuni, ⁴³ale mo lavia mo hania na nahora.

Iesu Mo Retileu Isara

⁴⁴ Ale Iesu mo vereia isara mara, “Reti nika enira noku reti sei na pete vereia moiso isamim hin rani atu na pa lo toho peresi kamim, vara hinau tari sei la ulia na Leu non Moses peresi na Retiulia nona p’ovet peresi na puku non psalms la pa masese.”

⁴⁵ Moiso mo vai na fomira la roi matan vara la efi rongovosahi na Retitapu, ⁴⁶ ale mo vereia isara mara, “La ulia sohen harihi lara, Kristo i pa lavi na rongohaji moiso i mate, ale na hatolu rani i pa mele turu na mateia, ⁴⁷ ale la pa retivujavujangi na posi mata hehe, ale God i pa fomi na nora hehe na hijan Kristo, la pa retivujavujangia i vano isana tamlohi mara jara tinatinapua tari i tapulo Jerusalem i vano. ⁴⁸ Kamim ka hite la hinau sei na matamim. ⁴⁹ Ale ha levosahia vara na lo rule na Tanume Tapu usuri na retitauhi non Tamaku isamim. Pani ha lo toho Jerusalem i tikeli rani atu suiha aulu matan na tuka i jovi hin kamim.”

Iesu Mo Sahe Na Tuka

(Mk 16.19, 20; Acts 1.9–11)

⁵⁰ Moiso mo tiromara la malue la vano la tikeli Bethany, ale mo tahe na limana mo lefuhu hinira. ⁵¹ Mo pa lo lefuhu hinira, God mo lavi narihia mo sahe aulu na tuka. ⁵² Ale la lotua, la mele hilu la vano Jerusalem peresi na avulahi tavera, ⁵³ ale la vano la lo toho tarea na Temple mata hasohaso God ea.

Retiruhu Hin Iesu Kristo John Mo Ulia Puku Nike

John mo vujangia vara Iesu Kristo enia ‘Reti non God’ sei mo vai na hinau tari la lo toho (1.3–4). Mo vujangia vara John Tamlohi Paptijo mo levosahia vara enia ‘Natu Sipsip non God tataholo, enia natu, i pa lavi narihi na hehe nona tamlohi na varama’. (1.29) Philip mo vereea mara Iesu enia haratu Moses mo lo vereea mara i pa mai (1.45).

John mo vujangia vara Iesu enia sava tamlohi, ale nona vavahinau sohena, la vujangia vara enia God mo mai tamlohi.

Matamata Mo Limaravrua Non Iesu:

1. Mo posi na wai mo mai waen (2.1–12)
2. Natun tamlohi tavera Capernaum mo mele ruhu (4.43–54)
3. Tamlohi rojoa matea Bethzatha mo mele ruhu (5.1–47)
4. Iesu mo vahani na tamlohi (6.1–15)
5. Iesu mo hahau na pusa tasi (6.16–21)
6. Tamlohi matavuso matea (9.1–41)
7. Lazarus mo mele mauri (11.1–57)

‘Enau na’ Reti non Iesu mo limaravrua

1. Enau na pereti mata mauri (6.35, 51)
2. Enau na malarani mata varama (8.12)
3. Enau na matarua (10.7, 9)
4. Enau na tavui sipsip ruhu (10.11, 14)
5. Enau na sauteterahi peresi na mauri (11.25)
6. Enau na malele, retivaraŕuhu peresi na mauri (14.6)
7. Enau na asi grape varaŕuhu (15.1)

John mo uli puku nike matan vara ha pa eri tau na nomim rasua hin Iesu vara enia Kristo atu, Natun God. Vara ha tau nomim rasua hinia ha pa lavi na mauri varaŕuhu. (20.31)

‘Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui.’ (3.16)

Hin Puku Nike

1. Iesu enia Reti non God (1.1–18)
2. Vujangi non John Tamlohi Paptijo (1.19–34)
3. Iesu mo viŕoni na nona tamlohi usuri (1.35–51)
4. Tatua matamata tavera Iesu mo lo vaira (2.1–12.50)
5. Isoiso wik non Iesu; nona mateia (13.1–19.42)
6. Iesu mo turu na mateia (20.1–10)
7. Iesu mo pala isana nona tamlohi usuri (20.11–21.25)

Iesu Enia Reti Non God

¹ Tuai tiroma, Reti atu mo pete toho moiso. Mo lo toho peresi God, ale Reti sei enia God tataholo. ² Tuai tiroma, enia mo lo toho peresi God, ³ ale hinia, God mo vai na hinau tari, mo sopo te hinau hatea vara mo sopo vaia hinia. ⁴ Pulo mauri mo lo toho isana. Mauri atu enia mo lavi na malarani mo mai isana tamlohi. ⁵ Malarani atu mo sasarami na roŕoha. Roŕoha atu mo sopo eri turuhoroa.*

God Mo Rule John

⁶ God mo ŕule na tamlohi matea mo mai, hijana John. ⁷ Enia mo mai mo sohena tuetueni matea vara i vereuli na tamlohi hin malarani atu. Mo vereea matan vara tamlohi tari la pa rasu malarani atu. ⁸ Tuetueni atu enia mo sopo malarani atu, pani enia mo mai vara i vereuli malarani atu.

Malarani Mata Varama

⁹ Malarani atu mo mai na varama, enia mo malarani varaŕuhu. Malarani varaŕuhu atu mo sile na malarani vara tamlohi tari la pa levosahia.

¹⁰ Hina purongo vara God mo vai na varama hinia, pani varama mo sopo hitevosahia. ¹¹ Mo mai na nona varama, isan la tavgavuina tataholo, pani la ŕohu hinia. ¹² Pani isan la haratu la lavia, la rasu na hijana, ale enia mo tinafihira vara enira la pa eri mai natun God. ¹³ La mai natun God mata masalon God hasena. La sopo mai natun God na posposi tamlohi mo vora teni na masalo tamlohi.

Reti Atu Mo Mai Tamlohi

¹⁴ Reti sei mo mai tamlohi, mo lo toho peresiŕa. Kama hite na hina fuhufuhu matuvana na maurina moiso, hina fuhufuhu matuvana non haratu hasena enia mo tai isan Tama, enia pulo ŕomfuhu, ale enia pulo retivaraŕuhu.

¹⁵ John mo ulo aulu mara, “Hara sei natu, na lo vereea vara i pa mai hitahu hiniau, enia mo aulu hiniau, matan enia mo lo toho tiroma tuai hiniau.”

¹⁶ Matan nona tavgavu mo tavera, ale enfa mo isoiso ŕa lo lavi na nona otori fuhu matuvana, ale matana, nona ŕomfuhu mo lo maŕivisihiŕa la lo masurere hiniŕa, ¹⁷ matan Moses mo sileŕa na Leu, pani ŕomfuhu peresi na retivaraŕuhu la tai isan Iesu Kristo. ¹⁸ Te tamlohi mo sopo lo hite God hin te pongi, pani haratu enia God sei mo lo toho na tavalun Tama, enia mo vujangia isaŕa vara God enia mo sohena sava.

* 1:5: turuhoroa: teni ‘hitevosahia’.

*John Tamlohi Paptijo**(Mt 3.1–12; Mk 1.1–8; Lk 3.15–17)*

¹⁹ Hin rani atu tamlohi tatavera nona Jew la rüle na pris peresi na tatua vao Levi enira tuetueni nona pris la lo toho Jerusalem vara la mai la usia isan John vara, “Engko natu Kristo atu teni mo vono?” Ale John mo faramira, ²⁰ mo sopo vunvunia, mo taviti isara mara, “Enau mo sopo Kristo atu!”

²¹ Ale la usia isana lara, “Ale o to vereea vara, engko hare? Engko Elijah teni mo vono?”† Pani mo faramira mara, “Mo vono, mo sopo enau.” La mele usia lara, “Engko natu, pfovet atu teni mo vono?” Mo mele vereea isara mara, “Mo vono.” *Deut 18.15, 18; Isa 40.3*

²² Ale la vereea isana lara, “Engko hare? O vere kamam hinia matan kama pa efi farami la haratu la lo rüle kamam. O to vere kamam hiniho vara engko hare.” ²³ John mo vereea sohen pfovet Isaiiah mo vereea mara,

‘Enau leo atu mo lo ulu na jara hasetoho, ha vasahi na malele matan vara Moli God i pa hahau hinia!’ *Isa 40.3*

²⁴ Ale tatuara la mai isana enira la tai na vao Pharisee. ²⁵ La mele usi John hinia lara, “Kama rongoho moiso vara engko mo sopo Kristo atu, teni Elijah teni pfovet atu Moses mo vereea vara i pa mai, ale vara mo sohena, mata sava ko lo paptijo na tamlohi?” *Deut 15.15–18*

²⁶ John mo faramira mara, “Paptijo nike, enau na lo vaia na wai purongo, pani matea mo lo turu na livuhamim moiso kamim ka sopo lo hitevosahia, ²⁷ haratu sei i pa mai usuriau enia mo aulu hiniua, ale enau na sopo tataholo vara a uli narihi na asi eve palona.” ²⁸ La hinau sei la mase na taon Bethany, tavalu vano na wai Jordan. Hin jara atu John mo lo paptijo na tamlohi ea.

Iesu Enia Natu Sipsip Non God

²⁹ Mo mele rani sahe, John mo hite Iesu mo lo hahau mo lo mai isana, mo vereea isan vao atu mara, “Eh! Ha kilau vano sevano isan tamlohi sei mo lo mai. Enia natu, Natu Sipsip non God tataholo, enia natu, i pa lavi narihi na hehe nona tamlohi na varama. ³⁰ Enau na pete vere kamim hinia moiso vara, ‘Tamlohi matea i pa mai hitahu hiniua mo aulu jea hiniua!’ matan mo lo mauri mo lo toho moiso tiroma na noku pongi vora.’ ³¹ Enau na sopo hitevosahia vara enia hare, pani enau na mai na lo paptijo na wai matan vara enia i pa pala isan Israel.”

³² Moiso, John mo lo vereulia mara, “Na hite Tanumen God mo tai aulu na tuka sohena vomahe matea, mo tau hinia.

³³ Tiroma na sopo hitevosahia vara enia hare, pani haratu sei mo rüleau vara a paptijo na wai mo vereea hinia mara, ‘Vara o hite na Tanume Tapu i sevuti i tau na tamlohi matea, tamlohi atu natu, ko lo kilau matana. Enia haratu i pa fuuni na tamlohi na suihan Tanume Tapu.’ ³⁴ Matan na hitea moiso enau a efi vereea kamim hinia vara vara ruhu haranike natu, enia Natun God.”

Andrew Enia Peter La Hite Iesu

³⁵ Mo mele rani sahe, John mo lo turu atu mo lo sorasora peresi na nona tamlohi usuri mo rua hin jara atu. ³⁶ Moiso, John mo hite Iesu mo lo hahau na tavalura, moiso John mo vereea isara mara, “Ka hite tamlohi sevano, enia natu, enia Natu Sipsip non God tataholo.” ³⁷ Tamlohi usuri non John lara la rongoa, la vano vahatea vara la pa usuri Iesu.

³⁸ Moiso Iesu mo posi vano isara mo hite vara la lo usuria mara, “Ka opoi na sava?”

La faramia lara, “Rabbi, imam mo lo toho epu?” Ale faramin hija nike ‘rabbi’ enia ‘tija’. ³⁹ Moiso mo vereea isara mara, “Ha mai, ha pa hitea.” La vano enira tolu Iesu la hite jara atu Iesu mo lo toho ea. Matan alo mo vati na ravravi moiso, ale la lo toho peresia mo sinai mo ravravi jea.

⁴⁰ Vonara matea atu sei mo rongo John mo lo verera hin Iesu, ale mo usuria enia Andrew, vorain Simon Peter. ⁴¹ Hinau tiroma Andrew mo vaia mo vano vara i ale tavaina Simon vara i vereea isana vara, “Kama hite tamlohi atu, enia natu pa Tamlohi Jujuri atu!” Tamlohi Jujuri na leon tadvavuin Israel faramina enia ‘Kristo’ na leo mara Greek.

⁴² Andrew mo vereea isana moiso mo lavia mo mai isan Iesu. Moiso Iesu mo vereea isana mara, “Engko Simon natun John, pani nake a pa tau na hijam vara Cephas.” Raramin hija sei ‘Cephas’ enia ‘Peter’.

Iesu Mo Tovi Philip Peresi Nathanael

⁴³ Mo mele rani sahe Iesu mo vano Galilee. Mo tapai Philip ea, ale mo vereea isana mara, “O pa mai noku tamlohi o usuriau!” ⁴⁴ Philip mo tai hin taon sei Bethsaida, jaran Andrew enia Peter. ⁴⁵ Philip mo malue vara i ale Nathanael, moiso mo vereea isana mara, “Kama tapai pa tamlohi tataholo atu sei Moses mo lo ulia na Leu, ale pfovet sohena la uliuli matana vara i pa mai.‡ Kama hitea enia mara Nazareth, natun Joseph, hijana Iesu.”

⁴⁶ Pani Nathanael mara mo rongoa mo vereea mara, “Nazareth! I vono! Sava hinau i fuhu i efi malue hin jara atu?”

† 1:21: Elijah: tadvavuin Israel la levosahia vara Moses mo vereea tiroma vara tamlohi matea God mo vifonia vara i pa pala isara hin te rani. ‡ 1:45: la ulia: Reti sei faramina enia Retiulia tuai la ulia matafa.

Philip mo faramia mara, “O mai, o pa hitea engko hasem.”

⁴⁷ La pa lo mai, Iesu mo hitera, mo vereia isan Nathanael mara, “Varafuhu, na lo hite na tamlohi matea enia mahapin Israel tataholo matea, mo sopo te halu hinia.” ⁴⁸ Ale Nathanael mo usia mara, “Pani engko ko levosahiau sohena sava?”

Iesu mo faramia mara, “Hin rani atu Philip mo sopo lo vano matam, enau na pete hiteho moiso, ko lo sakele na malumalu pulo fig vipahai atu.”

⁴⁹ Nathanael mo faramia mara, “Tija, engko Natun God tataholo! Engko Supe non Israel!”[§]

⁵⁰ Iesu mo faramia mara, “Enau na vereia purongo vara na hiteho ko lo sakele na pulo fig matea, moiso vahatea purongo ko rasuau, pani o pa mele hite na hina mafurahi matuvana, la pa jeu haratu sei ko lo hitera! ⁵¹ Varafuhu na vereia isamim mo isoiso, ha pa hite tuka i roi, moiso ha pa hite na angelo non God la pa lo mai, la pa lo sahe aulu, moiso la pa lo sevuti isan Natun Tamlohi.”*

2

Lahi Matea Cana

¹ Rani mo tolu mo vano moiso, ale tinan Iesu mo lo toho na lahi matea na taon matan Cana na jara Galilee. ² La usi Iesu tolu na nona tamlohi usuri vara la pa mai hin lahi atu.

³ Pani hin rani atu waen mo isoiso, mo sopo mele tea. Tinan Iesu mo vere Iesu hinia mara, “Mara waen mo isoiso, mo sopo mele tea.” ⁴ Iesu mo faramia mara, “Eh, nana, mo sopo te noŋa hinau hinia, matan noku rani mo sopo lo mai.”*

⁵ Tinana mo vereia isan la tamlohi tuetueni hin jara atu mara, “Ha vai na sava hinau i pa vereia isamim.”

⁶ Moiso mo kilau vano mo hite na jara wai tatavera mo limarave la vaira na lepa; Jew la lo utu na wai loso mata nora lotu hinira. La eri tau na wai i tikeli 50 lita hinira hatehateahi. ⁷ Iesu mo vereia isan la tamlohi tuetueni atu mara, “Ha mafivisira na wai!” Ale la vaia sohena, ⁸ ale mo vereia isara mara, “Ha rengi tea, ha silea isana tamlohi tavera mata hanhani vara i inu rongorongoa.”

Ale la vaia sohena mo vereia. ⁹ Pa tamlohi sei mo lo kilau na hanhani mo rongoa vara waen, pani enia mo sopo levosahia te hinau hinia, pani tamlohi tuetueni purongo enira

la levosahia, ale mo vano mo tovi pa tamlohi atu vara i pa lahi mo mai isana, ¹⁰ mo vereia isana mara, “Tarea na lahi, tamlohi lahi mo lo sile na waen fuhu mo memeje tiroma vara tamlohi la pa putu makomona hinia, moiso i pa sile na waen mo sopo fuhu jea, pani engko ko tau na waen fuhu sei vara fa pa inua hitahu!” ¹¹ Matamata tavera atu enia tiroma matamata tavera Iesu mo vaia, ale mo vaia na taon Cana na jara Galilee.[†] Iesu mo vuhesi na nona suiha fuhufuhu isana nona tamlohi usuri ea, ale la tau na nora rasua hinia. ¹² Hitahun haratu Iesu mo sahe Capernaum peresi tinana, la tasina tolu na nona tamlohi usuri, vara la pa toho atu te makomo rani.

Iesu Mo Rohi Na Temple

(Mt 21.12–13; Mk 11.15–17; Lk 19.45–46)

¹³ Nake mo lo mai mariviti mata hanhani tavera nona Jew la tovia Passover, ale Iesu mo sahe Jerusalem matana. ¹⁴ Iesu mo unu na Temple mo hite na vao tamlohi matuvana la lo haŋehi na buluk, sipsip peresi na vomahe mata malamalai ea. Ale mo hite na tamlohi mata jenjen mania la lo jeni na mania na mania mata silesilea na lolo Temple, la lo sakele na nora tep. ¹⁵ Moiso mo vai na maja na oti asihai, mo levuti nafihira peresi na pulara maji mo isoiso na lolon Temple atu. Mo jarai jovi na nora mania, ale mo tipovi na nora tep.

¹⁶ Isan la haratu la lo haŋehi na vomahe mo vereia isara mara, “Ha lavi nafihia la hinau nike! Ha sopo vai na Iman Tamaku ima aŋaŋehi matea!”

¹⁷ Nona tamlohi usuri la hitea, la mele romfomi na sava Retiulia mo vereia mara, “Noku opoia mata imam mo tavera jea, ale mo joleau vara a kilaua’.

¹⁸ Ale tamlohi tavera nona Jew lara, “O pa efi vai te matamata hatea nakerihi vara kama pa levosahia vara engko natu, tamlohi tataholo sei vara o pa efi vai hinau sei?”

¹⁹ Iesu mo faramira mara, “Ha kauti Temple nike, moiso na rani i tolu purongo, a pa mele turuhia.”

²⁰ Moiso tamlohi tatavera nona Jew atu la faramia lara, “La voro Temple nike mata tauni mo ngavulu vati mo limarave (46), pani o pa mele turuhia na rani i tolu purongo sohena sava?”

²¹ Pani Iesu mo lo retireti na epena sohena Temple matea. ²² Hin rani atu mo mele turu na mateia, nona tamlohi usuri la mele romfomi nona retireti atu, ale la rasu na Retitapu peresi na retireti non Iesu.

§ 1:49: Nathanael mo hutua matan Iesu mo sopo hitea na matana, matan Nathanael mo sopo toho hin te jara mariviti isan Iesu. * 1:51: la pa lo mai, la pa lo sahe aulu: Na rani Jacob mo rovo isan Esau, mo mavuho mo hite na angelo la lo mai, la lo sahe aulu na tuka na lada matea. * 2:4: noku rani: rani sei vara tamlohi la pa hitevosahia vara Iesu enia Natun God tataholo. Hite: Jn 12.23. † 2:11: matamata tavera: matamata atu mo vujangia vara la pa rasu na suihan God mo lo toho hin Iesu.

Iesu Mo Levosahi Na Tamlohi

²³ Hin rani atu Iesu mo lo toho Jerusalem na hanhani Passover, vao tavera la rasua vara enia tamlohi atu la lo kilau matana, matan la hite na matamata mo lo vaira. ²⁴ Pani Iesu mo sopo rasua matan mo levosahi na sava mo lo toho na mapura. ²⁵ Tea i sopo efi vereulia isana vara tamlohi la sohen sava. Enia mo levosahira moiso.

3

Nicodemus Mo Mai Isan Iesu

¹ Ale tamlohi tavera matea na vao Pharisee hijana Nicodemus, enia tamlohi aulu matea nona Jew, ² mo mai isan Iesu na vutepongi matea mo vere a isana mara, "Tija, kama levosahia vara God mo ruleho vara o vujangi kamam, matan mo sopo te tamlohi hatea vara i efi vai na matamata vara God mo sopo toho isana."

³ Iesu mo faramia mara, "Varafuhu na vereho hinia, vara tamlohi la sopo lavi na vora paro tiroma,* la pa sopo efi hitevosahi mauri atu God mo aulu hinia."

⁴ Nicodemus mo usia mara, "Pani tamlohi mo vajiaha moiso i pa mele vora sohen sava? I pa efi mele unu na pangen tinana vara i pa mele vora teni i vono?"

⁵ Iesu mo faramia mara, "Varafuhu, varafuhu na vere a isam vara te tamlohi i sopo vora na wai peresi na Tanumen God, i pa sopo efi unu hin mauri atu God mo aulu hinia. ⁶ Tamlohi la sile na mauri tamlohi isan natura, pani Tanumen God mo lo sile mauri atu mo tai isana. ⁷ Ha sopo mafurahi hin noku reti sei, na lo vere a isam vara ha pa lavi vora paro atu mo tai na tuka. ⁸ Tanumen God hasena mo lo sile na mauri paro. Tanumen God mo sohen langi sei mo lo sere mo vano na jara mo opoia, ko rongoa, pani ko sopo levosahia vara mo tai epu teni na sava jara mo lo vano ea."

⁹ Nicodemus mo usia mara, "La hinau sei la pa sohen haratu sohen sava?"

¹⁰ Iesu mo faramia mara, "Engko natu, tija nona tadvavuin Israel, pani ko sopo lo levosahi la hinau sei mata sava? ¹¹ Varafuhu na vere a isam, kama lo vereuli na sava kama levosahira, matan kama hasemam hitera, pani ka sopo rasu nomam vereulia sei. ¹² Vara a vere kamim na hinau mata varama, pani ha sopo rasuau, ha pa rasuau sohen sava vara a vere kamim na hinau matan na tuka? ¹³ Tea mo sopo lo sahe na tuka, ale i mele sinai, pani Natun Tamlohi hasena, enia mo tai atu mo

sinai nike. ¹⁴ Sohen tuai Moses mo tahe na mata mo vaia na bronze na tano koru, ale sohen haratu natu la pa tahe Natun Tamlohi aulu,† ¹⁵ vara sava tamlohi mo tau na nona rasua isana, enia i pa lavi na mauri tui.

¹⁶ Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui. ¹⁷ Matan God mo sopo rule Natuna na varama vara i ari na tamlohi, mo vono. Mo rulea vara i jurira hinia. ¹⁸ Haratu mo rasu na Natun God enia i pa sopo lavi na talai, pani isan la haratu la sopo rasua, God mo pete tau na nora talai moiso matan la sopo rasu na hijan Natun God vorahese.

¹⁹ Pulo nora talai mo sohen harihi: matan malarani mo mai na varama, pani tamlohi la opoi na fofoha mo tavera mo jeu na malarani matan nora vavahinau la hehe. ²⁰ Pani la haratu la lo vai na hehe la pa sopo efi mai na malarani, la fohu vara la mai na malarani matan vara i vono, malarani i pa vuhesi na nora hehe. ²¹ Pani la haratu la lo ololo na retivarafuhu na maurira, enira la pa mai na malarani, matan vara i vujangia vara nora vavahinau la tai isan God."

John Mo Vereuli Iesu

²² Hitahun harihi, Iesu tolu na nona tamlohi usuri, la mai na jara Judea. Enia mo lo toho peresira makomona, ale mo lo paptijo na tamlohi.

²³⁻²⁴ Hin rani atu la sopo lo tau John na ima rilangi, enia mo lo paptijo na tamlohi la lo mai isana na jara Aenon mariviti Salim mata wai mo marivi ea.

²⁵ Hin rani atu tamlohi usuri non John la lo vasvas peresi na Jew matea mata nora posposi mata hoje vara la vokevoke.‡ ²⁶ Ale la mai isan John la vere a isana lara, "Tija, pa tamlohi atu ko lo vere a hin rani atu, na tavalu wai Opae Jordan, nakerihi mo lo paptijo na tamlohi, moiso tamlohi tari la lo marongia."

²⁷ John mo faramira mara, "Tea i sopo efi vai te hinau hatea, pani vara God mo tinarihia, enia i pa efi vaia. ²⁸ Kamim ka levosahi na sava na pete vere a isamim moiso vara enau, mo sopo Kristo atu, pani God mo ruleau vara a mai tiroma hinia. ²⁹ Ka sopo levosahia vara tamlohi i pa lahi natu, mo lahi na harai, pani tapalan tamlohi atu mo avulahi vara mo rongu na leona, ale vara i turu mariviti isana. Enia natu, noku avulahi tavera mo vano sohen sava. ³⁰ Enia

* **3:3**: vora paro: vora atu mo tai aulu. † **3:14**: mata mo vaia na bronze: hin pongi atu tuai God mo sile na talai isana tadvavuin Israel. Mo sohai na mata vara la hatimateira. Moses mo vai na mata na bronze aen mo tahea aulu matan God mo vere a mara, vara tea i kilau sahe isana i pa mele fuhu, ale la haratu la rasua la mauri. ‡ **3:25**: hoje vara la vokevoke: tadvavuin Israel tuai la tau na posposi matuvana mata hoje na nora jilivi teni te hinau sohen sava matan la Romfomia vara God i pa avulahi hinira matana.

hijana i pa mai i mele aulu jea, pani hijaku i pa lo sivo atano jea.

Haratu Mo Tai Na Tuka

³¹ Haratu mo tai na tuka, enia mo aulu na tamlohi tari. Haratu mo tai na varama, enia non varama, ale enia mo efi vere na hinau na varama purongo. Pani haratu mo tai na tuka mo aulu na tamlohi tari. ³² Mo lo vere na sava mo hitera, mo rongora, pani tamlohi la sopo rasua. ³³ La haratu la rasua enira la vereea vara God enia varaʻuhuhu. ³⁴ Matan God mo rule Natuna vara i vere na nona reti, matana, mo sile vevuhi na suiha Tanumena isana.

³⁵ Tama sei, mo opoi Natuna, ale mo tau na hinau tari na limana vara i aulu hinira. ³⁶ Haratu mo rasu Natuna mo pete lavi na mauri tui moiso. Pani haratu mo sopo oloolo hin Natuna, i pa sopo efi lavi mauri tui atu, matan talai lolokoru non God mata hehe mo lo toho isana.”

4

Haʻai Mara Samaria Matea

¹ Na rani Iesu mo levosahia vara Pharisee la rongoa moiso vara tamlohi la lo usuria, la jeu la haratu la lo usuri John, ² mo ruhu vara ha levosahia vara Iesu hasena mo sopo paptijo na tamlohi, pani nona tamlohi usuri hasera la lo paptijo na tamlohi, ³ ale matana, Iesu mo malue Judea mo mele vano Galilee.

⁴ Hin rani atu mo lo hahau roto Samaria, ⁵ mo hahau mo mai Samaria na taon matan Sychar mariviti hin lepa atu sei tuai Jacob mo silea isan natuna Joseph. ⁶⁻⁸ Wel atu Jacob mo helia tuai mo pa lo toho ea, ale Iesu mo sakele na tavaluna matan mo hahau jara peravu mo malokoloko.

Ale na livuha rani, tamlohi usuri non Iesu la vano vara la voli te hanhani na taon. Haʻai mara Samaria matea mo mai vara i utu te wai na wel. Iesu mo usia isana mara, “O efi utu te maku wai?” ⁹ Haʻai atu mo ʻaramia mara, “Engko Jew matea, ale enau haʻai mara Samaria! Vara sava engko ko usiau vara a utu te mam wai?” Mo usia sohena matan mara Judea peresi na mara Samaria la lo hitelehilehira.

¹⁰ Moiso Iesu mo ʻaramia mara, “Engko ko sopo levosahi na sava God mo opoia vara i silea isam. Ale engko ko sopo levosahia vara harepu nahai mo lo usiho na wai mata i inua. Vara o pa lo levosahia, o pa usiau na wai sei mo sile na mauri.”

¹¹ Ale haʻai atu mo usia isana mara, “Tapala, mo sopo te nom baket, ale wel sei mo sivo atano. O pa efi utu wai atu mo sile na mauri epu? ¹² Pimam Jacob mo heli wel sei matamam, moiso enia peresi na vaona

peresi na pulana maji palovati tari la inu hinia. Engko o pa efi jeu na sava Jacob mo vaia?”

¹³ Iesu mo ʻaramia mo vereea mara, “Tamlohi tari la lo inu wai sei la pa mele maʻohu. ¹⁴ Pani la haratu vara la inu na wai a pa silea, la pa sopo efi mele maʻohu na rani sei la pa mai. Wai atu a pa silea enia patu wai sei mo sile na mauri tui.”

¹⁵ Ale haʻai atu mo ʻaramia mara, “Tapala, o sileau a inu wai atu matan vara a sopo mele maʻohu vara a pa mele mai hin wel nike.”

¹⁶ Ale Iesu mo vereea isana mara, “O vano o lavi tuam i mai.”

¹⁷ Haʻai atu mo ʻaramia mara, “Enau mo sopo te tuaku.” Iesu mo vereea isana mara, “Ko vereea ko varaʻuhuhu, mo sopo te tuam. ¹⁸ Engko ko lahi, ale tuam mo lima moiso, ale nake tamlohi atu ko lo toho peresia enia mo sopo tuam tataholo. Haratu ko vereea mo varaʻuhuhu.”

¹⁹ Ale haʻai atu mo vereea isana mara, “Moli, na hitevosahia vara engko pʻovet matea. ²⁰ Pimam la lo lotu na vutivuti nike,* pani kamim Jew ka vara Jerusalem purongo enia jara tataholo vara tamlohi la lo lotu ea.”

²¹ Ale Iesu mo vereea isana mara, “O rasuau, pongi matea mo lo mai vara ha pa sopo mele lotu Tama hin vutivuti nike teni Jerusalem. ²² Kamim mara Samaria, ka sopo levosahia varaʻuhuhu vara ka lo lotu hare. Pani kamam Jew, kama levosahi God atu kama lo lotua. Hin na mahapi Jew God i pa juri na varama. ²³ Pani pongi matea mo lo mai, ale mo tapulo moiso vara la haratu la lotu varaʻuhuhu, la pa lotu Tama sohena Tanumena mo vujangira na malele retivaraʻuhuhu. Tama mo lo ale na tamlohi sohen harihi vara la lotua. ²⁴ God enia Tanume, la haratu sei la lotu God la pa lotua sohena Tanumena i pa tiromara vara la pa usuri na malele retivaraʻuhuhu.”

²⁵ Haʻai atu mara, “Enau na levosahia vara Tamlohi Jujuri i pa mai, enia natu kama tovia Kʻristo. Ale hin pongi atu vara i mai, i pa vere mamahuni na hinau tari isamam.”

²⁶ Iesu mo vereea mara, “Enau natu, tamlohi atu mo lo toho jejeu. Na lo retireti isam nakerihi.”

²⁷ Vahatea atu, tamlohi usuri non Iesu la mele hilu, moiso la maʻurahi tavera matan Iesu mo lo retireti peresi na haʻai matea. Pani te vonara mo sopo usia vara, ‘Ko opoi

* **4:20:** Vutivuti nike: Vutivuti Gerizim, mariviti na taon Shechem.

na sava?' teni 'Mata sava ko lo retireti isan hafai nike?'†

²⁸ Moiso hafai atu mo tau nona jara wai, ale mo mele maro hilu mo vano na taon. Mo vereea isana tamlohi mara, ²⁹ "Ha mai! Ha hite na tamlohi matea sei mo vereau na hinau tari na vaira moiso. Korong enia natu, Křisto atu teni?" ³⁰ Ale tamlohi tari hin taon atu la vano la hite Iesu. ³¹ La hinau atu la lo vano, moiso tamlohi usuri non Iesu la lo vereea isana lara, "Tija, o hani te hinau."

³² Pani Iesu mo verera hinia mara, "Haku hinau kamim ka sopo levosahia te hinau hinia."

³³ Nona tamlohi usuri la lo ususira hinia lara, "Tea mo sile te hanhani isana teni mo vono?"

³⁴ Pani Iesu mo vereea isara mara,

"Haku hinau, enia mata a vai na masalon God. Enia natu, mo fuleau, ale enau a pa vai vevuhi na nona vavahinau sei mo taua isaku vara a vaira. ³⁵ Ha sopo vereea vara vitu mo vati mo lo toho vara i tikeli na asitauni. Pani enau na lo vere kamim hinia vara ha to kilau vano, ha pa hite vara isa la jea la lo mena mata lavi na asitauni moiso. ³⁶ Tamlohi asitauni la lo lavi na volira, mata la lo vu na vua mata mauri tui. La haratu la lo hapofahi na piri peresi la haratu la lavi na vua asitauni la pa avulahi jea na jara matea.

³⁷ Hin haratu reti nike mo varafuhu, 'Hai la hapofahi na piri, hai la lavi na vua asitauni.' ³⁸ Enau na lo rule kamim vara ha pa lavi na vua asitauni na isa sei tamlohi tinapua la vai na voko řilangi ea moiso."

Mara Samaria La Rasu Iesu

³⁹ Vao tavera mara Samaria hin taon atu la tau na nora rasua hin Iesu matan hafai atu mo vere mara, "Tamlohi nike, mo vereau na hinau tari na vaira moiso." ⁴⁰ La mai la usia isana vara i lo toho na taon nona mara Samaria. Ale mo lo toho ea mata rani mo rua.

⁴¹ Ale vao tavera mara Samaria la tau na nora rasua hin Iesu, mata sava la rongoa mo lo vereea. ⁴² La vereea isan hafai atu lara, "Kama sopo rasu Iesu matan la hinau atu ko lo vereea isamam purongo, pani matan kama hasemam rongoa, ale kama levosahia mo řuhu vara enia natu, Jujuri mata Varama!"

Tamlohi Tavera Matea Mo Rasu Iesu (Mt 8.5–13; Lk 7.1–10)

† **4:27:** mo lo retireti peresi na hafai matea: la romfomia vara nona tamlohi usuri la hutura hin Iesu matan posposi tavitavuni Israel tuai mo sopo tataholo vara te tamlohi vujangi hatea i sorasora peresi te hafai hasena teni vara Iesu mo lo sorasora peresi na hafai Samaria enira nora meresahi. ‡ **4:54:** matamata: o hite reti sei hin jara rihi sei 2.11.

* **5:2:** paltungu: peravung paltungu atu 95 metre, ale hin la pongi atu tamlohi la rasua vara wai i vali hin paltungu atu matan la vereea vara angelo matea mo tai na tuka vara i ariaria. Ale haratu mo sevuti tiroma hin paltungu atu i pa mele řuhu.

⁴³ Mo mele rani mo rua tinapua moiso, mo malue mo vano Galilee, ⁴⁴ matan Iesu mo vereea moiso vara tamlohi la pa ololoo na pfovet na jara tari, pani mo sopo na jarara tataholo, ⁴⁵ ale mo sinai Galilee, ale mara Galilee atu la avulahi na nona mai matan la hite la hinau tari atu mo lo vaia Jerusalem na hanhani Passover ea matan enira so-hena la sahe Jerusalem mata hanhani ea.

⁴⁶ Ale hin rani atu mo lo toho Galilee, mo mele hilu mo vano Cana taon sei mo posi na wai mo mai waen ea tiroma. Ale tamlohi tavera matea atu Capernaum natuna mo rojo. ⁴⁷ Pa tamlohi tavera mo rongoa vara Iesu mo tai Judea mo mai Galilee moiso, mo vano vara i usia řilangi vara i efi vai mamahuni natuna.

⁴⁸ Iesu mo vereea isan tamlohi tavera atu mara, "Kamim tamlohi, i pa sopo te nomim rasua vara ha sopo hite na matamata tavera peresi na hina mafurahi!"

⁴⁹ Pani tamlohi atu, mo řaramia mara, "Moli! O efi mai vila? Vara i vono, natuku i pa mate!"

⁵⁰ Iesu mo řaramia mara, "Natum i pa mauri. O mule, o vano isana!" Tamlohi atu mo rasu na sava Iesu mo vereea isana, ale mo tapulo mule.

⁵¹ Te slev non tamlohi tavera atu la tapaia na malele, ale la vereea isana lara, "Natum mo mele řuhu moiso!" ⁵² Mo usira mara, mo mele řuhu nangisa, ale la řaramia lara, "Seserei atu mo malue isana nanovi na matan alo matea."

⁵³ Vahatea taman uluvou atu mo fomfomia vara matan alo matea nanovi Iesu mo vereea isana mara, "Natum i pa mauri!" Ale tamlohi atu peresi na vao imana la tau na nora rasua hin Iesu.

⁵⁴ Matamata tavera sei enia harua matamata Iesu mo vaia hin rani atu, hitahun haratu mo malue Judea mo vano Galilee.‡

5

Tamlohi Rojoo Matea

¹ Hitahun la hinau sei, Iesu mo sahe Jerusalem mata hanhani tavera matea nona Jew. ² Na lolon Jerusalem paltungu tavera matea la vaia mata loloso mo lo toho ea na leon tavitavuni Israel la tovia Bethsaida. Mo lo toho mariviti na matarua matea mata sipsip sei la tauhasehira mata malamalai vara la lo unu na rope Temple atu. Paltungu atu la voro na palapala mo lima mo řalihia.*

³⁻⁴ Tamlohi matuvana la rojo, la haratu la matavuso, la haratu tavalu epera la mate, la haratu epera la mate, sohen la papao, la lo juruvi řalihi paltungu sei.

⁵ Na pahisan paltungu tavera atu, tamlohi matea tavalu epena mo mate mata tauni ngavulu tolu mo limaravtolu (38). ⁶ Ale Iesu mo hite tamlohi sei mo hitevosahia vara enia tavalu epena mo mate mata tauni matuvana moiso, ale mo usia isana mara, "Eh, ko opoia vara o řuhu teni mo vono?"

⁷ Ale tamlohi atu mo řaramia mara, "Tapala, mo sopo te tapalaku vara i pa eři tauau na lolu paltungu hin rani atu wai mo lo vali. Na vaihitea vara a pa sivo tiroma, pani tamlohi tinapua la lo sivo tiroma hiniau."

⁸ Iesu mo vereea isana mara, "O lavi na epam o hahau!" ⁹ Vahatea tamlohi atu mo mele řuhu. Mo lavi na epana mo tapulo hahau řalihi. Rani atu hinau atu mo masese hinia, enia Sabbath matea.

¹⁰ Moiso tamlohi tavera nona Jew la hite tamlohi atu mo lo řalihi mo lo lavi na epana, la vereea isana lara, "Haranike Sabbath nahai! Tea i sopo eři lavi na epa i lo hahau na Sabbath!"

¹¹ Pani mo řaramira mara, "Tamlohi atu mo vaiiau na řuhu mo vereea isaku vara a lavi na epaku a hahau."

¹² La usia isana lara, "Sava tamlohi natu, mo vereho vara o pa lavi na epam o hahau?"

¹³ Pani enia mo sopo levosahia vara Iesu enia hare, ale Iesu mo malue moiso mata vao hin jara atu.

¹⁴ Hitahun haratu, Iesu mo tapai tamlohi atu na lolu Temple, ale mo vereea isana mara, "Engko ko řuhu moiso, pani o sopo mele vai te hehe, vara i vono te hinau i mele sati jea i pa tikeliho." ¹⁵ Ale tamlohi atu mo malue mo vano mo vereea isana tamlohi tavera nona Jew mara Iesu natu, mo vaia mo řuhu. ¹⁶ Ale matana, tamlohi tavera nona Jew la tapulo tipahi Iesu matan mo vai na hinau sohen na Sabbath.

¹⁷ Pani Iesu mo vereea mara, "Tamaku mo lo vavahinau mo tikeli nakerihi, ale enau sohen na lo vavahinau."

¹⁸ Ale matan haratu, tamlohi tavera nona Jew la vaihitea řilangi vara la vilimateia. Mo sopo matan haratu vara mo lo tope na Sabbath purongo, pani matan mo lo vereea vara God enia Tamana, retireti atu mo vaia enia mo tataholo hin God.

Suiha Non Natun God

¹⁹ Iesu mo řaramira mara, "Varařuhu na vereea, Natun Tama hasena i sopo eři vai te hinau hatea, pani haratu purongo sei mo hite Tamana mo lo vaia tiroma, ale enia i pa vaia. Matan sava hinau Tamana mo lo vaia, Natuna sohen i pa vaia. ²⁰ Matan

Tama mo opoi Natuna, ale mo vujangia na hinau tari enia mo lo vaia. Tama i pa mele vujangi na hinau matuvana la jeu haranike isana matan vara ha pa mařurahi tavera. ²¹ Mo sohen Tama mo sauteterahi na mate mo silera na mauri, ale Natuna sohen i pa sile na mauri isan hare enia mo opoia.

²² Tama mo sopo ari te tamlohi, pani mo tau na aria mata tamlohi tari isan Natuna, ²³ matan Tama mo opoia vara tamlohi tari la oloolo hin Natuna sohen la lo oloolo hinia. Vara tea mo sopo oloolo hin Natuna, mo sohen na sopo oloolo hin Tama sei mo lo řulea.

²⁴ Varařuhu na vereea isamim, vara harepu mo rongo na noku reti, ale mo rasu haratu mo řuleau, enia mo pete lavi na mauri tui moiso, enia i pa sopo lavi na talai hin pongi atu, pani mo malue moiso na mateia, ale mo lavi na mauri.

²⁵ Varařuhu na vereea isamim, pongi matea mo lo mai, mo pete mai moiso, vara mate la pa rongo na leon Natun God, moiso la haratu purongo sei la tapurongo isana, la pa mauri.

²⁶ Ale matan Tama enia pulo mauri enia mo sile Natuna vara enia sohen, i pa lavi pulo mauri atu. ²⁷ Moiso, mo silea vara Natuna i lavi na suiha vara i ari na tamlohi, matan enia Natun Tamlohi.

²⁸ Ale ha sopo mařurahi matan hinau sei! Matan pongi matea mo lo mai vara la haratu la lo toho na taptap la pa rongoa na leon Natun Tamlohi, ²⁹ ale la pa malue, la haratu la vai na hina řuhu la pa sauteterahi la vano na mauri, la haratu la lo vai na hina hehe la pa sauteterahi la lavi na talai.

Retivuhesi Non Iesu

³⁰ Enau haseku a sopo eři vai te hinau. Haratu mo lo řuleau, enia mo vereea vara a pa ari sohen sava. Enau na ari tataholo matan na lo oloolo hinia, ale na sopo vai na masaloku matan na lo vai na masalona.

³¹ Vara a lo vereea enau haseku, tamlohi la pa sopo rasua vara na lo varařuhu. ³² Tamlohi tinapua matea mo lo vere na hinau varařuhu matakau. Ale na levosahia vara la hinau atu mo lo verera matakau enira la varařuhu. ³³ Kamim ka řule na tamlohi la vano isan John moiso, ale enia mo vereuli na retivarafuhu matakau isara, ³⁴ pani na sopo turu na vereulia nona tamlohi matakau, pani na lo vere la hinau sei matan vara ha pa eři juri hinira.

³⁵ Ale John enia lamu matea mo lo hani mo memera, ale kamim ka lo avulahi jea mata makomo rani na memerana.

³⁶ Pani hinau matea mo mele řuhu jea, mo jeu vereulia atu John mo lo vereea matakau. La hinau atu Tama mo silea isaku vara a

vaira, enira natu, la vujangia vara Tama hasena mo lo ruleau.

³⁷ Ale Tama sei mo lo ruleau, enia mo lo vereau, pani kamim ka sopo lo rongo na leona teni hitea hin te rani. ³⁸ Ale ka sopo lavi na nona reti na mapumim matan ka sopo rasu haratu mo lo ruleau na mai.

³⁹ Kamim ka lo ale na Retiulia matan ka romia vara hinira ha pa lavi na mauri tui. Retitapu sei la lo vereuliau, ⁴⁰ pani ka rohu vara ha mai isaku mata mauri tui.

⁴¹ Na sopo lavi na ooloo nona tamlohi matakū, ⁴² pani na levosahi kamim vara mo sopo te vonamim hatea i opoi God. ⁴³ Na lo mai na suiha hijan Tamaku, pani ka lo tipahiau. Vara te tamlohi i mai na hijana hasena, kamim ha pa avulahi vara ha lavia. ⁴⁴ Ha pa rasu sohena sava matan kamim, ka lo opoia vara tea i sile na ooloo isan te vonamim, ale ka sopo opoia vara God hasena i pa sile na ooloo isamim.

⁴⁵ Ha lo levosahia vara enau a pa sopo retitalai hin kamim isan Tama! Pani Moses sei, ka lo tau na nomim romtoho hinia, enia i pa retitalai hin kamim. ⁴⁶ Varafuhu, vara ha rasu Moses varafuhu, ha pa rasuau, matan enia mo uliuli matakū. ⁴⁷ Pani vara ka sopo efi rasu na sava Moses mo ulia, ha pa efi rasu na noku reti sohena sava?"

6

Iesu Mo Vahani Na Tamlohi

(Mt 14.13–21; Mk 6.30–44; Lk 9.10–17)

¹ Hitahun la hinai sei, Iesu mo vano na tavalu tasin Galilee la tovia Tiberias. ² Vao tavera la lo usuria matan la hite na mata-mata tavera mo lo vaia isana tamlohi rojia la mele ruhu. ³ Ale matan vao atu Iesu tolu na nona tamlohi usuri la sahe aulu na vutivuti, ale la sakele ea. ⁴ Pongi Passover hanhani tavera nona Jew mo lo mai.

⁵ Hin rani atu, Iesu mo hite na vao tavera la lo mai isana, mo usia isan Philip mara, "Ra palavi te hanhani epu vara ra pa vahani vevuhi la tamlohi nike hinia?" ⁶ Vea mo vereah sohena isan Philip vara i vaihitea matan enia mo levosahia moiso vara i pa vai na sava.

⁷ Philip mo faramia mara, "Voli tamlohi matea mata rani mo ngavulu sangavulu rua i sopo efi navu vara i vahanira hatehateahi na makomo pereti!" ⁸ Vonara, tamlohi usuri non Iesu matea, hijan Andrew, enia tasin Simon Peter, mo vereah isana mara, ⁹ "Natirihia matea nahai, mo lavi na pereti vavarihi mo lima la vaia na piri barley* peresi na maji mo rua, pani haratu mo ruhu na sava isan la tamlohi nike?"

¹⁰ Iesu mo vere mara, "Ha vere na tamlohi tari la saksakele nike!" Mo vereah sohena matan fuvufuvu ruhu hin jara atu mo mafivi. Evi tamlohi purongo la lo sakele atu mo tikeli tari vaha lima (5000). †

¹¹ Ale Iesu mo lavi pa la pereti atu mo vere meje isan God matara, moiso mo aseane na pereti isan la haratu la lo sakele. Mo lavi la maji atu mo vaia sohena. Mo vahani na tamlohi, la hanhani sohena la opoia, la masu.

¹² Hitahun haratu enira mo isoio la masu, Iesu mo vere na nona tamlohi usuri vara la takonahi na sopesope hanhani vara tea i pa sopo sati purongo. ¹³ Tamlohi non Iesu, la sohoni na tanga tavera mo sangavulu romana mo rua na sopesopen la pereti atu mo lima. ¹⁴ Hitahun matamata tavera atu Iesu mo vaia, tamlohi la tapulo vereah vara, "Tamlohi nike, enia pfovet atu Moses mo lo vereah vara i pa sinai na varama!" Deut 18.15–18

¹⁵ Moiso Iesu mo hitevosahia vara la pa ngurunguru isana vara la pa tahea nora supe. Ale matana, mo rovo mo sahe aulu na vutivuti vara i toho enia hasena.

Iesu Mo Hahau Na Pusa Tasi

(Mt 14.22–27; Mk 6.45–52)

¹⁶ Hin ravravi atu tamlohi usuri non Iesu la sevuti sivo na tasin Galilee, ¹⁷ moiso la vele na boti matea, la tapulo sua roto na tasi matan Capernaum, ale mo rofoha moiso, Iesu mo sopo lo sinai isara, ¹⁸ ale langi matea mo tapulo sere mo filangi, mo vaia mo tasiha.

¹⁹ Nona tamlohi la sua, la jeu na kilometre mo limarave moiso, ale la hite Iesu mo lo hahau na pusa tasi mo lo mai isara, la matahu tavera matana. ²⁰ Pani Iesu mo vereah isara mara, "Enau sei! Iesu! Ha sopo matahu!" ²¹ Nona tamlohi la opoia vara i vele na boti, ale vahatea purongo boti atu mo lo hoso hin jara atu la lo vano matana.

Iesu Enia Pereti Mata Mauri

²² Mo mele rani sahe, la vao atu la lo toho na tavalu tasi boti mo tai isara, la levosahia vara mo sopo mele te boti tinapua i lo toho atu, la levosahia vara Iesu mo sopo vele hin boti rihirihia atu peresi na nona tamlohi usuri, pani enira hasera purongo la malue. ²³ Hin rani atu, boti hai nona mara Tiberias la hoso mariviti hin jara atu Iesu mo lo vere meje mata hanhani ea. ²⁴ Ale vahatea purongo, la levosahia vara Iesu peresi na nona tamlohi usuri la sopo toho atu. Ale la vele hin la boti atu la sivo Capernaum vara la ale Iesu. ²⁵ Ale la vano la tapaia na tavalu tasi, la usia isana lara, "Tija, ko pa mai nangisa?"

* 6:9: barley: piri matea mo sohena piri wit mata flaua, pani tamlohi tilavono la hania.

† 6:10: Evi tamlohi

purongo: mo sopo evievi te hafai teni natuvarihia la lo toho ea.

²⁶ Iesu mo faramira mara, “Varaʻuhu na vereā isamim, ka sopo aleau mata mata-mata tavera ka lo hitera, pani matan ka lo hani vevuhi na hanhani ka opoia vara ha hanira. ²⁷ Ha sopo kalvono mata hanhani sei i pa tihai purongo, pani ha vavahinau matan hanhani sei i pa sopo eʻi tihai ale i pa sile na mauri tui. Natun Tamlohi i pa sile kamim hin hanhani atu matan, Tama mo tinafihia vara enia i vaia.”

²⁸ Vao atu la usia lara, “Sava hināu tata-holo natu, God mo opoia vara kama pa vaia?”

²⁹ Iesu mo faramira mara, “Vavahinau sei God mo opoia mo sohen harihi: vara ha tau na nomim rasua hin haratu mo lo ʻulea.”

³⁰ La faramia lara, “Sava matamata o pa vaia, matan vara kama pa tau na nomam rasua hiniho? Engko o pa vai na sava? ³¹ Pimam tuai la hani na mana na tano koru. Sohen la ulia na Retiulia vara, ‘Mo silera na pereti mo tai na tuka vara la hania.’” *Exo 16.4*

³² Iesu mo verera hinia mara, “Varaʻuhu na vereā isamim, Moses mo sopo sile na pereti mo tai na tuka isamim, pani Tamaku natu mo lo sile kamim na pereti varaʻuhu sei mo tai na tuka. ³³ Pereti atu God mo silea enia haratu mo tai na tuka, matan vara i sile na mauri na varama.”

³⁴ Ale la tamlohi atu la vereā lara, “Moli, tarea o pa sile kamam hin pereti atu!”

³⁵ Iesu mo faramira mara, “Enau pereti atu mo lo sile na mauri! Vara tea i mai isaku i pa sopo eʻi mele marohati. Mo sopo tea vara i tau na nona rasua hinia i pa mele marohu. ³⁶ Na vereā isamim moiso vara kamim ka hiteau, pani ka sopo lo rasuau! ³⁷ La haratu enira mo isoiso Tama mo lo sileau hinira la pa mai isaku. Ale haratu mo mai isaku a pa sopo tipahia.

³⁸ Matan enau na sevuti na tuka vara a pa vai na masalon God. Na sopo mai vara a pa vai na masaloku haseku. ³⁹ Hara nika masalon haratu mo lo ʻuleau, vara a sopo vaitihai te vonan la haratu mo lo sileau hinira, pani enau a pa sauteterahira na pongi hitahu.† ⁴⁰ Masalon Tamaku mo sohen harihi, mo opoia vara la haratu la hite Natuna, la pa tau na nora rasua isana, ale vara la lavi na mauri tui. Ale na pongi hitahu, enau a pa sauteterahira.”

⁴¹ Ale tamlohi tavera nona Jew atu la tapulo ngutungutu matan mo vereā vara, ‘Enau natu, pereti atu mo tai na tuka!’ ⁴² Ale la vereā lara, “Avei, tamlohi akerihi, enia Iesu natun Joseph sei teni mo vono? Enʻa ʻa levosahi tamana enia tinana, pani mo pa vere vara enia mo tai na tuka sohenā sava?”

⁴³ Iesu mo vereā isara mara, “Ha sopo mele ngutungutu! ⁴⁴ Tama mo ʻuleau, ale masalon Tama hasena sei mo vai na tamlohi i eʻi mai isaku, vara i vono, ipa sopo tea i eʻi mai isaku. Pani vara tea i mai isaku, a pa sauteterahia na pongi hitahu. ⁴⁵ Sava sei la uli na reti nona ʻprovet tuai lara, ‘God i pa vujangira enira mo isoiso’. *Isa 54.13* Ale la haratu la lo tapurongo hin Tama, la pa lavi na levosahi isana, enira la pa mai isaku.

⁴⁶ Haratu hasena sei mo tai isan God mo hite Tama atu. Mo sopo mele te tinapua vara i hite Tama hin te pongi. ⁴⁷ Varaʻuhu na vereā vara la haratu la lo tau na nora rasua hinia, la pete lavi na mauri tui moiso. ⁴⁸ Enau pereti atu mo lo sile na mauri! ⁴⁹ Pimim tuai la hani na mana na tano koru, ale la mate. ⁵⁰ Pani pereti atu mo lo tai na tuka mo sevuti matan vara tea vara i hania i pa sopo eʻi mate hin te pongi. ⁵¹ Enau pereti mauri atu mo tai na tuka! Vara tea i hani pereti atu enia i pa mauri jejeu. Pereti mauri atu a pa silea isana tamlohi na varama, enia epeku.”

⁵² Ale, tamlohi tavera nona Jew atu la rohu hin Iesu la tapulo vauriuri isara hasera lara, “Sohena sava natu, tamlohi nika i eʻi silera na epēna vara ʻa hania?”

⁵³ Iesu mo vereā isara mara, “Varaʻuhu na vereā isamim, vara ha sopo hani na epen Natun Tamlohi, ale vara ha sopo inu na ʻaena, i pa sopo te mauri varaʻuhu hin kamim. ⁵⁴ Pani haratu mo hani na epeku, mo inu na ʻaeku, enia mo pete lavi na mauri tui moiso, ale enau a pa sauteterahia na pongi hitahu. ⁵⁵ Epeku, enia hanhani varaʻuhu, ale ʻaeku, enia wai inu varaʻuhu. ⁵⁶ Vara tea i hani na epeku, ale i inu na ʻaeku, enia i pa toho hinia, enau a pa toho hinia.

⁵⁷ Tama sei mo ʻuleau, enia mo lo mauri, ale enau na lo mauri matana. Nake, tamlohi tari sei la haniau la pa mauri matakū. ⁵⁸ Pereti nika, mo tai na tuka mo sinai, mo sopo sohen haratu pimim la hania tuai matan enira la mate, pani hare mo hani pereti nika, i pa mauri jejeu.” ⁵⁹ Iesu mo lo retivujavujangi na ima lotu nona Jew Capernaum na rani mo lo vere la hināu sei.

La Vahari Hinia

⁶⁰ Nona tamlohi usuri matavana la rongo nona reti atu lara, “Avei, hara sei mo lo vere na sava sei?”

⁶¹ Iesu mo levosahia vara nona tamlohi usuri la lo ngutungutu, ale mo usira mara, “Ka rongo hināu sei mo sati? ⁶² I pa sohenā sava vara ha hite Natun Tamlohi i mele sahe na tuka sei mo tai ea mo sinai? ⁶³ Tamumena enia natu, mo lo sile na mauri! Suiha tamlohi i sopo eʻi vai te hināu. Noku reti na

† 6:39: pongi hitahu: pongi atu God i pa ari na tamlohi tari hinia.

lo vereia isamim, la tai isan Tanume atu sei mo lo sile na mauri. ⁶⁴ Pani te vonamim la sopo rasuau." Iesu mo vereia sohena matan na pongi tiroma mo levosahia moiso vara harepu i pa rasua, ale harepu i pa turuposi hinia.

⁶⁵ Ale Iesu mo mele vereia mara, "Matan haratu na vereia isamim moiso vara, 'I pa sopo tea i efi mai isaku vara Tama enia i sopo tinafihia vara i mai tiroma'."

⁶⁶ Matan la hinau sei Iesu mo verera, nona tamlohi usuri matuvana la vahafi hinia, la sopo mele usuria. ⁶⁷ Iesu mo usi la nona tamlohi usuri atu tupu sangavulu romana mo rua (12)

mara, "Kamim sohena ha pa rovo hiniau?" ⁶⁸ Simon Peter mo faramia mara, "Moli, mo sopo mele te tamlohi vara kama pa efi vano isana. Nom reti la sile na mauri tui. ⁶⁹ Kama rasuho, kama levosahia mo fuhu nake vara engko natu, tamlohi atu mo tapu non God!"

⁷⁰ Iesu mo vereia isana nona tamlohi mara, "Na viřoni kamim tupu sangavulu romana mo rua (12) pani vonamim matea enia tanume sasati matea!" ⁷¹ Iesu mo lo vere hinau sei matan Judas natun Simon Iscariot matan hitahu i pa halu na hijan Iesu, hina purongo hin haratu vara enia mo vonan la tupu sangavulu mo rua (12) atu, tamlohi non Iesu.

7

Tasin Iesu La Sopo Rasua

¹ Iesu mo hahau řalihi Galilee, pani mo sopo vano mariviti Judea matan tamlohi tavera nona Jew la opoia vara la vilimateia.

² Hanhani tavera nona Jew la tovia Tabernacle, pongina mo lo mai mariviti. ³ Ale tasin Iesu la lo vereia isana lara, "O vano Judea matan vara nom tamlohi usuri la pa efi hite na nom matamata tavera sei ko lo vaira. ⁴ Vara tamlohi matea mo opoia vara tamlohi la levosahia, i pa turu na naho tamlohi, i pa sopo jarohi na nona savahinau. Vara ko lo vai la hinau atu varafuhu, mo fuhu vara o vai na nom savahinau na naho tamlohi." ⁵ Tasina sohena la sopo lo rasua.

⁶ Pani Iesu mo faramira mara, "Noku pongi mo sopo lo mai, pani kamim ka tatamahu na rani tari. ⁷ Tamlohi varama la pa sopo tipahi kamim, pani la pa tipahiau matan na lo vereuli na nora sasati la lo vaira. ⁸ Kamim hasemim, ha sahe hin hanhani tavera atu. A pa sopo sahe nakerihi matan noku pongi mo sopo lo pala vevuhi." ⁹ Iesu mo vere hinau atu, ale mo lo toho atu Galilee.

Iesu Mo Vujangi Na Temple

¹⁰ Ale tasin Iesu la sahe hin hanhani tavera atu, Iesu mo pa lo sahe hitahu, tea mo sopo levosahia. ¹¹ Hin hanhani tavera

atu tamlohi tatavera nona Jew la lo ale Iesu lara, "Enia nene?"

¹² Vao tamlohi atu sohena la lo vasvas matana. Hai lara, "Iesu enia tamlohi fuhu matea."

Ale hai lara, "Enia mo lo halu na tamlohi."

¹³ Pani tamlohi la matahuni na tamlohi tatavera nona Jew ea, ale la sopo sorahi Iesu na naho vao.

¹⁴ Na sope rani matan hanhani tavera atu, Iesu mo unu na Temple, ale mo tapulo vujangi. ¹⁵ Tamlohi tavera nona Jew la mafurahi hinia, ale lara, "Tamlohi nike, mo pa patuha sohena sava? Tea mo sopo vujangia!"

¹⁶ Iesu mo faramira mara, "Enau na sopo vujangi na sava vara a haseku romfomia. Sava na lo vujangia mo tai isan haratu mo lo ruleau. ¹⁷ Vara ha pa lo opoia varafuhu vara ha ooloo hin God, ha pa levosahia vara enau na lo vujangi na sava mo tai isan God, pani mo sopo isaku haseku. ¹⁸ Haratu mo opoia vara tamlohi la sile na ooloo isana matan mo lo romfomia vara nona retireti mo tai isana hasena enia hapahapa, pani haratu sei mo opoia vara i sile na ooloo isan haratu mo lo rulea, enia tamlohi matea mo lo vere na varafuhu, ale mo sopo te hehe isana. ¹⁹ Moses mo sile kamim na Leu teni mo vono? Pani mo sopo te vonamim hatea i ooloo hinia! Ka opoia vara ha vilimateiau mata sava?"

²⁰ Vao atu la faramia lara, "Ko putu! Sava tanume mo unu hiniho mo vaiho ko romia vara tea mo opoia vara i vilimateiho?"

²¹ Iesu mo faramira mara, "Enau na vai na matamata tavera matea purongo, ale kamim mo isoiso ka mafurahi tavera hinia.

²² Moses mo retileu vara ha pa taifalihi na natumim, pani retileu atu mo sopo tai isan Moses, mo tai isan pimim tuai atu Abraham, pani nake kamim ka lo taifalihi na natumim na Sabbath, ²³ Ale vara ha taifalihi te tamlohi hatea na Sabbath matan vara ha pa sopo tope na Leu non Moses, mata sava ka lo lolokoru hiniau matan enau na lo vai na tamlohi rojoo epena tari la mele fuhu na Sabbath? ²⁴ Ha sopo ari na tamlohi na nomim kilakilau purongo! Ha ari na malele tataholo."

Iesu Enia Kristo

²⁵ Mara Jerusalem hai, la lo vereia lara, "Avei, mo sopo tamlohi nike natu, sei la lo vaihitea vara la pa vilimateia? ²⁶ Pani enia nahai! Mo lo retireti isana naho vao, pani la sopo vere te hinau hatea isana, la tamlohi tavera nike la toma? Korong la pa hitevosahia vara enia natu, Kristo atu? ²⁷ Pani tamlohi nike, enfa řa levosahi na jarana, pani hare i pa levosahi na sava jara Kristo i pa tai hinia?"

²⁸ Iesu mo lo vujangi na lolo Temple atu, ale mo ulo mara, “Kamim ka romi vara ka levosahiau, ale sava jara na tai ea. Enau na sopo mai na masaloku. Haratu mo ruleau enia mo varaʻuhu, pani kamim ka sopo levosahia. ²⁹ Pani enau na levosahi haratu mo lo ruleau, matan enau na tai isana.”

³⁰ Tatuva tamlohi la vaihitea vara la taurilatia atu natu, pani pongina mo sopo lo masese. ³¹ Pani tamlohi matuvana hin vao atu la tau na nora rasua hinia lara, “Avei, vara Kʻristo atu i pala, ka romi vara enia i pa efi vai te matamata tavera i jeu tamlohi nike?”

La Vaihite Vara La Taurilati Iesu

³² Pharisee lara la rongo na vao atu la lo ngutungutu hin Iesu moiso la pulutahi peresi na moli pʻris, ale la rule na police mata Temple atu vara la taurilatia. ³³ Pani Iesu mo vereea isara mara, “Enau a pa mele toho isamim i peravu makomona purongo, moiso enau a pa sahe isan haratu mo lo ruleau. ³⁴ Ha pa aleau, pani ha pa sopo efi hiteau. Ha pa sopo efi vano na jara enau a pa vano ea.”

³⁵ Ale tamlohi tavera nona Jew la lo ususira hinia lara, “Enia i pa vano epu vara fa pa sopo efi tapaia? Korong i pa vano hin te jara tinapua sei noʻa tamlohi la lo toho ea vara i vujangira peresi na mara Greek teni mo lo vereea sohena sava sei?” ³⁶ Raramin nona retireti atu, enia sava sei mo vereea mara, “Ha pa aleau, pani ha pa sopo hiteau. Ha pa sopo efi vano na jara enau a pa vano ea.”

Retitauhi Mata Wai Mauri

³⁷ Isoiso rani matan hanhani tavera atu, enia rani tavera matara, ale Iesu mo turu mo ulo aulu mara, “Vara tea mo maʻohu, i mai isaku i inu!” *Isa 55.1* ³⁸ Vara ha rasuau, i pa sohena Retitapu mo vereea mara, ‘Wai mauri i pa roro malue na mapumim sohena wai roro matea.’” *Isa 58.11*

³⁹ Iesu mo lo retireti hin Tanume Tapu atu God i pa silea i pa sopo tuai isan la haratu la rasua. God mo sopo lo sile na Tanumena isan tea matan Iesu mo sopo lo turu na nona mateia.

Tamlohi La Patumasa

⁴⁰ Tatuva vao atu la rongo Iesu mo veree hinai sei, ale lara, “Avei, enia natu, pʻrovet atu Moses mo lo vereea!” *Deut 18.15*

⁴¹ Tatuara lara, “Enia natu, Kʻristo atu!”

Pani tatuara la lo vereea vara, “Kʻristo atu i pa sopo efi tai Galilee!” ⁴² Retitapu mo sopo vereea vara Kʻristo atu i pa vora na vaon Supe David na vanua Bethlehem?” *Psa 7.12; Mic 5.2* ⁴³ Vao tamlohi atu la tapulo hase asera matan Iesu. ⁴⁴ Tatuara la opoia

vara la taurilatia, pani tea mo sopo tau na limana hinia.

Tamlohi Tavera La Rohu Hinia

⁴⁵ Police mata Temple la mele hilu lekoleko, la vano isana pʻris tatavera peresi na Pharisee, ale Pharisee la usi na police lara, “Mata sava ka sopo lavi Iesu i mai nike?”

⁴⁶ La faramira lara, “Tea mo sopo lo vujangi i sohen tamlohi atu.”

⁴⁷ Pharisee la kilau falihi isara, ale lara, “Mo halu kamim sohera?” ⁴⁸ Avei, tea hin la haratu la lo tauri na suiha teni te Pharisee la rasua? ⁴⁹ Ka levosahia vara la jaraʻoha nike la sopo levosahi te hinai hatea na Leu. La lo toho na ruhuruhu lesati non God moiso.”

⁵⁰ Hin rani atu, Nicodemus mo lo toho peresira matan enia mo lo sakele na nora pulutahi, nona tamlohi tatavera atu, enia natu, tamlohi tiroma mo mai isan Iesu. Mo vereea mara, ⁵¹ “Avei, noʻa Leu mo vara fa sopo efi sile na talai isan te tamlohi vavano fa sakele fa rongo na nona retireti tiroma matan vara fa pa levosahi na sava mo vaia.”

⁵² Ale la vereea isana lara, “Nicodemus, engko ko tai Galilee teni mo vono? O vano o evi na Retiulia! O sopo efi hitea vara te pʻrovet hatea i pa tai Galilee!”

⁵³ Ale tamlohi tari atu, la mele mule.

8

Iesu Mo Romi Na Haʻai Matea

¹ Pani Iesu mo hahau mo vano na vutivuti la tovia Vuti talu Olive. ² Ale na falavuhu jea mo mele vano na Temple. Vao tamlohi la lo mai isana, mo sakele mo pa lo tapulo vujangira. ³ Ale Pharisee peresi na tamlohi vujangi mata leu la mai isana la taurilati na haʻai matea la vileia mo lo juruvi peresi na tamlohi matea mo sopo tuana. La vaia mo turu na livuha vao, ⁴ ale la vereea isan Iesu lara, “Rabai, haʻai nike la taurilatia mo lo vaivaileu peresi na tamlohi matea mo sopo tuana. ⁵ Leu non Moses mo vujangia vara haʻai sohen hananike la pa parumateia! Pani, engko ko vereea sohena sava?”

Lev 20.10; Deut 22.22–24

⁶ La usi retiusia sei matan vara la vaihite Iesu vara sava reti i pa vereea, ale la pa tau na talai hinia. Pani Iesu mo rautoho sivo atano, mo tapulo uliuli na varangona na lepa.

⁷ La lo area hin retiusia sei matan haʻai atu, moiso mo turu mo vereea mara, “Vara te vonamim mo sopo lo vai te hehe hin te rani, enia i parua tiroma!” ⁸ Ale mo mele rautoho mo mele uliuli na lepa. ⁹ La tamlohi atu la rovo hinia hatehateahi, vajiahara la tiroma. Hitahu Iesu enia haʻai atu purongo la pa lo toho atu. ¹⁰ Iesu mo turu mo usi haʻai atu mara, “Tamlohi tari la haipu? Mo sopo tea vara i sile na talai isam?” ¹¹ Haʻai atu mo

řaramia mara, “Mo vono, tija.” Ale Iesu mo veree isana mara, “Enau sohena, a pa sopo sile na talai isam. O vano natu, ale nake o sopo mele vai na hehe!”

Iesu Enia Malarani Varama

¹² Moiso Iesu mo mele retireti isana tamlohi, mo vere mara, “Enau malarani mata varama! Vara ha usuriau, ha pa sopo hahau na řořoha, ha pa lavi na malarani sei mo sile na mauri.”

¹³ Pharisee la reti isana lara, “Engko, ko lo vereulio hasem, ena sava ko lo veree mo sopo varařuhu!”

¹⁴ Iesu mo řaramira mara, “Hina purongo vara na lo hase vereuliau, sava na lo veree mo varařuhu matan enau na levosahi na jara na tai ea, ale enau na levosahia vara na lo vano epu. Pani kamim ka sopo levosahia vara enau na tai epu teni sava jara na lo vano hinia. ¹⁵ Kamim ka lo ari na tamlohi na kilakilau nona tamlohi purongo, pani enau na sopo ari tea. ¹⁶ Pani vara a sile na aria, aria atu i pa tataholo matan mo sopo enau haseku a pa vaia. Pani enau Tama sei mo lo řuleau kama pa turu na jara matelete purongo. ¹⁷ Na nomim Leu la ulia lara, vara tamlohi tupra rua la vere na hinau matelete moiso mo varařuhu, o pa efi rasua. *Deut 19.15*

¹⁸ Enau na lo hase retivuhesiau, ale Tama sei mo lo řuleau, enia mo lo retivuhesiau.”

¹⁹ La usia lara, “Tamam mo lo toho epu?”

Iesu mo řaramira mara, “Ka sopo levosahiau teni Tamaku! Vara ha pa lo levosahiau ha pa levosahi Tamaku.”

²⁰ Iesu mo lo vere la reti atu hin rani atu mo lo vujangi hin jara atu tamlohi la lo tau mamahuni na nora silesilea hinia na Temple. Pani mo sopo tea i taurilatia matan pongina mo sopo lo mai.

²¹ Mele vahatea Iesu mo veree isara mara, “Enau a pa malue, ale kamim ha pa aleau, pani kamim ha sopo efi vano na jara enau na lo vano ea, moiso kamim ha pa mate na nomim hehe matan God i pa sopo řomira.”

²² Tamlohi tavera nona Jew la usiusira lara, “Avei, mo lo vai na řomina vara i pa vilimateia hasena matan enia mara, ‘Ha pa sopo efi usuriau ha vano hin jara atu enau na lo vano ea!’ teni sava?”

²³ Iesu mo řaramira mara, “Kamim matan atano, pani enau na tai aulu. Kamim mata varama, pani enau mo vono. ²⁴ Na pete veree isamim moiso vara ha pa mate na nomim hehe vara ha sopo rasua vara enau haratu sei mo lo toho jejeu, ha pa mate na nomim hehe.”

²⁵ La usia lara, “Engko hare?”

Iesu mo řaramira mara, “Sava na lo veree isamim na pete veree isamim moiso na pongi tiroma.* ²⁶ Hinau matuvana a efi veree isamim matan vara a ari kamim matana, pani haratu mo lo řuleau, enia mo varařuhu, ale sava hinau mo lo veree isaku enia natu, na lo veree isana tamlohi na varama.”

²⁷ Tea mo sopo lo levosahia vara Iesu mo lo vere na hinau matan Tama. ²⁸ Iesu mo mele veree mara, “Hin pongi atu vara ha tahe Natun Tamlohi, ha pa levosahia vara enau natu, haratu mo lo toho jejeu. Ha pa levosahia vara enau haseku a pa sopo efi vai te hinau haseku, na lo vere na sava purongo, Tama mo vujangiau hinia. ²⁹ Haratu mo řuleau, enia mo lo toho pereziau. Tarea na lo usuri na masalona, ale enia i pa sopo tinařihiau.”

³⁰ Hin pongi atu Iesu mo lo vere la hinau sei, tamlohi matuvana la tau na nora rasua hinia.

Retivararuhu I Pa Teriho

³¹ Ale Iesu mo veree isana tamlohi tavera nona Jew atu la rasua ea mara, “Vara ha lo oloolo hin na noku vujangi, ha pa noku tamlohi usuri varařuhu, ³² ale ha pa levosahi na retivararuhu, moiso retivararuhu atu i pa teri kamim.”

³³ La řaramia lara, “Kamam mahapin Abraham tataholo! Kama sopo lo slev isan te tamlohi hatea, ko pa veree sohena sava vara kama pa materi?”

³⁴ Ale Iesu mo řaramira mara, “Varařuhu na vere kamim hinia, haratu mo lo hehe enia slev non hehe! ³⁵ Slev mo sopo toho na lolo vao ima matea jejeu, pani Natuna i pa toho jejeu. ³⁶ Ale vara Natuna i vai kamim ha materi, ha pa materi varařuhu. ³⁷ Na levosahia vara kamim mahapin Abraham, pani ka lo opoia vara ha vilimateiau matan noku reti mo sopo toho na maurimim varařuhu. ³⁸ Enau na lo vere kamim na sava Tamaku mo vujangiau hinia, mo sohen kamim ka lo vai na sava tamamim mo lo vujangi kamim hinia.”

³⁹ La tamlohi atu la řaramia lara, “Abraham enia tamamam.”

Iesu mo řaramira mara, “Vara kamim natun Abraham, ha pa vai na sava Abraham mo lo vaia. ⁴⁰ Pani kamim ka opoia vara ha vilimateiau matan na lo vere kamim na retivararuhu God mo sileau hinia. Abraham mo sopo vai te hinau sohena. ⁴¹ Pani kamim ka lo vai na hinau tataholo sohen tamamim mo lo vaia.”

Ale la řaramia lara, “Pani kamam kama sopo natu malele! Kamam tamamam matea purongo, kama natun God!”

* 8:25: hai la posi sope jara akerihi sohen harihi, ‘Kamim ka tinapua, a pa mele retireti peresi kamim mata sava?’

⁴² Iesu mo faramira mara,

“Vara God enia tamamim, kamim ha pa opoiau matan enau na tai isan God. Enia mo ruleau, ale enau na sopo mai na masaloku haseku. ⁴³ Mata sava ka sopo efi levosahi na sava na lo vereia isamim? Ka opoia vara ha peropero na sava na lo vereia isamim? ⁴⁴ Tamamim enia Tiapolo, kamim ka lo vai na masalona. Pongi tiroma enia tamlohi vilimatei na tamlohi, ale enia tamlohi halu. Mo sopo te hinau varaʻuhu hinia. Enia mo lo vere na masalona purongo, ale hinau tari mo vereia enira halu. Mo sopo vara enia tamlohi halu purongo, pani enia tina halu.

⁴⁵ Pani hinau tari na lo vere kamim hinia la varaʻuhu, pani kamim ka pa lo rohu vara ha rasuau. ⁴⁶ Te vonamim i efi vereia vara na vai te hehe? Vara na vere na varaʻuhu, ka sopo rasuau mata sava? ⁴⁷ Haratu enia non God i pa tapurongo na nona reti, pani kamim ka rohu vara ha tapurongo matan ka sopo non God.”

⁴⁸ Ale tamlohi tavera nona Jew la vereia isan Iesu lara, “Kamam kama varaʻuhu hin haratu kama vereia vara, engko mara Samaria matea, ale tanume sasati matea mo lo toho hiniho!”

⁴⁹ Iesu mo faramira mara, “Mo sopo te tanume sasati hiniho! Enau na lo ooloo hin Tamaku, pani kamim ka rohu vara ha ooloo hiniau. ⁵⁰ Enau na sopo opoia vara a lavi na ooloo matakua haseku, mo vono, pani matea enia mo opoia vara a lavi na noku ooloo, ale enia natu, haratu i pa sile na aria. ⁵¹ Varaʻuhu na vere kamim hinia, vara ha ooloo na noku reti, ha pa sopo efi mate!”

⁵² Tamlohi tavera nona Jew sei la lo toho atu la lo tapurongo hinia lara, “Nake natu, kama levosahia vara tanume sasati matea mo lo toho isam. Abraham mo mate moiso, ale la pʻovet atu tuai sohena. Mo sohena sava natu, ko pa vereia vara, la haratu la lo ooloo na nom reti, la pa sopo efi mate?”

⁵³ Engko ko aulu ko jeu tamamam Abraham? Enia mo mate, ale la pʻovet atu tuai sohena la mate. Engko ko romi vara engko hare?” ⁵⁴ Iesu mo faramira mara, “Vara enau a lo hase tahe hijaku aulu, hijaku i pa sopo aulu varaʻuhu. Tamaku natu, enia mo lo tahe na hijaku aulu, enia haratu kamim ka lo tovia nomim God, ⁵⁵ ka lo vereia, pani ka sopo levosahia varaʻuhu. Vara enau a vereia vara na sopo levosahia, enau a pa tamlohi halu matea sohemim kamim mo isoiso, pani enau na levosahia, ale na lo vai na sava mo lo vereia. ⁵⁶ Tamamim Abraham mo avulahi tavera matan mo hite na noku pongi pala, ale mo avulahi matana.”

⁵⁷ Ale la tamlohi tavera nona Jew atu la vereia isana lara, “Pani engko taunim mo sopo lo tikeli ngavulu lima (50)!

Ko pa hite Abraham sohena sava?” ⁵⁸ Iesu mo faramira mara, “Varaʻuhu na vereia isamim, Abraham mo sopo lo vora, enau na lo toho moiso, enau haratu mo lo toho jejeu.” ⁵⁹ La rongo nona reti atu, la vilevilei vatua vara la pa paru Iesu, pani mo luhu hinira, ale mo malue hin Temple atu.

9

Tamlohi Vuso Mo Kilau

¹ Iesu mo pa lo hahau, ale hin rani atu mo hite na tamlohi matea mo vora mo matavuso moiso. ² Tamlohi usuri non Iesu la usia isana lara, “Avei, Tija, mata sava tamlohi nike mo vora matana mo vuso? Mata nona hehe teni hehe non tamana enia tinana?”

³ Iesu mo faramira mara, “Mo vono, mo sopo mata nona hehe teni hehe non tamana teni tinana. Pani matan mo matavuso, ha pa efi hite God i vai na matamata tavera hinia. ⁴ Nake mo lo rani, ʻra pa vai na masalon haratu mo lo ruleau. Pongi mo lo mai, ale i pa sopo tea i efi vai te vavahinau hinia. ⁵ Ale nakerihi na pa lo toho na varama, enau na malarani mata varama.”

⁶ Iesu mo vere reti atu moiso, mo litovi na lepa, mo hoi na lepa peresi na litona, ale mo jarai makamaka atu na matan tamlohi atu. ⁷ Ale mo vereia isana mara, “O vano, o hoje nafihi na lepa na paltungu Siloam!” Tamlohi atu mo vano na paltungu Siloam, faramin hija atu enia ‘Haratu la rulea’. Hin rani atu mo hoje nafihi na lepa moiso mo efi kilau, ale mo mule.

⁸ Hin rani atu tahisana peresi la haratu la hitea la lo ususira lara, “Avei, tamlohi sei natu, enia tamlohi sei tarea mo lo sakele mo lo ususi teni mo vono?”

⁹ Tatuara lara, “Enia natu, tamlohi atu!”

Ale tatuara lara, “Mo vono, pani mo sohen tamlohi atu.”

Pani tamlohi atu hasena mo vereia mara, “Enau sei, tamlohi atu!”

¹⁰ La usia lara, “Pani nake, ko pa kilau sohena sava?”

¹¹ Mo faramira mara, “Tamlohi matea hijana Iesu, mo vai na makamaka mo jaraia na matakua, mo ruleau vara a vano a hoje nafihi na paltungu Siloam. Vahatea atu na vaia na efi kilau.”

¹² La usia lara, “Mo lo toho epu nakerihi?” Mo faramira mara, “Na sopo levosahia.”

Sorasorahin Iesu

¹³⁻¹⁴ Hin rani atu Iesu mo vai tamlohi atu mo fuhu na lepa peresi na litona, enia Sabbath matea. Tahisana la lavia mo vano isana Pharisee. ¹⁵ Pharisee la mele usia vara mo pa kilau sohena sava. Tamlohi atu mo faramira mara, “Enia mo jarai na lepa na

mataku moiso na hoje naʻihia, ale nake na eʻi kilau.”

¹⁶ Tatu Pharisee la vereea isana lara, “Tamlohi nike, mo sopo tai isan God matan mo lo tope na Sabbath!”

Pani tatuara la vereea lara, “Sohena sava natu, tamlohi hehe matea i pa eʻi vai te matamata tavera sohen harihi?” Ale matana, Pharisee la patumasa, ¹⁷ la mele usi tamlohi atu lara, “Pani engko ko romia vara tamlohi atu mo vaiho ko kilau, enia hare?”

Mo faramira mara, “Enia pʻoʻvet matea!”

¹⁸ Pani la tamlohi tatavera atu nona Jew la rohu vara la rasua vara tamlohi sei natu, matana mo matavuso tiroma. Ale, la vahafule matan tamana enia tinana. ¹⁹ Ale, la mai moiso la usira lara, “Haranike natu, enia natumim sei ka vereea vara mo vora mo vuso? Sohena sava mo pa kilau nake?”

²⁰ Tamana enia tinana la faramira lara, “Kama levosahia vara enia natumam, ale kama levosahia vara mo vora mo vuso, ²¹ pani kama sopo levosahia vara mo pa kilau sohena sava, teni hare mo vaia vara i eʻi kilau. Ha usia isana! Enia mo tamlohi moiso, ale enia hasena i pa vereea.”

²²⁻²³ Tamana enia tinana la vereea sohena matan la matahuni na nora tamlohi tatavera nona Jew. Matan nora tamlohi tatavera la hatihia moiso vara la pa tipahi te tamlohi na nora ima lotu vara la lo vereea vara, Iesu enia Kʻristo.

²⁴ Tamlohi tatavera la mele tovi pa tamlohi sei mo vuso tiroma mo mele sinai, la vereea isana lara, “O reti tataholo na nahon God vara o pa vere na hinau varaʻuhu! Kama levosahia vara Iesu enia tamlohi hehe matea.”

²⁵ Tamlohi atu mo faramira mara, “Na sopo levosahia vara enia tamlohi hehe teni mo vono. Na levosahia vara tiroma na vuso, pani nake na kilau.”

²⁶ La usia isana lara, “Mo vai na sava isam? Mo vai mamahuni na matam sohena sava?”

²⁷ Tamlohi atu mo faramira mara, “Na pete vereea isamim vahatea moiso, pani ka rohu vara ha tapurongo. Ka opoia vara a mele vereea mata sava? Kamim sohena ka opoia vara ha mai na nona tamlohi usuri?”

²⁸ La kalia moiso, ale lara, “Engko nona tamlohi usuri! Kamam tamlohi usuri non Moses! ²⁹ Kama levosahia vara God mo reti isan Moses, pani kama sopo levosahia vara harakerihi mo tai epu.”

³⁰ Tamlohi atu mo faramira mara, “Kamim ka tinapua! Tamlohi atu mo vai mamahuni na mataku, pani kamim ka sopo levosahia vara mo tai epu! ³¹ Ra levosahia vara God mo lo tueni la haratu la opoia, ale la ololo hinia. God mo sopo tueni na tamlohi hehe. ³² Tuai jea na tapulo

varama mo tikeli nake hare mo rongoa vara te tamlohi mo mele vai mamahuni te tamlohi mo vora mo vuso vara i kilau. ³³ Vara tamlohi atu i sopo tai isan God, i pa sopo eʻi vai te hinau hatea sohen harihi.”

³⁴ La faramia lara, “Tarea engko ko tamlohi hehe na rani ko vora mo tikeli nake. Engko ko romromia vara o pa eʻi vujangi kamam hin te hinau hatea?” Ale la pulahi naʻihia la tipahia.

³⁵ Iesu mo rongo hinau atu mo masee moiso mo vano vara i ale tamlohi atu, ale mo tapai mo usia mara, “Engko ko rasu na Natun Tamlohi?”

³⁶ Mo faramia mara, “Moli, vara o vereea hinia vara enia hare, a pa tau na noku rasua hinia.”

³⁷ Iesu mo vereea isana mara, “Engko ko hitea moiso, ale nakerihi enia mo lo retireti peresiho.”

³⁸ Tamlohi atu mara, “Moli, na rasua.” Ale mo papaahi mo lotua.

³⁹ Moiso Iesu mo vereea mara, “Na mai vara aria i mai na tamlohi na varama. Na mai nike, vara a roi na matavuso la kilau, ale vara a vai la haratu la eʻi kilau, matara la vuso.”

⁴⁰ Pharisee la rongo Iesu mo vere hinau atu moiso, la usia lara, “Kamam kama matavuso?”

⁴¹ Iesu mo faramira mara, “Vara ka vuso i pa sopo te nomim hehe, pani nake matan ka lo vereea vara kamim ka lo kilau, kamim ha pa lo toho na nomim hehe.”

10

Iesu Enia Tavui Sipsip ruhu

¹ “Varaʻuhu na vereea isamim, tamlohi vavanaho peresi la haratu la lo vili na tamlohi mata vavanaho, la lo vele palausi na voʻa vara la unu na jara sipsip, la sopo unu na matarua voʻa.

² Pani haratu mo unu na matarua jara sipsip enia tavui sipsip tataholo. ³ Tamlohi kilau na matarua atu i pa roi na matarua matan vara tavui sipsip hasena i pa unu, ale sipsip la pa levosahi na leon tavuira moiso enia i tovi na pulana sipsip na hijara hatehateahi moiso i tiromara la malue.

⁴ Hin rani atu vara tavui sipsip mo tiroma na pulana sipsip tari vara la malue hin rope sipsip atu, enia mo tiromara, ale la usuria matan la rongovosahi na leona. ⁵ La pa sopo eʻi usuri te vinano hatea matan la pa sopo rongovosahi na leon vinano atu, pani la pa rovo hinia.”

⁶ Iesu mo vere titileu atu isara, pani la sopo levosahi na sava mo lo vereea isara.

⁷ Ale Iesu mo mele vereea mara, “Varaʻuhu na vereea isamim, enau matarua mata sipsip. ⁸ Tamlohi tari la mai tiroma hinia,

enira tamlohi vavanaho peresi la haratu la lo vili na tamlohi mata vavanaho, pani sipsip la pa sopo tapurongo isara. ⁹ Enau matarua. Vara tea i unu hiniāu, enia i pa juri, i pa efi unu, ale i pa mele malue vara i vilei na fuvufuvu ruhu mata hanhani.

¹⁰ Tamlohi vavanaho mo mai matan vara i pa vanaho i vilimatei, ale i komokomo purongo. Enau na mai vara haratu la unu hiniāu, la pa lavi na mauri fuhufuhu jea. ¹¹ Enau tavui ruhu mata sipsip. Tavui ruhu mata kilau na sipsip mo tau na maurina mata pulana sipsip. ¹² Tamlohi voko mata mania, * enira la sopo sohena tavui sipsip matan mo sopo pulara sipsip ale hin rani atu vara la hite na wolf i mai, † la pa rovo na sipsip, ale la pa sopo turuhoro na wolf sei enia viriu jala matea mo sati. Wolf i pa komora la rovorovo. ¹³ Tamlohi voko la rovo matan la sopo fomfomia vara la pa kilau na sipsip.

¹⁴ Enau tavui ruhu mata sipsip. Enau na levosahi na pulaku sipsip, enira la levosahiau ¹⁵ sohena Tama mo levosahiau, ale enau na levosahi Tama, ale enau na sile na mauriku mata pulaku sipsip. ¹⁶ Tatua pulaku sipsip la sopo lo toho na lolon voa nika. A pa lavira la mai sohera, ale la pa tapurongo na leoku. La pa mai matea, ale tavui sipsip i pa matelete.

¹⁷ Ale Tama mo opoiau matan enau na sile na mauriku matara, ale a pa mele efi lavia. ¹⁸ Mo sopo tea i efi lavi na hia isaku, pani enau na silea na masaloku purongo. Enau na lavi na suiha matan vara a silea, ale na lavi na suiha matan vara a mele lavia sohen Tamaku mo retileu vara a vaia.”

¹⁹ Tamlohi tatavera nona Jew atu la mele patumasa mata sava Iesu mo lo vereā isara. ²⁰ Matuvana lara, “Tanume sati matea mo lo toho hiniā! Mo putu! Mata sava ka lo tapurongo isana?”

²¹ Pani tatuara lara, “Vara tamlohi matea tanume sasati mo lo toho hiniā i pa efi vere na hināu sohen harihi sohena sava? I pa sopo te tanume sasati i efi vai na matavuso vara i kilau!”

La Tipahi Iesu

²² Hin rani atu na taro hamariri, hanhani tavera mata Dedication mo tapulo mata rani turuhi na Temple Jerusalem. ²³ Na rani matea Iesu mo lo hahau na lolo Temple hin jara atu la lo tovia Palapalan Solomon na roro ropen Temple atu, ²⁴ ale tamlohi tatavera nona Jew la falihia la vereā isana lara, “O pa vereuli kamam hiniho pangisa? Vara engko Kristo atu, o vere tataholo kamam hiniā!”

²⁵ Iesu mo faramira mara, “Na vere isamim moiso, pani ka rohu vara ha rasuau. Hināu na vaira na hijan Tamaku, enira la vujangia vara enau hare. ²⁶ Pani matan kamim mo sopo pulaku sipsip, ka sopo rasuau. ²⁷ Pulaku sipsip la rongvosahi na leoku, enau na levosahira, ale la pa usuria. ²⁸ Na silera na mauri tui, ale i pa sopo te hatea i efi thai hin te rani, ale mo sopo tea i efi tuahi na hira na limaku. ²⁹ Tamaku natu, mo silera isaku, ale enia mo aulu jea mo sopo tea i sohena, ale mo sopo tea i efi tuahi na hira na liman Tama, ³⁰ ale enau na matea peresi Tama.”

³¹ Mele vahatea tamlohi tatavera nona Jew atu la lavi na vatu vara la pa parumatei Iesu hinira. ³² Pani mo vereā isara mara, “Enau na vujangi kamim na hina ruhu matuvana Tama mo ruleau vara a vaira. Sahara hinira natu, ka opoia vara ha paruu matana?”

³³ La tamlohi tatavera nona Jew atu la faramia lara, “Kama sopo paruhu matan te hināu ruhu ko vaia, pani matan engko tamlohi purongo ko lo hase vaiho ko sohen God matan ko lo retihehe vara engko God!” *Lev 24.16*

³⁴ Iesu mo faramia mara, “Na nomim leu la ulia vara, ‘Na vereā vara kamim god’. *Psa 82.6* ³⁵ Ale, kamim ha sopo efi tope na Retitapu sei mo vereā vara God mo retireti isana tamlohi, ale mo tovera vara enira god. ³⁶ Ale, mata sava ka lo vere lejilejiau vara na lo retihehe matan na lo vereā vara enau Natun God? Pulon hināu sei Tama enia mo tauhasehiau mata masalona vara a pa vai la hināu sei. Enia natu, haratu mo lo ruleau na varama. ³⁷ Vara a sopo vai la hināu sei Tamaku mo lo vaira, ha sopo rasuau, ³⁸ pani vara a vai na hināu Tama mo lo vaia, hina purongo vara ha sopo rasuau, pani mo ruhu vara ha rasu God matan la hina mafurahi sei na lo vaira. Matan hināu atu ha pa levosahia varafuhu vara Tama enia mo matea peresia, ale enau na matea peresi Tama.”

³⁹ Mele vahatea la opoia vara la taurilati Iesu, pani mo majuri na limara, ⁴⁰ ale mo vano roto na wai Jordan hin jara atu John mo lo paptijo ea tiroma. Hin rani atu Iesu mo lo toho atu, ⁴¹ tamlohi matuvana la mai isana. La lo vereā lara, “John mo sopo vai te matamata tavera hatea, pani hināu tari mo vereā matan Iesu, enira la varafuhu.” ⁴² Tamlohi matuvana la tau na nora rasua hin Iesu hin jara atu.

11

Lazarus Mo Mate

* **10:12:** tamlohi voko: haratu la kilau na sipsip mata mania purongo. † **10:12:** wolf: enia viriu jala tavera matea i efi vilimatei na tamlohi peresi na sipsip.

¹⁻² Tamlohi matea hijana Lazarus, mo rojo na vanuan Bethany. Vetasina mo rua, Mary enia Martha la lo toho peresia. Mary enia hafai atu sei mo lo surei na hasori na palon Moli peresi na patuna, ale mo kamoti na palona na vuluna. ³ Vetasin Lazarus la sohai na reti isana lara, “Tija, tapalam fuhu sei Lazarus mo rojo tavera.”

⁴ Hin rani atu Iesu mo rongoa, mo vereia mara, “Rojo atu, i pa sopo isoiso na mate, pani i pa sile na ooloo isan God, ale Natuna i pa lavi na ooloo matan haratu i pa vaia.”

⁵ Iesu mo opoi Martha enia vetasina peresi Lazarus. ⁶ Ale matan mo rongoa vara mo rojo Iesu mo mele toho atu rani mo rua. ⁷ Hitahun haratu, mo vereia isana nona tamlohi usuri mara, “Nake fa mele sahe Judea.”

⁸ Nona tamlohi usuri la faramia lara, “Tija, mo fuhu, pani mo sopo tuai sei tamlohi tatavera atu nona Jew la opoia vara la pa parumateiho! Avei, ko opoia vara o pa mele vano atu?”

⁹ Iesu mo faramia mara, “Matan alo mo visa na rani matea? Ka levosahia vara mo sangavulu romana mo rua (12). Vara o hahau na rani o pa hite na mera alo, ale o pa sopo tialahalaha. ¹⁰ Pani vara o hahau na vutepongi o pa tialahalaha matan mo sopo te mera hinia.” ¹¹ Ale mo vereia isara mara, “Tapalafa Lazarus mo lo juruvi, pani enau a pa vano vara a pa foahaia.”

¹² Nona tamlohi usuri la faramia lara, “Tija, vara enia mo lo juruvi, enia i pa mele rongoa i fuhu.” ¹³ Iesu mo levosahia vara Lazarus mo mate, pani enira la lo romomia vara enia mo lo vereia vara mo lo juruvi romaliho purongo.

¹⁴ Moiso Iesu mo vere tataholoia isara mara, “Lazarus mo mate, ¹⁵ na avulahi matam matan na sopo toho atu matan nake masapa matea vara ha pa tau na nomim rasua hiniau, fa vano isana!”

¹⁶ Ale Thomas sei la lo tovia Havo, mo vereia isan tamlohi usuri tinapua non Iesu atu mara, “Eh! Ha turu, fa vano! Enfa fa vano vara fa pa tolu mate peresi Moli.”

Lazarus Mo Mele Mauri

¹⁷ Na rani Iesu mo kakau Bethany, mo rongoa vara Lazarus la taua na papavatu rani mo vati moiso. ¹⁸ Taon sei Bethany mo lo toho mariviti kilometre mo tolu, ale mele sopena asau hin Jerusalem, ¹⁹ ale tamlohi tatavera nona Jew matuvana la mai isan Martha enia Mary, vara la tangtangi pere-sira matan tavaira mo tihai.

²⁰ Vahatea atu Martha mo rongoa vara Iesu mo pala, mo malue vano vara i tapai, pani Mary mo lo toho na ima. ²¹ Martha mo vereia isan Iesu mara, “Tija, vara o pa lo toho nike tavaiku i pa sopo mate, ²² pani hina

purongo hin haratu matan na levosahia vara God i pa vai na sava hinou vara o usia.”

²³ Iesu mo vereia isana mara, “Tavaim i pa mele mauri!”

²⁴ Martha mo faramia mara, “Na levosahia vara i pa mele mauri na pongi hitahu hin rani atu vara tamlohi mate la mele turu.”

²⁵ Iesu mo vereia mara, “Enau pulo mauri, ale enau na sauteterahi na mateia, matan la haratu la rasuau la pa mauri, hina purongo vara la pa mate. ²⁶ Moiso la haratu la rasuau, la pa lo mauri, la pa sopo efi mate varafuhu. Martha, ko rasu hinou sei?”

²⁷ Martha mo faramia mara, “He'e Moli! Na lo rasua vara engko natu, Kristo, Natun God. Engko haratu kama lo kilau toho matana vara i pa mai na varama!”

²⁸ Martha mo retireti isan Iesu, moiso mo mele hilu vara i vere malumia isan Mary mara, “Tija mo mai, mo opoia vara i hiteho.”

²⁹ Mary mo rongoa, vahatea mo turu mo malue, mo vano isana. ³⁰ Iesu mo sopo lo unu na vanua, mo pa lo toho hin jara atu Martha mo tapai ea. ³¹ Na rani tamlohi tatavera nona Jew matuvana la lo nanau Mary na lolo ima, la hitea mo malue vilavila, ale la lo romomia vara mo vano vara i tangtangi na papa, ale la usuria.

³² Mary mo vano hin jara atu Iesu mo lo toho ea. Mo hitea, ale vahatea mo papaohi na palona, mo vereia mara, “Moli, vara o pa lo toho nike, tavaiku i pa sopo mate.”

³³ Na rani Iesu mo hite Mary tolu na tamlohi tavera nona Jew la lo tangtangi, enia mo rongoa mo sati hajavua. ³⁴ Iesu mo usia mara, “Ka tau na tarapena epu?” La faramia lara, “Moli, o mai vara o pa hitea.”

³⁵ Iesu mo tangi. ³⁶ Ale tamlohi tavera nona Jew lara, “Ka hitea, mo romia mo tavera.”

³⁷ Pani tatuara la vereia lara, “Enia mo vai na vuso mo mele kilau, pani mo sopo efi vai Lazarus vara i sopo mate mata sava?”

³⁸ Iesu mo mele romia hajavua, ale mo vano na papa, enia papa matea la kuresi na vatu matea mo lo turuhoro na mataruana. ³⁹ Iesu mo verera mara, “Ha kuresi nafihi vatu sei!” Pani Martha mo vereia mara, “Tija, engko ko levosahia vara nahapani enia havati pongin Lazarus, ale i pa ponaha.”

⁴⁰ Iesu mo faramia mara, “Na vereia isamim moiso, vara ha rasuau, ha pa hite na hina fuhufuhu matea na suihan God.”

⁴¹ Ale la kuresi nafihi vatu atu, ale Iesu mo ta'ara sahe na tuka mo ususi mara, “Tamaku, na vere meje isam matan ko lo tapurongo isaku. ⁴² Na levosahia vara tarea ko lo farami na noku ususi, pani na vere hinou nike, vara la tamlohi nike la pa rasua vara engko ko ruleau.”

⁴³ Iesu mo usiusi moiso, mo ulo mara, “Lazarus, o malue!” ⁴⁴ Tamlohi atu mo mate moiso, mo malue hin papa atu. Li-mana peresi na palona la pesira na tavalu ruru lulu, la tavu na nahona na tavalu ruru matea.

Iesu mo vere isana tamlohi mara, “Ha uli nañihia vara i malue.”

La Hatihia Vara La Vilimatei Iesu
(Mt 26.1–5; Mk 14.1–2; Lk 22.1–2)

⁴⁵ Ale Jew matuvana la lo toho peresi Mary atu, la rasu Iesu matan la hite hinau atu mo vaia ea. ⁴⁶ Pani tatuara la vano la hite na Pharisee, la vereuli na sava Iesu mo vaia isara. ⁴⁷ Moiso moli mata prís tolu na Pharisee la tovi na matavuhi matea, la vereea lara, “Ra pa vai na sava? Tamlohi nike, mo vai na matamata tavera matuvana. ⁴⁸ Vara ña sopo horoa nakerihi, tamlohi tari la pa tau na nora rasua hinia. Vara i sohena mara Rome la pa mai la komo na noña Temple tapu peresi na noña tamlohi jara mo isoiso.”

⁴⁹ Vonara matea, Caiaphas enia prís aulu hin tauni atu mo vereea mara, “Ka sopo levosahi te hinau hatea, ⁵⁰ ka sopo hitevosahia vara i pa mele fuhu vara tamlohi matelete purongo i mate matan la tamlohi tari nike, mo jeu haratu vara tamlohi jara mo isoiso hin Israel la mate!” ⁵¹ Caiaphas mo sopo vere hinau sei hasena, pani matan hin tauni atu enia prís aulu, ale mo lo retimangovia sohen God mo opoia vara Iesu i pa mate mata tamlohi jara tari hin Israel, ⁵² pani i pa sopo mate mata tamlohi jara tari hin Israel hasena, i pa mate mata tamlohi tari sei la natun God na sava jara la lo toho ea la pa mai matea. ⁵³ Mo tapulo hin pongi atu vao atu la hatihia vara la pa vilimatei Iesu.

⁵⁴ Matan hinau atu Iesu mo sopo mele hahau na jara tavera isana tamlohi tatavera nona Jew, pani mo vano asau na taon Ephraim enia mariviti na jara hasetoho tavera atu, ale mo lo toho atu peresi na nona tamlohi usuri.

⁵⁵ Rani Passover nona Jew mo lo mai mariviti. Tamlohi matuvana la lo toho ralihi hin jara atu la vano Jerusalem matan vara la vai na nora posposi mata onehi na hinahinau mata Passover. ⁵⁶ La lo ale Iesu ralihi ea. Ale hin rani atu la lo toho na Temple la lo usiusira lara, “Avei, ka levosahia vara i pa mai mata hanhani tavera mata Passover teni i vono?”

⁵⁷ Haratu la moli mata prís tolu na Pharisee la vereea isana tamlohi lara vara la hite Iesu, la pa vereulia isara vara la pa taurilatia.

12

Mary Mo Rengi Na Hasori Isan Iesu
(Mt 26.6–13; Mk 14.3–9)

¹ Rani mo limarave mo lo toho vara i tikeli na rani Passover. Iesu mo mele sivo Bethany, taon atu sei Iesu mo lo vai Lazarus mo lo turu na mateia ea. ² La tatamahu na hanhani matan Iesu. Martha natu, mo lo julai na hanhani, ale Lazarus enia vonara matea hin la haratu la lo sakele peresia atu. ³ Ale Mary mo lavi na potele hasori fuhu matea sohena sope lita matea, ale volina mo tavera jea, ale mo rengia na palon Iesu, ale mo kamotira na vuluna, ale ponana fuhu mo mañivisi na lolo ima. ⁴ Tamlohi usuri non Iesu matea, hijana Judas Iscariot mo lo toho atu. Enia natu, i pa turuposi hin Iesu hitahu, ale mo usia mara, ⁵ “Mata sava mo sopo hañehi hasori sei matan volina mo tataholo na voli tamlohi voko mata tauni matea, ale mania atu i pa eñi vano isana tamlohi la tilavono?” ⁶ Pani Judas mo sopo romi na tamlohi tilavono matan enia mo lo lavi na nora tanga mania, ale enia tamlohi vavanaho matea, ale hin te rani i pa vanaho hinia.

⁷ Iesu mo vereea mara, “Ha sopo hitesathia! Enia mo tauhasehia mata noku tavun. ⁸ Tamlohi tilavono la lo toho peresi kamim tarea, pani enau a pa sopo toho peresi kamim tarea.” *Deut 15.11*

Pharisee La Opoia Vara La Vilimatei Lazarus

⁹ Na rani vao tamlohi tavera nona Jew atu la levosahia vara Iesu mo lo toho atu. La sopo opoia vara la hite Iesu hasena, pani vara la hite Lazarus sohena matan Iesu mo vaia mo mele turu na mateia. ¹⁰ Ale moli mata prís la tau na fomira vara la pa vilimatei Lazarus, ¹¹ matan la hite na Jew matuvana la lo rovo hinira, ale la lo tau na nora rasua hin Iesu.

Iesu Mo Unu Jerusalem

(Mt 21.1–11; Mk 11.1–11; Lk 19.28–40)

¹² Rani tinapua mo mele sahe, vao tavera la lo mai Jerusalem mata hanhani tavera mata Passover. Pa vao atu la rongoa vara Iesu i pa mai matan hanhani tavera atu moiso, ¹³ la lavi na rau viniu, ale la vano vara la tapaia. La lo ulo lara,

‘Moli, o juri nakerihi!’
‘God o leruhu hin haratu mo lo mai na hijan
Moli God!’ *Psa 118.26*

‘God o leruhu na Supe non Israel!’ *Zep 3.15*

¹⁴ Iesu mo vilei na natu donki matea, ale mo vele hinia sohena Retulia mo vereea, ¹⁵ ‘Ha sopo matahu

kamim tamlohi hin Zion,*

* 12:15: Zion: Zion enia Jerusalem.

Nomim supe mo lo mai
na hari natu donki.’ *Zec 9.9*

¹⁶ Tiroma, tamlohi usuri non Iesu la sopo levosahia, pani la pa mele romfomia hin pongi atu mo turu na nona mateia mo sahe na tuka. Hinau tari la masele la tataholo hin haratu la ulia na Retiulia vara la pa sohena.

¹⁷ Ale vao atu la pa lo toho peresi Iesu hin rani atu mo tovi Lazarus mo malue na papa, ale la lo sorahia. ¹⁸ Ale vao atu la tapaiatan matan la rongo matamata tavera atu mo lo vaia. ¹⁹ Pani Pharisee la lo verevera hinia lara, “Ra sopo efi vai te hinau hatea! Tamlohi tari na varama la lo usuri Iesu.”

Mara Greek Hai La Mai Isan Iesu

²⁰ Mara Greek hai tolu na tamlohi la sahe Jerusalem vara la lotu na rani mata Passover. ²¹ Philip sohena, mara Bethsaida na jara Galilee mo lo toho ea. Mara Greek la vano isana la usia lara, “Tapala, kama opoia vari kama tapai Iesu.” ²² Philip mo vere isan Andrew, ale enira tupra rua la vano isan Iesu la vere isana.

²³ Iesu mo faramia mara, “Pongi tataholo mo pala vara Natun Tamlohi i lavi na nona ooloo tavera. ²⁴ Varaŕuhu na vere isamim, vara piri wit matea i sopo jovi na lepa i mate atu, i pa sopo ulua, i pa lo toho atu purongo, pani vara i jovi i mate na lepa i pa efi ulua, ale i pa sile na vuana i mafivi. ²⁵ Vara tea mo opoi na maurina, i pa vaitihaia. Vara i rohu na maurina nake na varama enia i pa taurilatia pongi tui tui. ²⁶ Vara tea mo volitusi noku enia i pa usuriau. Noku volitusi i pa toho peresiau na sava jara enau na lo toho ea. Vara tea mo volitusi Tama i pa sile na ooloo isana.

²⁷ Nake romiku mo puhoni hajavua. A pa vere na sava? A pa vere vara, “Tamaku o juriau hin rani rilangi sei?” Pani mo vono, matan na lo mai na varama matan rani rilangi sei. ²⁸ Tamaku, o tahe na hijam aulu.” Ale leo matea mo tai na tuka mo vere mara, “Enau na pete tahe na hijaku aulu moiso, ale a pa mele tahea aulu.” ²⁹ Vao tamlohi la lo turu atu la rongo leo atu, pani hai la lo romfomia vara mo piri, hai la lo romfomia vara angelo matea mo lo retireti isan Iesu.

³⁰ Moiso, Iesu mo verera mara, “Leo atu mo sopo mai maku, pani matamim. ³¹ Nake aria varama mo lo tapulo. Nake God mo tapulo vara i tipahi tamlohi tavera sasati atu matan varama nike.† ³² Hin pongi atu vara la tahe aulu na lepa, a pa vai na tamlohi tari vara la mai isaku.” ³³ Iesu mo lo vereulia vara i pa mate sohena sava.

³⁴ Vao tamlohi atu la vere isana lara, “Retiulia mo vujangia vara Kŕisto atu enia

i pa toho jejeu. Mo sohena sava natu, engko ko lo vere vara la pa tahe Natun Tamlohi aulu? Hare natu, enia Natun Tamlohi atu ko lo vere?” ³⁵ Iesu mo faramira mara, “Malarani i pa toho isamim mata makomo rani purongo. Ha hahau na merana matan nake mo lo rani, pani haratu mo lo hahau na roŕoha i pa sopo levosahi na sava jara mo lo vano ea. ³⁶ Ha rasu na malarani nake mo lo toho peresi kamim, ale kamim ha pa natu malarani!” Hitahun la hinau atu Iesu mo lo verera, mo malue mo vano mo sopo mele hahau na naho vao.

Tamlohi La Rohu Hin Iesu

³⁷ Hina purongo vara Iesu mo vai na matamata tavera matuvana na nahora, pani tamlohi la sopo tau na nora rasua hinia, ³⁸ hinau sei mo masele sohena retireti non pŕovet Isaiiah mo vere mara, ‘Moli God, hare mo rasu na nomam reti?’

Hare mo levosahi na suiha tavera non
Moli God? *Isa 53.1*

³⁹⁻⁴⁰ Matan retireti sei, tamlohi la sopo efi rasua, matan Isaiiah mo mele vere mara,

‘Enia mo vaira la matavuso,
ale mo vai na mapura la rilangi
matan vara la pa sopo efi kilau na matara,
ale vara la sopo efi levosahi na romira,
vara la pa posi mai isaku
— matan vara enau a pa vaira la ruhu.’ *Isa 6.10*

⁴¹ Isaiiah mo vere la hinau sei matan mo hitea vara Tamlohi Jujuri mo ruhuŕuhu jea sohena sava, ale mo vereulia. ⁴² Hina purongo hin haratu, tamlohi tauri na suiha nona Jew matuvana la rasua, pani matan la matahuni na Pharisee enira la sopo taviti na nora rasua hinia matan vara la vere, ale Pharisee la pa tipahira na nora ima lotu. ⁴³ Matan enira la romfomi na hasohano nona tamlohi mo jeu hasohano atu God mo lo silea.

Iesu Mo Retireti Isara

⁴⁴ Pani Iesu mo ulo aulu mara, “Vara te tamlohi mo rasuau, mo sopo rasuau haseku, pani mo rasu haratu mo lo ruŕeau, ⁴⁵ haratu mo hiteau, enia mo hite haratu mo lo ruŕeau. ⁴⁶ Enau na mai na varama sohena malarani vara tamlohi tari la rasuau, la pa sopo mele toho na roŕoha.

⁴⁷ Enau mo sopo haratu sei i pa ari la haratu la sopo ooloo na noku vujangi. Enau na mai vara a juri na tamlohi hin varama nike, na sopo mai vara a sile na talai. ⁴⁸ Pani na vere vara la haratu la lo rohu hinia peresi na noku vujangi vara nora hina aria mo lo toho moiso, na sava na verera moiso enira natu, la pa arira na pongi hitahu. ⁴⁹ Na sopo retireti haseku, pani na lo vere na

† 12:31: moli mata varama: Iesu mo lo vere Tiapolo.

sava Tama sei mo lo ruleau mo retileu isaku vara a vereia. ⁵⁰ Matan na levosahia vara vua nona retileu sei la pa sile na mauri tui, ale na lo vere tataholoi na sava Tama mo vereau hinia.”

13

Mo Vujangi Na Nona Tamlohi

¹ Ale rani mo tiroma na rani Passover mo lo mai, Iesu mo levosahia vara nona rani mo mai vara i malue na varama, ale vara i mele hilu sahe isan Tamana. Tarea mo lo opoi na nona tamlohi na rani mo lo toho hin varama nika, mo opoira mo tikeli na isoisona.

² La pa lo hanhani na ravravi, Tiapolo mo posi na romin Judas natun Simon Iscariot, vara i turuposi hin Iesu.

³ Iesu mo levosahia vara Tama mo tau na hinaiu tari na limana, Iesu mo levosahia vara enia mo tai isan God, ale vara i pa mele sahe isan God, ale matan haratu, ⁴ Iesu mo turu hin hanhani atu, mo lavi narīhi na ruruna matea, ale mo lavi na ruru kamoti mo talihia na otiotina, ⁵ ale mo tau na wai na pesin tavera matea moiso mo tapulo hoje na palo nona tamlohi usuri, ale mo kamotira peresi ruru kamoti atu mo lo talihia hinia.

⁶ Pani hin masapa atu Iesu mara i hoje na palon Simon Peter, Peter mo usia mara, “Tija, mata sava ko opoia vara o hoje na paloku?”

⁷ Iesu mo faramia mara, “Nake engko ko sopo hitevosahi na sava na lo vaia, pani hitahu, o pa levosahia.”

⁸ Peter mo vereia mara, “Mo vono! Engko o pa sopo eti hoje na paloku hin te rani!” Iesu mo vereia isana mara, “Vara a sopo hojeho, engko o pa sopo noku!”

⁹ Ale Simon Peter mo vereia mara, “Tija, o sopo hoje na paloku purongo, pani limaku peresi na patuku sohena!”

¹⁰ Iesu mo faramia mara, “Isan la haratu la loloso moiso, epera la vokevoke vevuhi moiso, la pa hoje na palora purongo. Ale kamim ka vokevoke moiso, pani vonamim matea mo vono.”

¹¹ Iesu mo levosahia vara hare natu i pa turuposi hinia hin haratu mo vereia mara, ‘vonamim matea.’

¹² Hitahun haratu Iesu mo hoje na palo nona tamlohi moiso, mo mele ru na nona ruru, ale mo mele sakele. Mo vereia isara mara, “Ka levosahi na sava hinaiu na lo vaia matamim?” ¹³ Ka lo toviau nomim tija, ale nomim tamlohi tavera. Haratu ka vereia mo tataholo, matan ka lo retivarafuhu. ¹⁴ Vara enaiu na hoje na palomim, pani enaiu nomim tamlohi tavera, ale nomim tija, mo fuhu vara ha hojehoje na palomim isamim hasemim. ¹⁵ Enaiu na lo vai na tovongi matea isamim, mo fuhu vara ha vaia isamim sohen enaiu na vaia isamim.

¹⁶ Varafuhu na vereia isamim vara slev la sopo aulu na nora tamlohi tavera moiso vahafule la sopo aulu hin la haratu la lo rulara. ¹⁷ Vara ka levosahi la hinaiu sei moiso, God i pa lefuhu hin kamim vara ha vaira.

¹⁸ Na sopo retireti hin kamim mo isoiso. Na levosahi la haratu na vironira moiso, pani matan vara sava hinaiu sei Retitapu mo lo vereia i mase, mo vereia mara, “Tamlohi atu mo lo hanhani peresia, mo pete turuposi hinaiu moiso!” *Psa 41.9*

¹⁹ Na lo vere kamim hinia tiroma moiso i pa mase matan hin pongi atu vara i mase ha pa rasua vara enaiu natu, haratu mo lo toho jejeu. ²⁰ Varafuhu na vereia isamim, vara tea mo lavi na noku vahafule, enia mo lo laviau, vara tea mo laviau, enia mo lavi haratu mo lo ruleau.”

Iesu Mo Vereia Na Sava I Pa Mase

(Mt 26.20–25; Mk 14.17–21; Lk 22.21–23)

²¹ Iesu mo vere la haratu moiso, mo rongi romina mo puhoni hajavua, mo vereia isana nona tamlohi mara, “Varafuhu na vereia isamim, vonamim matea i pa turuposi hinia!” ²² Nona tamlohi usuri la lo hase kilakilaura matan la sopo levosahia vara mo lo vere hare.

²³ Tamlohi usuri non Iesu matea mo olo vano na ruman Iesu hin hanhani atu, ale tamlohi atu natu Iesu mo opoia, ²⁴ moiso Simon Peter mo tianaho na patuna isana vara i usia isan Iesu vara mo lo vere hare. ²⁵ Ale nona tamlohi usuri atu mo olo vano na ruman Iesu, ale mo usia mara, “Tija, hare natu?”

²⁶ Iesu mo faramia mara, “A pa seri na tavalu pereti na wai pihi, ale a pa silea isana.”

Moiso Iesu mo seri tavalu pereti atu mo silea isan Judas, natun Simon Iscariot. ²⁷ Vahatea purongo, Setan mo unu hin Judas. Iesu mo vereia mara, “Judas, o vano o vai na sava ko opoi vara o pa vaia vila!” ²⁸ Te vonara mo sopo levosahi na faramin reti atu Iesu mo lo vereia isana. ²⁹ Pani matan Judas mo lo tauri na tanga mania, hai la lo romfomia vara Iesu mo lo rulea vara i voli te hinaiu mata hanhani, hai la lo romfomia vara Iesu mo rulea vara i sile te mania isan la haratu la tilavono. ³⁰ Judas mo lavi tavalu pereti atu, ale mo malue vahatea. Mo rofoha moiso.

Retileu Paro

³¹ Judas mo vano moiso, ale Iesu mo vereia mara, “Nake God mo lo tahe na hijan Natun Tamlohi, ale enia i pa tahe na hijan God matana. ³² Vara maurin Natun Tamlohi mo tahe na hijan God, God i pa hase tahe na hijana aulu vahatea. ³³ Na natuku, enaiu a pa mele toho peresi kamim mata makomo

rani. Ha pa aleau, pani ha pa sopo eri hiteau. Na lo vere isamim sohen haratu na pete vereia isana tamlohi tavera nona Jew moiso nara, 'Ha pa sopo eri vano hin jara atu enau na lo vano ea'.³⁴ Pani nake, na lo sile na retileu paro matea isamim. Ha pa opoiopoi kamim hatehateahi sohen enau na lo opoi kamim.³⁵ Vara ha opoiopoi kamim, tamlohi tari la pa hitea la pa levosahia vara kamim ka noku tamlohi usuri varafuhu."

Peter Mo Retitauhi Isan Iesu

(Mt 26.31–35; Mk 14.27–31; Lk 22.31–34)

³⁶ Simon Peter mo usia mara, "Tija, engko ko lo vano epu?"

Iesu mo faramia mara, "Nake o pa sopo eri usuriau na jara na lo vano ea, pani hitahu o pa usuriau."

³⁷ Peter mo usia mara, "Tija, mata sava a sopo eri usuriho nakerihi? A eri mate matam!"

³⁸ Iesu mo usia mara, "O eri mate matakū? Varafuhu na vereia isam, engko o pa vunvunia vaha tolu, moiso toa vari i pa tarere."

14

Ra Pa Toho Peresi Iesu

¹ Iesu mo vereia isana nona tamlohi usuri mara, "Ha sopo matahu! Ha rasu God, ale ha rasuau sohena, ² matan na iman Tamaku jara matuvana la lo toho ea. A pa sopo vereuli kamim hinia vara mo sopo varafuhu. A pa sahe vara a tatamahuni na jara matamim. ³ Vara a tatamahunia i isoiso, a pa mele mai, a pa lavi kamim vara na sava jara na lo toho ea, kamim sohena ha pa toho ea. ⁴ Kamim ka levosahi na malelen jara atu enau na lo vano ea."

⁵ Thomas mo vereia mara, "Tija, kama sopo levosahi na jara ko lo vano ea. Kama pa levosahi na malele sohena sava?"

⁶ Iesu mo vereia mara, "Enau malele varafuhu, enau pulo hina varafuhu, enau pulo mauri! Vara i sopo matakū, te vonamim i pa sopo eri sahe isan Tama. ⁷ Vara ha pa lo levosahiau, ha pa levosahi Tama, ale mo tapulo nake ka levosahia, ale ka hitea moiso."

⁸ Philip mo vereia isana mara, "Tija, o vujangi kamam hin Tama! Haratu purongo kama opoia."

⁹ Iesu mo faramia mara, "Philip, na lo toho peresi kamim mo tuai moiso. Kamim ka sopo lo levosahia vara enau hare? Vara ka hiteau, ka hite Tama. Mo sohena sava natu, ka lo usia vara a vujangi kamim hin Tama? ¹⁰ Ka sopo rasua vara enau na matea peresi Tama, ale Tama enia mo matea peresia? Sava na lo vereia na sopo vereia haseku. Tama sei mo lo toho hiniau, mo lo vai la nona matamata ruhufuhu atu.

¹¹ Ha rasuau hin haratu na vereia vara Tama enia mo matea peresia, ale enau na matea peresi Tama. Pani vara i vono, ha rasu mata vavahinau hasera purongo. ¹² Varafuhu na vereia isamim, vara ha rasuau, ha pa eri vai na sava hiniau na lo vaira. Ha pa vai na hiniau la pa jeuau, matan nake na lo mele hilu sahe isan Tama. ¹³ Ha usia, ale enau a pa vai na sava ka usia na hijaku matan vara Natuna i pa sile na oloolo i sahe isan Tama. ¹⁴ Vara ha usi te hiniau na hijaku, a pa vaia."

Tanume Tapu I Pa Mai

¹⁵ Iesu mo vereia isana nona tamlohi usuri mara, "Vara ha opoiau, ha pa vai na sava na lo retileu hinira. ¹⁶ Ale, a pa usi Tama vara i mele fule na meramim matea isamim, i pa toho peresi kamim tui tui, ¹⁷ meramim atu enia Tanumena, ale i pa vujangi na hina varafuhu hin God. Tamlohi na varama la pa sopo eri lavi na Tanumena matan la pa sopo eri hitea teni la levosahia. Pani kamim ka levosahi na Tanumena matan enia mo lo toho peresi kamim, i pa lo toho hin kamim.

¹⁸ A pa sopo rovo hin kamim sohena natu mafua, pani a pa mai isamim. ¹⁹ I pa sopo tuai, tamlohi varama la pa sopo eri mele hiteau, pani kamim ha pa hiteau, ale matan enau a pa mauri, kamim ha pa mauri. ²⁰ Hin pongi atu ha pa levosahia vara enau na matea peresi Tama. Ha pa levosahia vara kamim ka matea peresia, ale enau na matea peresi kamim. ²¹ Haratu mo lavi na noku retileu, ale mo oloolo hinira enia haratu mo opoiau, ale Tamaku i pa opoia, ale enau sohena a pa opoia, ale a pa hase vujangiau isana."

²² Moiso Judas, mo sopo Judas Iscariot, mo reti mo usia mara, "Tija, faramin nom reti sei vara o pa vujangiho isamam, pani i pa sopo isana tamlohi varama, enia sava?"

²³ Iesu mo faramia mara, "Vara tea mo opoiau, i pa oloolo hina noku reti, moiso Tamaku i pa opoia, kama pa mai isana, kama pa toho hinia. ²⁴ Pani haratu mo sopo opoiau, mo sopo oloolo hina noku reti. Sava reti ka rongo na vereia, la sopo noku, pani non Tamaku sei mo lo fuleau.

²⁵ Na lo vere kamim hin la hiniau sei nake matan na pa lo toho peresi kamim. ²⁶ Pani Tuetueni ruhu atu i pa mai, enia Tanume Tapu, Tama i pa fulea i lavi na jaraku, enia i pa vujangi kamim na hiniau tari, ale i pa vai kamim ha mele romfomi na hiniau tari na lo vereia isamim moiso.

²⁷ Na lo sile kamim na tamata, noku tamata atu, enau haseku a eri silea, mo sopo sohena tamata varama nike i eri silea. Ale ha sopo romkaka, ha sopo matahu.

²⁸ Ka pete rongoa, na vereia isamim moiso vara a pa vano, ale a pa mele mai isamim.

Vara ka opoiau varaʻuhu, ha pa avulahi matan enau na lo sahe isan Tama, matan Tama enia mo aulu jea hiniau.

²⁹ Na lo vere la hiniau nike tiroma isamim matan vara pongi atu vara i masese ha pa rasuau. ³⁰ A sopo eri retireti peravu isamim matan tamlohi tavera sasati matan varama nike mo lo mai, pani enia mo sopo lavi te suiha vara i aulu hiniau. ³¹ Pani vara tamlohi tari na varama la pa levosahia vara enau na opoi Tamaku, na lo vai na sava enia mo retileu vara a vaira.

Ale ha turu, ʻra malue!”

15

Iesu Enia Asi Grape Varaʻuhu

¹ Iesu mo vereea isana nona tamlohi mara, “Enau asi grape varaʻuhu, ale Tamaku enia tamlohi isa. ² Mo tai narihi vevuhi na rangaku sei la sopo vua hiniau. Pani hin haratu la lo vua, mo jalo na ranganā vara i pa namaha i maʻivi. ³ Kamim ka vokevoke moiso mata sava na lo vereea isamim moiso.

⁴ Ha toho hiniau, ale enau a pa lo toho hin kamim. Sohena ranga matea i sopo eri vua matan mo sopo soʻotahi peresi na lahona, kamim ha pa sopo eri vua vara ha sopo toho hiniau. ⁵ Enau pulo asi grape, ale kamim rangarangana, pani vara kamim ha soʻotahi isaku, ale enau a lo soʻotahi isamim, kamim ha pa vua i maʻivi, pani vara enau a sopo toho isamim, ha pa sopo eri vai te hiniau hatea. ⁶ Vara ha sopo toho hiniau, la pa pulahi kamim sohena ranga mahoa sei la takonahira, ale la pa sulira na hapu.

⁷ Vara ha lo toho hiniau, ale vara noku reti i lo toho hin kamim, sava ka usia Tamaku i pa vaia nomim. ⁸ Tamaku mo lo lavi na ooloo tavera hin malele sei, vara ha vua tavera ka lo vujangia vara ka noku tamlohi usuri varaʻuhu. ⁹ Na lo opoi kamim sohen Tama mo opoiau. Ha toho na noku opoia. ¹⁰ Vara ha ooloo na noku retileu, ha pa lo toho na noku opoia sohen enau na lo ooloo na retileu non Tamaku, ale na lo toho na nona opoia.

¹¹ Na lo vere la hiniau sei isamim vara ha pa avulahi tavera soheku. ¹² Noku retileu na lo vereea isamim nakerihi, vara ha opoi opoi kamim sohen enau na lo opoi kamim tiroma mo mai nake. ¹³ Mo sopo tea nona opoia i jeu haranike: vara tea i tau na maurina mata tapalana. ¹⁴ Ale kamim ha pa tapalaku vara ha lo ooloo na sava na retileu hinia isamim. ¹⁵ Slev la sopo levosahia vara nora tamlohi tavera mo lo vai na sava, ale enau na sopo mele retireti isamim sohena noku slev. Na tovi kamim tapalaku matan enau na vere vevuhi na sava Tamaku mo vereau hinia.

¹⁶ Kamim ka sopo viʻoniau, pani enau na viʻoni kamim matan vara ha pa vano ha vua na vua sei i pa lo toho jejeu. Ale sava hinau ka usia na hijaku, Tamaku i pa silea isamim. ¹⁷ Ale na retileu isamim vara ha opoi opoi kamim.”

Tamlohi Varama La Pa Rohu Hiniho

Iesu mo vereea mara:

¹⁸ “Vara tamlohi varama la rohu hin kamim, ha romʻomia vara la rohu hiniau tiroma. ¹⁹ Vara kamim tamlohi non varama, tamlohi hinia la pa opoi kamim. Pani kamim ka sopo tamlohi non varama, mo vono. Enau na viʻoni nafihi kamim vara ha pa tau na varama na haʻimim, ale matan haratu, tamlohi non varama la pa rohu hin kamim. ²⁰ Ha romʻomi na sava na lo vere kamim hinia moiso, ‘Slev mo sopo aulu i jeu na nona tamlohi tavera’. *Jn 13.16* Vara tamlohi la vailejilejiau, la pa vailejileji kamim. Vara la ooloo na sava na vereea, la pa ooloo na sava ka lo verera. ²¹ Tamlohi la pa vailejileji kamim matan ka lo lavi na hijaku, ale matan la sopo levosahi haratu sei mo lo fuleau. ²² Vara a sopo lo sinai a vereea isaku, enira la pa sopo ori na hehe, pani nake, la sopo eri vereea vara mo sopo te nora hehe.

²³ Haratu sei mo rohu hiniau, enia i pa rohu hin Tamaku. ²⁴ Vavahinau sei na vaira, mo sopo lo te tamlohi i vaira hin te rani, vara la sopo lo hiteau a vai la hiniau atu, la pa sopo ori na hehe, pani la hiteau na vai la hiniau atu, ale la rohu tavera hiniau peresi Tamaku. ²⁵ Pani matan sava la pete ulia na nora leu moiso i pa masese, ale mo vereea mara, ‘Tamlohi la rohu tavera hiniau, pani mo sopo matan te hinau’. *Psa 35.19; 69.4*

²⁶ Pani a pa fule na Tuetueni fuhu matea i pa tai isan Tama i sinai isamim, enia Tanumena, i pa vujangi na hina varaʻuhu mo malue isan Tama, ale Tanumena i pa vereuliau. ²⁷ Ale kamim sohena, ha pa vereuliau matan kamim ka lo toho peresiau na tapulo noku rani nike.”

16

Iesu Mo Vereulia Vara I Pa Mate

Iesu mo mele vereea mara:

¹ “Na lo vere kamim hin la hiniau nike, matan vara ha sopo kali hin te hinau. ² La pa tipahi kamim na ima lotu nona Jew. Ale pongi matea i pa mai, tamlohi la pa vilimatei kamim, ale matana, la pa romʻomia vara la lo vai na masalon God. ³ La pa vai hiniau atu matan la sopo levosahi Tama teni enau. ⁴ Pani na lo vere hiniau sei isamim nake, matan vara pongina i masese, ha pa romʻomi na sava na lo vere kamim hinia moiso. Tiroma na sopo vere la hiniau nike,

matan enau na lo toho peresi kamim, ⁵pani nake na lo sahe isan haratu mo lo fuleau, ale mo sopo te vonamim i usiau hinia vara, 'Ko lo haipu?' ⁶Mata sava na vereia isamim, ale ka rongo mo sati tavera. ⁷Pani na vereia isamim, i pa mele fuhu isamim vara a malue. Vara a sopo malue, Tuetueni fuhu atu i pa sopo eri mai vara i tueni kamim. Vara a vano a pa fule na Tanume Tapu i mai isamim.

⁸Tanume Tapu i pa mai i tuvai na tamlohi na varama na sava mo hehe, ale na sava mo vokevoke, mata aria non God. ⁹Ale i pa mai i tuvai na tamlohi na varama na sava mo hehe matan la sopo rasuau. ¹⁰Ale i pa mai i tuvai na tamlohi na varama na sava mo vokevoke matan mauriku mo vokevoke, ale enau na lo sahe isan Tama ale kamim ha pa sopo eri mele hiteau nike, ¹¹ale i pa mai i tuvai na tamlohi na varama mata aria non God matan mo pete ari haratu mo lo tauri na suiha non varama nike moiso.

¹²Na opoia vara a vere kamim na hinau matuvana, pani nakerihi i pa filangi vara ha pa levosahira. ¹³Pani hin pongi atu vara Tanume Tapu i mai, enia i pa vujangi na hina varafuhu, ale i pa tiroma hin kamim na malele varafuhu tari vara ha pa levosahira. Tanume Tapu mo sopo vere na hinau enia hasena, pani enia i pa vere kamim purongo na sava mo rongoa isaku. Moiso enia i pa vai kamim ha levosahi na sava i pa masese hitahu. ¹⁴Tanume Tapu i pa vuhesia isamim vara enau na fuhufuhu jea sohena sava, i pa vaia sohen harihi: i pa lavi na noku reti vara i vuhesia isamim. ¹⁵Hinau tari non Tama enia noku. Matan hinau atu na lo vere vara Tanume Tapu i pa lavi na noku reti, ale i vuhesia isamim.

Avulahi I Pa Mai

¹⁶I pa sopo tuai ha pa sopo mele hiteau, pani hitahun haratu, ha pa mele hiteau."

¹⁷Nona tamlohi usuri la lo vereverera hinia lara, "Raramin nona reti sei isafa enia sava sei enia mara, 'I pa sopo tuai ha pa sopo hiteau, pani hitahun haratu ha pa mele hiteau mata makomo rani!' teni 'matan a pa mele sahe isan Tama?'" ¹⁸Nona tamlohi usuri la lo mele usiusira hinia lara, "Raramin nona reti sei, 'I pa sopo tuai!' enia sava fa sopo levosahi na sava mo lo vereia."

¹⁹Iesu mo levosahia vara la opoia vara la usia hin la hinau sei, ale mo vereia isara mara, "Avei, ka lo usiusi kamim na raramin noku reti sei, 'I pa sopo tuai ha pa sopo hiteau, pani hitahun haratu, ha pa mele hiteau?'" ²⁰Varafuhu na vereia isamim vara ha pa tangi, moiso ha pa rongo i sati, pani tamlohi na varama la pa avulahi. Ha pa rongo i sati, pani hitahu ha pa avulahi. ²¹Vara hafai mariviti vara i lavalavi, enia

i pa rongohaji tavera, pani vara mo isoiso, mo romaliho na rongohaji, ale mo avulahi matan mo vasusui na natirihia matea mo pala na varama. ²²Ale sohen haratu nake romimim la lo sati, pani hitahu hin pongi atu vara a mele hite kamim, ha pa avulahi tavera, ale tea i pa sopo eri posi na nomim avulahi. ²³Vara pongi atu i masese, ha pa sopo eri mele usiau hin te hinau. Varafuhu na vereia isamim vara Tama i pa sile kamim na sava hinau ka usia na hijaku. ²⁴Mo tikeli nake ka sopo lo usi te hinau na hijaku, pani nake, ha pa usia na hijaku moiso i pa mai isamim matan vara ha pa avulahi jea.

²⁵Na lo retireti na titileu isamim matan vara i vuhesi na sava na lo vereia. Pani pongi matea mo lo mai, a pa vere tataholoi kamim hin Tama, ale a pa sopo mele titileu sohen haranike. ²⁶Hin pongi atu enau a pa sopo mele usia nomim matan kamim hasemim ha pa usi na hinau isan Tama na hijaku. ²⁷Matan Tama mo opoi kamim matan ka opoiau, ale ka rasua vara enau na tai isana. ²⁸Na tai isan Tama na mai na varama, pani nake na lo malue na varama vara a mele hilu a sahe isan Tama."

²⁹Nona tamlohi usuri lara, "Nakerihi ko reti tataholo isamim, ko sopo titileu. ³⁰Nake natu, kama levosahia vara engko ko levosahi na hinau tari, ale te i sopo eri usi te retiusia isam. Nake kama rasua vara engko ko tai isan God."

³¹Iesu mo raramira mara, "Kamim ka rasuau varafuhu?" ³²Rani matea mo lo mai, ale nake mo masese moiso vara kamim mo isoiso ha pa rovorovo, enau haseku a pa lo toho, pani Tamaku i pa lo toho peresiau, ale a pa sopo toho haseku. ³³Na lo vere hinau sei isamim matan vara tamata i pa toho na mapumim matakau. Nake ka lo toho na varama kamim ha pa lavi na rani filangi, pani ha lo romfilangi matan enau na jeu na noku meresahi na varama moiso."

17

Usiusi Non Iesu Isan Tamana

¹Iesu mo vere la hinau sei moiso, mo tara sahe aulu na tuka, mo vereia mara, "Tamaku, pongi atu mo mai vara o tahe na hijan Natum aulu matan vara Natum i eri tahe na hijam aulu. ²Ale matan ko sile na suiha isaku moiso vara a aulu na tamlohi tari matan vara a pa sile na mauri tui isan la haratu ko lo sileau hinira. ³Mauri tui enia vara la levosahiho vara engko hasem God varafuhu, ale vara la levosahi Iesu Kristo, haratu ko lo fulea. ⁴Enau na vujangi la tamlohi nike na varama vara nom fuhufuhu mo sohena sava matan na vai vevuhi na hinau tari ko lo taura isaku vara a vaira. ⁵Nake Tamaku, o mele taheau na noku suiha aulu peresihio na tuka i sohen haratu

mo lo toho isaku tiroma varama mo sopo lo tapulo.

⁶ Enau na vereulihio isan la tamlohi atu, engko ko lo sileau hinira na varama vara la pa levosahiho. Enira nom, moiso ko sileau hinira, ale la lo ooloo na nom reti. ⁷ Nake, la levosahia vara hinau tari ko sileau enira la tai isam. ⁸ Na vere na noku tamlohi moiso na sava ko lo vereau hinira vara a vereau, ale la lavia. La levosahia mo fuhu vara enau na tai isam, moiso la rasua vara engko ko ruleau na mai. ⁹ Na lo ususi matara, pani mo sopo matan la haratu non varama. Noku tamlohi enira nom, ale na lo ususi matara matana. ¹⁰ Hinau tari noku, enira nom moiso, ale na lavi na ooloo tavera matan la lo vereuliau.

¹¹ I pa sopo tuai enau a sopo mele toho na varama, pani enira la lo pa toho na varama, ale enau na lo mai isam. Tama Tapu o pa tingira hin suiham atu ko lo sileau isaku. Moiso la pa matea peresira hasera sohen engko peresiau fa matea. ¹² Hin rani atu na lo toho peresira, na lo tingira hin suiha atu ko lo sileau hinia. Na lo kilaura, ale mo sopo te vonara hatea i tihai, pani tamlohi atu matea purongo sei mo lo vano na komo matan vara Retitapu i pa masese. *Psa 41.9*

¹³ Na lo mai isam, pani na lo vere la hinau nike nake na lo toho na varama vara noku tamlohi, la pa eri avulahi tavera soheku matana. ¹⁴ Na silera na nom reti moiso, ale tamlohi non varama la fohu hinira, matan enira la sopo tamlohi non varama, mo soheku, la fohu hiniau matan enau na sopo non varama.

¹⁵ Tata, na sopo usiho vara o lavi narihi na noku tamlohi na varama, pani vara o tingira matan Tiapolo. ¹⁶ Enira la sopo non varama, sohen enau na sopo non varama. ¹⁷ O tapuhira na retivarafuhu, nom reti enia vararahu. ¹⁸ Enau na lo fulera vara la vano isana tamlohi falihia na varama sohen engko ko ruleau. ¹⁹ Enau na tapuhiau haseku vara a vai na masalom purongo, matan vara la pa eri hitevosahia, ale la mai tamlohi non retivarafuhu.

²⁰ Enau na sopo ususi matan la noku tamlohi nike hasera, pani na lo ususi mata tamlohi tari sei la pa tau na nora rasua hiniau na sava la pa lo vereau matakau. ²¹ Na opoia vara enira mo isoiso la pa matea peresihira hatehateahi, sohen enau na lo matea peresihio, ale engko ko matea peresiau. Na opoia vara la pa matea peresira, matan vara tamlohi hin varama nike, la pa rasua vara engko ko ruleau.

²² Suiha fuhufuhu atu ko lo sileau hinia, na pete silea isara moiso, matan vara la pa matea sohen ena fa matea, ²³ enau hinira, ale engko hiniau, matan vara la pa matea na hinau tari, matan vara tamlohi na varama

la eri levosahia vara engko ko ruleau, ale ko lo opoia sohen ko opoiau.

²⁴ Tata, na opoia vara la haratu ko lo sileau hinira, la pa toho peresiau na jara na lo toho ea, matan vara la pa eri hite noku ooloo tavera atu sei ko lo sileau hinia, matan ko opoiau hin pongi atu varama mo sopo lo toho. ²⁵ Tata ko vokevoke, hina purongo vara tamlohi na varama la sopo levosahiho, enau na levosahiho, ale la tamlohi nike la levosahia vara engko ko ruleau. ²⁶ Ale enau na vereau isara vara engko ko sohen sava, ale a pa mele vereau isara vara opoia atu ko opoiau hinia, i pa toho isara, ale enau a pa toho hinira.”

18

La Turuposi Hin Iesu

(Mt 26.47-56; Mk 14.43-50; Lk 22.47-53)

¹ Iesu mo ususi mo isoiso, enia tolu na nona tamlohi usuri, la vano roto na Vakoan Kidron na talu olive matea atu. ² Tarea Iesu tolu na nona tamlohi usuri la lo pulutahi ea, ale Judas haratu mo lo turuposi hin Iesu mo levosahi jara atu.

³ Ale Judas mo vano hin talu olive atu peresi na tamlohi vuro hai nona mara Rome peresi na police mata Temple. Nora moli mata pris peresi na Pharisee la fulera. La lavi na hapu jilangi, lamu peresi na hinau mata valum, ale la mai isan Iesu. ⁴ Iesu mo pete levosahi na sava i pa masese moiso, pani mo usi isara mara, “Ka lo ale hare?” ⁵ Ale Judas haratu mo lo turuposi hinia mo lo turu peresira atu. La faramia lara, “Kama lo ale Iesu mara Nazareth!”

Iesu mo vereau isara mara, “Enau natu, haratu na lo toho jejeu!” ⁶ Vahatea purongo enira mo isoiso la turu juha hinia, ale la jovi na lepa.

⁷ Iesu mo mele usia mara, “Ka lo ale hare?”

La faramia lara, “Kama lo ale Iesu mara Nazareth!”

⁸ Iesu mo faramira mara, “Na pete vereau moiso vara enau natu. Vara ka lo aleau, ha tinarihi la tamlohi nike la vano!” ⁹ Mo vereau sohen matan vara nona reti atu mo lo vereau tiroma i pa masese mara, ‘Enau na sopo vitihai te vonara hatea hin la haratu ko lo sileau hinira’.

Jn 6.39

¹⁰ Ale Simon Peter enia nona sita vuro matea, ale mo reve narihi sita vuro atu mo langa na matua pero slev non pris aulu atu, hijan slev atu enia Malchus. ¹¹ Pani Iesu mo reti isan Peter mara, “O tau narihi na nom sita vuro! Vara sava, ko rom vara enau a pa sopo eri lavi rani rilangi sei Tama mo lo sileau hinia?”

La Lavia Mo Vano Isan Annas

(Mt 26.57-58; Mk 14.53-54; Lk 22.54)

¹² Ale vao tamlohi vuro matea nona mara Rome peresi nora commander peresi na police mata Temple nona Jew, la taurilati Iesu, ale la pesia. ¹³ La lavia mo vano tiroma isan Annas, enia palihan Caiaphas, pris aulu hin tauni atu. ¹⁴ Caiaphas sei natu, mo lo vereia isana tamlohi tatavera nona Jew mara, "I pa mele ruhu vara tamlohi matea purongo i mate mata tamlohi tari."

Peter Mo Vunvuni Iesu

(Mt 26.69–70; Mk 14.66–68; Lk 22.55–57)

¹⁵ Simon Peter peresi na tamlohi usuri tinapua non Iesu matea, la usurira la lavi Iesu mo vano isan Annas. Tamlohi non Iesu atu enia mo levosahi mamahuni pris aulu atu, ale mo usuri Iesu mo sivo na lolo rope iman pris aulu atu. ¹⁶ Pani Peter mo lo toho na jingoima mariviti na mataruan rope atu. Pani pa tamlohi usuri non Iesu atu mo mele malue, ale mo vano mo retireti peresi haararihi atu mo lo kilau na matarua rope. Mo tinafihia vara Peter i unu hin rope atu, ¹⁷ pani mo usia isana mara, "Avei, engko ko sopo vonara matea sei la lo usuri tamlohi atu?"

Peter mo faramia mara, "Enau mo vono!"

¹⁸ Slev peresi na police mata Temple la lo turu ralihi na hapu matea la vaia na valaji hapu mata hamariri. Peter sohena mo lo turu peresihira mo lo marijo.

Pris Aulu Peresi Iesu

(Mt 26.59–66; Mk 14.55–64; Lk 22.66–71)

¹⁹ Na lolo ima, pris aulu atu mo lo usi Iesu mata nona tamlohi usuri peresi na nona vujangi. ²⁰ Pani Iesu mo faramia mara, "Enau na lo retireti na jara tavera isana tamlohi na varama. Ale tarea, enau na lo vujangi na lolo ima lotu peresi na Temple sei Jew la lo pulutahi ea. Na sopo vere te hinau hatea vara tamlohi la sopo rongoa. ²¹ Mata sava ka lo usiau hinia? Ha usi la haratu la lo rongoa, la levosahi na hinau na lo vere!"

²² Iesu mo vere reti atu moiso police mata Temple matea mo vojaia, ale mo vereia mara, "Ko rom vara o eri farami na pris aulu matea sohen haratu?"

²³ Iesu mo faramia mara, "Vara na vere te hinau mo sopo tataholo o vereia! Pani vara mo vono, mata sava ko vojaiau?" ²⁴ Ale Annas mo rule Iesu mo vano isan Caiaphas, pris aulu, pani la sopo lo uli nafihia na asihai hinia.

Peter Mo Mele Vunvunia

(Mt 26.71–75; Mk 14.69–72; Lk 22.58–62)

²⁵ Haratu mo lo vano, pani Simon Peter mo pa lo turu mo lo marijo, ale la usia isana

lara, "Avei, engko ko sopo nona tamlohi usuri matea?"

Peter mo mele vunvunia mara, "Enau mo vono!"

²⁶ Slev matea non pris aulu tahisan haratu sei Peter mo lo langa na perona, mo usia mara, "Mo sopo engko sei na hiteho na talu olive peresi tamlohi nike?"

²⁷ Peter mo mele vunvunia, ale vahatea purongo, toa vari matea mo tarere.

Iesu Mo Turu Na Nahon Pilate

(Mt 27.1–2, 11–14; Mk 15.1–5; Lk 23.1–5)

²⁸ Na falavuhu jea natu, la lavi Iesu la malue na iman Caiaphas, la vano na ima tavera matea nona tamlohi tavera nona mara Rome. Pani la lo sasaovi na jingoima, matan la rasua vara tea i unu, enia i pa lumiha na nahon God, ale enia i pa sopo eri hani na Passover.*

²⁹ Pilate mo malue mo usia mara, "Tamlohi nike, mo vai na sava hina sati?"

³⁰ La faramia lara, "Ko rom vara kama pa lavi tamlohi akerihi i mai isam vara enia mo sopo vai te hina hehe?"

³¹ Pilate mo vereia isara mara, "Ha lavia, ale ha pa aria i usuri na nomim leu."

Vao tamlohi nona Jew atu la faramia lara, "Pani nomim leu mo tapuhoro kamam vara kama eri tau te tamlohi na mateia."

³² Ale sohen Iesu mo vereia moiso vara nona mateia i pa sohena sava, mo lo mai vara i masee. Jn 3.14; 12.32

³³ Pilate mo mele unu na lolon patu ima tavera atu, ale mo tovi Iesu mo vano isana, ale mo usia isana mara, "Avei, engko natu, Supe nona Jew?"

³⁴ Iesu mo faramia mara, "Retusia sei mo tai isam hasem teni tea la vereia isam matakau?"

³⁵ Pilate mo faramia mara, "Sava? Vara sava, enau Jew matea? Tahisam tataholo peresi na pris aulu, enira natu, la laviho ko mai isaku. Ko vai na sava mo sati?"

³⁶ Iesu mo faramia mara, "Jara atu na lo tauri na suiha hinia mo sopo non varama nike, vara i sohena, noku tamlohi la pa valum moiso matan vara la turuhoroau vara a pa sopo eri vano na lima tamlohi tatavera nona Jew, pani mo vono, jara atu na lo tauri na suiha hinia mo sopo non varama nike."

³⁷ Pilate mo vereia mara, "Varafuhu, engko Supe matea?"

Iesu mo vereia isana mara, "Engko ko lo vereia vara enau Supe matea. Enau na vora hin varama nike matan vara a vere na retivarafuhu. Ale la haratu non varafuhu la levosahi na leoku."

* 18:28: lumiha: hite: Num 9.9 Leu non Moses mo vereia vara haratu mo tope na leu sei i pa saovi te vitu hatea tiroma moiso i pa mele eri hani na Passover.

³⁸ Pilate mo usia isan Iesu mara, “Reti-vararūhu enia sava?”

Iesu Mo Vano Na Matea

(Mt 27.15–31; Mk 15.6–20; Lk 23.13–25)

Hitahun haratu Pilate mo mele malue mo vereea isan la Jew atu mara, “Tamlohi nike, na sopo hite te hinau i ori hinia vara a sile na talai isana. ³⁹ Ale tarea na lo teri na tamlohi matea na nomim pongi Passover. Ale kamim ka opoia vara a teri na Supe nona Jew teni mo vono?”

⁴⁰ Ale la faramia la ulu lara, “Mo vono! Mo sopo enia. Kama opoi Barabbas.” Barabbas enia tamlohi valvalum matea ale enia mo fohu na gavman non Rome.

19

Pilate Mo Sile Iesu Isara

¹ Ale Pilate mo lavi Iesu mo retileu vara, la tamlohi vuro atu, la pa rupia na asi maja. ² Tamlohi vuro la peri na rongorongō na asihai ngaŋgaŋaŋi ha la taua na patuna, ale la liho na ruru peravu majhina mo perpel nona tamlohi aulu na pilina. ³ La mai isana la kerehia lara, “Engko Supe nona Jew, avei?” Ale la tutuhi na nahona.

⁴ Pilate mo mele malue, mo vereea isana tamlohi tatavera nona Jew mara, “Ka hitea, na lavia mo mai isamim, matan ha pa lev-osahia vara enau na sopo efi vilei te hinau i ori hinia vara i lavi na talai matana.”

⁵ Ale Iesu mo malue peresi na fongoŋongo la vaia na asihai ngaŋgaŋaŋi ha na patuna peresi na ruru peravu, majhina mo perpel. Ale Pilate mo vereea isara mara, “Ka hitea, tamlohi atu nahai!”

⁶ Moiso na rani moli nona pris peresi na police mata Temple la hitea, la ulu lara, “Ha vosaea na talopeilopei! Ha vosaea na talopeilopei!”

Pilate mo vereea mara, “Kamim ha lavia, ha vosaea na talopeilopei kamim hasemim! Enau na sopo vilei te hinau hatea vara mo ori hinia.”

⁷ Tamlohi tatavera nona Jew atu la faramia lara, “Kamam nomam leu matea mo vereea vara i pa mate matan mo lo vereea vara enia Natun God!”

⁸ Ale Pilate mara mo rongo reti atu mo mele matahu mo taverna, ⁹ moiso mo posi vara i mele unu hin nona patu ima taverna atu, ale mo hite Iesu, mo vereea isana mara, “Engko ko tai epu?” Pani Iesu mo sopo faramia.

¹⁰ Moiso Pilate mo vereea mara, “Ko sopo faramiau mata sava? Ko sopo levosahia vara ko lo toho na suiha limaku vara o pa materi teni la vosaeo na talopeilopei vara a opoia?” ¹¹ Iesu mo faramia mara, “Vara God i sopo lo sileho na suiha, engko o sopo efi vai te hinau isaku, ale matan harihi, la

haratu la sileau isam, nora hehe mo jeu na nom.”

¹² Hitahun haratu Pilate mo tapulo vaihite vara i teri Iesu, pani vao atu mo mele ulu aulu lara, “Vara o teri tamlohi nike, engko ko sopo tapalan supe hin Rome! Vara tea i vereea vara enia supe enia mo meresahi non supe hin Rome!”

¹³ Ale Pilate mara mo rongoa, mo tiroma hin Iesu la vano na jingoima, ale mo sakele na jara tamlohi ari la lo tovia, ‘Jara Pulutahi la tiua na vatu’ na leon tadvavuun Israel lara, ‘Gabbatha’. ¹⁴ Nake mo livuha rani moiso na rani mo tiroma na rani Passover. Pilate mo vereea isana vao Jew atu mara, “Ka hitea! Nomim Supe nahai!”

¹⁵ Vao atu la ulu aulu lara, “O vilimateia! O vilimateia! O vosaea na talopeilopei!”

Pilate mo usia isara mara, “Avei, ka opoia vara a vosae nomim Supe na talopeilopei?”

Moli pris la faramia lara, “Mo sopo te nomam Supe, pani Supe nona mara Rome enia nomam Supe!” ¹⁶ Ale Pilate mo tau Iesu na limara vara la pa vosaea na talopeilopei.

La Vosae Iesu Na Talopeilopei

(Mt 27.32–44; Mk 15.21–32; Lk 23.26–43)

La tauri Iesu la tiroma hinia, ¹⁷ ale la lavi Iesu mo vano, ale enia mo hasena lavi na talopeilopei, mo malue la vano hin jara atu la tovia vara, ‘Jara Patusui Tamlohi’ na leon tadvavuun Israel la tovia Golgotha. ¹⁸ Hin jara atu natu la vosaea na talopeilopei peresi na tamlohi tinapua mo rua na tavaluna, Iesu na livuhara.

¹⁹ Pilate sohena mo uli na reti matea mo vosaea aulu hin talopeilopei atu mo vereea mara,

Iesu mara Nazareth Supe nona Jew

²⁰ Jew matuvana la evia matan jara atu la vosae Iesu hinia, mo lo toho na pahisan taon taverna atu, ale mo ulia na leo tadvavuun Israel peresi na leo mara Rome peresi na leo mara Greek. ²¹ Ale moli nona pris la vano isan Pilate lara, “Mata sava ko ulia vara, enia Supe nona Jew? I pa mele ruhu vara o ulia vara, enia mo lo vereea vara enia Supe nona Jew!”

²² Pani Pilate mo faramira mara, “Sava na ulia moiso i lo toho sohena!”

²³ Tamlohi vuro la vosae Iesu na talopeilopei moiso, ale la asease na nona ruru isara tupu vati na sopo ruru matea isara hatehateahi. Nona ruru taverna enia tavalu ruru matea purongo, mo sopo te soŋosoŋo hinia, ²⁴ ale matana, la tamlohi vuro atu la verevere isara lara, “Ra sopo farifaria. Ra pa roro matana, vara fa pa hitea vara hare i pa lavia nona!” Haratu mo masese matan vara sava Retitapu mo vereea i pa masese mara, ‘La aseasehi na noku ruru, la roro mata noku ruru’. Psa 22.18

Ale tamlohi vuro la vai na sava la hatihia moiso.

²⁵ Tinan Iesu mo lo turu na tavalu nona talopeilopei peresi vetavain tinana, peresi Mary atu naroun Clopas, ale Mary Magdalene. ²⁶ Moiso Iesu mo hite tinana peresi tamlohi usuri atu mo opoia mo tavera, mo vereia isan tinana mara, "Tamlohi nike, nake enia natum." ²⁷ Ale mo vereia isan tamlohi usuri atu mara, "Enia nake tinam." Mo tapulo hin rani atu, tamlohi atu mo lavia mo vano na imana.

Iesu Mo Mate

(Mt 27.45–56; Mk 15.33–41; Lk 23.44–49)

²⁸ Hitahun haratu, Iesu mo levosahia vara mo vai vevuhi na nona vavahinau, ale vara na sava hinau Retitapu mo vereia moiso vara i pa masese mo vereia mara, "Na marohu!" *Psa 22.15*

²⁹ Potele waen hohona matea mo lo toho atu, ale la fuʻuni na susupaheu hin waen hohona atu na ranga hyssop matea, ale la tahea mo sahe na jingona. *Psa 69.21* ³⁰ Hitahun haratu Iesu mo inu waen atu mo vereia mara, "Hinaiu tari mo isoiso!" Mo rautoho moiso mo mate.

La Sari Na Roron Iesu

³¹ Ale matan vara i mele rani sahe i pa Sabbath matea peresi na Passover, enia rani aulu matea nona Jew. Jew la sopo opoia vara la tarape atu la lo sevu na talopeilopei hin rani atu, ale la vano la usia isan Pilate vara la kame na palora vara la mate vila, ale la pa eʻi suira. ³² Ale tamlohi vuro la kame na palon la tamlohi mo rua atu sei la lo vosaera na talopeilopei na tavalun Iesu tiroma. ³³ Pani lara la mai isan Iesu, la hitea vara enia mo pete mate moiso, ale la pa sopo kame na palona.

³⁴ Pani tamlohi vuro matea mo urai Iesu na rorona, ale fae peresi na wai mo malue. ³⁵ Kama levosahia vara hinaiu atu mo varaʻuhu matan haratu mo lo hitea mo vereulia vara mo varaʻuhu, ale nake kamim sohena, ha pa eʻi rasua. ³⁶ La hinaiu sei la masese matan vara Retitapu i pa masese sei mo vereia mara, 'Te sui epena hatea i pa sopo moti.'

Exo 12.46; Num 9.12; Psa 34.20

³⁷ Ale na jara tinapua na Retitapu mara, 'La pa hitea hin haratu sei la urai na rorona na sari.' *Zec 12.10; Rev 1.7*

La Tavuni Iesu

(Mt 27.57–61; Mk 15.42–47; Lk 23.50–56)

³⁸ Tamlohi usuri non Iesu matea, Joseph mara Arimathea, mo jarohi na nona rasua hin Iesu matan mo matahu vara tamlohi tatavera nona Jew la pa sile na talai isana, ale mo vano isan Pilate mo usia vara i

tinaʻihi na tarapen Iesu vara i tavunia. Pilate mo tinaʻihia, ale Joseph mo sui narihia na talopeilopei.

³⁹ Pa Nicodemus sei mo lo mai isan Iesu na vutepongi, mo usuri Joseph. Mo lavi na tanga hasori ruhu matea la tovia myrrh peresi na aloes la hoihoira jara matea, puhonina mo jeu 25 kilo. ⁴⁰ La tupra rua atu la tali ʻalihi na tarapen Iesu na ruru lulu peresi na hasori sei Jew la lo tavuni na nora mate peresia. ⁴¹ Mariviti hin jara atu sei la vosae Iesu na talopeilopei ea, lovuhai matea la lavo na vipahai mata lakolako mo ʻalihia mo lo toho atu. Ale papa vatu matea la sopo lo tau te tarape tamlohi hinia mo lo toho ea. ⁴² La tau na tarapen Iesu hin papa vatu atu matan mo lo toho mariviti atu, ale la vaia vilavila matan enia rani atu nona Jew mata tatamahu mata Passover.

20

Iesu Mo Mele Turu

(Mt 28.1–10; Mk 16.1–8; Lk 24.1–12)

¹ Na nahonaho rani na falavuhu na rani tiroma mata wik, mo pa lo ʻfofoha, ale Mary Magdalene mo vano hin papa atu. Ale mo hitea vara la kuresi narihi vatu tavera atu na matarua moiso, ale papa atu mo roi. ² Mara mo hitea sohena, mo maro mo mai isan Simon Peter peresi tamlohi usuri atu Iesu mo opoia, ale mo vereia isara mara, "La lavi narihi Tija na papa moiso! Kama sopo levosahia vara la taua epu!"

³ Peter peresi tamlohi usuri non Iesu tinapua atu la maro mata papa. ⁴ La maro pulupulu, pani tamlohi usuri non Iesu tinapua atu mo maro mo jeu Peter mo kakau na papa tiroma. ⁵ Mo rautoho mo riorio, ale mo hite te tavalu ruru la lo toho na lolo papa, pani mo sopo unu na lolo papa.

⁶ Hin rani atu Simon Peter mara mo kakau mo unu na papa, ale mo hite te tavalu ruru atu. ⁷ Ale enia mo hite tavalu ruru atu sei la lo tavu na nahon Iesu hinia, la pirura la lo toho hasera. ⁸ Tamlohi usuri non Iesu atu haratu mo lo kakau tiroma, mo unu na papa, ale mo hitea moiso mo rasua. ⁹ Hin rani atu, Peter peresi nona tamlohi tinapua atu, la sopo levosahia vara Retitapu mo vereia vara Iesu i pa mele turu na mateia. ¹⁰ Ale la tamlohi usuri tupra rua atu la mele hilu la mule.

Mary Magdalene Mo Hite Iesu

(Mk 16.9–11)

¹¹ Mary Magdalene mo lo turu na jin-goiman papa atu mo lo tangi, mo lo tangi ale mo rautoho mara mo riorio sivo hin papa atu, ¹² mo hite na angelo mo rua, la ru na ruru lulu la lo sakele na jara la tau na tarapen Iesu ea. Matea mo sakele na jara patuna, ale haruana mo sakele na jara

palona. ¹³ La angelo atu la usi Mary lara, “Haʻfai, ko lo tangi mata sava?”

Mo raramira mara, “La lavi naʻihi na tarapen noku Tija! Na sopo levosahia vara la taua epu.”

¹⁴ Mary mo vereia soheni mo isoiso mo posi mo hite Iesu mo lo turu atu, pani enia mo sopo hitevosahia vara enia Iesu. ¹⁵ Iesu mo usia mara, “Haʻai, mata sava ko lo tangi? Ko lo ale hare?”

Mary mo ʻomi vara enia tamlohi lovuhai, ale mo vereia mara, “Tapala, vara engko ko naʻihi na tarapena, na opoia vara o vereau hinia, matan vara a eʻi vano a lavia.”

¹⁶ Ale Iesu mo vereia isana mara, “Mary!”

Mary mo posi mo vereia isana mara, “Rabbi!” Ale ʻaramin ‘rabbi’ enia ‘tija’ na leon tavitauin Israel.

¹⁷ Iesu mo vereia isana mara, “O sopo tikeliau! Na sopo lo sahe isan Tata, pani o pa vereia isana noku tamlohi vara enau na lo sahe isan Tamaku enia noku God, ale enia nomim God, ale Tamamim.”

¹⁸ Mary Magdalene mo mele hilu vano mo vereia isana nona tamlohi usuri vara mo hite Moli. Mo verera na sava Iesu mo vereia isana.

Iesu Mo Pala Isara

(Mt 28.16–20; Mk 16.14–18; Lk 24.36–49)

¹⁹ Nona tamlohi usuri la matahuni na tamlohi tatavera nona Jew, ale na ravravin rani atu la pelatihoro na lolo ima matea. Vahatea purongo Iesu mo pala na livuhara, mo vereia isara mara, “Tamata i toho isamim!” ²⁰ Ale mo vujangira na limana peresi na rorona, ale nona tamlohi usuri la avulahi tavera matan la hite Moli.

²¹ Iesu mo mele vereia isara mara, “Tamata i toho isamim, enau na lo ʻule kamim sohen Tama mo ʻuleau.” ²² Hitahun haratu Iesu mo soro na maromaroni isara mo vereia mara, “Ha lavi na Tanume Tapu! ²³ Vara ha ʻomi tea na nona hehe, God i pa romia, pani vara ha sopo ʻomi tea na nona hehe, God i pa sopo romia.”

Thomas Mo Hite Iesu

²⁴ Hin rani atu Iesu mo pala isana nona tamlohi usuri, matea mo sopo toho peresira, enia Thomas la tovia ‘Havo’.

²⁵ Ale tatua tamlohi usuri tinapua la vereia isana lara, “Kama hite Moli!” Pani Thomas mara, “A pa rasua vara a hite na matara nila na limana, ale a majohoi na limaku na mataran sari atu mo lo unu na rorona.”

²⁶ Ale wik matea mo vano moiso, nona tamlohi usuri la lo mele pulutahi, pani nake Thomas mo lo toho peresira. La pelatihoro, pani Iesu mo pala mo turu na livuhara mo vereia mara, “Tamata i toho isamim!” ²⁷ Ale mo vereia isan Thomas mara, “O tau na pisum nike, ale o kilau usuri na limaku. O

majohoi na liman na roroku. O isoiso na nom rom rua o rasu!”

²⁸ Thomas mo ʻaramia mara, “Engko noku Moli, engko noku God!”

²⁹ Iesu mara, “Thomas, engko ko rasua matan ko hiteau purongo teni mo vono? La haratu la sopo hiteau na matara, pani la tau na nora rasua hiniau, enira natu, la pa avulahi tavera.”

Puku Nike

³⁰ Iesu mo vai na matamata tavera matu-vana tinapua na naho nona tamlohi usuri, pani enira mo isoiso la sopo ulira hin puku nike. ³¹ Pani na uli la haranike matan vara ha pa eʻi tau na nomim rasua hin Iesu vara enia Kристо atu, Natun God. Vara ha tau nomim rasua hinia ha pa lavi na mauri vararuhu.

21

Iesu Mo Pala Isara Galilee

¹ Hitahun haratu, sorasora matan Iesu mo vano sohen harihi: Iesu mo mele pala isana nona tamlohi usuri na pahisa tasi sei la tovia Tiberias teni Galilee. ² Simon Peter, Thomas la tovia ‘Havo’ enia Nathanael mara Cana atu Galilee la natun Zebedee, ale la vorai atu James enia John la lo toho atu peresi na nona tamlohi usuri mo rua tinapua. ³ Simon Peter mara, “Enau a sivo a tara maji!”

Tatuara lara, “Kama pa usuriho!” La vele na botira la sivo, pani hin vutepongi atu, la sopo tikeli te maji hatea.

⁴ Mo mele rani sahe na ʻalavuhio jea, Iesu mo lo turu na pahisa tasi, pani nona tamlohi usuri la sopo hitevosahia vara enia hare. ⁵ Iesu mo ulo mara, “La tapala, ka tikeli te maji teni mo vono?”

La ʻaramia lara, “Mo vono!”

⁶ Ale mo vereia isara mara, “Ha tuhu na nomim tara na matua botimim, ale ha pa tikeli te maji!”

La vaia soheni, ale tara mo maʻivi na maji la sopo eʻi mele revea i unu na boti.

⁷ Tamlohi usuri atu Iesu mo opoia, mo vereia isan Peter mara, “Eh, Moli sei!” Ale Simon Peter mara mo rongu vara Moli natu, mo mele ru na nona ruru sei mo lo talihia na pangena vara mo lo revereve, moiso mo kue na tasi. ⁸ La tamlohi usuri tinapua non Iesu atu na lolo boti la pa lo sua reve na tara mo maʻivi na maji mo lo usuri na boti na haʻina. Ale jara atu la lo toho hinia mo mariviti 100 metre asau na jarauta.

⁹ Ale la hoso na jarauta, la hite te pereti ea, ale la hite te maji la lo toho na valaje hapu. ¹⁰ Iesu mo vereia isana nona tamlohi usuri mara, “Ha lavi te maji sei ka pa taraira nakerihi i sinai.” ¹¹ Simon Peter mo mele vele na boti, ale mo reve hosohi na tara.

Evi maji mo tikeli 153, ale maji tatavera nakonako, pani tara atu mo sopo mafari.

¹² Iesu mo vereea mara, “Ha mai, ha hanhani!” Pani la matahu mo sopo te tamlohi usuri vonara hatea i usia vara enia hare matan la levosahia vara enia Moli. ¹³ Iesu mo lavi na pereti, ale mo asea isana nona tamlohi usuri, ale mo vaia sohena na maji. ¹⁴ Haranike enia hatolun nona pala isana nona tamlohi usuri hitahun rani atu, mo mele turu na nona mateia.

Iesu Enia Peter

¹⁵ Ale Iesu tolu na nona tamlohi lara la hanhani moiso, mo usia mara, “Simon natun John, engko ko opoiau mo jeu la tamlohi nike?”

Simon Peter mo faramia mara, “He’e Moli, engko ko levosahia vara na opoiho.”

Iesu mara, “O vahani na pulaku natu sipsip!”

¹⁶ Iesu mo mele usia vaha rua isan Peter mara, “Simon natun John, ko opoiau?”

Peter mo faramia mara, “He’e Moli, ko levosahia vara na opoiho.”

Iesu mo faramia mara, “O lo kilau na pulaku sipsip!”

¹⁷ Iesu mo mele usia vaha tolu isan Peter mara, “Simon natun John, ko opoiau?”

Nake, Peter mo rongo mo sati matan Iesu mo usia vaha tolu isana vara mo opoia. Ale mo faramia mara, “Moli, engko ko levosahi na hinau tari. Ko levosahia vara na opoiho.”

Iesu mo faramia mara, “O vahani na pulaku sipsip.”

¹⁸ Varaʻuhu na vereho hinia, na pongi ko lo uluvou ko lo ruru hasem, ale ko lo vano na jara ko opoia, pani hin pongi atu vara o vajiaha, o pa sohai na limam, ale tamlohi tinapua la pa lihoho, ale la pa tiroma hiniho o vano na jara engko ko sopo opoia.”

¹⁹ Iesu mo vereea matan vara i vereulia vara Peter i pa mate sohena sava, ale sohena sava nona mate i pa tahe na hijan God aulu. Hitahun haratu Iesu mo mele vereea isan Peter mara, “O usuriau!”

Iesu Mo Vujangi Peter

²⁰ Peter mo posi mo kilau sivo mo hite tamlohi usuri atu Iesu mo opoia mo lo usurira. Enia pa nona tamlohi usuri atu sei mo lo sakele na tavalun Iesu na hanhani Passover, ale mo lo usia vara, “Tija, hare natu, i pa turuposi hiniho?” ²¹ Ale Peter mo hite nona tamlohi atu mo lo usurira, mo usi Iesu hinia mara, “Moli, enia i pa sohena sava?”

²² Iesu mo faramia mara, “Vara enau a opoia vara enia i mauri i tikeli pongi atu a mele mai, mo sopo te nom hinau hinia, pani engko o usuriau!” ²³ Ale sorasora atu la sorahia vara nona tamlohi usuri atu i pa sopo efi mate, pani Iesu mo sopo vereea vara

i pa sopo mate, mo vono. Enia mo vereea purongo isan Peter mara, “Mo sopo te nom hinau hinia vara enau a opoia vara enia i mauri i tikeli pongi atu a mele mai.”

²⁴ Enau sei nona tamlohi usuri atu, ale enau natu na lo vereuli la hinau sei. Na lo ulira vara ha pa eri levosahia vara enau na lo vereulia ale la varaʻuhu.

²⁵ Iesu mo vai na hinau tinapua matuvana, pani vara la uli vevuhira na puku, i pa sopo te masapa na varama matara.

Acts Vavahinau Non Tanume Tapu Puku Nike

Harihi enia tapala puku peresi na Retiruhu sei Luke mo ulia. Hinira Luke mo uli mamahuni na hinau tari Iesu mo lo vaira mo tikeli rani atu mo sahe na tuka (1.1–2). Na tapulo puku nike mariviti Iesu i pa sahe na tuka, ale mo retileu isana nona tamlohi mara la pa lo sasaovi Jerusalem mata Tanume Tapu (1.8).

Iesu mo sahe na tuka, ale vao kalesia la unu hin mauri atu God mo supe hinia na jara tari na varama hin pongi atu (2.1–35). Jew la lo romromia lara enira hasera purongo la tamlohi non God, pani puku akerihi mo vujangia vara Tanumen God mo mai mata tamlohi fofoha sohera.

Iesu mo pala isan Paul mata vironia vara i mai nona volitusi (9.1–22). Paul mo hahau mata lavi na Retiruhu i vano isana jara tamlohi fofoha ale tamlohi matuvana la mai la kalesia matana. Jew la poeia vara la pa vilimateia, pani na isoisona Paul mo lavi na Retiruhu mo kakau Rome (28.16–31).

Hin Puku Akerihi

1. Retiruhu Mo Uluia Jerusalem (1.1–8.3)
2. Tanumen Tapu Mo Jovi Hinira Judea Peresi Samaria (8.4–12.25)
3. Tiroma Hahau Non Paul (13.1–14.28)
4. Council Tavera Nona Kalesia Jerusalem (15.1–35)
5. Harua Hahau Non Paul (15.36–18.22)
6. Hatolu Hahau Non Paul (18.23–21.16)
7. La Taurilati Paul Jerusalem (21.17–23.22)
8. La Lavi Paul Mo Sivo Caesarea (23.23–26.32)
9. Paul Mo Sahe Rome (27.1–28.31)

Retitauhi Mata Tanume Tapu

¹ Theophilus, na noku puku tiroma na uli na hinau tari Iesu mo tapulo vaira, ale mo lo vujangira ² mo kakau hin rani atu God mo lavi nafiha, mo sahe aulu na tuka, sei tiromana mo sile na nona retileu hin Tanume Tapu isana nona vahafule sei mo vifonira.

³ Hitahun na nona rongohaji, mo mele hase vujangia isara vara mo mele mauri na malele tinatinapua matuvana hin la rani atu, mo ngavulu vati atu sei mo lo sorahi mauri atu God mo aulu hinia isara. ⁴ Tiroma sei mo pa lo toho peresira mo vereea mara, “Ha sopo malue Jerusalem pani ha lo saovi tako mata sava na pete vereea isamim moiso sei vara Tama i pa fule na Tanume Tapu, i mai isamim. ⁵ Matan John tamlohi paptijo

mo paptijo na wai, pani i pa sopo tuai ha pa paptijo na Tanume Tapu.”

Iesu Mo Mele Sahe Na Tuka

⁶ Hin rani atu vahafule la lo toho peresi Iesu, tarea la lo usia isana lara, “Moli, engko o pa turu na nom suiha mata supe aulu hin Israel pangisa?”

⁷ Iesu mo vereea isara mara, “Mo sopo tinafiha vara ha levosahi na ranin hinau sei Tama hasena mo taua usuri na masalona. ⁸ Pani kamim ha pa lavi na suiha hin rani atu vara Tanume Tapu i mai hin kamim, ale kamim ha pa noku tuetuenu hin Jerusalem, na jara tari Judea, Samaria, i tikeli na isoiso jara tari na varama.”

⁹ Hitahun la hinau atu mo lo verera, ale lara la pa lo kilaua, palona mo tinafihi na lepa mo lo sahe aulu, ale telangi matea mo lavi nafiha mo tihai na nahora, ¹⁰ ale la pa lo tafa la lo tafengia mo lo sahe na tuka, ale vahatea purongo, tamlohi mo rua la ru la ruru lulu jea la lo turu na pahisara, ¹¹ ale la vereea lara, “Mara Galilee, mata sava ka lo turu nike, ka lo kilau sahe na tuka? Iesu akerihi sei God mo lavi nafiha isamim, mo sahe na tuka, i pa mele sinai sohen harihi ka lo hitea mo lo sahe na tuka.”

Matthias Mo Lavi Na Jaran Judas

¹² Hin rani atu hinau atu mo masese vahafule la lo toho na Vuti talu Olive mariviti kilometre matea hin Jerusalem, ale la mele hilu la vano Jerusalem. ¹³ Ale lara la unu Jerusalem, la vele sahe aulu na jara tinapua matea hin ima atu sei la lo toho ea hin rani atu:

Peter
John
James
Andrew
Philip
Thomas
Bartholomew
Matthew

James natun Alphaeus

Simon sei, enia tamlohi matea mata valum mata jarana, peresi Judas natun James.

¹⁴ Enira mo isoiso la tau na romira mata ususi jara matea tolu na hafai tinatinapua hai peresi Mary tinan Iesu tolu na tasin Iesu.

La Vironi Matthias

¹⁵ Hin rani atu, Peter mo lo turu na livuhan la tamlohi rasua atu, ale vao atu mariviti i ngav sangavulu ngavulu rua (120) la lo pulutahi hin jara atu, ale mo vereea isara mara, ¹⁶ “La vorai, sava Retitapu mo vereea vara i pa masese isan Judas, Tanume Tapu mo vereea tiroma moiso na jingon supe David mara, enia i pa tiroma hin la haratula

pa taurilati Iesu. ¹⁷ Matan enia mo viŋonia peresiŋa, ale enia vonaŋa matea na nofa vavahinau.

¹⁸ Ale tamlohi akerihi mo voli na lepa matea na voli nona hehe. Mo vele mo sahe na pesapesa, ale mo jovi patuna mo tiroma mo vujahi ŋaŋihi na pangena, ale tinena tari la maŋava. ¹⁹ Mara Jerusalem tari la rongoa, ale la tau na hijan jara atu vara Akeldama: na leora mo vara, 'Lepa Mata Rae'.

²⁰ Matan David mo ulia na nona puku na psalm mara, 'Ha tinafiŋhia vara jara nona toho i puru, ale i sopo tea i toho hinia'. *Psa 69.25* Ale mo mele vereea mara, 'Ha viŋoni te tamlohi tinapua i lavi na jarana'. *Psa 109.8*

²¹ Ale nakerihi, ŋa pa mele viŋoni te tamlohi tinapua hatea vara i lavi na jaran Judas, enia i pa tamlohi matea mo lo toho peresiŋa tarea hin rani atu Moli Iesu mo lo toho peresiŋa, ²² mo tapulo hin rani atu sei John tamlohi paptijo mo tapulo paptijo mo mai mo tikeli rani atu Iesu mo mele sahe na tuka — enia i pa vonaŋa matea sei mo hite na nona sauteterahi."

²³ La vere na tupra rua, matea enia Joseph la tovia Barsabbas teni Justus, ale haruana enia Matthias. ²⁴ Ale la usiŋi lara, "Moli, engko ko levosahi na mapu tamlohi tari. O vujangi kamam hin haratu sei ko viŋonia ²⁵ vara enia i pa lavi na jaran Judas peresi na nona vavahinau, matan enia mo vano na nona talai." ²⁶ Ale la reve na hijara, ale mo jovi isan Matthias, ale Matthias mo mai vahaŋule matea peresi la haratu mo sangavulu ŋomana matea.

2

Tanume Tapu Mo Mai

¹ Ranin Pentecost mo pala, la lo toho na jara matea enira mo isoiso. ² Ale vatea purongo, la rongo na hinau matea sohena langi tavera matea mo lo sere, ale mo maŋivisi ima atu la lo sakele hinia. ³ Ale hinau hai sohena pepe hapu, la pala isara la sakele aulu na patura hatehateahi. ⁴ Ale enira mo isoiso, Tanume Tapu mo sohonira, ale la tapulo retireti na leo tinatinapua sohen Tanumen God mo tinafiŋhira hinia.

⁵ Hin rani atu, Jew matuvana na jara tari na varama sei ŋomira mo ŋilangi mata nora rasua la lo toho atu Jerusalem. ⁶ Ale vaore tavera atu, mo vai na vao tamlohi la mai jara matea, ale la hutura matan enira hatehateahi la rongora la lo retireti na leora.

⁷ Ale la hutura, la maŋurahi tavera lara, "Avei, la tamlohi nike, la sopo mara Galilee nakonako? ⁸ Ale mata sava natu ŋa lo rongora la lo retireti na leo jaraŋa hatehateahi sei ŋa vora hinira? ⁹ Enŋa mara Pathian, Medes, Elamite ale mara Mesopotamia, Judea, Cappadocia, Pontus, Asia, ¹⁰ Phrygia,

Pamphylia, Egypt ale jara hai Libya na lolon Cyrene, ale hai la tai Rome. ¹¹ Tatuŋa Jew, tatuŋa enira la tamlohi ŋoŋoha sei la lo usuri Moses, ale mara Crete peresi na mara Arabia — ŋa rongora la lo retireti na leofa. La lo vere na vavahinau ruhu mata suiha non God." ¹² Ale enira mo isoiso, la maŋurahi la hutura, la lo verevera hinia lara, "Matamata mata sava nahai?" ¹³ Pani tatuara la kerehira lara, "Hara sei, la drong na waen meji!"

Peter Mo Retivujavujangi

¹⁴ Ale Peter peresi la tupu sangavulu ŋomana matea atu, la turu mai na nahora, ale mo ulo mo vereea isara mara, "Mara Judea, ale mara Jerusalem tari, ha tapurongo! Ha levosahi mamahuni hinau nike! ¹⁵ Matan la tamlohi nike la sopo drong sohen ka lo ŋomŋomia, matan mo pa lo ŋalavuhu purongo nahai. ¹⁶ Pani hinau nike pŋoŋet Joel mo vereea moiso mara,

¹⁷ 'God mo vereea mara:

Na pongi hitahu, a pa surei na Tanumeku na tamlohi tari,

ale natumim peresi na venatumim la pa retimangovi,

ale uluvoumim lamane la pa hite na hinau sohena mavuho a pa vujangia isara,

ale vajiahamim a pa silera na mavuho;

¹⁸ hin pongi atu sohena,

a pa surei na Tanumeku isana noku slev lamane peresi na slev haŋai,

ale la pa retimangovi.

¹⁹ Ale a pa vujangi na matamata maŋurahi tavera aulu na masapa,

ale matamata mata ŋae,

hapu peresi na asu hapu atano na varama,

²⁰ ale alo i pa posi i mai i ŋoŋoha,

majhi vitu i pa hahara sohena ŋae,

la pa pala tiroma hin rani atu Moli i pa mele mai,

rani tavera atu i pa ruhuŋu jea.

²¹ Ale rani matea i pa mai vara sava tamlohi la tau na nora rasu na hijan Moli la pa juri.' " *Joel 2.28-32*

²² Ale Peter mo mele vereea mara, "Tavtavuin Israel, ha tapurongo! Iesu mara Nazareth, tamlohi matea God mo taua na nahomim, mo lo vai na vavahinau mata suiha, matamata ruhuŋu tavera, peresi na matamata maŋurahi sei God mo vaira na nahomim hin Iesu, sohen kamim mo isoiso ka levosahi mamahunia — ²³ tamlohi atu, ka taua na lima tamlohi sasati, matan vara la pa vosaea na talopeilopei vara i mate, pani haratu mo pa lo usuri na ŋomŋomi tavera non God, ale enia mo levosahia tiroma moiso vara i pa sohena. ²⁴ Pani God mo sauteterahia, mo teria na liman matea, matan matea i pa sopo efi tauria

na suišana. ²⁵ Matan supe David mo retireti matana mara,

‘Tarea na lo hite Moli na nahoku, matan enia mo lo toho na matuaku, enau a pa sopo hisu.

²⁶ Matan haratu mapuku mo avulahi, ale leoku mo uloulo na hasohasona! Epeku i pa toho na liman fomtoho,

²⁷ matan engko God o pa sopo tinañihia vara a toho na varama mata mateia, teni vara o tinañihia vara nom tamlohi tapu i rovo na taptap.

²⁸ Engko ko vujangiau moiso na malele mata mauri; engko o pa vaiua a avulahi tavera na nahom.’ *Psa 16.8–11*

²⁹ La vorai, na levosahi mamahunia vara a efi vereia isamim, vara pua David mo mate ale la tavunia. Ale tapuna mo lo toho peresira mo kakau nake. ³⁰ Matan David enia p̄ovet mateia, mo levosahia vara God mo vai na retitauhi matea peresia, vara mahapina matea, i pa sakele na nona jara sakele mata supe, ³¹ David mo hiteulia tiroma moiso, ale mo vereia mara Kristo i pa sauteterahi, ale vara i pa sopo taua vara i lo toho na varama mata mateia teni vara epena i rovo.

³² Iesu sei, God mo sauteterahia na mateia, ale kamam mo isoiso kama hitea.

³³ Nake, God mo tahea mo sahe na matuana, vara i tauri na suiha tavera sei mo aulu jea mo jeu na tinapua na tuka, ale usuri na retitauhi non God Tama, mo lavi na Tanume Tapu, ale mo sureia hin kamam, sei ka lo rongoa ale ka lo hitea nakerihi. ³⁴ Matan David mo sopo lo sahe aulu na tuka, pani enia mo vereia mara,

‘Moli, mo vereia isan noku Moli:

O sakele na matuaku,

³⁵ i tikeli rani atu a vai na nom meresahi, la toho na ruhuruhu palom.’ *Psa 110.1**

³⁶ Matan haratu, mo fuhu vara tamlohi tari Israel la levosahi mamahunia vara God mo vaia mo mai Moli! Ale mo vaia mo mai Kristo, pa Iesu atu sei ka lo vosaea na talopeilopei!”

³⁷ Lara la rongo na nona reti, fomira la jovi vahatea. Ale la vereia isan Peter tolu na vahañule tari atu lara, “La vorai, kama pa vai na sava?”

³⁸ Ale Peter mo vereia isara mara, “Ha posi! Ale ha paptijo kamim mo isoiso na hijan Iesu Kristo, matan vara God i fomira na nomim hehe! Ale i pa sile purongoi kamim na Tanume Tapu. ³⁹ Matan retitauhi nike, enia nomim peresi na natumim, ale nona tamlohi tari sei la lo toho asau rove, tamlohi mo isoiso sei Moli noña God i pa

tovira vara la mai isana.” ⁴⁰ Ale Peter mo mele vujangira vavano, mo vereia rilangi isara mara, “Ha juri kamim hasemim hin pina lejileji nike!”

⁴¹ Ale evin la haratu sei la rasu na nona reti moiso la paptijo hin rani atu, la mai kalesia korong mariviti tari vaha tolu (3000). ⁴² Ale la hase taura na vujangi nona vahañule, ale la matavuhi mata hanhani tapu peresi na ususi.

Kalesia La Tapulo Matavuhi Jara Matea

⁴³ Ale matahu tavera mo sohani na tamlohi tari matan vahañule la vai na hina mañurahi tavera matuvana peresi na mata-mata tavera. ⁴⁴ Ale tarea, tamlohi rasua tari la lo pulutahi jara matea, ale hina tari enia nora enira mo isoiso. ⁴⁵ Ale la lo afehi na jarara peresi na nora hinahinau, ale la lo asera isan la haratu la vejuveju hin te hinau. ⁴⁶ Ale na rani hatehateahi, la lo matavuhi na Temple, ale la lo lavi na hanhani tapu na lolo imara, ale na nora hanhani la vaia na avulahi peresi na hansohai. ⁴⁷ La hasohaso God, ale tamlohi tari la avulahi hinira. Ale na rani hatehateahi tamlohi tinatinapu sei Moli mo jurira, la lo pulutahi peresira.

3

Tamlohi Hariju Matea

¹ Peter enia John la lo sahe na Temple na rani mata ususi na matan alo mo tolu na ravravi. ² Ale tamlohi hai, la lavi na tamlohi matea mo vora mo hariju moiso. La lavia matan vara la pa mele taua i juruvi sohen tarea na pahisa matarua matea na ropen Temple atu sei la tovia ‘Matarua Ruhuru’ vara i mele usi na mania isan la haratu la lo unu na Temple ea. ³ Mara mo hite Peter peresi John la lo unu na Temple, mo usi na mania isara.

⁴ Ale Peter mo kilau tatahola sivo isana, ale John sohana mo vaia ale Peter mara, “O kilau kamam.” ⁵ Ale tamlohi hariju atu mo tafengira matan mo lo fomfomia mara la pa sile te hinau isana. ⁶ Pani Peter mo vereia mara, “Mo sopo te noku silver teni gold, pani sava enia noku, a pa silea isam na hijan Iesu Kristo mara Nazareth. O turu o hahau!”

⁷ Ale Peter mo sohai na matua limana mo tauria mo saua, ale vahatea purongo, varango palona peresi na jue palona la rilangi. ⁸ Ale mo kue mo sahe aulu mo turu, ale mo tapulo hahau ralihi na palona, ale mo usurira la unu na lolo rope Temple. Mo lo hahau, mo lo kuekue ale mo lo hasohaso God.

⁹ Ale tamlohi mo isoiso la hitea mo lo hahau mo lo hasohaso God, ¹⁰ ale la

* 2:35: ruhuruhu palom: Iesu mo lavi na suiha tavera mo aulu jea hinira.

hitevosahia vara enia natu pa tamlohi atu sei mo lo sakele na 'Matarua Ruhufuhu' mata Temple tarea mo lo usi na mania. Ale la maʼurahi tavera na sava mo masese isana. ¹¹ Mara mo pa lo keho hin Peter enia John, tamlohi tari la maro la mai isara hin jara atu sei la tovia Palapalan Solomon, ale la hutura tavera hinia.

Peter Mo Retivujavujangi Na Temple

¹² Ale Peter mara mo hitera la lo mai mo vereia isara mara, "Tavtavin Israel, mata sava ka hutu kamim hin hinau nike, teni mata sava ka lo varoi kamam sohena, vara kama vai tamlohi akerihi mo mele hahau na nomam suiha teni matan nomam posposi tataholo?" ¹³ God non Abraham, God non Isaac, God non Jacob, God non noʼa pua, mo tahe nona volitusi sei Iesu, hara sei ka taua na liman noʼa tamlohi aulu, ale ka rohu hinia na nahon Pilate hin rani atu mo opoia vara i teria. ¹⁴ Pani kamim, ka tipahi haratu sei mo tapu mo tataholo jea, ale ka usi Pilate vara i sile kamim na tamlohi vilimatei na tamlohi matea. ¹⁵ Ale ka vilimatei haratu enia pulo mauri, hara sei God mo sauteterahia na mateia. Hinau sei kamam kama hitea na matamam.

¹⁶ Ale tamlohi akerihi ka hitea ale ka levosahia, kama lo vereia vara nona rasua na hijan Iesu natu mo vaia mo rilangi. Rasua atu hin Iesu mo vai mamahuni na epena na nahomim mo isoiso.

¹⁷ Ale la vorai, na levosahia vara ka sopo levosahi na sava ka vaira, sohen nomim tamlohi aulu la vaira. ¹⁸ Pani sava God mo vereia tiroma moiso na jingo pʼovet tari, sei vara nona Kristo i pa lavi na rongohaji sohena sava ale mo marivisia. ¹⁹ Matan haratu, ha posi, ale ha posi mai isan God matan vara i jarai narihi na nomim hehe, ²⁰ matan vara rani ruhufuhu mata suiha paro la mai isamim la tai na nahon Moli, ale i pa mele rule Iesu vara i mele mai isamim sei God mo viʼonia vara i nomim Kristo, ²¹ enia i pa toho na tuka i tikeli rani atu God i mele vai tataholoi na hinau tari sohen mo vereia na reti nona pʼovet tuai moiso. ²² Moses mara, 'Moli God i pa tahe na nomim pʼovet matea na voraimim soheku. Ha pa tapurongo na hinau tari i pa vereia isamim.'

Deut 18.15 ²³ Ale mo mele vereia mara, "Tamlohi tari sei la rohu vara la ooloo hin pʼovet atu God i pa langahi nafihiara na nona tamlohi ale i pa vilimateira.' *Deut 18.18-19*

²⁴ Ale pʼovet tari sei la sile na nora retireti, mo tapulo isan Samuel peresi la haratu la pa mai hitahuna, enira sohena la pete retivujavujangi hin la rani nike moiso. ²⁵ Kamim, ka natun la pʼovet atu tuai, ale ka natun retitauhi atu God mo vaia peresi

na nomim pua, sei mo vereia isan Abraham mara, 'Ale na mahapim, vao tamlohi tari na varama la pa avulahi tavera hinia'. *Gen 22.18; 26.4*

²⁶ Hin rani atu God mo sauteterahi nona volitusi mo fulea mo vai isamim tiroma tavtavin Israel, matan vara i leʼuhu hin kamim i vai kamim ha posi na nomim posposi hehe."

4

Peter Enia John Na Naho Council Jerusalem

¹ Ale Peter enia John la pa lo retireti isana tamlohi, pʼris peresi na patu tamlohi nona police mata Temple peresi na Sadducee hai la mai isara. ² La lolokoru tavera hinira matan la lo vujangi na tamlohi, ale matan la lo retivujavujangia vara God mo sauteterahi Iesu na mateia. ³ Ale la taurilatira, la taura na ima rilangi mo tikeli na rani tinapua matan mo pete ravravi moiso. ⁴ Pani tamlohi matuvana hin la haratu la lo tapurongo isara, la rasua. Ale evin la tamlohi atu mariviti i tari vaha lima (5000). ⁵ Ale mo mele rani sahe, nora tamlohi aulu peresi na vajiahara peresi na tamlohi vujangi mata leu, la matavuhi jara matea Jerusalem, ⁶ peresi Annas sei pʼris aulu, ale Caiaphas, John, Alexander ale tamlohi tari sei la tai na vaon pʼris aulu. ⁷ Ale la vaira la turu na livuhara, ale la tapulo usira lara, "Ka vai hinau atu na sava suiha teni na hijan hare?"

⁸ Ale Tanume Tapu mo sohoni Peter mo vereia isara mara, "Tamlohi aulu peresi na vajiaha; ⁹ vara ka lo usi kamam vara kama vai na hina fuhu isan tamlohi hariju nike sohena sava, ¹⁰ ale a pa vereia i mera i ruhu isamim tari, ale isana tamlohi tari Israel, vara tamlohi nike mo ruhu na hija peresi na suiha Iesu Kristo mara Nazareth sei ka lo vosaea na talopeilopei, pani God mo sauteterahia na mateia.

¹¹ Iesu akerihi natu enia, 'Vatu atu kamim tamlohi voro ima ka tipahia, enia mo mai pulo vatu mata ima.' *Psa 118.22*

¹² Ale mo sopo mele te malele tinapua vara tea i efi juri hinia matan mo sopo mele te hija tinapua na varama vara God mo silea vara tamlohi la pa juri hinia."

¹³ Ale lara la hite na turu rilangi non Peter enia John, la maʼurahi tavera matan la levosahia vara la tamlohi nike la sopo lavi te lelevosahi isara, ale la vara enira la tamlohi purongo purongo, ale la pa hitevosahia vara enira la lo toho peresi Iesu tiroma. ¹⁴ Pani lara la hite tamlohi atu sei mo mele ruhu mo lo turu na pahisara, la sopo efi mele vere te hinau sati vano isara.

¹⁵ Ale lara la retileu vara la malue na nora matavuhi, ale la tapulo sorasorahia isara —
¹⁶ lara, “Ra pa vai na sava isan la tamlohi nike? Matan la vai na matamata tavera matea na naho tamlohi tari Jerusalem, ale ra sopo efi vuvunia. ¹⁷ Pani matan vara ra opoia vara ra horora vara la sopo mele retivujavujangia isana tamlohi, ra pa retifoahaira vara la sopo mele vujangi hin Iesu isan tea.” ¹⁸ Ale la tovara la mele mai la turu na nahora, ale la silera na reti rilangi matea vara la sopo mele retireti teni la vujangi na hijan Iesu.

¹⁹ Pani Peter peresi John la faramira lara, “Vara ka hitea mo tataholo vara kama ooloo hin kamim, pani mo sopo hin God, ha to kilausuria; ²⁰ matan kama sopo efi isoiso na nomam retireti na sava hina ruhu kama hitea, ale na sava kama rongoa moiso.”

²¹ Matavuhi atu la mele sile na reti rilangi tinapua hai isara, pani la tinafihira la malue matan la sopo levosahia vara la pa sile na talai isara sohena sava matan vara la vaia vao tamlohi atu la pa lolokoru matan la lo hasohaso God matan matamata tavera atu. ²² Matan matamata tavera atu mo masese hin tamlohi atu mo hariju mata tauni mo jeu mo ngavulu vati moiso.

Kalesia La Usiisi Isan Moli God

²³ Peter enia John lara la malue isara, la mele vano na vaora mata tamlohi rasua, ale la verera na hinau tari sei la pris aulu atu peresi na vajiahara la vereea isara. ²⁴ Lara la rongo la hinau atu, enira mo isoiso la tahe na leora, la usiisi isan God na fomfomi matea purongo ale lara, “Moli aulu na hinau tari, engko ko vai na tuka peresi na varama, na tasi ale hinau tari sei la lo toho na lolora. ²⁵ ko vereea tuai na Tanume Tapu na retireti non nom volitusi supe David nomam pua vara,

‘Mata sava tamlohi fofoha la lo lolokoru patura,
 ale mata sava tamlohi la lo hatihia vara la pa vai na hinau rongorongono vono?
²⁶ Matan supe mata varama la turu jara matea,
 ale tamlohi aulu la matavuhi jara matea,
 matan vara la turuleji hin Moli God peresi na nona Kristo.’ *Psa 2.1–2*

²⁷ Matan Herod enia Pontius Pilate, peresi na tamlohi fofoha, peresi na tavitavin Israel la matavuhi jara matea hin taon tavera nike, la turuleji hin nom volitusi tapu Iesu, haratu ko vifonia mata juri na tamlohi. ²⁸ Varafuhu hinau tari la masese usuri na masalom, peresi na nom fomfomi tavera sei ko taua vara i pa sohena tiroma moiso. ²⁹ Ale nake Moli, o tapurongo na nora retireti leji, ale o vai na nom volitusi la vere na

nom retisohai i sopo te matahu hinira, ³⁰ ale o sohai na suiha mata vai na rojoa i tihai, ale vara matamata tavera peresi na hinau marurahi la pala na hijan nom volitusi tapu Iesu.”

³¹ La usiisi mo isoiso, ale jara atu sei la lo matavuhi ea mo hutehi, ale enira mo isoiso Tanume Tapu mo sohonira, ale mo tapulo hin rani atu mo vano, la retivujavujangi na retisohai non God, ale mo sopo te matahu hinira.

Kalesia La Tuetuenira Hasera

³² Vao tamlohi rasua atu fomira mo matea purongo, ale mo sopo tea isara i efi vereea vara nona hinau enia nona hasena, pani nora hinau tari enira nora mo isoiso. ³³ Retivujavujangi non la vahafule atu mata sauteterahi non Moli Iesu mo suiha. Ale God mo lefuhu hinira mo isoiso mo tavera jea ³⁴ matan mo sopo tea isara i vejuveju hin te hinau, matan la haratu sei nora lepa teni imara, la afehira ale la lavi na volira, ³⁵ moiso la taura na lima vahafule, moiso la asera isan la haratu la vejuveju hin te hinau.

³⁶ Ale vonara matea enia Joseph, tapala hijana vahafule la silea isana enia Barnabas, faramin hija sei enia Tamlohi mata Retituetueni, enia mara Cyprus matea mo tai na vao Levi na tavitavin Israel. ³⁷ Ale mo ahehi na nona lepa matea, ale mo lavi na volina mo mai mo silea isana vahafule.

5

Ananias Enia Sapphira

¹ Tamlohi tinapua matea sohena hijana Ananias peresi narouna Sapphira, la ahehi na nora hinahinau. ² Ananias mo taurilati na sope volin la nora hinau atu sei la lo afehira, ale narouna mo levosahia. Enia mo lavi na sopena mo silea isana vahafule, ale mo vereea mara volina enira mo isoiso natu.

³ Pani Peter mo vereea mara, “Ananias, mata sava ko tinafihi Setan mo sohoni na mapum mo vaiho ko halu Tanume Tapu moiso ko taurilati na sope voli lepa vara nom hasem? ⁴ Ko sopo lo afehira enia nom teni mo vono? Ale kora ko afehira moiso volina mo lo toho na limam vara o pa silea teni mo vono? Mata sava ko fomfomia vara o vai na hinau matea sohen harihi? Ko sopo halu kamam, pani ko lo halu God!”

⁵ Ananias mara mo rongo la reti atu, mo jovi sivo na lepa mo mate. Ale matahu mo sohoni enira mo isoiso sei la rongo hinau atu. ⁶ Ale uluvou hai la mai, la tatavua ale la alialia la vano la tavunia.

⁷ Ale aoa mo tolu mo vano moiso, narouna mo pete pala mo unu pani mo sopo levosahi te hinau na sava mo masese moiso. ⁸ Peter mo vereea isana mara, “O to vereau

hinia, vara volin lepa atu enira mo isoiso nakerihi natu teni mo vono?"

Sapphira mara, "He'e, volina natu."

⁹ Ale Peter mo vereia isana mara, "Mata sava kamim tupra rua ka hatihia vara ha pa vaihite na Tanumen Moli? O to kilau sahe, la tamlohi atu sei la lo tavuni tuam la lo mele mai, ale nakerihi sohena la pa pete alialiho!"

¹⁰ Vahatea purongo, mo jovi na palon Peter mo mate. Ale la uluvou atu lara la unu na lolo ima la hitea, la alialia la vano la tavunia na pahisan tuana. ¹¹ Matahu tavera mo sohoni na vao kalesia tari peresi na tamlohi tari sei la lo rongu hinau atu sei mo masese.

Vahaʻule La Vai Na Rojoa La Tihai

¹² Matamata tavera matuvana peresi na hinau maʻurahi la pala na liman la vahaʻule atu na naho tamlohi. Ale enira mo isoiso la lo matavuhi jara matea na Palapalan Solomon. ¹³ Ale la haratu la sopo lo toho na lolo vaora, la matahu tavera vara la pulutahi peresira, pani tamlohi la sile na ooloo tavera isara. ¹⁴ Ale rani hatehateahi, tamlohi la lo tau na nora rasua hin Moli, vao haʻai peresi na vao tamlohi la lo mai. ¹⁵ Ale tamlohi la lo tau na nora tamlohi rojoa na pahisa malele, la taura na vata teni na epa matan vara foʻon Peter purongo i eʻi tikeli na epen te tatuara ale nora rojoa la tihai, vara i hahau i lo vano. ¹⁶ Vao tamlohi la lo tai na vanua varihi ʻalialihi Jerusalem la lo lavi na nora tamlohi rojoa peresi la haratu tanume sasati mo sohonira la mai isara, ale enira mo isoiso nora rojoa la tihai.

La Taurilati Na Vahaʻule

¹⁷ Ale pris aulu peresi la haratu la lo toho peresia enira Sadducee, ale enira la maʻrivi na mereimerei, ale mo vaira la lolokoru. ¹⁸ La taurilati la vahaʻule atu, la taura na ima ʻilangi. ¹⁹ Pani hin vutepongi atu, angelo non Moli matea mo sinai mo roi na pelatin ima ʻilangi atu mo tiromara la malue, ale mo vereia isara mara, ²⁰ "Ha vano, ale ha turu na lolo rope Temple, ale ha retivujavujangi na tamlohi na retisohai hin mauri nikel!" ²¹ Ale lara la rongoa sohena, la vano la unu na rope Temple mo pa lo fari na rani ale la tapulo vujangi.

Ale pris aulu peresi la haratu la lo toho peresia la pala na Temple, la tovi na council tavera nona tavitavuin Israel sei la tovia Sanhedrin matan vara la pa sakele. Ale la rule na tamlohi hai la vano na ima ʻilangi vara la lavi la vahaʻule atu la mai isara. ²² Pani police mata Temple lara la pala na ima ʻilangi, la sopo hitera, ale la mele hilu la vano la vereulia isara lara, ²³ "Kama hite na ima ʻilangi mo pa lo loko mo ruhu, ale tamlohi kilau na ima ʻilangi la lo turu na

nora pelati, pani kamara kama roira, kama sopo hite tea na lolora."

²⁴ Tamlohi tavera nona police mata Temple peresi na moli nona pris lara la rongoa sohena, la hutura tavera hinia matan la sopo levosahia vara i pa isoiso epu. ²⁵ Pani tamlohi matea mo mai mo vereulia isara mara, "Eh! La tamlohi atu ka lo taura na ima ʻilangi enira nahai la lo turu na lolo rope Temple, la lo vujangi na tamlohi!"

²⁶ Ale tamlohi tavera nona police mata Temple peresi na nona police, la vano la lavi malumira la mai matan la matahu vara tamlohi la pa parura vara la vai na hinau ʻilangi isara.

²⁷ La lavira la mai la vaira la turu na nahon nora council tavera, ale pris aulu mo usi na retiusia isara ²⁸ mara, "Kama retihoro kamim moiso vara ha sopo mele retivujavujangi na hijan tamlohi atu. Ka hitea, nake Jerusalem mo maʻrivi na nomim vujangi, ale ka opoia vara ha tau na ʻraen tamlohi nikel isamam!"

²⁹ Pani Peter peresi na vahaʻule la ʻaramia lara, "Kama pa ooloo hin God hasena, mo sopo na tamlohi. ³⁰ God non noʻa pua tuai mo sauteterahi Iesu na mateia, mo vaia hitahu hin la rani atu sei ka vilimateia ka vosaea na talopeilopei. ³¹ God mo tahea aulu na matuana mo vaia mo pulon mauri nikel ale Jujuri matan vara i sile na masapa isan Israel vara la posi, ale i ʻromi na nora hehe. ³² Kamam kama hite vevuhi la hinau nikel, ale Tanume Tapu sei God mo silea isan la haratu la lo ooloo hinia enia sohen mo hitea."

³³ Lara la rongoa sohena la lolokoru patura, ale la opoia vara la vilimateira.

³⁴ Pani Pharisee matea hijana Gamaliel, enia tamlohi vujangi mata leu matea. Tamlohi la lo sile na ooloo isana matan la opoia, mo turu na naho council ale mo vereia vara la tau naʻihira na jingoima tako.

³⁵ Moiso mo vereia isan council atu mara, "La tavitavuin Israel, mo ruhu vara fa lo kilau i ruhu na sava fa opoia vara fa vaia isan la tamlohi nikel. ³⁶ Matan tauni mo visa mo vano moiso nahai, Theudas mo turu mo vereia mara enia tamlohi tavera matea, ale korong tamlohi mo ngavulu sangavulu vati (400) la usuria. Pani hitahuna hai la vilimateia ale nona tamlohi la taskara, ale nona romfomi atu mo mai hina purongo. ³⁷ Ale hitahun haratu mara Galilee matea hijana Judas, mo turu hin rani atu la lo evi na tamlohi, ale mo vai na tamlohi la lo usuria mata valum. Enia sohena mo mate, ale nona tamlohi usuri tari la taskara.

³⁸ Ale matan haratu, noku retituetueni isamim enia mo sohen harihi: vara ha toho asau hinira ha tinaʻihira, matan vara romfomi sei la lo vujangia teni hinau sei

la lo vaia mo tai isana tamlohi purongo i pa mele mai hina purongo, ³⁹ pani vara mo tai isan God, ha sopo efi horora, vara i vono ha pa hiteulia vara ka lo valum peresi God.” Ale la tatauri na nona romromi, ⁴⁰ ale la mele tovi na vahaŕule la mele unu, ale la tamajira, moiso la vereea isara vara la pa sopo mele retireti na hijan Iesu, ale la tinarihira. ⁴¹ La vahaŕule atu, la malue hin matavuhi tavera atu. La avulahi matan God mo hitea vara mo tataholo vara la lavi na rani rilangi mata hijan Iesu. ⁴² Ale na rani hatehateahi na lolo Temple peresi na imara, la lo vujangi ale la retivujavujangi na Retifuhu vara Iesu enia Kŕisto atu tamlohi la lo kilau matana.

6

Deacon Mo Limaravrua

¹ Hin rani atu evi tamlohi usuri non Iesu mo lo ulua, ale retireti matea mo malue isana Jew sei la retireti na leo mara Greek. Ale la sopo avulahi na Jew sei la lo retireti na leon tadvavuin Israel, matan tarea vara la ase na hanhani nora malepu la sopo lavi tea. ² Ale la tupu sangavulu romana mo rua atu la tovi matavuhi na tamlohi usuri la mai, ale lara, “Mo sopo tataholo vara kama tinarihi na vujangi mata reti non God mata kilau na hamim hinau. ³ Pani ha viŕoni mamahuni te vorai kalesia i limaravrua isamim tamlohi tari sei ka levosahia vara Tanume Tapu peresi na lelevosahi mo maŕivi hinira, ale fa pa taura la aulu hin la hinau sei. ⁴ Pani kamam kama pa tau na romimam tari mata ususi, ale na vavahinaiu mata Retifuhu.”

⁵ Tamlohi tari la avulahi hin romromi atu, ale la viŕoni Stephen, tamlohi matea sei mo jea na nona rasua ale Tanume Tapu mo maŕivisia, la viŕoni Philip, Prochorus, Nicanor, Timon, Parmenas peresi Nicolaus mara Antioch matea enia tamlohi roŕoha matea pani mo usuri na nora rasua, moiso mo posi mo mai tamlohi kalesia matea. ⁶ La vao atu la vaira la turu na naho vahaŕule, ale la vahaŕule atu la tau na limara hinira, ale la ususi matara.

⁷ Reti non God mo lo vano, ale evi tamlohi usuri Jerusalem mo lo sahe aulu jea. Ale vao tavera matea mata pŕis la lavi pa rasua atu ale la ooloo hinia.

⁸ Stephen, tamlohi matea sei mo maŕivi na hina fuhufuhu peresi na suiha God mo silea isana, mo vai na matamata tavera na naho tamlohi. ⁹ Pani tamlohi hai Jew na vao matea la tovia ‘Ima Lotu Nona Tamlohi Materi’. Hai la mara Cyrene, mara Alexandria, tatuara la tai Cilicia peresi Asia, la turu la vasi peresi Stephen. ¹⁰ Pani la sopo efi rethoro na lelevosahi sei Tanume Tapu mo silea isana vara mo retireti.

¹¹ Ale la haluhalu na tamlohi hai vara la vere te hinau halu hin Stephen lara, “Kama rongoa mo retisati hin Moses enia God.”

¹² La halu na tamlohi, peresi na vajiahara tolu na tamlohi vujangi mata leu, moiso la mai isan Stephen, la tauria ale la vaia mo turu na naho council. ¹³ Pa la tuetueni halu atu lara, “Tarea tamlohi nike mo lo retisati hin jara tapu nike peresi na leu. ¹⁴ Matan kama rongoa mo vereea mara Iesu mara Nazareth i pa komo jara nike, ale mo posi na posposi sei Moses mo lo silea mo sinai mo kakauŕa nake.” ¹⁵ Tamlohi tari hin matavuhi atu sei la lo sakele atu, la hite na nahon Stephen mo posi sohena naho angelo matea.

7

Stephen Mo Sile Na Nona Reti

¹ Ale pŕis aulu mo vereea isan Stephen mara, “La hinau atu la varaŕuhu?”

² Ale Stephen mara, “La vorai peresi na vajiaha, ha tapurongo na noku reti. God mata mera tavera mo pala isan nofa pua Abraham hin rani atu mo lo toho Mesopotamia, moiso mo pa vano mo toho Haran, ³ ale mo vereea isana mara, ‘O malue na jaram peresi na tahisam, ale o vano na jara matea enau a pa vujangia isam.’ *Gen 12.1*

⁴ Ale mo malue na jara mara Chaldea, mo vano mo lo toho Haran. Hitahu, tamana mo mate, ale God mo tinarihia atu mo taua hin jara nike nake fa lo toho hinia. ⁵ Pani mo sopo sile te tavaluna hatelete isana sohena koruna, pani mo retitauhi isana vara i pa silea isana sohena nona peresi na tianana sei la pa usuria, hina purongo vara mo sopo te natuna. ⁶ Pani God mo mele retireti isana sohen harihi mara, ‘Mahapim la pa vinano na jara tamlohi tinapua, ale tamlohi hin jara atu la pa vaira la slev, la pa vailelejira mata tauni i ngavulu sangavulu vati. ⁷ Pani a pa sile na talai isan la haratu la lo slev nora, *Gen 15.13–14* moiso hitahu la pa malue hin jara atu la mai la lotuau nike.’ *Exo 3.12*

⁸ Ale mo sile Abraham na retitauhi mata taiŕalihu, ale Abraham mo mai taman Isaac, ale mo taiŕalihu na halimaravtolu rani nona vora, ale Isaac mo mai taman Jacob, ale Jacob enia taman la pua atu tupu sangavulu romana mo rua.

⁹ Ale la pua atu, la mereimerei hin Joseph, la afehia mo sivo Egypt; pani God mo lo toho peresia ¹⁰ matan vara i pa juria na nona rani rilangi tari, ale i tuenia na lelevosahi na nahon Pharaoh, supe non Egypt matan vara Pharaoh i avulahi hinia ale mo tahea vara i aulu Egypt peresi na hinau tari nona.

¹¹ Hin rani atu marua tavera matea mo vili na jara tari Egypt peresi Canaan na rani

rilangi. Ale nofa pua la sopo efi hite te hanhani. ¹² Pani na rani Jacob mo rongoa vara hanhani mo lo toho Egypt, mo fule na nofa pua la sivo, harihi enia nora tiroma hahau hin jara atu. ¹³ Ale na nora harua hahau la sivo atu, Joseph mo hase vuhesia isana voraina, ale Pharaoh mo pa levosahi na vaon Joseph natu. ¹⁴ Moiso Joseph mo fulea la mele sahe, ale la usi Jacob tamana peresi na tamlohi tari na ruhuruhuna sei enira mo isoiso mo ngavulu limaravrua mo lima vara la sinai. ¹⁵ Ale Jacob mo sivo Egypt mo pa mate atu, enia peresi na nofa pua, ¹⁶ ale la lavi na suira la sahe la taura Shechem na papa sei Abraham mo volia isan natun Hamor atu Shechem.

¹⁷ Pani rani mata retitauhi non God sei mo silea isan Abraham mo mai mariviti, tanian Abraham la mafivi jea Egypt, ¹⁸ mo tikeli rani atu supe tinapua matea mo tauri na suiha Egypt, ale enia mo sopo opoia vara i levosahi na mahapin Joseph. ¹⁹ Mo haluhalu na tahisafa, ale mo vere na nofa pua vara la tau na natura la toho hasera na jara tavera matea matan vara la pa mate ea.

²⁰ Hin rani atu Moses mo vora, God mo avulahi hinia. Ale tamana la jarohia na ima mata vitu mo tolu, ²¹ ale hin rani atu la lavia mo pala na jara tavera venatun Pharaoh mo tapaia mo korohia sohena natuna. ²² Ale la vujangia na lelevosahi tari nona mara Egypt, ale enia mo mai tamlohi ruhu matea mata retireti peresi na nona vavahinau.

²³ Na rani taunina mo ngavulu vati, romina mo mai vara i vano i hite na tasina, mahapin Israel. ²⁴ Moses mara mo hite na mara Egypt matea mo lo vaileljeji na tahisana matea, mo tueni tahisana atu mo vilimatei pa mara Egypt atu. ²⁵ Moses mo lo romfomia vara tahisana la pa hitevosahia vara God mo fulea mo mai isara vara i jurira, pani la sopo hitevosahi na sava mo lo vaia.

²⁶ Ale mo mele rani sahe mo mele pala, ale mo hite na tamlohi tavitavuin Israel mo rua la lo vasvasi, ale mo vaihitea vara i tau na tamata isara mara, 'La tapala, kamim vorai matea purongo, mata sava ka lo vaileljeji kamim?'

²⁷ Pani tamlohi atu sei mo lo vaileljeji na tahisana purongo, mo sohai narihi Moses, ale mo vereea mara, 'Hare mo vaiho ko aulu vara o efi ari kamam?' ²⁸ Ko opoia vara o mele viliau sohen ko vili mara Egypt atu nanovi teni?' *Exo 2.14* ²⁹ Tamlohi atu mara mo vereea sohena, Moses mo rovo mo vano mo vinano na jara mara Midia, ale hin jara atu mo mai tama matea natuna lamane mo rua.

³⁰ Ale mele tauni mo ngavulu vati tinapua angelo matea mo pala isana na jara hase-toho na vutin Sinai na pepe hapu na pulo

pahai matea mo lo hani. ³¹ Moses mara mo hitea mo mafurahi hinia, ale mara mo mai mariviti vara i hite mamahunia, leon Moli God mo malue hinia mara, ³² 'Enau God non nom pua, God non Abraham, God non Isaac peresi Jacob'.

Exo 3.6
Ale Moses mo savaravara mo matahu vara i mele kilau vano.

³³ Ale Moli God mo vereea isana mara, 'O lavi narihi na nom sabat matan jara sei ko lo turu hinia enia mo tapu.

Exo 3.5 ³⁴ Enau na hite na rani rilangi nona noku tamlohi sei la lo toho Egypt, ale na rongi na nora tangi, ale na sinai vara a lavi narihira. Ale o mai, a pa ruleho o sivo Egypt.'

Exo 3.7-10 ³⁵ Moses akerihi natu sei la lo rohu hinia lara, 'Hare mo vaiho ko aulu vara o efi ari kamam? Tamlohi akerihi natu God mo rulea sohena tamlohi aulu matea, ale tamlohi juri na tamlohi matea na liman angelo atu sei mo lo pala isana hin pulo pahai atu mo lo hani. ³⁶ Tamlohi akerihi natu mo tiromara la malue, mo vai na hinau mafurahi peresi na matamata tavera na lolon Egypt, na Tasi Hahara, ale jara tano koru mata tauni mo ngavulu vati.

³⁷ Moses akerihi natu sei mo vereea isana tavitavuin Israel mara, 'God i pa turuhi na nomim provet matea isana voraimim soheku'.

Deut 18.15
³⁸ Tamlohi akerihi natu, mo lo toho na lolon vao atu na jara hasetoho peresi angelo atu sei mo lo retireti isana, peresi na nofa pua na vutin Sinai. Ale enia mo lavi na reti sei mo sile na mauri vara i silea isafa.

³⁹ Pani nofa pua la rohu vara la oloolo hinia, la tau narihia, ale na mapura la opoia jea vara la mele sivo Egypt, ⁴⁰ la vereea isan Aaron lara, 'O vai te nofa god matan la pa tiroma hiniha. Pa Moses atu sei mo lo tiroma hiniha ra malue Egypt, ra sopo levosahia vara mo sopo mele pala mata sava.'

Exo 32.1 ⁴¹ Ale hin rani atu la vai na hinau matea mo tovongi na natu buluk matea, ale la sile na malamalai isana, ale la lo avulahi na nora vavahinau sei. ⁴² Pani matana, God mo vahafi isara ale mo tinarihira vara la lotu na hinahinau tinatinapu na masapa, mo sohen la ulia moiso na puku nona provet lara,

'Varafuhu, kamim Israel

ka lo sile na malamalai isaku na jara tano koru hin la tauni atu mo ngavulu vati?'

⁴³ Mo vono, romimim tavera mo lo toho na nomim god na tent non Moloch,

peresi Rephan god nona vitusarasara, peresi na taminin te hinau ka vaira mata ha pa lotura.

Ale matana, a pa ʻrūle kamim ha vano ha toho asau na tavalun Babylon na ruhuruhura.’

Amos 5.25–27

⁴⁴ Ale noʻa pua la lo toho peresi na Tabernacle na jara hasetoho, la vaia mo tataholo na sava God mo vereea isan Moses mo usuri na sava mo hitea. ⁴⁵ Hitahuna noʻa pua, la pete lavia hin la rani atu la lo usuri Joshua sei mo lo tiromara na vuro isana tamlohi la sopo levosahi God. Ale God mo tipahira na nahon noʻa pua mo kakau na rani non supe David, ⁴⁶ enia God mo avulahi hinia, ale David mo usi God vara i voro te iman God non Jacob hatea. ⁴⁷ Pani Solomon natu, mo pa voro ima atu. ⁴⁸ Pani God Aulu Jea mo sopo toho na ima tamlohi la vaira, sohena pʻrovet mo ulia vara Moli mo vereea mara, ⁴⁹ ‘Moli mo vereea:

Tuka enia noku jara sakele mata suiha,
ale varama enia jara paloku.

Sava ima natu o pa eʻfi voroa vara i pa imaku,
teni sava jara enia noku jara mapu?

⁵⁰ Ka ʻromi vara limaku mo sopo vai vevuhi la hinau nike?’ *Isa 66.1–2*

⁵¹ Ka tamlohi patu ʻrilangi, mapumim la ʻfofoha, ale ka peropero na vararūhu. Ka lo rohu na Tanume Tapu tarea sohen nomim pua la lo vaia tiroma. ⁵² Sava pʻrovet natu nomim pua la sopo tipahia? Ale la vilimatei la haratu sei la lo vereuli na mai non haratu mo tataholo jea sei nake ka turuleji hinia moiso, ale ka vilimateia. ⁵³ Kamim akerihi natu, ka sopo oloolo na leu non God sei mo silea isamim na lima angelo.”

⁵⁴ La tamlohi atu sei la lo tapurongo isan Stephen lara la rongo la hinau atu, la lolokoru patura, la hatihati na huʻura matana. ⁵⁵ Pani Tanume Tapu mo sohoni Stephen, ale mo tafa sahe aulu na tuka, ale mo hite na hasohason God, ale mo hite Iesu mo lo turu na matuan God. ⁵⁶ Ale mo vereea mara, “Ka hitea, na hite tuka mo roi, ale na hite Natun Tamlohi mo lo turu na matuan God.”

⁵⁷ Pani la ulo na leo tavera matea ale la jongi na perora ale vahatea la kue la tau-ria. ⁵⁸ Moiso, la lavi naʻfihia la vano na jingoiman taon tavera atu, la pulahia atano vara la pa parumateia. Ale la tamlohi atu sei la lo rongo na nona reti, la lanafihi na nora ruru tavera matan vara la eʻfi paruparu, ale la taura na palo uluvou matea hijana Saul.

⁵⁹ Ale na rani la lo parua, Stephen enia mo lo usi mara, “Moli Iesu, o lavi na tanumeku.” ⁶⁰ Ale mo jovi sivo na pauna mo ulo mara, “Moli, o sopo taurilatira matan hehe akerihi.” Mo vere hinau atu moiso, natu mo mate.

8

¹ Ale Saul mo majinga na mateia non Stephen.

La Tipahi Na Kalesia

Ale mo tapulo hin rani atu tamlohi la tipahi na vao kalesia Jerusalem la levuti jalajalaira la vano na jara tari Judea peresi Samaria, pani vahafule purongo la pa lo toho atu. ² Tamlohi hai sei ʻromira mo ʻrilangi mata lotu God tarea la tavuni Stephen, ale la vai na tangi tavera matana. ³ Pani Saul, mo opoia vara i vaikomokomo na kalesia tari, mo lo unu jongi na tamlohi rasua na ima hatehateahi, mo reve tahitahi na tamlohi peresi na haʻrai ale mo taura na ima ʻrilangi.

Philip Mo Retivujavujangi Samaria

⁴ Ale la kalesia atu sei la lo levuti jalajalaira, la vano la lo retivujavujangi na Retiʻruhu. ⁵ Philip mo sivo na taon tavera matan Samaria ale mo lo retivujavujangi hin Kristo. ⁶ Ale vao tamlohi tari atu la lo tapurongo mamahu na sava mo lo verera, ale matan la hite na matamata tavera mo lo vaira. ⁷ Matan tanume lumihia sasati la lo malue na tamlohi matuvana sei la lo toho hinira, ale lara la malue la lo ulo ʻrilangi, ale la haratu la ʻfira teni la papao la ʻruhu. ⁸ Ale avulahi tavera mo lo toho hin taon tavera atu Samaria.

⁹ Tamlohi matea hijana Simon enia mo lo mahumahu na suihan tiapolo ale mo lo vai na hinau maʻfuraahi tavera hin jara atu mo tuai moiso, mo lo vereea vara enia tamlohi tavera matea. ¹⁰ Tamlohi tari la lo tapurongo hinia, mo tapulo na tamlohi purongo mo tikeli la haratu la aulu lara, “Tamlohi akerihi enia mo lavi suiha atu non God sei la lo vereea vara mo tavera jea.” ¹¹ Ale tamlohi la lo tapurongo mamahu isana matan la lo maʻfuraahi na nona mahumahu tuai moiso mo mai. ¹² Pani lara la rasu Philip matan mo lo retivujavujangi na Retiʻruhu matan mauri atu God mo aulu hinia, tamlohi peresi na haʻrai la tapulo lavi na paptijo na hijan Iesu Kristo. ¹³ Simon sohena mo rasua, ale hitahu na nona paptijo mo usuri Philip. Ale mara mo hite na matamata peresi na hinau maʻfuraahi tavera mo lo vaira, mo hutua.

¹⁴ Ale la vahaʻfule atu Jerusalem lara la rongoa vara mara Samaria la lo lavi na reti non God, la rule Peter enia John ¹⁵ la sivo isara la usi nora matan vara la pa eʻfi lavi na Tanume Tapu, ¹⁶ matan enia mo sopo lo jovi isan te vonara hatea, pani enira la lavi na paptijo na hijan Moli Iesu purongo. ¹⁷ Ale Peter enia John la tau na limara hinira, ale la lavi na Tanume Tapu.

¹⁸ Simon mara mo hitea vara Tanumen God mo lo mai na tamlohi vara la vahaʻfule

atu la tau na limara hinira purongo, mo usia vara i efi silera hin te mania ¹⁹ mara, “Ha sileau hin suiha sei matan vara sava tamlohi na tau na limaku hinia enia sohena i pa lavi na Tanume Tapu.”

²⁰ Pani Peter mo vere isana mara, “Mo ruhu vara nom mania i tihai peresiho matan ko fomi vara o efi voli na otori non God na mania. ²¹ Engko o sopo efi lavi te tavalun hinau nike matan mapum mo sopo tataholo na nahon God. ²² Matan haratu, o posi na nom fomfomi hehe, ale o ususi isan God matana, matan vara i avulahi, i pa romiho matan nom fomfomi sei. ²³ Matan na hitea ko mafivi na mereimerei ale hehe mo taurilatiho.”

²⁴ Ale Simon mo faramia mara, “O ususi matakui isan Moli matan vara sava sei ko vere moiso tea i sopo masese isaku.”

²⁵ Ale hitahun la vereuli mamahuni la reti atu non Moli, Peter enia John la mele hilu sahe Jerusalem, ale la retivujavujangi na Retiruhu isana vanua mara Samaria matuvana na malelera la lo sahe.

Tamlohi Aulu Mara Ethiopia Matea

²⁶ Ale angelo matea mo vere isan Philip mara, “O turu o vano o sivo na malele sei mo tai Jerusalem mo lo vano Gaza.” Jara atu enia jara hasetoho matea. ²⁷ Ale mo turu mo vano. Hin jara atu mo hite na mara Ethiopia matea mo povota, enia tamlohi aulu matea matan Candace, vesupe nona mara Ethiopia. Enia natu mo lo kilau na nona tavitav tari. Mo mai Jerusalem mata lotu, ²⁸ ale mo lo mele mule, mo lo sakele na nona kati, hos la lo revea mo lo evi na reti non pfovet Isaiah.

²⁹ Ale Tanumen God mo vere isan Philip mara, “O vano o hahau na pahisa nona kati.”

³⁰ Ale Philip mo maro mo vano isana, ale mo rongoa mo lo evi na reti non pfovet Isaiah, ale mo usia isana mara, “Ko levosahi na sava ko lo evia?”

³¹ Ale mo faramia mara, “A pa levosahia sohena sava vara tea i sopo vujangiau hinia?” Ale mo usi Philip vara i vele i sahe i sakele peresia. ³² Jara rihirihii atu mo lo evia na Retitapu enia harihi,

‘La tiroma hinia sohena sipsip matea mo vano matan vara la vilimateia, ale sohena natu sipsip matea sei mo lo tapanono purongo vara tamlohi tai na vulu mo lo tai na vuluna, ale mo sopo vere te hinau hatea.

³³ Na rani la vailejleja

mo sopo tea i turu vara i tuenia.

Mo sopo te taniaana vara i efi lavi na koruna.

Matan la lavi nafihii na maurina na varama.’

Isa 53.7-8

³⁴ Ale pa tamlohi atu sei la votaia mo usi Philip mara, “Isaiah enia mo lo retireti hin enia hasena teni mo lo vere te tamlohi tinapua?” ³⁵ Ale Philip mo vereuli na Retiruhu hin Iesu isana mo tapulo hin jara rihirihii atu na Retitapu.

³⁶ Ale lara la lo vano la mai na pahisa wai matea, ale pa tamlohi atu sei la votaia mara, “O to kilau vano, wai sevano! Mo sopo lo tataholo vara a lavi na paptijo?”

³⁷⁻³⁸ Ale mo vere mara nona kati i turu, ale enira rua la sevuti la sivo na wai, ale Philip mo paptijo hinia.

³⁹ Ale mara mo malue na wai, Tanumen Moli mo lavi nafihii Philip na nahona. Pa tamlohi atu mo sopo mele hitea pani na malelena mo lo vano mo avulahi tavera. ⁴⁰ Ale Philip mo pa hutua purongo mo lo turu hin taon atu Azotus, ale mo retivujavujangi na Retiruhu atu peresi na taon tari sei na malelena vavano mo kakau Caesarea.

9

Iesu Mo Horo Saul, Mo Vironia Nona (Acts 22.6-16; 26.12-18)

¹ Hin rani atu Jerusalem, Saul mo lo vere rilangi vara i pa vilimatei na tamlohi usuri non Moli, ale matana mo vano isan pris aulu. ² Ale mo usia vara i uli te leta vara i lavira la sahe isana ima lotu nona Jew Damascus, mata usia vara la turu peresia vara la taurilati la haratu la lo usuri na malelen Kristo, hina purongo vara tamlohi teni hafai. Ale vara i lihora i lavira la mele sahe Jerusalem.

³ Saul mo lo sahe Damascus, mo pa lo mai mariviti, mera tavera matea mo tai na tuka mo efi tuntunia. ⁴ Mo jovi sivo na lepa, ale mo rongoa na leo matea mo vere mara, “Saul! Saul! Mata sava ko lo tipahiau?”

⁵ Ale Saul mo usia mara, “Tamlohi tavera, engko hare?”

Ale leo atu mo faramia mara, “Enau sei Iesu! Haratu sei ko lo tipahia. ⁶ Pani nakerihii o turu, o vano o unu na lolon taon tavera atu ko lo mai matana, ale tamlohi matea i pa vereho na sava o pa vaia.”

⁷ La tamlohi atu sei la lo hahau peresi Saul la turu tapanono vahatea matan la rongoa leo atu, pani la sopo hite na tamlohina. ⁸ Ale Saul mo mele turu, matana mo lo roi pani mo sopo efi hite te hinau. Nona tamlohi la tauri na limana la tiroma hinia la sahe Damascus. ⁹ Ale Saul mo matavuso mata rani mo tolu. Mo rohu na hanhani peresi na wai hin la rani atu.

¹⁰ Tamlohi usuri matea hijana Ananias mo lo toho atu Damascus. Moli mo pala isana na hinau matea sohena mavuhoo mara, “Ananias!”

Ananias mo faramia mara, “Enau sei Moli!”

¹¹ Moli mo vereia isana mara, “O turu o vano hin malele atu la tovia ‘Tataholo’ ale atu na iman Judas o usi na mara Tarsus matea hijana Saul, ale nakerihi mo lo ususi, ¹² ale hinau matea sohena mavuho enia mo hite na tamlohi matea hijana Ananias mo mai mo tau na limana hinia matan vara i eri mele kilau.”

¹³ Pani Ananias mo faramia mara, “Moli, tamlohi matuvana la vereau na sava hinau sasati tamlohi atu mo lo vaia isana nom tapuhi Jerusalem. ¹⁴ Ale nahai nike mo lo lavi na suiha isana pris aulu Jerusalem vara i taurilati la haratu la lo rasuho vara engko Moli!”

¹⁵ Pani Moli mo vereia isana mara, “O vano matan enau na viŋonia mata vavahinau matea vara enia i pa lavi na hijaku i vano isana tamlohi ŋoroŋa, ale isana supe, ale isana Jew. ¹⁶ Matan enau a pa vujangia vara i pa lavi na rongohaji mata hijaku.”

¹⁷ Ale Ananias mo malue mo vano mo unu hin ima atu. Mo tau na limana hinia, ale mara, “Voraiku Saul, Moli Iesu sei mo lo pala isam hin malele sei ko lo mai hinia, mo fuleau na mai isam matan vara o eri mele kilau, ale Tanume Tapu i maŋivisiho.” ¹⁸ Vahatea purongo hinau hai sohena langalanga maji la jovi na matan Saul, ale mo mele kilau, moiso mo turu ale la paptijo hinia; ¹⁹ ale mara mo hanhani, mo mele suiha. Saul mo lo toho peresi na tamlohi usuri non Moli makomona atu Damascus.

Saul Mo Mele Sahe Jerusalem

²⁰ Ale vila ŋuhu purongo, Saul mo tapulo retivujavujangi Iesu na ima lotu nona Jew mara, “Varaŋuhu Iesu enia Natun God.”

²¹ Ale tamlohi tari sei la rongoa la maŋurahi tavera hinia lara, “Avei, mo sopo tamlohi nike natu sei mo lo vailejleji la haratu Jerusalem sei la lo vereia vara Iesu enia Moli? Ale nona mai nike nake mo sopo matan vara i mele vaia sohena, matan vara i liho kamam ale i lavi kamam kama vano isana moli nona pris Jerusalem?”

²² Pani suihan Saul mata retivujavujangi mo mai mo mele ŋilangi jea, ale mo ari posposi na Jew sei la lo toho Damascus matan mo lo vujangi mamahunia vara Iesu enia Kŋisto atu la lo kilau matana. ²³ Mo sopo tuai, tamlohi tavera nona Jew atu Damascus la hathia vara la pa vilimateia, ²⁴ pani Saul mo levosahi nora ŋomŋomi luhu atu. La lo kilau na mataruan taon tavera atu na rani na vutepongi matan vara la pa eri vilimateia. ²⁵ Pani na vutepongi matea, nona tamlohi usuri la tuhua na tanga matea na maŋole matea na roro ropen taon atu.

²⁶ Ale hin rani atu, Saul mo pala Jerusalem mo vaihitea vara i pulutahi

peresi na tamlohi usuri non Moli ea. Ale enira mo isoiso la matahunia matan la sopo rasua vara enia tamlohi usuri matea. ²⁷ Pani Barnabas mo vano mo lavia mo mai isana vahaŋule, ale mo vereulia isara sohena sava Saul mo hite Moli na malele, ale mo vereuli na sava Moli mo vereia isana, ale sohena sava mo lo retivujavujangi ŋilangi na hijan Iesu Damascus. ²⁸ Ale tamlohi usuri la pa avulahi hinia natu vara i lo toho peresira, ale nona retivujavujangi Jerusalem na hijan Moli mo ŋilangi jea. ²⁹ Ale mo sorasora peresi na mara Jew atu sei la retireti na leo mara Greek, ale mo vasi peresira, pani la lo tiasia vara la vilimateia. ³⁰ Ale vorai kalesia atu lara la levosahia, la lavia mo sivo Caesarea, ale la ŋule naŋihia mo sahe Tarsus.

³¹ Matan haratu, kalesia na jara tari Judea, Galilee peresi Samaria la toho na tamata, la ulua la ŋilangi ale evira mo tavera. Ale na maurira la sile na ooloo isan Moli ale la lo toho na nanauhi non Tanume Tapu, ale la ulua mo tavera jea.

Peter Enia Dorcas

³² Ale, Peter mo lo hahau ŋalihi ale na malelena mo sivo isana tapuhi non Moli Lydda. ³³ Hin jara atu mo tapai na tamlohi papao matea hijana Aeneas sei mo lo juruvi na vatana mata tauni mo limaravtolu moiso. ³⁴ Ale Peter mo vereia isana mara, “Aeneas, Iesu Kŋisto mo vai mamahunio; o turu o vai na vatam.” Ale vahatea purongo mo turu. ³⁵ Ale tamlohi tari Lydda peresi Sharon la hitea, ale la posi mai isan Moli.

³⁶ Hin rani atu tamlohi usuri haŋai matea mo lo toho Joppa, hijana na leo Jew enia Tabitha, ale na leo mara Greek enia Dorcas. Tarea mo lo vai na vavahinau ŋuhu ale mo lo tueni na tilavono. ³⁷ Hin la rani atu mo rojo ale mo mate. Ale lara la hoje na tarapena moiso la taua mo juruvi na jara tinapua matea aulu hin ima atu. ³⁸ Pani matan Lydda mo lo toho mariviti Joppa, tamlohi usuri atu lara la rongoa vara Peter mo lo toho atu, la ŋule na tamlohi mo rua la vano isana vara la usia ŋilangi vara, “Kama opoia mo tavera jea vara o mai nakerihi purongo.”

³⁹ Ale Peter mo turu mo usurira la vano. Ale mara mo pala, la lavia mo sahe aulu isan Dorcas. Malepu tari la lo turu na pahisana la lo tangi, ale la lo vujangi na ruru peravu peresi te ruru tinatinapua Dorcas mo vaira na rani mo pa lo mauri. ⁴⁰ Pani Peter mo rulera enira mo isoiso vara la malue, ale mo papaohi mo ususi, ale mo posi vano isan tarape atu mara, “Tabitha, o turu.” Ale mo roi na matana, ale mara mo hite Peter, mo sakele tataholo. ⁴¹ Ale mo sohai na limana vano isana ale mo saua. Moiso mo tovi na

tapuhi peresi la haʻai malepu atu vara la mai ale mo vujangia isara vara mo mele mauri.

⁴² Ale sorasorahina mo ʻalīhi na jara tari Joppa, ale tamlohi matuvana la tau na nora rasua hin Moli. ⁴³ Ale Peter mo lo toho atu Joppa mata rani matuvana peresi na tamlohi matea hijana Simon mo lo vavahinau na huri maji.

10

Cornelius Mo Vahaʻule Matan Peter

¹ Atu Caesarea tamlohi matea, hijana Cornelius, enia captain mata tamlohi vuro mo lo kilau na vao tamlohi vuro mara Rome matea evira mo ngavulu sangavulu mo limarave (600), ² enia tamlohi matea romina mo ʻilangī mata lotu God, ale mo lo sile na oloolo isana tolu na vao imana, ale nona silesilea mo ruhu jea isana tamlohi, ale mo lo usiisi tarea isan God. ³ Matan alo mariviti i tolu na ravravi matea, mo hite na hināu matea sohena mavuho matea, ale mo hite na angelo non God matea mo mai mo vereā isana mara, “Cornelius!”

⁴ Ale mo kilāua na matahu tavera ale mara, “Eh, sava tamlohi tavera?”

Ale mo vereā isana mara, “Nom usiisi peresi na nom silesilea la sopo sahe aulu purongo na nahon God. ⁵ Ale nakerihi, o ʻule te tamlohi la sivo Joppa la lavi Simon tapala hijana Peter. ⁶ Enia mo lo toho peresi na tamlohi matea hijana Simon sei mo lo vavahinau na huri maji, ale imana mo lo toho na pahisa tasi.”

⁷ Angelo atu mara mo lo retireti isana moiso mo malue, ale Cornelius mo tovi na nona volitusi mo rua peresi na tamlohi vuro matea sei mo rasua mo tavera jea ale mo rula isan la haratu la lo volitusi isana, ⁸ mo vere na sava mo masese isana isara, ale mo rula la sivo Joppa.

Sava God Mo Vujangia Isan Peter

⁹ Mo mele rani sahe la pa lo mai mariviti hin taon tavera atu, Peter mo sahe aulu na pusa ima na livuha rani mata usiisi. ¹⁰ Ale mo marohati, mo opoia vara i hani te hināu, pani la pa lo tatamahunia, hināu matea sohena mavuho mo taurilati na romina, ¹¹ ale mo hite tuka la roi ale hināu matea sohena tavalu ruru tavera jea matea mo lo sinai atano, la tuhua mo lo sinai atano na varama hin la pingona atu mo vati. ¹² Mo hite na maji tinatinapua matuvana, maji haraho peresi na maji avuavu la lo toho na lolona. ¹³ Ale leo matea mo malue mo vereā isana mara, “O turu Peter; o vilimatei tea o hania!”

¹⁴ Pani Peter mara, “A sopo efi vaia sohena Moli; matan na sopo lo hani te hināu lumiha hatea sei leu mo horoa!”

¹⁵ Ale leo atu mo mele mai isana haruana mara, “Sava God mo vaia mo vokevoke, o sopo vereā vara mo lumiha!” ¹⁶ Ale hināu sei mo masese sohena vaha tolu moiso, ale vahatea purongo mo mele sahe aulu na tuka.

¹⁷ Ale ʻromin Peter mara mo pa lo toho na ʻraramin hināu atu mo hitea, vahatea purongo, pa la tamlohi atu sei Cornelius mo lo rula la kakau na iman Simon la turu na get.

¹⁸ Ale la ulo la usia lara Simon matea tapala hijana Peter mo lo toho atu teni mo vono. ¹⁹ Peter mo pa lo fomfomi hināu atu mo lo hitea, ale Tanume Tapu mo vereā isana mara, “Nakerihi, tamlohi tupu tolu la lo aleho. ²⁰ O turu, o sivo atano, ʻromim i sopo kaka hinira, ale o usurira matan enau sei na rula.”

²¹ Ale Peter mo sevuti sivo isara ale mo vereā mara, “Enau natu haratu ko lo alea. Ka mai mata sava?”

²² Ale la vereā lara, “Cornelius, enia captain mata tamlohi vuro matea, mo lo kilau na vao tamlohi vuro mara Rome matea, ale enia tamlohi tataholo matea sei mo lo sile na oloolo tavera isan God. Ale Jew la lo vereā vara enia tamlohi ruhu matea; angelo tapu matea mo vereā isana mara i vahaʻule matam matan vara o mai na imana ale i pa rongo na sava o pa vereā isana.” ²³ Ale Peter mo usira vara la pa toho atu peresia hin rani atu.

Mo mele rani sahe mo turu mo usurira, ale tatua vorai sei mara Joppa la vano peresia.

²⁴ Mo mele rani sahe la unu Caesarea. Cornelius mo lo kilau matana moiso, ale mo tovi matavuhi na tahisana peresi na tavitavui peresi na tapalana ruhuʻuhu la lo saovia. ²⁵ Peter mara mo unu, Cornelius mo tapaia, mo jovi sivo na palona ale mo lotua. ²⁶ Pani Peter mo sau sahe aulu mara, “O turu, enau tamlohi matea sohem purongo!” ²⁷ Mara mo lo retireti peresia mo unu mo hite na vao tavera la lo takonahi saovia.

²⁸ Ale mo vereā isara mara, “Kamim hasemim ka levosahia vara mo sopo tataholo vara Jew matea i pulutahi teni i rohi te tamlohi mara jara tinapua, pani God mo vujangia isaku vara a sopo tovi na tamlohi tinapua sohena tamlohi lumiha matea na nahon God. ²⁹ Ale kara ka vahaʻule matakū, na mai tataholo vahatea. Ale nake, na opoia vara a usia vara mata sava ka vahaʻule matakū?”

³⁰ Ale Cornelius mara, “Rani mo vati mo vano moiso, korong matan alo mo tolu natu na ravravi, na lo usiisi na imaku, ale vahatea purongo, tamlohi matea mo turu na nahoku mo ru na ruru la memera ³¹ ale

mo veree mara, ‘Cornelius, God mo sopo romaliho na nom usiusi peresi na nom sile-silea. ³² Ale matan haratu o řule tea la sivo Joppa la usi na tamlohi matea hijana Simon tapala hijana Peter. Enia mo lo toho na iman Simon, tamlohi vavahinau na huri maji matea na pahisa tasi.’ ³³ Ale na vahařule matam vahatea, ale engko ko řomřuhu ko mai. Ale matana nakerihi, kamam mo isoiso kama lo toho na nahon God vara kama rongo vevuhi na sava mo retileu hinia isam vara o veree isamam.”

Iman Cornelius La Rongo Na Retiřuhu

³⁴ Ale Peter mo tapulo retireti mara, “Varařuhu, nake natu na pa levosahia vara God mo sopo tametame tea, ³⁵ pani sava tamlohi na sava jara sei mo lo sile na ololo isana, ale mo vai na hinau tataholo, enia mo avulahi hinia. ³⁶ Ale ka levosahi retisohai atu sei mo lo silea isana tavitavin Israel, mo retivujavujangi na Retiřuhu mata tamata hin Iesu Křisto enia Moli nona tamlohi tari. ³⁷ Kamim ka levosahi vevuhi na sava mo masese Judea, mo tapulo Galilee hitahun paptijo atu John mo lo retivujavujangia ³⁸ hin Iesu mara Nazareth sei God mo viřonia na Tanume Tapu ale peresi na suiha. Enia mo hahau řalihi mo lo vai na hina řuhu, mo vai na rojoa la tihai hin la haratu tiapolo mo lo vailejlejiřa matan God mo lo toho peresia.

³⁹ Kamam kama hite vevuhi la hinau sei na matamam mo vaira Judea peresi Jerusalem. La vilimateia na talopeilopei matea, ⁴⁰ pani God mo sauteterahia na hatolu rani, ale mo tinarihia vara i pala, ⁴¹ mo sopo isana tamlohi tari, pani isamam sei God mo pete viřoni kamam moiso vara kama pa hitea. Hitahun haratu mo lo turu na mateia, kamam natu, kama hanhani ale kama inu peresia. ⁴² Mo retileu isamam vara kama retivujavujangi na tamlohi ale vara kama retiřoahaira vara enia natu haratu God mo viřonia vara i pa ari la haratu la mate peresi la haratu la lo mauri. ⁴³ Provet tari la vereulia vara sava tamlohi sei mo tau na nona rasua hinia, God i pa romi na nona hehe na hijana.

Tanume Tapu Mo Jovi Isara

⁴⁴ Peter mo pa lo vere la hinau atu, Tanume Tapu mo jovi isan la haratu enira mo isoiso sei la lo tapurongo na nona reti. ⁴⁵ Tamlohi řořoha sei la lo usuri Peter, la mařurahi tavera matan God mo surei na Tanume Tapu isana tamlohi řořoha sohera. ⁴⁶ Matan la rongora la lo retireti na leo tinatinapua la lo tahe na hijan God, moiso Peter mo veree mara, ⁴⁷ “Hare natu i eři horo na wai vara la tamlohi nike la sopo paptijo hinia? Matan enira sohena la lavi na Tanume Tapu soheřa moiso.” ⁴⁸ Ale mo

retileu isara vara la pa paptijo na hijan Iesu Křisto. Hitahun haratu, la usia vara i lo toho peresira makomona tako.

11

Kalesia Jerusalem La Rongo Na Sorasorahin Cornelius

¹ Ale, vahařule peresi la vorai atu la lo toho řalihi Judea la rongoa vara tamlohi řořoha la lavi na reti non God. ² Ale Peter mara mo sahe Jerusalem, Jew kalesia hai la verelejiřia lara, ³ “Avei, ko vano isana tamlohi řořoha, ale ko hanhani peresira.”

⁴ Pani Peter mo tapulo vereuli na sava mo masese mo tapulo na tapulona mara, ⁵ “Na lo toho na taon tavera matan Joppa na lo usiusi, ale hinau matea sohena mavuhu matea mo pala isaku, ale na hite na hinau matea sohena tavalu ruru tavera jea matea mo lo sinai atano mo tai na tuka ale la tuhua hin la pingona atu mo vati mo sinai tataholo isaku. ⁶ Nara na kilau mamahunia, na hite na maji palo vati hai, maji jala hai, maji haraho hai peresi na maji auavuu tinatinapua hai sei la tapu mata hanira. ⁷ Ale na rongora na leo matea mo malue mo veree isaku mara, ‘O turu Peter; o vilimatei tea, ale o hanira!’

⁸ Pani na veree nara, ‘A sopo eři vaia sohena Moli; matan na sopo lo hani te hinau lumihia hatea sei leu mo horoa.’

⁹ Pani pa leo atu na tuka mo mele řaramiauh haruana mara, ‘Sava na vaia mo vokevoke, o sopo eři veree vara mo lumiha.’

¹⁰ Hinau atu mo masese sohena vaha tolu moiso, la hinau tari atu la pa mele sahe na tuka. ¹¹ Vahatea atu, tamlohi mo tolu la pala hin ima atu na lo toho ea, la řulera Caesarea mataku. ¹² Ale Tanumen God mo veree isaku mara a usurira, ale na sopo mele řomřomia vara enira la tamlohi tinapua. La tamlohi tupu limarave nike natu, la usuriau kama sahe, ale kama unu na iman tamlohi matea Caesarea. ¹³ Ale mo vereulia sohena sava mo hite angelo atu mo turu na lolo imana, ale mo veree isana mara, ‘O řule tea la sivo Joppa, ale la lavi Simon sei tapala hijana Peter; ¹⁴ ale i pa vereuli na retisohai matea sei o pa juri hinia, engko peresi na vao imam.’

¹⁵ Nara na tapulo retireti, Tanume Tapu mo jovi hinira sohen mo vaia isařa tiroma. ¹⁶ Ale na mele řomřomi na reti non Moli sei mara, ‘John mo paptijo peresi na wai, pani God i pa paptijo hin kamim na Tanume Tapu.’ ¹⁷ Vara God mo silera na otori sohen mo silea isařa hin rani atu řa rasu Moli Iesu Křisto, enau sava tamlohi vara a eři horoa?”

¹⁸ Lara la rongora la hinau atu la sopo mele retireti, pani la hasohaso God lara, “Varařuhu, God mo tinarihia vara tamlohi

řořoha la eři posi, ale la lavi na mauri sohefa.”

Vao Kalesia Matan Antioch Matan Syria

¹⁹ Ale hin rani atu, la haratu sei la lo tipahira Jerusalem usuri na mate non Stephen, la sahe asau la kakau na jara sohen Phoenicia, Cyprus peresi Antioch. La sopo vere retisohai sei isan te tinapua pani isana Jew sei la lo retireti na leon Israel purongo. ²⁰ Pani tatuara enira mara Cyprus enia Cyrene sohena, ale lara la pala Antioch la vereia isana tamlohi řořoha sei leora enia mara Greek, la lo retivujavujangi Moli Iesu. ²¹ Suihan Moli mo lo toho hinira, ale vao tavera sei la tamlohi řořoha la rasua, ale la posi mai isan Moli.

²² Sorasora atu mara mo pala na vao kalesia Jerusalem, ale la řule Barnabas mo sahe Antioch. ²³ Mara mo pala mo hiteuli na vavahinau ruhuruhu non God isara, ale mo avulahi mo retituetuenira vara la lo toho řilangi vararuhu isan Moli, ²⁴ matan Barnabas enia tamlohi řuhu matea, Tanume Tapu mo mařivi hinia, ale nona rasua mo řilangi, ale matana, tamlohi matuvana la mele mai isan Moli.

²⁵ Matana, Barnabas mo vano Tarsus vara i ale Saul, ²⁶ ale mara mo tapaia, mo lavia mo sinai Antioch. Barnabas peresi Saul la lo pulutahi peresi vao kalesia atu, ale la vujangi na tamlohi matuvana ea mata tauni matea. Antioch natu, enia tiroma jara sei tamlohi rasua la lavi hija sei — kalesia ea.

²⁷ Ale hin la rani atu přovet hai la tai Jerusalem la sahe Antioch. ²⁸ Vonara matea hijana Agabus mo turu, ale mo retimangovi na suihan Tanumen God mara marua tavera matea i pa jovi na varama, ale hinau atu mo maseh hin rani atu Claudius mo lo supe nona mara Rome. ²⁹ Ale matana, tamlohi usuri Antioch la hatihia vara la pa sile te tuetueni isana voraira peresi na vevoraira sei la lo toho Judea, la pa silea sohena vara la eři silea. ³⁰ Ale la vaia sohena, la sile na nora tuetueni isan Barnabas enia Saul vara la pa silea isan la haratu la lo kilau na kalesia Jerusalem.

12

La Vilimatei James

¹ Hin la rani atu, supe Herod Agrippa mo taurilati na kalesia hai vara i pa vaikokomora. ² Mo retileu vara la vilimatei James, tasin John na sita vuro. ³ Ale mara mo hitea vara Jew la avulahi hinia mo mele taurilati Peter sohena, harihi mo maseh na rani Passover. ⁴ Mara mo tauria mo taua na ima řilangi, mo taua na lima vao tamlohi vuro mo vati sei tupu vati na vao matea. Herod mo lo řomřomia vara i pa lavi Peter i malue vara i aria na naho

tamlohi hitahu na Passover. ⁵ Ale Peter mo lo toho atu na ima řilangi, pani vao kalesia Jerusalem la lo usiisi řilangi isan God matana.

Angelo Matea Mo Tiroma Hin Peter

⁶ Ale hin vutepongi atu sei vara i rani sahe supe Herod i pa vaia i turu na aria, Peter mo lo juruvi na livuha tamlohi vuro mo rua, la liho na limana na jen, ale hai la lo turu na pelatin ima řilangi atu. ⁷ Vahatea purongo, angelo matea non Moli mo pala na pahisan Peter na lolon jara atu mo lo toho hinia na ima řilangi, ale mera matea mo merasahi jara atu. Mo hoti Peter na rorona, ale mo řohaia mara, “O turu vila.” Ale jen la jovi nařihi na limana. ⁸ Ale angelo atu mo vereia isana mara, “O ruru ale o ru na nom sabat!” Ale mo vaia sohena. Ale mo mele vereia isana mara, “O tavuhorořo na nom ruru tavera, ale o usuriau.”

⁹ Ale Peter mo malue mo usuria. Mo sopo levosahia vara hinau atu angelo atu mo lo vaia enia hina vararuhu, pani mo lo řomřomia vara mo lo hite na hinau matea sohena mavuho matea. ¹⁰ Ale lara la jeu na tiroma vao tamlohi vuro peresi na harua vao tamlohi vuro sei la lo kilau na ima řilangi, la sahe tataholo na pelati aen sei mata unu hin taon tavera atu. Pelati atu mo hasena roi matara, ale la malue la lo usuri na malele tavera matea, ale vahatea purongo, angelo atu mo tinarihia.

¹¹ Ale řomin Peter mara mo mele mai mo hasena vereia mara, “Nakerihi na levosahi mamahunia vara Moli mo řule na nona angelo vara i juriau na liman Herod peresi na hinau tari sei Jew la opoia vara i pa maseh isaku.”

¹² Mara mo levosahia, mo vano na iman Mary tinan John sei tapala hijana Mark. Ale tamlohi matuvana la lo pulutahi ea la lo usiisi. ¹³ Ale mara mo řiringi na pelatin rope ima atu, hařarihi volitisi matea hijana Rhoda mo mai vara i roi. ¹⁴ Mara mo rongovosahi na leon Peter, na nona avulahi mo sopo roi na pelati pani mo maro mo mele unu na ima mo vereulia isara vara Peter mo lo turu na pelati.

¹⁵ La vereia isana lara, “Ko to, ko putu teni?” Pani mo vereia mo řilangi mara mo vararuhu, ale enira la lo vereia vara, “Enia nona angelo!”

¹⁶ Pani Peter mo lo řiringi ale enira lara la roi, la hitea ale la mařurahi tavera. ¹⁷ Pani mo vai na matamata na limana vara la toho malum, ale mo vereulia sohena sava Moli God mo nařihia hin ima řilangi atu. Ale mo vereia mara, “Ha vere la hinau nike isan James peresi na voraiřa.” Moiso mo malue mo vano na jara tinapua matea.

¹⁸ Na nahonaho rani tamlohi vuro tari na ima filangi atu la matahu tavera na sava mo masese isan Peter. ¹⁹ Supe Herod mo pala isara atu, ale mo alea pani mo sopo hitea, ale mo usi na retusia hai isan la tamlohi vuro atu sei la lo kilaua moiso mo retileu vara nona tamlohi vuro tinapua la lavira la vano la vilimateira. Moiso Herod mo sivo mo hahau roto Judea mo vano Caesarea vara i lo toho atu.

Herod Agrippa Mo Mate

²⁰ Supe Herod Agrippa mo lolokoru tavera na mara Tyre peresi Sidon, ale la mai isana na romfomi matea, ale na rani Blastus patu volitusi non Herod mara mo majinga na romira moiso, la usia vara la efi sari tamata peresi Herod matan hara hinau mo lo tai na jaran Supe. ²¹ Ale hin rani atu sei Herod mo taua moiso, mo ru na nona ruru peravu mata supe, mo sakele na jara sakele mata supe, ale mo sile na nona retireti isara. ²² Tamlohi la lo ulo lara, “Aaah! Leo god matea nahai, mo sopo leo tamlohi!”

²³ Vahatea purongo, angelo matea non Moli mo vilijovia matan mo sopo sile na hasohaso isan God, ale hulesi la hania mo mate.

²⁴ Pani reti non God mo ulua mo vano mo vai na tamlohi matuvana tinapua la rasua.

²⁵ Barnabas enia Saul lara la vai vevuhi na sava la lo vano matana Jerusalem, la mele hilu matan Antioch la lavi John sei, tapala hijana Mark.

13

Tanume Tapu Mo Rule Barnabas Enia Saul

¹ Harihi enia hija pfovet hai peresi na tamlohi vujangi Antioch: Barnabas, Simon la tovia ‘tamlohi viriha’, ale Lucius mara Cyrene, Manaen enia vorain Herod Antipas matea, vaona la korohia, ale Saul. ² Na rani matea la tapuhoro na hanhani ale la pa lo lotu Moli, Tanume Tapu mo vereaa mara, “Ha tauhasehi Barnabas enia Saul mata noku voko atu na tovara matana.” ³ Hitahu na nora tapuhoro na hanhani peresi na ususi, la tau na limara hinira ale la fulera la vano na malelera.

Tiroma Hahau Non Saul

⁴ Ale Barnabas enia Saul, Tanume Tapu mo fulera la sivo Seleucia na pahisa tasi, ale la vele na boti hin jara atu, la sivo na Ureuren Cyprus. ⁵ Lara la hoso Salamis, la retivujavujangi na reti non God na ima lotu nona Jew. Ale John Mark mo lo usurira sohena nora tuetueni.

⁶ Lara la hahau roto ureure atu la kakau Paphos, la tataholo na tamlohi matea mo lo mahumahu na suihaan tiapolo, enia Jew

pfovet haluhalu matea hijana Bar-Jesus, ⁷ enia mo lo toho peresi na tamlohi aulu matan Cyprus sei supe non Rome mo taua atu, hijana Sergius Paulus, enia tamlohi lelevosahi matea. Tamlohi aulu atu mo vahafula matan Barnabas enia Saul matan mo opoia vara i rongo na reti non God. ⁸ Pani Elymas tamlohi mahumahu atu mo rethorora matan mo sopo opoia vara tamlohi aulu atu i rongo te reti na rasua non Saul enia Barnabas hin Iesu.

⁹ Pani Saul sei tapala hijana Paul, Tanume Tapu mo marivisia ale Paul mo kilau tataholo isana, ¹⁰ ale mara, “Engko natun Tiapolo, ko marivi na halu peresi posposi tope na leu, meresahi nona hinau tari sei la ruhu, o pa isoiso na nom vailejleji na malele varafuhu non Moli pangisa?” ¹¹ Ale nakerihi natu, liman Moli mo meresahi isam, ale o pa vuso, o pa sopo efi hite na mera alo matan te rani makomona.” Vahatea purongo, matana mo nini ale fofoha mo sohonia, ale mo aleale tamlohi vara tea i tauri na limana i tiroma hinia. ¹² Tamlohi aulu atu mara mo hite hinau atu mo masese mo rasua, matan mo mafurahi tavera na vujangi matan Moli.

Paul Enia Barnabas La Sahe Antioch

¹³ Moiso, Paul peresi na tapalana la mele malue Paphos na boti matea la sahe matan Pamphylia. La hoso na taon matan Perga. John Mark mo tinarihira atu natu, ale mo mele hilu mo sivo Jerusalem. ¹⁴ La mele malue Perga la sahe la pala Antioch matan Pisidia, ale na rani Sabbath la vano la unu na ima lotu nona Jew la sakele. ¹⁵ Hitahun na evievi mata Leu non Moses peresi na reti nona pfovet, patu tamlohi mata ima lotu mo sohahi na retisohahi isara mara, “La vorai, vara te nomim retisohahi mata tueni na tamlohi, ha sinai ha silea.”

¹⁶ Ale Paul mo turu mo tahe na limana vara la tapurongo ale mara, “La tavitavin Israel peresi kamim ka tamlohi fofoha sei ka lo sile na oloolo isan God, ha tapurongo:

¹⁷ God nona tavitavin Israel, mo viroini na nofa pua, ale mo vaira la ulua filangi hin rani atu la lo toho Egypt. Ale mo jurira na suihaana la malue na mauri slev. ¹⁸ God mo lavi na rani filangi isara na jara hasetoho mata tauni ngavulu vati (40). ¹⁹ Ale hitahun haratu, mo vaikomokoma na mara jara tinatinapua mo limaravrua Canaan, ale mo sile na nona tamlohi hin jara atu sohena koruna. ²⁰ La hinau atu mariviti vara i lavi na tauni mo ngavulu sangavulu vati mo ngavulu lima (450). Hitahun, mo silera na tamlohi ari mo tikeli na rani non pfovet Samuel. ²¹ Moiso, tamlohi la tangi matan vara te nora supe, ale God mo silera hin Saul natun Kish, tavitavin Benjamin matea, ale enia mo aulu mata tauni mo ngavulu vati.

²² Pani God mo narihia sohena supe, ale mo tau David na jarana. God mo retireti matan David mara, 'Na hite David natun Jesse vara romina mo usuri na romiku matan enia i pa vai na hinau tari na masaloku.'

1 Sam 13.14

²³ Ale mahapin David, Iesu natu, enia haratu sei God mo sohaia usuri na nona retitauhi hinia sohena Jujuri non Israel! ²⁴ Hin la rani atu la tiroma na nona pala, John tamlohi paptijo mo lo retivujavujangi na tavitauin Israel vara la vahaŋi na nora hehe, ale la posi mai isan God la paptijo. ²⁵ Ale vavahinau non John mariviti vara i lo isoiso, mo vere vaha visa mara, 'Ka romi vara enau hare? Enau mo sopo tamlohi atu, pani ha lo levosahia vara haratu mo lo mai hitahu hinia, enau na sopo tataholo vara a uli na asi eve palona.'

²⁶ La vorai, kamim sei natun Abraham peresi kamim tari sei ka tamlohi roŋoha sei ka lo sile na ololo isan God non Israel, retisohai matan juri akerihi, mo mai isafa mo isoiso. ²⁷ Tamlohin Jerusalem peresi na nora tamlohi aulu la maŋivisi na retimangovi hin haratu la sile na talai isan Iesu vara i mate. La sopo hitevosahia vara enia haratu sei pŋovet la lo uliuli matana, hina purongo vara la lo rongo na retireti nona pŋovet terea na Sabbath. ²⁸ La sopo eri tapai te malele vara i ori hinia, ale hina purongo hin haratu, la usi Pilate vara i vilimateia.

²⁹ Ale lara la maŋivisi vevuhi na retimangovi mata nona mateia, la juria na talopeilopei, la taua na papa matea. ³⁰ Pani God mo sauteterahia na mateia! ³¹ Ale mo pala vaha visa isan la haratu sei enira tolu la tai Galilee la sahe Jerusalem, enira natu la vere la hinau sei la hitera isana tavitauin Israel.

³² Ale kama lo retivujavujangi kamim hin Retiruhu atu matan retitauhi sei God mo vai isana noŋa pua, ³³ vara retitauhi atu God mo maŋivisia isaŋa — natura hin haratu mo tahe Iesu sohen David mo ulia na harua psalm mara,

'Engko Natuku,

nahapani na vujangia
vara enau Tamam.'

Psa 2.7

³⁴ Enia hina varaŋuhu matea sei God mo tahe Iesu na mateia matan vara i pa sopo rovo, hinau atu mo vere na Retitapu sei mara,

'A pa sileho na leŋuhu tapu peresi na retitauhi sei na vaia isan David.'

Isa 55.3

³⁵ Matana, mo mele vere na psalm tinapua matea mara,

'O pa sopo tinaŋihia vara nom Tamlohi
Tapu i hite na rovo.'

Psa 16.10

³⁶ Matan David, hitahun haratu mo vai na masalon God na nona rani, mo mate ale la tavunia peresi na tahisana, epena mo rovo. ³⁷ Pani haratu sei God mo lo tahea na mateia, epena i pa sopo hite na rovo.

³⁸ Matan haratu, la vorai ha levosahia vara hinia, kama lo retivujavujangia vara God i pa romi na hehe, ³⁹ ale vara sava tamlohi la tau na nora rasua hinia, la pa tataholo na nahon God, hinau sei Leu non Moses i sopo eri vaia hin te rani. ⁴⁰ Ha lo kilau! Ha sopo tinaŋihia vara retireti nona pŋovet la lo vere kamim, matan la vere a lara,

⁴¹ 'Ha hitea la tamlohi kerekerehi,

ha maŋurahi tavera hinia ale ha tihai!

Matan na lo vai na vavahinau matea na nomim rani,

vavahinau atu ha sopo eri rasua,

hina purongo vara tea la vereulia isamim.' "

Hab 1.5

⁴² Paul enia Barnabas lara la lo malue na nora ima lotu, tamlohi la usia mo rilangi isara vara la mele vere la hinau atu na tavalu wik na Sabbath. ⁴³ Jew matuvana peresi la haratu sei la posi la lavi na rasua nona Jew la lo lotu na ima lotu la usuri Paul enia Barnabas, ale la tupra rua atu la vere a isara vara la turu rilangi usuri na romfuhu non God.

Paul Mo Vano Isana Tamlohi Roŋoha

⁴⁴ Sabbath atu mo usuria, mariviti tamlohi tari hin taon tavera atu la sinai vara la rongora la retivujavujangi na reti non Moli.

⁴⁵ Pani Jew lara la hite vao atu, mereimerei mo maŋivisia, ale la tapulo vereleji na sava Paul mo lo vere a isara, la lo retisatihia.

⁴⁶ Paul enia Barnabas la romrilangi la raramira lara, "God mo taua vara kama pa sile na Retiruhu isana tavitauin Israel tiroma, pani matan ka rohu hinia, ale matan ka hitea vara ka sopo tataholo vara ha lavi na mauri tui, kama pa silea isana tamlohi roŋoha. ⁴⁷ Matan Moli mo retileu hinia isamam hin haratu mo vere a mara, 'Enau na vai kamim sohena malarani isana tamlohi roŋoha,

vara ha lavi na reti mata juri i vano na isoiso varama.' "

Isa 49.6

⁴⁸ La haratu sei la tamlohi roŋoha lara la rongoa, la avulahi hinia ale la hasohaso na reti non Moli, ale la haratu sei God mo viŋonira mata mauri tui la rasua. ⁴⁹ Ale reti non Moli mo lo unu na jara tari hin jara tavera atu.

⁵⁰ Pani tamlohi tavera nona Jew la reve takonahi na haŋai aulu sei la lo sile na ololo isan God peresi na tamlohi aulu matan taon tavera atu, ale la vai na vao matea la meresahi hin Paul enia Barnabas ale la tipahi nafihiara hin jara tavera atu. ⁵¹ Pani

la safsaŋhi naŋihi na tangotango palora matara ale la vano na taon tavera matan Iconium. ⁵² Ale tamlohi rasua atu la maŋivi na avulahi peresi na Tanume Tapu.

14

Paul Enia Barnabas La Rohi Iconium

¹ Na rani Paul enia Barnabas la lo toho Iconium, la unu na ima lotu nona Jew, ale la retivujavujangi peresi na suiha mo vaia vao tavera jea matea isana Jew peresi la haratu la tamlohi rofoha la rasua. ² Pani Jew sei la sopo rasua, la ari posposi la haratu la tamlohi rofoha, ale la komo na romira la meresahi isan Paul enia Barnabas.

³ Mo vaia la toho mo peravu atu, ale la retivujavujangi mo sopo te matahu hinira, ale la vereuli na romŋuhu non Moli. Ale Moli mo vujangia vara nona retisohai sei mo varaŋuhu matan mo sile na suiha isana nona vahaŋule vara la eri vai na matamata tavera peresi na hinau maŋurahi. ⁴ Pani tamlohi hin taon tavera atu la patumasa, hai la turu peresi la Jew atu, ale hai la turu peresi la vahaŋule atu.

⁵ Vao matea mata Jew peresi la haratu la tamlohi rofoha peresi na nora tamlohi tatavera la hatiha vara la pa vailejlejira, ale la pa parura, ⁶ pani Paul enia Barnabas lara la levosahia, la rovo la vano na jara tavera Lycaonia, ale isan la taon tavera atu Lystra enia Derbe peresi na jara ralihi ea, ⁷ ale la retivujavujangi na Retiŋuhu ea.

Paul Enia Barnabas La Rohi Lystra Enia Derbe

⁸ La pa lo toho atu Lystra la mai tataholo na tamlohi papao matea, mo vora palona la sati ale mo sopo lo hahau na maurina. ⁹ Tamlohi atu mo lo tapurongo mo ruhu na retivujavujangi non Paul, ale Paul mo hitea ale mo hitevosahia vara enia mo rasua vara enia i eri ruhu. ¹⁰ Ale Paul mo vereia isana na leo tavera matea mara, “O turu!” ale tamlohi atu mo turu tataholo mo tapulo hahau.

¹¹ Ale vao atu lara la hite hinau atu Paul mo vaia, la ulo na leon Lycaonia lara, “La tamlohi nike enira god sei la tai na tuka la pala na epe tamlohi!” ¹² La tapulo tovi Barnabas vara Zeus sei god nona mara Greek, ale Paul enia god sei Hermes matan enia mo lo sile na retireti. ¹³ Temple non Zeus mo lo toho na jingoima ropen taon tavera atu. Ale nona priŋ peresi na vao la lavi na buluk peresi na fongoŋo la vaira na vira pahai, ale la lavira la vano na mataruan taon tavera atu, ale la tatamahu vara la pa vai na malamalai isan la vahaŋule atu.

¹⁴ Pani Barnabas enia Paul lara la rongvosahi na sava la lo vereia, la fari na nora ruru ale la maro la vano na livuhan vao

atu la lo ulo lara, ¹⁵ “La tapala, ka lo vai la hinau sei mata sava? Kamam tamlohi sohemim purongo. Kama mai matan vara kama sile na Retiŋuhu isamim matan vara ha pa vahaŋi na hinau la sopo ruhu, ale ha posi mai isan God sei mo mauri mo vai na tuka, varama, tasi peresi na hinau tari sei la lo toho hinira. ¹⁶ Tuai mo tinarihia vara la haratu la sopo levosahi God na jara tari la eri usuri na masalora, ¹⁷ pani mo vujangia vara enia mo lo mauri na hina ruhu mo lo vaira sohena usa mo jovi na masapa ale hanhani la ruhu, ale ka masu na hanhani ka avulahi matana.”

¹⁸ Pani hina purongo hin haratu, Paul enia Barnabas mariviti la sopo eri horo la vao atu vara la sopo vai na malamalai isara.

¹⁹ Pani Jew hai la tai Antioch peresi Iconium, la mai la posi na romin la vao atu la meresahi hinira, ale la paru Paul ale la reve tahitahia mo malue hin taon tavera atu matan la romi vara mo mate. ²⁰ Pani tamlohi rasua lara la lo turu ralihi, Paul mo mele turu ale mo mele unu hin taon tavera atu. Ale na rani tinapua matana, Paul enia Barnabas la malue la vano matan Derbe.

Paul Enia Barnabas La Sivo Antioch Matan Syria

²¹ Paul enia Barnabas lara la retivujavujangi na taon tavera matan Derbe la vai na tamlohi usuri matuvana. La mele hilu la sivo Lystra, Iconium ale la mele sahe Antioch matan Pisia, ²² ale hin la jara atu la tueni na rasua nona tamlohi usuri. La retituetuenira vara la turu filangi na nora rasua, ale la vere mamahunia isara lara, “Ra pa unu hin mauri atu God mo aulu hinia na malele rani filangi matuvana.” ²³ Paul enia Barnabas la viŋoni na patu tamlohi mata kilau na vao kalesia tari, ale na ususi peresi na tapuhoro hanhani la taura na liman Moli sei la lo tau na nora rasua hinia. ²⁴ Moiso la mele sivo roto Pisia vavano la tikeli Pamphylia. ²⁵ Hin jara atu la mele retivujavujangi Perga moiso la sivo Attalia.

²⁶ La malue hin jara atu la vele na boti la vano Antioch matan Syria, jara atu sei la lo tapulo na nora hahau ea, jara sei la taura na liman romŋuhu non God ea matan voko sei la isoiso hinia natu. ²⁷ Lara la pala, la tovi matavuhi na vao kalesia na jara matea, ale la vereuli vevuhi na sava God mo vaia isara ale sohena sava mo roi na malele mata rasua isan la haratu la tamlohi rofoha. ²⁸ Ale la lo toho peresi na tamlohi usuri Antioch mo peravu makomona.

15

Council Tavera Nona Kalesia Jerusalem vao

¹ Pani tamlohi hai la tai Judea la sinai la tapulo vujangi na kalesia vara, “Vara ha sopo taifalihu sohen leu non Moses mo vereia, ha pa sopo eri juri!” ² Paul enia Barnabas lara la rongoa la sopo avulahi, la vauriuri tavera peresira matana. Ale vao kalesia atu la viřoni Paul enia Barnabas peresi na nora tamlohi hai, vara la sivo Judea matan la sahe Jerusalem vara la sorahia peresi na vahařule tolu na tamlohi tatavera nona vao kalesia Jerusalem. ³ Vao kalesia Antioch la řulera la sivo, ale lara la lo sivo la rohi Phoenicia peresi Samaria, ale la sorahia sohen sava la haratu la tamlohi řořoha la posi, ale vorai kalesia hin la jara atu la avulahi tavera matana.

⁴ Ale hin rani atu la kakau Jerusalem, kalesia tari, vahařule peresi na vajiahara, la lavi Paul enia Barnabas na avulahi. Ale la vere vevuhi na sava God mo vaia na nora vavahinau. ⁵ Pani tamlohi rasua hai sei la tai na vao Pharisee, la turu lara, “Ha vujangi la haratu la tamlohi řořoha vara la pa taifalihu, ale la pa usuri na leu non Moses.”

⁶ Vahařule peresi na vajiahara la pulutahi vara la sorahi hinau sei. ⁷ Retireti matuvana la vano moiso, Peter mo turu ale mara, “La vorai, ka levosahia vara tiroma God mo viřoniau vara a vano a retivujavujangi isan la haratu la tamlohi řořoha, matan vara la efi rongoa na retisohai mata Retiřuhu, ale la rasua. ⁸ God sei mo levosahi na mapu tamlohi, mo vujangia vara enia mo avulahi hinira, matan enia mo sile na Tanume Tapu isara sohen mo lo silea isafa nika. ⁹ Na nahon God, enfa řa sopo tinapua hinira, matan mo vai na mapura la vokevu na rasua sohen. ¹⁰ Ale vara mo sohen, mata sava ka lo vaihite God, matan ka opoia vara ha tau na tetehi puhoni isana tamlohi usuri sei la tamlohi řořoha? Hinau sei, enfa teni nořa pua la sopo efi solotia! ¹¹ Pani řa rasua vara God i pa jurifa na řomřuhu non Moli Iesu sohera.”

¹² Ale řomřomi atu mo moti, ale tamlohi tari la tapurongo isan Barnabas enia Paul, la sorahi na matamata tavera peresi na hinau mařurahi sei God mo lo vaira na naho tamlohi la tamlohi řořoha.

¹³ La retireti mo isoiso, James mo turu mo vereia mara, “La vorai, ha tapurongo isaku. ¹⁴ Ka rongoa Simon Peter mo vereia moiso sohen sava God mo řulea isana tamlohi řořoha vara i lavi nařihi na nona tamlohi isara. ¹⁵ Ale reti nona řovet la majinga hin hinau sei sohen la ulia na Retiulia lara,

¹⁶ Ĥitahun hinau sei a pa mele pala,
ale a pa mele voro na jaran supe David
sei mo jovi.

A pa mele voroa hin la sopesopena sei la lo toho,
ale a pa mele turuhia,

¹⁷ matan vara tamlohi tinatinapua na varama la pa hite Moli ea,
la haratu sei la tamlohi řořoha sei,
na tovira moiso vara la pa noku.
Harihi enia sava Moli mo vereia.’

Amos 9.11–12

¹⁸ Haratu sei mo lo vereuli la hinau nika tuai moiso.

¹⁹ Matan haratu, noku kilakilau řa sopo mele sile te rani řilangi tinapua isana tamlohi řořoha sei la lo posi la mai isan God, ²⁰ pani mo ruhu vara řa uli te leta hatea mata i vereia isara vara i horora vara la sopo hani na mit sei la silea isana tamasi moiso, ale vara la toho asau na mauri maji, ale vara la sopo hani te maji sei la punia, ale la sopo inu na řae.* ²¹ Matan la leu nika non Moses la retivujavujangira na ima lotu nona Jew na taon tavera tari na Sabbath mata tauni mo visa moiso.”

Leta La Ulia Isana Tamlohi Rořoha

²² Ale vahařule peresi na vajiahara peresi na vao kalesia Jerusalem, la viřoni na tamlohi hai, ale la řulera la sahe Antioch matan Syria peresi Paul enia Barnabas, vara la vereuli na řaramin řomřomi atu la lo hahau matana. La tamlohi atu la viřoni na patu tamlohi nona vao kalesia mo rua, Judas sei tapala hijana Barsabbas peresi Silas. ²³ Harihi enia leta atu la lo lavia peresira:

“Retioloolo isamim la vorai kalesia Antioch, Syria peresi Cilicia sei ka tamlohi řořoha, mo tai isana vorai kalesia nika Jerusalem, peresi na vahařule peresi na vajiaha sei la aulu na vao kalesia nika.

²⁴ Kama levosahia vara tamlohi hai la tai nika la vano isamim ale la vai na řomimim la kaka na nora vujangi, pani kama sopo řulera hin te hinau sohen. ²⁵ Ale matana, kama hitea vara mo tataholo vara kama rule la vahařule sei Judas enia Silas peresi la vorai ruřuruhi sei Paul enia Barnabas isamim usuri na řomřomi kamam tari nika kama hatiha. ²⁶ Paul enia Barnabas sei mariviti la mate matan Moli Iesu Kristo. ²⁷ Ale matana, kama lo rule Judas enia Silas vara la pa vereuli na sava kama ulia hin leta nika na nahomim.

²⁸ Matan kama majinga peresi na Tanume Tapu vara i pa mele ruhu vara kama sopo mele tau te retileu řilangi isamim, pani la retileu nika mo visalete purongo:

²⁹ Vara ha sopo hanhani na mit sei la silea isana tamasi moiso, ale vara ha sopo hani te maji sei la punia, ale ha sopo inu na řae, ale vara ha toho asau na mauri maji. Vara ha

* 15:20: maji sei la punia: mo sopo tataholo vara řa hani na maji la punia matan řaena mo pa lo mařivi na visihona.

sopo vai la hināu atu, i pa ōhū jēa isamim. Enia natu, enā vūho.”

³⁰ Ale la vahaŕule tupu vati atu la malue, vahatea la sahe Antioch. La tovi matavūhi na kalesia tari la mai jara matea atu, ale la evi leta atu isara. ³¹ Ale avulahi tavera mo jovi isana kalesia tari hin rani atu, lara la rongo retisohai ōhū atu.

³² Ale Judas enia Silas enira tupra rua la pŕovet, ale la retireti mo peravu isana kalesia vara la tueni na nora rasua vara i ulua i mele ŕilangi. ³³ La lo toho atu mata makomo rani moiso, la ŕulera la mele sivo Jerusalem peresi na leŕuhu nona kalesia isan la haratu sei la lo ŕulera. ³⁴⁻³⁵ Pani Paul enia Barnabas la lo toho Antioch, la lo vujangi, ale la retivujavujangi na reti non Moli peresi na tamlohi tinapua hai.

Paul Enia Barnabas

³⁶ Rani hai la vano moiso, ale Paul mo vereā isan Barnabas mara, “Ra mele sahe ŕa rohi na vorai hin la taon tavera tari sei ŕa lo retivujavujangi na reti non Moli ea, ale ŕa hitea vara la lo sohena sava.”

³⁷ Barnabas mo avulahi ale mo opoia vara i lavi John Mark. ³⁸ Pani Paul mo ŕohu ŕilangi, matan John Mark mo rovo hinira tiroma Pamphylia ale mo sopo tuenira na nora vavahināu. ³⁹ La sopo eŕi mai na ŕomŕomi matelete mo vaia Barnabas mo lavi John Mark peresia ale la vele na boti la sahe Cyprus, ⁴⁰ pani Paul mo viŕoni Silas ale la malue peresi na leŕuhu nona vorai kalesia lamane peresi na haŕai. ⁴¹ Mo sahe roto Syria peresi Cilicia mo tueni na vao kalesia tari ea vara la turu ŕilangi na nora rasua.

16

Timothy Mo Usuri Paul

¹ Paul mo mele sahe mo mai Derbe, ale mo sahe Lystra. Hin jara atu mo tapai na uluvou matea enia tamlohi usuri matea, hijana Timothy, enia natun haŕai Jew matea enia kalesia, pani tamana enia mara Greek matea. ² Vorai kalesia Lystra peresi Iconium la vereā vara enia tamlohi ōhū matea. ³ Paul mo opoia vara Timothy i usuria na nora hahau, ale mo lavia mo taifalīhia matan la Jew atu la lo toho hin jara atu la levosahia vara tamana enia mara Greek matea. ⁴ Lara la lo vano na taon tavera hatehateahi, la lo vereuli na sava sei vahaŕule peresi na vajiaha sei lo aulu na kalesia Jerusalem, la hatihia vara tamlohi ŕoŕoha la pa oloolo hinira. ⁵ Matana, vao kalesia tari la mele ulua ŕilangi na nora rasua, ale evira mo lo sahe aulu na rani hatehateahi.

Tamlohīn Macedonia Matea Mo Tovi Paul

⁶ Ale la sahe la hahau roto na jara tavera matan Phrygia peresi Galatia, matan Tanume Tapu mo horora vara la sopo sivo Asia mata la vere na retisohai non Moli ea.

⁷ Lara la mai Mysia, la vaihitea vara la sahe na jara matan Bithynia, pani Tanumen Iesu mo horora, ⁸ ale la mele hahau sivo roto Mysia moiso la sivo Troas.

⁹ Hin vutepongi atu hināu matea sohena mavuho matea mo pala isan Paul. Mo hite na mara Macedonia matea mo lo turu atu mo lo usia ŕilangi mara, “O mai Macedonia, o tueni kamam!” ¹⁰ Paul mara mo hite mavuho atu moiso, kama turu vahatea, ale kama aleale malelemam vara kama vano Macedonia, kama levosahia vara God mo tovi kamam vara kama vano kama retivujavujangi na Retiŕuhu isara.

Lydia Mo Rasu Na Retiŕuhu

¹¹ Ale kama vele na boti Troas kama sahe tataholo Samothrace, ale mo mele rani sahe kama hoso Neapolis, ¹² moiso kama malue atu kama lo sahe Philippi, enia taon tavera matan Macedonia, jara mara Rome matea. Kama toho atu mata makomo rani.

¹³ Ale na Sabbath kama malue na mataruan taon tavera atu, kama vano makomona na pahisa wai matea. Kama ŕomi vara enia jara matea tamlohi la lo pulutahi mata usiisi ea, ale kama sakele hin jara atu ale kama lo sorasora peresi la haŕai atu sei la lo pulutahi atu. ¹⁴ Vonara matea, hijana Lydia enia mara Thyatira sei, enia taon tavera matea, enia mo lo vai na mania na ruru ōhū sei perpel, ale matan enia mo lo lotu God, mo lo tapurongo isamam. Ale God mo roi na mapuna vara i rasu na sava Paul mo lo vereā. ¹⁵ Ale mo lavi na paptijo peresi na vao imana, ale hitahuna, mo usia ŕilangi isamam mara, “Vara na nomim kilakilau ka hitea vara enāu na lo turu ŕilangi hin Moli, ha mai na imaku ale ha lo toho ea.” Ale mo vereā mo ŕilangi vavano kama majinga isana.

Paul Enia Silas Na Ima ŕilangi

¹⁶ Kamara kama lo vano na jara mata usiisi, kama tapai na haŕarihi slev matea sei tanume sasati mata vere na hināu i pa mase se mo lo toho hinia. Ale nona tamlohi tavera la lo lavi na mania tavera matana. ¹⁷ Mo lo usuri kamam peresi Paul, mo lo ulu aulu mara, “La tamlohi nīke enira la volitisi non God sei mo Aulu Jea, enira la lo retivujavujangi kamim na malele mata juri.”

¹⁸ Ale mo lo vai hināu atu sohena mata rani matuvana moiso, ale Paul mo malokona, ale mo posi vano isana mo vereā isan tanume sasati atu mara, “Na retileu isam na hijan Iesu Kŕisto vara o malue hinia.” Ale vahatea purongo mo tināŕihia.

¹⁹ Pani nona tamlohi tavera lara la hitea vara malele mata nora mania mo pelati, la taurilati Paul enia Silas la reve tahitahira la sivo na jara maket, la vaira la turu na naho tamlohi aulu hin taon atu. ²⁰ Lara la lavira la mai la turu na naho tamlohi aria atu, la vereea lara, “La mara Jew nike, la lo vai na rom tamlohi hin taon tavera nike la sopo sakele, ²¹ ale la lo vujangi na tamlohi na posposi hai mo sopo tataholo vara enfa mara Rome fa lavira teni vara fa vaira!”

²² Vao atu la tapulo turuleji hinira, ale la tamlohi aria atu la fari nafihi na ruru non Paul enia Silas, ale la retileu vara la hamajira na maja. ²³ Hitahun haratu la hamaji komokomora, la pulahira na lolo ima filangi, ale la retileu vara tamlohi ima filangi i lo kilaura vara la sopo mele malue. ²⁴ Mara mo lavi retileu atu sohena, mo pulahira sivo na jara matea na lolona vahatea. Ale mo sohoni na palora na koko tapea mo pilatira.

²⁵ Na livuha vutepongi, Paul enia Silas la pa lo usiisi ale la lo lalavete isan God, ale tamlohi tinapua na lolo ima filangi, la lo tapurongo hinira. ²⁶ Vahatea purongo, mihi tavera matea mo hisu, mo hisuhi ima filangi atu mo tikeli pulona vahatea, ale vahatea purongo pelati tari la roi, ale jen tari la jovi nafihi hinira enira mo isoiso. ²⁷ Tamlohi kilau na ima filangi mara mo turu mo hitea vara pelati tari la roi, mo reve nafihi na nona sita mo tatamahu vara i pa vilia enia hasena, matan mo fomi vara la haratu la lo toho na lolo ima filangi la rovo moiso. ²⁸ Pani Paul mo ulo aulu isana mara, “O sopo vaia! Matan kamam mo isoiso nahai kama lo toho!”

²⁹ Tamlohi atu mo ulo mata lamu ale mo maro matan lolon ima filangi atu vahatea, ale mo jovi na palon Paul enia Silas na nona matahu. ³⁰ Moiso mo lavira la malue ale mo usia isara mara, “La tamlohi tavera, a pa vai na sava vara a efi juri hinia?”

³¹ La raramia lara, “O tau na nom rasua hin Moli Iesu, ale o pa juri, engko peresi na vao imam.” ³² Ale la vere na reti non Moli isana peresi la haratu sei la lo toho peresira na lolo ima. ³³ Ale hin vutepongi atu purongo mo lavira la vano mo hoje na matara maja isara, ale enia peresi na vao tari na imana la paptijo vahatea. ³⁴ Ale pa tamlohi atu mo lo kilau na ima filangi mo lavira la sahe na imana, ale mo tau na hanhani na nahora ale mo avulahi tavera peresi na vao imana, matan enira la tau na nora rasua hin God.

³⁵ Pani na nahonaho rani, la tamlohi aria atu la fule na nora police vara la vereea isan tamlohi atu mata kilau na ima filangi lara, “O tinafihi!”

³⁶ Pa tamlohi atu mata kilau na ima filangi, mo vere retireti atu isan Paul mara, “Tamlohi aria, la vahafule vara a tinafihi kamim. Ale matana, ha malue ha vano na tamata.”

³⁷ Pani Paul mo vereea isana police atu mara, “La tamlohi atu la hamaji kamam na naho tamlohi, la sopo usuri na posposi tataholo mata ari na tamlohi, hina purongo vara kama mara Rome, ale la pulahi kamam na ima filangi. Ale nake, la opoia vara la tinafihi kamam tamlohi la sopo levosahia? Mo sopo te malele sohena. Ha vano ha verera hinia vara enira la pa mai nike, ale la nafihi kamam.”

³⁸ La police atu la vere la retireti atu isan la tamlohi aria atu. Ale la tamlohi aria atu lara la rongoa vara Paul enia Silas enira mara Rome, la matahu tavera matana. ³⁹ Ale la mai la fomtuhutuhu isara. Ale la lavi nafihiara la usira filangi vara la malue hin taon tavera atu. ⁴⁰ Lara la malue na ima filangi, la vano la unu na iman Lydia, ale lara la hite na vorai kalesia atu la retituetenira moiso la malue.

17

Paul Enia Silas La Kakau Thessalonica

¹ Lara la hahau roto Amphipolis enia Apollonia moiso, la mai Thessalonica sei ima lotu nona Jew matea mo lo toho ea.

² Ale usuri na posin Paul, mo lo matavuhi peresira mata Sabbath mo tolu, ale mo lo vereuli na Retitapu isana tamlohi ea. ³ Mo lo vereuli mamahuni na Retitapu na nona vujangi sohena sava Kristo i pa lavi na rongohaji, ale i pa mele turu na mateia, ale mo vereea mara, “Iesu akerihhi natu sei na lo retivujavujangia isamim, enia Kristo atu.”

⁴ Tatua Jew atu la rasua peresi na vao tavera mara Greek la lo lotu God peresi na hafai aulu matuvana, la avulahi vara la tapala peresi Paul enia Silas.

⁵ Pani tamlohi aulu nona Jew la mereimerei hinira, ale la lavi na tamlohi sasati hai hin vao tavera atu na jara maket, ale la vaira la mai vao meresahi matea, ale taon tavera atu mo tapulo roroa na leora. ⁶ Ale lara la sopo efi hite Paul enia Silas, la reve tahitahi Jason peresi na vorai kalesia hai, la vaira la turu na naho tamlohi aulu matan taon tavera atu, la ulo lara, “La tamlohi nike sei la lo posileji na varama, enira nahai la pala nike sohen la pete vaia na jara tinapua moiso, ⁷ ale Jason mo avulahi hinira mo taura na imana! Enira mo isoiso la lo turuleji na retileu non supe nona mara Rome matan la lo vere na supe tinapua matea hijana Iesu!”

⁸ Ale tamlohi peresi na tamlohi aulu matan taon tavera atu lara la rongo la hinau sei, fomira la sopo sakele. ⁹ La tamlohi aulu

atu matan taon tavera atu lara la lavi na mania mata volituhu non Jason peresi la vorai kalesia tinapua atu moiso, la tinañihira.

Paul Enia Silas La Kakau Berea

¹⁰ Hin vutepongi atu purongo, kalesia la ñule Paul enia Silas la malue la vano Berea, ale lara la pala atu, la vano la unu na ima lotu nona Jew. ¹¹ Ale Jew matan Berea enira tamlohi ale lelevosahi, la jeu la haratu Thessalonica, matan la lo opoia jea vara la tapurongo hin retisohai atu na rani hatehateahi, ale la lo kilau usuri mamahuni na Retitapu matan vara la hitea vara mo sohena teni mo vono. ¹² Ale matana, vao tavera isara la rasua peresi na mara Greek aulu hai lamane peresi na hañai. ¹³ Pani Jew matan Thessalonica lara la rongoa vara Paul mo lo retivujavujangi na retisohai mata reti non God Berea, la mai ea sohena, ale la vai na vao matea matan vara la vai na romi tamlohi la sati. ¹⁴ Ale vahatea purongo la vorai kalesia atu la ñule Paul mo sivo na tasi, pani Silas enia Timothy la lo toho atu Berea. ¹⁵ La haratu la lo tiroma hin Paul la lavia mo sivo la tikeli Athens, ale Paul mo vereea isara mara la vere Silas enia Timothy la sinai isana vila, ale la vorai kalesia atu la malue la sahe matara.

Paul Mo Retivujavujangi Athens

¹⁶ Ale na rani Paul mo lo saovira Athens, romina mo jovi tavera matan mo hite taon tavera atu mo mañivi na tamasi. ¹⁷ Ale mo lo vano na ima lotu nona Jew vara i retivujavujangi isara peresi na tamlohi roñoha sei la lo lotu God ea, ale na rani hatehateahi mo lo vujangi na vao tamlohi sei la lo toho na jara maket.

¹⁸ Ale Paul mo mele sorasora peresi na tamlohi hai la lo usuri na vujangi non Epicurus peresi hai non Zeno sei la tovara Stoic,* ale hai la lo usia lara, “Tamlohi rongorongono vono nike mo lo vere na sava nahai?” Tatuara lara, “Vara o tapurongo usuria, o pa hitea sohena vara mo lo vujangi na rasua paro matea.” La pa vereea sohena matan Paul mo lo retivujavujangi na Retiñuhu matan Iesu peresi na nona sauteterahi. ¹⁹ Ale la lavi Paul la vano na council nora sei hijana Areopagus,† lara, “O eñi vereuli kamam hin vujangi paro akerihi sei ko lo retivujavujangia? ²⁰ Matan ko lo vere na hinau paro hai nahai na peromam, ale kama opoia vara kama levosahi na ñaramira.” ²¹ Mara Athens peresi na tamlohi mara jara tinatinapua sei la lo toho

atu, tarea la lo opoia vara la lo sorahi na romfomi paro sei la pa pala purongo.

²² Ale Paul mo turu na naho vao matan Areopagus atu ale mara:

“Mara Athens, na hitea vara kamim ka ñilangi na sava ka lo rasua, ²³ matan nara na lo hahau ñalihi, ale na hite na nomim hinahinau mata lotu, ale na mele hite na uliuli matea mo lo toho na votavota vara,

**Isana god matea
kama sopo levosahia**

Matan haratu a pa retivujavujangi kamim hin God atu sei ka lo lotua pani ka sopo levosahia.

²⁴ God atu sei mo vai na varama peresi na hinau tari hinia enia Moli matan na tuka peresi na varama, ale mo sopo toho na ima lotu sei tamlohi la lo vaira na limara, ²⁵ teni tamlohi la sopo volitusi isana na limara sohena vara enia mo opoi te hinau isara, pani enia natu mo sile na mauri peresi na maromaro peresi na hinau tari isana tamlohi tari. ²⁶ Ale na tamlohi matea mo vai na tamlohi mara jara tinatinapu tari vara la toho na jara tari na varama, mo tau na nora rani ale mo tau na jara sei vara la pa toho ea, ²⁷ matan vara la pa ale God, ale la pa tarongo ale vara la tapaia, pani enia mo sopo toho asau hiniña hatehateahi. ²⁸ Matan hinia, enña ña lo mauri, ña lo vavahinau ale ña lo toho, sohena nomim tamlohi lelevosahi hai la vereea moiso lara, “Matan enña sohena enña tanihana.”

²⁹ Ale matan enña sei ña natun God, ña pa sopo romromia vara God enia hinau matea la vaia na gold teni silver teni vatu, teni te ninu tamlohi la vai mamahunia usuri na romira. ³⁰ Matan haratu, hina purongo vara God mo lo kilau purongoi la haratu la lo toho na mauri roñoha, pani nake, mo lo retileu vara tamlohi tari na jara tari vara la pa vahai na nora hehe, ³¹ matan enia mo tau na rani matea moiso vara i pa ari na varama usuri na nona posposi tataholo jea na lima tamlohi matea enia mo viñonia, ale mo vujangia mo memera isana tamlohi tari hin haratu mo sauteterahia na mateia.”

³² Ale lara la rongo na retireti matan sauteterahi atu, hai la tapulo vaivaia. Pani hai lara, “Kama pa mele tapurongo isam matan la hinau akerihi hin te rani.” ³³ Ale Paul mo malue na naho tamlohin Areopagus atu. ³⁴ Pani tamlohi hai la usuria ale la rasu na sava mo lo verera. Vonara matea hijana Dionysius, enia tamlohi matea hin council tavera atu Areopagus, ale hañai

* **17:18:** Epicurus / Zeno: Epicurus enia Zeno la vujangi na nora kilakilau mata mauri isana tamlohi. Ale hai la usurira, la haratu la lo usurira la lo vereea vara enira la tamlohi lelevosahi. Hija tamlohi usuri non Epicurus enia Epicurean, ale hija tamlohi usuri non Zeno enia Stoic. † **17:19:** Areopagus: Council akerihi enia mo lo kilau usuri na vujangi tari la lo unu Athens peresi na tamlohira.

matea hijan Damaris, ale mele tamlohi tina-pua hai peresira.

18

Paul Mo Tapai Priscilla Enia Aquila

¹ Hitahun haratu, Paul mo malue Athens mo sivo Corinth. ² Ale mo tapala peresi na Jew matea hijana Aquila mara Pontus matea sei mo pa tai Italy purongo peresi narouna Priscilla, matan Claudius, supe matan Rome, mo retileu vara Jew tari la malue Rome, ³ ale matan Paul, enia nona voko mo sohera la lo vai na tent, ale mo lo toho peresira mo lo voko peresira.

⁴ Ale na Sabbath hatehateahi, Paul mo lo retivujavujangi isana Jew peresi na mara Greek na nora ima lotu ale mo lo vaihitea vara la levosahia vara Iesu enia hare.

⁵ Silas enia Timothy lara la tai Macedonia la pala, Paul mo tau vevuhi na nona rani mata retivujavujangi na reti non God, ale mo lo vereulia isana Jew tarea vara Iesu enia Kristo atu la lo kilau matana. ⁶ Pani Jew lara la rohu hinia, ale la verelejeleja. Paul mo vai na tovongi matea mo vujangi na nona rohu hinira hin haratu mo safsafhi nafihi na tangotango na nona ruru ale mara, "Raemim i pa toho na patumim, mo sopo te noku hinau hinia! Mo tapulo nake, a pa vano isana tamlohi rofoha!"

⁷ Moiso, Paul mo malue hin nora ima lotu atu mo vano mo unu na ima matea mo lo toho na pahisan ima lotu atu, enia iman Titius Justus, tamlohi rofoha matea pani enia mo lo lotu God. ⁸ Pani Crispus, tamlohi aulu mata ima lotu atu, enia peresi na vao imana sohena la rasu Moli. Mara Corinth tinapua hai sei la rongo hinau atu, la rasua, ale la lavi na paptijo sohera.

⁹ Ale Moli mo vujangi Paul na hinau matea sohena mavuho matea hin vutepongi atu, mo vereea isana mara, "O sopo matahu, o retireti, o sopo puni na jingom, ¹⁰ matan enau na lo toho peresihio, ale tea i sopo eri tikeli na epem vara i komoho, matan noku tamlohi hin taon tavera nike la mafivi." ¹¹ Matan haratu, Paul mo lo toho atu mata tauni matea vitu mo limarave, mo lo vujangi na reti non God isara.

Paul Mo Turu Na Nahon Gallio

¹² Ale hin rani atu Gallio mo lo aulu hin Achaia, Jew la pulutahi jara matea la vai na vao tavera matea, ale la turuleji hin Paul, la taurilatia la vaia mo turu na naho jara aria vara la aria ¹³ lara, "Tamlohi akerihi mo lo vereea isana tamlohi vara la lotu God na malele matea mo sopo usuri na posposi sei leu non Moses mo lo vereea."

¹⁴ Paul mo tatamahu vara i pa retireti pani Gallio mo vereea isan la Jew atu mara,

"Vara hinau akerihi enia mata tope na leu matea, teni matan te vafen sasati, i pa tataholo vara a tapurongo isamim Jew matana, ¹⁵ pani matan enia mata nomim retireti peresi na hija tamlohi peresi na nomim leu, kamim purongo ha vai tataholoia. A pa sopo ari na hinau sohena."

¹⁶ Ale mo vai na nona tamlohi la sohai nafihi na nona jara aria. ¹⁷ Ale vao atu la taurilati Sosthenes, tamlohi aulu mata ima lotu nona Jew, ale la tapulo tamajia na naho jara aria atu purongo, pani Gallio mo sopo kilaura hinia.

Paul Mo Mele Vano Antioch Matan Syria

¹⁸ Paul mo mele toho Corinth mata rani matuvana moiso natu mo vere enfa vuho isana vorai peresi na vevorai kalesia atu. Ale mo vele na boti matea peresi Priscilla enia Aquila matan vara la vano Syria. Paul mo hiri nafihi na vuluna hin rani atu la pa lo toho Cencreae mata vujangia vara mo vai vevuhi na nona retitauhi. ¹⁹ Na rani la pala Ephesus, Paul mo tinafihi Priscilla enia Aquila la pa lo toho atu. Ale enia mo sahe mo unu na ima lotu nona Jew, ale mo retivujavujangi isara. ²⁰ Mara Ephesus lara la usia vara i toho peravu isara, mo vereea isara mara mo vono, ²¹ pani mo vere enfa vuho isara ale mara, "Vara na masalon God, a pa mele mai isamim." Moiso la mele vele hin boti atu, la malue Ephesus. ²² Ale lara la hoso Caesarea, Paul mo sahe Jerusalem vara i sile na retioloolo isana vao kalesia ea tiroma, moiso mo pa sahe Antioch matan Syria.

²³ Mo lo toho atu mata makomo rani, moiso mo mele malue mo sahe mo falihi na jara matan Galatia enia Phrygia vara i vai na tamlohi usuri hin la jara atu la mele rilangi.

Apollos Mo Tapulo Na Nona Vavahinau

²⁴ Hin pongi atu Jew matea hijana Apollos mara Alexandria mo pala Ephesus. Ale enia tamlohi sorasora fuhu matea mo levosahi mamahuni na Retitapu. ²⁵ Mo lavi na nona levosahi matan Moli moiso, ale maurina mo lo vujangi na nona avulahi na nona retireti peresi na vujangi tataholo fuhu na hinahina vararuhu hin Moli, pani nona levosahi mo tikeli na paptijo non John purongo. ²⁶ Mo tapulo na nona retireti na lolo ima lotu nona Jew mo sopo te matahu hinia. Pani Priscilla enia Aquila lara la rongoa, la tovi rofohia vano hasena, ale la vere tataholoi na malelen God isana.

²⁷ Hitahu, Apollos mara mo opoia vara i sivo Achaia, vorai kalesia peresi na vevorai kalesia la retituetuenia vara i vaia. Ale la uli na leta matea isana vorai kalesia Achaia vara la lavia. Mara mo pala isan la haratu la rasua atu, mo tuenira mo tavera usuri na

romruhu non Moli, ²⁸ matan mo vilijovjovi vevuhi na fomfomi nona Jew na naho tamlohi. Ale mo vujangira usuri na Retitapu vara Kristo atu enia Iesu.

19

Hatolu Hahau Mata Vavahinau Non Paul

¹ Ale hin rani atu Apollos mo lo toho Corinth, Paul mo hahau roto na uratan Asia mo pala Ephesus. Ale hin jara atu mo tapai na tamlohi usuri hai, ² ale mo vereea isara mara, “Kamim ka lavi na Tanume Tapu hin rani atu ka tapulo rasua, teni mo vono?”

La raramia lara, “Mo vono, kama sopo lo rongoa vara te Tanume Tapu mo lo toho.”

³ Ale Paul mo vereea mara, “Vara soheni, kamim ka paptijo na sava?”

Lara, “Paptijo atu John mo lo vaia.” ⁴ Paul mara, “Paptijo atu John mo lo vaia, enia paptijo mata vahari na hehe, ale mo lo vereea isana tamlohi vara la pa tau na nora rasua hin haratu mo lo mai hitahu hinia, enia mo lo vere Iesu sei.”

⁵ Lara la rongoa hinia atu, la paptijo na hijan Moli Iesu, ⁶ ale Paul mara mo tau na limana hinira, Tanume Tapu mo mai hinira ale la tapulo retireti na leo tinatinapua, ale la lo retimangovi. ⁷ Korong, enira tupu sangavulu romana mo rua.

Vavahinau Non Paul Ephesus

⁸ Ale Paul mo unu na ima lotu nona Jew, ale mo retivujavujangi mo sopo te matahu isana mata vitu mo tolu. Mo vere mamahunia vara mauri atu God mo aulu hinia mo soheni sava, ale mo vaira la hitevosahi na nona vujangi matan mauri atu. ⁹ Pani tatuara la lo turu rilangi na romira hasera, ale la rohu vara la rasu. La verelejeji rasua atu na naho tamlohi. Ale Paul mo malue mo lavi la tamlohi usuri atu peresia. Na rani hatehateahi la lo pulutahi na ima matavuhi matan Tyrannus, ale mo lo retivujavujangira ea. ¹⁰ Paul mo vaia soheni mata tauni mo rua matan haratu tamlohi tari sei la lo toho Asia, Jew peresi na tamlohi rofoha, la rongoa na reti non Moli.

La Natun Sceva Atu Mo Limaravrua

¹¹ God mo lo vai na matamata tavera tinatinapua na liman Paul. ¹² Ale matana, hina purongo vara te ruru kamoti teni ruru mata voko purongo la tia na huin Paul, ale vara la lavira la vano isana tamlohi rojoa, mo vai na nora rojoa la tihai, ale tanume sasati la malue hinira.

¹³ Ale pani Jew hai soheni, la lo titiu nafihina na tanume sasati na taon la lo vano hinira, pani la vaihitea vara la vaia na hijan Moli Iesu isan la haratu sei tanume sasati la lo toho hinira, ale la vereea sohen harihi lara, “Na lo retileu rilangi isam na

hijan Iesu sei Paul mo lo retivujavujangia vara o malue!” ¹⁴ Vorai mo limaravrua la natun Jew matea hijana Sceva, enia mo lo hase vereea vara enia pris aulu matea, enira natu la lo vai la hinia nika. ¹⁵ Pani lara la vaia, tanume sasati matea mo raramia mara, “Na levosahi Iesu, ale na levosahi Paul makomona, pani kamim sava tamlohi hin kamim?” ¹⁶ Pa tamlohi atu sei tanume sasati mo lo toho hinia mo kue matara mo hamajira vavano la levosahi, ale la hitea soheni la sopo eri mele vai te hinia, la turu la maro la rovo malamala, pani la loso na raera la vano.

¹⁷ Jew tari peresi na tamlohi rofoha tari Ephesus la rongoa sorasora akerihi, ale mo vaira la matahu enira mo isoiso. Ale hijan Moli Iesu mo lavi na hasohaso tavera matana. ¹⁸ Matuvana hin la haratu sei la rasu Iesu, la sinai la turu nahonaho, la taviti na sava hehe la vaira. ¹⁹ Vao tavera sei la lo mahumahu, la lavi na nora puku mata mahumahu la takonahira jara matea, ale la sulira na naho tamlohi tari. Lara la evi na volin la puku atu hatehateahi, evira mo isoiso mo tataholo na volvoli mata voko mata rani mo tari vaha ngavulu lima (50,000). ²⁰ Matan haratu, retisohai hin Moli mo ulua, ale suihana mo posi na mauri tamlohi matuvana.

Tamlohi Lotulotu Vono La Mai Jara Matea

²¹ Hitahun la hinia atu, Paul mo tau na romina vara i sivo Jerusalem, ale vara i hahau roto Macedonia enia Achai. Mo vereea mara, “Vara na sivo atu moiso, na opoia vara a vano a hite Rome.” ²² Mo rule na nona tamlohi tuetueni mo rua, Timothy enia Erastus la vano Macedonia, pani enia mo mele toho atu Asia mata makomo rani.

²³ Hin la rani atu patumasa tavera matea Ephesus mo pala mata rasua hin Iesu. ²⁴ Mo tapulo na tamlohi matea hijana Demetrius, enia tamlohi matea mo lo vai na tamasi varihina mata nora Temple sei la tovia Artemis na silver. Ale enia peresi la haratu la lo vaira, la lo vai na mania tavera matana. ²⁵ Mo tovi matavuhi la tamlohi atu peresi la haratu la lo vavahinau na hinia mariviti i sohera, ale mara, “La tapala, ka levosahia vara nofa mauri tavitavi mo lo mai na nofa vavahinau. ²⁶ Ale ka hitea ale ka rongoa vara Paul akerihi natu, mo lo vai na tamlohi vao tavera la lo rasua, ale nake la lo vahari hin nofa god Artemis, matan mo lo vereea isara mara god sei tamlohi la lo vaira na limara purongo, la sopo god varafuhu, ale mo sopo vujangia nika Ephesus purongo, pani na jara tari Asia sei mo lo vano ea. ²⁷ I pa sopo sati purongo na nofa vavahinau mata tavitav, pani matan tamlohi la pa fomfomi purongo

na temple non god haʻai aulu sei Artemis, enia peresi na tamlohi na jara tari Asia peresi na varama sei la lo lotua, la pa rongo i sati matan hijana mo jovi.”

²⁸ Lara la rongoa la lolokoru patura, ale la tapulo ngara lara, “Artemis nona mara Ephesus enia mo aulu jea!” ²⁹ Naon tavera atu mo maʻivi na uloulo, ale vao tavera atu la maro la vano na nora jara tavera mata matavuhi, la lo reve tahitahi Gaius enia Aristarchus, tamlohi mo rua mara Macedonia sei la lo usuri Paul na nona hahau. ³⁰ Pani Paul mara mo opoia vara i unu hin jara matavuhi tavera atu, tamlohi usuri la horoa. ³¹ Mo sopo enira purongo pani tapalan Paul hai sohenā, enira tamlohi aulu matan jara atu Asia, ale la sohai na retisohai matea isana la usia filangi vara i sopo unu hin jara matavuhi atu.

³² Hin matavuhi atu, tamlohi hai la lo ngara mata hināu matea, hai la ngara na hināu tinapua matan matavuhi atu mo vaore hajavua, ale matavana la sopo levosahia vara la lo matavuhi mata sava. ³³ Tatuara hin vao atu la romfomia vara enia matan Alexander, matan Jew hai la sohaia mo sahe na nahon matavuhi atu. Ale Alexander mo lo tahe na limana matan mo opoia vara i vere mamahunia na nahon vao atu, vara hināu nike Jew la sopo vaia. ³⁴ Pani vao atu lara la hitea vara enia Jew matea, la mele tapulo uloulo, ale la taurilati uloulo atu mata aoa mo rua lara, “Artemis nona mara Ephesus enia mo aulu jea!”

³⁵ Ale hitahun haratu, tamlohi tavera matan taon atu mara mo vaira la toho malum mo vereā mara, “Mara Ephesus, sava tamlohi natu mo sopo levosahia vara taon matan Ephesus mo lo kilau mamahuni na temple non Artemis aulu peresi na vatuna sei mo jovi na tuka?” ³⁶ Matan la hināu atu tea i sopo efi halu hinira, mo ruhu jea vara ha toho malum ha sopo rongorongono! ³⁷ Matan ka lavi la tamlohi nike la sinai nike, la sopo tamlohi mata vavanaho na temple teni la lo retisatihi noʻa god haʻai. ³⁸ Ale, vara Demetrius peresi la haratu la lo vai voko akerihi, la rongo mo sati matan tea, ima aria mo lo roi, ale tamlohi aria la lo toho purongo, mo ruhu vara la usuri na malele leu ea. ³⁹ Pani vara ka mele opoi te hināu aulu hinia, ha pa vai tataholioia na noʻa matavuhi tavera hitahu. ⁴⁰ Matan vara i vono, tamlohi tavera matan Rome, la pa sile na talai isan matavuhi tavera nike matan mo vaore hajavua, ale mo sopo te retireti ruhu tea i eri vereā matan matavuhi nike.” ⁴¹ Mara mo vere la hināu atu mo isoiso, mo rula la mule.

Paul Mo Mele Vano Macedonia Peresi Greece

¹ Matavuhi tavera atu mara mo isoiso, Paul mo tovi na tamlohi usuri la mai jara matea. Ale mo retituetuenira moiso mo vere enā vuhō isara ale mo malue mo vano Macedonia. ² Na nona hahau mo lo vano mo retituetueni na kalesia na taon hatehateahi na malelena vavano mo pala Greece. ³ Mo lo toho vitu mo tolu atu, ale Paul mo tatamahu vara i vele na boti matea i sivo Syria, pani matan mo rongoa vara Jew la hatihi moiso vara la pa vai te hināu isana, mo posi na romina ale mo mele sahe mo hahau roto Macedonia.

⁴ Tamlohi hai la lo usuri Paul sohen: Sopa-ter mara Berea natun Pyrrhus; Aristarchus enia Secundus mara Thessalonica, Gaius mara Derbe; Timothy, Tychicus enia Trophimus matan Asia. ⁵ La tamlohi nike la vano Troas tiroma vara la lo saovi kamam ea. ⁶ Rani mata Passover la vano moiso, kama vele na boti matea Philippi, ale kama maro na tasi mata rani mo lima moiso, ale kama pa hoso isara Troas. Kama lo toho atu mata rani mo limaravua.

Paul Mo Mele Vano Troas

⁷ Na Sunday, kamara kama pulutahi jara matea mata hanhani non Moli, Paul mo tapulo vujangi na tamlohi, pani matan mo tau na romina moiso vara i mele rani sahe i pa malue, mo vujangira vavano mo livuha vutepongi. ⁸ Kama lo sakele na jara matea mo aulu makomona na lolon ima atu kama lo toho hinia, ale lamu matavana la lo hani hin jara atu, ⁹ ale uluvou matea hijana Eutychus mo lo sakele na windoa matea, ale mo lo tapulo juruvi romaliho, matan Paul mo retireti mo peravu. Ale mara mo juruvi romaliho hin jara atu sei mo aulu sohenā ima mo tolu, mo jovi sivo na lepa mo mate. ¹⁰ Pani Paul mo sivo isana mo rautoho, ale mo tapea na limana ale mara, “Ha sopo matahu, mo lo mauri.” ¹¹ Moiso Paul mo mele vele sahe aulu hin jara atu, ale mara mo tope na pereti ale la hania moiso, mo mele tapulo retireti peresira vavano mo rani, moiso mo malue isara. ¹² Ale la lavi uluvou atu mo mule, ale la avulahi tavera matan mo lo ruhu purongo.

Patu Tamlohi Kalesia Matan Ephesus

¹³ Kama vano tiroma na boti ale kama malue kama sivo Assos, matan vara kama pa tapai Paul ea, matan enia mo vereā mara i pa hahau purongo i sivo atu, ale kama pa lingia atu. ¹⁴ Kamara kama tapai Paul Assos, mo vele na boti kama sivo Mitylene. ¹⁵ Kama malue atu ale mo mele rani sahe kama tikeli Chios, mo mele rani sahe kama pala Samos, ale mo mele rani sahe, kama tikeli Miletus.

¹⁶Matan Paul mo opoia vara i jeu Ephesus matan vara i sopo mele toho matan te rani atu Asia matan mo lo vaivila vara i sivo Jerusalem tiroma moiso i pa rani mata Pentecost. ¹⁷Kama hosō Miletus ale Paul mo sohāi na retisohai matea isana patu tamlohi mata vao kalesia Ephesus vara la sinai la tapāia atu.

¹⁸Lara la pala mo vere isara mara, “Kamim ka levosahi na mauriku hin rani atu na lo toho peresi kamim mo tapulo hin rani atu na tau na paloku Asia. ¹⁹Na volitusi non Moli na posposi fomatano peresi na tangi ale peresi na rani filangi sei la mai isaku na sava Jew la hatihia matakū. ²⁰Pani ka levosahi mamahunia vara hin la rani atu na sopo turu juha na noku retivujavujangi isamim matan te hinau sei vara i eri tueni kamim hinia. Ale na sopo turu juha hin te hinau na noku vujangi isamim na naho vao tamlohi teni na lolo ima hatehateahi, ²¹ale na lo retivuhesi isana Jew peresi na tamlohi fofoha mata vahāfi na hehe la mai isan God na rasua hin noŋa Moli Iesu.

²²Ale nakerihi, Tanume Tapu mo lo sohaiau vara a sivo Jerusalem, ale na sopo levosahi na sava i pa masese isaku atu, ²³pani Tanume Tapu mo pete retiŋoŋoahāiau hinia moiso na taon tari sei na lo vano ea vara ima filangi peresi na noku tipahi la lo saoviau ea. ²⁴Pani mauriku i pa sopo fuhu matan te hinau isaku vara a sopo vai vevuhi na sava Moli Iesu mo taua na limaku, enia vavahinau sei mata vereuli na Retiruhu mata fomfuhu non God.

²⁵Ale nakerihi na lo vere tataholoia kamim hinia vara i pa sopo te vonamim hatea sei na lo hahau ŋalihi na lo retivujavujangi mauri atu God mo aulu hinia isana, i pa mele hiteau. ²⁶Matan haratu, na lo vereea vara mo sopo te noku hinau hinia na ŋaemim. ²⁷Matan na sopo turu juha vara a sopo vereuli kamim na fomfomi tavera tari non God.

²⁸Ha hase kilau mamahuni kamim peresi na vao kalesia sei Tanume Tapu mo vai kamim ka aulu hinira, vara ha tiroma na vao kalesia non God sei mo volira na ŋaena. ²⁹Na levosahia, vara a malue isamim, tamlohi sasati sohena viriu jala la pa mai isamim, la pa komo na vao kalesia, ale la sopo eri fomfomira. ³⁰Mo sopo haratu purongo pani na lolomim tataholo te tamlohi la pa turu la vujangileji na retivararuhu matan vara la pa lavi te nora tamlohi usuri isamim. ³¹Matan haratu, ha pa sopo peka, ha lo fomfomia vara, mata tauni mo tolu, tarea na lo retiŋoŋoahai kamim hatehateahi peresi na wai matakū.

³²Ale nakerihi, na lo tau kamim na li-man God matan vara ha pa sile na retiso-

hai mata nona fomfuhu. Retisohai nike i eri tueni kamim vara ha filangi, ale i sile kamim na koruna peresi la haratu sei God mo tapuhira.

³³Ka levosahi mamahunia vara na sopo usi tea hin te silver, gold teni ruru. ³⁴Kamim ka levosahi mamahunia vara enau peresi la haratu sei la toho peresiau, kama lo hanhani na masumasuku purongo. ³⁵Enira mo isoiso la tapulo tangi aulu, la raho Paul ale la pungosia, ³⁸fomira mo pa sati jea matan mo vereea mara la pa sopo eri mele hitea, moiso la usuria la sivo vara la taua na boti.

21

Paul Mo Sivo Jerusalem

¹Kamara kama tināhira, kama malue vano na tasi, ale kama sivo tataholo na ureuren Cos, ale mo mele rani sahe kama pala Rhodes, ale kama malue atu kama hosō Patara. ²Hin jara atu kama tapai na boti matea, mo tatamahu vara i sivo Phoenicia, kama vele hinia ale kama malue vano na tasi. ³Kama kilau vano na ureuren Cyprus mo lo sale vara i tihai na maraumam, ale kama lo sivo Syria, ale kama hosō Tyre matan boti atu i pa tināfihi na nona lavlavi atu. ⁴Ale kama ale na tamlohi usuri hin jara atu ale kama hitera, kama lo toho peresira mata rani mo limaravrua. La lo ŋaena isan Paul lara Tanume Tapu mo vereea isara vara i sopo tau na palona Jerusalem. ⁵Mo turu tetelehi na rani vara kama pa malue na boti, enira mo isoiso peresi na naroura, na natura, la usuri kamam kama malue hin taon tavera atu, ale kamara kama papaohi na oneone kama usiusi moiso, ⁶kama vere enŋa vuho isara hatehateahi moiso kama vele hin pa boti, ale enira la mele mule.

⁷Kama mele tapulo na nomam hahau atu Tyre kama sivo kama hosō Ptolemais, ale kamara kama tulahi na vorai kalesia peresi na vevorai kalesia atu moiso, kama lo toho peresira mata rani matea. ⁸Mo mele rani sahe, kama malue kama sivo kama hosō Caesarea, ale kama unu na iman Philip. Enia evangelist matea, enia deacon matea hin la haratu mo limaravrua, ale kama lo toho peresia. ⁹Venatuna mo vati la sopo lo lahi, ale la lo retimangovi.

¹⁰Kama lo toho atu mata rani mo visa moiso, pfovet matea hijana Agabus mo tai Judea mo sinai. ¹¹Mo mai isamam, mo lai

na otin Paul, mo liho na limana peresi na palona hinia ale mara, “Tanume Tapu mo vereea mara, ‘Hin malele akerihi natu, Jew matan Jerusalem la pa liho tamlohi atu sei otina nakerihi, ale la pa taua na lima tamlohi ōŋoŋo.’”¹² Kamam peresi la haratu la lo toho atu, kama rongō hināu atu sohena, kama vereea ōŋangi isan Paul vara i sopo sahe Jerusalem.

¹³ Moiso Paul mo vereea mara, “Ka lo vai na sava nahai? Matan nomim tangi mo lo vaiau na lo rongō mo sati! Matan enāu na tatamāhu moiso vara la pa lihoāu, ale vara a mate Jerusalem mata hijan Moli Iesu.”

¹⁴ Ale matan kama sopo efi horoa, kama sopo mele vere te hināu pani kamara, “Ra pa usuri na masolon Moli purongo.”

Paul Mo Kakau Jerusalem

¹⁵ Hitahun la rani atu, kama tatamāhu, ale kama sahe Jerusalem. ¹⁶ Tamlohi usuri mara Caesarea hai la usuri kamam, ale la lavi kamam la tau kamam na iman Mnason mara Cyprus, enia mo mai tamlohi usuri tuai moiso. ¹⁷ Hin rani atu kama pala Jerusalem, vorai peresi na vevorai kalesia la lavi kamam na avulahi tavera.

¹⁸ Mo mele rani sahe, Paul mo usuri kamam kama vano vara kama hite James peresi na vajiāha aulu na vao kalesia atu sei la lo toho atu. ¹⁹ Ale Paul mara mo sile na retioloolo isara moiso, mo tapulo vereuli mamahuni na hināu tari God mo vaia isana tamlohi ōŋoŋo na nona vavahināu. ²⁰ Lara la rongoa la hasohaso God moiso, la vereea isana lara, “Ko levosahia vorai vara Jew mo tari vaha visa moiso la tau na nora rasu hin Iesu pani la pa lo turu ōŋangi na leu non Moses. ²¹ Ale la rongoa moiso vara ko lo vereea isana Jew tari sei la lo toho na jara tamlohi ōŋoŋo vara la sopo mele usuri na leu non Moses, ale ko vereea isara vara la sopo taiŋalihi na natura teni vara la sopo usuri na posifa matan tuai. ²² Vara mo sohena, ŋa pa efi vai na sava? La pa levosahia vara ko pala nike moiso.

²³ Ale matana, o pa vai na sava kama pa vereea isam nakerihi: nomam tamlohi tupu vati nahai, la vai na retitāuhi isan God moiso matan vara la pa hiri pilopilo, ²⁴ o lavira o vano peresira, o hase onehiho usuri na leu non Moses peresira, ale o voli na nora silesilea matan vara enira la efi hiri pilopilo. Moiso tamlohi tari la pa levosahia natu vara sava la lo rongoa matam enira hina purongo matan engko ko lo hahau usuri na leu.

²⁵ Pani isana tamlohi ōŋoŋo sei la rasua, kama pete sohai na leta moiso peresi na nomam ōmŋomi vara la sopo hani na mit sei la silea isana tamasi moiso, ale la sopo

inu na ŋae, ale vara la sopo hani te maji sei la punia, ale vara la toho asau na mauri maji.”

La Taurilati Paul

²⁶ Moiso mo mele rani sahe, Paul mo lavi la tamlohi atu, ale enia mo hase vaia mo vokevoke peresira, moiso mo vano na Temple mo vereuli na isoiso rani mata nora retitāuhi mata vokevoke isana ōŋis vara la pa sile na malamalai matara hatehateahi.

²⁷ La rani mo limaravrua atu mariviti vara la isoiso, Jew hai matan Asia la hite Paul na lolo rope Temple. La halu na vao matea matan vara la pa taurilati Paul. ²⁸ La lo uloulo lara, “Tavtāvuin Israel! Ha tueni kamam! Tamlohi nike natu mo lo vujangi na tamlohi tari na jara tari vara la ŋoŋo na noŋa tamlohi, noŋa leu ale jara tapu nike! Aulu hin haratu, mo lavi na tamlohi ōŋoŋo hai la unu na lolo rope Temple, ale mo vai jara tapu nike mo lumihā!” ²⁹ Matan hin rani atu purongo la hite Trophimus, mara Ephesus matea, mo lo toho peresi Paul Jerusalem, ale la lo ōmŋomia vara mo lavia mo unu na lolo rope Temple.

³⁰ Ale tamlohi tari hin taon tavera atu la sopo mele sakele malum, ale tamlohi la maro jara matea, la tauri Paul ale la reve tahitahia mo malue na lolo Temple, ale vahatea purongo mataruana la pelati. ³¹ Ale la pa lo vaihitea vara la vilimateia. Pani reti-sohai matea mo tikeli na commander nona tamlohi vuro non Rome vara tamlohi tari la lo vai na vaore rongorongō vono Jerusalem. ³² Vahatea purongo commander atu mo lavi na tamlohi vuro peresi na captain la maro la sivo hin vao atu. Ale vao atu lara la hite commander atu mo mai peresi la tamlohi vuro atu, la sopo mele tamaji Paul.

³³ Moiso pa commander atu mo sinai mo taurilatia, ale mo retileu vara la lihoāu na jen mo rua, moiso mo usia vara enia hare ale vara mo vai na sava mo sati. ³⁴ Pani hai hin vao atu la lo ulo na hināu matea, hai la lo ulo na hināu tināpuā, ale pa commander atu mara mo levosahia vara i pa sopo efi lavuti na retivarāfuhu matan vaore atu, mo retileu vara la lavi Paul i unu na patu ima mata vuro Jerusalem. ³⁵ Ale lara la mai na jara sevsevuti hin patu ima mata vuro atu, tamlohi vuro la tauri Paul aulu na pilira matan vao atu la lo vaihitea mo ōŋangi jea vara la vilimateia, ³⁶ matan vao tamlohi atu la lo usuria la lo ngara lara, “Ha vilimateia!”

Paul Mo Retireti Isan Vao Tavera Atu

³⁷ Ale lara la pa lo lavi Paul mo lo unu hin patu ima mata vuro atu, Paul mo vereea isan commander atu mara, “A efi vere na hināu matea isam?”

Commander atu mo hutua, mo faramia mara, “Avei, engko ko levosahi na leo mara Greek? ³⁸ Engko mo sopo pa mara Egypt

atu sei mo lo tiroma na vao mata valum naturihi, ale sei mo tiroma na tamlohi mata vili na tamlohi mo tari vaha vati (4000) la vano na jara tano koru?"

³⁹ Paul mo faramia mara, "Mo vono! Enau Jew matea mara Tarsus hin Cilicia, enau matan taon aulu atu! O efi tinafihia vara a retireti isan la tamlohi nike?"

⁴⁰ Commander atu mara mo tinafihia, Paul mo turu hin jara sevsevuti atu, ale mo tahe na limana isan vao atu, ale lara la toho malum, mo retireti isara na leon tadvauin Israel.

22

Paul Mo Tapulo Retireti

¹ Ale Paul mara, "La vorai peresi na vajiaha, ha tapurongo na sava a pa vereea mata noku vavahinau."

² Lara la rongoa vara mo lo retireti isara na leon tadvauin Israel, la mele toho malum jea, ale mo vereea mara, ³ "Enau Jew matea, na vora Tarsus hin Cilicia, pani na ulua hin taon tavera nike, na lavi na noku lelevosahi isan Gamaliel usuri na posposi tataholo mata leu nona nofa pua, ale na lo rilangi hin God sohen kamim nahapani. ⁴ Na lo tipahi na tamlohi hin rasua sei, hai la mate na noku vavahinau, na liho na lamane peresi na hafai na taura na ima rilangi, ⁵ sohen pris aulu peresi na tamlohi tari mata council la efi vereea matakua. Na lavi na leta isara matan vara a lavia i vano isana voraiha Jew, Damascus. Ale na pa lo vano na maleleku matan vara a taurilatira ale a tiroma hinira la mai Jerusalem vara la lavi na talai nike, ⁶ ale na pa lo vano mariviti Damascus, korong alo mo posi moiso, ale vahatea purongo, memera tavera matea mo sasari falihiau. ⁷ Ale na jovi sivo na lepa na rongo na leo matea mo vereea isaku mara, 'Saul, Saul, mata sava ko lo tipahiau?"

⁸ Ale na faramia nara, "Tamlohi tavera, engko hare?"

Ale mo vereea isaku mara, 'Enau Iesu pa mara Nazareth atu sei ko lo tipahia!'

⁹ La haratu la lo toho peresiau la hite memera atu, pani la sopo rongovosahi na leon haratu mo lo retireti isaku.

¹⁰ Ale na usia nara, 'A pa vai na sava Moli?"

Ale Moli mo vereea isaku mara, 'O turu o vano Damascus, hin jara atu la pa vereeha na hinau tari sei na vifonihio vara o pa vaira.'

¹¹ Ale matan na sopo mele efi kilau matan memera tavera atu, la haratu la lo toho peresiau la tiroma hinia na vano Damascus.

¹² Tamlohi matea hijana Ananias, mo lo lotu God tarea usuri na leu, ale Jew Damascus la vereea vara enia tamlohi fuhu matea, ¹³ mo mai isaku, mo turu na pahisaku ale mo vereea isaku mara, 'Vorai Saul, o mele

kilau!' Ale vahatea purongo na kilau sahe na hitea.

¹⁴ Moiso mo vereea mara, 'God nona nofa pua mo vifonihio moiso, vara o pa levosahi na masalona vara o pa hite haratu mo Tataholo Jea, ale vara o pa efi rongo na retileu matea na jingona, ¹⁵ matan engko, o pa nona tuetueni isana tamlohi tari na sava ko hitea ale sava ko rongoa. ¹⁶ Ale nakerihi, ko lo saovi na sava? O turu, o lavi na paptijo, ale God i pa hoje narhihi na nom hehe, o tau na nom rasua na hijan Moli.'

¹⁷ Na rani na mele mai Jerusalem, ale na lo usiuni na lolo Temple, na hite na hinau matea sohena mavuho matea, ¹⁸ ale na hite Moli mo lo vereea isaku mara, 'O vila, o malue Jerusalem vila matan la pa sopo efi lavi na nom vereulia matakua.'

¹⁹ Na vereea isana nara, 'Pani Moli, enira hasera la efi vereea vara enau natu, na lo tau la haratu la rasuho na ima rilangi, ale na lo hamajira na ima lotu nona Jew tari. ²⁰ Ale na rani nom tuetueni Stephen mo mate, na lo turu atu na majinga hinia, ale na lo kilau mamahuni na ruru non la haratu la lo vilia.'

²¹ Ale mo vereea isaku mara, 'O malue Jerusalem, matan a pa ruleho o vano asau rove isana tamlohi rofoha!'

La Ari Paul Na Lolo Patu Ima Mata Vuro

²² Vao atu la lo tapurongo hinia mo tikeli reti sei Paul mo vereea mara, 'La haratu la tamlohi rofoha.' Ale la ngaruhia lara, "Ha vilimateia! Mo sopo tataholo vara i lo maurii!" ²³ La ngara ngara, ale la lo lanafihio na nora ruru peravu, ale la lo pulahi na tangotango aulu na masapa, ²⁴ ale pa commander atu mo retileu vara la lavia i unu hin patu ima mata vuro atu. Mo vere na nona tamlohi vara la pa rupia na asi maja mata lavi na farami nona retiusia, matan mo opoia vara i levosahia vara vao atu mo lo ngarahia mata sava.

Paul Enia Mara Rome Matea

²⁵ Lara la firahi Paul na jara mata tamaji na tamlohi moiso, Paul mo vereea isana captain mata tamlohi vuro matea mo lo turu na pahisana mara, "Mo tataholo vara ha rupi na mara Rome matea na asi maja matea, pani ka sopo lo aria?"

²⁶ Pa captain atu mara mo rongoa sohena, mo vano isan nona commander, ale mo vereea isana mara, "Ko levosahi na sava ko lo tatamahu vara o vaia? Matan tamlohi nike enia mara Rome matea!"

²⁷ Pa commander atu mo mai mo usia isan Paul mara, "O to vereea isaku, varafuhu vara engko mara Rome matea?"

Ale Paul mo faramia mara, "He'e."

²⁸ Ale commander atu mo faramia mara, "Enau na jalahi na mania tavera matan vara a efi mai mara Rome matea."

Paul mara, “Pani enau, na vora mara Rome matea.”

²⁹ Ale la haratu sei la lo tatamahu vara la pa rupia na asi maja, la turu juha hinia vahatea. Pa patu tamlohi vuro aulu atu mo matahu matan mo levosahia vara Paul enia mara Rome tataholo matea, ale enia natu mo vereia vara la lihoa.

³⁰ Mo mele rani sahe, ale matan pa patu tamlohi vuro aulu atu mo opoia vara i levosahia i ruhu vara Jew la lo tuvai Paul mata sava, mo uli nafihia ale mo retileu vara moli nona p̄ris peresi na tamlohi tari mata council matan Jerusalem la mai jara matea. Ale mo lavi Paul ale mo vaia mo turu na nahora.

23

Paul Mo Turu Na Naho Council Jerusalem

¹ Ale Paul mo kilau tataholo isana tamlohi hin council atu, ale mara, “La vorai, na mauriku na nahon God mo tikeli nake, fomiku mo sopo kaka hin te hinau.”

² Ananias p̄ris aulu mara mo rongoa, mo vereia mara la haratu la lo turu na pahisana la vojahia na jingona. ³ Ale Paul mo vereia isana mara, “God i pa vojahiho, ko tapnetano! Ko sakele atu vara o ariau usuri na leu, moiso ko lo tope na leu na nom retileu vara la vojahiau.”

⁴ La haratu la lo turu mariviti la vereia lara, “Ko rom vara mo tataholo vara o reti isan p̄ris aulu non God sohen haratu?”

⁵ Ale Paul mara, “La vorai, na sopo lo levosahia vara enia p̄ris aulu. Matan na levosahia vara Retiulia mo vereia vara, ‘Ha sopo veresati na nomim tamlohi aulu.’” *Exo 22.28*

⁶ Moiso, Paul mo hitea vara sopen vao atu enia Sadducee, ale sopera enira Pharisee, ale mo ulo aulu isana tamlohin council atu mara, “La vorai, enau Pharisee matea, enau natu Pharisee. Na lo turu na aria matan na lo fomtoho na sauteterahi!”

⁷ Mara mo vereia sohena, vasvas matea mo malue isana Pharisee peresi na Sadducee ale vao atu la patumasa. ⁸ Matan Sadducee la vereia vara mo sopo te sauteterahi, teni te angelo teni te tanume, pani Pharisee la rasu la hinai sei. ⁹ Ale vao atu la vaore tavera, tamlohi vujangi mata leu na vao Pharisee la turu ale la vereia mo rilangi lara, “Kama sopo hite te hinai i sati isan tamlohi nike. I pa sohena sava vara te tanume ruhu teni te angelo mo lo retireti isana?” ¹⁰ Ale commander atu mara mo hitea, mo matahu vara la pa farihari Paul, ale mo retileu vara nona tamlohi vuro la sivo la lavi nafihia na nora suiha, ale la mele lavia i vano i unu na patu ima mata vuro.

¹¹ Hin vutepongi atu Moli mo turu mariviti isan Paul ale mo vereia mara, “O sopo matahu! Matan sohena nakerihi ko lo vereuliau nike Jerusalem, o pa vereuliau sohena Rome.”

La Hatihia Vara La Pa Vilimatei Paul

¹² Mo mele rani sahe, vao Jew matea la mai jara matea, la lihora na retitauhi matea vara la pa sopo tikeli te hanhani teni te wai vavano, la vilimatei Paul. ¹³ Vao atu sei la vai retitauhi atu mo jeu mo ngavulu vati (40).

¹⁴ La vano isana p̄ris aulu peresi na vajihara, ale lara, “Kama liho kamam na retitauhi matea vara kama pa sopo mele tikeli te hanhani teni te wai vavano kama vilimatei Paul. ¹⁵ Ale nakerihi kamim peresi na tamlohi council ha vahafulu matana isan patu tamlohi vuro aulu atu, vara i lavia i sinai isamim. Ale ha vaia sohena vara ha pa mele kilau usuri mamahuni na nona aria. Ale kama pa tatamahu vara kama vilia na malele, ale i pa sopo efi kakau nike.”

¹⁶ Pani natun vetasin Paul mara mo rongoa vara la pa luhu hinia, mo mai mo unu hin patu ima mata vuro atu mo vereulia isan Paul ¹⁷ Ale Paul mo tovi na captain matea hin la captian atu mara, “O lavi uluvou nike i sahe isan nom commander, ale uluvou nike i pa vere na hinai matea isana.”

¹⁸ Ale captain atu, mo lavia mo sahe isan nona commander ale mara, “Paul mo toviau mo usiau vara a lavi uluvou nike i mai isam, matan enia mo lavi na retisohai matea vara i pa silea isam.”

¹⁹ Pa commander atu mo tauri na limana, ale mo lavia la sivo enira hasera, ale mo usia mara, “Sava natu ko opoia vara o vereia isaku?”

²⁰ Mo faramia mara, “Jew la majinga moiso vara pavuho, la pa usiho vara o lavi Paul i sivo na council, vara la pa mele kilau usuri mamahuni na nona aria. ²¹ Pani o sopo tinafihia vara la haluhaluho matana! Matan tamlohi mo jeu mo ngavulu vati (40) la pa luhu la lo saovia. La lihora na retitauhi matea moiso vara la pa sopo tikeli te hanhani teni te wai vavano la vilimateia. Ale nakerihi la tatamahu moiso, la lo saovi na nom majinga purongo natu.”

²² Moiso, commander atu mo rule uluvou atu mo mele malue, ale mo vereia isana mara, “O sopo mele vere tea hin hinai akერიhi ko vereia isaku.”

La Lavi Paul Mo Sivo Caesarea

²³ Moiso, pa commander atu mo tovi na nona captain mo rua, ale mo vereia isara mara, “Ha tatamahuni te tamlohi vuro i ngavulu sangavulu rua (200) vara la sivo Caesarea nohorihhi na matan alo

i limaravati na vutepongi, peresi te hos i ngavulu limaravua (70) peresi na tamlohira, ale peresi te tamlohi vuro mata sari i ngavulu sangavulu rua (200).²⁴ Ha tatamahuni te hos non Paul vara i pa vele hinia, ale ha lavi mamahunia i sivo isan Felix tamlohi aulu matan Palestine.”

²⁵ Moiso mo uli leta nike isan Felix mara,

²⁶ “Leta nike enau Claudius Lysias na lo uli na noku retioloolo mo vano isam Felix tamlohi aulu ruhuruhu. ²⁷ Tamlohi akerihi, Jew hai la taurilatia ale la tatamahu vara la pa vilia ale na sinai peresi na noku tamlohi vuro ale kama nafihiia, ale matan na levosahia vara enia mara Rome matea na lo matahia. ²⁸ Na lavia mo sivo na nora council matan na opoia vara a levosahi mamahunia vara la lo aria mata sava. ²⁹ Na hiteulia vara la lo tuvaia matan te hinau usuri na leu mata nora rasua, pani mo sopo matan te hinau vara i pa toho na ima rilangi teni i mate matana. ³⁰ Pani nara na levosahia vara la lo vai na malele matea vara la pa vilimateia, na fulea mo mai nike isam vahatea. Ale na vereea isan la haratu la lo aria vara la pa lavi na nora retiararia sei la lo aria hinia la vereea isam.”

³¹ Ale la tamlohi vuro atu la vaia usuri na nona retileu. La lavi Paul mo sivo Antipatris hin vutepongi atu. ³² Mo mele rani sahe, la tinafihiia vara tamlohi vuro na hos purongo la sivo peresia. Ale enira la mele hilu la sahe na nora patu ima mata vuro Jerusalem. ³³ La tamlohi vuro na hos atu lara la pala Caesarea, la lavi Paul peresi pa leta atu la silea isan tamlohi aulu atu Felix. ³⁴ Tamlohi aulu atu mara mo evi leta atu moiso, mo usi Paul vara mo tai na sava jara, ale mara mo levosahia vara mo tai Cilicia, ³⁵ mo vereea mara, “A pa sileho na masapa vara o retireti hin rani atu vara nom meresahi la pala nike.” Moiso, mo retileu vara la pa pelati horo Paul na jara matea na lolo ima tavera, iman Herod Agrippa.

24

Paul Mo Turu Na Nahon Felix

¹ Ale rani mo lima la vano moiso, Ananias pa pris aulu atu mo sinai peresi na vajiaha hai peresi na tamlohi retireti na leu matea hijana Tertullus, ale matan vara la sile na nora retiararia matan Paul isan tamlohi aulu atu Felix. ² Ale lara la tovi Paul mo sinai moiso, Tertullus mo tapulo aria mara:

“Tamlohi aulu Felix, kama lo toho na tamata mo peravu jea na ruhuruhum, ale hina paro fuhu hai la malue na jaramam usuri na nom kilakilau. ³ Kama lo vere la hinau nike na jara tari, ale na malele tari na nomam vere meje. ⁴ Pani matan vara a sopo mele taurilatihu i peravu, na lo usia

isam vara o tapurongo isamam makomona purongo usuri na nom romfuhu. ⁵ Matan kama tapaia vara tamlohi nike enia tamlohi lejileji matea, enia tamlohi matea mo lo vai na tamlohi la lo matavuhi mata vai na hina sati na jara tari Jew la lo toho ea na varama, ale enia patu tamlohi nona vao haluhalu matea la lo tovia lara vao mara Nazareth. ⁶ Mo sopo haratu purongo, pani kama tauria hin rani atu mo lo vaihitea vara i vai na Temple i lumiha. ⁷⁻⁸ O pa efi tapai na retivara fuhu mata nomam aria isana hasena vara o usia.”

Paul Mo Raramira

⁹ Ale, la Jew atu sei la lo tapurongo usuria, la tapulo verelejeleji, ale lara hinau tari sei Tertullus mo lo verera la varafuhu.

¹⁰ Pa tamlohi aulu mara mo tahe na limana vara Paul i efi retireti, Paul mo raramia mara: “Matan na levosahia vara engko ko lo toho sohena tamlohi aria matea matan jara nike tuai moiso mo mai, mo vaiau na sopo matahu vara a vere na noku retireti. ¹¹ Ale vara ko opoia, o pa efi levosahia vara rani mo sopo lo jeu sangavulu romana mo rua na sahe Jerusalem mata lotu. ¹² La sopo tapaiau vara a lo vasvas peresi tea teni vara a lo tovi matavuhi na tamlohi matan vara la vai te hina sasati na lolo rope Temple, teni hin te ima lotu hatea teni na malele matan taon tavera atu Jerusalem. ¹³ Ale la tamlohi nike, la sopo efi pisuhiau hin te hinau hatea hin la hinau nike la lo ariau vara na vaira.

¹⁴ Pani na taviti vara na lo lotu God non nomam pua usuri na malele rasua hara sei la lo vereea vara enia rasua haluhalu matea. Ale na lo rasu na hinau tari sei Moses peresi na p rovet la ulia na Leu. ¹⁵ Enau na lo tau na noku romtoho isan God sohen la tamlohi nike vara i pa sauteterahi na tamlohi tari, la haratu la tataholo peresi la haratu la sopo tataholo. ¹⁶ Matan hinau atu natu, mo lo vaiau na lo vaihitea tarea vara romiku i pa sopo kaka hin te hinau isan God teni isana tamlohi.

¹⁷ Tauni mo visa la vano moiso na sopo mele toho Jerusalem, ale na mele sinai ea peresi na otori nona noku tamlohi vara a silea isan la haratu la tilavono, ale vara a sile na noku silesilea mata malamalai, ¹⁸ sei na lo vaira hin rani atu la tapaiau na lolo rope Temple. Na pete vokevoke moiso usuri na nomam posposi, ale mo sopo te vao teni tea i lo vai na valum. ¹⁹ Pani Jew hai matan Asia, i pa fuhu jea vara la lo toho akerihi na nahom nakerihi matan vara la tuvaiau hin te retiararia matan te hinau sati vara la efi vereea matakau. ²⁰ O to usi la tamlohi nike vara sava hina sati natu, la hitea hiniau hin rani atu na lo turu na nahon council

atu, ²¹ pani hināu matea purongo na ulō na vereā na nahora nara, na lo turu nīke na ariā nahapani matan na rasu na sauteterahi nona mateia.”

²² Moiso Felix, matan enia mo levosahi mamahuni na malele nora rasua mo fūhu, mo vereā mara nora masapa mata sile na nora retireti mo isoiso, ale mo vereā isara mara, “Sava rani vara patu tamlohi vuro aulu atu Lysias i sinai nīke, a pa sile na noku fōmfōmi mata nomim ariā.”

²³ Ale mo retileu vara captain atu, i lo kilau mamahuni Paul na ima tavera atu purongo. Ale vara i sopo horoa na masalona, ale vara i sopo horo na tapalan Paul vara la opoia vara la mai la tuenia.

Felix Mo Tapurongo Isan Paul

²⁴ Rani mo visa la vano moiso, Felix enia narouna Drusilla sei enia Jew matea, la pala. Ale mo vahafulē matan Paul vara la tapurongo hinia vara i verera hin rasua atu hin Iesu Křisto. ²⁵ Ale Felix mara mo rongo Paul mo lo sorahi na mauri tataholo, ale mata hase taurilatīho peresi na rani ari tavera sei mo lo mai, enia mo matahu tavera, ale mara, “O vano tako, ale vara te masapaku a pa mele vahafulē matam.”

²⁶ Mo lo tapurongo hinia, pani mo lo rōmtau vara Paul i pa silea hin te mania na hari tamlohi, ale matan haratu, mo vahafulē matana vaha visa vara i mai i sorasora peresia.

²⁷ Tauni mo rua la vano sohen haratu moiso, natu Porcius Festus mo pete lavi na jaran Felix, pani matan Felix mo opoia vara i vai na Jew la avulahi, mo tau Paul na ima rilangi.

25

Paul Mo Turu Na Nahon Festus

¹ Festus mo pala Caesarea ale rani mo tolu tinapua la vano moiso, ale mo sahe Jerusalem. ² Ale moli nona pñis peresi na tamlohi aulu nona Jew la lavi na nora retiarīa hin Paul la vano isana. ³ La usia isana vara i vai na sava la opoia matan Paul, la usi Festus mo rilangi vara i vahafulē vara i mai Jerusalem matan la hatīhia moiso vara la pa luhu na malele vara la vilimateia. ⁴ Moiso Festus mo faramira mara la lo taurilatīa Caesarea, ale enia i pa mele sivo atu i sopo tuai. ⁵ Mo vereā mara, “Ale, mo rūhu vara nomim tamlohi tavera la sivo atu peresia, ale vara tamlohi akerīhi mo vai te hināu mo sati, la pa efi sile na nora retiarīa.”

⁶ Ale Festus mo mele toho Jerusalem mariviti rani i sangavulu, moiso mo pa sivo Caesarea. Ale mo mele rani sahe mo sakele na jara sakele mata ariā, ale mo retileu vara la lavi Paul i mai isana. ⁷ Paul mara mo pala,

la Jew atu sei la lo tai Jerusalem la lo sinai, la turu falihia la lo tuvaia na hināu sasati hai sei la sopo efi vujangira vara la varafūhu.

⁸ Paul mo sile na nona retireti mata horora mara, “Na sopo vai te hināu i sati mata i vaiāu a meresahi na leu nona Jew, teni na Temple, teni isana supe matan Rome.”

⁹ Pani Festus mo opoia vara i vai na Jew la avulahi, mo usia mara, “O pa avulahi vara o sahe Jerusalem vara o turu na ariā na nahoku matan la hināu nīke?”

¹⁰ Paul mo faramia mara, “Nakerīhi na lo turu na jara tataholo moiso mata ariā na naho jara sakele mata ari non supe matan Rome. Na sopo vai te hināu i sati isana Jew sohen engko ko levosahi mamahunia.

¹¹ Vara na vai te hināu mo tataholo vara a mate matana, na sopo fōhu na mate. Pani vara na lo vokevoke purongo, engko teni te hatea i sopo efi tauau na liman la tamlohi nīke sei la opoia vara la vilimateia. Na opoia vara a turu na nahon supe matan Rome!”

¹² Festus mo sorasora peresi na nona tamlohi tuetueni sei vara la sile te fōmfōmi hatea isana, moiso mo faramia mara, “Ko opoia vara o turu na nahon supe matan Rome, ale isan supe matan Rome o pa vano.”

Festus Mo Sorahi Paul Peresi Harua Supe Agrippa

¹³ Rani mo visa la vano moiso, harua supe Agrippa mo pala Caesarea peresi vetasina Bernice, matan vara la sile na nora oloolo isan Festus. ¹⁴ Hin la rani atu la lo toho peresia, Festus mo vereuli na sorasora matan Paul isan supe atu matan vara i sile te retireti matana mara:

“Felix mo tau na tamlohi matea mo lo toho na ima rilangi. ¹⁵ Na rani na lo toho Jerusalem, moli nona pñis peresi na vajīaha nona Jew la vereāu hinia, la usia vara a sile na talai isana. ¹⁶ Na vereā isara nara, mo sopo usuri na posposi nona mara Rome vara a sile te tamlohi na talai vara mo sopo lo lavi te masapa vara i turu nahonaho peresia, ale i farami na retireti non la haratu la lo tuvaia.

¹⁷ Ale hitahuna, la mele usuriau la sinai nīke, na sopo mele toho i peravu, pani mara mo mele rani sahe na sakele vara a ariā. Ale na tovia vara i mai na nahoku. ¹⁸ Pani la haratu la lo tuvaia lara la turu, la sopo tuvai Paul hin te hināu sasati sohen na lo fōmfōmia. ¹⁹ Mo vono, la sopo turu jara matea na nora fōmfōmi matan te hināu mata nora rasua, ale mata tamlohi matea hijana Iesu sei mo mate, hara sei Paul mo lo vereā vara mo mele mauri. ²⁰ Matan na sopo levosahia vara a pa vileiuli la hināu nīke sohenā sava, na usia isana vara mo

avulahi vara i sahe Jerusalem ale i pa turu na aria ea. ²¹ Pani Paul mo opoia vara i lo toho tako na ima filangi, i lo saovi na fomfomi non nofa tamlohi tavera supe matan Rome. Matan haratu, na retileu vara la lo kilaua i tikeli rani atu a efi rulea i vano isan supe matan Rome.”

²² Moiso Agrippa mo vereia isan Festus mara, “Enau na opoia vara a tapurongo hin tamlohi atu.”

Mo faramia mara, “Pavuhu o pa tapurongo isana.”

Paul Mo Turu Na Nahon Supe Agrippa

²³ Ale mo mele rani sahe, supe Agrippa peresi Bernice la mai na nora pohapoha, ale la unu na jara tavera atu mata matavuhi peresi na nora patu tamlohi aulu mata vuro, peresi na tamlohi aulu matan taon tavera atu. Moiso Festus mara mo retileu, la lavi Paul mo unu. ²⁴ Ale Festus mara, “Supe Agrippa peresi kamim mo isoiso sei ka lo toho peresi kamam nakerihi, ka hite tamlohi nike natu sei tamlohi aulu nona Jew tari la lo usiau mo rilangi Jerusalem peresi nike Caesarea, vara a taua na mateia. ²⁵ Pani na noku kilakilau na hitea vara mo sopo vai te hinau vara i lavi na mateia matana. Ale mara mo opoia vara i turu na nahon nofa tamlohi tavera, supe matan Rome, na majinga vara a pa rulea i sahe isana. ²⁶ Pani na sopo levosahia vara a pa uli na sava isan noku supe matana. Matan haratu, na revea mo sinai na nahomim tari, pani na nahom supe Agrippa, matan vara na isoison retireti akerihi, korong a pa efi lavi te retireti vara a ulia. ²⁷ Matan na hitea vara mo sopo tataholo isaku vara a rule te tamlohi hatea sei mo lo toho na ima filangi vara la sopo vere mamahuni na nora tuvai matana.”

26

Paul Mo Sile Na Nona Retireti

¹ Ale supe Agrippa mo vereia isan Paul mara, “O efi turu natu, o retireti.”

Ale Paul mo turu mo tahe na limana ale mo tapulo retireti mara, ² “Enau na avulahi jea supe Agrippa matan engko natu o pa tapurongo na noku retireti matan la hinau nike tamlohi tatavera nona Jew la lo tuvaiau hinira. ³ Matan na levosahia vara engko ko levosahi mamahuni na posposi nona Jew peresi na retiusia sei tamlohi la lo sorahira tarea. Ale matan haratu, na lo usia isam vara o fomperavu mata tapurongo isaku.

⁴ Jew tari la levosahi mamahuni na mauriku, mo tapulo na lo uluvuvu peresi na tahisaku tataholo ale na rani na lo toho Jerusalem. ⁵ Vara la majinga la efi vereia vara enau Pharisee matea, vao matea sei la filangi jea mata nofa rasua. ⁶ Ale nakerihi

na lo turu na aria, na lo fomtoho matan retitauhi atu God mo vaia isana nofa pua vara i masese. ⁷ Supe Agrippa, noku tamlohi tavera, retitauhi atu natu mo vai la tadvavui tupu sangavulu romana mo rua atu la lo volitusi isan God tarea matana. Matan fomtoho atu natu, la Jew nike la lo tuvaiau matana. ⁸ Mata sava natu, mo filangi vara tea i rasua vara God mo lo sauteterahi na tamlohi mate?

⁹ Vara fuhu, tiroma enau haseku na levosahi mamahunia vara mo tataholo vara a komo na tamlohi usuri non Iesu mara Nazareth. ¹⁰ Ale hinau atu natu, na vaia Jerusalem. Na sopo tau na tapuhi na ima filangi na suiha na lavia isana moli nona pris purongo, pani na majinga vara la pa vilimateira. ¹¹ Vaha visa na rupira na asi maja matea na ima lotu nona Jew, ale na vaihitea vara la retisati hin Kristo. Matan na lo lolokoru sasati hinira, na vano vara a tipahira na taon tavera na jara tinapua sohena.

¹² Na lo vai hinau atu natu hin rani atu na lo sahe Damascus, moli nona pris la sileau na suiha vara a efi vaia, ¹³ moiso na pa lo toho na maleleku korong alo mo posi noku tamlohi tavera, na hite na memera tavera matea mo tai na tuka, mo mera mo jeu na alo, mo sasari falihiau peresi la haratu la lo hahau peresia. ¹⁴ Kamara kama jovi sivo na lepa moiso, na rongo na leo matea mo retireti isaku na leomam tadvavuin Israel mara, ‘Saul, Saul, mata sava ko lo tipahia? Ko lo hasem hotiho!’

¹⁵ Ale nara, ‘Engko hare tamlohi tavera?’

Ale Moli mo vereia isaku mara, ‘Enau sei Iesu haratu ko lo tipahiau. ¹⁶ Pani o turu! Matan na pala isam vara a vifonihio vara engko volitusi matea. Ale o pa vereuli na hinau ko hitera ale hin te hinau a pa mele vujangira isam. ¹⁷ A pa jurihio isana tadvavui peresi la tamlohi fofoha sei na lo ruleho vano isara, ¹⁸ matan vara o pa roi na matara vara la pa vahari na fofoha la mai na malarani, ale vara la malue na suiha Setan la mai isan God matan vara i efi fomi na nora hehe, ale la pa lavi na rungara peresi la haratu sei God mo tapuhira mata nora rasua hiniau.’

¹⁹ Matan haratu supe Agrippa, enau na oloolo hin hinau atu Moli na tuka mo vujangia isaku, ²⁰ ale matana, na vereulia isana mara Damascus tiroma, moiso isan la haratu la lo toho Jerusalem ale na jara tari Judea, ale isana tamlohi fofoha matan vara la pa vahari na nora hehe la mai isan God, ale la vujangia vara vara fuhu la posi moiso na nora vavahinau fuhu la lo vaira. ²¹ Matan hinau atu natu, Jew la tauriau na lolo rope Temple, ale la lo vaihitea vara la vilimateia. ²² Pani, na lo lavi na tuetuenu

isan God tarea mo tikeli nahapani, ale na lo turu na lo vereulia isan la haratu la tamlohi purongo, peresi la haratu la aulu, na sopo vere te hinau tinapua, pani haratu purongo sei p̄rovet peresi Moses la lo vereea vara i pa masese; ²³ vara Kristo i pa lavi na nona rani rilangi, ale i pa tiroma hin la haratu la turu na mateia sohena malarani matea isana Jew peresi na tamlohi rofoha.”

²⁴ Vahatea purongo, Festus mo ulo mara, “Paul, nom lelevosahi tavera mo vaiho ko putul!”

²⁵ Pani Paul mo faramia mara, “Noku tamlohi tavera Festus, na sopo putu, pani na lo vere na varafuhu na hinau na levosahi mamahunira. ²⁶ Matan supe Agrippa mo levosahi la hinau nike, ale na lo vere la hinau nike isana matan a sopo efi rasua vara enia mo sopo levosahi la hinau nike, matan la hinau nike la sopo masese hin te tavalu jara rihirihia hatea. ²⁷ Supe Agrippa, engko ko rasu na p̄rovet teni mo vono? Na levosahia vara ko rasura.”

²⁸ Agrippa mo vereea isan Paul mara, “Ko rom vara o efi vaiua na mai kalesia matea vila sohena harihi?”

²⁹ Paul mo faramia mara, “Vara i vila teni mo vono, pani na lo usiisi isan God vara engko peresi la tamlohi sei ka lo tapurongo isaku nakerihi, vara ha pa mai soheku — pani i sopo peresi na jen.”

³⁰ Moiso, pa supe atu mo turu ale Festus, Bernice peresi la haratu la lo sakele p̄resira la usuria, ³¹ ale lara la lo malue, la lo vereverea isara lara, “Tamlohi nike mo sopo vai te hinau vara i tataholo mata i mate matana, teni vara i vano na ima rilangi matana.”

³² Agrippa mo vereea isan Festus mara, “Tamlohi akerihi i efi malue purongo vara i sopo lo usia vara i turu na nahon supe matan Rome.”

27

Paul Mo Malue Vara I Sahe Rome

¹ Lara la hatihia vara kama pa malue matan vara kama sahe Italy, la tau Paul peresi na tatua tamlohi tinapua na ima rilangi na lima captain mata tamlohi vuro matea hijana Julius. Enia mo lo kilau na vao tamlohi vuro matea, ale vao tamlohi vuro atu la lavi na hijan nora supe matea matan Rome tuai sei Augustus. ² Kama vele na boti matea mo malue Adramyttium sei mo tatamahu vara i pa maro usuri na vusalean Asia, ale kama malue. Aristarchus mara Macedonia matea mo tai Thessalonica mo usuri kamam.

³ Mo mele rani sahe kama hosu Sidon, ale Julius mo kilau mamahuni Paul na posposi ruhu, ale mo tinarihia vara i efi sahe i hite na tapalana matan vara la efi tuenia

na nona vejuveju. ⁴ Kama mele malue atu kama sivo na tasi, ale kama maro na maumau ureuren Cyprus matan kama lo songai na langin hapuara hafua. ⁵ Kama maro roto na tasi tavera moiso, kama sahe usuri vusalean Cilicia ale Pamphylia. Ale kama hosu Myra hin Lycia. ⁶ Hin jara atu captain mata tamlohi vuro atu mo tapai na boti tinapua matea matan Alexandria mo lo sahe Italy, ale mo tau kamam hinia.

⁷ Kama maro malum na tasi mata rani matuvana, mo rilangi pani kama mai mariviti Cnidus, pani langin hapuara hafua atu mo horo kamam, kama pa sopo efi mele vano. Ale kama posi sivo kama maro usuri na maumau ureuren Crete kama jeu na jingon Salmone. ⁸ Kama maro usuri na vusalean, kama lavi na rani rilangi. Ale kama mai na jara matea la tovia Fair Havens, enia mo lo toho mariviti na taon matan Lasea.

Kama Ori Na Langi Tavera

⁹ Matan rani ruhu mo visa la vano purongo moiso, nomam hahau nakerihi mo pa mele sati jea matan taro hamariri tavera peresi na langi sati matan October mo pala moiso, ale rani mata tapuhoro na hanhani nona Jew mo isoiso tuai moiso. Ale Paul mo vereea isara mara,

¹⁰ “La tamlohi tavera, na hitevosahia vara nofa hahau i pa isoiso na rani sati vara fa malue akerihi nakerihi. Ale mo sopo hinahinau na lolo boti purongo la pa tihai, pani mauriia sohena.” ¹¹ Pani pa captain atu, mo tapurongo na retireti non captain nona boti atu peresi na tamlohin boti atu, ale mo sopo tapurongo na sava Paul mo lo vereea. ¹² Matan jara atu enia mo sopo ruhu vara tea i efi toho atu na taro hamariri teni na taro langi, vaora la hatihia vara la malue atu. La lo romtaua vara la efi tikeli Phoenix, mo naho sivo Malaharua enia jara matea matan Crete ale jara ruhu mata luhu na langi, ale la pa toho atu na taro hamariri.

Langi Tavera Mo Vilira Na Tasi

¹³ Langin tahuna matea mara mo tapulo ivi malum, la lo romromia vara la pa efi tikeli Phoenix. Ale kama reve narhi na matalalavo, kama hapahapani usuri na vusalean Crete. ¹⁴ Pani mo sopo tuai, langi sati tavera matan Tokalau mo jovi mo malue hin ureure atu mo vili kamam. ¹⁵ Boti atu mara mo kali hinia, i sopo efi mele songaia, kama tavuti kama tinarihia mo sere kamam.

¹⁶ Kama sivo kama tikeli na maumau ureuren Cauda. Mo rilangi pani kama taurilati boti rihirihia atu sei boti tavera atu mo lo revea. ¹⁷ Tamlohi voko mata boti lara la sau narhiia moiso, la talihi na tali na pangen boti tavera atu ale la lihohatia. Ale matan la

matahu vara langi i pa pulahi kamam kama hoso na rataratan Syrtis, la tuhu na timlen boti atu matan vara i taurilatira, ale la pa sivo malum purongo.

¹⁸ Mo mele rani sahe, matan langi atu mo tapulo fari boti atu, tamlohi voko la tapulo pulahi na lavilavi sivo na lolo tasi. ¹⁹ Mara mo mele rani sahe la tapulo pulahi na hinahinaun boti atu peresi te hinau sei la hitera la lo toho toho purongo. ²⁰ Ale matan kama sopo mele hite na alo teni te vitusarasara mata rani matuvana moiso, ale langi atu mo sopo moti, kama sopo mele romtoho vara kama pa juri hinia.

²¹ Matan vao tavera la rohu na hanhani, Paul mo turu sahe na livuhara, ale mara:

“La tamlohi, vara ha pa lo tapurongo isaku, vara fa sopo lo malue Crete, fa pa sopo eri lavi na rani rilangi sohen harihi, teni vara fa pulahi tihai te hinau na tasi. ²² Pani nakerihi, na lo vere kamim hinia vara ha sopo matahu, matan tea i pa sopo eri mate, pani boti akerihi purongo i pa tihai. ²³ Matan na vutepongi na hite na angelo matea non God sei enau nona volitusi, mo turu na pahisaku ²⁴ ale mo vereea isaku mara, ‘Paul, o sopo matahu! O pa turu na nahon supe matan Rome, ale God mo tinarihia vara tamlohi tari sei la lo toho peresiho la pa mauri.’

²⁵ Matan haratu, ha romrilangi la tamlohi, matan enau na tau na noku rasua hin God vara i pa sohen haratu mo vereea isaku. ²⁶ Pani na levosahia vara boti akerihi i pa takosa hin te ureure hatea.”

Boti Mo Mai Mariviti Na Jarauta

²⁷ Na sangavulu romana mo vati vutepongi matan langi atu, langi atu mara mo lo pulahi kamam, kama lo sivo roto na tasin Adria. Tamlohi voko hin boti atu la levosahia vara kama lo mai mariviti na jarauta. ²⁸ Matana, la tuhu na asihai ale la hiteulia vara puahana mo tikeli na metre mo ngavulu vati (40). Ale la mele sahe makomona la mele tuhu pa asihai atu, ale la mele hiteulia vara nakerihi natu puahana mo tikeli na metre mo ngavulu tolu moiso (30).

²⁹ Ale matan la matahu vara kama pa kali hin te paranga, la tuhu na matalalavo mo vati na pulo boti, ale la opoia vara i rani vila. ³⁰ Moiso tamlohi voko la vaihitea vara la rovo hin boti atu, la tuhu pa boti rihirihitu, ale lara la lo vaia, o hitea sohena vara la pa tuhu na matalalavo na patun boti tavera atu. ³¹ Pani Paul mo vereea isan nora captain mata tamlohi vuro atu peresi la tamlohi vuro atu mara, “Vara la tamlohi akerihi la malue hin boti akerihi, ha pa sopo eri juri!” ³² Moiso la tamlohi vuro atu la tai roto na asin pa boti rihirihitu, la tinarihia mo sale.

³³ Mo pa lo nahonaho rani, Paul mo vereea rilangi isara vara la hani te hinau mara, “Nahapani enia harau wik natu sei ka sopo hani te hinau matan ka sopo levosahia vara ha pa mauri teni mo vono. ³⁴ Matan haratu, na lo vereea rilangi vara ha hani te hinau matan enia i pa tueni kamim vara ha pa sopo mate. Matan te vulun te vonamim hatea i pa sopo eri tihai na patuna.” ³⁵ Mara mo vere hinau atu mo isoiso, Paul mo lavi na pereti ale mo vere meje isan God na nahora mo isoiso matana, mo topea ale mo tapulo hania. ³⁶ Matan haratu, enira mo isoiso romira mo mele rilangi ale la hanhani. ³⁷ Evimam hin boti atu mo tikeli ngavulu sangavulu rua mo ngavulu limaravrua mo limarave (276).

³⁸ Lara la hanhani la masu, la pulahi na tanga wit mo sivo na lolo tasi matan vara i vai na boti i salesale.

Boti Mo Kali Na Paranga

³⁹ Rani mara mo pala, la sopo hitevosahi jara atu, pani la hite na jara luhu matea peresi na oneone, ale la hatihia vara la eri vaia vara boti atu i hoso hinia. ⁴⁰ Ale la tai roto na asi mata matalalavo sei la lo toho na lolo tasi, ale la uli narihi asihai atu sei mo lo tauri la stian boti atu jara matea, moiso la tahe na hapanin patu boti atu mo sahe na langi, la haloa mo sahe na oneone. ⁴¹ Pani la tia na jara matea tasi mo lo maro leji hinia, ale patun boti atu mo kali na ratarata mo rilangi i sopo eri mele hisu, pani loloputu la lo tapulo kauti na pulo boti moiso.

⁴² La tamlohi vuro atu la hatihia vara la pa vilimatei la tamlohi atu mata ima rilangi matan vara tea i sopo olo i rovo. ⁴³ Pani pa captain mata tamlohi vuro atu matan mo opoia vara i juri na maurin Paul, mo horora vara la sopo vai na sava la hatihia moiso. Mo retileu mara la haratu la eri olo la kue nafihiti tiroma ale la olo sahe na jarauta, ⁴⁴ ale sopera la pa lo hitahu, tea la pa keho hin te tavalu tapea teni te hinau i eri sale hin boti atu. Hin malele akerihi natu, tamlohi tari hin boti atu la jelu la sahe na jarauta hinia.

28

La Hosu Na Ureuren Malta

¹ Kama hosu na jarauta mo ruhu moiso, kama pa levosahia vara kama lo toho na Ureuren Malta. ² Tamlohin jara atu la ruhu ruhu isamam hajavua, matan mo lo usa ale hamariri tavera. Ale la avulahi vara la lavi kamam, matan la polo na hapu tavera matea matan vara kama pa marijo hinia.

³ Paul mara mo rako na oti rangaranga hapu matea, ale mo lo taua na hapu, mata sasati matea mo malue matan hapu atu ale

mo katoho na limana. ⁴ Tamlohin jara atu lara la hite maji atu mo lo keho na liman Paul, la lo vereverea isara lara, “Mo sopo te retusia vara tamlohi akerihi enia tamlohi vili tamlohi matea teni mo vono, hina purongo vara mo juri na tasi, pani noʻa god haʻai sei Justice, mo sopo tinaʻihia vara i mauri.” ⁵ Pani Paul mo pulapulah narihi maji atu mo sivo na lolo hapu, ale mo sopo rongo i sati. ⁶ Pani la tamlohi atu la lo kilau vara epena la pa sosohi teni i pa jovi i mate vahatea. Ale la lo saovi mo peravu moiso ale lara la sopo hite te hinai i vaia, la posi na ʻomira lara enia god matea.

⁷ Ale ʻalihi hin jara atu lepa enia non patu tamlohi matan Malta, hijana Publius; ale enia mo avulahi hin kamam, mo lavi kamam mo lo kilau mamahuni kamam mata rani mo tolu. ⁸ Taman Publius mo rojo mo lo juruvi na vatana. Mo lo rongohaji na seserei peresi na jimajima. Paul mo unu mo sivo mo hitea, ale mo usi isana, moiso mo tau na limana hinia ale mo vai na nona rojoa la tihai. ⁹ Hinai atu mara mo masese mo isoiso, tamlohi matuvana hin ureure atu sei la rojo, enira sohena la mai isan Paul ale la mele ruhu. ¹⁰ Matan haratu, la sile kamam na hinai matuvana, ale kama lo tatamahu vara kama pa mele malue, la sile na hinai tari kama pa vejuveju hinira la boti.

Paul Mo Kakau Rome

¹¹ Vitu mo tolu la vano moiso, kama pa mele malue sivo na tasi na boti tinapua matea matan Alexandria sei mo lo luhu hin ureure atu. Ale na patuna la tai na patu god mo rua sei la tovara ‘Havo Matan Tuka’. ¹² Kama maro kama hoso Syracuse na ureuren Sicily, ale kama lo toho atu mata rani mo tolu. ¹³ Kama malue atu kama hapahapani kama vano na jara tinatina-pua, ale kama sahe kama hoso Rhegium, ale mo mele rani sahe, langin tahuna mo sere, ale na harua rani kama hoso Puteoli. ¹⁴ Hin jara atu kama hite na vorai kalesia hai, ale la usi kamam vara kama pa toho peresira, ale kama lo toho atu mata rani mo limaravrua. Kama usuri na malele atu kama hahau kama sahe kama pala Rome.

¹⁵ Vorai kalesia ʻalihi hin jara atu lara la rongoa vara kama lo sahe Rome, la tai Rome la sinai vara la hite kamam. La jara atu la hahau matara la asau ʻove sohen na taon sei Forum matan Appius peresi Ima Mo Tolu atu mata tamlohi hahau. Paul mara mo hitera, mo vere meje isan God ale mo mele ʻilafilangi.

¹⁶ Kamara kama unu Rome, la tinaʻihia vara Paul i ʻefi toho enia hasena peresi na tamlohi vuro matea mo lo kilaua.

Paul Mo Retivujavujangi Isana Jew Rome

¹⁷ Rani mo tolu la vano moiso, Paul mo tovi na tamlohi tavera nona Jew hin jara atu la mai jara matea. Lara la sakele matavuhi moiso, mo vere isara mara:

“La vorai, hina purongo vara na sopo vai te hinai i sati isana noʻa tamlohi teni na posposi nona noʻa pua, la taurilatiau Jerusalem ale la tauau sohena tamlohi sasati matea na lima mara Rome. ¹⁸ Tamlohi tavera atu lara la kilau usuri na sava la tuvaiau hinira, la opoia vara la tinaʻihia matan la sopo lavuti te hinai vara a pa mate matana. ¹⁹ Pani Jew lara la sopo avulahi hinia, mo vaiau na mele usia vara a pa turu na nahon supe matan Rome, mo sopo matan vara a pa tuvai na tahisaku hin te retireti. ²⁰ Matan hinai atu natu, mo vaiau na opoia vara a hite kamim ale a retireti isamim. Matan enau na lo toho hin jen nike matan na lo tau na noku rasua hin ʻomtoho atu nona tavitavuin Israel matan Tamlohi Jujuri.”

²¹ La ʻaramia lara, “Kama sopo lo lavi te leta Judea matam, teni te vorai atu mo sopo lo sinai nike vara i vere te hina sasati matam. ²² Pani kama opoia vara kama rongo na ʻomim hin rasua nike sei tamlohi na jara tari la lo vereleleja.”

²³ La tau na rani matea vara la pa matavuhi peresia. Ale la mai na jara mo lo toho ea, enira vao tavera, mo tapulo na ralavuhu mo tikeli na ravravi mo lo vere mamahunia, ale mo vereuli mauri atu God mo aulu hinia, ale mo vaihitea vara la tau na nora rasua hin Iesu hin na leu non Moses peresi na provet. ²⁴ Tatuara la rasu na sava mo lo vere, pani hai la ʻohu vara la rasua. ²⁵ Ale la tapulo malmalue, matan ʻomira mo sopo matea. Hitahuna, Paul mo sile na isoiso reti isara mara, “Tanume Tapu mo vere mo tataholo mata nomim pua na sava sei provet Isaiah mo vere mara:

²⁶ ‘O vano isan la tamlohi nike,

ale o vere vara,

Ha pa rongoa vavano,

pani ha sopo ʻefi rongovosahia,

ale ha pa lo kilaua vavano,

pani ha sopo ʻefi hitevosahia.

²⁷ Matan mapun la tamlohi nike

la mate,

ale perora la sopo rongo,

ale la pelati na matara moiso,

matan vara la pa sopo kilau,

ale perora la pa sopo rongo,

ale mapura la pa sopo rongovosahi,

vara i vono la pa posi

ale a pa vai mamahunira.’ Isa 6.9–10

²⁸ Matan haratu, ha lo levosahi mamahunia vara vavahinau sei God mo vaia mata juri na tamlohi, enia mo sohaia mo

vano isana tamlohi ʻōroha: ale enira la tapurongo hinia!”

²⁹⁻³⁰ Paul mo lo toho atu mata tauni mo rua na ima matea mo pakaia, ale mo avulahi na tamlohi tari sei la lo mai isana. ³¹ Mo lo retivujavujangi mauri atu God mo aulu hinia, ale mo lo vujangi hin Moli Iesu Křisto mo sopo te matahu hinia, ale mo sopo tea i horoa.

Romans
Leta
Paul Mo Uli
Isana Mara
Rome
Puku Nike

Paul mo uli leta nike isana mara Rome. Rome enia taon tavera na varama hin pongi atu. Mo levosahi na kalesia ea (15.22–16.21). Mo vere isara mara Iesu mo viro- nia vara enia i pa nona volitusi isara (1.1) mo lavi na retisohai matea ‘— matan enia suihan God mata juri na tamlohi tari sei la rasua, tiroma isana Jew moiso i pa isana tamlohi rofoha.’ (1.16). Paul mo vere mara tamlohi tari la hehe (3.23). Pani mo vai na malele mata vai na tamlohi la tata- holo na nahona:

‘Matan tamlohi tari la vai na hehe, la lo toho asau na hina fuhufuhu sei non God hasena, ale God mo avulahi vara i vai na tamlohi la tataholo na nahona na nona romfuhu purongo, mo vaia na malele mata volituhu hin Kristo Iesu, enia sei, God mo taua na nahoŋa, ŋaena mo voli- tuhu na talai lolokoru non God mata hehe, ale rasua enia malele sei tamlohi la eri lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai.’ (3.23–25).

Paul mo vujangia vara rasua nike mo sohen rasua atu non Abraham tuai (4.13). Ale nake vara tamlohi la mai kalesia, la pa mauri usuri na suiha Tanumen God (8.1–27). God mo sile na suiha hai isana nona tamlohi mata hahau usuri na masalona (12.1–13).

Hin Leta Nike

1. Paul Mo Vujangi Na Retiruhu (1.1–17)
2. Tamlohi Tari La Ori Na Hehe (1.18–3.20)
3. God Mo Vai Na Tamlohi La Tataholo Na Nahona (3.21–4.25)
4. Mauri Paro Nona Tamlohi (5.1–8.39)
5. Vujangi Mata Tavtavuin Israel (9.1–11.36)
6. Mauri Paro Nona Kalesia (12.1–15.13)
7. Vavahinau Non Paul, Isoiso Retireti (15.14–16.27)

Paul Mo Sile Na Nona Retioloolo

¹ Enau Paul, volitusi non Kristo Iesu matea, enia mo toviau vara a vahaŋule, mo tapuhiau vara a retivujavujangi na Retiruhu non God. ² Mo retitauhi hin Retiruhu sei tuai moiso na reti nona provet na Reti- tapu mo tapu, ³ mo lo vereuli Natuna, enia mahapin Supe David usuri na malele tam- lohi, ⁴ ale God mo vujangia vara enia Natun God na suihan Tanume Tapu na nona mele

turu na mateia, Iesu Kristo noŋa Moli, ⁵ ale hinia, kama lo lavi na romfuhu peresi na hija fuhu mata vahaŋule matan vara kama efi tiroma na tamlohi vara la oloolo usuri na mauri rasua, matan vara hijana i pa aulu na tamlohi rofoha, ⁶ kamim sohana, God mo tovi kamim vara ha mai tamlohi non Iesu Kristo.

⁷ Isan la haratu tari la lo toho Rome sei God mo opoira, ale mo tovira vara la mai nona tapuhi:

Romfuhu peresi na tamata non God Tamaŋa peresi Moli Iesu Kristo la mai isamim.

Retiruhu Non God

⁸ Tiroma, na opoia vara a vere meje isan noku God matamim hin Iesu Kristo, matan tamlohi na jara tari na varama la lo so- rahi na nomim rasua. ⁹ Matan God sei na lo volitusi isana na mauriku usuri na Reti- ruhu matan Natuna, enia noku tuetueni sei mo levosahia vara na lo vere kamim tarea ¹⁰ na noku ususi, tarea na lo usia vara te masapa na masalon God vara a efi mai isamim. ¹¹ Matan tuai moiso, romiku tavera na opoia vara a hite kamim, vara Tanume Tapu i eri sile kamim hin te otori na limaku matan vara i eri rilangi na maurimim hinia, ¹² na lo ŋaramia vara, enŋa ŋa efi romfomi rilangi mata noŋa rasua, nomim peresi na noku.

¹³ La vorai peresi na vevorai, na opoia vara ha levosahia vara na opoia vaha visa moiso vara a mai, pani mo tikeli nake, mo sopo lo te masapa, matan vara a eri hite na vua nomim rasua sohen na hitea moiso isana tamlohi rofoha tinatinapua. ¹⁴ God mo tauau moiso vara a pa tueni la haratu la lo retireti na leo mara Greek peresi la haratu la tamlohi rofoha, ale isan la haratu la lelevosahi peresi la haratu la rongorongono vono. ¹⁵ Matana, enau na opoia mo tavera jea vara a retivujavujangi na Retiruhu isamim sei ka lo toho Rome.

¹⁶ Matan enau na sopo mahanuhanu na Retiruhu, matan enia suihan God mata juri na tamlohi tari sei la rasua, tiroma isana Jew moiso i pa isana tamlohi rofoha. ¹⁷ Matan hin Retiruhu sei, malelen God mo vaia vara tamlohi la mai la tataholo na na- hona, mo malue na jara tavera, enia mata rasua purongo, matan la ulia moiso vara, ‘Haratu mo tataholo na nahon God la pa mauri usuri na malele rasua purongo’. *Hab 2.4*

Lolokoru Non God Mata Hehe

¹⁸ Matan God mo lo vujangi na nona talai lolokoru mata hehe na tuka mo sinai na varama mata posposi varama tari peresi na posposi hehe tari nona tamlohi, ale matan nora posposi hehe sei mata turuhoro na

retivarafuhu vara i malue na jara tavera. ¹⁹Matan sava hinau tamlohi la efi levosahia hin God mo memera isara, matan God mo vujangia isara moiso. ²⁰Matan ruhuruhun God sei nona hasena la lo luhu sohen harihi; nona suiha matan tui tui peresi mauri atu sei enia non God hasena. Ale la hinau sei tamlohi la efi hitevosahira matan la memera purongo hin la hinau atu God mo vaira na tapulo rani sei mo vai na varama. Ale matan haratu, tamlohi la sopo efi vereva vara God mo sopo toho.

²¹Matan hina purongo vara la levosahi God moiso, pani la sopo hasohaso vara enia God teni la sopo vere meje isana, ale romira la mai la putu, ale mapura la rongorongono vono la mai la fofoha, ²²la vereva lara la levosahi, pani la mai la rongorongono vono, ²³la sopo lotu na ruhuruhun God sei i sopo efi tihai, pani la lo lotu na hinau sohenama tamasi sei la vaira sohenama tamlohi peresi na maji avuavu, peresi na maji palo vati, peresi na maji haraho sohenama mata teni malupa, enira mo isoiso la pa tihai!

²⁴Ale matana, God mo silera la vano na masalo mapura, ale la usuri na posposi lumiha, la vai na hina mahanuhanu na epera hasera, ²⁵matan la jeni na retivarafuhu hin God mata halu, ale la lo lotu ale la volitusi nona hinau God mo vaira, pani mo sopo isan God sei mo vaira, enia hasena mo tataholo vara tamlohi la hasohaso na rani tui tui tarea! Amen.

²⁶Matan harihi, God mo silera la vano na nora opoia mata posposi mahanuhanu, matan nora ha'ai la jeni na posposi tataholo nona ha'ai matan la lo hase lavilavira. ²⁷Ale lamane sohenama tinafihi na posposi tataholo peresi na ha'ai, matan posposi mata opoi na lamane mo jeu na masalora tinatinapua, lamane la vai na hina mahanuhanu peresi na lamane, ale la hani na vua pulara vetali mata nora lejileji.

²⁸Ale matan la rohu vara la romromi God, ale God mo silera na romromi nona maji matan vara la vai na hinau mo sopo tataholo vara tamlohi la efi vaira. ²⁹La marivi na posposi tari la sopo tataholo, la lo vaivaileu, la lo romusuri, la sasati, la marivi na mereimerei, la lo vilimatei na tamlohi, la lo hitesatihi, la lo halu, la lo vaisatihi na tinapua, la lo sorasora tamlohi, ³⁰la lo retirefen, la rohu hin God, la lo vatafa, la lo mangisi, la lo retihapahapa, la lo romromi, ale la aleale malele paro mata la vai na hina sasati hinia, la sopo oloolo hin tamara teni tinara, ³¹romira mo vono, la lo tope na nora retitauhi, mo sopo te nora opoia, la sopo romopoi te tinapua. ³²Hina purongo vara la levosahia mo ruhu moiso vara God mo pete tau na retileu moiso vara tea mo topea i pa

mate matana, enira la sopo vaira purongo, pani la retituetueni la haratu la lo vaira.

2

God I Pa Ari Na Nom Hehe

¹Ale nake, mo sopo te hinau hatea vara o efi halu hinia tapala, kamim mo isoiso sei ka lo ari na tinapua. Matan vara ko lo ari na tinapua, ko lo hasem ariho matan engko ko lo vai la hinau atu na lo vereva moiso vara tamlohi la lo vaira. ²Ra levosahia vara talai non God mo lo jovi isan la haratu la lo vai la hinau sei, ale enia mo tataholo. ³Tapala, engko sei ko lo ari la haratu la lo vai la hinau sei, ko rom vara o pa efi jelu na talai non God, pani i pa sohenama vara matan engko sohenama ko lo vaira? ⁴Ko lo romromi purongo na nona romromi peresi na nona rompurongo peresi na nona romperavu tavera isam, pani ko sopo levosahia vara nona romperavu mo lo sileho na masapa vara o posi na nom hehe.

⁵Pani matan mapum mo rilangi, ale ko rohu vara o posi, ko lo hasem takonahi na nom talai matan rani ari atu sei God i pa vujangia na nona talai lolokoru mata hehe usuri na nona posposi tataholo hinia. ⁶God i pa ari na tamlohi i tataholo na nora vavahinau: ⁷God i pa sile na mauri tui isan la haratu la lo romperavu vara la vai na vavahinau ruhu, ale la lo ale na hasohaso peresi na oloolo tavera peresi mauri atu sei i pa sopo efi tihai hin te rani; ⁸pani isan la haratu la lo vai na masalora purongo, ale la sopo oloolo na retivarafuhu, pani la lo oloolo na posposi mo sopo tataholo na nahon God, enira la pa lavi na talai lolokoru non God mata hehe peresi na nona lolokoru sasati. ⁹Ale tamlohi tari sei la lo vai na vavahinau hehe la pa lavi na rani rilangi peresi na rani sasati, isana Jew tiroma moiso i pa isana tamlohi fofoha, ¹⁰pani God i pa sile na hasohaso, oloolo peresi na tamata isana tamlohi tari sei la lo vai na vavahinau ruhu, isana Jew tiroma moiso i pa isana tamlohi fofoha, ¹¹matan God mo sopo tametame tea.

¹²God i pa sile na talai isana tamlohi la sopo Jew vara la hehe, hina purongo vara la sopo lo lavi na nona leu. Ale i pa sile na talai isana Jew vara la hehe matan nona leu mo lo pisuhi na nora hehe. ¹³Matan mo sopo la haratu sei la lo rongo na leu purongo mo vaira la tataholo na nahon God, pani la haratu sei la lo vai na sava leu mo vereva, enira natu la tataholo na nahon God. ¹⁴Matan vara la tamlohi fofoha sei la sopo lavi na leu, pani la lo vai na sava leu mo vereva, mo vujangia vara leu mo lo toho hinira moiso, hina purongo vara la sopo lo lavi na leu. ¹⁵La lo vujangia vara sava

hinau leu non God mo vereea, mo lo toho na mapura moiso, matan romira sohenana mo vereulia isara vara la lo vai na hina ruhu teni te hina hehe, ¹⁶hin rani atu usuri noku Retiruhu sei mo lo vereea vara God mo ari na hina luhu nona tamlohi hin Křisto Iesu.

Leu Non God Mo Reti Isana Jew

¹⁷Pani vara ko lo vereea vara engko Jew matea, ale ko lo turu na leu, ale ko lo hapahapa vara ko levosahi God, ¹⁸ale vara ko levosahi na masalona, ale ko lo avulahi na sava hinau la fuhufuhu jea matan ko lo lavi na lelevosahi na leu, ¹⁹ale vara ko levosahi mamahunia vara engko tamlohi tiroma na matavuso matea, ale lamu matea isan la haratu na rofoha, ²⁰ale vara engko tamlohi matea mata vujangi la haratu la sopo rongovosahi, ale tamlohi vujangi na natuvarihi matan ko lavi vevuhi na lelevosahi peresi na retivararuha na leu, ²¹ale vara ko lo vujangira sohenana, mata sava ko sopo hasem vujangiho? Ko lo retivujavujangi vara tamlohi la pa sopo vavanaho, pani engko, ko lo vavanaho teni mo vono? ²²Engko sei ko lo vereea vara mo sopo tataholo vara tamlohi la vaivaileu peresi na tinapua mo lahi moiso, ko lo vaivaileu peresi na tinapua mo lahi moiso teni mo vono? Ko lo vereea vara ko sopo lotulotu vono, pani ko lo vanaho na hinau na lolo temple nona tamasi teni mo vono? ²³Engko sei ko lo hapahapa na leu, ko lo topea, ale ko lo komo na hijan God matana. ²⁴Matan sohen la ulia vara, 'Tamlohi rofoha matuvana na varama la lo veresatihi na hijan God matamim'.

Isa 52.5

²⁵Matan posposi taifalihi mo ruhu purongo vara ko ololo na leu, pani vara ko lo tope na leu, nom taifalihi enia hina purongo. ²⁶Ale matana, vara tamlohi matea mo sopo taifalihi, pani mo lo tauri na vujangi mata leu, ko hitea vara God i pa hitea vara posina mo tataholo hin la haratu la taifalihi teni mo vono? ²⁷Ale matana, tamlohi atu mo sopo taifalihi, ale mo lo tauri na leu, enia i pa vereea vara talai i pa jovi isam sei ko taifalihi sei ko lavi na leu, matan engko natu ko lo tope leu atu.

²⁸Matan engko mo sopo Jew matea tataholo vara tamam enia tinam enira Jew teni matan engko ko lavi na taifalihi na epem. ²⁹Mo vono. Jew tataholo matea enia haratu mapuna mo tataholo na nahon God. Ale taifalihi vararuha enia mo sopo taifalihi na epe, pani sava Tanume Tapu mo vaia na mapum. Tamlohi sohenana, mo lo ale hasohaso atu God mo lo silea, mo sopo hasohaso sei tamlohi la lo silea.

3

Retitauhi Non God La Vararuha

¹Vara mo sohen haratu, sava mo ruhu natu vara engko Jew matea? Teni sava natu mo ruhu na taifalihi? ²Vararuha, God mo leruhu na Jew na malele matuvana, tiro-mara enia God mo sile na nona vereulia isara. ³Vararuha, tatuara la tope na nora retitauhi, pani nora posposi mata tope na retitauhi i pa vai na retitauhi non God i vano hina purongo teni i vono? ⁴I vono! Tamlohi tari enira tamlohi halu, pani God mo lo vararuha, sohen la ulia vara, 'Nom reti la vujangia vara engko ko tataholo, ale engko o pa jeu na nora retituvai na court'. *Psa 51.4*

⁵Pani vara hai la lo vereea lara nora hehe mo sile God na masapa vara i pa vujangi na nona posposi tataholo, řa pa řarami romfomi atu sohenana sava? Vara mo sopo tataholo vara God i sile na nona talai lolokoru mata hehe isara teni mo vono? Na lo retireti usuri na romfomi tamlohi nahai. ⁶I vono! Vara sohenana, God i pa efi ari na varama sohenana sava? ⁷Pani tea la pa vereea vara, 'Vara noku halu mo lo vujangia vara reti non God mo vararuha sohenana sava, ale mo lo lavi na hasohaso matana, mata sava natu, na lo lavi na talai sohenana tamlohi hehe matea?' ⁸Ale mata sava řa sopo efi vereea vara, 'Mo ruhu vara řa vai na hina sasati matan vara hina ruhu i efi mai matana.' Matan tea la lo retirefen hin kamam lara kama lo vujangia sohenana. Pani hara talai sei God i pa silea isara matana i pa tataholo.

Tamlohi Tari La Hehe

⁹Nake i pa sohenana sava? Kamam Jew kama ruhu kama jeu na tinapua teni mo vono? I vono, matan řa pete vujangia moiso vara tamlohi tari, Jew teni tamlohi rofoha, la lo toho na ruhuruhu suiha hehe, ¹⁰mo sohen la ulia vara,

'Mo sopo tea i tataholo,

mo vono, mo sopo te hatelete.

¹¹mo sopo tea i lelevosahi;

mo sopo tea i lo ale God.

¹²Tamlohi tari la vahari hinia,

enira mo isoiso la sopo mele ruhu

matan te hinau;

mo sopo tea i vai te hina ruhu,

mo vono, mo sopo te hatelete.'

Psa 14.1-3; 53.1-3

¹³'Nora retireti mo řanga sohenana pona taptap roi matea;

la vai na memera la halu.' *Psa 5.9*

'Nora reti mo sohenana poison mata

mata sasati mo lo toho

na jingora.'

Psa 140.3

¹⁴'Jingora mo marivi na lesati

peresi na lolokoru.'

Psa 10.7

¹⁵'La tamlohi akerihi la tatamahu moiso mata vili na tamlohi;

¹⁶Sava jara la vano hinia,

la vaikomokomoa,
ale rongohaji mo vora,
17 ale malele mata tamata
enira la sopo levosahi te hinau hinia.’
Psa 59.7–8

18 ‘Mo sopo te matahu matan God
na nora vavahinau.’ *Psa 36.1*

19 Ale nake ʻa levosahia vara sava hinau
leu mo vereaa, mo vereaa isan la haratu la lo
toho na leu matan mo vai na tamlohi tari
la tapanono, ale mo vujangia vara tamlohi
tari na varama la pa toho na ruhuruhu talai
non God. 20 Matana, mo sopo te tamlohi
vara i efi tataholo na nahon God matan enia
mo lo usuri na leu. Matan leu mo sile na
leleivosahi mata hehe.

Kristo Mo Lavi Na Noʻa Talai

21 Pani nake, malele tamlohi mata la mai
la tataholo na nahon God mo lo toho na jara
tavaa, pani leu mo sopo toho na lolona,
o pa hitea vara Leu non Moses peresi na
retireti nona pʻovet la lo vereulia 22 soheaa
sava God mo lo vujangi na nona posposi
tataholo na malele rasua. Tamlohi tari la
tau nora rasua hin Iesu Kristo la mai la tata-
holo na nahon God matan God mo sopo ase
na tamlohi, 23 matan tamlohi tari la lo vai
na hehe, la toho asau na hina fuhuruhu sei
non God hasena, 24 ale God mo avulahi vara
i vai na tamlohi la tataholo na nahona na
nona fomʻuru purongo, mo vaia na malele
mata volituhu hin Kristo Iesu, 25 enia sei,
God mo taua na nahofa, faena mo volituhu
na talai lolokoru non God mata hehe, ale
rasua enia malele sei tamlohi la efi lavi na
vuan vavahinau sei. God mo vujangia vara
posina mo tataholo matan enia mo sopo sile
na talai mata hehe tari isana tamlohi sei
la vaira tuai. 26 Nake mo vaia matan vara
i vujangia vara nona aria mo tataholo, ale
mo tataholo vara enia i vai na tamlohi la tau
na nora rasu hin Iesu, ale la mai la tataholo
na nahona.

27 Ale, hare natu i efi retihapahapa i vereaa
vara mo tataholo mata nona vavahinau? I
pa sopo tea! Mo mai mata sava leu? Matan
ʻa lo oloolo na leu? Mo vono, pani matan
ʻa usuri na leu mata rasua. 28 Matan kama
lo vereaa vara tamlohi la mai la tataholo na
nahon God mata rasua, mo sopo matan la lo
oloolo na leu.

29 Pani God enia God nona Jew purongo
teni mo vono? Enia God nona tamlohi
foʻofoha teni mo vono? Enjora, enia God
nona tamlohi foʻofoha, 30 matan God enia mo
matelete. Enia i pa vai la haratu la taiʻalilihi
peresi la haratu la sopo taiʻalilihi la tataholo
na nahona mata rasua. 31 Ale, vara mo
soheaa, rasua mo vai na suiʻhan leu atu mo
isoiso teni mo vono? Mo vono, matan kama
lo vereaa vara leu mo tataholo.

4

Rasua Non Abraham

1 Ale vara mo soheaa, ʻa pa vereaa na sava
matan hinau sei piʻa Abraham mo vileia
tuai? 2 Matan, vara Abraham mo tataholo
na nahon God mata nona vavahinau, enia
i pa hapahapa matana. Pani i sopo efi ha-
pahapa na nahon God. 3 Retitapu mo vereaa
na sava matana? ‘Abraham mo rasu God,
ale God mo vereaa vara enia mo tataholo na
nahona matana.’ *Gen 15.6*

4 Ale isana tamlohi voko matea, volina
mo sopo hina silesilea matea, pani enia voli
nona voko. 5 Pani isan haratu mo sopo vai
te voko, pani mo tau na nona rasu hin God
sei mo efi vai na tamlohi varama la mai la
tataholo na nahona, ale God mo vereaa vara
rasua non tamlohi atu mo vaia mo mai mo
tataholo na nahona.

6 Mo sohen supe David mo vereaa matan
avulahi tavaa non haratu sei God mo hitea
vara mo tataholo na nahona, mo sopo
matan te hinau enia mo vaia:

7 ‘Avulahi tavaa isan la haratu
God mo romi na nora vaivaileu,
ale mo tatavuhi na nora hehe;

8 avulahi tavaa isan tamlohi sei

Moli i pa sopo evi na nona hehe hin te
rani.’ *Psa 32.1–2*

9 Avulahi tavaa nika enia non la haratu
la taiʻalilihi purongo? Mo vono, avulahi sei
enia non la haratu la sopo taiʻalilihi peresi
la haratu la taiʻalilihi, matan kama lo vereaa
vara, ‘God mo vereaa vara Abraham mo tata-
holo na nahona mata nona rasua purongo’.
Gen 15.6

10 God mo pa vaia soheaa isan Abraham
soheaa sava? Mo vaia tiroma teni hitahu
moiso mo pa taiʻalilihi? Mo sopo hitahu,
pani tiroma na nona taiʻalilihi.

11 Mo lavi na taiʻalilihi soheaa matamata
matea mata vujangia vara enia mo tata-
holo mata nona rasua hin rani atu mo sopo
lo taiʻalilihi. Enia matan vara God i vaia
i tama tamlohi tari sei la rasua, pani la
sopo taiʻalilihi, matan vara God i pa vaira la
tataholo na nahona sohen Abraham, 12 ale
mo vai Abraham mo taman la haratu la
taiʻalilihi, mo sopo mata taiʻalilihi purongo,
pani matan la lo hahau usuri na malele
rasua non tamafa Abraham hin rani atu mo
sopo lo taiʻalilihi.

13 Matan retitauhi sei God mo silea isan
Abraham peresi na taniana mo vereaa vara
varama i pa nora, mo sopo mai mata leu,
pani mata rasua sei mo vai na tamlohi la
tataholo na nahon God. 14 Matan, vara la
haratu la lo usuri na leu la lavi na vuan
retitauhi sei, rasua enia mo sopo te suiʻhana,
ale retitauhi atu mo vano hina purongo.
15 Matan leu mo lavi na talai lolokoru non

God mata hehe mo mai isana tamlohi, pani vara i sopo lo te leu, i pa sopo te hehe.

¹⁶ Mo pa sohena matan mo turu na rasua purongo, matan vara sava retitauhi mo vere, mo mai mata romfuhu, mo turu rilangi mata taniaha tari, mo sopo isan haratu mo lo usuri na leu purongo pani isan haratu mo rasua sohen Abraham mo lo rasua, enia tamaa enfa mo isoiso, ¹⁷ sohena la ulia vara, 'Enau na viŕoniho vara engko o pa tama tamlohi jara matuvana'. *Gen 17.5* Ale God mo hitea vara Abraham mo rasua vara enia i eri sile na mauri isana mate, ale mo retireti purongo ale hinau sei la sopo lo toho la pala. ¹⁸ Abraham mo lo romtoho, hina purongo vara mo sopo levosahia vara i pa sohena sohena sava, pani mo lo romtoho vara i pa tama mara jara matuvana usuri na sava God mo vere isana mara, 'Ale taniam la pa matuvana sohena vitusarasara'. *Gen 15.5*

¹⁹ Nona rasua mo sopo jovi, hina purongo vara epena mo vajiaha mariviti i pa mate purongo matan taunina mo lo lavilavi na tauni mo ngavulu sangavulu (100), ale hina purongo vara Sarah mo aroaro.

²⁰ Mo sopo romkaka na retitauhi non God, pani mo ulua rilangi na nona rasua, ale mo lo sile na ololo isan God, ²¹ mo levosahi mamahunia vara God i eri vai na sava mo retitauhi hinia. ²² Ale matan nona rasua atu, 'God mo vere vara enia mo tataholo na nahona.'

²³ Pani reti sei akerihi, 'God mo vere vara enia mo tataholo...' la sopo ulia matan Abraham hasena, ²⁴ pani matan nofa rasua sohena. God i pa vere sohena isan la haratu la lo tau nora rasua hin God sei mo sauteterahi Iesu nofa Moli na mateia. ²⁵ Enia, God mo silea mata nofa hehe, ale mo sauteterahia matan vara i vaifa fa tataholo na nahona.

5

Rasua Mo Sile Na Avulahi

¹ Ale matan nake fa tataholo moiso na nahon God na rasua, fa toho na tamata peresi God hin nofa Moli Iesu Kristo. ² Hinia, fa eri unu na romfuhu sei fa lo turu hinia mata rasua, ale fa lo avulahi tavera matan fa lo romtoho vara fa pa toho peresi God na hasohasona. ³ Aulu hin haratu, fa avulahi na nofa rani rilangi, matan fa levosahia vara nofa rani rilangi, vuana enia posposi mata turu rilangi, ⁴ ale posposi mata turu rilangi, vuana enia jelu na hinau vaihite, ale posposi mata jelu na hinau vaihite, vuana enia romtoho, ⁵ ale nofa romtoho sei i pa sopo eri vano romfomi purongo matan Tanume Tapu sei God mo silea isaŕa mo surei na opoia non God na mapuŕa.

⁶ Matan na rani mo sopo lo te nofa suiha, na ranina tataholo, Kristo mo mate matafa tamlohi sei fa lo usuri na posposi varama. ⁷ I pa rilangi vara o eri vilei tea vara i mate mata tamlohi tataholo matea, pani korong, tea i pa eri romfilangi vara i mate matan te tamlohi ruhu hatea; ⁸ pani God mo vujangia vara nona opoia matafa mo sohena sava matan, hin rani atu fa pa lo tamlohi hehe, Kristo mo mate matafa. ⁹ Matan fa mai fa tataholo na nahon God mata faen Iesu moiso, ale nake, mo sopo te retiusia hatea vara Iesu i eri juriŕa na talai lolokoru non God mata hehe. ¹⁰ Matan, vara God mo sari tamata peresiŕa na mateia non Natuna na rani fa pa lo nona meresahi, nake matan fa turu na tamata peresia moiso, mo sopo te retiusia hatea vara fa pa eri juri na maurina teni i vono. ¹¹ Aulu hin haratu, fa avulahi tavera hin God hin nofa Moli Iesu Kristo, ale hinia, nake fa lavi na nona sari tamata, fa mai fa tapalana.

Mateia Mo Mai Matan Adam

¹² Ale matana, sohena hehe mo mai na varama na tamlohi matea purongo, ale mateia mo mai mata hehe, ale sohena, mateia mo tikeli na tamlohi tari matan enira mo isoiso la vai na hehe, ¹³ matan hehe mo lo toho na varama moiso God mo pa sile na leu, ale mo sopo te hehe vara i sopo te leu hatea i pisuhia. ¹⁴ Hina purongo matana, mateia mo lo aulu na tamlohi mo tapulo hin Adam mo tikeli Moses, hina purongo vara la sopo vai na hehe sohena hehe non Adam, mateia mo lo aulu hinira. Ale Adam enia tovongi matea hin harasei mo lo mai hitahu.

Mauri Tui Mo Mai Matan Iesu

¹⁵ Pani hehe non Adam mo sopo sohen romfuhu sei God mo sile purongoia, matan hehe nona tamlohi matea purongo, mateia mo vano isana tamlohi matuvana, pani hin na tamlohi tinapua matea, Iesu Kristo, God mo sile purongoia na otori ruhu mata romfuhu mo masurere isana tamlohi matuvana. ¹⁶ Ale otori ruhu sei God mo sile purongoia, mo sopo sohena vua hehe non tamlohi atu, matan vua ariamata hehe atu enia matea purongo, mo lavi na talai mo mai, pani otori ruhu sei God mo sile purongoia, mo mai hitahun na hehe matuvana, mo roi na malele vara God i eri vere vara tamlohi la mai tataholo na nahona. ¹⁷ Varaŕuhu, mateia mo aulu na tamlohi tari matan hehe atu matea non tamlohi atu matea purongo, pani la haratu la lo lavi romfuhu sei mo maŕivi savulevule peresi na otori sei God mo sile purongoia mata i vai na tamlohi la tataholo na nahona, enira natu, maurira la pa aulu na mauri nake

ale hitahu hin tamlohi atu matea, enia Iesu Kristo.

¹⁸ Ale matana, sohena hehe nona tamlohi matea purongo mo vai na talai mo mai isana tamlohi tari, ale vavahinau tataholo matea purongo, mo vai na malele vara God i vereva vara tamlohi la tataholo na nahona, ale matan vara i eri sile na mauri isana tamlohi tari. ¹⁹ Ale sohena lejileji nona tamlohi matea purongo mo vai na tamlohi matuvana la hehe, ale mo sohena ooloo nona tamlohi matea purongo mo vai na tamlohi matuvana la tataholo na nahon God. ²⁰ Ale nakerihi natu, leu mo mai vara i vai na hehe i memera i ruhu, pani vara hehe mo mai mo mele tavera, romfuhu natu, mo mai mo mele marivi savulevule jea, ²¹ matan vara sohena mateia mo vujangi na suiha nona hehe, romfuhu i pa eri vujangi na nona suiha hin malele sei God mo vai na tamlohi la tataholo na nahona hinia, ale vuana, enia mauri tui hin Iesu Kristo nofa Moli.

6

Suihan Hehe Mo Moli

¹ Ale nake fa pa vere na sava vara mo sohena? Mo tataholo vara fa lo vai na hehe i lo vano matan vara romfuhu i pa lo marivi savulevule matana, teni mo vono? ² Mo vono! I pa sohena sava natu vara enfa sei fa mate na hehe moiso, fa lo toho hinia? ³ Teni ka sopo levosahia vara enfa sei fa lavi na paptijo hin Kristo Iesu, fa paptijo hin na nona mateia? ⁴ God mo tavunifa peresi Iesu na nona mateia na rani fa paptijo hinia, matan vara enfa sohena, fa eri hahau na mauri paro sohen Kristo sei mo turu na mateia na mauri paro na suihan God Tama.

⁵ Matan, vara enfa fa sofofotahi peresia na nofa mate sohen na nona mate, fa levosahia vara fa pa sofofotahi peresia na sauteterahi sohen na nona sauteterahi. ⁶ Ra levosahia vara nofa mauri tuai mo mate peresia na talopeilopei matan vara i tope na suihan hehe na maurifa, matan vara fa pa sopo mele slev isan hehe. ⁷ Matan haratu mo mate moiso, mo pete materi moiso na hehe. ⁸ Ale vara fa mate peresi Kristo, fa rasua vara fa pa mauri peresia. ⁹ Ra levosahia vara God mo sauteterahi Kristo na mateia moiso, ale i pa sopo eri mele mate; mate mo sopo te suihana vara i eri aulu hinia. ¹⁰ Matan mateia atu mo mate hinia, mo mate vara i jeu na hehe, vahatea mata rani tari, pani mauri atu mo mauri hinia nake, mo mauri matan God. ¹¹ Ale kamim sohena ha levosahia vara kamim sohena ka mate isan hehe, ale ka mauri matan God hin Kristo Iesu.

¹² Matan haratu, ha sopo tinafihia vara hehe i aulu na epemim nike na varama, vara i vai kamim ha ooloo na masalora.

¹³ Ha sopo tinafihia vara te epemim la mai volitusi na hehe mata posposi mo sopo tataholo na nahon God, pani ha sile kamim isan God sohen la haratu sei God mo vaira la malue na mateia la mauri, ale ha sile na epemim isan God sohena volitusi mata posposi tataholo na nahon God. ¹⁴ Matan hehe i sopo eri te suihana vara i aulu hin kamim, matan kamim ka sopo toho na ruhuruhu leu, pani ka lo toho na ruhuruhu romfuhu.

Ra Eri Ooloo Hin God

¹⁵ I pa sohena sava natu? Matan romfuhu non God mo vaifa fa materi moiso, mo tataholo vara fa hahau na hehe matan nake fa sopo toho na ruhuruhu leu teni mo vono? Mo vono! ¹⁶ Ka levosahia vara, vara ka sile kamim isan tea sohena slev matea, ha pa ooloo hinia ale ka slev isan haratu sei ka lo ooloo hinia. Vara ka slev na hehe, vuana enia mateia, vara ka slev mata ooloo hin God, vuana enia posposi tataholo na nahona. ¹⁷ Pani fa vere meje isan God matamim sei tuai ka lo slev non hehe, pani nake ka mai ka ooloo na mapumim na vujangi tataholo sei la silea isamim moiso, ¹⁸ ale nake, ka materi na hehe, ale ka mai slev non posposi atu mo tataholo na nahon God.

¹⁹ Na lo vere na tovongi na slev sohena matan vara i tueni na nomim lelevosahi. Matan sohen tiroma ka lo sile na epemim sohena slev mata hina lumiha teni vaivaileu sei vuana mo mele vaivaileu jea, ale nake ha sile na epemim sohena slev isan posposi sei mo tataholo na nahon God sei vuana mo lo vai kamim vara ha tapu na maurimim.

²⁰ Na rani ka pa lo slev non hehe, ka sopo romfomi na posposi sei mo tataholo na nahon God. ²¹ Pani vuana enia sava? Vuana mo sopo ruhu matan nake ka lo mahahanu matan la hinia sei ka lo vaira tiroma, matan isoison la hinia sei, enia mate. ²² Pani matan nake ka materi moiso na hehe, ale ka mai slev non God, vua ka lavia matana mo vai kamim vara ha pa tapu na maurimim, ale isoisona, enia mauri tui. ²³ Matan voli hehe enia mateia, pani otori non God sei mo lo sile purongoia, enia mauri tui hin Kristo Iesu nofa Moli.

7

Leu Mo Sopo Mele Aulu Hiniifa

¹ Teni, ka levosahia la vorai peresi na vevorai vara, vara leu mo lo suiha purongo vara tamlohi mo lo mauri? Na lo retireti isan la haratu la levosahi na leu. ² Mo sohena hafai lahi matea, leu mo lo tauria vara tuana mo lo mauri, pani vara tuana mo mate, hafai atu mo materi na leu mata

lahi. ³ Ale vara tuana mo lo mauri, pani mo mele juruvi peresi na tamlohi tinapua, la pa vereea vara enia hafai vaivaileu matea. Pani vara tuana mo mate, hafai atu i pa materi na leu, vara i vano isana tamlohi tinapua matea, enia mo sopo hafai vaivaileu.

⁴ Mo sohena natu, la voraiku peresi na vevoraiku, kamim sohena, ka mate na leu peresi Kristo matan vara ha pa mai tamlohi non tinapua, haratu non Kristo sei God mo sauteterahia na mateia matan vara fa efi vua ruhu isan God. ⁵ Matan tiroma fa lo usuri na masalo varama, leu mo lo rohahi na masalo fa sei mo lo vua hehe, ale vuana enia mateia. ⁶ Pani nake fa materi na leu, matan fa mate peresi Kristo moiso, ale fa sopo mele toho na ruhuruhi suiha leu, matan vara fa eri volitusi isan God, mo sopo na malele mata oloolo na retileu la ulia tuai, pani na malele paro, hin mauri atu Tanumena mo lo silea.

Leu Non God Mo Vujangi Na Hehe

⁷ Ra pa vereea sohena sava natu? Ra pa vereea vara leu enia hehe teni mo vono? Mo vono! Pani vara leu i sopo lo mai a pa sopo eri levosahi na hehe. A pa sopo eri levosahia vara fomusuri enia sava, vara leu mo sopo vereea vara, 'O sopo fomusuri'. *Exo 20.17; Deut 5.21*

⁸ Pani hehe mo lavi na masapa hin retileu atu, mo vaiua na vua na fomusuri tinatnapua matuvana. Vara leu i sopo lo toho, hehe i pa sopo mauri. ⁹ Tiroma na lo toho hin mauri atu na sopo levosahi na leu hinia, pani na rani leu mo pala mo pisuhi na hehe ale mo mera purongo vara hehe mo lo mauri hinia, ¹⁰ ale mo tauau na ruhuruhi talai mata mate. Matan na vileia vara retileu atu sei mo lo retitauhi na mauri mo sopo silea, pani mo sile na mateia isaku. ¹¹ Matan hehe mo lavi na masapa matea na retileu, hehe mo halhaluau, ale retileu atu mo viliau, ¹² hina purongo vara fa levosahia vara leu tari la tapu, ale retileu enia mo tapu mo tataholo ale mo ruhu.

¹³ Ale ka hitea vara mo tataholo vara leu sei mo ruhu mo sile na mateia isaku? Mo vono! Hehe mo tauau na malele mata mate usuri na sava retileu sei mo ruhu mo vujangiau, matan vara hehe i pa pala hehe vara ruhu, ale hin retileu sei, hehe mo pala mo sasati jea.

Suiha Hehe Na Maurifa

¹⁴ Matan fa levosahia vara leu enia mata i vujangi mauri atu God mo opoia, pani enau na lo toho hin mauri atu nona tamlohi sei mo lo toho na ruhuruhi suihan hehe. ¹⁵ Na sopo levosahia mata sava na lo vai na hinau na lo vaia. Matan na sopo vai na sava na opoia, pani na lo vai pa hinau sei na lo rohu vara a vaia. ¹⁶ Na levosahi mamahunia vara

sava hinau na lo vaia mo sopo tataholo, enia mo vujangia vara na lo majinga vara leu enia mo ruhu. ¹⁷ Pani nake, mo sopo enau sei na lo vaia, pani hehe sei mo lo toho isaku.

¹⁸ Matan na levosahia vara mo sopo te hinau ruhu na loloku, na lo vere na masalo varama na loloku. Matan na opoia vara a vai na hinau mo tataholo, pani na sopo eri vaia. ¹⁹ Matan na sopo vai na sava hinau ruhu na opoia, pani terea na lo vai na hina sasati sei na sopo opoia. ²⁰ Ale, pani vara enau na lo vai na hinau na sopo opoia, enia mo sopo enau sei na lo vaia, pani hehe na loloku.

²¹ Ale na mauri na hitea vara na opoia vara a vai na hina tataholo, sasati mo lo kilau rofoiau. ²² Matan na loloku, enau na avulahi mo tavera jea na leu non God, ²³ pani na hite na leu tinapua matea mo lo voko na epeku, mo lo valum peresi na leu mata fomiku, mo opoia vara a lo toho na ruhuruhi suiha leu mata hehe na epeku.

²⁴ Enau tamlohi sasati matea! Hare i pa efi juriau na epeku sei mo tauau na ruhuruhi talai matan mateia nika? ²⁵ Pani fa vere meje isan God hin Iesu Kristo nofa Moli matan malele mo roi! Ale nake, enau na lo volitusi isan leu non God na fomiku, pani na loloku, na lo volitusi isana leu mata hehe.

8

Mauri Atu Tanumen God Mo Lo Silea

¹ Ale matan sava God mo vaia hin Kristo Iesu, nake natu, mo sopo te talai non la haratu sei la lo toho hin Kristo Iesu. ² Matan suiha non Tanume mata mauri hin Kristo Iesu mo teriho na suiha mata hehe peresi na mateia. ³ Matan leu mo sopo te suihana vara i efi posi na masalo varama na loloku, pani God mo vaia hin Natuna sei mo fulea mo mai vara i tamlohi, matan vara i mai sohena malamalai mata hehe, pani mo sopo te hehe hinia, ale hinia, God mo komo na suihan hehe sei mo lo aulu hinifa, ⁴ matan vara sava hinau tataholo sei leu mo lo vereea la pa toho na maurifa sei fa sopo mele hahau usuri na masalo varama, pani fa lo hahau usuri na Tanume Tapu.

⁵ Matan la haratu la lo usuri na masalo varama, la lo tau na fomira na hinau mata masalon mauri atu, pani la haratu la lo usuri na Tanume Tapu na maurifa, la lo tau na fomira na hinau non Tanume Tapu. ⁶ Matan vua fomfomi mata masalo varama, enia mateia, pani vua fomfomi mata Tanume Tapu enia mata mauri peresi na tamata. ⁷ Matan fomfomi atu mo lo usuri na masalo varama, enia meresahi isan God, matan enia mo sopo oloolo na leu non God, matan i pa sopo efi oloolo hinia. ⁸ La haratu

la lo usuri na masalo varama, la pa sopo efi vai na sava God mo avulahi hinia.

⁹ Pani kamim sei, ka sopo toho na ruhu-ruhu suihan masalo varama, matan ka lo toho na ruhuruhi suihan Tanume Tapu, varafuhu vara Tanumen God mo lo toho isamim. Vara tea mo sopo lavi na Tanumen Kristo, enia mo sopo nona. ¹⁰ Pani vara Kristo mo lo toho hin kamim, hina purongo vara epemim la pa mate mata hehe, Tanumena mo sile kamim na mauri matan mo vai kamim ka tataholo na nahona. ¹¹ Vara Tanumen haratu sei mo lo sauteterahi Iesu na mateia mo lo toho hin kamim, haratu mo sauteterahi Kristo Iesu na mateia i pa sile na mauri na epemim na Tanumena sei mo lo toho hin kamim.

¹² Matan haratu, la vorai peresi na vevorai enfa tamlohi ave, pani mo sopo isana masalo varama, fa sopo usuri na masalon mauri atu. ¹³ Matan, vara ha lo usuri na masalo varama, ha pa mate, pani vara hin Tanume Tapu ka lo tau nafihi na vavahinau sasati nona epemim, ha pa mauri. ¹⁴ Matan tamlohi tari sei Tanume Tapu mo lo tiroma hinira, enira natun God.

¹⁵ Matan ka sopo lavi na Tanumena vara ha lo sohena slev sei la lo juhajuha mata matahu, pani ka lavi na Tanumena vara i korohi kamim sohena natuna, ale hinia, fa lo ulo vara, 'Tata, Tamaku!' ¹⁶ Tanume Tapu hasena mo lo vujangi mamahuni na mapu fa hinia mara enfa fa natun God, ¹⁷ ale vara enfa fa natuna, enfa fa pa lavi na hinia God mo silea isan Natuna Kristo, vara fa lavi na rani rilangi peresia matan vara fa pa efi lavi na hija aulu peresia.

Mauri Pongi Hitahu

¹⁸ Matan enau na levosahia vara rani rilangi mata mauri nake, enira hina purongo na hina hasohaso fuhufuhu sei God i pa vujangia isa fa. ¹⁹ Matan hinai tari God mo vaira la lo sasaovi vara la hite rani atu natun God la pa pala hinia. ²⁰ Matan God mo tau na lesati isana hinai tari na varama tuai tuai jea, mo sopo matan la opoia vara la sohena, pani matan God mo taura sohena, ale la lo kilau matan rani atu, ²¹ hinai tari na varama peresi na natun God la pa lavi materi sei mo fuhufuhu jea. La pa malue hin mauri atu mata mate peresi na mauri mata rovo. ²² Matan fa levosahia vara hinai tari God mo vaira, la lo ngutu na rongohaji mata vasusu mo tikeli nake. ²³ Ale mo sopo hinai God mo vaira purongo, pani enfa sohena sei fa lavi na tiroma asitauni isan Tanume Tapu, fa lo ngutu na lolo fa, fa lo saovi matan rani atu sei fa pa mai sohena natuna tataholo, ale fa lavi

na epefa paro. ²⁴ Matan hin romtoho sei, God mo jurifa. Vara fa lo hite na sava fa lo romtoho hinia, mo sopo romtoho varafuhu natu. Matan hare mo lo romtoho na hinai mo efi hitea? ²⁵ Pani vara fa lo romtoho na hinai fa sopo hitea, fa pa lo kilau matana na nofa romperavu.

²⁶ Mo sohena natu, Tanume Tapu mo lo tuenira na nofa vejuveju, matan fa sopo levosahia vara fa pa ususi mata sava hinai sohen God mo opoia, pani Tanume Tapu hasena mo lo ususi nofa na malele matea mo sopo te reti vara i efi vere na raramina. ²⁷ Pani haratu sei mo levosahi na mapu tari, mo levosahi na sava mo lo toho na romin Tanume Tapu, matan Tanume Tapu mo lo ususi nona tapuhi usuri na masalon God. ²⁸ Ale fa levosahia vara la haratu la opoi God, hinai tari la voko jara matea mata ruhu non la haratu God mo tovira usuri na nona romromi tavera. ²⁹ Matan la haratu mo vifonira tiroma, mo pete tapuhira moiso vara la pa mai sohen Natuna, matan vara enia i pa vora tiroma na vorai matuvana. ³⁰ Ale la haratu mo pete tapuhira moiso, mo tovira, ale la haratu mo tovira, mo vaira la tataholo na nahona, ale la haratu mo vaira la tataholo na nahona, mo tahera aulu na hasohasona.

Opoia Non God

³¹ Ra pa vere sohena sava natu? Vara God enia nofa, hare i pa efi komo fa? ³² Vara God mo sopo horo Natuna tataholo, pani mo silea matafa enfa mo isoiso, sohena sava natu, God sei mo sile Kristo isa fa i pa sopo efi sile na hinai tari isa fa?

³³ Hare i efi pisuhi na vifoni non God matan te hinai? God natu, mo vaira la tataholo na nahona. ³⁴ Hare natu i pa vere vara i pa efi sile na talai isa fa? * Kristo Iesu enia haratu mo mate, aulu hin haratu, enia mo turu na mateia, ale mo lo toho na suiha na matuan God, ale enia natu mo lo ususi nofa. ³⁵ Hare i pa asefa na opoia non Kristo? Rani rilangi, teni rani sasati, teni tipahi, teni mafua, teni malamala, teni hinai mo efi komo na mauri, teni vuro? ³⁶ Varafuhu la uli la hinai sei moiso na Retiulia vara, 'Matam, mateia mo lo toho na nahomam tarea, ale la hite kamam sohen natu sipsip sei la pa vilimateira'. *Psa 44.22*

³⁷ Mo vono, hina purongo hin la hinai tari sei matan fa efi jurera hin Kristo sei mo opoia. ³⁸ Matan na levosahi mamahunia vara fa mate teni fa lo mauri, teni angelo, teni tamlohi aulu, teni hinai nake la lo toho, teni hinai la pa mai, teni haratu la rilangi, ³⁹ teni te hinai aulu na masapa teni na puaha atano na lolo tasi teni varama, teni

* **8:34:** sile na talai: tamlohi teni Tiapolo la pa vaihitea pani God mo sile na talai isan Kristo matafa.

te hinau tinapua na varama, i pa sopo efi aseŕa na opoia non God hin Kristo Iesu nofa Moli.

9

Tapuhi Non God Hin Israel

¹ Na lo vere na retivaraŕuhu na hijan Kristo, na sopo halu; ŕomiku mo levosahia vara Tanume Tapu mo levosahia ² vara ŕomiku mo jovi tavera, ale mapuku mo tangi, ³ vara te malele vara voraiku sei tahisaku Israel, la efi juri hini, a pa hase tai naŕihiau hin Kristo, a mai hina lesati mata malelera. ⁴ Enira la tavitavuun Israel, ale enira korohi non God, mo vujangi na nona matamata tavera isara la ruhufuhu jea, peresi na nona retitauhi isara tuai, la lavi na nona leu, la lavi na posposi mata lotua, ale nona retitauhi mata jurira. ⁵ Ale pira tuai enira tamlohi aulu non God, ale Kristo vara ŕa usuri na malele tamlohi, enia mo tai isara, enia God sei mo aulu na hinau tari, ale i pa lavi na hasohaso tarea tui tui, amen.

⁶ Pani mo sopo sohena vara God mo ŕomaliho na nona retitauhi isan tavitavuun Israel, matan mo sopo tamlohi tari sei la tai isan Israel la tavitavuun Israel, ⁷ ale mo sopo vara enira mo isoiso natun Abraham vara enira tania, pani matan la ulia vara, ‘Taniam la pa lavi na hijam hin Isaac’. *Gen 21.12*

⁸ Enia mo ŕaramia vara na nahon God mo sopo tania tari la tai isan Abraham la natun God, pani natuna tari na nona retitauhi, enira mahapin Abraham. ⁹ Matan retitauhi mo vere sohen harihi mara, ‘Sohen harakerihi tavul tauni a pa mele mai, ale Sarah i pa vasusui na lamane matea’. *Gen 18.10, 14*

¹⁰ Mo sopo haratu purongo, pani Rebecca sohena mara mo vasusui na havo isan tamlohi matea purongo piŕa Isaac, ¹¹ pani tiroma la pa vora, teni tiroma la pa vai te hinau mo fuhu teni mo sati, matan vara ŕomŕomi non God mata viŕoni na nona tamlohi i pa turu, ¹² mo sopo mata nora vavahinau, pani matan God mo tovia, mo vere isan Rebecca mara, ‘Vora tiroma i pa volitusi isan vora hitahu’. *Gen 25.23*

¹³ Sohen la ulia vara God mo vere mara, ‘Na opoi Jacob, pani na ŕohu hin Esau’. *Mal 1.2-3*

¹⁴ Vara sohena, ŕa pa vere na sava? God mo tametame tea teni mo vono? Mo vono!

¹⁵ Matan God mo vere isan Moses mara, ‘A pa ŕomŕuhu hin haratu sei na ŕomŕuhu hini, a pa ŕomopoi hin haratu sei na ŕomopoa.’ *Exo 33.19*

¹⁶ Matan haratu, mo sopo turu na masalon te tamlohi teni te nona vavahinau, pani mo turu hin God sei mo lo ŕomopoi.

¹⁷ Matan na Retitapu God mo vere isan Pharaoh mara, ‘Na taheho sahe aulu matan hinau akerihi natu, vara a pa efi vuhesi na suiaku hiniho, ale matan vara tamlohi la pa hasohaso na hijaku na jara tari na varama’. *Exo 9.16*

¹⁸ Ale matan haratu mo vujangia vara God mo lo ŕomopoi na sava tamlohi enia mo opoia, ale enia mo lo pelati na mapun hare enia mo opoia.

¹⁹ Korong tea i pa vere isaku vara, ‘Avei, vara God mo vai na masalona sohena, mata sava natu mo pa lo hite na hehe? Matan hare natu, i pa efi horo na masalona?’

²⁰ Pani engko sava tamlohi natu, vara o pa efi reti isan God sohena? ‘Mo tataholo vara hinau sei God mo vaia, i efi vere isan God sei mo vaia vara, ‘Mata sava ko vaiau sohen harihi?’’ *Isa 29.16; 45.9* ²¹ Teni vara tamlohi sei mo lo vai na jilivi na lepa, ko hitea vara mo sopo tataholo vara i vai na jilivi i rua na voŕoli lepa matea vara matea mata jara lakolako, ale matea mata jara utauta?

²² Ko hitea mo tataholo vara God mo opoia vara i lo ŕomperavu tako hin la haratu mo viŕonira mata komo moiso, matan vara i efi vujangi na nona talai lolokoru mata hehe peresi na suihana isana tamlohi, ²³ matan vara i efi vujangia vara ruhufuhuna mo ruhufuhu jea sohena sava isan la haratu sei i pa ŕomopoi, enira sei mo viŕonira moiso mata lavi na ruhufuhuna, ²⁴ enŕa sohena, enia mo toviŕa, pani mo sopo toviŕa isana Jew purongo, pani isana tamlohi ŕoŕoha sohena.

²⁵ Sohen God mo vere na Retiulia non Hosea mara,

‘La haratu sei la sopo noku tamlohi, nake a pa toviŕa “noku tamlohi” ale a pa opoi haŕai sei mo sopo tea i opoia.’ *Hos 2.23*

²⁶ Ale,

‘Tiroma mo vere isara mara, “Ka sopo noku tamlohi”, pani nake i pa vere vara, “Kamim ka natun God sei mo mauri”.’ *Hos 1.10*

²⁷ Ale Isaiah mo lo ulo aulu matan Israel mara,

‘Hina purongo vara evi natun Israel la sohena oneone vavarahi na tasi, tupu visalete purongo la pa juri.

²⁸ Matan Moli i pa sile vevuhi na nona talai i vila, ŕomina i pa sopo rua hini.’ *Isa 10.22-23*

²⁹ Ale sohen Isaiah mo vere tiroma moiso mara, ‘Vara Moli Suiha Tavera Jea na tuka

i sopo lo tināhīhia vara te mahapimam la mauri,
korong kama pa tihai sohen Sodom peresi Gomorrhah moiso.’

Isa 1.9

Israel La Sopo Rasu God

³⁰ Ra pa vereā sohenā sava natu? Ra pa efi vereā vara haratu la tamlohi rofoha la mai la tataholo na nahon God pani mo sopo matan la lo tutunguia pani matan la rasu God, ³¹ pani Israel sei la lo tutungui na leu vara i pa vaira la tataholo na nahon God, pani la sopo efi vai vevuhi leu atu. ³² La sopo efi vaia mata sava? Matan la sopo tutunguia na malele rasua, pani la hitea vara la pa vaia na nora vavahināu. La tialahalaha hin vatu atu mata tialahalaha, ³³ sohenā la ulia vara,

‘Ka hitea? Na lo tau na vatu matea hin Zion mata tialahalaha,*

ale na tau na vatu matea
matan i pa vaira la jovi,

pani haratu mo tau na nona rasua hinia, i pa sopo tea i eri vaia i mahānuhanu.’ *Isa 8.14; 28.16*

10

God Mo Juri Na Tamlohi Mata Rasua

¹ La vorāiku peresi na vevoraiku, noku usiisi isan God peresi na opoia na mapuku mata tavtavuiku Israel, enia vara la pa juri. ² Na lo vereulia matara, vara la lo fomjea hin God, pani la sopo usuria na malele mata lelevosahi. ³ Matan, la sopo rongovosahi na malele sei God mo taua vara tamlohi la pa mai la tataholo na nahona hinia, ale la lo ale na malelera purongo sei vara la pa tataholo na nahon God hinia, la rohu vara la usuri malele atu God mo lo vai na tamlohi la mai la tataholo na nahona hinia. ⁴ Matan hin Křisto mo vai vevuhi na leu, matan hinia, tamlohi tari sei la rasua la mai la tataholo na nahon God.

Israel La Jalio Na Malele

⁵ Matan Moses mo ulia mara te tamlohi mo opoia vara i mai i tataholo na nahona na malele mata leu, enia i pa usuri vevuhi na nona retileu na maurina. *Lev 18.5*

⁶ Pani vujangi atu mo vujangia vara tamlohi la mai la tataholo na nahon God na rasua mo vereā mara, ‘O sopo vereā na mapum vara, “Hare natu i pa sahe na tuka?”’

Deut 30.12
vara i tapai Křisto, ale i lavia i sinai vara i vujangiho. ⁷ Ale vujangi atu mo vereā mara, ‘Hare natu i pa sivo hin koko tavera jea atu sei mo sivo atano jea na lolo varama mata matea?’ *Deut 30.13* vara i lavi Křisto

i mele mauri na mate. ⁸ Malele mata juri mo mai mata rasua hin Křisto, enia natu, Retiřuhu sei kama lo retivujavujangia, mo mariviti isam purongo, pani mo lo vere na sava? ‘Retisohai sei mo mariviti, mo lo toho na hufurivim, ale mo lo toho na mapum’.

Deut 30.14

⁹ Matan, vara o taviti na jingom vara Iesu enia Moli, ale o rasua na mapum vara God mo sauteterahia na mateia, o pa juri. ¹⁰ Matan rasua na mapum purongo, enia natu, mo vaiho ko tataholo na nahon God, ale ko pa juri matan ko taviti na jingom. ¹¹ Matan Retitapu mo vereā mara, ‘Tamlohi tari sei la tau na nora rasua hinia, i pa sopo tea i vaira la mahānuhanu’.

Isa 28.16

¹² Ale nake God mo sopo mele vereā vara Jew teni mara Greek matan enia Moli matelete nora Moli enira mo isoiso, enia mo sile na nona ruhuřuhuna isana tamlohi tari sei la lo kilau isana. ¹³ Matan Retiulia mo vara, ‘Tamlohi tari sei la tovi na hijan Moli God la pa juri’.

Joel 2.32

¹⁴ Sohenā sava natu, la haratu la sopo lo rasua la pa efi tovia? Ale sohenā sava natu, la pa tau na nora rasua hinia matan la sopo lo levosahia? Ale la pa rongoa sohenā sava vara tea i sopo retivujavujangi isara? ¹⁵ Ale sohenā sava natu la pa retivujavujangi isara vara tea mo sopo řulera? Mo sohen la ulia vara, ‘Rani řuhu mata avulahi matan la haratu la lo retivujavujangi na Retiřuhu la pala!’

Isa 52.7; Nah 1.15

¹⁶ Pani mo sopo tamlohi tari la rasu na Retiřuhu, sohen İsaiah mo vereā mara, ‘Moli, hare mo rasu na sava mo rongoa isamam?’

Isa 53.1

¹⁷ Ale haratu mo vujangia vara rasua mo vora na sava la rongoa, ale sava la rongoa mo mai na retivujavujangi na reti non Křisto.

¹⁸ Pani na lo usia vara korong, Jew la sopo lo rongoa? Mo vono, la rongoa, matan Retiulia mo vereā vara,

‘Leora mo vano na jara tari na varama,

nora reti la vano na jara mo isoiso na varama.’

Psa 19.4

¹⁹ Pani na mele usia vara, korong Israel mo sopo levosahia? Matan na rani non Moses, God mo vereā mara,

‘A pa vai kamim ha mereimerei

na mara jara tinatinapua,

a pa vai kamim ha lolokoru

na tamlohi rofoha mara jara tinatina-

pua.’

Deut

32.21

²⁰ Ale hitahu İsaiah mo fomřilangi vara i vereā vara,

‘La haratu la sopo aleau la hiteau.

* 9:33: Zion: Zion enia Jerusalem.

Na hase vuhesiau isan la haratu
la sopo usia isaku.' *Isa 65.1*

²¹ Pani isan Israel God mo vereea mara,
'Tarea na roi na limaku matara,
pani tarea la sopo ololo hiniau,
ale la lo lejiau.' *Isa 65.2*

11

God Mo Tipahi Israel Teni?

¹ Ale na lo usia nara, korong God mo tipahi na nona tamlohi teni mo vono? Mo vono! Matan enau sohena matea na vora Israel, mahapin Abraham, tadvavuin Benjamin.

² Mo vono, God mo sopo tipahi na nona tamlohi sei mo levosahira tiroma moiso. Ka lo romfomi na sava Retitapu mo vereea matan Elijah sohena sava mo usia rilangi isan God mata sopo nona tadvavuin Israel sei mara, ³ Moli, la vilimatei na nom p'rovet, la viliroiroi na nom votavota, enau haseku na pa lo toho, ale la lo aleau vara la vilimateiau'.

1 Kings 19.10, 14

⁴ Pani God hasena mo faramia isana sohena sava? Enia mara, 'Enau na tapuhi nafihi na tamlohi mo tari vaha limaravrua (7000) moiso sei la sopo popovitoho isan Baal'.

1 Kings 19.18

⁵ Mo sohena nake, tupu visaletete purongo God mo vihonira na nona romfuhu. ⁶ Ale vara mo usuri na nona romfuhu, mo sopo matan te vavahinau, vara i vono, romfuhu atu i pa sopo romfuhu.

⁷ I pa sohena sava natu? Israel la jovi na sava la lo alea, la alea vara la mai la tataholo na nahon God. Tatuara God sei mo tapuhira la lavia, pani mo pelati na romin la haratu mo sopo tapuhira,

⁸ mo usuri na sava la ulia vara,
'God mo vai na romira la mate mo tikeli
nake,
mo pelati na matara,
ale la sopo hitevosahi,
mo pelati na perora,
ale la sopo rongovosahi.'

Deut 29.4; Isa 29.10

⁹ Ale David mo vereea mara,
'God o vai na hinau la opoira
sohena vuna teni tara matea,
la sohena hinau mata tialalaha isara,
hinau mata sile na talai isara.

¹⁰ O vai na matara la rofoha
matan vara la sopo hitevosahi,
ale o vai na harira
la hoho na hina puhoni la lo lavira.'

Psa 69.22-23

Matan Israel Romfuhu Non God Mo Mai

¹¹ Na lo usia vara korong, enira la tialalaha matan vara la pa jovi vevuhi? Mo vono! Pani matan na nora jovi, God mo juri

na tamlohi rofoha, mo vaia matan vara i vai Israel i mereimerei. ¹² Ale vara vua nora hehe matan la tipahi nora Jujuri mo vai na nona tadvav mo mai isana tamlohi tari, ale vara vua nora jovi enia tadvav nona tamlohi rofoha, ra sopo levosahia vara i pa mele ruhu jea sohena sava hin rani atu vara la mele pulutahi vevuhi isan God!

¹³ Na lo vere la hinau tari nike matamim ka tamlohi rofoha, God mo vihonira vara a vaha'rule isana tamlohi rofoha, na tahe na noku vavahinau isamim na nahora, ¹⁴ vara a hite te malele hatea vara a vai na Jew la opoi na sava kamim ka tamlohi rofoha ka lo lavia, ale hin malele atu a pa eri juri te tatuara. ¹⁵ Matan, vara vua nora tipahi enia God mo sari tamata mata tamlohi tari, i pa mele ruhu jea na varama sohena sava vara la mele hilu, korong i pa sohen la haratu la mele turu na mateia. ¹⁶ Vara sope silesilea atu mata flaua sei la lo silea isan God tiroma mo tapu, sope flaua tari la pa tapu, ale vara wari vipahai atu la pa tapu, rangarangana sohena la tapu.

Israel Enia Pulo Olive Atu God Mo Lavoa

¹⁷ Pani vara God mo tai nafihi na tatua rangarangan pulo olive atu, ale God mo so'otahi kamim olive urata, ka vano na livuhara, ale ka ulua na hanhani ruhu na pulon olive atu, ¹⁸ ha sopo haphahapa mata rangarangana. Pani vara ha haphahapa, ha lo romfomia vara kamim ka sopo tueni na warina, pani warina mo lo tueni kamim.

¹⁹ Ale vara ka lo vereea vara, 'La rangaranga atu God mo tai nafihira vara i vai na masapa matakau.' ²⁰ Vara'ruhu, mo vaia, pani ha lo romfomia, la rangarangana atu enira Jew, God mo tai nafihira matan la sopo rasua, ale kamim ka lo toho atu matan ka rasua. Ha sopo romaulu hin kamim, pani ha matahuni na sava i eri masese isamim. ²¹ Vara God i sopo romi na rangarangana tataholo matan la tipahi nora Jujuri, i pa sopo romi kamim.

²² Ha hitevosahia, vara posin God mo sohena sava, mo romfuhu ale mo rilangi jea. Mo rilangi jea isan la haratu la tipahi na nora Jujuri, pani mo romfuhu isamim, ale i pa romfuhu isamim vara ka lo tau na nomim rasu hinia, pani vara ka sopo mele tau na nomim rasua hinia, kamim sohena i pa tai narihi kamim. ²³ Ale vara Jew la posi mai la tau na nora rasua hinia, God i pa mele so'otahira vano na pulon olive atu, matan God i eri mele so'otahira.

²⁴ Matan, vara mo avulahi vara i lavi kamim olive urata purongo, ale i so'otahi kamim ha vano na pulo pulana olive ruhu, enia hina mafurahi matea, i pa mele malum isan God vara i mele tau na rangarangana

tataholo i mele soʻrotahia na jarana tataholo na pulon olive atu.

Jujuri I Pa Tai Jerusalem

²⁵ Matana, la voraikū peresi na vevo-raiku, na opoia vara ha levosahi hina luhu nike matan vara ha sopo ʻromaulu, God mo vai na mapun tatua tavitauin Israel la ʻrilangi i pa tikeli rani atu evi tamlohi ʻofoha la unu vevuhi. ²⁶ Ale vaon Israel tari la pa juri hin malele atu, sohen la ulia moiso vara,

ʻTamlohi Jujuri matea i pa tai Zion,*
ale i pa posi na tavitauin Israel
na nona posposi varama.

²⁷ Ale harihi enia noku retitauhi peresira, hin rani atu na lavi naʻihi na nora hehe.’ *Isa 59.20–21*

²⁸ Jew matuvana nake la meresahi na Retiʻuhu matamim, pani enira la pa lo toho viʻoni non God mata nona retitauhi isan Abraham, Isaac peresi Jacob. ²⁹ Matan sile-silea peresi na tovi non God la sopo eʻri jovi. ³⁰ Sohen tuai ka sopo oloolo hin God, pani nake ka lavi na nona ʻromopioia matan la sopo oloolo, ³¹ enira nake sohena, la sopo oloolo matan vara God i pa ʻromopoi kamim, pani enira sohena, la pa eʻri lavi na nona ʻromopioia. ³² Matan mo sohen God mo pelatihoro na tamlohi tari na nora hehe matan la sopo oloolo, matan vara nona ʻromopioia i eʻri toho isara isoiso.

Paul Mo Hasohaso God

³³ Hare natu i eʻri vereva vara nona lelevosahi peresi na sava mo levosahia la fuhufuhu sohena sava! Mo sopo tea i eʻri levosahi na sava mo hatihia moiso, ale mo sopo tea i eʻri hitevosahia vara sava mo lo vaira mo vaira sohena sava.

³⁴ Matan hare i eʻri levosahia vara God mo lo ʻromʻomi na sava? Hare mo tataholo vara i eʻri pisuhi na malele isana? *Isa 40.13*

³⁵ Teni hare natu, mo sile te hina silesilea isana matan vara i pa mele spaia? *Job 41.11*

³⁶ Matan God enia pulo hinai tari matan enia mo vaira, mo vaira la lo toho vara la pa sile na hasohaso isana. Mo tataholo vara tamlohi tari la sile na oloolo isana tarea mata rani tui tui. Amen.

12

Mauri Paro Peresi Kʻristo

¹ Matan la hinai sei God mo vaira moiso la vorai peresi na vevorai, na lo usia ʻrilangi vara ha sile na epemim isan God sohena hina malamalai matea mo mauri mo tapu isana, haratu God i pa avulahi hinia. Harihi enia nomim lotu tataholo vara ha lo vaia isana. ² Ha sopo hahau usuri na posposi non varama nike, pani ha tinarhia vara God i

posi kamim matan vara ha eʻri levosahi na malele paro mata ʻromʻomi, ale hin malele sei ha pa eʻri levosahia vara masalon God mo opoia vara ha pa vai na sava mo fuhu, ale mo tataholo, ale sava natu, mo vaia mo avulahi.

³ Matan usuri na ʻromʻuhu sei God mo silea isaku na lo vereva vara ha sopo hase ʻromaulu hin kamim i jeu na sava mo tataholo vara ha ʻromʻomia, pani ha hase ʻromvosahi kamim i usuri na silesilea mata rasu atu God mo lo silea isamim. ⁴ Sohen epeʻa sopesopena mo marivi, ale nora vavahinau la tinatinapua, ⁵ ale mo sohena na epen Kʻristo. Enʻa mo isoiso ʻa sopesope epena, pani epena enia matelete, ale enʻa hatehateahi noʻa vavahinau la tinatinapua vara ʻa vaia. Ale matan enʻa mo isoiso ʻa matea na epe hin Kʻristo, enʻa ʻa noʻa hatehateahi.

⁶ ʻRomʻuhu non God mo silea isaʻa mo vaiʻa ʻa eʻri vai na hinai hai, ale vara nom enia mata o retimangovi, o vereuli na sava ko rasua vara God mo lo vereva isam, ⁷ vara nom enia mata o tueni na tinapua, o tueni mamahunira, vara nom enia mata o vujangi, o vujangi i fuhu, ⁸ vara nom enia mata o retituetueni, o vaia, vara nom enia mata o silesile, o silea na avulahi, vara nom enia mata o tiroma na tamlohi, o vai mamahunia, vara nom enia mata o ʻromopoi hin te tinapua, o vaia na avulahi.

Posposi Tataholo Nona Mauri Kalesia

⁹ O sopo halu na nom opoia mata tinapua, pani o opoia varaʻuhu, ha ʻohu na sava mo hina sasati, ha turu na hinai mo fuhu. ¹⁰ Ha opoiopoi kamim na opoia varaʻuhu, ha lo kilau mata masapa vara ha sile na oloolo isana tinapua tiroma. ¹¹ Ha sopo malokovari, pani ha vaʻilefile na vavahinau non Moli.

¹² Ha avulahi matan hinai sei ka lo ʻromtoho hinia vara God i pa vaia isamim, ha ʻromperavu na rani ʻrilangi, ha lo ususi tarea. ¹³ Vara te tapuhi non God mo vejuveju hin te hinai, ha tuenira na nomim hinahinau, ale ha avulahi vara ha lavi na tamlohi na imamim.

¹⁴ Ha usi God vara i vaia i fuhu isan la haratu la lo tipahi kamim, ha leʻuhu hinira, ha sopo lesati hinira. ¹⁵ Ha avulahi peresi la haratu la avulahi, ha tangi peresi la haratu la rongo mo sati. ¹⁶ Ha ʻromʻomi na tinapua i tataholo hin kamim, ha sopo haruharu matan vara tamlohi aulu la pa tametame kamim, pani ha avulahi vara ha lo toho peresi na tamlohi purongo, ale ha sopo ʻromaulu hin te rani.

¹⁷ Ha sopo kelekele. Ha hahau na malele matea sei tamlohi tari la hitevosahia vara

* 11:26: Zion: Zion enia Jerusalem.

mo ūhu. ¹⁸ Vara ha efi vaia, ha mauri usuri na malele mata tamata peresi na tamlohi tari.

¹⁹ La tapala rufurufu, ha sopo kelekele hin te rani, pani ha sile na masapa isan God vara i efi sile na nona talai lolokoru mata hehe matan la ulia na Retiulia vara,

‘Enau a pa kelea,
enau a pa volira,
enau Moli na lo vere.’ *Deut 32.35*

²⁰ Ha vaia sohen harihi:

‘Vara nom meresahi mo marohati,
o vahania,
vara mo maŕohu,
o sile te wai isana,
ale matana, i pa mahanuhanu
mata sava mo vaia isam.’

Prov 25.21–22

²¹ Ha sopo tinaŕihi na hehe vara i jeu kamim, pani ha jeu na hehe na vavahinau ruhu.

13

Ha Oloolo Hin La Haratu La Lo Tauri Na Suiha

¹ Tamlohi rasua tari ha oloolo hin la haratu la lo tauri na suiha, matan mo sopo tea vara i lo toho na suiha vara God mo sopo tinaŕihira, ale la haratu la lo turu, la turu matan God mo turuhira. ² Matana, sava tamlohi mo leji la haratu God mo taura la tauri na suiha, la lo leji na sava God atu mo vaia, ale la pa lavi na nona talai. ³ Matan tamlohi aulu na jara, la sopo matan vara tamlohi la pa matahunira vara la lo vai na posposi tataholo, pani tamlohi sei la lo vai na sasati la pa matahunira. Vara o vai na hinau tataholo, la pa ūhu isam. ⁴ God mo tau la haratu la lo aulu matan vara la tueniho. Pani vara ko lo vai na hehe, o pa matahu, matan God mo taua na limara vara la pa sileho na nom talai. ⁵ Matana, mo tataholo vara o oloolo, mo sopo mata talai purongo, pani matan vara ŕomim i tataholo na nahon God.

⁶ Matan hinau sei, mo tataholo vara ha voli na nomim takis. Mania atu i pa tueni la haratu la lo tauri na suiha vara la vai voko atu God mo taua na limara. ⁷ Ha sile na sava ka ave hinia isara, ale ha voli na takis tinatinapua isan la haratu la lo toho vara ha pa volia isara, ha sile na oloolo isan la haratu mo tataholo vara la lavi na oloolo.

Opoia Mo Maŕivisi Na Leu

⁸ Ha sopo ave isan tea, pani ave atu enia vara ha pa volia tarea enia vara ha opoiopoi kamim, matan haratu mo opoi na tinapua mo lo maŕivisi na leu non God. ⁹ Na leu non God, retileu matuvana la lo toho sohen harihi: o sopo vaivaileu peresi na tinapua mo lahi moiso, o sopo vilimatei na tamlohi,

o sopo vavanaho, o sopo ŕomusuri, peresi te mele retileu tinapua la pisuhi na retileu matelete purongo sei mara, ‘O opoi na tinapua sohen ko lo hasem opoiho!’ *Lev 19.18*

¹⁰ Opoia mo sopo vai te hina sati isana tinapua, ale matana, opoia enia mo maŕivisi na leu.

¹¹ Varaŕuhu ha levosahia vara nake mo sopo rani mata juruvi ŕomalihu, matan rani mata juri mo vejuveju, mo mele mariviti mo jeu rani atu ŕa pa tau na noŕa rasua hinia tiroma sei. ¹² Pongi mariviti vara i isoiso, rani juri mariviti vara i pala, ale ŕa sopo toho na ŕoŕoha, ŕa pulahi na noŕa posposi sasati, ale ŕa ru na posposi tataholo sei mo tai isan God. ¹³ Ra hahau na posposi tataholo sohen ŕa lo hahau na malarani, mo sopo hin na matavuhi mata lavilavi na tinapua, peresi na putu mata wai, teni posposi viriu, teni ŕomŕomi na hina lumiha, teni vasvas teni mereimerei. ¹⁴ Pani ha ru Moli Iesu Kristo na maurimim, ha sopo sile na masapa vara ha vahani na maurimim na masalo varama.

14

Haratu La Sopo Rilangi Na Nora Rasua

¹ Ha lavi la haratu ŕomira la lo kaka vara sava natu mo tataholo na posposi rasua, ale ha sopo arera na hinau la rasua. ² Tamlohi hai la ŕomŕomia vara mo tataholo vara la hani na hinau tari, pani hai ŕomira la sopo rilangi sohera, la lo hani na pere pahai purongo. ³ Haratu mo hani na hinau tari i pa sopo hiteŕesi haratu mo tapuhoro te hanhani, ale haratu mo tapuhoro te hanhani, i pa sopo ari haratu mo lo hani na hinau tari, matan God mo lavia nona moiso. ⁴ Engko hare vara o efi ari na volitusi nona tinapua? Nona tamlohi tavera purongo i pa vere vara enia mo tataholo teni mo vono, ale i pa turu matan Moli i pa efi vaia i turu na rani aria.

⁵ Tamlohi hai la ŕomŕomia vara na nahon God rani matea mo mele tapu mo jeu na tinapua mata lotu God, pani tamlohi hai la hitea vara rani tari la sohesohera purongo. Mo tataholo vara tamlohi hatehateahi la hatihia vara sava mo tataholo na ŕomira. ⁶ Haratu mo sile na oloolo isana rani matea, mo vaia matan vara i sile na oloolo isan Moli. Haratu mo lo hani na hinau tari, mo sile na oloolo isan Moli na nona vere meje matana, ale haratu mo tapuhoro na hanhani, mo tapuhoroa matan vara i sile na oloolo isan Moli, ale mo vere meje isan God. ⁷ Matan mo sopo tea vara i mauri nona hasena, ale mo sopo tea vara i mate nona hasena. ⁸ Vara ŕa mauri, ŕa mauri non Moli, vara ŕa mate, ŕa mate ŕa sahe isan Moli, matan haratu, vara ŕa mauri teni fa mate,

enfa non Moli. ⁹ Matan harakerihi natu Kristo mo mate ale mo mele mauri, matan vara i eri Moli non la haratu la mate peresi la haratu la mauri.

¹⁰ Engko, mata sava ko ari na voraim, teni vara ko hiteresia? Matan enfa tari fa pa turu na nahon God mata aria, ¹¹ matan la ulia vara,

‘Moli mo vereea mara:

Matan enau na lo mauri,
tamlohi tari la pa popovitoiho isaku,
ale meme tari la pa taviti isan God.’

Isa 45.23

¹² Matan haratu mo mera purongo vara enfa tari fa pa turu na nahon God vara fa farami na nona aria mata nofa vavahinai. ¹³ Matan hinai atu, fa sopo mele sile na talai isara hatehateahi, pani i pa mele ruhu vara fa hatihia vara fa sopo mele vai te hinai vara i vai na vorai fa tinapua i tialalalaha teni i ori hinia.

¹⁴ Usuri na romfomi non Moli Iesu, na lo levosahia mo ruhu vara mo sopo te hanhahi mo lumiha vara fa sopo efi hania, pani enia mo lumiha isan haratu mo romromia vara mo lumiha. ¹⁵ Vara voraim romina mo lo sati na sava ko lo hania, ko sopo mele hahau na opoia. O sopo koma haratu Kristo mo mate matana, mata ham hinai purongo. ¹⁶ Ale matana, o sopo sile na masapa isan tea vara i jovi na hehe mata sava ko levosahia vara la pa retisasati hiniho matana, hina purongo vara ko levosahia vara mo tataholo.

¹⁷ Matan sava ko lo hania teni ko lo inua, la sopo aulu hin mauri atu God mo aulu hinia, pani posposi tataholo, tamata peresi avulahi atu la tai isan Tanume Tapu la aulu na mauri. ¹⁸ Hare sei, mo volitusi isan Kristo hin malele sei, God i pa avulahi hinia, ale tamlohi sohana la pa avulahi hinia. ¹⁹ Matan haratu, mo ruhu vara fa tutungui na sava i pa vai na tamata, ale na sava i pa tueni na tamlohi la ulua na nora rasua.

²⁰ O sopo koma na vavahinai non God mata hanhahi purongo, varafuhu hinai tari la vokevoke, pani mo sopo tataholo vara o hani te hinai vara i pa vai na tinapua i jovi matana. ²¹ I pa mele ruhu vara o sopo hani te mit teni o inu te wai rilangi vara i pa vai na voraim i jovi na nona rasua. ²² Nom rasua enia nom hasem peresi God. Haratu mo vai na hinai matan mo levosahia vara mo tataholo vara i vaia, i pa avulahi matan mo levosahia vara i pa sopo lavi na talai matana. ²³ Pani haratu mo sopo levosahi mamahunia vara sava mo lo hania mo tataholo na nahon God teni mo vono, enia i pa lavi na talai vara i hania matan mo sopo hania usuri na nona rasua, ale sava mo sopo vora na rasua enia hehe.

15

Ha Vai Na Tovongi Ruhu

¹ Enfa sei nofa rasua mo rilangi, mo tataholo vara fa tueni la haratu romira mo sopo rilangi, mo sopo tataholo vara fa hase kilaua purongo. ² Mo tataholo vara enfa hatehateahi fa vaia i ruhu isana tavitavui fa, fa tuenira la ulua na nora rasua, ³ matan Kristo mo vai na tovongi matea isara mo sopo hase kilaua purongo, pani sohen la ulia vara Kristo mo vereea isan God mara, ‘Na rani tamlohi la veresatiho, enau na rongo mo sati matana.’ *Psa 69.9*

⁴ Matan sava la ulia tuai la ulia matan vara i pa vujangira, la lo silefa na romtoho, la tahe na romira na nofa saovi na romperavu mata Retitapu non God.

⁵ Ale nake na lo ususi vara God mata romperavu peresi na tuetueni, i tinarihia vara ha romfomi na tinapua i tataholo hin kamim sohen Kristo Iesu mo lo vaia, ⁶ matan vara kamim mo isoiso na leo matea, ha pa sile na hasohaso tavera isan God Taman nofa Moli Iesu Kristo.

⁷ Matana, ha avulahi hin kamim hatehateahi sohen Kristo mo avulahi hin kamim matan vara God i lavi na hasohaso matana. ⁸ Ka levosahia vara Kristo mo sinai sohana volitusi isana Jew, vara i vujangia vara God mo sopo tope na nona reti mo retitauhi hinia isana tama Jew tuai, ⁹ ale matan vara tamlohi rofoha la pa hasohaso God mata nona romopoia sohen la ulia vara, ‘A pa hasohasoho isana tamlohi mara jara tinatinapua, a pa lalavete a tahe na hijam i aulu.’

Psa 18.49

¹⁰ Mo mele vereea na jara tinapua vara, ‘Kamim tamlohi rofoha!

Ha avulahi peresi na nona tamlohi,
tavitavuin Israel.’ *Deut 32.43*

¹¹ Ale mo mele vereea vara,

‘Kamim tamlohi sei ka tamlohi rofoha,
ha hasohaso Moli,
ale tamlohi tari
ha tahe na hijana i aulu.’ *Psa 117.1*

¹² Ale mele vahatea, Isaiah mara,

‘Mahapin Jesse matea i pa turu,
enia sei i pa aulu
na tamlohi rofoha,
ale enira la pa lo romtoho isana.’

Isa 11.10

¹³ Ale nake na lo ususi vara God sei mo lo sile na romtoho, i marivisi kamim na avulahi peresi na tamata na nomim rasua, matan vara na suihan Tanume Tapu nomim romtoho i pa marivi savulevule.

Paul Mo Verera Na Nona Vavahinai

¹⁴ Ale la vorai ku peresi na vevoraiku, na hase levosahia mo ruhu vara ka lo vai na posposi ruhu isana tinapua, matan ka pete

levosahi na sava God mo opoia moiso, ale ha pa efi vere tataholoia isamim hasemim. ¹⁵ Pani hin te hinau, na lo uliuli filangi isamim vara ha mele romromira, na vaia matan romruhu non God enia mo vironiau, ¹⁶ matan vara a volitusi non Kristo Iesu isana tamlohi rofoha, vara a lavi na Retiruhu non God isara sohena vavahinau nona pris matea matan vara haratu la tamlohi rofoha la efi tau na nora rasua hin Kristo, la mai sohena malamalai ruhu matea God mo avulahi hinia, ale matan vara i pa vaira la vokevoke na suiha Tanume Tapu. ¹⁷ Hin Kristo Iesu enau a efi hapahapa na noku vavahinau na vaia non God, ¹⁸ matan a pa sopo vere te hinau, pani sava Kristo mo vaia hiniau matan vara haratu la tamlohi rofoha la ooloo na Retiruhu na noku retireti peresi na noku vavahinau, ¹⁹ ale hiniau la ooloo mata suiha mata matamata peresi na hina marurahi tavera na suiha Tanumen God, matan vara i tapulo Jerusalem i falahi i tikeli Illyricum, enau na marivisi vevuhi na vavahinau mata Retiruhu non Kristo; ²⁰ ale na tau na romiku vara a retivujavujangi na Retiruhu, pani mo sopo na jara sei la pete rongo na hijan Kristo ea moiso, mo sopo ruhu vara a voro na jara nona tamlohi tinapua enia mo pete tapulo voro na vao kalesia tiroma ea moiso, ²¹ pani mo lo usuri na sava la ulia vara,

‘La haratu mo sopo tea la sorahia isara hin te rani, la pa hitevosahia, ale la haratu la sopo lo rongo na sorasorahina hin te rani, la pa rongovosahia.’ *Isa 52.15*

²² Vavahinau atu natu, mo horoau vaha visa moiso vara a mai isamim.

Paul Mara I Pa Sivo Jerusalem

²³ Pani nake, matan mo sopo te mele masapa vara a vavahinau hin la jara atu na lo vano hinira moiso, ale matan tuai moiso na opoia vara a pa mai isamim, ²⁴ na lo fomtoho vara na malele vara a sivo Spain a pa rohi kamim, na opoia vara a pa toho peresi kamim mata makomo rani, ale na rani vara a malue, ha pa tueniau na maleleku.

²⁵ Pani nake, na lo sivo Jerusalem, na lavi na silesilea mata mania vara i pa tueni na tapuhi non God atu. ²⁶ Matan tamlohin Macedonia peresi Achaia la avulahi vara la sile te silesilea matan vara i pa tueni na tapuhi tilavono Jerusalem. ²⁷ Enira la avulahi vara la tuenira, ale mo tataholo vara la vaia isara, matan haratu tamlohi rofoha sei la lavi na hina ruhufuhun Tanumen God mo silea, i pa tataholo vara la ase na nora silesilea mata mania isara Jerusalem. ²⁸ Hin rani atu vara a tau pa mania atu

isan la haratu Jerusalem, moiso vara na maleleku vara a sivo Spain a pa rohi kamim. ²⁹ Na levosahia vara a mai isamim, a pa mai na leruhu non Kristo sei i pa ruhu jea matamim.

³⁰ La voraiiku peresi na vevoraiku, na lo usia filangi isamim na hijan Moli Iesu Kristo, ale na opoia non Tanumen God, ha turu peresiau na nomim usiusi isan God matak, ³¹ ha usiusi vara i juriau na liman la haratu Judea sei la sopo rasua, ale vara noku vavahinau Jerusalem i pa tataholo na naho tapuhi non God ea, ³² matan vara na masalon God, a pa mai isamim na avulahi, ale ra pa rongo i ruhu jara matea matan a pa toho peresi kamim.

³³ God mata tamata i pa toho isamim mo isoiso, amen.

16

Retioloolo Non Paul

¹ Ale na tau vevoraifa nike na nahomim, Deacon Phoebe volitusi mata vao kalesia mata vanuan Cenchreae, ² na opoia vara ha avulahi vara ha lavia hin Moli usuri posposi sei mo tataholo isana tapuhi non God, ale ha tuenia na nona opoia tari, matan enia harai tuetueni ruhu matea mo tueni na tamlohi matuvana, ale mo lo tueniau sohera.

³ Ha sile na retioloolo isan Priscilla enia Aquila, tapalaku na vavahinau non Kristo Iesu, ⁴ enira mariviti la mate matan la lo tueniau, mo sopo enau haseku na lo vere meje isara, pani vao kalesia tari non la haratu la tamlohi rofoha la vere meje isara.

⁵ Ha sile na retioloolo isan la haratu la lo matavuhi na imara, ha sile na retioloolo isan Epaenetus tamlohi ruhu matea sei tamlohi la romruhu hinia, enia mo tamlohi tiroma matan Asia sei mo posi mo mai isan Kristo mata noku vavahinau. ⁶ Ha sile na retioloolo isan Mary, enia sei mo voko filangi matamim. ⁷ Ha sile na retioloolo isan Andronicus peresi narouna Junias tadvavuin Israel, na rani na lo toho na ima filangi enira la lo toho peresiau. VahaRULE non Iesu la levosahi mamahunira, enira la mai isan Kristo tiroma hiniau. ⁸ Ha sile na retioloolo isan Ampliatius, tamlohi ruhu matea na opoia hin Moli. ⁹ Ha sile na retioloolo isan Urbanus, tapalafa na vavahinau non Kristo, peresi Stachys na opoia.

¹⁰ Ha sile na retioloolo isan Apelles, mo turu filangi na rani filangi moiso, ale Kristo mo avulahi hinia. Ha sile na retioloolo na iman Aristobulus. ¹¹ Ha sile na retioloolo isan tadvavuiuku na vaon Herodion, ha sile na retioloolo isan la haratu non Moli na iman Narcissus. ¹² Ha sile na retioloolo isan la harai atu la lo vavahinau non Moli,

Tryphaena peresi Tryphosa. Ha sile na retioloolo isan haʻai ruhu sei Persis, enia mo vavahinau mo Filangi non Moli. ¹³ Ha sile na retioloolo isan Rufus, viʻoni non Moli, peresi tinana sei, enia mo kilauau sohena natuna matea.

¹⁴ Ha sile na retioloolo isan Asyncritus, Phlegon, Hermes, Patrobas, Hermas, peresi la vorai atu la lo toho peresira. ¹⁵ Ha sile na retioloolo isan Philologus, Julia, Nereus peresi vetasina Olympas, peresi na tapuhi tari sei non God la lo toho peresira. ¹⁶ Ha tapatapapai kamim na pungosi mata ooloo, vao kalesia tari non Kʻristo la sile na nora retioloolo isamim.

Isoiso Reti Non Paul

¹⁷ La voraiuku peresi na vevoraiku, na lo usia Filangi isamim vara ha lo kilau matan la haratu la pulo patumasa, ale haratu la lo posileji na vujangi tataholo ka lavi moiso, ale ha vahai hinira, ¹⁸ matan tamlohi sohen haratu la sopo volitusi non noʻa Moli Kʻristo, pani mata pangera purongo, ale na nora haruharu peresi na nora retimemeji la lo halu na romin haratu la sopo lelevosahi. ¹⁹ Matan tamlohi tari la levosahi na nomim ooloo, ale mo vaiau na avulahi hin kamim, pani na opoia vara ha lelevosahi na sava mo ruhu, ale vara ha sopo tia na hina sasati. ²⁰ Ale i pa sopo tuai God mata tamata i pa putputi Setan na ruhuruhu palomim. Ale romuruhu non Moli Iesu Kʻristo i pa toho isamim.

²¹ Timothy, tapalaku na vavahinau, mo sile na retioloolo isamim; enia peresi Lucius enia Jason, peresi Sosipater, enira tavitaviuku Israel.

²² Enau Tertius, na uli leta nike usuri na sava Paul mo vereia isaku, enau sohena, na lo sile na noku retioloolo isamim hin Moli.

²³ Enau Paul na lo toho na iman Gaius, mo lo sile na nona retioloolo isamim, enia sei tamlohi tavera sei mo lo tueni na vao kalesia tari nike, ale Erastus, treasurer mata taon tavera nike peresi voraiʻa Quartus, la sile na nora retioloolo isamim.

²⁴⁻²⁵ Ra hasohaso God, enia i eri vai kamim ha Filangi i usuri na noku Retiruhu peresi na retivujavujangi hin Iesu Kʻristo, i usuri na vujangi mata hina luhu sei God mo jarohia tuai tuai jea, ²⁶ pani nake mo pala, ale na Retiulia sohena pʻrovet la ulia tuai la vujangia mo mera isana mara jara tinatina-pua tari, mo usuri na retileu non God sei mo lo toho rani tui tui, matan vara i vai na tamlohi la ooloo usuri na malele rasua, ²⁷ isan God enia hasena mo lelevosahi, i pa lavi na hasohaso mata rani tui tui hin Iesu Kʻristo. Amen.

1 Corinthians

Tiroma Leta

Paul Mo Ulia Isana Mara Corinth Leta Nike

Leta akerihi mo usuri leta na tinapua matea Paul mo ulia isana mara Corinth moiso (5.9), hin leta nike Paul mo farami na nora retusia sei la sohaia isana moiso (7.1). Corinth enia taon tavera jea matea na pahisa tasi Greece. Vao kalesia Corinth la patumasa, la lo aseasera (1.10–4.21). Mo farami na retusia mata lahi (7.1–40), mata hanhani sei la silea isana tamasi (8.1–13), mata posposi tataholo mata lotu (10.1–14.40), peresi na sauteterahi non Iesu peresi na nona tamlohi usuri (15.1–58). Paul mo vereea isara mara opoia mo aulu jea, mo jeu na rasua peresi na fomtoho matan enia i pa toho jejeu (13.13).

Hin Leta Nike

1. Tiroma Retireti Non Paul (1.1–9)
2. Paul Mo Vereea Mara La Turu Jara Matea (1.10–4.21)
3. Mauri Na Vao Kalesia (5.1–7.40)
4. Posposi Tataholo Mata Vao Kalesia (8.1–11.1)
5. Posposi Tataholo Mata Lotu God (11.2–14.40)
6. Kristo Mo Aulu Na Mateia (15.1–58)
7. Silesilea Nona Kalesia Jerusalem (16.1–4)
8. Paul Mo Hahau Corinth Mata Sava (16.5–12)
9. Retioloolo Non Paul (16.13–24)

Retioloolo Non Paul Isana Kalesia

¹ Enau Paul, na vahafulu non Kristo Iesu usuri na masalon God, peresi voraira Sosthenes, ² kama sohai leta nike isana vao kalesia non God Corinth, isana tapuhi hin Kristo Iesu, God mo tovi kamim tapuhi peresi la haratu na jara tari sei la lo lotu Moli Iesu Kristo, nora Moli, ale enia nofa Moli,

³ romfuhu peresi na tamata la tai isan God Tamafa, peresi Moli Iesu Kristo, la vano isamim.

Paul Mo Vere Meje Isan God

⁴ Na lo vere meje isan God tarea matamim matan romfuhu sei God mo silea isamim hin Kristo Iesu, ⁵ matan enia mo vai kamim ka ulua mo ruhu hinia na retireti tari peresi na lelevosahi tari, ⁶ harihi mo vujangia vara sava na vereea isamim matan Kristo mo varafulu na maurimim, ⁷ matan vara ka sopo vejeveju hin te otori sei Tanumen God mo lo silea, ale ka lo kilau matan rani atu nofa Moli Iesu Kristo i pa mele pala hinia,

⁸ enia i pa vai na nomim rasua i rilangi i kakau na isoisona, i pa sopo tea i eri tuvai kamim hin te hinau hin rani atu non nofa Moli Iesu Kristo. ⁹ God enia i sopo efi tope na nona retitauhi, God mo tovi kamim vara ha tapala peresi Natuna, Iesu Kristo, nofa Moli.

Patumasa Na Lolo Vao Kalesia

¹⁰ Na lo usia rilangi isamim la voraiiku peresi na vevoraiku, na hijan nofa Moli Iesu Kristo, vara kamim mo isoiso nomim reti i matea, ale i sopo te patumasa isamim, pani ha matea na romfomi matea, ale ha matea na nomim ari. ¹¹ Matan la voraiiku peresi na vevoraiku, na rongo na reti matea mo tai na vaon Chloe vara, kamim ka lo vasvas isamim. ¹² Na lo vereea matan vonamim hai la lo vereea lara, “Enau na usuri Paul!” tea la vara “Enau na usuri Apolos!” tea la vara “Enau na usuri Peter!” moiso tea la vara “Enau na usuri Kristo!” ¹³ Ha eri topetope Kristo? Paul mo mate na talopeilopei matamim? Teni ka lavi na paptijo na hijan Paul? ¹⁴ Enau na lo vere meje isan God matan enau na sopo paptijo hin te vonamim hatea, pani Crispus peresi Gaius purongo, ¹⁵ matan vara i pa sopo te vonamim hatea i eri vereea vara enia mo lavi na paptijo na hijaku. ¹⁶ Varafulu, na paptijo na vao iman Stephanas, pani korong na sopo mele paptijo hin te tinapua. ¹⁷ Matan Kristo mo sopo ruleau vara a paptijo, pani vara a retivujavujangi na Retiruhu ale mo sopo hin te reti mo rilangi mata levosahia, vara i vono talopeilopei non Kristo i pa sopo te faramina.

Lelevosahi Non God

¹⁸ Matan reti mata talopeilopei enia hina rongorongono vono isan la haratu la lo vano na komokomo, pani isafa sei fa juri hinia, enia suihan God. ¹⁹ Matan Isaiah mo ulia vara,

‘Enau a pa komo na lelevosahi

nona tamlohi lelevosahi,

ale a pa vai na romfomi nona tamlohi lelevosahi

i mai hina purongo.’ *Isa 29.14*

²⁰ Nene tamlohi lelevosahi? Nene tamlohi vujangi mata leu non God? Nene tamlohi mo eri retireti na varama nake? Ra efi vereea vara God mo vai na lelevosahi nona tamlohi mata varama la mai hina rongorongono vono purongo. ²¹ Matan usuri na lelevosahi non God, God mo taua vara tamlohi na varama, la sopo efi lavutia na nora lelevosahi purongo. God mo avulahi vara i juri la haratu la rasu na hina rongorongono vono sei kama lo retivujavujangi hinia, ²² matan Jew la lo usia rilangi vara God i vai te matamata vara la hitea ale la pa rasua, ale tamlohi rofoha la opoi vara

la ale na lelevosahi vara la rasua, ²³ pani kamam kama lo retivujavujangi na mateia non Křisto na talopeilopei, enia hina tialalahala matea isana Jew, ale enia hina rongorongo vono isana tamlohi řořoha sohena mara Greek. ²⁴ Pani isařa sei God mo toviřa, hina purongo vara enřa Jew teni tamlohi řořoha, enřa řa eři hitevosahi na suihan God peresi na nona lelevosahi řuhu hin Křisto. ²⁵ Matan hina rongorongo vono non God enia mo jeu na lelevosahi nona tamlohi, ale hinau non God sei tamlohi la vereva vara mo sopo te suiha hinia, enia mo jeu na suiha nona tamlohi.

²⁶ Ale la voraiķu peresi na vevoraķu, ha to řomřomia vara hin rani atu God mo tovi kamim, mo sopo te matuvana isamim ka tamlohi lelevosahi na naho tamlohi, mo sopo te matuvana ka tauri na suiha, mo sopo te matuvana ka vora tamlohi aulu. ²⁷ Pani God mo viřoni na hinau la rongorongo vono na varama matan vara i vai na tamlohi lelevosahi la mahanuhanu; ale God mo viřoni na hinau sei mo sopo te suiha hinira na varama vara i vai na tamlohi suiha la mahanuhanu. ²⁸ God mo viřoni na hinau la atano na varama, tamlohi la hitefesira, hinau mo sopo te hinau hinira, mo vaira matan vara i vai la hinau sei tamlohi la lo vereva vara la hina aulu, la mai hina purongo, ²⁹ matan vara tea i pa sopo eři retihapahapa na nahon God.

³⁰ Enia pulo maurimim hin Křisto Iesu. God mo vai Křisto enia nořa hina lelevosahi, enia natu, mo vaiřa řa tataholo na nahon God, ale enia malele mata vaiřa řa tapu, enia mo hase silea vara i volituhuřa. ³¹ Ale matan haratu sohen la ulia vara, 'Mo ruhu vara haratu mo lo retihapahapa, i pa hapahapa hin Moli.' *Jer 9.24*

2

Talopeilopei Non Křisto

¹ La voraiķu peresi na vevoraķu, hin rani atu enau na lo toho peresi kamim, na sopo mai vara a retivujavujangi na hina luhu mata juri non God na retitavera teni na retilelevosahi. ² Matan enau na tau na řomiku vara a pa sopo vujangi te hinau tinapua pani Iesu Křisto purongo, ale hin na nona mateia na talopeilopei. ³ Ale hin rani atu na lo toho peresi kamim mo sopo te suiħaku, na matahu, ale na savaravara tavera matan na sopo levosahia vara sava i pa masese isaku, ⁴ ale noku retireti peresi na noku retivujavujangi la sopo retihaluhalu mata lelevosahi, pani na limaku Tanumen God mo vujangia isamim na matamata peresi na suiħa, ⁵ matan vara nomim rasua i pa sopo turu na lelevosahi nona tamlohi, pani na suiħan God purongo.

Lelevosahi Mo Tai Isan God

⁶ Pani isan la haratu la jea, kama lo retireti na hina lelevosahi, pani mo sopo na hina lelevosahi mata varama nake, teni hina lelevosahi nona tamlohi aulu mata varama nake, enira la haratu sei la lo vano na nora komokomo. ⁷ Pani kama lo vereva na lelevosahi non God matea sei mo lo luhu, enia God mo taua matařa tuai moiso varama mo sopo lo toho, matan mauri řuhuruħu atu na tuka. ⁸ Mo sopo te tamlohi aulu na varama nake i levosahia matan, vara la pa lo levosahia la pa sopo vili matei Moli mata řuhuruħu hin talopeilopei atu. ⁹ Pani sohen la ulia mo vereva vara, 'Sava te mata mo sopo lo hitea, teni te pero i rongoa, teni tea i řomřomia, sava God mo tau mamahunia moiso, matan la haratu mo lo opoira.' *Isa 64.4*

¹⁰ La hinau nike, God mo vujangia isařa hin Tanumena. Matan Tanumena mo levosahi na hinau tari peresi na lolo řomřomi non God. ¹¹ Matan hare mo levosahi na řomřomi non tamlohi tinapua matea pani tanumen tamlohi atu purongo sei mo lo toho na lolona? Ale mo sohena purongo, mo sopo tea i eři levosahi na řomřomi non God pani Tanumen God purongo. ¹² Ale nake, enřa řa sopo lavi na tanume mo tai na varama, pani řa lavi Tanume atu mo tai isan God matan vara řa pa eři levosahi na hinau God mo sile purongoia isařa. ¹³ Ale kama vujangi la hinau sei mo sopo usuri na lelevosahi nona tamlohi, pani na retireti Tanumena mo vujangia isamam, kama lo sořotahi na řomřomi non Tanumena peresi na retivarařuhu non Tanumena, ale kama vereulira isan la haratu Tanumena mo lo toho isara. ¹⁴ Tamlohi purongo i sopo eři lavi na hinahinau non Tanumen God, matan enira hina rongorongo vono isana, ale enia i sopo eři levosahia matan Tanumen God purongo i eři vujangira isana. ¹⁵ Tamlohi atu Tanumen God mo lo toho isana, i eři ari mamahuni na hinau tari, pani tinapua i pa sopo eři mele ari tamlohi atu. ¹⁶ Matan reti non God mo vereva vara, 'Hare mo levosahi na řomin Moli?'

Hare i pa eři pisuhi na malele isana?'

Isa 40.13

Pani enřa řa lavi na řomin Křisto.

3

Volitusi Non Křisto

¹ Pani, la vorai peresi na vevorai, hin rani atu enau na lo toho peresi kamim, na sopo retireti isamim sohena tamlohi rasua la jea. Mo vono. Na lo retireti isamim sohena natuvarihia matan ka pa lo usuri na posi tamlohi varama, ka pa lo pipi na maurin

Kristo. ² Na vahani kamim na wai susu, mo sopo na hanhani filangi, ale mo tikeli nake, ka sopo lo tatamahu matana, ³ matan ka pa lo toho na suiha masalomim. Matan ka mereimerei hin kamim hatehateahi, ale ka lo vasvas hin kamim hatehateahi. Matan posposi sei mo vujangia vara kamim ka pa lo toho na suiha masalomim. Ka lo hahau sohena tamlohi varama. ⁴ Matan vonamim matea mara, 'Enau na usuri Paul!' moiso tinapua mo vereea mara, 'Enau na usuri Apollos!' mo vujangia vara ka lo hahau sohena tamlohi purongo.

⁵ Apollos enia mo ruhu mata sava? Paul mo ruhu mata sava? Kamam volitusi, ale hin kamam kamim ka mai na rasua, sohena Moli mo taua moiso vara hare i pa vai na sava. ⁶ Enau na lavo, Apollos mo tau na wai, pani God natu, mo vaia mo ulua. ⁷ Haratu mo lo lavo teni haratu mo lo tau na wai, mo sopo te hinau ruhu hinia, pani God purongo sei mo lo vaia mo ulua. ⁸ Haratu mo lo lavo, ale haratu mo lo tau na wai, enira la matea, ale la pa lavi na volira i tataholo na sava la lo vaira hatehateahi. ⁹ Matan kamam kama tapala na vavahinau non God. Kamim lovuhai non God, ale ka iman God.

¹⁰ Enau tamlohi tavera mata voro ima usuri na romfuhu non God, ale na tau na pulo ima, ale tamlohi tinapua matea mo lo voro aulu hinia. Mo ruhu vara tamlohi hatehateahi i kilau mamahunia vara sohena sava i pa voro na ima hinia. ¹¹ Matan mo sopo tea i eri tau te pulona tinapua hin haratu mo lo toho moiso. Enia sei, Iesu Kristo. ¹² Vara tea i voro hin pulona atu na gold teni silver, teni vatu angiangi ruhu, teni mo lo voro hin te vipahai teni rato teni ere, ¹³ voko nona tamlohi hatehateahi, i pa mera purongo matan rani aria i pa vaia i mera, matan suiha hapu i pa vaihite na voko nona tamlohi hatehateahi vara mo sohena sava. ¹⁴ Vara te voko atu sei tea mo voro aulu hin pulo ima atu mo jeu na hapu, enia i pa lavi na nona otori matana. ¹⁵ Vara hapu mo hani vevuhi na voko non tea, nona otori i pa tihai, ale tamlohi atu i pa juri, pani i pa sohena tamlohi matea la juri narihia na hapu mo lo turu lekoleko purongo.

¹⁶ Ka sopo levosahia vara kamim ka temple non God, ale Tanumen God mo lo toho na lolomim? ¹⁷ Vara tea i komo na temple non God, God i pa komoa, matan temple non God enia mo tapu, ale kamim natu, ka temple atu.*

¹⁸ Tea i sopo eri hase halua hasena. Vara te vonamim mo lo romfomia vara enia tamlohi lelevosahi matea hin varama nike nake, i pa mele ruhu jea isana vara i mai

tamlohi rongorongono vono, matan vara i pa mai tamlohi lelevosahi vararu. ¹⁹ Matan lelevosahi matan varama nike, enia rongorongono vono isan God matan la ulia mo vereea vara,

'Enia mo vunai na tamlohi lelevosahi na nora posposi mata lelevosahi.'

Job 5.13

²⁰ Ale mo mele vereea vara,

'Moli mo levosahia vara romfomi nona tamlohi lelevosahi la sopo ruhu matan te hinau hatea.'

Psa 94.11

²¹ Matan mo sohena, i pa sopo tea i eri hahapaha hin te hinau nona tamlohi. Matan hinau tari enira mata tueni kamim, ²² vara Paul, teni Apollos, teni Peter, teni varama, teni mauri, teni matea, teni hinau nake, teni hinau la pa mai, enira mo isoiso nomim, ²³ ale kamim non Kristo, ale Kristo enia non God.

4

Vavahinau Nona Vaharule Non God

¹ Kamim mo tataholo vara ha kilau kamam sohena volitusi non Kristo, volitusi sei mata tauri na hina tatalanghi non God. ² Ale aulu hinia, mo tataholo vara la haratu la lo tauri na hinau sohena, la pa turu filangi na sava la lo vaia. ³ Pani enia hina rihirihiri purongo isaku vara te vonamim teni te court nona tamlohi hatea i ariau. Vararu, matan enau haseku na sopo ariau. ⁴ Na sopo romfomi te hinau vara na vaia mo sati, pani mo sopo haratu natu vara mo vaiua na tataholo na nahon Moli, matan Moli hasena i pa ariau. ⁵ Matan hinau sei, ha sopo sile te talai i tiroma hin rani atu mata aria, i tiroma na mele mai non Moli sei i pa lavi na hina luhu na fofoha nake la mai na malarani, ale i pa vujangia vara tamlohi la lo vai na nora vavahinau mata sava. Ale hin rani atu, God i pa sile na nona reti ruhu isara hatehateahi.

⁶ La voraiku, na lo vereea enau Apollos sohen tovongi matea isamim mo usuri na noku vujangi nike. Ale vara ha turu na sava la ulia na Retitapu moiso, ha pa sopo eri retihapahapa hin te tamlohi hatea matan mo pa aulu na vavahinau non tinapua. ⁷ Sava mo vai kamim ka romfomia vara ka ruhu ka jeu na tinapua? Sava enia nomim sei God mo sopo silea isamim? Ale vara hinau tari nomim mo tai isan God, mata sava ka lo retihapahapa sohena vara ka sopo lavi te hinau isana?

⁸ Ka pete lavi vevuhi na hinau tari ka opoira moiso. Ka pete tavitav moiso. Ka jeu kamam matan ka pete supe moiso, ale i pa ruhu vara ka pete tauri suiha

* 3:17: temple: Paul mo lo vere temple nike, ale faramina enia matavuhi nona kalesia hin jara atu, mo sopo vereea na epe tamlohi matea.

atu moiso matan kama pa tauri na suiha peresi kamim. ⁹ Matan na hitea sohena vara God mo tau kamam vahaʻule sohen tovongi matea, mo tau kamam hitahu jea na tamlohi,* sohena tamlohi la lo vano na nora mateia, kama mai sohena hinau matea varama peresi na angelo peresi na tamlohi la pa varoia.

¹⁰ Kamam kama tamlohi rongorongo vono matan Křisto, pani kamim ka tamlohi lelevosahi hin Křisto. Kamam kama tamlohi malum, pani kamim ka tamlohi řilangi. Kamim, tamlohi la sile na oloolo isamim, pani kamam, la hitelehilehi kamam. ¹¹ Mo mai nake, kama pa lo marohati, ale kama pa lo maʻohu, nomam ruru la sopo řuhu, tamlohi la vailehilehi kamam, ale mo sopo te imamam. ¹² Ale kama kalvono, kama voko na limamam, vara la veresatihi kamam, kama leřuhu hinira, ale vara la tipahi kamam, kama turu řilangi tarea, ¹³ vara la veresifesi kamam, kama reti řuhu isara. Kama mai sohena, ale kama pa lo toho sohena utauta na varama, sohena tapahuri.

¹⁴ Na sopo uli la hinau nike, matan vara a vai kamim ha mahanuhanu, pani vara a retiřoařoahai kamim sohena natuku řuhuru. ¹⁵ Matan hina purongo vara nomim tamlohi vujangi mo matuvana hin Křisto, tamamim mata rasua la tupu visaleta purongo. Matan enau na mai tamamim hin Křisto Iesu na Retiřuhu. ¹⁶ Ale matana, na lo usia řilangi isamim vara ha usuri na noku tovongi.

¹⁷ Matan hinau sei natu, na pa řule Timothy natuku řuhuru isamim, ale enia mo řomturu řilangi tarea hin Moli, i pa mai vara i mele vere kamim na noku posposi hin Křisto, i pa vujangi kamim sohen enau na lo vujangi na vao kalesia tari na jara tari.

¹⁸ Tatuamim nake la lo mangisi tavera jea matan la lo řomfomia vara a pa sopo mele mai isamim. ¹⁹ Pani vara masalon Moli, a pa mele mai isamim vila, ale a pa vileiulia vara la tamlohi mangisi nike la lo vaore purongi teni vara nora suiha mo tai isan God. ²⁰ Matan mauri atu God mo aulu hinia mo sopo turu na retireti nona tamlohi purongi, pani na suihan God. ²¹ Ka opoi na sava? A pa mai isamim peresi na hamim maja, teni a pa mai isamim peresi na opoia na posposi řomatano?

5

Tau Narihi Haratu Mo Hehe

¹ Sorasora mo lo vano vara posposi maji mo lo toho isamim, ale posposi maji sei mo

sopo te tamlohi řořoha i eri majinga hinia vara tea i eri vaia sohena, matan tamlohi matea mo lo lavi na naroun tamana, ² ale kamim ka řomaulu pani řomimim mo sopo sati mata sava? Ha tau narihi tamlohi atu mo lo vai posposi atu na livuhamim.

³ Matan hina purongi vara na sopo toho peresi kamim nake, noku řomřomi mo lo toho isamim, na pete sile na talai moiso isan haratu sei mo vai posposi atu. ⁴ Vara ha matavuhi na hijan Moli Iesu, ale noku řomřomi i pa lo toho peresi kamim na suihan nořa Moli Iesu, ⁵ ha pa sile tamlohi nike na liman Setan matan vara i komo na epena, matan vara maurina i pa juri na rani aria non Moli.

⁶ Nomim hapahapa mo sopo tataholo. Ka sopo levosahia vara ha tau na makomo isi na flaua, i pa vai na flaua i sosohi vevuhi? ⁷ Ha tau narihi na flaua tuai isi mo lo toho hinia, matan vara ha pa mai flaua paro, matan kamim ka flaua paro varařuhu. Matan la sile Křisto nořa natu sipsip mata Passover, Křisto, enia malamalai atu mo mate matařa. ⁸ Mo řuhu vara řa matavuhi mata hanhani Passover, mo sopo peresi na flaua tuai isi mo lo toho hinia, isi atu enia posposi vaisatihi na tinapua, ale enia hina sasati, pani řa pa hani pereti atu mo sopo te isi hinia, pereti atu enia mauri vokevoke peresi na retivarařuhu.

Hehe Na Lolo Vao Kalesia

⁹ Na uliuli isamim moiso na noku leta vara ha pa sopo tapala peresi na tamlohi la lo vai na posposi maji, ¹⁰ na sopo řarami la haratu non varama la sopo tatuafa sei la lo vai na posposi maji, teni la haratu řomřomi hařivi mo lo vilira, teni la haratu la lo vavanaho, teni la haratu la lo lotu-lotu vono. Matan, vara na lo vereea sohena, ha pa malue hin varama nike vara ha eri toho asau hinira. ¹¹ Pani nakerihi na lo uliuli isamim vara ha sopo pulutahi peresi tea sei mo vereea vara mo vorai rasua vara mo jovi na posposi maji, teni na řomřomi hařivi, teni mo lotulotu vono, teni mo lo hitefesifesi na tinapua, teni mo lo putu na wai řilangi tarea, teni mo tamlohi halu, ale ha pa sopo sakele vara ha hanhani matavuhi peresi tea vara mo sohena.

¹² Matan mo sopo noku hinau vara a ari na tamlohi la sopo rasua. Pani enia nomim hinau mata ari la haratu na lolo vao kalesia. ¹³ God i pa ari la haratu la sopo tamlohi rasua ale mo vereea mara,

'Ha tipahi narihi na tamlohi hehe sasati na livuhamim!' *Deut 17.7; 19.19*

* 4:9 hitahu jea na tamlohi enia mo lo řarami rani atu tamlohi vuro la lavi la tamlohi atu mata vilimateira la taura na isoiso vao atu sei la tiroma hinira na naho tamlohi tari na rani la mele pala na jarara tataholo.

6

Nomim Vauriuri

¹ Vara te vonamim mo vauriuri peresi na vonamim matea, mo pa hitea sohena sava vara i vano isana tamlohi ari na jingoima, ale mo sopo taua na lima tapuhi non God?

² Teni ka sopo levosahia vara tapuhi non God la pa ari na varama? Ale vara ha pa ari na varama, mo toma, ka sopo navu vara ha ari na nomim vauriuri vavarihi? ³ Ka sopo levosahia vara enfa fa pa ari na angelo? Matan haratu, mata sava ka sopo efi tau na tamata na vauriuri vavarihi nike na varama? ⁴ Vara te hinau isamim mo sohena, mata sava natu, ka lo vano isana tamlohi varama, haratu sei mo sopo te nora hinau vara la efi reti matana na lolo vao kalesia? ⁵ Na lo vere hinau nike, vara a vai kamim ha mahanuhanu. Varaŕuhu, mo sopo tea na lolo vaomim kalesia vara mo sopo lo jea na lelevosahi vara i efi tau na tamata na vauriuri nona vorai kalesia? ⁶ Pani kamim, ka hitea vara mo tataholo purongo vara te voraimim i tau na voraina kalesia tinapua matea na aria nona tamlohi varama!

⁷ Ka lo vauriuri peresi kamim hasemim na naho tamlohi aria mata varama, enia mo vujangia mo memera moiso vara ka lo toho asau hin mauri atu God mo opoia. I pa mele ŕuhu vara ha tinafihi purongoia, i pa mele ŕuhu vara ha tinafihira la jeu kamim. ⁸ Pani kamim purongo kamim hasemim, ka lo vai na hehe isamim, ale ka lo haluhalu na voraimim kalesia!

Ha Toho Asau Na Posposi Lumiha

⁹ Ka sopo levosahia vara la haratu la lo vai na hehe la pa sopo efi lavi mauri atu God mo aulu hinia? Ha mera hinia, la haratu la lo vai na posposi viriu, teni la haratu la lotulotu vono, teni la haratu la lo vaivaileu peresi na tinapua, teni tamlohi la juruvi peresi na tamlohi teni haŕai la juruvi peresi na haŕai purongo, ¹⁰ teni tamlohi vavanaho, teni la haratu la lo romusuri na hinau non te tinapua, teni la haratu la opoi jea na wai rilangi tarea, teni la haratu la lo veresatihi na tinapua, teni la haratu la lo uri na tamlohi mata vavanaho na nora hinau, enira mo isoiso atu la pa sopo lavi mauri atu God mo aulu hinia. ¹¹ Ale tuai tatuamim ka sohena, pani nake God mo hoje naŕihi na nomim hehe moiso, ale mo tapuhi kamim, mo vai kamim ka tataholo na nahon God na hijan Moli Iesu Kŕisto peresi na Tanumen noŕa God.

Hahau Mo Tataholo

¹² Hai la lo vereea lara, “Matan enau kalesia matea, mo tataholo purongo vara a usuri na masaloku tari.” Pani a efi vereea vara hinau tari la pa sopo efi tueni

kamim, pani hina purongo vara, “Enau kalesia matea, mo tataholo purongo vara a usuri na masaloku tari.” A pa sopo tinafihiia vara a toho na ruhuruhun te hinau hatea. ¹³ Ale hai la lo vereea vara, “Hanhani mo lo toho mata pangeŕa, ale pangeŕa mo lo toho mata hanhani!” Mo varaŕuhu pani ko hitea, God i pa komora enira mo rua. Epeŕa mo sopo toho mata posposi viriu, mo vono! Epeŕa la lo toho mata non Moli, ale Moli mo aulu na epeŕa. ¹⁴ Ale God mo sauteterahi Moli na mateia, ale i pa sauteterahi na epeŕa sohena na suihana. ¹⁵ Ka sopo levosahia vara epemim enira vonara matea na epen Kŕisto? Mo tataholo vara a lavi te vonara hatea na epen Kŕisto, ale a vaia i soŕotahi isana haŕai malele matea? I vonovono ŕuhu! ¹⁶ Teni ka sopo levosahia vara haratu mo soŕotahi peresi na haŕai malele matea mo mai epe matelete peresia? Matan sohen la ulia mo vereea vara, ‘Enira rua, la pa mai epe matelete’.

Gen 2.24

¹⁷ Pani haratu sei mo soŕotahi isan Moli, enia mo mai matelete peresi na Tanumena.

¹⁸ Ha rovo asau na posposi viriu. Hina sasati tinapua tari tamlohi la lo vaira mo sopo komo na epena, pani haratu mo lo vai na posposi viriu mo lo hase hehe na epena. ¹⁹ Teni ka sopo levosahia vara epemim enia temple non Tanume Tapu sei mo lo toho na lolomim sei God mo silea isamim? Ka sopo nomim hasemim, ²⁰ matan sava God mo volituhu kamim hinia vara i juri kamim mo tavera jea. Ale na epemim tari ha vaira na posposi ŕuhu vara la tahe na hijan God i aulu.

7

Vujangi Mata Lahi

¹ Ale nakerihi, usuri na sava ka usia na nomim leta, ka usia vara, “Mo tataholo vara tamlohi la sopo juruvi peresi na haŕai teni mo vono?” Ale noku ŕarami nahai, ² mo ŕuhu, pani matan posposi viriu mo maŕivi hajavua, i pa mele ŕuhu jea vara tamlohi matea i lahi, ale i lo toho peresi narouna purongo, ale haŕai matea i toho peresi tuana purongo. ³ Mo sopo tataholo vara tamlohi lahi matea i horo narouna vara mo opoia vara i juruvi peresia, matan mo tataholo vara i usia, ale narouna sohena i pa sopo horo tuana. ⁴ Haŕai lahi matea i sopo efi vai na sava tarea enia hasena mo opoia, matan tuana mo aulu na epena, ale tuana sohena i sopo efi vai na sava tarea enia hasena mo opoia, matan narouna mo aulu na epena. ⁵ Ha sopo horohoro kamim, pani matan te hinau purongo sohen harihi: vara engko peresi naroum ka majinga hinia matan vara ha hase tau kamim mata usiusi matan te makomo rani purongo. Pani vara

mo isoiso, ha mele juruvi jara matea matan vara Setan i sopo efi vaihite kamim vara ha vano isana tinapua matan ka sopo efi hase taurilati kamim.

⁶ Sava na lo vereea matana mo tataholo, pani enia mo sopo retileu matea. ⁷ Enau na opoia vara tamlohi tari la soheku, pani tatua tamlohi God mo vaira la tataholo vara la lahi, ale tatuara God mo vaira la tataholo matan la sopo lahi.

⁸ Ale isan la haratu la sopo lahi teni la hafai malepu, na vereea vara mo mele ruhu jea vara la sopo lahi soheku. ⁹ Pani vara la sopo efi hase taurilatira, mo ruhu vara la lahi. Matan enia mo mele ruhu jea vara la lahi mo jeua vara la sopo efi taurilati na masalo epera.

¹⁰ Ale isan la haratu la lahi mo sopo enau na lo vereea pani Moli mo lo vereea vara, hafai lahi i pa sopo rovo hin tuana, ¹¹ pani vara i vaia, i pa sopo efi mele lahi, pani vara mo ruhu hin fomfomi atu, mo sopo te mele malele tinapua, i pa vai na tamata peresi tuana i mele mai isana, ale tamlohi lahi sohena i sopo ruhu hin narouna.

¹² Isana tamlohi tinapua enau na lo vereea mo sopo Moli mo vereea vara te vorai kalesia hatea sei narouna mo sopo kalesia, pani fomina mo rilangi vara i toho peresi tuana, i pa sopo ruhu hinia. ¹³ Vara te hafai kalesia hatea tuana mo sopo kalesia matea, pani vara fomina mo rilangi vara i lo toho peresi narouna, narouna i pa sopo ruhu hinia. ¹⁴ Matan God mo tapuhi na tamlohi mo sopo rasu matan narouna enia hafai kalesia matea, ale God mo tapuhi na hafai mo sopo rasu matan tuana enia tamlohi kalesia matea. Vara i vono, natumim la pa lumiha na nahon God, pani matan mo sohen haratu, enira la tapu na nahona. ¹⁵ Pani vara vonara matea sei na lahi mo sopo kalesia, ale mo rovo, ha tinarihia vara i sohena. Hin posposi sei vorai kalesia atu i sopo efi tia hin lahi atu, matan God mo tovi kamim vara ha toho na tamata. ¹⁶ Hafai lahi, ko pa levosahia sohena sava vara o efi juri tuam? Tamlohi lahi, ko pa levosahia sohena sava vara o efi juri naroum?

¹⁷ Mo ruhu vara tamlohi kalesia hatehateahi la toho hin mauri atu sohen Moli mo silea isara, hara sei God mo tovira matana, harihi enia noku retileu isana vao kalesia tari. ¹⁸ Vara tea mo taifalihu tiroma moiso hin rani atu God mo pa tovia, i pa sopo vaihitea vara i vaihitea na hapila nona taifalihu! Vara tea mo sopo taifalihu hin rani atu God mo tovia, i pa sopo ale na taifalihu! ¹⁹ Matan mo sopo te hinau hinia vara ko taifalihu teni ko sopo taifalihu, hina aulu enia vara ha ooloo na retileu non God.

²⁰ Mo ruhu vara tamlohi hatehateahi la lo toho hin mauri atu God mo tovira hinia.

²¹ Vara te vonamim mo lo slev hin pongi atu God mo tovia, i pa sopo fomfomi te hinau vara i pa lo toho sohena slev teni mo vono. Pani vara nona tamlohi tavera mo opoia vara i teria, mo ruhu vara i vano. ²² Matan hara sei Moli mo tovia na rani mo pa lo toho sohena slev matea, enia mo materi hin Moli, ale sohen haratu, haratu sei mo materi hin rani atu Moli mo tovia, enia mo slev non Kristo. ²³ Volimim atu God mo volia mata juri kamim mo tavera jea, ha sopo mai slev nona tamlohi. ²⁴ Ale la voraiku peresi na vevoraiku, na sava mauri vara God mo tovi kamim hatehateahi hinia, mo ruhu vara ha lo toho atu, ale God i pa toho peresiho.

²⁵ Ale isana kalesia sei la sopo lo lahi, na sopo lavi te retileu isan Moli matara, pani na sile na noku kilakilau sohena tamlohi matea sei Moli mo fomopoia, hinau sei ha efi rasua. ²⁶ Ale na fomiku na sava mauri mo lo toho nake, mo ruhu vara haratu mo lo toho na sava mauri, i lo toho hinia. ²⁷ Vara ko lahi moiso, o sopo rovo hin naroum. Vara ko sopo lo lahi, mo mele ruhu jea vara o sopo aleale naroum. ²⁸ Pani vara ko lahi, ko sopo vai na hehe, ale vara te hafai matea la tapuhoroa moiso mo lahi, mo sopo vai na hehe. Pani la haratu la lahi la pa lavi na rani rilangi matana, na vereea matan na opoia vara a horo kamim na rani rilangi mata lahi.

²⁹ La voraiku peresi na vevoraiku, farami noku reti mo sohen harihi: rani sei God mo taua matan varama nike mo vejuveju sati moiso. Ale matana, mo tapulo nake, la haratu sei naroura, la pa toho sohena mo sopo te naroura, ³⁰ ale la haratu sei la lo tangtangi la pa vaia sohena la sopo tangtangi, ale la haratu sei la lo avulahi, la pa vaia sohena la sopo avulahi, ale la haratu sei la lo volvoli, la pa sopo taurilati na sava la volia, ³¹ ale la haratu la lo vai na voko hin varama nike, la pa sopo tia hin varama nike, matan varama nike mo lo vano vara i tihai. ³² Na opoia vara fomimim la sopo tiatia na hina tinatinapua matuvana, matan haratu mo sopo lo lahi i pa efi tau na fomina na vavahinau non Moli vara i pa vai Moli i avulahi hinia. ³³ Pani tamlohi atu mo lahi moiso, mo lo tau na fomina na hinahinau mata varama matan vara i pa vai narouna i avulahi hinia, ³⁴ ale fomina mo lo masanga, ale hafai mo sopo lo lahi, teni hafai la tauhoroa moiso vara i pa lahi, enira la tau na fomira na vavahinau non Moli vara la pa hahau na mauri vokevoke na epera peresi na fomira. Pani hafai atu mo lahi moiso mo lo tau na fomina na hinahinau mata varama mata i vai tuana i avulahi hinia.

³⁵ Na lo retireti sohena vara a tueni kamim, mo sopo matan vara a horo kamim hin te hinau, pani vara hinau tari isamim

la pa maro tatakholo, moiso vara i vai na romimim i rilangi isan Moli matan vara i sopo masanga. ³⁶ Vara tea isamim mo lo hase tapuhoroa vara i sopo lahi isan tapalana, ale nake mo romfomia vara mo sopo romfomi fuhu natu, ale vara romina mo rilangi vara i lahi, ha tinafihia vara i vaia sohen, ha tinafihira vara la lahi, enia mo sopo vai na hehe. ³⁷ Pani haratu sei romina mo rilangi vara i hase tapuhoroa na lahi, mo sopo matan te hinau tinapua, pani matan mo hase eri taurilatia, ale vara romina mo turu rilangi hinia, mo lo fuhu purongo vara i sopo lahi. ³⁸ Ale matana, haratu mo lahi isan tapalana, enia mo vai na hina fuhu matea, ale isan haratu mo lo hase tapuhoroa na lahi, mo vai na hinau mo mele fuhu jea.

³⁹ Hafai lahi matea mo lo toho na ruhuruhun tuana i tikeli rani atu tuana mo mate. Pani vara mo mate, enia mo materi vara i eri mele lahi vara mo opoia, pani isana tamlohi kalesia matea purongo. ⁴⁰ Pani na noku kilakilau, hafai malepu atu i pa mele avulahi jea vara i lo toho hasena purongo. Ale na levosahia vara enau na lo usuri na romin Tanumen God matana.

8

Hanhani La Silea Isana Tamasi

¹ Ale nakerihi na opoia vara a mele retireti makomona na hinau matea na nomim leta sei mata hanhansi sei tamlohi la silea isana tamasi moiso. Enfa mo isoiso fa levosahia vara: Enfa fa lavi na lelevosahi. Pani 'lelevosahi' sei la lo vere a mo lo vai na tamlohi la romaulu, pani opoia mo lo vai na tamlohi la ulua na posposi fuhu. ² Vara tea, romina mo romfomia vara mo levosahi te hinau, tamlohi atu mo sopo lo levosahi te hinau na sava vara i pa levosahia. ³ Pani vara tea mo opoi God, God mo levosahi tamlohi atu.

⁴ Matan haratu, na romfomi mata hani na hanhansi sei la silea isana tamasi, fa levosahia vara tamasi la sopo mauri, ale fa levosahia vara mo sopo te God tinapua, pani matelete purongo. ⁵ Matan hina purongo vara hinau hai na tuka teni na varama la tovira god la lo toho, varafuhu god matuvana peresi na moli matuvana la lo toho, ⁶ pani isafa, God mo matelete enia Tamafa, hinau tari la tai isana, enira mo isoiso nona, ale Moli matelete enia Iesu Kristo, ale hinia, hinau tari la pala, ale hinia, enfa fa lo mauri.

⁷ Pani, mo sopo tamlohi tari la lavi lelevosahi nike. Pani matan tamlohi kalesia hai tiroma la lo pulutahi peresi na tamasi moiso vara la hani na hanhansi la silea isana tamasi moiso, la pa romfomia vara la lo vai na hehe, ale la pa rongoa vara la lumiha

matana. ⁸ Pani hanhansi i sopo eri vai fa tatakholo na nahon God. Ra sopo eri vejuveju hin te hinau vara fa sopo hania, ale vara fa hania i pa sopo eri tuenifa. ⁹ Pani ha lo kilau i fuhu vara nomim materi sohen harihi i sopo vai te voraimim kalesia hatea i jovi matan romina mo sopo lo rilangi hinia.

¹⁰ Matan, vara tea romina mo sopo lo rilangi mo hiteho ko lo hanhansi na lolo temple nona tamasi matea, ale ko sopo levosahia vara nomim materi sei i pa vai tamlohi atu mo sopo lo rilangi vara i hani hanhansi atu la silea isana tamasi moiso i pa jovi? ¹¹ Ale matan nom lelevosahi sei, voraim kalesia sei romina mo sopo lo rilangi, i pa jovi nafihia na nona rasua, vorai sei Kristo mo mate matana. ¹² Ale matana, ko lo vai na hehe isan Kristo vara ko lo rulefule te vorai kalesia tinapua hin te hinau la rasua vara mo sopo tatakholo. ¹³ Matan haratu vara te hanhansi na lo hania mo vai te vorai kalesia mo jovi, a pa sopo eri mele hani mit atu vara i vai vorai kalesia atu i jovi matana.

9

Mauri Nona Vahafulu Tatakholo Matea

¹ Enau mo sopo tamlohi materi matea? Teni enau mo sopo vahafulu matea? Enau mo sopo haratu sei mo hite Iesu nofa Moli na matakau? Kamim mo sopo noku vua vavahinau hin Moli? ² Vara isana tinapua enau mo sopo vahafulu matea, pani isamim, enau vahafulu matea, matan kamim ka mai kalesia mata noku vua vavahinau, ale mo vujangia vara enau tamlohi vahafulu non Moli.

³ Hinau sei enia noku farami isan la haratu la lo aleau mata noku vavahinau. ⁴ Ka romi vara mo sopo tatakholo vara ha vahani kamam? ⁵ Ka romi vara mo sopo tatakholo vara kama lavi na naroum sei la kalesia la usuri kamam, sohen la vahafulu tinapua sei la lo vaia, ale sohen tasin Moli peresi Peter la lo vaia? ⁶ Teni, enia matan enau Barnabas purongo vara mo sopo tatakholo vara kama isoiso na nomam voko mata mania? ⁷ Sava tamlohi vuro mo lo hasena volia? Sava tamlohi isa mo lavo na isa matea, ale mo sopo hani te vuana? Teni hare mo lo korohi te nani pani mo sopo inu te wai susuna?

⁸ Ka romi vara na lo vere la hinau nike usuri na noku romfomi purongo? Ka romi vara leu mo sopo vere sohen? ⁹ Matan la ulia na Leu non Moses moiso, vara 'O sopo pesihoro na jingo buluk vara mo lo varasi nafihia na piri wit'.

Deut 25.4

Ka romi vara God mo lo romfomi na buluk purongo? ¹⁰ Ka romi vara mo sopo vere reti sei matafa? La ulia matafa, matan haratu mo lo rule na lepa mo lo rule na nona

romtau, ale haratu mo lo pete na piri wit mo lo pitera na nona romtau vara i pa lavi na fungana hin la piri wit atu?

¹¹ Vara kamam vahaʻule kama lo lavo na piri fuhu mata mauri isamim, ka romi vara mo sopo tataholo vara kama lavi te hinau mata i tueni na maurimam nake isamim? ¹² Vara tinapua la opoia vara la lavi na oloolo isamim, ka romi vara kamam mo sopo tataholo vara kama lavia i jeu na vahaʻule tinapua? Hina purongo, kama sopo ngurunguru hin kamim vara ha sile na oloolo isamim, pani kama hitea vara i pa mele fuhu jea vara kama sopo mele tau te hinau i vai kamim ha tialahalaha hinia, ale ha rohu na Retifuhu non Kristo matana.

¹³ Kamim ka sopo levosahia vara la pris atu la lo kilau na Temple nona Jew, la lo lavi na hara hinau na hanhani mata sile-silea nona tamlohi? Ale ka sopo levosahia vara pris sei la lo volitusi na votavota mata malamalai atu la lo asease na silesilea mata malamalai? ¹⁴ Hin malele akerihi natu, Moli mo retileu hinia vara la haratu la lo vereuli na Retifuhu non Kristo la pa lavi na hara hinau mata nora vavahinau na Retifuhu.

¹⁵ Mo tataholo vara a usi kamim vara ha tueniau, pani na sopo usia. Na sopo uliuli isamim nake vara a usia isamim. Mo vono. I pa mele fuhu isaku vara a mate i jeua vara a usi kamim mata nomim tuetueni! ¹⁶ Vara a lo retivujavujangi na Retifuhu, mo sopo sile te masapa isaku vara a pa mangisi matana. Matan God mo taua na limaku vara a pa vaia. Rani sati i pa mai isaku vara a sopo retivujavujangi na Retifuhu.

¹⁷ Vara na lo vaia usuri na masaloku a pa lavi na noku otori matana, pani God mo viʻoniau, ale mo sileau hin voko tapu nike, ale enau, a sopo efi vai te hinau tinapua. ¹⁸ Sava natu enia noku otori? Enia masapa vara a retivujavujangi purongoi na Retifuhu, ale na sopo usi na sava sei mo tataholo mata tamlohi retivujavujangi na Retifuhu matea i efi lavia.

¹⁹ Matan hina purongo vara enau tamlohi materi, na sopo toho na ruhuruhun tea, pani na hase vaiau vara a volitusi isana tamlohi tari vara a pa efi lavi te vaora isara la mai isan Kristo.

²⁰ Isana Jew, na mai sohana Jew matea matan vara a lavi na Jew la mai isan Kristo. Isan la haratu la lo toho na ruhuruhu leu, na mai isara sohana tamlohi matea sei mo lo toho na ruhuruhu leu, pani na sopo toho na ruhuruhu leu matan vara a lavi la haratu la lo toho na ruhuruhu leu la mai isana. ²¹ Isan la haratu la sopo toho na ruhuruhun te leu, na mai sohana tamlohi matea mo sopo toho na ruhuruhun te leu, mo sopo vara na sopo toho na ruhuruhu leu non God, pani na lo

toho na ruhuruhu leu non Kristo, matan vara a efi lavi la haratu la sopo toho na ruhuruhun te leu la mai isan Kristo.

²² Isan la haratu la sopo lo romfilangi na retivararuhu, na mai sohera, matan vara a lavi la haratu la sopo lo romfilangi la mai. Isana tamlohi tari tinatinapua na mai sohera na malelera tari matan vara a efi juri tea. ²³ Na lo vai la hinau tari sei mata Retifuhu purongo, matan vara hinira enau peresira a pa efi lavi na hina ruhuruhu sei Retifuhu mo retitauhi hinira.

²⁴ Korong ka levosahia vara na rani maromaro matea, tamlohi maromaro tari la maro, pani tamlohi matelete purongo i pa mai tiroma. Ale matana, ha maro matan vara ha efi mai tiroma. ²⁵ Tamlohi maromaro hatehateahi tari, la tau na romira vara la hase taurilatira na hinahinau matuvana. La lo vaia matan vara la eri lavi na rongoʻongo rau vipahai purongo sei i pa rovo. Pani ena, fa lo vaia matan vara fa pa lavi na hinau i pa sopo efi rovo. ²⁶ Matan hinau sei, enau na sopo maromaro purongo; na sopo tutuhi sohen tamlohi matea mo lo tutuhi purongoi na masapa. ²⁷ Pani na lo taurilati na epeku, ale na aulu hinia matan vara i vono, hitahu na noku retivujavujangi isana tinapua, enau haseku purongo na mele tau narihiau na noku vujangi.

10

Rongorongo Vono Nona Tavtavuin Israel Tuai

¹ La voraike peresi na vevoraiku, na opoia vara ha levosahia vara tamaʻa la lo toho na ruhuruhun telangi atu, ale enira mo isoiso la hahau roto na tasi hin masapa atu God mo vaia, ² ale enira mo isoiso la mai tamlohi usuri non Moses ale la paptijo hinia hin telangi atu ale hin tasi atu, ³ enira mo isoiso la hani hanhani atu God mo silea, ⁴ enira mo isoiso la inu hin wai atu God mo silea. Matan la inu hin vatu mauri atu sei mo lo usurira, ale vatu atu enia Kristo. ⁵ Pani God mo sopo avulahi na sope vaora tavera, matan God mo vilimateira, ale mo pla hau na tarapera na jara hasetoho atu.

⁶ La hinau sei la masese sohana tovongi matea isaʻa, matan vara fa pa sopo opoi na hina sasati sohera. ⁷ Ha pa sopo lotulotu vono sohana tatuara la lo vaia tuai, sohen la ulia moiso vara, ‘Tamlohi la sakele vara la hanhani, la inu, ale hitahu, la turu la velu’.

Exo 32.6 ⁸ Ra pa sopo usuri na posposi maji sohana tatuara sei la lo vaia tuai, rani matelete purongo vao sei la mate, evira mo tikeli tari vaha ngavulu rua mo tolu (23,000). ⁹ Ra sopo vaihite Moli sohen la tatuara atu la lo vaihite tuai

sei ale mata la hati matemateira, ¹⁰ teni ʔa sopo reti vavarihi sohen la tatauara atu la lo vaia tuai, ale angelo mata mateia mo vilimatemateira. ¹¹ La hinau sei la mai isara tuai sohena tovongi matea isaʔa, ale la ulira mata retifoʔoahai isaʔa nake, enʔa sei ʔa lo toho na pongi hitahu.

¹² Matan haratu, sava tamlohi mo lo ʔomʔomia vara enia mo lo turu ʔilangi, i lo kilau mamahunia vara i sopo jovi sohera. ¹³ Mo sopo te vaihite hatea vara ko jovi hinia mo tinapua hin la haratu la lo tikeli na tamlohi tari. God mo lo turu ʔilangi tarea, ale i pa sopo tinarihia vara te hinau hatea i vaihite kamim i jeu na vaihite sei ha eʔi horora, pani hin vaihite atu God i pa sile te malele mata rovo hinia matan vara ha pa eʔi jelu hinia.

Leʔuhu Non Moli Na Hanhani Tapu

¹⁴ Matan hinau sei, la voraiku rufufuhu, ha rovo na lotulotu vono. ¹⁵ Noku reti mo lo vano isana tamlohi la tamlohi tapurongo, ha ari na sava na lo vere isamim. ¹⁶ Paniken mata leʔuhu non God sei ʔa lo vere meje isana matana, enia matan vara enʔa mo isoiso ʔa eʔi lavi na leʔuhu na ʔaen Kristo hinia. Ale pereti atu ʔa lo topea, enia matan vara enʔa mo isoiso ʔa eʔi lavi na leʔuhu na epen Kristo hinia. ¹⁷ Matan pereti atu enia pereti matelete purongo, enʔa sei ʔa vao matuvana, ʔa mai epe matelete, matan enʔa mo isoiso ʔa hani na pereti matelete purongo. ¹⁸ Ha to ʔomʔomi na tavitavin Israel. Ka hitea vara la haratu sei la lo hani na malamalai, la sopo mai matelete matana?

¹⁹ Ka ʔomi vara na lo vere na sava? Na sopo vere vara tamasi teni te hanhani sei la silea isara enira hinau purongo. ²⁰ Mo vono! Na lo vere vara malamalai atu tamlohi ʔoʔoha la lo silea, la lo silea isana tanume sasati, mo sopo isan God. Na sopo opoia vara kamim ha matavuhi peresi na tanume sasati. ²¹ Ha sopo eʔi inu na paniken non Moli, ale ha inu na paniken nona tanume sasati! ²² Mo toma? Mo tataholo vara ʔa vaivai Moli i lolokoru? Ka ʔomi vara enʔa ʔa ʔilangi ʔa jeu Moli?

Materi Nona Kalesia

²³ Tamlohi hai la lo vere lara, “A eʔi vai na hinau tari na opoia!” Mo ʔuhu pani hinau tari la pa sopo ruhu hiniho ale hai lara, “A eʔi vai na hinau tari na opoia!” Mo ruhu pani hinau tari la pa sopo tueniho vara o ulua. ²⁴ I pa sopo tea i ʔomʔomi na sava mo ʔuhu isana purongo. Ha ʔomʔomi na tinapua, ale sava i pa ʔuhu isara.

²⁵ Ha hani na mit la aʔehira na jara maket, i sopo te retusia vara la silea isana tamasi

moiso teni mo vono matan vara ʔomimim i sopo ʔomkaka hinia. ²⁶ Matan Retitapu mo vere vara, “Varama enia non Moli, ale hinau tari la lo toho hinia enira nona”. *Psa 24.1*

²⁷ Ale vara te tamlohi ʔoʔoha mo tovi kamim vara ha hanhani peresia, ale ka avulahi vara ha vano, ha hani na sava hinau la taua na nahomim, i sopo te retusia hinira vara la tataholo vara ha eʔi hanira teni mo vono. ²⁸ Pani vara tea mo vere isamim vara, “Hinau sei la silea sohen malamalai moiso!” vara mo sohena, ha sopo hania matan enia mo vere kamim hinia, ale matan vara i sopo komo te ʔomina. ²⁹ Pani na sopo vere na ʔomimim, pani ʔomim tamlohi atu. Matan mata sava natu, noku mater i pa isoiso mata ʔomim non te tinapua? ³⁰ Vara na lavia peresi na vere meje isan God, mata sava natu, tea la eʔi tuvaiu matan hinau sei na vere meje matana moiso?

³¹ Ale matana, sava ka hania teni ka inua teni ka vaira, ha vaira matan vara hasohaso i pa vano isan God matana. ³² Ha sopo vai te hinau mata vaivai na Jew, teni na tamlohi ʔoʔoha teni isana vao kalesia non God, ³³ sohen enau sei na vaihitea vara a vai na tamlohi tari la avulahi na hinau tari sei na lo vaira. Na sopo vaia mata i pa ʔuhu isaku, pani na lo alea vara a vaia i tueni na tamlohi matuvana matan la pa eʔi juri.

11

Vujangi Mata Tamlohi Peresi Na Haʔai

¹ Ha usuri na noku tovongi sohen enau na lo usuri na tovongi non Kristo.

² Ale nakerihi, na lo hasohaso kamim matan ka lo ʔomʔomiau na hinau tari, matana ka lo tauri mamahuni na mauri kalesia, sohen enau na lo vujangi kamim hinia. ³ Pani na opoia vara ha pa levosahia vara patu haʔai lahi matea enia tuana, patu lamane tari enia Kristo, ale patun Kristo enia God. ⁴ Lamane tari sei la ropoi na patura, ale vara la lo usiusi teni la lo retimangovi, enira la lo vai mahanuhanu na patura sei, enia Kristo. ⁵ Pani haʔai lahi tari sei, vara la sopo ropoi na patura ale la lo usiusi teni la lo retimangovi, enira la lo vai mahanuhanu na patura sei tuara, mo sohena vara la hiripilopiloia.* ⁶ Vara haʔai lahi matea mo ʔohu vara i ropoi na patuna, mo ʔuhu vara i tai na vuluna i vejuveju. Pani matan enia hina mahanuhanu matea vara te haʔai lahi i tai na vuluna teni la hiripilopilo na patuna, mo ʔuhu vara i ropoi na patuna. ⁷ Matan mo sopo tataholo vara lamane matea i ropoi na patuna, matan

* 11:5: La lo hiripilopilo na haʔai sohena tuai matan la tope na nora retitauhi mata lahi.

enia niniun God, enia mo lo vujangi na rufurufuun God, pani haʻai enira la vujangi na rufurufu nona tamlohi. ⁸ Matan God mo sopo vai na lamane na haʻai, pani mo vai na haʻai na lamane. ⁹ Ale mo sohena purongo, God mo sopo vai na lamane mata haʻai, pani haʻai mata lamane. ¹⁰ Matan haratu natu, mo ruhu vara haʻai la ropoi na patura sohena matamata matea mo vujangia vara la lo toho na rufurufu suiha tinapua, matan angelo la lo kilau matana.

¹¹ Pani na vao kalesia non Moli, haʻai mo sopo matan i toho hasena, teni tamlohi i toho hasena, ¹² matan God mo vai na haʻai na lamane, ale nake lamane mo vora isan haʻai, ale hinau tari la tai isan God.

¹³ Kamim hasemim ka hitea vara mo tataholo vara haʻai matea i ususi isan God, ale i sopo ropoi na patuna? ¹⁴ Mauri mo sopo vujangi kamim moiso i mera vara lamane matea vuluna mo peravu, enia hina mahanuhanu isana? ¹⁵ Pani vara vulu haʻai mo peravu, enia hina rufurufuun haʻai atu teni mo vono? Matan God mo sile na vuluna mata ropoi na patuna. ¹⁶ Vara tea romina mo sopo opoi hinau sei, pani mo sohen haratu natu isamam peresi na lolo vao kalesia non God.

Posposi Tataholo Mata Hanhani Tapu

¹⁷ Pani sava a pa vere nakerihi, na sopo hasohaso kamim matara, matan ka lo pulutahi jara matea, enia mo sopo matan ha pa vai te hinau i mele ruhu, pani ka vaia mo mele sati jea sivo. ¹⁸ Matan tiroma hinau na rongoa, enia vara ka lo pulutahi mata lotu ale patumasa mo lo toho isamim. Ale na rongoa vara mo varafuhu, ¹⁹ matan fa levosahia vara patumasa la pa vora isamim, matan vara i memera vara hare nakonako isamim la jea na mauri rasua.

²⁰ Matan ka lo pulutahi jara matea, mo sopo hanhani tapu sei ka lo hania. ²¹ Matan, na nomim hanhani, tamlohi hatehateahi la hasera hani na hara hinau. Matea mo marohati, ale tinapua mo drong! ²² Mo toma? Mo sopo te imamim vara ha eri hanhani teni ha inu hinira? Teni ka lo hitelehilehi na vao kalesia non God, matan ka vai la haratu mo sopo te nora hinau la mahanuhanu? Na sopo levosahia vara a pa vere na sava isamim! Ka romi vara a pa hasohaso kamim matana? Mo vono!

Isoio Hanhani

(Mt 26.26–29; Mk 14.22–25; Lk 22.14–20)

²³ Matan sava na silea isamim na lavia isan Moli. Hin vutepongi atu sei Judas mo turuposi hania, Moli Iesu mo lavi na pereti, ²⁴ ale mo vere meje matana moiso mo topea mo vere mara, “Harihi enia epeku sei na silea matamim. Ha vai harihi romromi na

sava na vaia matamim.” ²⁵ Mo mele vaia sohena purongo na isoisin hanhani atu, enia mo lavi paniken atu, mo vere mara, “Harihi enia retitauhi paro na faeku. Vara ha inua, ha vai harihi romromi na sava na vaia matamim.” ²⁶ Matan sava rani ka lo hani pereti atu, ale ka inu hin paniken atu, ka lo vujangi na mateia non Moli, ale ha lo vaia sohena i tikeli na rani i mele mai hinia.

²⁷ Sava tamlohi vara mo hani pereti atu teni mo inu hin paniken atu non Moli na malele matea mo sopo tataholo, enia mo lo vai na hehe matan mo lo kilau purongoi na epen Moli peresi na faena. ²⁸ Tamlohi hatehateahi hasera la pa kilau usurira matan te hehe na maurira la pa vahari hinia, moiso la pa eri hani pereti atu, ale la inu hin paniken atu. ²⁹ Matan, vara tea mo hani teni mo inu, pani mo sopo romromi na kalesia tinapua, enia mo hase hani teni mo inu na nona talai.† ³⁰ Hinau sei natu, mo vai kamim matuvana mo sopo te suihamim, ale ka rojo, ale hai la mate.

³¹ Pani vara fa hasefa kilau usuri mamahuniʻa, God i pa sopo ariʻa matana. ³² Pani vara Moli i arifa, mo vaia matan vara i vai tataholoira matan vara fa pa sopo lavi na talai peresi na tamlohi tinapua na varama na pongi hitahu. ³³ Matana, la voraiku peresi na vevoraiku, vara ha pulutahi mata hanhani tapu, ha saovi kamim hatehateahi. ³⁴ Vara tea mo marohati, i pa hanhani na ima purongo, matan vara ka pulutahi, i sopo mata lavi na talai. Ale mata hinau tinatinapua a pa vere na malelera tataholo isamim vara a mai.

12

Silesilea Non Tanume Tapu

¹ Ale nakerihi, la vorai peresi na vevorai, enau na opoia vara ha mera na hinau sei Tanumen God mo lo silera. ² Ka levosahia vara hin pongi atu ka lo toho na rofoha, suihan Tiapolo mo lo tikauleji kamim usuri na malele mo tiroman kamim ka vano isana tamasi mengo. ³ Matan haratu, na opoi vara ha levosahia vara mo sopo te tamlohi mo lo reti na suihan Tanumen God, i eri vere hin te rani vara, “Na lesati hin Kʻristo!” Moiso i sopo tea i eri vere, i vara “Iesu enia Moli!” vara Tanume Tapu mo sopo toho isana.

⁴ Ale, otori tinatinapua matuvana la lo toho, pani pulora matelete purongo, enia Tanume Tapu. ⁵ Ale vavahinau mata tuetuenu tinatinapua matuvana, pani Moli matelete purongo; ⁶ ale malele mata vavahinau tinatinapua mo matuvana, pani God matelete purongo sei mo lo voko hinira hatehateahi. ⁷ Tanume Tapu mo vuhesi na

† 11:29: Mt 5.23–26

suihana isara hatehateahi mata tueni na tinapua.

⁸ Isana tamlohi matea, Tanume Tapu mo silea na retireti mata lelevosahi, ale isana tinapua mo sile na retireti mata levosahi matan te hinau. ⁹ Isana tinapua pa Tanume Tapu atu mo sile na rasua, ale isana tinapua mo sile na otori mata na vai rojoa i tihai, ¹⁰ isana tinapua suiha mata vai na hinau mafurahi, isana tinapua retimangovi, isana tinapua eria mata efi hitevosahi na sava tanume enia pulo retireti matea, isana tinapua i efi retireti na leo tinatinapua, isana tinapua i efi rongvosahi na leo tinatinapua.

¹¹ Enia pa Tanume Tapu atu sei enia hasena mo lo aseasehi la otori sei. Enia hasena mo hatihia vara sava tamlohi i pa lavi na sava otori.

¹² Matan epe tamlohi matea enia matelete, ale tavitavaluna matuvana, ale tavitavaluna matuvana pani la vai na epe matelete, mo sohen harihi peresi Kristo. ¹³ Matan hin Tanume Tapu matelete purongo, enfa mo isoiso fa paptijo na epe matelete, vara tamlohi rofoha teni Jew, slev teni tamlohi materi, mo vaifa enfa mo isoiso vara fa inu isana Tanume Tapu matelete purongo.

¹⁴ Matan epe tamlohi, tavaluna mo sopo matelete purongo, pani matuvana. ¹⁵ Vara palona i vereea vara, "Enau na sopo tavalu epe matea matan enau na sopo limana!" romfomi sohena haratu mo sopo vaia vara enia mo sopo tavalu epe matea. ¹⁶ Vara perona i vereea vara, "Enau na sopo tavalu epe matea, matan enau na sopo matana!" romfomi sohen haratu mo sopo vaia vara enia mo sopo tavalu epe matea. ¹⁷ Vara tavalu epe tari enira matana matea i pa rongo te hinau na savana? Vara tavalu epe tari enira perona matea, i pa ngusahi te hinau na savana?

¹⁸ Pani mo sohen haratu natu, God mo tau mamahuni na tavalu epe tari na jarara usuri na masalona. ¹⁹ Vara enira mo isoiso tavaluna matelete purongo, epena i pa toho epu? ²⁰ Pani mo sohen haratu natu, tavitavaluna matuvana, pani epe matelete. ²¹ Matam i sopo efi vereea isana limam vara, "Ko sopo ruhu matan te hinau!" teni vara patum i vereea isana palom vara, "Ko sopo ruhu matan te hinau."

²² Vararuhu, la tavalu epe atu sei ka lo hitera vara la sopo filangi teni la sopo ruhu, pani nora vavahinau la aulu jea mata tueni na epe, ²³ ale la tavalu epe atu ka lo rompurongo hinira, enira pa la haratu sei ka lo ru mamahunira matan vara tea i pa sopo efi hitera, ²⁴ pani tatua tavalu epe fa sopo romfomia vara fa rurura sohera. Pani God mo vai na epe na malele matea

vara fa sile na ololo isana tavalu epe sei fa hitera vara la sopo efi lavi te ololo. ²⁵ Mo vaia matan vara la sopo patumasa na epe, pani vara tavitavalu epe tari atu la kilau mamahuni na tatuara tinatinapua. ²⁶ Vara te tavalu epe hatea mo rongohaji, enira mo isoiso la rongohaji. Vara tavalu epe matea mo lavi na ololo, enira isoiso la avulahi matana.

²⁷ Ale kamim epen Kristo, ale kamim hatehateahi ka tavitavaluna. ²⁸ Ale God mo vironi na tamlohi mata vavahinau na lolo vao kalesia sohen harihi:

tiromara enia vahafulu,
haruana enia provet,

hatoluna enia tamlohi vujangi mata reti non God,

moiso la haratu la lo vai na hinau mafurahi tavera,

moiso la haratu la lo vai na rojoa la tihai, moiso tamlohi tueni,

moiso tamlohi tiroma na vavahinau, moiso mata retireti na leo tinatinapua.

²⁹ Enira mo isoiso la vahafulu teni mo vono? Enira mo isoiso la provet teni mo vono? Enira mo isoiso la tamlohi vujangi teni mo vono? Enira mo isoiso la eri vai na hina mafurahi tavera teni mo vono?

³⁰ Enira mo isoiso la eri vai na rojoa i tihai teni mo vono? Enira mo isoiso la efi retireti na leo tinatinapua teni mo vono? Enira mo isoiso la eri vereuli na farami leo tinatinapua teni mo vono? Mo vono!

Opoia Mo Aulu Na Hinahinau Tari

³¹ Pani ha tau na romimim mata otori la mele aulu hinira. Ale enau a pa mele vujangi kamim na malele tinapua matea mo ruhuruhu jea.

13

Opoia Mo Aulu Jea

¹ Vara a efi reti na leo nona tamlohi tinatinapua, teni na leo nona angelo na tuka, pani vara mo sopo te opoia isaku, enau na lo vaore purongo sohena belo sei mo lo tangi teni mo lo kolekole roro purongo. ² Vara a lavi na suiha mata retimangovi, ale a levosahi na hina luhu tari peresi na lelevosahi tari, ale vara noku rasua mo rilangi vara a efi juhati te vutivuti, pani vara mo sopo te opoia isaku, enau hina purongo matea. ³ Vara a lo sile na noku hinau tari isana tinapua, teni vara a sile na epeku vara la sulimateia, pani vara i sopo te opoia isaku, enau na sopo ruhu hin te hinau.

Opoia

⁴ Opoia na maurifa mo sohen harihi: Opoia enia romperavu, ale enia romfuhu. Opoia mo sopo mereimerei, teni mo sopo rethapahapa.

⁵ Opoia enia mo sopo vai na hina mahuanuhanu na naho tamlohi.

Opoia enia mo sopo opoi na masalona purongo.

Opoia enia mo sopo lolokoru vila.

Opoia enia mo sopo evi na hehe nona tinapua isana.

⁶ Opoia enia mo sopo avulahi na posposi hehe,

pani mo avulahi na retivarafuhu.

⁷ Opoia enia mo tatamahu mata hina filangi tari.

Opoia enia mo lo kilau mata hina fuhu purongo.

Opoia enia fomfilangi mata hina fuhu la pa mai.

Opoia enia turu filangi tarea.

⁸ Opoia, i pa sopo te isoisona hin te rani pani retimangovi la pa tihai, leo tinatinapua la pa isoiso, ale lelevosahi la pa tihai.

⁹ Matan enfa fa levosahi makomona purongo, ale fa lo retimangovi makomona purongo, ¹⁰ pani vara haratu sei mo sopo vejuveju hin te suiha hatea i pala, fa pa sopo mele opoi la hinau sei fa lo vejuveju hinira nake, matan la pa tihai.

¹¹ Hin pongi atu na lo natirihi, na retireti sohenata natiirihi. Na lo romromi sohenata natiirihi, noku kilakilau mo sohenata natiirihi. Hin pongi atu na mai tamlohi, na tau nafihi na posposi nona natuvarahi. ¹² Matan nake nofa kilakilau mo pa lo vusovusoha, pani na pongi hitahu nofa kilakilau i pa mera i fuhu. Nake na lo levosahi na makomona purongo, pani hitahu a pa levosahi vevuhia tataholo sohenata God mo pete levosahi vevuhiau moiso.

¹³ La hinau akerihi mo tolu natu, la pa lo toho jejeu:

rasua, romtoho, peresi na opoia, pani hinau aulu hinira, enia opoia.

14

Otori Sei Tanume Tapu Mo Lo Silera

¹ Ha tau na opoia hina tiro ma maurimim, ale ha tau na romimim i filangi mata lavi la otori ruhu ruhu sei Tanume Tapu i efi silea isamim, ale hinau atu mo fuhu jea hinira, enia matan vara ha efi vere na retimangovi sohenata God mo mangovi kamim hinia. ² Matan haratu mo lo retireti na leo tinapua matea Tanume Tapu mo silea, mo sopo retireti isana tamlohi, pani isan God, matan mo sopo tea i rongovosahia, matan enia mo lo vere na hina luhu hin Tanume Tapu. ³ Pani haratu mo lo retimangovi sohenata God mo mangovia hinia, enia mo lo tueni na tamlohi vara la efi ulua hin Moli, ale mo lo retituetenira, ale mo lo retinanauhira. ⁴ Haratu mo lo retireti hin te leo matea Tanume Tapu mo silea isana, enia

mo lo tuenia hasena vara i ulua, pani haratu mo lo retimangovi sohenata God mo mangovia hinia, enia mo lo tueni na vao kalesia vara la ulua.

⁵ Ale, a pa avulahi vara kamim mo isoiso ha efi retireti hin la leo tinatinapua atu sei Tanume Tapu mo lo silea, pani i pa mele fuhu jea vara ha efi retimangovi sohenata God mo mangovi kamim hinia. Retimangovi enia mo mele aulu jea na retireti na leo tinapua matea sei Tanume Tapu mo lo silera, i pa mele fuhu jea vara tea i efi posi leo atu matan vara vao kalesia la efi levosahi na faramina, ale la pa efi ulua matana.

⁶ Ale la voraiku peresi na vevoraiku, vara a mai isamim, ale a retireti isamim hin te leo tinapua hatea sei Tanume Tapu mo lo silera, i pa tueni kamim sohenata sava? Pani vara a lavi te reti hin te hinau God mo vuhesia isaku, teni te hina lelevosahi, teni te retimangovi matea God mo mangovia isaku, teni te vujangi matea, ale haratu io, i pa tueni kamim. ⁷ Mo sohenata pue tangangi teni te potikevu matea, mo sopo te mauri hinira, enira sohenata, vara tea mo sopo soro tataholo te vete hinira, hare i pa rongovosahi vete atu mo lo soro hinia? ⁸ Ale vara tea mo tiv na trumpet, ale roroana mo sopo tataholo, hare i pa tamamahunia hasena mata vuro? ⁹ Ale mo sohenata isamim, vara mememim mo lo retireti na leo matea tea i sopo efi rongovosahia, tea i pa efi levosahi na sava ka lo vereata sohenata sava? Matan ka lo vaore purongo.

¹⁰ Varafuhu, leo tinatinapua la lo toho na varama, ale mo sopo tea vara mo sopo te faramina. ¹¹ Pani vara na sopo levosahi na faramin te reti hatea a pa sohenata vinano isan haratu mo lo vereata, ale haratu mo lo retireti enia i pa sohenata vinano isaku. ¹² Ale matan ka lo opoia jea vara ha lavi te otori isan Tanume Tapu, mo fuhu vara ha usi God matan la haratu sei la efi tueni na vao kalesia tari vara la ulua.

¹³ Matan haratu, haratu mo lo retireti na leo tinapua matea Tanume Tapu mo silea isana, mo tataholo vara i usi usi vara i efi lavi na suiha mata i vereuli na faramin la retireti atu. ¹⁴ Matan vara na lo usi usi na leo tinapua matea Tanume Tapu mo silea isaku, mapuku mo lo usi usi usuri na suiha otori atu, pani romiku mo sopo rongovosahi na sava na lo vereata.

¹⁵ Vara mo sohenata haratu a pa vai na sava? A pa usi usi usuri na suiha otori atu na mapuku, ale a pa usi usi usuri na sava mo lo toho na romiku sohenata; a pa lalavete usuri na suiha otori atu na mapuku, ale a pa lalavete usuri na reti enau na levosahi na faramira. ¹⁶ Matan vara ko lo hashaso God

usuri na suihan otori atu na mapum, so-hena sava natu, te tamlohi mo sopo tahisam i efi vere 'amen' vara mo sopo rongovosahi na sava ko lo vereea na nom vere meje isan God? ¹⁷ Matan korong, nom vere meje mo tataholo purongo, pani i pa sopo efi tueni pa tamlohi atu vara i ulua.

¹⁸ Na vere meje isan God matan enau na lo retireti hin leo atu Tanume Tapu mo silea isaku mo tavera, mo jeu kamim mo isoiso. ¹⁹ Pani na naho vao kalesia, i pa mele fuhu jea vara a vere te reti i lima isara vara la efi rongovosahira matan vara i efi tuenira, mo jeua vara a vere na reti mo tari vaha sangavulu (10,000) na leo tinapua matea la sopo rongovosahia.

²⁰ La voraiuku peresi na vevoraiku, romfomi nona natuvarihia i sopo toho isamim. Ha pipi mata vai na hehe, pani ha tamlohi na nomim romfomi. ²¹ La ulia na Leu lara,

Moli mo vereea vara:

'A pa retireti isan noku tamlohi na leo tinatinapua, ale na jingo vinano. Pani isoisona, la pa sopo tapurongo isaku.'

Isa 28.11-12

²² Ale matan reti atu, retireti na leo tinatinapua, enira matamata matea mo sopo nona tamlohi rasua, pani nona tamlohi la sopo rasu. Ale retimangovi sei God mo mangovira enia matamata matea mo sopo nona tamlohi la sopo rasua, pani nona tamlohi la rasua. ²³ Ale vara tamlohi kalesia tari la lo pulutahi jara matea, ale la lo retireti na leo tinatinapua Tanume Tapu mo silea isara, ale vara te vinano teni te tamlohi la sopo rasu la unu atu, fa levosahia vara la pa vereea vara kamim ka putu. ²⁴ Pani vara kamim mo isoiso ka lo retimangovi, ale vara te vinano teni te tamlohi mo sopo rasu mo unu atu, i pa levosahia vara enia tamlohi hehe matea matan God i pa pisuhi na hehe na maurina, ale i pa rongovosahia na mapuna vara mo pete tia moiso mata talai non God. ²⁵ Hina luhu na mapuna la mavuhesi, ale i pa jovi popovitoho, ale i pa lotu God i pa vereea vara, "Varafuhu purongo! God mo lo toho na livuhamim."

Posposi Tataholo Mata Lotu

²⁶ La voraiuku peresi na vevoraiku, i pa sohena sava natu? Vara ha pulutahi jara matea, te hatea i pa lavi te vete, te tinapua i vujangi, te tinapua i vereuli te hinau paro God mo vujangia isana, te tinapua i pa retireti na leo tinapua matea Tanume Tapu mo silea isana, ale te tinapua i pa posposi reti atu matan vara vao kalesia la efi levosahia. Hinau tari ka lo vaira, ha pa vaira matan vara tamlohi la pa ulua matara.

²⁷ Vara tea la efi retireti na leo tinapua matea Tanume Tapu mo silea isana, ha sopo tinafihia vara i jeu i rua teni i tolu la retireti, ale te hatea i retireti moiso, ale te tinapua i pa pete retireti, ale te hatea i pa vere na farami nora retireti. ²⁸ Pani vara mo sopo tea vara i efi posi na nora retireti, la pa sakele malum purongo, ale la retireti isara hasera peresi God.

²⁹ Ha tinafihia vara te pfovet i rua teni i tolu la retireti, ale tatua pfovet la pa tapurongo usuri na sava la lo vereea. ³⁰ Vara God i vuhesi te hinau isan te tinapua mo lo sakele atu, haratu mo lo reti tiroma i pa sopo reve na nona retireti i peravu, pani i sile na masapa isana vara i efi retireti. ³¹ Matan kamim mo isoiso ha efi sile te reti God mo mangovia isamim, matea i retireti moiso ale matea, matan vara kamim mo isoiso ha efi lavi te lelevosahi atu, ale ha ulua na nomim rasua. ³² Ha levosahia vara la haratu la lo vere na retimangovi God mo silea isara, enira la efi hase taurilatira, la sasaovi mata masapa vara la efi retireti hinia, ³³ matan God enia mo sopo God mata kojokojohi, mo vono, enia God mata tamata, ale posposi tataholo akerihi sei la lo vaia na vao kalesia mata tapuhi tari non God.

³⁴ Ha'ai la pa toho malum na lolo ima lotu, matan mo tapu isara vara la efi retireti ea, ale la pa tapurongo sohena leu mo vereea. ³⁵ Vara la opoia vara la levosahi mamahuni te hinau, la pa usi na tuara hinia na imara, matan mo sopo tataholo vara te ha'ai i retireti na naho vao kalesia.

³⁶ Ka romi vara lelevosahi mata reti non God mo tapulo isamim, ale ka romi vara mo isoiso isamim purongo? ³⁷ Vara tea mo lo romfomia vara enia pfovet matea, teni enia mo tapu, enia i pa romfomi mamahuni na sava na lo ulia isamim vara enira retireti non Moli. ³⁸ Vara tea mo lo kilau purongoi hinau nike, tamlohi atu mo sopo fuhu matan te hinau.

³⁹ Ale matan hinau tari atu la voraiuku peresi na vevoraiku, ha opoia jea vara ha efi vere na retimangovi God mo silea isamim. Ale ha sopo horo na retireti na leo tinapua sei Tanume Tapu mo silera. ⁴⁰ Pani ha vai na hinau tari usuri na posposi tataholo na malelera tataholo.

15

Vujangi Mata Sauteterahi Non Kristo

¹ Ale la voraiuku peresi na vevoraiku, na opoia vara ha mele romfomi pa Retifuhu sei na lo retivujavujangi kamim hinia sei ka lavia moiso, ale mo tikeli nake, ka pa lo turu filangi hinia. ² Ale ka lo juri hinia nake, vara ha lo taurilati filangi reti atu sei na retivujavujangia isamim, vara i vono, korong nomim rasua enia hina purongo.

³ Matan na pete sile kamim hin vujangi aulu atu hin la haratu Moli mo lo silera isaku moiso, enia vara Křisto mo mate mata nofa hehe, sohena Retitapu mo vere, ⁴ ale usuri na noku vujangi, enia la tavunia, ale na hatolu rani God mo sauteterahia sohena Retitapu mo vere. ⁵ Ale hin rani atu enia mo pala isan Peter, moiso isan la nona tamlohi usuri atu tupu sangavulu řomana mo rua. ⁶ Moiso, mo mele pala isana vao vorai kalesia matea na rani matea, evira mo jeu mo ngav sangavulu lima, (500) vao tavera hinira la pa lo mauri mo tikeli nake, pani tatuara la mate moiso. ⁷ Ale moiso mo pala isan James, moiso mo pa isana vahařule tari. ⁸ Hitahu mo pala isaku, mo sohena vara na sopo vora na noku rani vora tataholo. ⁹ Matan na nona vao vahařule enau na atano jea, ale mo sopo tataholo vara la toviau vara a vahařule matea, matan na lo levuti na vao kalesia non God.

¹⁰ Pani řomřuhu non God mo vaiau na mai sava tamlohi nake, ale nona řomřuhu isaku mo sopo vano hina purongo. Mo vono, matan enau na voko řilangi mo jeu na vahařule tari, pani mo sopo enau haseku na lo voko, pani řomřuhu non God sei mo lo toho hiniau. ¹¹ Mo sopo te hiniau hinia vara hare natu mo retivujavujangia isamim vara enau teni enira, hina aulu hinia enia matan ka rasu na sava kama retivujavujan-gia isamim.

Mele Turu Na Mateia

¹² Ale ha to vere isaku, mata sava natu, tatuamim la lo vere vara i pa sopo te sauteterahi na mateia? Na lo usia sohena matan kama lo retivujavujangia vara Křisto mo turu na mateia. ¹³ Matan, vara i sopo te sauteterahi na mateia, mo vere vara Křisto mo sopo mele turu na mateia. ¹⁴ Ale vara Křisto mo sopo turu na mateia, nomam retivujavujangi enira la vano hina purongo, ale nomim rasua mo vano hina purongo. ¹⁵ Ale vara sohena, kamam nona vahařule kama lo retihalu hin God matan kama lo vere vara God mo sauteterahi Křisto na mateia, pani vara reti atu mo varařuhu, mo vere vara God i pa sopo sauteterahi na tamlohi. ¹⁶ Matan, vara la haratu la mate la sopo mele turu na mateia, Křisto sohena mo sopo turu na mateia. ¹⁷ Ale vara Křisto mo sopo mele turu na mateia, nomim rasua enia hina purongo, ale kamim ka pa lo toho na nomim hehe. ¹⁸ Ale la haratu la mate hin Křisto la tihai jejeu. ¹⁹ Vara nofa řomtoho hin Křisto enia matan mauri nika nake purongo, tamlohi tinapua la pa řomřomia vara enfa řa rongorongono vono.

²⁰ Pani mo vono! Enia hina varařuhu matea vara Křisto mo turu na mateia, enia vua tiroma hin la haratu la mate moiso.

²¹ Matan sohen mateia mo mai na tamlohi matea, ale mele turu na mateia mo mai na tamlohi matea. ²² Matan hin Adam, tamlohi tari la mate, ale tamlohi tari hin Křisto la pa mele mauri. ²³ Pani usuri na malele tataholo mata sauteterahi, Křisto mo tiroma, moiso la haratu nona na nona mele mai.

²⁴ Moiso pongi hitahu i pa pala hin rani atu vara Křisto i komo na suiha meresahi tari sei la aulu teni la lo tauri na suiha peresi na řilangi, moiso i pa sile na nona suiha mata aulu na hinau tari isan God Tama. ²⁵ Matan enia i pa tauri na suiha i tikeli rani atu vara mo tau vevuhi na nona meresahi tari na ruhuruhu palona. ²⁶ Isoiso meresahi vara i pa komoa, enia mateia. ²⁷ Matan Retitapu mo vere vara, 'God mo tau vevuhi na hinau tari vara la pa toho na ruhuruhu palona'.

Psa 8.6

Reti atu mo vere vara, 'hinau tari vara la pa toho na ruhuruhu palona' mo memera purongo vara God Tama i pa sopo toho na ruhuruhuna. ²⁸ Hin rani atu hinau tari la mai na ruhuruhun Natuna, ale Natun God sohena i pa hase taua i toho na ruhuruhun God Tama sei mo tau na hinau tari na ruhuruhuna, ale God i pa aulu na hinau tari na jara tari.

²⁹ Vara tamlohi la pa sopo turu na mateia, sava natu mo lo toho na řomin la haratu la lo lavi na paptijo matan la haratu la mate moiso? Vara tamlohi la pa sopo turu na mateia, mata sava natu tamlohi la lo lavi na paptijo matara?

³⁰ Sava natu mo řuhu na nomam vavahinau nika, matan mo lo tau na mateia na nahomam tarea? ³¹ Matan na lo vere tataholia isamim la voraiku peresi na vevoraiku, noku hapahapa hin Křisto enia kamim sei, matan rani mo visa moiso, mariviti a lo mate matamim. ³² Sava hina řuhu i pa malue na noku valum peresi maji jala sei, la tamlohi atu Ephesus, vara i pa sopo te sauteterahi na mateia? Vara mo sopo te sauteterahi, mo řuhu vara řa vaia usuri retireti nika vara,

'Ra vai na hanhani tavera,

ale řa inu, matan pavuho řa pa mate.'

Isa 22.13

³³ Ha sopo tinařihia vara tea i halu kamim hin haratu la lo vere lara, "Posposi nona tamlohi sasati i efi posi na posposi tataholo nona tamlohi řuhu."

³⁴ Ha rovo na nomim posposi sasaruhi, ale ha isoiso na hehe, matan tatuamim la sopo levosahi te hinau hin God. Na vere matan vara a vai kamim ha mahanuhanu.

Epe Tuai Peresi Na Epe Paro

³⁵ Pani tea i pa usia vara, 'Tamlohi mate la pa mele turu sohena sava? Ale epera la pa sohena sava?' ³⁶ Kamim tamlohi

rongorongono vono! Sava ka lavoa i pa sopo efi mauri vara i sopo mate tiroma. ³⁷ Ale sava ka lavoa, mo sopo enia natu mo mele tuvu, matan enia piri matea purongo, hina purongo vara piri wit teni te piri vipahai tinapua. ³⁸ Ale God mo silea na epenu usuri na masalona, ale mo sile na piri hatehateahi na epe tinatinapua. ³⁹ Matan epe tari la sopo sohesohera, pani epe tamlohi enira la sohesohera, epe maji palo vati la tinatinapua, epe maji avuavu mo mele tinapua, ale epe maji tasi mo tinapua.

⁴⁰ Epe hinau na tuka la tinapua na epe hinau na varama, pani memera epe na tuka la tinapua, ale memera epe na varama la tinapua. ⁴¹ Memera alo enia hinau matea, memera vitu enia mo tinapua, memera vitusarasara la mele tinapua, matan memera vitusarasara matea matea la tinatinapua.

⁴² Ale mo sohena natu na sauteterahi nona mateia. Sava la tavunia enia i pa rovo, sava mo mele turu enia i sopo efi rovo. ⁴³ Sava la tavunia enia hina purongo, ale sava mo turu enia mo fuhufuhu jea. Sava la tavunia enia mo talekoleko, ale sava mo turu enia mo rilangi. ⁴⁴ Sava la tavunia enia epe mata varama, ale sava mo turu enia epe matan na tuka. Vara epe matea matan varama nike, i pa epe matea matan na tuka.

⁴⁵ Sohen la ulia lara, 'Tamlohi tiroma atu Adam mo mai tamlohi mo lo mauri'. *Gen* 2.7 Harua Adam atu mo pa mai hitahu, enia mo sile na mauri mata Tanumen God. ⁴⁶ Sava mo mai tiroma, mo sopo haratu matan na tuka, pani haratu mata varama, haratu matan na tuka mo pa usuria hitahu. ⁴⁷ Tamlohi tiroma, enia mo tai na varama, mo malue na lepa, pani harua tamlohi enia mo tai na tuka. ⁴⁸ Tamlohi tari na varama la lavi na epe varama sohen Adam, pani epefa matan na tuka i pa sohen epen Kristo. ⁴⁹ Nake fa sohen Adam, tamlohi mata varama, ale hitahu fa pa sohen Kristo sei mo tai na tuka.

⁵⁰ La voraiuku peresi na vevoraiku, na vere isamim, vara epe peresi na fae matan varama nike la pa sopo efi unu hin mauri atu na tuka, teni haratu i pa rovo i pa sopo efi unu hin mauri atu i sopo efi rovo.

⁵¹ Ha tapurongo, a pa vere kamim na hina luhu matea. Enfa mo isoiso fa pa sopo mate, pani enfa mo isoiso fa pa posi, ⁵² vahatea purongo na isoiso roroa trumpet non God. Matan roroan trumpet atu i pa roroa, ale la haratu la mate la pa turu la sopo efi mele rovo. Enfa mo isoiso fa pa posi. ⁵³ Matan epe mata rovo nike, i pa ru epe atu i sopo efi rovo, ale epe mata mate nike, i pa ru na epe i sopo efi mate.

⁵⁴ Hin rani atu vara hinau mata rovo mo ru na hinau i sopo efi rovo, ale epe mata mate i ru na epe i sopo efi mate, ha pa

levosahia vara sava la ulia tuai moiso i pa masese natu vara, 'Suiha mata mauri mo rolohi na mateia.' *Isa* 25.8

⁵⁵ 'Eh mateia! Suiham enia epu?

Eh mateia! Suiham mata sile na rongohaji enia epu?' *Hos* 13.14

⁵⁶ Suiha mata sile na rongohaji non mateia enia hehe, ale suiha mata hehe enia leu non God. ⁵⁷ Pani fa vere meje isan God sei mo lo silefa na suiha matan vara fa jeu na nofa meresahi tari hin nofa Moli Iesu Kristo.

⁵⁸ Matan hinau sei, la voraiuku kalesia fuhufuhu, ha turu rilangi, ale ha sopo hisuhisu, tarea ha vai na vavahinau non Moli matan ka levosahia vara hin Moli nomim vavahinau i sopo efi vano hina purongo.

16

Silesilea Mata Kalesia Jerusalem

¹ Ale usuri na hinau na nomim leta mata silesilea mata mania nona tapuhi, sava na vere isana mara Galatia, kamim sohena, ha pa vaia sohera. ² Na tiroma rani na wik hatehateahi, kamim hatehateahi ha pa tauhasehi te mania na volimim, ale ha tau mamahunia, sohen ka hitea mo tataholo isamim, matan vara hin pongi atu vara a mai isamim, ka pete tatamahunia moiso vara a lavia. ³ Ale hin rani atu vara a pala, a pa rule la haratu ka vifonira moiso peresi na leta vara i vereulia vara enira la tai epu peresi na nomim silesilea i sivo Jerusalem. ⁴ Vara ka hitea vara mo tataholo vara a sivo peresira, mo lo fuhu purongo, la pa usuriau.

Romromi Mata Roroahi Corinth

⁵ A pa rohi kamim vara a hahau roto Macedonia, matan na lo romfomia vara a pa hahau roto Macedonia. ⁶ Korong a pa toho isamim makomona, vara i vono, a pa toho isamim na pongi hamariri, matan vara ha efi tueniau na maleleku na sava jara vara a vano ea. ⁷ Matan na sopo opoia vara a hite kamim mata makomo rani purongo. Na lo romtoho vara a pa toho peresi kamim i peravu makomona vara Moli mo avulahi. ⁸ Pani a pa toho Ephesus i tikeli na pongin Pentecost, ⁹ matan masapa mata vavahinau matea mo roi isaku vara a efi vai te vavahinau non Moli nike, ale noku meresahi enira matuvana.

¹⁰ Vara Timothy i mai isamim, ha kilau mamahunia, enia mo lo vai na vavahinau non Moli soheku. ¹¹ Ha sopo tinafihia vara tea i hitelehilehia. Ha rulea na malelena peresi na nomim lefuhu vara i mai isaku.

Na lo kilau vara a pa hitea peresi na tatua vorai kalesia tinapua i sopo tuai.

¹² Ale voraiŕa atu Apollos, na lo usia ŕilangi isana vara i rohi kamim tolu na voraiŕa kalesia tinapua nike. Pani mo sopo opoia vara i mai nake, i pa mai hitahu vara i hite te masapana.

¹³ Ha lo kilau, ha lo turu ŕilangi na rasua, ha ŕomŕilangi, ha ŕilaŕilangi. ¹⁴ Na hinau tari ka lo vaira, ha vaira na opoia.

¹⁵ Ka levosahi Stephanas peresi na vao imana enira la mai kalesia tiroma nike Greece, ale la sile na maurira matan vara la vavahinau la tueni na kalesia tinapua. Na lo usia ŕilangi isamim la voraiŕu peresi na vevoraiku, ¹⁶ vara ha sile na oloolo isara peresi la haratu sei mapura la lo toho na nora vavahinau sohera. ¹⁷ Na lo avulahi tavera na mai non tahisamim Stephanas, Fortunatus peresi Achaicas, matan enira la lavi na jaramim nike peresiau. ¹⁸ Matan la vai na ŕomiku mo mele ŕuhu sohen la lo vaia na maurimim. Ha sile na oloolo isana tamlohi sohen harihi.

Isoiso Retioloolo Non Paul

¹⁹ Vao kalesia nike Asia, la sohai na nora retioloolo isamim. Aquila enia Priscilla peresi na vao kalesia na imara la sohai na retioloolo ŕuhuruŕu isamim hin Moli. ²⁰ La vorai kalesia tari nike, la sohai na nora retioloolo isamim. Ha tapatapai kamim hatehateahi na posposi tataholo nona tapuhi non God.

²¹ Enau Paul na uli la retioloolo nike na limaku. ²² Vara tea mo sopo te opoia non Moli isana, lesati i pa toho isana. Noŕa Moli, o mai. ²³ Romŕuhu non Moli Iesu i pa toho isamim. ²⁴ Noku opoia i pa toho isamim mo isoiso, hin Kristo Iesu. Amen.

2 Corinthians

Harua Leta

Paul Mo Ulia Isana Mara

Corinth

Leta Nike

Paul mo farami na retiusia nona kalesia Corinth, vara Paul i pa pala sohen mo vereia isara moiso teni mo vono. Mo sopo opoia vara i rohira matan mo levosahia vara i pa arira mata nora hehe (1.23). Paul mo opoia vara i sile na masapa isara vara i eri hitea vara la pa hahau usuri na mauri rasua sohen sava (2.5–11).

Paul mo vereia isara mara posin God mo ruhu isan la haratu la vejevu, ale mo lo kilau vara la pa tueni na kalesia la tilavono Jerusalem peresi Judea (8.1–9.15).

Paul mo vereia mara enia volitusi mata retitauhi paro non God (3.1–17). Mo lo turu rilangi mata lavi na tamlohi la mai isan God, hina purongo vara mo lo lavi na rani rilangi matana. (4.1–6.13; 10.1–12.10).

‘La hinau tari nike la tai isan God sei mo sara tamata peresi na tamlohi na varama hin Kristo, ale enia natu mo sile kamam na vavahinau mata tau na tamata.

Matan fa eri vereia vara hin Kristo, God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata.’ (5.18–19)

Hin Leta Nike

1. Paul mo vere meje isan God (1.1–11)
2. Vavahinau nona vahaʻule non God (1.12–2.17)
3. Opoia non Kristo mo haloa (3.1–7.16)
4. Otori nona tilavono (8.1–9.15)
5. Vahaʻule varaʻuhu (10.1–13.10)
6. Isoiso Retioloolo (13.11–13)

Retioloolo Non Paul

¹ Enau Paul na uli leta nike peresi vorairi Timothy, enau vahaʻule non Kristo Iesu matea usuri na masalon God. Kama lo uliuli mo vano isana vao kalesia non God Corinth peresi na tapuhi sei la lo toho ralihi na jara taverna matan Achaia. ² Romʻuhu peresi na tamata la mai isamim la tai isan God Tamaʻa peresi Moli Iesu Kristo.

God Mo Tahe Na Romi Nona Tamlohi

³ Hasohaso taverna i vano isan God sei Taman noʻa Moli Iesu Kristo, enia God mo lo romopoi na tamlohi, ale God mata tahe la haratu romira la jovi. ⁴ Enia mo lo tahe na fomimam na nomam rani rilangi tari matan vara kama eri tahe na romin tinapua na nora rani rilangi hin nanauhi sei God mo silea isamam. ⁵ Ale sohen kamam kama lo lavi na rani rilangi matuvana matan Kristo,

ale hin Kristo sohen nomam nanauhi mo maʻivi savulevule. ⁶ Pani vara kama lo lavi na mauri rilangi, ka levosahia vara kama lavira mata i tahe na romimim ale mata maurimim la juri; ale vara God mo tahe na romimim, enia matan vara kama eri tahe na romimim na nomim rani rilangi. Ale matana, ha eri rom peravu ha turu rilangi na rani rilangi sei sohen kama lo lavira. ⁷ Kama levosahi mamahunia vara ka lavi na rani rilangi peresi kamam, God i pa tahe na romimim sohen mo lo vaia isamam.

⁸ Matan, la vorai peresi na vevorai, kama opoia vara ha levosahi mamahuni na rani rilangi sei kama lavira na jara taverna matan Asia. La lo puhoni kamam la jeu na suihamam tari, ale kama rom vara kama pa mate. ⁹ Varaʻuhu, kama rom vara talai mata mateia mo jovi isamam moiso hin la rani rilangi atu, ale matana, kama sopo mele rasu na suihamam pani kama tau na nomam rasua hin God sei mo sauteterahi la haratu la mate. ¹⁰ God mo sau naʻihi kamam na liman mateia, ale i pa juri kamam, ale kama tau na nomam romtoho isana vara i pa mele juri kamam. ¹¹ Kamim sohen, ha pa tueni kamam na nomim usiusi matamam, ale vuana, tamlohi matuvana la pa vere meje isan God matamam matan enia mo juri kamam na usiusi nona tamlohi matuvana.

Paul Mo Posi Na Romina

¹² Kama lo retihapahapa sohen matan kama eri vere tataholoia vara romimim la sopo pisuhi kamam hin te nomam vavahinau mo sati kama lo vaira na naho tamlohi tari teni isamim. Kamam kama lo turu na romʻuhu non God, mo sopo na levosahi nona tamlohi, kama romatano kama lo hahau sohen natirihina na naho tamlohi, ale kama lo vaia nike isamim mo jeu na jara tinatinapua. ¹³ Matan kama lo uli na sava mo lo toho na romimam hin leta nike matan vara ha eri levosahi mamahunia, ale na lo romtau vara ha pa levosahi mamahuni kamam, ¹⁴ hina purongo vara nake ka sopo lo levosahi mamahuni kamam. Hin rani atu vara noʻa Moli Iesu i mele pala, kamim ha pa hapahapa matamam sohen nake kamam kama lo hapahapa matamim.

¹⁵ Ale matan na levosahi hinau atu, na lo vereia isamim tiroma vara a pa rohi kamim mata a sile na leʻuhu vaha rua isamim vara a toho peresi kamim. ¹⁶ Hin rani atu na fomi vara a pa toho peresi kamim na maleleku na lo vano Macedonia, ale vara a lo mele mule ha pa tueniau na maleleku vara a sivo Judea.

¹⁷ Korong ka romʻomia vara na posi na romiku vara a pa rohi kamim matan na

sopo mele pala isamim sohen na vereaa moiso. Korong kara na lo halu sohena tamlohi varama sei lara “io” pani farami nora retireti tataholo enia “mo vono”.¹⁸ Sohen God mo lo vararuhu tarea, nomam retisohai isamim mo sopo “io” ale hitahu “mo vono”.¹⁹ Matan Natun God, Iesu Kristo, haratu sei enau, Silas peresi Timothy, kama lo retivujavujangia isamim enia mo sopo “io” ale hitahu “mo vono”, pani hin Iesu enia “io” tarea.²⁰ Matan retitauhi tari non God hin Iesu enira mo isoiso “io”, ale matan haratu natu fa lo vere “amen” na rani fa lo hasohaso God hin Kristo.²¹ Pani God natu mo vai kamam kama filangi peresi kamim na rasua hin Kristo, ale enia natu mo vifonifa mata nona vavahinau,²² ale enia mo tapuhifa, ale mo tau na Tanumena na mapufa mo sohena vara mo tau na sope volifa tiroma na hinau tari la pa mai hitahu.²³ Ale na nahon God, na sopo halu, na sopo mele mai isamim Corinth matan na sopo opoia vara a vere komokomo kamim.²⁴ Na sopo opoia vara kama aulu na nomim rasua, pani vara kama tapala peresi kamim na vavahinau matan vara nomim avulahi i pa mafivi na nomim turu filangi na nomim rasua.

2

¹ Ale mo vaia na tau na fomiku vara a pa sopo rohi kamim ale ha mele rongo i sati matana.² Matan, vara a vai kamim ha rongo i sati, hare natu i pa vaiau a avulahi pani la haratu sei na lo vaira la rongo mo sati?³ Ale na uli hinau akerihi isamim matan vara a mai, a pa sopo rongo i sati hin la haratu sei mo tataholo vara la vai na noku avulahi i tavera jea. Ka sopo levosahia vara noku avulahi mo lo turu na nomim avulahi?⁴ Na rongo mo sati hajavua hin rani atu na uli leta atu isamim, fomiku mo jovi tavera ale na tangi matana. Na sopo opoia vara a vai kamim ha fom sasati, pani na opoia vara ha levosahia sohena sava na lo opoi kamim.

God Mo Romi Na Tamlohi Hehe

⁵ Vara tamlohi atu mo vaiau na rongo mo sati, mo sopo vaiau haseku vara a rongo i sati, pani na malele tinapua mo vai kamim mo isoiso ka rongo mo sati.⁶ Enia mo lavi na rani filangi tavera mata talai atu sei ka lo silea isana moiso hin rani atu kamim mo isoiso ka pulutahi jara matea mata aria.⁷ Ale nake mo tataholo vara ha fomia, ale ha mele tahe na fomina, vara i vono, fomina i pa sati jea ale i jovi narihi na nona rasua vevuhi.⁸ Ale nakerihi, i pa fuhu jea vara ha vujangia vara ka pa lo opoia.

⁹ Hin rani atu na lo uliuli sohena isamim matan vara a pa hitea vara ha pa ololo hiniau i tikeli epu.¹⁰ Vara ha fomi tamlohi akerihi hin te hinau, enau sohena a pa

fomia vara te hinau mata fomia mo lo toho mo tikeli nake, ale na vaia na suihan Kristo matamim,¹¹ matan vara Setan i pa sopo jeufa, matan enfa fa levosahi mamahuni na malelen Setan.

Volitusi Mata Retitauhi Paro

¹² Hin rani atu nara na pala Troas vara a retivujavujangi na Retiruhu hin Kristo, hina purongo vara Moli mo sileau na masapa tavera matea,¹³ fomiku mo sopo sakele matan na sopo lo hite voraiuku Titus ea matan vara i vereau vara kamim ka lo toho sohena sava. Ale matana, na enfa vuho isara Troas ale na malue na vano Macedonia.

Vavahinau Nona Vahafule

¹⁴ Pani fa vere meje tavera isan God sei hin Kristo, mo lo tiroma fa lo jeu na nofa meresahi tarea. Ale na sava jara fa lo vano hinira, enia mo vaifa fa lo vere na tinapua hin Moli, ale fa lo sohai na Retiruhu sohena hasori ponaha fuhu matea.¹⁵ Matan enfa fa hasori ponaha fuhu non Kristo isan God isan la haratu sei God mo lo jurira, ale isan la haratu sei la pa tihai —¹⁶ enfa hasori ponaha ranga matea mata i sile na mate isara, pani isan vao atu la rasua enfa hasori ponaha fuhu matea mata i sile na mauri. Ale hare natu mo tataholo mata i vai la vavahinau nike?¹⁷ Matan kamam kama sopo sohen la vao tamlohi vujangi tinapua sei la lo vere na reti non God na nora halu mata lavi na mania. Mo vono, kamam kama lo retivujavujangi na retisohai non God mo sopo te halu hinia na nahon God, ale peresi na suihan Kristo usuri na posposi tataholo nona vahafule non God.

3

¹ Ka fomia vara kama lo mele tapulo tahe kamam hasemam teni mo vono? Korong ka lo fomfomia vara kama pa lavi te leta isamim teni i mai isamim vara i vereaa vara kamam sava tamlohi, sohena tamlohi tinapua la lo lavira matan tamlohi la sopo levosahira?² Kamim ka nomam leta sei God mo ulia na mapumam, tamlohi tari la levosahia ale la efi evia,³ mo vujangia vara kamim ka leta matea non Kristo sei kamam kama lo lavia mo mai isana, tea mo sopo ulia na pepa na limara pani Tanumen God sei mo mauri mo ulia, mo sopo sohena leu mo ulia na tavalu vatu, pani na mapu tamlohi.

⁴ Kama levosahi mamahuni la hinau nike nomam rasua hin God hin Kristo mo tavera.⁵ Enia mo sopo vara kama fomfomia vara kama efi vai te hinau kamam hasemam, pani nomam efi efi mo tai isan God,⁶ sei mo vaifa fa tataholo mata efi vai na vavahinau non retitauhi paro mata mauri sei mo sopo

usuri na leu la ulia na pepa, pani na Tanumena, matan leu mo sile na mateia, pani Tanumena mo sile na mauri.

Ruhuruhu Retitauhi Paro

⁷ Pani, vara vavahinau atu tuai mata leu la ulia na tavalu vatu mo sile na mateia, hina purongo mo pala peresi na mera tavera ale mo vaia tadvavuin Israel atu la sopo efi kilau tataholo na nahon Moses mata meran God mo mera na nahona pani mera atu mo lo majara, ⁸ ra levosahia mamahunia vara mera vavahinau non Tanumena i pa mele ruhu jea! ⁹ Matan, vara mera ruhuruhu mo lo toho hin retitauhi tuai atu mata leu sei mo sile na talai, ra levosahia vara retitauhi paro sei mo lo vai na tamlohi la tataholo na nahon God mo mele ruhu jea. ¹⁰ Varaʻuhu, sava retitauhi tuai mata leu mo vereva vara mo mera mo ruhu tiroma, nake mo sopo mele mera i ruhu matan retitauhi paro mo pete lavi na jarana moiso, ale mo mera mo ruhuruhu jea. ¹¹ Matan, vara sava mo lo majara tiroma mo mai peresi na mera ruhuruhu, meran retitauhi paro i pa toho jejeu i pa mele ruhuruhu jea.

¹² Ale matan retitauhi paro nike mo vai na romira mo filangi, mo sopo te matahu na nomam vavahinau, ¹³ ale mo sopo sohen Moses sei tuai mo lo ropoi na nahona na tavalu ruru matea matan vara tadvavuin Israel la sopo efi varoi mera atu mo lo majara na nahona. *Exo 34.30–35*

¹⁴ Pani romira mo pelati, ale mo kakau nake, tavalu ruru atu mo pa lo toho vara la rongo tea mo evi retitauhi tuai atu. Tea i sopo efi lavi nafihi hasena matan hin Kristo hasena tavalu ruru atu i efi malue. ¹⁵ Pani romira mo pa lo pelati mo kakau nake vara la tapurongo na sava Moses mo ulia tuai, tavalu ruru atu mo pa lo ropoi na romira.

¹⁶ Pani vara tea mo posi mo mai isan Moli, Moli mo lanafihi tavalu ruru atu. ¹⁷ Ale Moli enia Tanumen God, ale na sava jara Tanumen Moli mo lo toho hinia, tamlohi la pa materi. ¹⁸ Ale ena mo isoiso nahofa mo lo toho na jara tavera, ale la mera na meran Moli, ale mo lo posifa ra mai sohena na merana makomakomona na suihan Moli sei enia Tanumen God.

4

Hina Ruhuruhu Na Loloʻa

¹ Matan haratu, matan kama lavi vavahinau nike usuri na romopoi non God, romimam la sopo efi jovi. ² Pani kama rohu na hina luhu mata mahanuhanu, ale kama sopo vaihitea vara kama halu tea teni kama sopo posileji na reti non God. Pani kama lo retivujavujangi na retivarafuhu

na jara tavera matan vara tamlohi la pa hitevosahia vara kama lo varafuhu na nahon God. ³ Pani hina purongo vara God mo tavuhoro na noʻa Retifuhu, mo tavuhoro purongo isan la haratu sei la pa tihai sei, ⁴ Setan, god matan varafuhu nike, mo vusohi na romin la haratu sei la sopo rasu, ale la pa sopo efi hitevosahi na meran Retifuhu sei non Kristo — enia niniun God tataholo.

⁵ Kama sopo retivujavujangi hin kamam hasemam, pani hin Iesu Kristo sei enia Moli, ale kama vereva vara kamam nomim slev mata sava Iesu mo vaia matamam. ⁶ Matan God sei mo vereva mara, ‘Malarani i mera na rofoha.’ *Gen 1.3* enia haratu sei mo lo mera na mapuʻa matan vara i sileʻa na mera mata lelevosahi ruhuruhu non God ra hitea na maurin Iesu Kristo.

Hasohaso Tavera Mo Lo Mai

⁷ Pani kama lo lavi la hina ruhuruhu nike na jilivi lepa purongo, matan vara suiha tavera sei tamlohi la efi hitea mo lo malue hin kamam mo sopo nomam pani non God hasena.

⁸ Kama lo lavi na rani filangi na malele tari, pani la sopo lomolomo kamam. Kama sopo levosahia vara kama pa vai na sava, pani kama sopo hilu atu, ⁹ la tipahi kamam, pani God mo sopo rovo hin kamam, la vili sati kamam, pani kama mele turu. ¹⁰ Kama lo lavi na rani filangi tarea na epemam hin mauri nike, ale la lo lavi na rungara mata mateia non Iesu matan vara tamlohi la pa efi hite na maurin Iesu na epemam.

¹¹ Varaʻuhu kama lo toho tarea na matarua mateia matan kama lo volitusi isan Iesu matan vara maurin Iesu i pa mera na jara tavera na epemam sei mata mate. ¹² Matana, kama lo nahoi na mateia, pani vuana enia nomim mauri tui tui.

¹³ Pani kama pa lo retivujavujangi matan nomam rasua mo tataholo na sava la ulia na psalm mara, ‘Na rasua, ale matana, na pa retireti.’

Psa 116.10

Ale kamam sohena, kama rasua, ale matana, kama pa retireti.

¹⁴ Kama pa vaia sohena matan kama levosahia vara God sei mo sauteterahi Iesu, i pa lavi kamam peresi kamim fa ruru na nahona. ¹⁵ Hinau filangi kama lo lavira na maurimam nake enira mata la tueni kamim. Ale sohen romuru non God mo lo lavi na tamlohi matuvana la lo mai isan Kristo, tamlohi la pa mele hasohaso God i tavera jea.

¹⁶ Enia matan haratu natu mo vaia kama sopo hilu taleu. Hina purongo vara suiha epemam mo lo majara, pani maurimam

la lo ulua na rani hatehateahi. ¹⁷ Hina purongo vara fa hite na nofa rani rilangi matan nake sohena hina tavera, pani enira la varihi purongo matan enira mata makomo rani purongo. Ra levosahia vara nofa rani rilangi nake la pa silefa na hasohaso tavera sei i pa toho jejeu hin mauri atu mo lo mai. ¹⁸ Ale fa sopo romromi na nofa rani rilangi matan nake, mo vono, pani fa lo kilau toho mata hinau fa sopo eri hitera. Matan sava sei fa eri hitera, enira la pa toho mata makomo rani purongo, pani sava fa sopo eri hitera la pa toho jejeu.

5

Epe Paro Matan Tui Tui

¹ Matan fa levosahia vara epefa nike na varama fa lo toho hinia mo fovo — vara fa mate fa pa malue hinia — fa levosahia vara jarafa matea mo lo toho na tuka na epe matea matan tui tui sei tamlohi la sopo voroa na limara, pani God hasena mo vaia matafa. ² Ra lo malokoloko hin epefa nike nake, ale fa lo kilau toho matan rani atu sei God i pa ru na epe matan tuka hiniha sohena ruru paro. ³ Matan fa pa sopo toho sohena tanume mo sopo te epera, pani fa pa ru na epe paro matan tuka. ⁴ Epefa nike nake la lo mate, la vaifa fa rongohaji ale la puhoniha, pani mo sopo matan vara fa opoia vara fa mate ale fa sopo lavi te epe hatea. Ra opoia vara fa unu na epefa paro matan vara mauri tui atu i romlomi epefa tui nike. ⁵ God hasena mo tatamahuniha matan la hinau akerihi, ale mo silefa na Tanumena sohena sope volifa tiroma na hinau tari i pa silera hitahu.

⁶ Ale matana, tarea fa lo romrilangi, hina purongo vara fa levosahia vara fa lo toho nike na varama na epefa nakerihi, fa sopo lo toho peresi Moli, ⁷ matan nake, fa lo mauri na rasua, mo sopo na sava fa lo hitera. ⁸ Varafuhu fa romrilangi, ale fa levosahia vara i pa mele fuhu vara fa eri malue hin la epe nike matan vara fa pa toho na jarafa na tuka peresi Moli. ⁹ Hina purongo vara fa lo mauri hin epe nike teni vara fa mate fa malue hinia, fa lo tau na romiha hinia mata i lo vai Moli i avulahi tarea. ¹⁰ Matana enfa tari fa pa turu na nahon Kristo na nona jara sakele mata aria vara i arifa. Ra pa lavi na sava mo tataholo isana usuri na sava fa vaia mo fuhu teni mo soti hin epefa nike na varama.

Vahafulu Non Retitauhi Paro

¹¹ Matan kama levosahi matahu tavera akerihi mata aria non Kristo, enia mo vai kamam kama voko rilangi vara kama reve na tinapua isana. God mo levosahia vara kama lo varafuhu, ale na lo fomtoho vara

kamim sohena ka levosahia. ¹² Kamam kama sopo mele vaihitea vara kama hase tahe kamam, mo vono. Kama lo vere kamim hin la hinau nike matan vara ha eri haphapa hin kamam, ale matan vara ha eri farami la tamlohi vujangi haluhalu atu sei la lo reti mangisi na nora vavahinau purongo, pani la sopo vere varafuhu vara enira la sava tamlohi. ¹³ Matan vara tea la hitea vara kama rongorongo vono, enia matan vara kama pa sile na hasohaso isan God hinira. Ale vara kama lo vai na hinau tataholo, enia matan vara i tueni kamim. ¹⁴ Matan opoia non Kristo mo lo halo kamam, matan kama levosahi mamahunia vara Kristo mo mate mata tamlohi tari: ale matan hinia tamlohi tari la mate. ¹⁵ Ale enia mo mate mata tamlohi tari matan vara la haratu la lo mauri la pa sopo mauri nora hasera, pani la pa mauri non haratu sei mo mate matara, ale God mo sauteterahia na mateia.

¹⁶ Matan haratu nake, kama sopo mele kilau na tamlohi usuri na fom tamlohi. Tuai na lo romromia sohena hin Kristo vara enia tamlohi matea purongo. Pani nake noku kilakilau mo sopo mele sohena. ¹⁷ Mo faramia vara la haratu la mai kalesia hin Kristo la mai tamlohi paro. La sopo mele sohen tuai, matan mauri tuai mo tihai, ale mauri paro mo tapulo moiso.

¹⁸ La hinau tari nike la tai isan God sei mo sari tamata peresi na tamlohi na varama hin Kristo, ale enia natu mo sile kamam na vavahinau mata tau na tamata. ¹⁹ Matan fa eri vere vara hin Kristo, God mo sari tamata non varama vara i mele tapala peresa. Mo sopo mele evi na hehe nona tamlohi, ale mo sile kamam na retisohai mata sari tamata. ²⁰ Matan haratu, kamam kama vahafulu non Kristo, ale hin kamam, God mo lo usi kamim rilangi sohen Kristo hasena mo lo usia vara ha sari tamata peresi God! ²¹ Matan God mo vai Kristo sei mo sopo hehe hin te rani, mo mai nofa malamalai mata hehe, matan vara hinia, fa pa eri mai fa tataholo na nahon God.

6

¹ Ale matan enfa fa tapala na vavahinau non Moli, kama lo usi kamim mo rilangi vara ha sopo romromi purongo na retisohai ruhuruhu mata romfuhu non God. ² Matan God mo vere mara, 'Na ranina tataholo na rongoho,

'Na rani mata juri na tueniho.' *Isa 49.8* Varafuhu, God mo lo tatamahu mata i tueni kamim nakerihi. Nakerihi enia rani mata juri.

Rani Rilangi Non Paul

³ Kama sopo sile na masapa vara tea i pa fohu hin Moli na sava kama lo vaia,

matan vara tea i sopo efi hite te hina sati na nomam vavahinau. ⁴ Matan hinau tari kamam vahaʻule kama lo vaira, kama vai-hitea vara tamlohi la hitea vara varafuhu kamam vahaʻule varafuhu non God. Kama lo fomperavu tarea na rongohaji peresi na rani rilangi peresi na rani sasati tinatina-pua, ⁵ ale na rani tamlohi la tamaji kamam, teni vara la pulahi kamam na lolo ima rilangi, teni vara vao tamlohi la meresahi hin kamam, teni vara kama voko mate, ale kama kilau rani vaha visa, ale kama marohati. ⁶ Kama lo hahau na posposi vokevoke, kama lo vujangi na nomam lelevosahi hin Kristo, ale na nomam fomperavu, na nomam fomfuhu, na nomam opoia varafuhu, ale na suihan Tanume Tapu. ⁷ Kama lo turu rilangi na retivujavujangi mata retivarafuhu. Suihan God mo lo voko hin kamam. Nomam posposi tataholo mo sohena sita vuro matea mata i taijovjovi na hehe na matua limamam, ale tingting matea mata i turuhoro na meresahi na marau limamam. ⁸ Kama lo volitusi isan God, hina purongo vara tamlohi la sile na oloolo isamam teni vara la fohu hin kamam, hina purongo vara la verefesfesi kamam teni la hasohaso kamam. Kama lo varafuhu, pani hai la veree lara kama tamlohi halu! ⁹ Tamlohi la levosahi mamahuni kamam, pani la vai kamam sohena la sopo levosahi kamam. Kama lo toho na matarua mateia, pani ka hitea kama pa lo mauri nahai! La hamaji komokomo kamam pani kama sopo mate, ¹⁰ ale fomimam la sati, pani kama avulahi, kama sohena tilavono, pani kama vai na mauri tamlohi matuvana la mele fuhu jea, ale sohena mo sopo te nomam hinahinau, pani hinau tari enira nomam.

¹¹ La tapala fuhufuhu matan Corinth, kama lo retireti tataholo peresi kamim, kama avulahi tarea mata kama tueni kamim. ¹² Mo sopo te hinau i turuhoro na nomam opoia isamim, pani matan kamim purongo ka horo na nomim opoia isamam. ¹³ Ale ka levosahia vara na lo retireti isamim na opoia sohena natuku tataholo, ale kamim sohena, ha avulahi vara fa mele tapala.

Temple Non God Mo Mauri

¹⁴ Ha sopo turu jara matea na vavahinau non la haratu la sopo usuri na mauri rasua, matan i pa sohena sava vara tea i vai na posposi tataholo i efi tapala peresi la haratu la lo tope na leu? Teni sohena sava natu malarani i efi tapala peresi na fofoha? ¹⁵ Kristo enia Tiapolo la efi turu jara matea hin te hinau teni mo vono? Ka levosahia vara la haratu la rasu God la lo lotua, pani la haratu la sopo rasua la lo lotulotu vono. ¹⁶ Ale sohena sava natu hinau mata lotulotu

vono i efi turu jara matea na lolo Temple non God? Matan enfa fa temple non God sei mo lo mauri, mo sohen God mo retitauhi hinira moiso mara,

‘A pa toho hinira

ale a pa lo hahau na livuhara.

Enau a pa nora God,

ale enira la pa noku tamlohi.’

Lev 26.12; Ezek 37.27

¹⁷ ‘Matana, ha malue hinira

ale ha turu hasemim hinira,

Moli mo veree.

Ha sopo tikeli na nora hina lumiha,

ale a pa avulahi hin kamim.’

Isa 52.11; Ezek 20.34

¹⁸ ‘A pa Tamamim,

ale kamim ha pa natuku,

peresi na venatuku,

Moli God Suiha mo veree.’ *2 Sam 7.14*

7

¹ La tapala fuhufuhu, matan fa lavi la retitauhi nike, fa tau nafihi na posposi tari sei la efi vai na epefa peresi na mauri fa la lumiha, matan vara fa efi lavi mauri atu mo tapu matan fa lo lotu God na nofa matahu.

Paul Mo Avulahi

² Ha avulahi vara fa mele tapala! Kama sopo vai te hinau i sati isan tea, kama sopo tikauleji tea, kama sopo haluhalu tea.

³ Na sopo vere harihi matan vara i vai na fomimim i sati, matan na pete veree isamim moiso vara kamim ka lo toho na mapumam, ale vara fa mate jara matea, fa pa mauri jara matea. ⁴ Enau na rasu kamim, ale noku hapahapa matamim mo tavera jea. Ka tahe na fomiku, ale ka vaiau na avulahi hina purongo na nomam rani rilangi nake.

⁵ Na rani kama kakau Macedonia, kama sopo mapu matan falihii hin kamam rani rilangi la lo mai na jara tari, ale na lolomam, matahu mo lo malue matana. ⁶ Pani God atu sei mo lo tahe na fomin la haratu fomira la jovi mo tahe na fomimam na rani Titus mo pala. ⁷ Kama sopo avulahi purongo na nona pala pani na retisohai fuhufuhu sei ka silea isana. Noku avulahi mo tavera na nona pala matan mo vereau hinia sohena sava ka lo kilau toho matan rani atu vara a pa mele rohi kamim hinia, ale sohena sava fomimim mo sati, ale sohena sava fomimim mo sati matan hehe atu, ale vara nomim opoia hinia mo sohena sava.

⁸ Romiku mo sopo mele sati matan leta atu na sohaia, hina purongo vara fomiku mo sati mata makomo rani, matan na levosahia vara ka rongu mo sati matana mata makomo rani. ⁹ Nake na lo avulahi matan na sohaia, mo sopo matan mo vai kamim ka rongu mo sati, pani matan nomim fomi sati mo vai kamim ka posi na nomim hehe.

Romi sati atu natu God mo lo opoi na nona tamlohi vara la lavia, ale na isoisona, kama sopo komo kamim hin te hinau matana. ¹⁰ Matan God i eri vai na romi sati mata hehe na mauriŕa i tueniŕa, mata i vaiŕa ŕa posi na noŕa hehe, ale vuana enia ŕa pa juri. Ale mauriŕa i sopo eri sati na romi sati sohen harihi. Pani romi sati sei mo sopo te posi matana mata hehe, enia pa haratu sei vuana enia mateia.

¹¹ Ka hite na sava romi sati ruhuŕuhu nike mo vaia na maurimim? Mo vujangia vara ka tatamahu varaŕuhu mata ololo sohena sava, ale mata vai na hijamim la vokevoke, ale vara lolokoru matan hehe akerihi sei mo vai na matamim mo lo roi matana, ale sohena ka lo kilau toho mata ha mele hiteau, ale sohena ka romjea vara ha sile na talai isan tamlohi atu mo lo hehe. *1Co 5.1-2*

Ka lo vujangia vara ka vaihitea vara ha vai na hinau tari ka eŕi vaira mata vai na hinau la tataholo. ¹² Ale matana, hina purongo vara na uliuli isamim, pani mo sopo matan haratu mo lo vai na hehe, teni isan haratu sei hehe atu mo vai na romina mo sati, pani matan vara a vujangi kamim sohena sava ka lo tatamahu mata usuri na nomam reti na nahon God. ¹³ Ale kama avulahi tavera matana, mo sopo matan haratu purongo, pani matan kama avulahi tavera matan kama hite na avulahi non Titus mata nomim posposi ruhu sei ka lavia hinia, ale sohena sava ka vai na romina mo sakele matan hinau akerihi. ¹⁴ Enau na vere a isana sohena sava na hapahapa hin kamim, ale kamim ka sopo vai na romiku i jovi. Tarea na lo reti varaŕuhu isamim, ale nakerihi na levosahia vara noku reti hapahapa isan Titus matamim mo varaŕuhu. ¹⁵ Ale nake mo lo opoi kamim mo tavera jea vara mo lo romromi na nomim ololo, ale sohena sava ka lavia na ololo tavera. ¹⁶ Nake na avulahi tavera matan noku rasua mo filangi hin kamim.

8

Ra Pa Hansohai Tarea

¹ Ale nakerihi na opoia vara a vere a isamim la vorai peresi na vevorai, na sava God na nona romŕuhu mo vaia na nona vao kalesia tari Macedonia. ² Hina purongo vara nora rani filangi peresi na rani sasati mo matuvana, nora avulahi ruhuŕuhu peresi na mauri tilavono mo vaira la avulahi jea mata tueni na tinapua na nora hansohai. ³ Matan a eŕi vere a vara la sopo sile purongoi na sava la eŕi silea pani mo jeu haratu, matan la silea na nora romavulahi purongo. ⁴ La usia vaha visa moiso vara la eŕi soŕotahi peresi na tinapua mata la sile te tuetueni mata i tueni

na kalesia tilavono Jerusalem ale na jara tavera matan Judea. ⁵ Ale aulu hin haratu, la vai na hinau mo jeu na nomam romtau, matan la hase silera isan Moli tiroma, moiso la tatamahu mata vai na sava kama vere a usuri na masalon God.

⁶ Ale kamim vao kalesia sei Corinth, ka levosahia vara kama mele usi Titus sei mo lo vere isamim tiroma moiso vara i pa mele vano isamim, ale i usi kamim vara ha vai maŕivisi na nomim silesilea. ⁷ Ale matan usuri na posimim ka lo vaia mo ruhuŕuhu jea na hinau tari — nomim rasua mo tavera jea, nomim tamlohi hai la eŕi retireti mo ruhu, ka lelevosahi, romimim mo filangi mata ha vai na hinau, ale nomim opoia hin kamam mo tavera jea — pani nake na opoia vara ha maŕivisi na nomim vavahinau mata sile na silesilea sohen ka lo vaia na hinau tinatinapua mo ruhu. ⁸ Na sopo vere a vara ha pa sile na silesilea nike sohena retileu matea, pani na lo vaihite na nomim opoia. Matan na opoia vara a hitea vara i pa sohena opoia nona vao kalesia tinapua Macedonia teni mo vono.

⁹ Matan kamim ka levosahi na romŕuhu non noŕa Moli Iesu Kristo, vara hina purongo vara enia mo tadvav sohen God mo tadvav, enia mo mai tamlohi tilavono matamim, matan vara na nona tilavono kamim ha pa tadvav na mauri.

¹⁰ Ale mo ruhu vara ha vai vevuhi na silesilea sei ka tapulona na tauni sei mo vano moiso, matan kamim natu ka vere a romromi sei, ale kamim natu ka tapulo mata ha vaia. ¹¹ Mo tataholo mata ha vai vevuhia sohen ka romjea hinia na tapulona. Ha sile na sava ha eŕi silea. ¹² Vara ka avulahi jea mata ha sile na silesilea, mo sopo te hinau hinia vara ha eŕi sile i visa. God mo opoia vara ha sile na sava ha eŕi silea, mo sopo usi na hinau mo sopo te nomim. ¹³ Na sopo vere a vara ha pa silea hajavua matan vara i vai kamim ha vejuveju. Na lo vere a matan na sopo opoia vara tea i eŕi vere a vara kama lo tametame te tatua vao kalesia purongo. ¹⁴ Nake nomim tadvav mo maŕivi, ale ha eŕi tueniŕa Judea na nora vejuveju. Ale hin te rani vara ka vejuveju, enira sohena la pa eŕi tueni kamim. Hin malele akerihi natu vao kalesia tari la pa sopo eŕi vejuveju hin te hinau hinia. ¹⁵ Mo sohen la ulia tuai na Retitapu vara, 'Haratu mo takonahi na mana mo maŕivi, nona mo sopo maŕivi hajavua, ale haratu mo takonahi makomona, nona mo sopo makomona hajavua'. *Exo 16.18*

Titus Tolu Na Tapalana

¹⁶ Pani na lo vere meje isan God sei mo tau na romromi matea hin Titus sohen mo taua hiniua mata kama kilau kamim. ¹⁷ Kama

usia vara i mele rohi kamim, ale mo avulahi matana, aulu hin haratu, enia mo lo tatamahu moiso vara i mele vano i hite kamim. ¹⁸ Kama pa rüle na vorai tinapua matea vara i usuri Titus. Vao kalesia tari la majinga vara vorai sei enia tamlohi fuhu matea mata retivujavujangi na Retiruhu. ¹⁹ Aulu hin haratu vao kalesia nike Macedonia la vironi vorai sei vara i pa usuri kamam na rani kama sivo Jerusalem mata sile silesilea nike isana kalesia tilavono ea — enia vavahinau matea i pa sile na hasohaso isan Moli, ale mo vujangia vara kama tatamahu mata tuetuani. ²⁰ Kama pa hahau jara matea matan vara i pa sopo sile te masapa vara tea la romfomia vara kama lo roro hin silesilea avulahi nike. ²¹ Ale matana, kama lo vaihitea tarea vara kama vai na hina tataholo na nahon God peresi na naho tamlohi.

²² Ale kama lo mele rüle na vorai kalesia tinapua matea peresira Corinth, enia mo jeu na nomam hina vaihite moiso, ale mo mera purongo vara mo avulahi na hinau matuvana, pani nake mo mele jeu tiroma matan mo rasu kamim mo tavera jea. ²³ Vara te retusia matan Titus, ha vere isara vara enia tapalaku mata i vai na vavahinau non Moli matamim. Ale la vorai tinapua sei la lo usuria enira vaha'ule fuhu nona vao kalesia nike, ale nora tovongi mo vai na tamlohi la hasohaso Kristo matara. ²⁴ Ale matana, ha turu peresira matan vara vao kalesia la pa eri hitevosahi na nomim opoia, ale vara i vujangia vara nomam reti hapa'aha matamim mo vara'uru.

9

Silesilea Nona Kalesia Jerusalem

¹ Na levosahia vara mo sopo te hinau hinia vara a sopo uliuli matan silesilea nike nona tapuhi Jerusalem, ² matan na levosahia vara ka lo tatamahu mata ha tuenira moiso. Ale na reti hapa'aha moiso isan tapala'ra nike Macedonia vara kamim kalesia Corinth ka tatamahu hin tauni sei mo vano moiso vara ha sohai na silesilea matea, ale nomim avulahi mo vai na vao kalesia tinapua romira mo filangi mata la tapulo na tuetuani. ³ Pani na lo rüle la vorai kalesia nike vara la hitea vara vara'uru ka tatamahu sohen na vere isara vara ha pa tatamahuni na mania moiso. Na sopo opoia vara la pa hitea vara noku reti hapa'aha nike hin kamim i vano hina purongo. ⁴ Matan, vara te mara Macedonia i mai peresiau ale vara i hitea vara ka sopo tatamahu, kama pa mahanuhanu ale kamim sohena, matan kama vere moiso vara kama lo rasu kamim. ⁵ Matan na sopo opoia vara a mahanuhanu, na romfomia vara a usi

la vorai kalesia nike vara la mai isamim tiroma mata la tatamahuni na nomim silesilea tavera sei ka lo retitauhi hinia moiso. Ale mo sopo hinau matea mata ngurunguru matana, pani enia silesilea matea usuri na nomim fomavulahi.

Ha Hansohai Matan God Mo Hansohai Tiroma

⁶ Ha lo levosahia vara tamlohi isa matea vara mo lavo na piri mo visa'ete, i pa vua makomona purongo. Pani haratu mo lavo na piri matuvana, i pa lavi na vuana matuvana. ⁷ Kamim hatehateahi ha pa silesile usuri na romimim hasemim, mo sopo matan ka sopo fomavulahi teni matan tea mo ngurunguru hin kamim, pani matan God mo opoi haratu sei mo sile na nona silesilea na avulahi. ⁸ Ale God i eri sile kamim na hinau tari ka opoira, matan vara ha sopo eri vejuveju hin te hinau ka opoia, ale matana, ha eri mele tueni na tinapua na sopena. ⁹ Mo sohena Retitapu mo vere vara,

'Haratu la tataholo na nahon God,
la lo hansohai tarea isana tilavono.

Ale God i pa sopo fomaliho
na nora vavahinau fuhu sei hin te rani.'

Psa 112.9

¹⁰ Matan God enia haratu sei mo lo sile na piri wit isana tamlohi isa, moiso mo vai na pereti mata hanhani hinia. Hin malele akerihi natu God i pa sile na masapa matuvana isamim mata ha vai na vavahinau fuhu, ale enia i pa vai na nomim hansohai i vua tavera isamim.

¹¹ Enjora, ha pa ma'ivi savulevule matan vara ha eri hansohai i jeu tiroma. Ale na rani vara kama lavi na nomim silesilea i vano isan la haratu la vejuveju, la pa ulu na vere meje isan God matana. ¹² Hinau mo rua vahatea la pa masese matan silesilea atu, i pa ma'ivisi na vejuveju nona tapuhi Jerusalem, ale la pa hasohaso God na nora vere meje matana. ¹³ Kamim ha pa tahe na hijan God na nomim silesilea na avulahi. Matan nomim hansohai isara i pa vujangia vara kamim ka lo oloolo na Retiruhu non Kristo, ale la kalesia atu la pa hasohaso God matamim. ¹⁴ Ale la pa ususi matamim na opoia tavera mata rom'uru fuhufuhu non God sei mo lo malue hin kamim.

¹⁵ Ha vere meje isan God matan Natuna — matan nona otori fuhufuhu sei mo sopo te reti i eri vere vara mo fuhu sohena sava.

10

Suiha Nona Vaha'ule Vara'uru Non God

¹ Enau Paul haseku, na lo usia filangi isamim vara ha tapurongo isaku. Na lo vaia usuri na rommalum peresi na posposi malum non Kristo, enau sei tamlohi hai

Corinth la lo vereea vara enau na malum vara na lo toho isamim pani vara na malue na lo filangi isamim na noku leta! ² Na lo fomtau vara i pa sopo sohena, pani korong vara na mai a pa filangi isan la haratu sei la fom vara kama lo vavahinau usuri na posposi tamlohi purongo. ³ Hina purongo kamam kama tamlohi varama, pani kama sopo vai na vuro usuri na fomfomi nona tamlohi, ⁴ matan nomam hinahinau mata vai na vuro mo sopo matan varama nike, pani God mo vai na retivarafuhu mo suiha mata vilijovjovi na fomfomi filangi non Tiapolo sei la lo taurilati na tamlohi. Ale la suiha mata la vilijovjovi na fomfomi ⁵ peresi na fomaulu tari sei la lo turuhoro na tamlohi na lelevosahi hin God. Ale kama taurilati na fomfomi tari na retivarafuhu, ale kama vaira la ooloo hin Kristo. ⁶ Ale kama lo tatamahu mata kama sile na talai isana tamlohi lejileji tari sei atu, ale kama pa vaia hin rani atu vara kamim mo isoiso ka lo ooloo hin Kristo moiso.

⁷ Kamim ka lo kilau na huri tamlohi purongo. Kamim ka hitevosahia moiso vara kamam kama tamlohi non Kristo, sohen la haratu sei la lo reti hapahapa lara enira non Kristo. ⁸ Korong, ha pa hitea vara na lo pohapoha na suiha sei Moli mo silea isamam. Pani suiha nike enia matan vara i turuhi kamim, mo sopo matan vara i vilijovjovi kamim. Ale a pa sopo tinafihia vara tea i vaiiau a mahanuhanu, vara i vai na noku vavahinau isamim i mai hina purongo.

⁹ Na sopo opoia vara tea i fomfomia vara na lo filangi na noku leta purongo ale i vai na tamlohi la matahuniau matana, ¹⁰ matan hai la lo vereea lara, "Paul enia hare? Nona leta la filangi pani enia mo sopo te suihana, ale mo sopo tamlohi matea mata retireti i fuhu." ¹¹ La haratu la lo retireti sohen harahi, la levosahia moiso vara kamam kama lo filangi na nahomim sohen kama lo filangi na nomam leta.

¹² Matan kamam kama sopo fomfomia vara kama pa vereea vara kama tamlohi fuhu i tikeli la tamlohi sei la lo vereea vara enira io. Pani ka hitea, enira la lo hase kilau usurira na tatuara purongo vara hare natu mo fuhu sohena sava. Hinau akerihi enia rongorongono vono purongo!

¹³ Pani kama pa sopo reti hapahapa hin te hinau sei mo sopo nomam. Mata kama tau na fomimam mata vai na vavahinau sei God mo taua na limamam purongo, ale mo taua vara kama pa vavahinau na jaramim mara Corinth. ¹⁴ Matan mo tataholo purongo vara kama lo vereea vara kama aulu hin kamim na mauri rasua, matan kamam natu, kama tiroma tamlohi sei mata lavi na Retifuhu non Kristo

isamim. ¹⁵ Ale kama sopo lavi na hasohaso mata vavahinau nona tinapua, mo vono, kama lo fomtau vara nomim rasua i pa ulua, ale vara nomam vavahinau isamam i pa ulua i mele tavera jea, ¹⁶ matan vara kama pa retivujavujangi na jara tinapua sei tele vano na jaramim. Ale kama pa sopo reti hapahapa hin te vavahinau tamlohi tinapua la vaira hin la jara tinapua atu. ¹⁷ Pani Retitapu mo vereea vara,

"Vara tea mo opoia vara i reti hapahapa, i pa reti hapahapa na sava Moli mo vaia purongo." *Jer 9:24*

¹⁸ Matan hina aulu mo sopo haratu sei mo hase vereea hasena, pani haratu Moli mo vereea vara mo vaia mo fuhu.

11

Vahaʻule Haluhalu

¹ Na opoia vara ha fomperavu mata makomo rani peresiau, ale a pa retireti sohena tamlohi rongorongono vono matea mo lo retireti, pani na levosahia vara varafuhu ka lo fomperavu isaku. ² Enau na mereimerei matamim na mereimerei non God. Matan na retitauhi vara kamim ha pa sohena harai lahi vokevoke matea tuana matelete, enia Kristo. ³ Pani na lo matahu vara sohen tuai mata sasati atu Tiapolo mo halu Eve na nona haluhalu, ale vara tinapua sohena i posi na fomimim ale i tiroma hin kamim ha malue na malele mata lotu Kristo na mapumim tari sei mo varafuhu. ⁴ Matan vara te tamlohi vujangi tinapua mo mai ale mo retivujavujangi na vujangi tinapua matea hin Iesu hin haratu kama lo vujangi kamim hinia moiso, teni hin te tanume tinapua hin Tanume Tapu atu ka lo lavia moiso, teni te Retifuhu tinapua hin haratu ka lo rasua, ale mo mera purongo vara kamim ka hitea mo fuhu purongo. ⁵ Matan na sopo fomfomia vara enau na vejuveju hin la haratu Corinth sei la lo vereea vara la vahaʻule aulu jea, enira la jeuuu. ⁶ Hina purongo vara na sopo levosahi na malele mata retireti sohera, pani enau a eri vereea vara na sopo vejuveju na lelevosahi. Varafuhu kamim ka levosahia vara kama lo vujangi na lelevosahi mo mera isamim moiso na malele tinatinapua matuvana.

⁷ Ka fom vara na vai te hehe hin haratu na hase tauau atano matan vara a tahe kamim na ooloo matan na lo retivujavujangi na Retifuhu non God isamim, ale na sopo usi te hinau hatea matana? ⁸ Korong ka fom vara na lo vanaho na vao kalesia tinapua matan na avulahi mata a lavi na nora mania matan vara a efi mai a lo volitusi purongo isamim. ⁹ Ale na rani na lo toho peresi kamim, na noku vejuveju na sopo usi te tuetuenu isan te vonamim hatelete, matan la vorai kalesia atu sei la tai Macedonia, la lavi na

tuetueni tinapua matea mo mafivisi vevuhi na noku vejuveju. Noku retihapahapa sei enia matan na hase taurilatiau vara a pa sopo tau te tetehi puhoni hatea isamim hin te malele, ale a pa sopo efi vaia hin te rani. ¹⁰ Sohen retivarafuhu non Kristo mo lo toho hiniau, a pa sopo efi isoiso na noku reti-hapahapa matan hinau atu na jara tari matan Achaia. ¹¹ A pa reti hapahapa mata sava? Matan na sopo opoi kamim teni mo vono? God mo levosahia vara na opoia kamim.

¹² Ale sava na lo retihapahapa hinia, a pa lo retihapahapa hinia, matan vara a lanafihhi na masapa tari mata retihapahapa isan la haratu sei la lo vereea lara enira la sohemam na nomam vavahinau tari. ¹³ Matan, la tamlohi nike enira la vahafulu haluhalu, la tamlohi haluhalu, ale la lo vaia sohena vara enira la vahafulu non Kristo na nora halu. ¹⁴ Pani enau na sopo mafurahi hinira matan Setan i efi hase vaia i mai sohena angelo mata malarani. ¹⁵ Matan haratu, mo sopo hinau mafurahi matea vara volitusi non Setan la lo hase vaira sohen la volitusi tataholo non God, pani na isoisona, nora talai i pa tataholo i fuhu na nora vavahinau.

Paul Mo Sopo Avulahi Hinira

¹⁶ A mele vereea vara ha sopo romromia vara enau na rongorongo vono matan na lo retireti sohen harihi, pani hina purongo vara na lo vaia, ha lo tapurongo tako matan a pa mele retihapahapa makomona. ¹⁷ Ra levosahia vara Moli mo sopo avulahi na retihapahapa sohen harihi, pani na lo vaia sohena vara enau na tamlohi rongorongo vono matea. ¹⁸ Matan tamlohi tinatinapua la lo retihapahapa usuri na vavahinau nona tamlohi, enau sohena a pa vaia. ¹⁹ Ka rom vara nomim lelevosahi sei mo tavera jea, i pa tataholo vara ha tapurongo isana tamlohi rongorongo vono teni mo vono! ²⁰ Avei, nomim lelevosahi mo sohena sava matan mo sopo te hinau hinia vara te vonara mo vai kamim ka slev, teni vara ka levosahia vara mo lo haluhalu kamim mata nomim tavitav, teni vara la lo hani na masumasumim, teni vara la lo romaulu hinira hasera, teni vara la lo varasi na patumim. ²¹ Na hitea mo sati matan kamam kama sopo efi vaia sohera!

Paul Mo Lo Retihapahapa

Pani vara tea mo romfilangi vara i retihapahapa na nona rongorongo vono, enau sohena a efi vaia. ²² La tamlohi halu nike, la lo retihapahapa lara enira hasera la Hebrew, pani enau na Hebrew. Enira, la rom vara enira hasera la tavitavin Israel, pani enau sohera. Enira, la rom vara enira hasera la mahapin Abraham, pani enau sohera. ²³ Na levosahia vara na lo retireti sohen na

tamlohi rongorongo vono matea, pani na levosahia vara ka lo romromia vara enira la lo volitusi non Kristo, pani enau na jeura, noku vavahinau mo jeura, la tauriau na vano na ima filangi vaha visa, la rupi lejilejiau na asi maja vaha visa, mariviti vara a mate vaha visa. ²⁴ Vaha lima moiso, Jew la rupiau mo vaha ngavulu tolu mo limaravati (39). *Deut 25.1-3*

²⁵ Vaha tolu, la hamajiau na vipahai. Na rani matea la paruaa vara a mate. Na pute na lanis vaha tolu. Na rani matea, na lo sale na pahai matea na tasi masapa mata rani matea ale pongi matea. ²⁶ Na hahau falihi mata jara la asau rove vaha visa, ale na lavi na rani sasati na wai tavei, rani sasati mata tamlohi sei la lo vili na tamlohi mata mania, ale rani sasati isana Jew, rani sasati isana tamlohi rofoha, rani sasati na lolo taon tavera, rani sasati na rani na lo toho na jara hasetoho, rani sasati na tasi, rani sasati isana vorai kalesia haluhalu. ²⁷ Na lo mauri peresi na noku malokoloko, noku rongohaji, ale na sopo efi juruvi vaha visa moiso mata marohati peresi na mafohu, ale vaha visa moiso mo sopo te haku hinau. Vaha visa moiso na lo toho na jara hamariri sati pani mo sopo te noku ruru hamariri.

²⁸ Ale aulu hin la hinau sei, na rani hatehateahi, romiku mo lo puhoni matan na sopo levosahia vara vao kalesia tari la lo toho sohena sava. ²⁹ Hare natu vara mo rongoa vara mo sopo te suihana, vara enau sohena na sopo rongoa, enjora. Hare natu vara i malue na malele rasua matan tea mo tikaulejia pani enau a pa sopo lolokoru matana, enjora.

³⁰ Vara a efi retihapahapa hin te hinau, a pa retihapahapa na hinau sei na sopo efi vaia haseku. ³¹ God, Taman Moli Iesu, enia i pa lavi na hasohaso mata rani tui tui. Enia mo levosahia vara enau na sopo halu, ³² ale hin rani atu na lo toho Damascus, tamlohi aulu na ruhuruhun Supe Aretas, mo sile na retileu matea isana tamlohi la lo kilau na matarua tavera matan taon tavera atu vara la pa taurilatiau, ³³ pani kalesia hai atu la tuhuau na windoa na sivo atano na tanga tavera matea na ropen taon atu, matan vara a efi malue a rovo!

12

Paul Mo Hite Na Tuka Na Mamavuhu Matea

¹ Na levosahia vara noku reti hapahapa nike mo rongorongo vono, pani a pa mele vere te makomona hin te hinau sei Moli mo vujangia isaku mo sohena mamavuhu matea. ² God mo sauau na sahe aulu na hatolu tuka na rani matea tauni mo sangavulu romana mo vati la vano moiso, na sopo levosahia vara na lo toho na epeku

hehe, ³ matan ka lo opoia vara ha levosahia vara varaʻuhu, Kʻristo mo lo retireti hiniau. Kʻristo mo sopo kilau purongoi na sava ka lo vaira, pani hin kamam, enia suiha tavera jea matea na livuhamim. ⁴ Hina purongo vara mo mate na talopeilopei sohena mo sopo te suihana, pani nake mo lo mauri mata suihan God. Ale, kamam sohena mo sopo te suihamam, pani kama pa toho peresi kamim na suihan God. Suiha atu sei kama lo vavahinau hinia matamim.

⁵ Ha hase vaihite kamim hasemim vara varaʻuhu nomim rasua mo varaʻuhu. Ha hase kilau usuri kamim hasemim! Vara ha sopo efi hitevosahia vara Iesu Kʻristo mo lo mauri hin kamim, mo ʻfaramia vara ka jovi na nomim vaihite. ⁶ Ale na lo ʻromtau vara kamim ka hitevosahia vara kamam kama jeu vaihite nike moiso.

⁷ Ale kama lo ususi isan God vara ha pa sopo vai te hiniau sasati. Mo sopo matan vara tamlohi la pa hitea vara kama jeu vaihite atu moiso, pani matan vara ha pa vai na hiniau tataholo, hina purongo vara ka lo ʻromʻromia vara kama sopo lo jeu vaihite atu. ⁸ Matan kama sopo efi vai te hiniau vara i turuleji na retivaraʻuhu, pani kama pa lo turu ʻfilangi mata retivaraʻuhu tarea. ⁹ Matan enia hina purongo vara mo sopo mele te suihamam, pani kama pa avulahi vara kamim ka ʻfilangi varaʻuhu. Nomam ususi enia vara ha jea i ʻfuhu na mauri rasua.

¹⁰ Matan haratu, na lo uli la hiniau nike Macedonia isamim vara ha lo vai tatalohoi na maurimim, matan vara na rani vara a pala, a pa sopo vai na posposi ʻfilangi hajavua na noku suiha sei Moli mo sileau hinia mata vai na kalesia la ulua, pani mo sopo mata vilijovjovira.

Isoiso Retireti

¹¹ Ale isoiso hiniau la vorai peresi na vevorai, enia vara ha avulahi, ha mele vai mamahuni na maurimim la tataholo, ha ʻromʻfilangi, ha turu jara matea na ʻromimim hatehateahi, ha toho na tamata, ale God mata opoia peresi na tamata i pa toho peresi kamim.

¹² Ha tapatapapai kamim na posposi mo tataholo mata kalesia. Tapuhi tari nike la sile na nora retioloalo isamim.

¹³ Romʻfuhu non Moli Iesu Kʻristo peresi na opoia non God peresi na tapala ʻfuhu nona Tanume Tapu i pa toho peresi kamim mo isoiso. Amen.

Galatians
Leta
Paul Mo Ulia Isana Mara
Galatia
Leta Nike

Na rani tiroma leta nika mo vano isana kalesia hin jara atu Galatia, Paul mo lo vereia mo memera isara moiso vara enia mo silera hin Retiruhu tataholo atu sei Iesu mo lo silea isana tiroma. Retiruhu sei hasena, enia hina vararuhu (1.1–10). Haranika enia hina aulu matan te tamlohi la lo vereia vara reti non Paul mo halu na Retiruhu non God matan enia tamlohi halu.

Paul enia vahafulu vararuhu non Iesu. Iesu mo rulea isana tamlohi la sopo levosahi God. Patu tamlohi na vao kalesia matan Jerusalem la lo avulahi hin Paul peresi na nona Retiruhu (1.18–2.10). Paul mo reti isan Peter na rani matea Antioch, matan mo vaileji na vujangi non Retiruhu, matan mo lo tametame na tadvavuin Israel la lo toho peresia (2.1–18).

Paul mo vujangia vara rasua hin Kristo, enia hasena malele tataholo vara tamlohi la lavi na mauri mo materi hinia. Enia malele sei God mo silea isan Abraham tuai (3.1–4.31).

‘Matan hin leu atu na lo usuria, na mate matan leu atu, matan vara a pa mauri hin God, enau na mate peresi Kristo na nona talopeilopei. Nake mo sopo enau sei na lo mauri, pani Kristo enia mo lo mauri hiniau.’ (2.19–20)

Hin Puku Nike

1. Vahafulu Vararuhu, Retiruhu Vararuhu (1.1–10)
2. God mo vifoni Paul vara i nona vahafulu (1.11–24)
3. Paul mo mele tahe na Retiruhu (2.1–21)
4. Rasua enia malele vararuhu mata tamlohi la juri (3.1–4.31)
5. Tanumen God mo revera na opoia (5.1–6.10)
6. Isoiso retireti (6.11–18)

Retireti Tiroma Non Paul Isara

¹ Leta nika, enau Paul na ulia, enau vahafulu matea, pani mo sopo na romromi tamlohi teni tea la vifoniau vara a vahafulu, mo vono. Iesu Kristo hasena peresi God Tama la toviau, God sei mo lo sauteterahi Iesu na mateia.

² Ale la vorai nika peresia, kama sohai na nomam retioloolo isamim kamim vao kalesia na jara tari Galatia. ³ Na lo ususi vara God Tamafa enia Moli Iesu Kristo vara la sile na nora romfuhu peresi na nora tamata isamim. ⁴ Iesu mo hase silea vara

i mate mata nofa hehe vara i jurifa fa materi na suihan sasati na varama nake, usuri na masalon nofa God Tamafa, ⁵ hasohaso tavera enia nona, mata rani tui tui tarea. Amen.

Retiruhu Enia Matelete

⁶ Na marurahi jea, matan vila ruhu purongo, ka rovo isan haratu mo tovi kamim na nona romfuhu non Kristo, ale ka lo posi vano na retiruhu tinapua, ⁷ mo sopo mele te retiruhu tinapua, pani na levosahia vara tamlohi hai la vai na romimim la lo kaka. La opoia vara la vai na retiruhu non Kristo i mele tinapua.

⁸ Pani vara kamam teni te angelo na tuka i lo retivujavujangi na retiruhu matea mo sopo tataholo hin haratu kama lo retivujavujangi kamim hinia moiso, talai tavera non God i pa toho isana. ⁹ Soheha kama pete vereia tiroma moiso, ale na mele vereia vara, tea mo lo retivujavujangi na retiruhu tinapua isamim, ale mo sopo na retiruhu sei ka lavia tiroma moiso, talai tavera non God i pa toho isana.

¹⁰ Ka rom vara na lo reti soheha matan vara tamlohi, teni God la avulahi hiniau matana? Teni ka hitea vara na lo vaihitea vara a vai na tamlohi la avulahi hiniau? Vara a lo vaihitea vara a vai na tamlohi la avulahi hiniau, i pa vujangia vara enau na sopo slev vararuhu matea non Kristo.

Vujangi Non Paul Mo Tai Isan Kristo

¹¹ La vorai peresi na vevorai, na opoia vara ha levosahia vara Retiruhu atu na lo retivujavujangi hinia, enia mo sopo tai isana tamlohi. ¹² Matan na sopo lavia isan te tamlohi teni tea mo sopo vujangiau hinia, pani na lavia matan Iesu Kristo mo vujangia isaku.

¹³ Matan ka rongoa moiso, vara mauriku mo soheha sava tiroma, na lo usuri na posposi rasua nona Jew. Ale soheha sava hin pongi atu na lo tipahi filangi na vao kalesia non God, ale na vaihitea vara a komora. ¹⁴ Hin pongi atu, na lo sahe aulu jea na posposi rasua nona Jew, mo jeu na tamlohi tinapua la tautauuniku na tahisamam, matan na lo turu filangi na posposi nona tamamam.

¹⁵ Pani na rani na sopo lo vora, God mo tapuhiau moiso, ale mo toviau na nona romfuhu, ¹⁶ ale enia mo avulahi vara i vujangi Natuna isaku, matan vara a pa retivujavujangi Iesu isana tamlohi rofoha. Ale na sopo vano vahatea vara a usi rongorongoa isan tea, ¹⁷ teni vara a sahe Jerusalem isan la haratu la vahafulu tiroma hiniau, pani na vano Arabia, moiso na mele mai Damascus.

¹⁸ Ale tauni mo tolu la vano moiso na sahe Jerusalem vara a hite Peter, ale na lo toho

isana mata rani mo sangavulu romana mo lima (15).

¹⁹ Hin rani atu, na sopo hite te vahaʻule tinapua, pani James purongo, tasin nofa Moli. ²⁰ La hinau sei na lo ulia isamim na nahon God na sopo halu hinira.

²¹ Moiso na vano na lolon la jara tavera sei mo rua, Syria enia Cilicia. ²² Hin rani atu, vao kalesia hin Kristo la lo toho na vao kalesia tari Judea, la sopo lo levosahiau i fuhu. ²³ Pani la lo rongo purongoi na sorasora la lo vereea lara, “Tamlohi nike natu, tiroma mo lo tipahiʻa, pani nake mo lo retivujavujangi pa rasua sei, tiroma mo vaihitea vara i komoa.” ²⁴ Matan hinau atu, la lo sile na hasohaso tavera isan God matakū.

2

Vahaʻule Jerusalem La Avulahi Hin Paul

¹ Moiso, tauni mo sangavulu romana mo vati mo vano moiso, enau Barnabas peresi Titus, kama sahe Jerusalem. ² Na sahe matan God mo vujangia isaku vara a sahe. Enau tolu na tamlohi tatavera mata rasua kama hasemam sorasora matavuhī atu matan na opoia vara la levosahi mamahuni na sava na lo retivujavujangi hinia isana tamlohi ʻoʻoʻoha, matan vara a levosahi tataholoia vara la majinga hinia vara i vono, noku vavahinau i pa vano hina purongo.

³ Pani hina purongo vara la levosahia vara Titus enia mara Greek matea, la sopo ngurunguru hinia vara i taiʻalihi, ⁴ mo sopo matan vara romfomi atu i pa malue, pani matan hin matavuhī atu, matea mo lavi na vorai hai la sopo vorai vararūhu na nofa rasua, la mai sohena tanume luhu, matan vara la efi levosahia vara nomam materi hin Kristo Iesu mo sohena sava, matan vara la efi tau kamam sohena nora slev na ruhuruhun nora posposi rasua, ⁵ pani kama sopo usuri na romira, hina purongo vara enia mata makomo rani purongo, matan vara hina vararūhu mata Retiʻrūhu i pa toho jejeu matamim.

⁶ Ale patu tamlohi mata vao kalesia atu, la sopo vere te hinau aulu na sava na lo retivujavujangi hinia. Ale na vere tataholoia vara na sopo romfomi na nora hija tavera sohena patu tamlohi, matan God mo sopo tametame tea. ⁷ Pani la hitevosahia vara God mo tauau vara a pa retivujavujangi na Retiʻrūhu, isan la haratu la sopo Jew, sohena mo tau Peter vara i pa retivujavujangi na Retiʻrūhu isana Jew. ⁸ Matan haratu mo lo voko hin Peter mata nona vavahinau sohena vahaʻule isana Jew, enia haratu sei mo lo voko hinia na nona vavahinau mata tamlohi ʻoʻoʻoha. ⁹ Ale hin rani atu James, Peter, John, enira la lo kilaura sohena viʻa mata vao kalesia, enira la hitevosahia vara God mo tau na vavahinau fuhu na

limaku usuri na nona romfūhu. La tulahi enau Barnabas vara kama voko matea pere-sira, ale lara kama pa vano isana tamlohi ʻoʻoʻoha, ale enira, isana Jew. ¹⁰ Hinau matea purongo la usia lara kama pa lo romfomi na tamlohi tilavono, hinau atu natu na lo opoia mo tavera jea vara a vaia.

Paul Mo Vujangi Peter

¹¹ Pani na rani Peter mo mai Antioch, na reti isana na naho vao. Na reti rilangi isana mata sava mo lo vaia, matan sava mo lo vaia mo sopo tataholo. ¹² Matan, tiroma moiso tamlohi hai Jerusalem, la pa pala la tai isan James, enia mo lo hanhani tolu na voraiʻa la tamlohi ʻoʻoʻoha, pani na rani la pala, Peter mo turujuha hinira mo toho asau, matan mo matahuni la haratu la lo reti na taiʻalihi. ¹³ Ale tamlohi rasua Jew tari tinapua atu, la usuri na posposi tapnetano non Peter, ale Barnabas sohena, la tikaulejia mo usurira na nora tapnetano.

¹⁴ Pani nara na hitea vara la sopo usuri tataholo na retivararūhu mata Retiʻrūhu, na vereea isan Peter na nahora enira mo isoiso nara, “Vara engko ko vora Jew matea, ale ko sopo mele usuri na posposi nona Jew, ale nake ko lo toho sohen na tamlohi ʻoʻoʻoha, mata sava natu, ko lo vaihitea vara o vai la tamlohi ʻoʻoʻoha nike vara la ooloo na posposi nona Jew sei, engko ko tinarihira moiso?” ¹⁵ Enfa ʻa vora ʻa Jew, ʻa sopo tai isana ‘tamlohi hehe’ sei la tamlohi ʻoʻoʻoha, ¹⁶ pani enfa ʻa levosahia vara tamlohi mo sopo tataholo na nahon God matan vara mo lo ooloo na Leu non Moses, pani matan nona rasua hin Iesu Kristo purongo. Ale enfa sohena, ʻa rasu Kristo Iesu matan vara ʻa pa tataholo na nahon God matan noʻa rasua, mo sopo matan ʻa lo vai na Leu. Matan tea i sopo eri tataholo na nahon God vara mo lo vai na leu.

¹⁷ Pani i pa sohena sava, vara ʻa lo aleale malele vara ʻa tataholo na nahon God mata rasua hin Kristo, ale ʻa vileiulia vara enfa ʻa pa lo tamlohi hehe? Korong Kristo mo vaiʻa ʻa mai sohena ‘tamlohi hehe’? Mo vono! ¹⁸ Matan, vara a mele turuhi na sava na vilijovjovia moiso, i pa vujangiau vara enau tamlohi tope leu matea. ¹⁹ Matan hin leu atu na lo usuria, na mate matan leu atu, matan vara a pa mauri hin God, enau na mate peresi Kristo na nona talopeilopei. ²⁰ Nake mo sopo enau sei na lo mauri, pani Kristo enia mo lo mauri hinia. Ale nake na mauriku na lo toho hinia na epeku, na lo mauri usuri na rasua hin Natun God sei mo opoiau, ale mo hasena silea matakū. ²¹ Enau na sopo vonavonon la haratu sei, la lo vai na romfūhu non God sohena hinau purongo matea. Matan vara ʻa efi juri vara

ra ooloo na leu, mo raramia vara mateia non Kristo, enia mo sopo te hinau hinia!

3

La Jalio Na Malele Mata Rasua

¹ Kamim mara Galatia, ka rongorongo vono! Sava tamlohi natu, mo mahuhi kamim? Na levosahia vara na vujangi mamahuni na rarami mateia non Iesu Kristo na nona talopeilopei, mo memera isamim moiso. ² Na opoia vara a usi na retiusia matea isamim tiroma. Ka lavi na Tanumen God matan ka vai na vavahinau mata leu, teni matan ka rongo na Retiruhu, ale ka rasua? ³ Varafuhu, ka rongorongo vono sohen haratu natu? Ka tapulo na mauri rasua na Tanumen God, pani nake ka romfomia vara ha pa tataholo na nahon God na nomim vavahinau? ⁴ Ka lavi na rani rilangi tavera moiso mata retiruhu, mo sopo matan vara i pa vano hina purongo teni ka lo romfomi purongo hinia?

⁵ Ale, haratu sei mo lo sile kamim na Tanumena, mo vai na hinau mafurahi matuvana na nahomim matan ka lo vai na vavahinau mata leu, teni matan ka lo rasu na retiruhu sei ka rongoa?

⁶ Hin malele nike Abraham sohena mo 'rasu God, ale God mo vereea vara enia mo tataholo na nahona'. *Gen 15.6*

⁷ Ha levosahi mamahunia vara la haratu la rasu God, enira natun Abraham tataholo.

⁸ Ale Retiulia mo retitauhi hinia tuai mara, God i pa vai na tamlohi foroha la tataholo na nahona mata rasua. Retitapu sei mo retivujavujangi na Retiruhu tuai isan Abraham mara, 'Hiniho a pa leluhu na mara jara tinatinapua tari'. *Gen 12.3; 18.18; 22.18* ⁹ Ale mo sohena natu, la haratu la rasu Kristo, la lavi na lefuhu peresi Abraham, tamlohi rasua sei tuai.

¹⁰ Matan tamlohi tari sei la lo turu rilangi na nora vavahinau mata leu, la lo toho na ruhuruhi lesati moiso, matan Retiulia mara, 'Lesati i pa toho isana tamlohi tari sei la sopo usuri vevuhi na hinau tari na lolo Puku mata Leu la ulia'. *Deut 27.26*

¹¹ Nake mo memera purongo, vara tea i sopo eri mai tataholo na nahon God, matan vara mo lo ooloo na Leu, matan 'Tamlohi sei la tataholo na nahon God, la pa mauri na rasua'. *Hab 2.4*

¹² Pani malele leu mo sopo sohena malele mata rasua, matan Retiulia mo vereea mara, 'Vara tea mo opoia vara i tapai na mauri matan mo lo usuri na leu, i pa ooloo vevuhi na leu tari na maurina'. *Lev 18.5*

¹³ Kristo mo volituhufa hin lesati atu leu mo lo silea, ale enia mo mai lesati matafa, sohena Retiulia mo vereea mara, 'Lesati mo lo toho na tamlohi tari sei la taua mo sevu

aulu na vipahai mata talai'. *Deut 21.23*

¹⁴ Matan vara hin Kristo Iesu lefuhu God mo retitauhi hinia isan Abraham, i pa pala isana tamlohi foroha, matan vara ra eri lavi na Tanume Tapu sei God mo retitauhi hinia na rasua.

Retitauhi Mo Lo Toho Tiroma Na Leu

¹⁵ La vorai peresi na vevorai, a pa vai na tovongi matea na posposi tamlohi. Vara te tamlohi la retitauhi hin te hinau moiso, mo sopo tea i eri topea teni i mele tau te hinau aulu hinia. ¹⁶ Ale la retitauhi atu God mo vereea, mo vereea isan Abraham peresi na mahapina. Mo sopo vereea vara, 'peresi te mahapina tinapua' sei mo lo rarami na vao matuvana, mo vono, mo lo rarami matea purongo mo vereea mara 'peresi na mahapim' enia Kristo. *Gen 12.7*

¹⁷ Rarami noku reti sei mo sohen harihi: Leu sei, mo pa pala tauni mo ngavulu sangavulu vati mo sangavulu tolu (430) mo usuri la retitauhi sei, i sopo eri tope la retitauhi sei God mo vaia tiroma moiso isan Abraham vara la mai hina purongo. ¹⁸ Matan, vara ra eri lavi na vua retitauhi non God mata ra lo usuri na leu, ale vua retitauhi mo sopo mele mai mata retitauhi, pani God mo silea isan Abraham na malele retitauhi matea.

¹⁹ Vara sohena, God mo sile na Leu mata sava? God mo pa tau na leu mata hehe, vara i toho i tikeli rani atu mahapin Abraham sei God mo retitauhi hinia i pala. Ale God mo sile na leu isana angelo vara la pa silea isan Moses, enia haratu mo lo turu na livuhan God peresi na tamlohi. ²⁰ Ale ra levosahia vara tamlohi matea i pa turu na livuha tamlohi mo rua sei la opoia vara la vai na retitauhi matea, pani nike, God hasena mo vai na retitauhi isan Abraham.

Vavahinau Mata Leu

²¹ Vara sohena leu mo horo na retitauhi non God? Mo vono, matan vara te leu hatea la silea vara i eri sile na mauri, ale tamlohi la pa eri mai tataholo na nahon God matan vara la lo ooloo hin leu atu. ²² Pani Retitapu mo vereulia vara, enra mo isoiso, ra lo toho na ruhuruhi suiha hehe, matan vara vua retitauhi mata rasua hin Iesu Kristo, i pa mai isan la haratu la rasua.

²³ Ale rasua mo pa mai isafa sei, leu mo lo taurilatifa moiso, mo tapovifa mo tikeli rani atu God mo vujangi na malele mata rasua. ²⁴ Ale matana, leu atu mo lo kilaufa mo sinai mo tikeli rani atu Kristo mo mai, matan vara ra eri mai tataholo na nahon God na rasua. ²⁵ Pani nake, matan rasua mo mai moiso, ra sopo mele toho na ruhuruhi tea, ²⁶ matan hin Kristo Iesu, kamim mo isoiso ka natun God mata rasua. ²⁷ Matan

kamim matuvana ka paptijo hin Kristo, ka ru Kristo na maurimim. ²⁸ Matan haratu, mo sopo te Jew teni te tamlohi fofoha, teni slev, teni te tamlohi purongo teni te lamane teni te hafai, matan kamim mo isoiso ka matea hin Kristo Iesu. ²⁹ Ale vara kamim non Kristo, kamim ka mahapin Abraham, la haratu sei la pa lavi na vua retitauhi.

4

Enʻa Ra Natun God

¹ Rarami noku reti enia vara natun tamlohi matea enia i pa lavi na korun tamana, enia mo sopo tinapua na slev matea, hina purongo vara hinau tari enia nona. ² Pani natirihī atu, i pa lo toho na ruhuruhi lima tamlohi matea mata i pa kilaua peresi na volitusi non tamana i tikeli rani atu tamana mo taua moiso.

³ Mo sohen haratu isaʻa, na rani ʻa pa lo natuvarihī, noʻa fomʻomi mo lo toho na ruhuruhi liman vui varama nika.

⁴ Pani rani tataholo mo pala, God mo ʻule Natuna, mo vora isana hafai matea, mo vora na ruhuruhi leu, ⁵ vara i volituhu la haratu la lo toho na ruhuruhi leu, matan vara God i pa korohiʻa ʻa mai natuna tataholo. ⁶ Ale matan ka natun God, enia mo ʻule na Tanumen Natuna mo mai na lolo mapuʻa, mo vaiʻa ʻa eri tovi God sohena, “Tata, Tamaku”. ⁷ Matan haratu, ko sopo mele slev, pani ko natun God, ale vara natun God, o pa lavi na vua retitauhi non God.

Paul Mo Romi Na Mara Galatia

⁸ Tuai ka sopo lo levosahi God, ka lo toho na ruhuruhi lima vui varama sei tamlohi hai la vereea vara enira god, pani enira la sopo god. ⁹ Pani nake, matan ka levosahi God, pani vara a reti tataholo, God mo levosahi kamim tiroma, ale mata sava ka opoia vara ha mele slev nona vui varama sei, la sopo eri vai te hinau, ale la sopo ruhu hin te hinau hatelete? ¹⁰ Ka lo oloolo hin te rani tapu, teni te vitu tapu, teni te taro, teni te tauni mata sava?

¹¹ Enau na lo fomʻomia vara korong vara i vono, na lo kalvono purongo matamim.

¹² La vorai peresi na vevorai, na usia isamim vara ha materi soheku, matan na sohemim kamim mo sopo Jew, ka materi na leu. Hin rani atu na lo toho peresi kamim, ka sopo vai te hinau i sati isaku. ¹³ Ka levosahia vara hin rani atu, na pa tapulo retivujavujangi na retiruhu isamim, na rojo makomona. ¹⁴ Hina purongo vara epeku mo sati sohena vaihite matea isamim, pani kamim ka sopo hitelehilehia teni tipahiau. Ka kilauau sohena enau angelo non God matea teni sohen Kristo Iesu. ¹⁵ Pani nake nomim avulahi mo haipu? Na levosahi

mamahunia vara hin rani atu, vara ha eri vaia, korong ka julai nafihi na matamim moiso vara ha silera isaku vara i tueniuau na noku rojoa. ¹⁶ Korong na mai sohena nomim meresahi matan na lo vere na reti-varafuhu isamim?

¹⁷ La tamlohi vujangi haluhalu atu sei la lo vaihitea vara ha usurira, mo sopo matan vara la pa tueni kamim. La vaihitea vara ha foʻhu hiniua matan vara ha tapurongo isara purongo. ¹⁸ Tarea mo ruhu vara ha turu filangi mata vai na vavahinau ruhu, mo mele ruhu jea na rani na sopo toho peresi kamim. ¹⁹ La natuku ruhufuhu, enau na sohena hafai matea mo rongohaji vara i mele lavilavi, ale i pa lo sohena isaku i tikeli rani atu, maurin Kristo i jea isamim. ²⁰ Vara a pa lo toho peresi kamim nakerihī, a pa retireti malum peresi kamim, matan na sopo levosahia vara a pa mele vai na sava isamim.

Hagar Enia Sarah

²¹ Ha to vereea isaku kamim sei ka opoia vara ha lo toho na ruhuruhi leu, ka levosahi na sava leu mo lo vereea? ²² Matan la ulia na Retiulia, vara Abraham natuna lamane mo rua, matea isana hafai slev matea, moiso matea isana hafai materi matea, narouna. ²³ Pani natun hafai slev atu, mo vora na masalo tamlohi purongo, ale natun narouna, mo vora usuri na reti-tauhi non God.

²⁴ Ale la hafai atu mo rua la tovonigi la retitauhi atu mo rua sei God mo vaira. Hafai sei Hagar, mo sohena retitauhi sei God mo vaia na vutivutin Sinai, hin jara atu natu, tamlohi la tapulo mai slev mata leu ea. ²⁵ Ale Hagar enia vutivutin Sinai atu Arabia; enia mo sohen Jerusalem sei matan nona tamlohi la lo toho na ruhuruhi leu, la sohena slev mo kakau nake.

²⁶ Pani Sarah, hafai materi atu mo sohen Jerusalem aulu na Retiulia, enia tinaʻa. ²⁷ Ale Isaiah mo ulia na Retiulia mo vereea mara,

‘Hafai aroaro, o avulahi,
o avulahi tavera, o ulo aulu,
hina purongo ko sopo vasusui te natum,

matan nake, haratu mo aroaro mo vasusui mo jea na hafai lahi tinapua.’ *Isa 54.1*

²⁸ Ale nake la vorai peresi na vevorai, kamim ka sohen Isaac, ka natuvarihī mata retitauhi. ²⁹ Pani nake, mo pa lo sohen rani atu, haratu sei mo vora usuri na masalo tamlohi, mo lo tipahi haratu sei mo vora usuri na Tanumen God.

³⁰ Pani Retitapu mo vere na sava? Mo vereea mara, ‘O tipahi nafihi na hafai slev enia natuna, matan natuna i sopo lavi na korum, matan korum enia non natun hafai

materi purongo.' *Gen 21.10* ³¹ Ale la vorai, mo sohena natu, enfa fa sopo natun hafai slev atu, pani enfa natun hafai materi atu.

5

Ka Materi Na Leu

¹ Kristo mo terifa vara fa materi jejeu. Ale ha turu rilangi hinia, ha sopo tinarihia vara ha mele mai slev nona leu.

² Ka hitea, enau Paul na vereea isamim, vara ha lavi na taiŕalihi matan vara ka romfomia vara i pa vai kamim ha tataholo na nahon God, vavahinau non Kristo i sopo efi tueni kamim. ³ A mele vereulia isamim tari sei ka lavi na taiŕalihi vara kamim ha pa ooloo vevuhi na leu tari matana. ⁴ Kamim sei ka lo opoia vara ha ooloo na leu, matan vara i vai kamim ha tataholo na nahon God, ka lo hase langahi narihi kamim isan Kristo, ale ka jovi narihi na romfuhu non God.

⁵ Matan enfa sei Tanume Tapu mo lo mauri isafa mata rasua, fa lo kilau toho mata retitauhi sei vara God i pa vai fa fa tataholo na nahona. ⁶ Matan hin Kristo Iesu, taiŕalihi teni tea vara mo sopo taiŕalihi, enia hina purongo. Pani hina aulu mata rasua, enia vara opoia i vujangi na vavahinau tari.

⁷ Tiroma ka lo vano mo fuhu moiso. Hare mo posi na romimim, mo vai kamim ka sopo mele usuri na retivarafuhu? ⁸ God sei mo tovi kamim, mo sopo posi na romimim sohena. ⁹ Ha levosahi retireti sei la vereea lara, 'Wai vahona makomona purongo, i pa efi vai na mit tari la hohona'.

1Co 5.6 ¹⁰ Hin Moli, na levosahi mo fuhu vara, romifa i pa matea na hinau tari, ale vara ha levosahia vara sava tamlohi natu mo lo tikauleji kamim, i pa lavi na talai non God.

¹¹ La vorai peresi na vevorai, vara a pa lo retivujavujangi vara ha pa taiŕalihi sohena hai la vereea vara na lo vaia, mata sava natu Jew la lo tipahiau? Matan la lo rohu hiniau, mo vujangia vara na lo retivujavujangi na talopeilopei non Kristo. ¹² Na opoia vara la haratu sei la lo vai na romimim la lo kaka, la lo opoi jea vara ha taiŕalihi, mo fuhu vara la hase votaira.

¹³ La vorai peresi na vevorai, God mo tovi kamim moiso vara ha materi, pani ha lo kilau, ha sopo usuri na masalo varama, pani na nomim opoia, ha lo kilau mata masapa vara ha tueni na tamlohi rasua tinapua. ¹⁴ Matan leu tari fa efi verera vara la vere na leu matea purongo,

'O opoi na tinapua sohen ko lo hasem opoiho.'

Lev 19.18

¹⁵ Pani vara ka lo hatihati kamim hasemim, ale ka lo romi kamim hasemim, ha lo kilau matan posposi sei i pa efi vaikomokomo kamim hasemim.

Masalo Tamlohi Mo Rohu Hin Tanume Tapu

¹⁶ Pani na vereea vara ha hahau usuri na Tanume Tapu matan vara ha sopo mele usuri na masalo varama. ¹⁷ Matan masalo varama mo rohu hin la hinau atu Tanume Tapu mo opoia. Ale Tanume Tapu sohena, mo rohu hin la hinau atu, masalo varama mo opoia, matan enira la mere-sahi isara hatehateahi, ale matana, mo vaia mo rilangi vara ha vai na sava ka opoia. ¹⁸ Pani vara Tanume Tapu mo lo tiroma hin kamim, kamim ka sopo toho na ruhuruhu leu.

¹⁹ Vavahinau mata masalo varama la memera purongo sohen harihi: mauri maji, romfomi hina lumiha, posposi mo lumiha jea, ²⁰ lotulotu vono, majaputu, valum lolokoru, vasvas, mereimerei, lolokoru patum, romfomi hasem na hinau tari, patumasa, romfomia vara vaom hasena purongo la tataholo, ²¹ romusuri, putu na wai rilangi, la matavuhi mata lavilavi na tinapua, ale mele hinau tinatinapua sohera. Na lo mele retifofoahai kamim sohen na retifofoahai kamim tiroma moiso, vara haratu mo lo vai la hinau sei, enia i pa sopo unu hin mauri atu God mo aulu hinia.

²² Pani, vua Tanume Tapu mo sohen harihi: opoia, avulahi jea, tamata, romperavu, romfuhu, posposi mo fuhu, o vai na sava ko retitauhi hinia, ²³ posposi malum, o hase taurilatihu i fuhu. Mo sopo te leu mata i pisuhi na posposi sohera.

²⁴ Ale la haratu la tamlohi rasu non Kristo Iesu, la vosae na masalo varama peresi na nona opoia sasati, peresi na nona romfomi lumiha na talopeilopei. ²⁵ Vara fa lavi na Tanume Tapu, fa pa hahau usuri na Tanume Tapu. ²⁶ Ra sopo pohapoha, teni fa lo vaivai fa teni fa lo mereimerei hini fa.

6

Tueniŕa Tarea

¹ La vorai peresi na vevorai, vara tea mo jovi hin te hehe, kamim sei ka lo usuri Tanume Tapu, na posposi malum, ha tuenia vara i mele turu. Ha hase kilau mamahuni kamim, vara tea i sopo jovi hin hehe atu tamlohi atu mo vaia. ² Ha tuetueni kamim tarea na nomim rani rilangi, ale vara ha lo vaia sohena, ka lo vai marivisi na leu non Kristo. ³ Matan vara te vonamim mo romfomia vara enia te hinau hinia, pani mo sopo te hinau hinia, mo lo hasena halua.

⁴ Pani mo fuhu vara o hasem vaihite na nom vavahinau, ale vara mo fuhu, o pa efi mangisi matana, pani mo sopo mata vavahinau nona tinapua. ⁵ Matan enfa hatehateahi fa pa hase lavi na nofa tetehi.

⁶ Mo ŋuhu vara haratu la lo lavi na vujangi mata reti non God, la voli la haratu la lo vujangira.

⁷ Ha sopo tinaŋhia vara tea i halu kamim. Ha sopo ŋomŋomia vara God mo lo kilau purongoi na sava ka lo vaia, sava ka lo lavoa, ha pa hani na vuana. ⁸ Matan haratu mo lavo na masalo varama, hin masalo varama atu i pa lavi na vua mata komokomo. Pani haratu sei mo lavo isan Tanume Tapu, i pa lavi na vua mauri tui. ⁹ Ale mo ŋuhu vara ŋa sopo maloko mata vai na posposi ŋuhu, matan na pongina tataholo vara ŋa sopo maloko, ŋa pa lavi na vuana. ¹⁰ Ale, nake matan masapaŋa, mo ŋuhu vara ŋa vai na hina ŋuhu isana tamlohi tari, ale i pa mele ŋuhu jea vara ŋa vaia isan la haratu la rasua.

Isoiso Reti

¹¹ Ha hitevosahia vara na lo uliuli hin leta nike na leta hatehateahi tatavera isamim. ¹² La haratu la lo vaihitea vara la vai kamim ha taiŋalihi, la lo vaia mata hinau matelete purongo, la matahu vara tea la pa tipahira matan vujangi sei vara talopeilopei non Kŋisto hasena, i eŋi juri na tamlohi. ¹³ Ale la haratu sei la lo vere na taiŋalihi, la sopo ololo tataholo na leu tari. Pani la opoia purongo vara ha taiŋalihi matan la pa eŋi retipohapoha matana, ale la pa verea vara kamim nora tamlohi.

¹⁴ Pani enau, mo sopo te hinau vara a eŋi mangisi matana, pani talopeilopei non noŋa Moli Iesu Kŋisto purongo. Nona talopeilopei mo vai na masalo varama la mate hiniau, ale mo vaiau na sopo mele ŋomŋomi na masalo varama. ¹⁵ Mo sopo te hinau hinia vara te tamlohi mo taiŋalihi teni i vono. Pani hina aulu enia vara mauri paro sei mo posi na mauri tamlohi. ¹⁶ Na lo usiusi vara ŋomopoia non God peresi na nona tamata, la toho isan la haratu la lo usuri mauri nike. Enira natu, Israel varafuhu non God.

¹⁷ Ale mo tapulo nake mo vano, na sopo opoia vara te tamlohi i vai na rani ŋilangi isaku, matan na lavi na matara maja na epeku mo vujangia vara enau tamlohi non Iesu.

¹⁸ La vorai peresi na vevorai, noku usiusi vara ŋomŋuhu non noŋa Moli Iesu Kŋisto i toho isamim tarea. Amen.

Ephesians

Leta

Paul Mo Uliā Isana Mara

Ephesus

Leta Nike

'Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto.' (1.3). Paul mo tapulo uli na hina aulu hin nona retisohai sei, vara Křisto mo mate na talopeilopei mo vaiřa řa materi řa mai natun God (1.7–8). Ale nake mo lo sakele aulu na tuka na matuan God, mo aulu na hināu tari nake i pa aulu tui tui (1.20–21).

Křisto mo vilijojovi vořa tavera sei mo lo turu na livuhāfa sei mo lo vaiřa řa lo meresahi (2.14) mo vaiřa řa mai matea na Tanume Tapu (2.22) usuri na masalon God (3.11).

Moli matalete, Tanume Tapu matalete, God matalete mo aulu na hināu tari (4.4–5). Mo vereā mara kalesia la pa hahāu na tamata usuri na Tanumen God (4.3).

Ephesus mo lo toho mariviti na pahisa tasi Asia Minor (nake la tovia Turkey). Hin rani atu enia havati taon tavera hin jara atu na ruhuruhun Rome. Enia jaran Artemis, god hařai atu tamlohi řořoha la lo lotua ea (Acts 19).

Paul mo vujangia vara na natun God la pa hahāu hin mauri paro nike sohena sava (4.17–5.20). Tamlohi usuri non Moli la lo toho na opoia non God, ale la pa usuri na masalona (5.1). La malue na řořoha, la pa hahāu na malarani, ale maurira la pa merasahi na tinapua (5.8–9).

Paul mo vujangia vara tamlohi, hařai lahi peresi na natura, ale slev peresi na nora tamlohi tavera la pa hahāu sohena na maurira hin Křisto (5.21–6.9).

Paul mo levosahi mamahuni na řomopoia non God:

'Pani God, na nona řomopoia tavera jea, mo opoia mo tavera jea, mo sořotahiřa peresi Křisto ale mo sileřa na mauri paro, hina purongo vara enřa řa pa lo toho na mate mata nořa lejleji – God mo juri kamim usuri na nona řomřuhu – Matan kamim ka lo juri usuri na nona řomřuhu na rasua, kamim hasemim ka sopo vaia, enia otori non God isařa.' (2.4–5, 8)

Hin Leta Nike

1. Retioloolo (1.1–2)
2. Otori non Křisto hin Tanume Tapu (1.3–3.21)
3. Mauri paro hin Křisto (4.1–6.20)
4. Isoiso Retioloolo (6.21–24)

Retioloolo Non Paul Isana Mara Ephesus

¹ Enāu Paul, enāu vahařule matea non Křisto Iesu usuri na masalon God. Na lo uli leta nike isana tapuhi Ephesus, la haratu la lo turu řilangi hin Křisto Iesu.

² Na lo usiisi vara God Tamařa peresi nořa Moli Iesu Křisto la sohai na nora řomřuhu peresi na tamata isamim.

God Mo Leřuhu Hiniřa Hin Křisto

³ Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto. ⁴ Matan God na nona opoia mo viřoniřa hin Křisto tiroma moiso mo pa vai na varama, vara řa pa tapu ale řa vokevoke na nahona. ⁵ God mo taua tiroma moiso vara i pa laviřa sohena nona korohi řa mai natuna tataholo hin Iesu Křisto, usuri na nona řomavulahi peresi na masalona.

⁶ Matan haratu, řa hasohaso God matan nona řomřuhu tavera sei mo sureia hiniřa, matan enřa non Natuna sei mo opoia mo tavera jea. ⁷ Křisto mo volituhuřa na raena, ale God mo řomiřa mata nořa hehe usuri na ruhuruřu mata nona řomřuhu, ⁸ ale mo surei tavuniřa na nona řomřuhu usuri na nona lelvosahi.

⁹ God mo vaia hin haratu mo vuhesia na jara tavera. Mo vuhesi na nona hina luhu mata masalona usuri na nona řomavulahi sei mo taua hin Křisto, ¹⁰ ale řomřomi tavera atu non God sei mo taua moiso i pa masese na ranina tataholo sei vara Křisto i pa aulu na hināu tari na tuka peresi na varama. ¹¹ Ale God mo vai na hināu tari la masese usuri na masalona, mo taua tiroma moiso vara i pa viřoniřa nona vara řa pa vao matea hin Křisto. ¹² Matan vara kamam Jew sei kama lo tau na nomam řomtoho tiroma hin Křisto, God i pa lavi na hasohaso tavera matana. ¹³ Ale kamim sohena, ka sořotahi peresi na vaon Křisto hin rani atu ka rongu na reti mata varařuhu sei Retiřuhu mata nomim juri. Kamim ka tau na nomim rasua hin Křisto ale ka lo sořotahi peresia, ale matan ka sořotahi peresi Křisto, God mo sile kamim na Tanume Tapu sei mo retitauhi hiniřa tiroma moiso isana nona tamlohi. God mo vujangia vara ka nona matan mo sile kamim na Tanumena Tapu. ¹⁴ Tanume Tapu sei mo sohena retitauhi matea sei mo vujangia vara God i pa sileřa na hina řuhuruřu sei mo retitauhi hiniřa moiso, vavano i tikeli rani atu God i marivisi na nona vavahināu mata volituhu na nona tamlohi tari, ale matan haratu, řa pa hasohaso nořa God.

Usiisi Mata Lelvosahi Varařuhu

¹⁵ Matan hinau akerihi natu, mo tapulo hin rani atu nara na rongo na nomim rasua hin Moli Iesu peresi na nomim opoia isana tapuhi tari, ¹⁶ na sopo lo isoiso na noku vere meje isan God matamim na rani na lo usiusi vara na romfomi kamim. ¹⁷ Na lo usiusi vara God non nofa Moli Iesu Křisto sei memerana rufuhuru mo tavera jea, vara Tanumena i sile kamim na nona lelevosahi peresi na hitevosahi matan vara ha efi ulua na nomim levosahi hin God, ¹⁸ matan enia mo vai na mapumim mo mafivi na memera, matan vara ha efi hitevosahi na romtoho rufuhuru sei mo tovi kamim matana, ale matan vara ha efi hitevosahia vara nona lefuru rufuhuru sei la rufuhuru jea la sohena sava isana nona tamlohi.

¹⁹ Ale na lo usiusi vara ha pa tapulo hitevosahi na tavera suihana rufuhuru sei enia nofa, enfa sei fa rasua. Suiha nike enia pa suiha tavera jea atu ²⁰ sei mo sauteterahi Křisto na mateia ale mo sakelehia na jara ooloo tavera na matuan God na tuka aulu hinia, ²¹ God mo tahea mo aulu jea mo jeu la haratu la aulu, teni la haratu la lo tauri na suiha, teni la haratu la lo rilangi, teni la haratu la lo tiroma hin tea, teni na hija tari sei la lo toho, mo sopo hin pongi akerihi purongo pani hin pongi atu mo lo mai sohena. ²² Ale God mo tau na hinau tari na rufuhuru palon Křisto, ale mo vai Křisto sei mo aulu na hinau tari vara i patu nona kalesia tari, ²³ ale nona vao kalesia tari enira epena, ale maurin Křisto natu mo lo marivisi na hinau tari.

2

Mauri Paro Hin Křisto

¹ Tiroma ka mate mata nomim lejileji peresi na hehe sei ² ka lo toho hinira usuri na malelen varama nike nake, usuri na masalon Setan, enia supe rihirihiri rilangi atu sei mo aulu na masapa, natu mo lo voko na mapun la haratu sei la řohu vara la ooloo hin God. ³ Enfa řa sohera tiroma, řa lo hahau usuri na masalořa, ale řa loloso na masalořa sei mata epeřa peresi na romiřa, ale řa vora řa natu talai lolokoru non God mata hehe sohena tamlohi tari tinapua.

⁴ Pani God, na nona romopoia tavera jea, mo opoia mo tavera jea, ⁵ mo sořotahiřa peresi Křisto ale mo silefa na mauri paro, hina purongo vara enfa řa pa lo toho na mate mata nofa lejileji — God mo juri kamim usuri na nona romfuhu. ⁶ Matan God mo sauteterahiřa na mateia peresi Křisto, ale mo sakelehiřa peresia na tuka matan enfa řa matea peresi Křisto Iesu, ⁷ mo vaia matan vara hin la pongi sei la pa mai, i pa vujangia vara nona romfuhu mo

tavera jea sohena sava isařa usuri na nona romfuhu tari hiniřa hin Křisto Iesu.

⁸ Matan kamim ka lo juri usuri na nona romfuhu na rasua, kamim hasemim ka sopo vaia, God sei mo sile purongoi otori nike isařa; ⁹ mo sopo juri kamim mata nomim vavahinau, mo vono matan vara tea i sopo efi mangisi matana. ¹⁰ Matan enfa vavahinau non God, mo vaia řa mai hina paro matea hin Křisto Iesu matan vara řa pa vai na vavahinau řuhu sei God mo tatamahunira tiroma moiso matan vara řa pa hahau hinira.

Enfa Ra Matea Hin Křisto

¹¹ Matan haratu, na opoia vara kamim sei ka vora tamlohi řořoha, ha to romřomia sohena sava ka lo toho tiroma, ale Jew la lo vere vaia vara kamim ka sopo tatuara matan ka sopo taiřalihi sohera, hinau sei tamlohi la lo vaia na epera purongo pani mo sopo tueni na mapura, ¹² ale ha sopo romaliho vara hin la rani atu ka lo toho pani mo sopo te nomim Křisto, ka lo toho ka sopo tatua vao tadvavuin Israel, ale ka vinano na nora retitauhi mata lefuru non God, ale mo sopo te nomim romtoho, ka lo toho na varama pani ka sopo levosahi God. ¹³ Pani nake hin Křisto Iesu, kamim sei tiroma ka lo toho asau řove isan God, God mo lavi kamim ka mai mariviti isana na řaen Křisto Iesu. ¹⁴ Matan Křisto natu, mo tau na tamata isamam Jew peresi kamim tamlohi řořoha, mo vaia řa mai vao matea. Nona mateia mo vilijovovi vora tavera mata hitesatihi na tinapua sei mo lo turu na livuhařa, ale mo lo vaia řa lo meresahi, ¹⁵ na nona mateia mo vai na leu tari nona Jew la isoiso. Mo vaia matan vara i vai na vao tamlohi paro matea i malue hin la haratu mo rua mata nona sari tamata, ¹⁶ ale Křisto mo vaia la epe matea, mo sořotahira jara matea isan God na nona mateia, ale hinia, mo vilimatei na nofa hitesatisatihiřa. ¹⁷ Ale mo mai ale mo retivujavujangi na tamata isamim sei tiroma ka lo toho asau řove hin God, ale tamata isan la haratu la lo toho mariviti, ¹⁸ matan vara hin Křisto enfa tolu řa pa eri mai isan God Tama na Tanumena sei mo matelete purongo.

Ra Mai Iman God Paro

¹⁹ Ale nake ka sopo mele vinano teni tamlohi mata jara tinapua. Pani ka tamlohi hin jara atu tolu na nona tapuhi, ka tamlohi lolo iman God. ²⁰ Enfa řa imana, řa lo turu na pulon ima sei God mo vaia na nona vahařule peresi na provet matan nake, ale Křisto Iesu natu enia pulo vatu matan ima atu. ²¹ Hinia, ima tari la lo sořotahi mamahu mo řuhu, la ulua la mai temple tapu matea hin Moli sei ²² kamim sohena, God mo lo voro kamim ka mai jara

matea vara ha mai jara toho matea non Tanumen God.

3

Romfomi Luhu Non God

¹ Matan romfuhu non God sei natu, enau Paul na lo toho na ima rilangi matan noku vavahinau non Kristo Iesu matamim la tamlohi fofoha. ² Na levosahia vara ka levosahi moiso sohena sava God mo sileau hin vavahinau ruhu nike mata vereuli na sava hinau ruhu mo vaia mata juri kamim. ³ Sohena na ulia makomona tiroma moiso hin leta nike vara God hasena mo vuhesi na nona romfomi luhu isaku moiso. ⁴ Vara ha lo evia, ha pa efi hitevosahi na sava na levosahia moiso hin hina luhu atu hin Kristo. ⁵ Hina luhu nike, God mo sopo vuhesi isan te pina tamlohi na varama tuai sohena Tanumena mo vuhesia nake isana nona vahafulu tapu peresi na pfovet.

⁶ Hina luhu atu enia harihi: enia vara tamlohi fofoha tolu na Jew tari enira la pa lavi na hina ruhu ruhu sei God i pa silea isana natuna. Enira tupra rua la pa juri matan la rasu na Retiruahu, ale la sopesope tavalu epe matea purongo, ale enira tupra rua la pa lavi na vua retitauhi hin Kristo Iesu. ⁷ Enau na mai volitusi matea non Retiruahu nike usuri na otori ruhu ruhu mata romfuhu non God sei mo silea isaku usuri na nona vavahinau na suihana.

⁸ Hina purongo vara enau na atano jea na tapuhi non God, enia mo romfuhu isaku vara a pa retivujavujangi na ruhu ruhun Kristo isana tamlohi fofoha na sava tea i sopo eri levosahi te hinau matana, ⁹ ale vara a vai na tamlohi tari la memera na romfomi luhu non God sei mo vai na hinau tari sei mo jarohia tuai moiso.

¹⁰ Romfomi tavera non God enia mata vujangi na nona levosahi na malele tinatinapua tari na lima nona tamlohi isana vui varama sei la lo aulu peresi la haratu la lo tauri na suiha na masapa peresi na tuka. ¹¹ Haratu natu mo usuri na nona romfomi sei mo taua matan tuai tiroma moiso vara Kristo Iesu nofa Moli i pa vai mafivisia.

¹² Matan hin Kristo fa efi turu rilangi, ale enia mo vaifa fa efi romfilangi na nofa rasua fa sopo matahu vara fa mai na nahon God. ¹³ Matan haratu, na lo usi kamim vara mapumim la sopo jovi mata noku rani rilangi matamim, ha lavia sohena hina ruhu matea isamim.

Usiisi Non Paul

¹⁴ Matan hinau nike, na lo papaohi atano na nahon God Tama, ¹⁵ enia haratu sei mo tau na hija vao tari na tuka peresi na varama. ¹⁶ Na lo usiisi vara God na nona leruhu ruhu ruhu matuvana, i tinafiha

vara i vai na lolomim la suiha hin suiha atu Tanume Tapu mo lo silea. ¹⁷ Na lo usiisi vara Kristo i pa toho na lolo mapumim na nomim rasua, na lo usiisi vara na nomim wariha i rilangi na opoia ruhu ruhu non God, ¹⁸ na lo usiisi vara ha pa efi hitevosahia peresi na tapuhi tari vara nona opoia mo tavera sohena sava, mo peravu sohena sava, mo aulu sohena sava, ale mo puaha sohena sava, ¹⁹ ale matana, na lo usiisi vara fa efi levosahi na opoia non Kristo sei mo jeu na lelevosahi, matan vara ha pa mafivi savulevu na mauri peresi na suiha tari sei la lo tai isan God.

²⁰ Na lo usiisi isan God sei suihana tavera jea mo lo voko hini fa sei i efi vai na hinau la jeu na sava fa lo usia teni fa lo romfomia, ²¹ vara i lavi hasohaso tavera na vao kalesia tari, ale hin Kristo Iesu na rani tari, tui tui, amen.

4

Enfa Epe Matea Hin Kristo

¹ Matan haratu, enau prisoner matea non Moli, na lo usia rilangi vara ha hahau na malele mo tataholo na nahon God usuri mauri atu mo tovi kamim matana. ² Ha romatano, ha ruhu isana tinapua, ha romperavu isamim hatehateahi, na opoia ha romfomi purongo na hinau sei tinapua la jovi hinira. ³ Tanume Tapu mo sofofotahi kamim moiso, ale ha hahau na tamata matan vara ha pa matea.

⁴ Enfa mo isoiso fa epe matea, ale enfa mo isoiso fa lavi na Tanume Tapu matelete purongo, ale enfa mo isoiso God mo tovi fa matan mauri ruhu ruhu atu na rani mo lo mai. ⁵ Moli enia matelete purongo, rasua matea, paptijo matea, ⁶ ale God matelete purongo, enia Tamafa sei enia mo aulu hini fa mo isoiso, ale mo lo toho hini fa mo isoiso, ale mo lo vavahinau hini fa mo isoiso.

⁷ Pani Kristo mo silefa hatehateahi na vavahinau ruhu usuri na masalona ruhu ruhu. ⁸ Matan Retitapu mo vereea tuai moiso vara,

'Rani atu mo sahe aulu na tuka,
mo tiroma na vao matea mo terira,
ale mo sile na otori isana nona tamlohi.'
Psa 68.18

⁹ Reti sei 'mo sahe aulu' mo lo farami na sava? Mo faramia vara enia mo sivo na lolo varama tiroma. ¹⁰ Haratu sei mo lo sivo atano na lolo varama enia haratu sei mo sahe aulu vara i aulu na hinau tari na tuka.

¹¹ Enia haratu sei mo sile na tamlohi hai isana vao kalesia sohena vahafulu, hai sohena pfovet, hai la evangelist, hai la tavui kalesia, ale hai la tamlohi vujangi. ¹² Nora vavahinau enia matan vara la pa efi vujangi mamahuni na tapuhi, matan vara la efi vai na vavahinau non God, ale enia vara

la vai na epen Křisto sei enŕa kalesia tari, la ulua i rilangi, ¹³ vavano i tikeli na rani enŕa mo isoiso ŕa matea na rasua peresi na lelevosahi hin Natun God. Ale ŕa mai tamlohi jea na ŕomŕomi, ale ŕa ulua ŕa sohen Křisto vevuhi.

¹⁴ Moiso ŕa pa sopo mele sohena natuvarihhi sei tarea ŕomira la sopo levosahi mamahuni na sava la lo rasua. Ale la ŕomkaka matan tea mo vere te hinau tinapua isara teni te reti nona tamlohi vujangi haluhalu sei mo vai halu atu la rongoa sohena retivararuhu matea isara. ¹⁵ Ra pa sopo sohera pani ŕa lo taurilati na retivararuhu na opoia, ale na hinau tari ŕa pa ulua hin Křisto sei enia patu epena. ¹⁶ Epena tari la lo ulua na limana purongo, la lo soŕotahi mo fuhu matan manmanina tari la lo taurilatira jara matea. Vara kalesia hatehateahi la vai na ŕungara vavahinai, pa epena mo ulua na opoia.

Mauri Paro Hin Křisto

¹⁷ Ale na lo verea rilangi isamim na hian Moli vara ha sopo mele hahau sohena tamlohi ŕoŕoha sei nora ŕomŕomi mo rongorongono. ¹⁸ Nora ŕomŕomi ŕoŕoha, mo lo toho asau rove na maurin God matan mapura mo rilangi ale mo horora vara la sopo eri lelevosahi. ¹⁹ Matan la sopo eri mele mahanuhanu hin te nora hehe, la pute na nora mauri maji, ale la lo ŕomŕomjea vara la vai na posposi lumiha sasati tari.

²⁰ Pani hin rani atu ka tau na nomim rasua hin Křisto, la sopo vujangia vara ha mauri sohena, ²¹ na levosahia mo fuhu vara ka pete rongo te hinau matana moiso, ale ka soŕotahi peresi Iesu usuri na retivararuhu sei la vujangia isamim moiso. ²² La vujangia isamim troma moiso vara ha tau naŕihhi na nomim mauri tuai mata hehe sei la posposi lumiha sasati sei mata halu la vaia mo lo ranga jea, ²³ ale ha tinaŕihhia vara Tanumen God i posi na ŕomimim peresi na nomim kilakilau la paro. ²⁴ La vujangia isamim vara ha ru na mauri paro sei God mo vaia usuri na masalona, mo tataholo, mo tapu ale mo vararuhu.

²⁵ Matan haratu, ha isoiso na halu sohen provet matea mo verea mara, 'kamim hatehateahi ha retireti tataholo isana tahisamim'

Zec 8.16

matan enŕa ŕa noŕa hatehateahi. ²⁶ 'Vara ka lolokoru, ha sopo hehe!' *Psa 4.4* Ha sopo tinaŕihhia vara pulo nomim lolokoru i aulu hin kamim i peravu, ²⁷ vara i vono, ha pa sile na masapa isan Tiapolo vara i aulu hin kamim.

²⁸ Vara engko tamlohi vavanaho matea, o isoiso na vavanaho. O tapulo hani na masumasum, ale o hansohai isan la haratu la vejuveju. ²⁹ Ha sopo tinaŕihhia vara te reti

sasati hatea i malue na jingomim, pani ha pa lo vere na reti fuhu purongo matan vara la eŕi tueni la haratu la lo rongora.

³⁰ Ale ha sopo vai na Tanume Tapu non God i rongo i sati na sava ka lo vaia, matan enia natu mo tapuhi kamim moiso matan rani atu God i pa juri kamim hinia.

³¹ Ha pulahi naŕihhi na nomim posposi hohona, lolokoru sati, lolokoru, ngaruhi na tinapua, retiŕeŕesi na tinapua, ale ha pulahi naŕihhi na posposi sasati tari la sopo toho na maurimim.

³² Pani ha vai na posposi fuhu isamim hatehateahi, ha ŕomopoi, ha ŕomi kamim hatehateahi sohen God hin Křisto mo ŕomi kamim.

5

Ha Hahau Na Malarani

¹ Matan haratu, ha usuri na tovongi non God na hinau tari ka lo vaira sohena natuna tataholo sei mo opoira mo tavera jea, ² ale ha toho na opoia sohen Křisto mo opoira sei mo sile na maurina mataŕa sohena malamalai matea asuna mo ponaha mo fuhu isan God.

³ Ha sopo tinaŕihhia vara te mauri maji teni te ŕomŕomi lumiha, teni te hanmarua i toho isamim. Matan la hinau nika la sopo eri toho isana tapuhi non God. ⁴ Ha sopo vere na hina lumiha teni retireti rongorongono vono, teni sorahi sati na haŕai teni tamlohi — la hinau tari sei enira la sopo tataholo isamim. Pani na jarara, ha vere meje isan God. ⁵ Matan ha levosahi mamahunia vara haratu mo lo vai na mauri maji, teni ŕomina mo lumiha, teni mo hanmarua matan tamlohi hanmarua matea enia tamlohi lotulotu vono matea, i pa sopo eri unu hin mauri atu Křisto enia God la supe hinia. ⁶ Ha sopo tinaŕihhia vara tea i halu kamim i verea vara sava na lo verea akerihhi la retireti purongo, matan talai lolokoru non God mata hehe i pa jovi isana tamlohi lejileji tari. ⁷ Ha sopo vai la hinau sei la lo vaira, ⁸ matan na pongi matea kamim ka lo toho na ŕoŕoha, pani nake kamim ka lo toho na malarani matan Moli. Ha hahau sohena natu malarani, ⁹ matan vua malarani enia mo vai na hina fuhufuhu tari sei la tataholo ale la vararuhu la pala.

¹⁰ Ha vaihitea vara ha levosahi na sava God mo avulahi hinia. ¹¹ Ha sopo soŕotahi peresi tea mata vai na hina sasati mata ŕoŕoha, pani na jarara ha vai na tamlohi la levosahia vara la hinau atu la sati. ¹² Matan enia hina mahanuhanu matea vara ha lo eŕi sorahi na hinau tamlohi lejileji la lo vai luhu hinira. ¹³ Pani hinau tari, malarani mo merasahira la mera mo fuhu vara la sasati sohena sava. ¹⁴ Matan hinau tari sei

la pala na jara tavera malarani mo vaira la memera, ale Retitapu mo vereea vara, 'O turu o kilau na nom fommate!

O turu na mateia,
ale Kristo i pa merasahiho,
ale ha pa lelevosahi.'

Isa 26.19; 51.17; 52.1; 60.1

Ha Mauri Na Suihan Tanume Tapu

¹⁵ Matan haratu, ha lo kilau mamahunia vara ka lo hahau sohenana sava, i sopo sohenana tamlohi rongorongono vono pani sohenana tamlohi lelevosahi. ¹⁶ Ha sopo toho purongo pani ha vai na hina ruhu matan la rani nike hehe mo mafivi hinira. ¹⁷ Matan haratu ha sopo rongorongono vono, pani ha tamlohi lelevosahi mata levosahi na masalon Moli. ¹⁸ Ale ha sopo drong na wai filangi sei i pa komo na maurimim, pani ha tinafihi na Tanumen God i mafivisi kamim, ¹⁹ ale ha lalavete na psalm, na hymn peresi na vete Tanume Tapu mo silera, ale ha sohai na vete sei la lo toho na mapumim la sahe isan God. ²⁰ Tarea ha vere meje isan God Tama matamim hatehateahi na hijan nofa Moli, Iesu Kristo.

Reti Mata Lahi Nona Kalesia

²¹ A mele vereea vara ha ooloo hin kamim hatehateahi matan ka lo lotu Kristo na ooloo. ²² Kamim ha'rai lahi, ha ooloo na tuamim sohenana ka lo ooloo hin Moli. ²³ Matan tamlohi lahi matea enia patun narouna, mo sohen Kristo enia patu epena sei vao kalesia tari, enia hasena mo sile na maurina vara i jurira. ²⁴ Sohenana vao kalesia tari la lo ooloo hin Kristo, ale kamim ha'rai lahi sohenana ha pa ooloo na tuamim na hinau tari.

Tamlohi Lahi La Sohen Kristo

²⁵ Tamlohi lahi ha opoi na naroumim sohen Kristo mo opoi na nona vao kalesia ale mo hase sile na maurina matana, ²⁶ matan vara i tapuhia ale Tanumena mo vaia mo vokevoké na paptijo peresi na nona reti. ²⁷ Mo vaia matan vara i tatamahuni na vao kalesia vara i nona hasena sei mo fuhuruhu jea, mo sopo te hina lumiha hinia, teni te hehe teni te hina sasati tinapua hatea, pani mo tapu mo sopo te hinau vara tea i efi tuvaia hinia. ²⁸ Mo sohenana purongo, tamlohi lahi la pa opoi na naroura sohen la lo opoi na epera hasera. Matan tamlohi lahi sei mo lo opoi narouna, mo lo hasena opoia. ²⁹ Matan tea mo sopo hasena rohu na epena, pani mo vahania na nona reti ale mo kilau mamahunia, sohen Kristo mo lo vaia isana vao kalesia. ³⁰ Ale enfa ra sope-sope epena. ³¹ Sohenana Retitapu mo vereea vara, 'Matan hinau atu, tamlohi matea i pa tinafihi tamana enia tinana, ale i sorotahi isan narouna, ale enira tupra rua la mai matea'.

Gen 2.24

³² Hinau nike enia vujangi puhoni matea, matan enia mo lo vujangia sohenana sava Kristo mo lo sorotahi isana vao kalesia, ale la matea. ³³ Matana, a mele vereea vara tamlohi hatehateahi i pa opoi narouna sohen mo lo hase opoia, ale narouna i pa sile na ooloo isan tuana.

6

Reti Mata Natuvarihi Peresi Na Tamara

¹ Natuvarihi tari, ha ooloo na tamamim peresi na tinamim, matan enia mo tatholo. ² 'Ha ooloo hin tamamim peresi na tinamim' — matan harihi enia tiroma leu sei retitauhi matea mo lo toho hinia, ³ ale sopena mo lo vereea mara vara ha ooloo hinira — 'maurim i pa peravu, ale i pa mafivi na lefuhu'.

Deut 5.16

⁴ Tama, ha sopo vaivai na natumim vara la lolokoru, pani ha vaira la ulua na ooloo peresi na vujangi hin Moli.

Reti Mata Slev Peresi Na Nora Tamlohi Tavera

⁵ Kamim slev, hin mauri nike ha tatamahu tarea vara ha ooloo na nomim tamlohi tavera, ha lo ooloo hinira na mapumim tari mo sopo te halu hinia, sohen ka lo vaia isan Kristo. ⁶ Ha sopo sohen la haratu sei la lo voko matan tamlohi la lo kilaura — sohen la haratu la opoia vara tamlohi la pa avulahi hinira purongo — pani ha sohenana slev non Kristo sei la lo vai na masalon God na mapura, ⁷ ale ha avulahi hinia ha vaia sohen ka lo volitusi isan Moli mo sopo isana tamlohi. ⁸ Kamim ha lo levosahia vara Moli i pa sile na volifra hatehateahi usuri na hina fuhu ra lo vaira, hina purongo vara enfa ra materi teni ra lo slev.

⁹ Ale usuri posposi nike, kamim tamlohi tavera ha pa vaia isana nomim slev sohenana, ha isoiso na nomim reti filangi isara matan ha lo levosahia vara kamim rua nomim tamlohi tavera matea purongo na tuka, ale enia mo sopo tametame tea.

Ruru Mata Vuro Non God

¹⁰ Isoiso noku reti nahai: ha filafilangi hin Moli na filangi nona suihana. ¹¹ Ha ru na ruru mata vuro tari non God matan vara ha efi turu filangi mata turuhoro na vavahinau non Tiapolo sei la lo mai la lo haluhalu na tamlohi na malele matuvana. ¹² Matan nofa vuro mo sopo peresi na tamlohi sei ra efi hitera, pani peresi na angelo sasati sei la aulu, peresi la haratu la filangi, peresi la haratu sei la aulu na rofoha hin varama nike, peresi na suiha vutii sasati na masapa.

¹³ Matan haratu, ha ru na ruru vuro tari non God matan vara ha efi turu na jaramim hin rani sasati nike, ale ha vai na hinau tari

ha efi vaira, ale ha turu filangi. ¹⁴ Ha turu filangi ha sopo juha, ha otioi na oti mata retivaraŕuhu, ale ha ru na ŕumamim na rururu vuro mata posposi tataholo non God. ¹⁵ Ale sohena nomim sabat mata palomim, ha ru na Retiŕuhu sei mo lo sile na tamata matan vara ha pa tatamaha tarea mata ha hahau peresia. ¹⁶ Ha tauri filangi na nomim rasua sohena tingting matea sei i efi tinghoro na evine hani non Tiapolo. ¹⁷ Ha ru na hati vuro mata juri sei mo lo matahi na maurimim, ale ha taurilati na sita vuro non Tanume Tapu sei enia reti non God. ¹⁸ Ha usiusi ale ha usi God vara i tueni kamim tarea. Tarea ha usiusi usuri na Tanumen God, ale matana, tarea ha lo kilau i ŕuhu, ale ha tau na ŕomimim mata usiusi mata tapuhi tari non God.

¹⁹ Ha usiusi matakū matan vara God i pa sileau na retisohai sei mo opoia vara a vereā, ale vara a sopo matahu mata vere mamahuni na hina luhu mata Retiŕuhu i memera i ŕuhu vara enia mata tamlohi tari. ²⁰ Enau na lo toho na jen nakerihi matan na lo retivujavujangi retisohai nike sohen God mo ŕuleau matana.

Isoiso Reti Non Paul

²¹ Tychicus, vorai ŕuhuruŕuhu sei mo lo turu filangi mata volitusi na vavahinau non Moli, enia i pa vere kamim na hinau tari vara ha levosahira, matan ha pa levosahia vara na lo toho sohena sava. ²² Na lo ŕulea mai isamim matan haratu natu, vara ha pa efi levosahia vara kamam kama lo toho sohena sava nike, ale vara i efi retituetueni na mapumim.

²³ Noku usiusi vara tamata, opoia peresi na rasua la tai isan God Tama peresi Moli Iesu Kŕisto, la pa toho isamim la vorai peresi na vevorai. ²⁴ Na lo usiusi vara ŕomfuhu non God i pa toho isan la haratu sei la opoi noŕa Moli Iesu Kŕisto na opoia sei mo sopo te isoisona.

**Leta
Paul Mo Uli Isana Mara
Philippi
Leta Nike**

Paul mo uli leta nike na ima filangi (1.7) vara i vere meje isana kalesia Philippi mata nora otori peresi nora usiusi matana (1.5; 4.10–19). Mo lo kilau toho vara i pa materi matan vara i efi mele retivujavujangi na Retifuhu (3.17–19). Pani mo levosahia vara korong la pa vilimateia hin ima filangi atu (1.21; 2.17; 3.10).

Philippi mo lo toho auta Greece hin jara atu la tovia Macedonia. Paul mo tapulo na vao kalesia atu Philippi usuri na nona retivujavujangi ea (Acts 16). Ale mo retiroahaira vara la pa lavi na rani filangi sohen Paul mo lo lavia moiso. Pani mo vereea isara mara vara i sohena, leruhu non God i pa toho isara matana (1.28–30).

Paul mo vereea isara mara la pa lo kilau matan la tamlohi atu la lo posi na vujangi tataholo non Kristo (3.2–11). Paul mo avulahi tavera, hina purongo mo lo toho na ima filangi matan Kristo. Paul mo vereea mara la pa hahau jara matea (2.2; 4.2–3) ale vara la pa usuri na romfomi non Kristo Iesu sohen harihi:

'Romimim i pa sohena romin Kristo Iesu, hina purongo vara tiroma enia God tataholo, enia mo sopo romfomia vara i taurilati romfomi atu vara enia God, pani mo hasena taua sivo atano mo mai sohena volitusi matea tataholo, ale mo vora mo mai mo sohena tamlohi purongo, ale mo hasena taua sivo atano, ale mo ololo mo kakau na nona mateia, mateia atu enia mateia sasati mata talai na talopeilopei matea.' (2.6–8)

Hin Leta Nike

1. Retiololo (1.1–11)
2. Maurin Paul (1.12–30)
3. Maurin Iesu (2.1–18)
4. Retisohai Hin Te Tapalan Paul (2.19–30)
5. God Mo Laviira (3.1–4.9)
6. Paul Mo Vere Meje Isara (4.10–20)
7. Isoiso Reti (4.21–23)

¹ Enau Paul peresi Timothy, kamam kama slev non Kristo Iesu, kama uli leta nike isana tamlohi vironi non God hin Kristo Iesu la lo toho Philippi, peresi la haratu la lo tiroma na tamlohi peresi la haratu la lo deacon ea. ² Romfuhu peresi na tamata non God Tamafa peresi Moli Iesu Kristo i pa toho isamim.

Usiusi Non Paul

³ Vara na lo romfomi kamim, tarea na lo vere meje isan God matamim. ⁴ Ale na rani na lo usiusi matamim sohena, na lo usiusi na noku romavulahi, ⁵ matan kamim ka tapala na vavahinaiu mata Retifuhu, mo tapulo na tiroma rani mo tikeli nake, ⁶ Na levosahia mo fuhu vara haratu mo lo tapulo na vavahinaiu fuhu na maurimim, i pa lo vaia i tikeli rani atu Iesu i mele mai, ale i pa mai na isoisona.

⁷ Mo tataholo vara a romfomia sohena matamim matan noku opoia matamim mo tavera jea, hina purongo vara na lo toho nike na ima filangi teni vara a lo matahi na Retifuhu sei ka lavia, teni vara a lo vujangi vara enia mo retivarafuhu, ale mata romfuhu non God, enfa mo isoiso fa tapala matana. ⁸ God mo levosahia vara na lo opoi kamim, mo tataholo na opoia non Kristo Iesu isamim. ⁹ ale harihi enia noku usiusi: vara nomim opoia i pa lo ulua i tavera tarea, na lo usiusi vara ha ulua na nomim levosahi fuhu tari peresi na rongvosahi na hinaiu mo varafuhu, ¹⁰ matan vara ha pa eri rongvosahi na sava natu, mo tataholo vara ha vaia, ale matan haratu, ha pa eri toho vokevoke i pa sopo tea i tuvai kamim i tikeli rani atu Kristo i mele mai, ¹¹ ale ha pa marivi na vua mata mauri tataholo sei mo tai isan Iesu Kristo, i pa vai na tamlohi la tahe na hijana, ale la pa sile na hasohaso isan God.

Retivujavujangi Hin Kristo

¹² Ale la vorai peresi na vevorai, na opoia vara ha pa levosahia vara sava rani filangi mo mai isaku nike, mo mai matan vara tamlohi matuvana la efi rasu na Retifuhu. ¹³ Ale matan haratu, tamlohi vuro tari non Supen Rome sei la lo kilauai nike, peresi na tamlohi tari la levosahia vara enau na lo toho na ima filangi matan Kristo. ¹⁴ Matan na lo toho na ima filangi nike, Moli mo vai na romfomi nona vorai kalesia nike la romfilangi vara la pa vereuli na Reti non God la sopo matahu matana.

¹⁵ Varafuhu tamlohi hai la lo retivujavujangi hin Kristo na nora mereimerei, na nora romaulu, pani hai la lo vaia na posposi tataholo. ¹⁶ La haratu hitahu, la lo vaia na nora opoia matan la levosahia vara enau na lo toho na ima filangi matan na lo matahi na Retifuhu. ¹⁷ La haratu tiroma la lo retivujavujangi hin Kristo na romaulu, romira la sopo tataholo, la lo romtau vara la pa mele vai na noku rongohaji i mele tavera nike na ima filangi matana. ¹⁸ Pani mo sopo te hinaiu hinia. Hinaiu aulu hinia, enia vara tamlohi la retivujavujangi Kristo, hina purongo vara la lo vaia na nora tapnetano teni la varafuhu. Matan haratu na avulahi,

ale a pa lo avulahi, ¹⁹ matan na levosahia vara nomim usiusi peresi na tuetuenui sei Tanumen Iesu Křisto mo silea, sava mo masese isaku, isoisona God i pa juria.

Paul Mo Mauri Matan Iesu

²⁰ Na levosahia mo ruhu, ale na lo fomtoho vara a pa sopo vai te hinau vara i eri vaiiau a mahanuhanu matana, pani na noku fomřilangi nake sohena tarea, a pa lo sile na ooloo isan Křisto na hinau tari na lo vaira, vara a mauri teni a mate. ²¹ Matan isaku, mauri enia matan Křisto, ale mate, i pa mele ruhu. ²² Vara a lo mauri hin epe nike, enia masapa vara noku vavahinau ruhu la pa vuaha. Pani na sopo levosahia vara sahara mo mele ruhu, ²³ fomiku mo opoira enira rua. Na opoia vara a malue a toho peresi Křisto matan haratu mo ruhu jea, ²⁴ pani i pa mele ruhu jea isamim vara a lo mauri.

²⁵ Matan na levosahia mo ruhu vara a lo mauri, a eri tuenui kamim mo isoiso, ale ha pa ulua na avulahi na nomim rasua, ²⁶ matan vara ha pa hasohaso Křisto Iesu mata mo tinafihiia vara a mele toho peresi kamim.

Ra Pa Tamlohin Tuka

²⁷ Hinau aulu enia harihi: vara ha hahau na malele mo tataholo na Retiřuhu non Křisto, matan vara a mai a hite kamim teni vara a rongo te sorasorahimim, a pa levosahia vara ka lo turu řilangi jara matea sohena tamlohi matelete, mata matahi na sava Retiřuhu mo vujangia, ²⁸ ale ha sopo matahuni la haratu sei la nomim meresahi, matan nomim rasua enia i pa matamata mera matea isara mata vujangira vara maurira la pa sopo juri, pani kamim ha pa juri, harihi God i pa vaia. ²⁹ Matan God mo taua vara ha pa sopo rasu Křisto purongo, pani vara ha pa lavi na rani řilangi matan Křisto, ³⁰ matan na levosahia vara ka lo lavi na rani řilangi sohen ka hitea isaku hin rani atu na lo toho peresi kamim, ale nakerihi sohena na lo lavia na ima řilangi.

2

Tarea Ra Pa Usuri Na Posin Křisto

¹ Matan ka lo sořotahi hin Křisto, vara te nomim retituetuenui, teni ka nanau matan nona opoia mo lo toho isamim, teni ka tapala peresi na Tanumena, teni te opoia na mapumim teni te fomopoia, ² ha marivisi na noku avulahi sohen harihi: fomimim i matea, ha opoiopoi kamim, mapumim peresi na fomimim i matea na sava ha pa vaia, ³ ha sopo vai te hinau matan ka opoia vara ha pa jeu na tinapua, teni ha vai na hinau na fomaulu, pani na posposi fomatanu, ha fomfomi na tinapua i jeu kamim. ⁴ Kamim hatehateahi, ha

sopo fomřomi kamim hasemim purongo, pani na hinau i pa ruhu isana tinapua. ⁵ Romimim i pa sohena fomim Křisto Iesu, ⁶ hina purongo vara tiroma enia God tataholo, enia mo sopo fomřomia vara i taurilati fomřomi atu vara enia God, ⁷ pani mo hasena taua sivo atano mo mai sohena volitusi matea tataholo, ale mo vora mo mai mo sohena tamlohi purongo, ⁸ ale mo hasena taua sivo atano, ale mo ooloo mo kakau na nona mateia, mateia atu enia mateia sasati mata talai na talopeilopei matea. ⁹ Matan haratu, God mo tahea hin jara atu mata lavi na ooloo tavera jea, mo silea hin hija atu mo aulu jea mo jeu na hija tari, ¹⁰ matan vara na hijan Iesu, tamlohi tari la pa paaohi, la haratu la lo toho na tuka, na varama peresi na jaran la haratu la mate na lolo varama, ¹¹ ale meme tari la pa taviti vara Iesu Křisto enia Moli, hasohaso tari i pa sahe isan God Tamařa matana.

Kamim Ka Malarani Na Varama

¹² Matana, la tapalaku ruřuřuhu hin rani atu na lo toho peresi kamim ka lo ooloo tarea, ale nake, matan na sopo toho peresi kamim, i pa mele ruhu vara ha lo kilau mamahu vara ha vai na vavahinau nona tamlohi sei God mo jurira na posposi matahu peresi na savaravara, ¹³ matan God hasena sei mo lo vavahinau hin kamim, mo vai kamim vara ha avulahi vara ha vavahinau i usuri na sava mo opoia.

¹⁴ Na vavahinau tari ka lo vaira, ha sopo ngutungutu teni ha vasvas, ¹⁵ matan vara i pa sopo te hinau vara tamlohi tinapua la eri tuvai kamim hinia. Ha toho na mauri vokevoke, i sohena natun God na livuhan pina haluhalu sei mo hehe, ale kamim ka lo mera sohena majou na varama. ¹⁶ Ha taurilati reti atu mo sile na mauri, matan vara a pa eri retihapahapa hin pongi atu non Křisto, vara noku vavahinau isamim la sopo vano hina purongo, ¹⁷ pani hina purongo vara mauriku i sohena wai malamalai matea, ale i vano peresi na nomim rasua isan God, enau na avulahi vara a silea vara enfa tolu řa pa avulahi jara matea. ¹⁸ Ale mo ruhu vara ha avulahi matana sohena, ale ha avulahi peresiau.

Paul I Pa Rule Timothy Isara

¹⁹ Na lo fomtoho vara a pa řule Timothy i vano isamim i pa sopo tuai, vara Moli Iesu i tinafihiia, matan vara enau sohena a pa rongo i ruhu vara a rongo te sorasorahimim. ²⁰ Matan mo sopo tea nike, řomina i tavera matamim sohen Timothy, matan enia mo opoia vara ha lo toho i ruhu. ²¹ Matan tamlohi tinapua mo isoiso la lo ale na masalora purongo, mo sopo masalon Iesu Křisto. ²² Pani kamim ka levosahi mamahuni na posposi ruhu non Timothy

moiso, matan enia mo lo tueniau sohen natuku matea tataholo na vavahinau mata Retiŕuhu. ²³ Matana, na lo ŕomtoho vara a pa ŕulea nohorih, pani a pa hitea vara i pa sohena sava isaku tako. ²⁴ Ale hin Moli, na levosahia mo ŕuhu vara i sopo tuai enau sohena a pa mai.

Paul Mo Rule Epaphroditus

²⁵ Pani na lo ŕomŕomia vara a pa mele ŕule Epaphroditus vano isamim. Enia vo-raiku, tapalaku na vavahinau, ale tapala tamlohi vuro matea mata rasua, ale nomim vahafule, haratu ka lo ŕulea isaku vara i tueniau nike. ²⁶ Matan enia mo opoia vara i mele hite kamim, ale mo rongo mo sati matan ka rongoa vara enia mo rojo, ²⁷ vara ŕuhu enia mo rojo, mariviti vara i mate, pani God mo ŕomopoia, mo sopo isana hasena, pani enau sohena, mo sopo opoia vara i vaiau a rongu i sati aulu na noku rongo sati. ²⁸ Matan haratu, na avulahi vara a mele ŕulea vano isamim, matan vara ha pa avulahi vara ha mele hitea, ale enau ŕomiku i sopo mele kaka hajavua hinia. ²⁹ Ale, ha mele lavia mai isamim na hijan Moli na avulahi tavera. Ale mo tataholo vara ha sile na ololo isana tamlohi sohena, ³⁰ matan mariviti i mate mata vavahinau non Kristo, matan mo hafehi na maurina vara i vai vevuhi na nomim vavahinau sei ka sopo eri vaia isaku.

3

Vara A Levosahi Kristo Peresi Na Suihana

¹ Mele hina tinapua la vorai peresi na vevorai, ha avulahi tavera matan Moli. Mo sopo te hinau hinia vara a mele uli la hinau sei na pete vereea isamim tiroma moiso matan la pa turuhoro kamim.

² Ha lo kilau la viriu sei, la tamlohi sasati atu la lo tai komokomo na epe tamlohi na taiŕalihi.* ³ Matan enfa natu, taiŕalihi varaŕuhu, ŕa lo lotu na suihan Tanumen God, ale ŕa lo retihasohaso Kristo Iesu na sava mo vaia matafa, ale ŕa sopo mele tau na rasua na noŕa vavahinau, ⁴ hina purongo vara enau a eri tau na noku rasua na noku vavahinau sohera. Vara tea mo ŕomŕomia vara i eri tau na nona rasua na nona vavahinau, enau na jeua, ⁵ enau na taiŕalihi na rani mo limaravtolu na noku pongi vora, enau na tavitavin Israel, tavitavin Benjamin, enau Jew tataholo, usuri na Leu, enau Pharisee matea. ⁶ Ale na filarilangi na noku rasua, na tipahi na vao kalesia non Iesu. Ale usuri na leu tataholo ŕuhu, tea i sopo eri tuvaiau hin te hinau matana, ⁷ pani na noku kilakilau mata hinau vara la

pa tueniau tiroma, nake matan hin Kristo, na hitera sohen hina purongo. ⁸ Aulu hin haratu, na levosahia vara hinau tari enira hina purongo na rani na lo kilau usurira peresi na hinau mo mele ŕuhu jea, enia vara a levosahi Kristo Iesu noku Moli, ale matan Kristo, na sopo mele tau na noku rasua na noku vavahinau tari, na hitera sohena utauta matan vara a lavi Kristo, ⁹ ale vara a pa toho isana, mo sopo matan na vai te hinau mo tataholo matan na lo usuri na Leu, pani vara a mai a tataholo na nahona mata noku rasua hin Kristo, hinau sei, God hasena mo vereea vara enau na tataholo mata noku rasua hinia, ¹⁰ matan vara a levosahi Kristo peresi na suiha nona sauteterahi, ale na opoia vara a soŕotahi peresia na nona rani rilangi, ale a sohena na nona mateia, ¹¹ ale, matan la hinau tari sei vara enau sohena, a pa lavi na sauteterahi na mateia.

¹² Na sopo vereea vara na pete lavi la hinau tari atu moiso, teni vara God mo vaiau na tataholo vevuhi moiso, pani na lo tutunguia vara a lavi la haratu sei Kristo Iesu mo vifoniau matara. ¹³ La vorai peresi na vevorai, na sopo vereea vara na lavira noku moiso, pani hina aulu matea na lo tau na ŕomiku vara a vaia enia harihi: na sopo mele tauri na hinaun tuai, pani na lo kilau na hinau mo lo mai, ¹⁴ ale na lo tutunguia vara a kakau na isoisona, matan vara a lavi otori atu na tuka God mo toviau matana hin Kristo Iesu.

¹⁵ Mo ŕuhu vara enfa sei ŕa jea na malele rasua, ŕa lo ŕomŕomi sohena. Pani vara kilakilau non tea mo sopo sohena, God i pa vujangia vara sava na lo vereea mo tataholo isamim. ¹⁶ Hina aulu hin la hinau sei ŕa lavira moiso enia vara ŕa usuri na sava ŕa pete levosahia moiso vara la tataholo.

Tunguhi Na Palon Paul

¹⁷ La vorai peresi na vevorai, ha pulutahi ha tutungui na paloku, ale ha kilau mamahuni la haratu la lo hahau usuri tovongi sei kama lo sile kamim hinia. ¹⁸ Matan sohen na pete vereea isamim moiso, ale nake na lo mele vereea isamim na ŕomsati, vara tamlohi matuvana la lo hahau sohena meresahi na sava Kristo mo vaia na nona talopeilopei. ¹⁹ Isoisona enia la pa hase komora, nora god enia masalora, la retihapahapa na nora vavahinau mata mahanuhanu, la lo tau na ŕomira na hinau mata varama purongo. ²⁰ Pani enfa tamlohin tuka, ale ŕa lo kilau matan noŕa Jujuri i pa tai ea, enia Moli Iesu Kristo, ²¹ enia i pa posi na epefa la mai la tataholo na epena sei mo ŕuhufuhu jea, i pa vaia hin

* 3:2: viriu: Paul mo lo vere vara Jew enira viriu, enira haratu sei la rilangi vara la taiŕalihi na tamlohi.

Colossians

Leta

Paul Mo Uliā Isana Mara

Colossae

Leta Nike

Colossae enia taon tavera mo aulu na jara matan Asia Minor, mo lo toho Opaē na vanuan Ephesus ale la asa asau. Paul mo sopo lo vano ea hin te rani, pani mo avulahi matan mo levosahia vara rasua nona kalesia ea hin Křisto mo lo mauri (1.3–7; 2.6–7). Epaphras mo vujangi na Retiruhu isara tiroma, enia mara Colossae, pani enia mo pa lo toho na ima filangi peresi Paul hin rani atu Paul mo uli leta nike. (1.14; 4.3, 10, 18).

Tamlohi řořoha la mařivi hin jara atu (1.27), ale hai la lo lavi na řomřomi tinapua la sopo vararuhu (2.16–23). La jalio na retivararuhu, la lo řomřomia lara tamlohi i pa mai i tataholo na nahon God vara i horo na masalo epena. La lo hasohaso na angelo peresi na suiha tinapua na tuka, pani Paul mo opoia vara la levosahi mamahunia vara Křisto mo aulu jea na suiha tari na jara tari, mo lo toho na tuka peresi God Tamana (3.1). Moiso matan vara la pa haso Iesu Křisto purongo.

Hite Leta Nike

1. Reti Tiroma (1.1–2)
2. Usiisi Mata Vere Meje (1.3–8)
3. Křisto Peresi Na Nona Vavahinau (1.9–2.19)
4. Mauri Paro Hin Křisto (2.20–4.6)
5. Isoiso Retireti (4.7–18)

¹ Enau Paul, enau vahařule matea non Křisto Iesu na masalon God, peresi Timothy, enia voraiřa, ² enau na lo uli leta nike isana tapuhi non God la vorai kalesia sei la řomturu filangi hin Křisto atu Colossae, řomřuhu isamim peresi na tamata mo tai isan God Tamařa.

Usiisi Non Paul

³ Tarea kama lo vere meje isan God, Taman nořa Moli Iesu Křisto na rani kama lo usiisi matamim, ⁴ mo tapulo na rani kama rongoa na sorasora mata nomim rasua hin Křisto Iesu peresi na nomim opoia isana tapuhi non God, ⁵ ka lo vaia sohena matan ka řomtoho na hinau God mo taua na tuka matamim, hara sei ka rongoa moiso na retivararuhu na Retiruhu, ⁶ Retiruhu sei mo mai isamim, enia mo vano řalihi na varama, mo lo vua mo posi na tamlohi, ale mo talulu, sohen mo vaia isamim mo tapulo hin rani atu ka rongoa, ale ka levosahi mamahuni na řomřuhu non God, ⁷ sohen ka hitevosahia moiso isan Epaphras, voraiřa volitusi tinapua sei na nona vujangi na Retiruhu isamim, enia mo lo řomturu řilangi

na vavahinau non Křisto matamim, ⁸ ale mo vereia isamim sohena sava opoia non Tanumen God mo lo toho isamim.

⁹ Ale matana, mo tapulo hin rani atu kama rongoa, kama lo usiisi tarea matamim, kama lo usia vara,

Tanumen God i sile kamim, na lelevosahi peresi na levosahi tari, matan vara ha pa levosahi mamahuni na masalon God, ¹⁰ matan vara ha pa hahau na mauri řuhu, sohena God mo avulahi hinia, ale ha vua na nomim vavahinau řuhu tari, moiso matana, ha pa levosahi God i mele řuhu jea.

¹¹ Kama lo usiisi vara ha pa řilangi na suiha tari na nona suiha tavera řuhuru jea matan vara ha pa turu řilangi na nomim řomperavu peresi na nomim rani řilangi, ale na posposi mo avulahi řuhu, ¹² ha vere meje isan Tama matan enia mo vai kamim ka tataholo vara ha lavi hinau atu God mo taua moiso mata nona tapuhi, haratu la mauri hin malarani atu retivararuhu mo lo silea, ¹³ God enia mo jurifa na suihan řořoha, ale mo laviřa řa mai hin mauri atu non Natuna sei God mo aulu hinia,

Křisto Enia God Tataholo

¹⁴ Ale hinia, God mo volituhura, mo řomi na nořa hina sasati.

¹⁵ Natun God enia niniun God, haratu řa sopo eři hitea, enia mo vora tiroma non God, ale mo aulu na vavahinau tari non God, ¹⁶ matan Křisto mo vai na hinau tari la pala, hinau tari na tuka peresi na varama, la haratu řa eři hitera peresi la haratu řa sopo eři hitera, suihan supe aulu teni suihan moli, teni tamlohi aulu, teni la haratu la lo tauri na suiha, hin Natuna, hinau tari la pala na nona suiha matan vara la ololo hinia, ¹⁷ ale enia mo tiroma na hinau tari, ale hinia, hinau tari la lo toho la sořotahi mo řuhu.

¹⁸ Enia patu epena, epena enia vao kalesia tari, enia mo tiroma, enia mo tiroma hin la haratu la pa turu na mateia, matan vara enia i pa tiroma i aulu na hinau tari, ¹⁹ matan God mo avulahi vara enia i lo toho vevuhi hin Natuna, ²⁰ ale hinia, God mo sari tamata na hinau tari na tuka peresi na varama na faena na nona talopeilopei matan vara la pa toho na ruhuru huna. ²¹ Ale tiroma moiso kamim ka vinano isan God, ale ka nona meresahi mata řomimim la vai kamim ka vai na vavahinau sasati, ²² ale nake natu, mo sari tamata na epena na nona mateia, ale mo vai kamim ka tapu ka vokevoke, ale tea i sopo eři tuvai kamim na nahon God, ²³ vara tarea ha lo tauri řilangi na nomim rasua, vara ha sopo tinafihi na nomim řomtoho na retitauhi mata Retiruhu sei ka rongoa moiso, hara sei la lo retivujavujangia isana tamlohi tari na

varama, hara sei enau na mai na volitusi matana.

Vavahinau Non Paul

²⁴ Nake na lo avulahi matan vara na epeku a lavi na rani rilangi matamim, na lo marivisi na sava mo vejuveju na rongohaji non Křisto na noku vavahinau na lo vaia mata epena, epena enia vao kalesia tari, ²⁵ hara sei God mo tauau vara a mai nona volitusi matana, mo viřoniau matamim vara a vereuli vevuhi na Reti non God isamim, ²⁶ ale řomřomi luhu atu God mo jarohia tuai tuai isana mahapi tamlohi, pani nake mo vujangia isana nona tapuhi, ²⁷ isana tapuhi natu, God mo hatihia vara i vujangi na nona řomřomi luhu mata nona řomřufuhu i malue na jara tavera matan vara tamlohi řořoha la pa levosahia vara mo fuhufuhu jea sohena sava, řomřomi luhu sei enia harihi: Křisto mo lo toho hin kamim, enia pulo řomtoho atu mo vereva vara ha pa lavi na oloolo tavera jea peresia, ²⁸ na lelevosahi atu Tanumena mo lo silea, kama lo retivujavujangi hin Křisto, ale kama lo retiřořohahi isana tamlohi tari, ale kama lo vujangi na tamlohi tari, matan kama opoia vara kama pa sile na tamlohi tari isan God la jea hin Křisto. ²⁹ Matan harihi, enau na lo vavahinau rilangi na malele tari a eři vaia, pani na lo vaia na suihan Křisto mo lo vavahinau rilangi hinia.

2

Hasohason Křisto

¹ Na opoia vara ha levosahi na noku kalvono tavera vara a matahi na řomimim peresi la haratu la lo toho Laodicea, moiso la haratu la sopo lo hite na nahoku hin te rani, ² matan vara a eři retitetueni na mapura vara la mai na vao matea na nora opoia, matan vara la pa marivi na levosahi fuhu sei mo tai na levosahi mata hina luhu non God sei, enia natu, Křisto, ³ ale God mo jarohi na nona tavitav mata lelevosahi peresi na levosahi tari hin Křisto hasena.

⁴ Na lo vere reti sei isamim matan vara tea i sopo halu kamim na nora retimemeji. ⁵ Hina purongo vara na sopo toho peresi kamim, pani řomiku mo lo toho isamim, ale na avulahi matan na hitea vara ka lo hase kilau kamim, ale ka lo turu rilangi na nomim rasua hin Křisto.

Křisto Mo Vaira Ra Materi

⁶ Matan haratu, sohen ka lavi Křisto Iesu sohena nomim Moli, ha hahau sohena nona tamlohi la lo hahau, ⁷ ha tau na warimim hinia, ha ulua hinia vara ha pa toho jejeu na nomim rasua usuri vujangi sei ka lo lavia moiso, ale tarea ha tatamahu mata vere meje isan God matana. ⁸ Ha lo kilau, mo sopo fuhu vara tea i tikauleji kamim na

nora řomřomi purongo teni na nora retireti halu usuri na posposi tamlohi peresi na posposi mata tau na rasua na vui varama, pani la sopo usuri na vujangi hin Křisto, ⁹ matan hin Křisto, God mo lo toho vevuhi na epen tamlohi purongo, ¹⁰ ale mo vai kamim ka marivi hinia, enia haratu mo patun la haratu la aulu tari peresi la haratu la lo tauri na suiha. ¹¹ Ale hin Křisto, kamim ka taiřalihi, pani mo sopo taiřalihi atu na epemim, pani haratu Tanumena mo vaia sei mo tai narīhi na nomim hehe na maurimim, ¹² hinau atu mo masese hin rani atu ka paptijo hin Křisto, mo sohen God mo tavuni kamim peresia, ale ka mele turu na mauri paro peresia matan ka rasu na suiha tavera non God, haratu mo lo sauteterahi Křisto na mateia. ¹³ Tiroma ka lo mate mata nomim hehe matan mo sopo lo tai narīhi na masalo varama na maurimim, moiso nake God mo vai kamim ka mauri peresi Křisto matan enia mo řomi na nofa hehe tari, ¹⁴ Ale mo sohen nofa hehe la lo toho na pepa matea la lo tuvaiřa mo usuri na leu non Moses, pani God mo jarai narīhira mo lavi pepa atu mo vosaea na talopeilopei, ¹⁵ varařuhu, Křisto mo lavi narīhi na suiha isan la haratu la lo aulu tari peresi la haratu la lo tauri na suiha na varama, ale mo vaira la mahanuhanu na naho tamlohi hin rani atu na nona talopeilopei.

¹⁶ Matan hinau sei ha sopo majinga vara tea i ari kamim mata hanhani teni na sava ka lo inua, teni matan te rani tavera, teni matan te rani tavera mata vitu paro teni te rani tapu hatea, ¹⁷ matan la hinau sei enira řořo hinau purongo mata hinau i pa pala, pani hinau atu mo mai moiso, enia Křisto. ¹⁸ Ha sopo majinga vara tea mo opoia vara i tau narīhi kamim na nomim rasua, matan enia mo lo vereva vara ka sopo hase tauhoro kamim hin te hinau, ale vara ka sopo lotu na angelo mo lo vereva vara mo hitera na nona mavuhu, matan enia mo lo mangisi mata nona řomřomi varama purongo, ¹⁹ ale mo sopo sořotahi hin Křisto, enia natu, patu epena tari, pani enřa manmanina rilangi peresi na sořosořo epena, řa ulua řa sořotahi hinia matan řa lavi na ulua mo tai hin suiha atu God mo lo silea.

Mauri Paro Hin Křisto

²⁰ Ale matan hin Křisto ka mate moiso, ale mo vai kamim ka materi na suiha vui sasati mata varama, ale mata sava ka pa lo řomřomi sohena tamlohi varama, ale ka lo oloolo na leu sohen harihi: ²¹ "Ha sopo eři tauri hinau sei! Ha sopo eři hani hinau sei! Ha sopo tikeli hinau sei!" ²² La retileu sei enira vujangi nona tamlohi purongo, ale i pa sopo tuai la hinau sei la pa tihai. ²³ Varařuhu, tamlohi la pa hitea vara la

retileu sei enira la hina lelevosahi na malele rasua tataholo, na posposi fomatanano, peresi na hase tauhoro, pani la hinau sei la pa sopo efi tueni tea vara i horo na nona fomfomi hehe teni masalona.

3

Ha Kilau Matan Tuka

¹ Matan God mo pete sau kamim na mauri paro peresi Kristo moiso, ha tau na fomimim hin mauri atu na tuka, hin jara atu Kristo mo lo sakele na jara suiha tavera atu na matuan God, *Psa 110.1.*

² Ha tau na fomimim na hinau matan tuka, pani i sopo na hinau mata varama, ³ matan kamim ka mate moiso, ale maurimim la lo jarohi peresi Kristo hin God. ⁴ Maurimim la lo toho hin Kristo, ale hin rani atu i pa mai, kamim sohena, ha pa pala peresia na nona hasohaso tavera.

⁵ Ale matan haratu, ha vilimatei na hina hehe mata varama na lolomim sohen harihi: mauri maji, posposi lumiha, fomusuri hafai, masalo sasati, ale posposi hanmarua sei enia pulo hinau mata lotulotu vono, ⁶ matan talai lolokoru non God mata hehe mo lo mai isan la haratu la lo vai la hinau atu. ⁷ Kamim sohena, ka lo vaira na maurimim tuai hin rani atu ka pa lo toho na mauri varama. ⁸ Pani nake, ha tau narihi la hinau sei na vere moiso, ale la hinau sohen harihi: lolokoru, lolokoru patumim, vaisatihi na tinapua, retisasati hin God, teni vara jingomim la retisasati teni varikali. ⁹ Ha sopo haluhalu kamim matan ka pete tau narihi mauri tuai atu moiso peresi na nona posposi hehe na maurimim, ¹⁰ ale ka pete lavi na mauri paro moiso sei tarea mo lo mele ulua na levosahi, ale mo lo mele posi mai tataholo na niniun haratu mo vai mauri paro sei. *Gen 1.26.*

¹¹ Nake, mo sopo te hinau vara tamlohi rofoha, teni Jew, teni haratu mo taifalihi, teni haratu mo sopo taifalihi, teni tamlohi rofoha, teni tamlohi sasati mara Scythia, * teni slev, teni tamlohi teri, pani Kristo enia patu hinau tari, ale enia mo lo mauri hinira mo isoiso.

Posposi Tamlohi Rasu

¹² Ale matan kamim ka haratu sei God mo opoira, God mo vifonira, God mo tapuhira, ha ruru na fomopoi, fomfuhu na tamlohi tinapua, fomatanano, fommalum, fomperavu, ¹³ Ale vara te vorai tinapua mo vai te hinau mo hehe isamim, ha fomperavu isana, ale vara tea mo vai te retireti matan te vonamim, ha fomia, matan Moli mo fom kamim moiso, kamim ha pa

hase fom kamim. ¹⁴ Ale aulu hin la hinau nike, ha ruru na opoia matan enia mo lo sofoatahi na hinau tari, ale ha pa efi turu jara matea. ¹⁵ Ale ha tutungui na tamata non Kristo i aulu na mapumim, matan God mo vai kamim ka vao epe matea, ale mo tovi kamim vara ha toho na tamata, ale vara tarea ha lo vere meje. ¹⁶ Ha lavi vevuhi na reti non Kristo na lolo mapumim, matan vara tarea ha efi tau na fomimim hinira. Ale ha vujangira isamim hasemim, ale ha vaitataholoi kamim hatehateahi na malele lelevosahi tari, ale na lolo mapumim ha avulahi vara ha lalavete na vete mata psalm, ale vete la sile na hasohaso isan God peresi na vete Tanumena mo silera na fomimim. ¹⁷ Ale vara sava ka lo vaia teni ka lo vere, ha sopo fomaliho vara kamim ka tamlohi non Moli Iesu, ale tarea ha vere meje isan God Tama hinia.

Retireti Mata Posposi Oloolo

¹⁸ Hafai lahi, ha oloolo na tuamim matan enia mo tataholo na nahon Moli, ¹⁹ tamlohi lahi, ha opoi na naroumim, ale ha sopo vai na hinau rilangi isara. ²⁰ Natuvarihi, ha oloolo na tamamim peresi na tinamim na hinau tari, matan haratu enia God mo avulahi hinia. ²¹ Tama, ha sopo plele na natumim, vara i vono, la pa maloko vara la tapurongo isamim.

²² Kamim slev, tarea ha lo oloolo na nomim tamlohi tavera nike na varama, ha sopo vaia mata tamlohi purongo, teni ha vaia mata fom tamlohi tinapua i avulahi hin kamim, pani, ha vaia varafuhu na mapumim matan ka lo sile na oloolo tavera isan Moli. ²³ Sava vavahinau ka lo vaia, ha vaia na mapumim sohena vara non God, mo sopo nona tamlohi, ²⁴ matan ka levosahia vara Moli i pa sile na korumim sohena nomim otori. Ka lo volitusi isan Moli Kristo, ²⁵ matan ka levosahia vara haratu mo lo vai na hina sasati i pa lavi na voli hina sasati mo vaia, matan God mo sopo tametame tea.

Deut 10.17; Eph 6.9

4

¹ Kamim la tamlohi tavera, ha kilau mamahuni na nomim slev na posposi fuhu, matan kamim sohena, ka levosahia vara nomim tamlohi tavera sei, Moli na tuka, mo lo kilau kamim.

Usiisi Matan Paul

² Ha turu rilangi na nomim usiisi, ha fomfomi mamahuni na sava ka lo usiisi matana, ale ha vere meje na mapumim i vano isana, ³ ha usiisi matamam sohena,

* **3:11:** teni tamlohi rofoha, teni tamlohi sasati mara Scythia: Tamlohi rofoha la tamlohi sei la sopo levosahi na leon mara Greek, ale mara Scythia la lavi na hija mata vilimatei na tamlohi.

ha usiisi vara God i sile te masapa matan vara kama pa vereuli na nona retisohai sei mo lo vujangi na nona fomfomi luhu hin Křisto, haratu natu, na lo toho na ima řilangi matana, ⁴ ha usiisi matakua vara a pa vereulia i pa memera i řuhu na malele God mo opoia. ⁵ Ale mo řuhu vara ha sopo toho purongo na nahon tamlohi atu la sopo rasua, pani ha lo usuri na posposi tataholo non Moli. ⁶ Mo řuhu vara tarea na nomim retireti, ha retiholoholo, ha fomfomi na sava reti ka vereia, ale ha pa tatamahu vara ha pa řarami mamahuni na tamlohi hatehateahi sohena sava.

Ha sopo fomaliho vara enau na lo toho na ima řilangi, ale fomřuhu non God i pa toho isamim.

Retioloolo Isan Tapalan Paul

⁷Tychicus voraiřa atu enřa řa opoia, enia tapalaku volitusi matea non Moli, tarea mo lo romturu řilangi na vavahinau non Moli, enia i pa sorahi na sava na lo vaia isamim, ⁸ ale na lo rule Tychicus isamim matan haratu, vara ha pa levosahia vara kama lo toho sohena sava, ale vara i eři retituetueni na mapumim, ⁹ moiso Onesimus mo lo usuri Tychicus, enia voraiřa matea, řa opoia mo romturu řilangi, enia vonamim matea, ale la pa sorahi na sava hinu kama lo vaira nike.

¹⁰ Aristarchus, enia mo lo toho peresiau na ima řilangi nike, mo sile na nona retioloolo isamim, moiso Mark atu vorain Barnabas, korong ka lavi te reti moiso vara i pala isamim, ale ha pa lavia, ¹¹ peresi na tamlohi matea hijan Iesu la lo tovia Jastas. La harihi tupu visalete purongo na Jew tari la lo vavahinau matan mauri atu God mo aulu hinia peresiau nike, ale na avulahi tavera mata enira la lo tueniau. ¹² Epaphras, enia vonamim matea, enia volitusi non Křisto Iesu, mo sile na retioloolo isamim, mo lo usiisi řilangi tarea matamim na nona usiisi matan vara ha pa mai ha pa jea, ale ha levosahi mamahuni na masalon God. ¹³ Enau a eři vereia isamim vara enia mo lo vavahinau řilangi matamim peresi la haratu Laodicea peresi la haratu Hierapolis. ¹⁴ Doctor Luke voraiřa sei řa opoia, peresi Demas, enira la sile na nora retioloolo isamim. ¹⁵ Ha sile na noku retioloolo isana vorai kalesia atu Laodicea, ale isan hařai atu Nympha peresi na vao kalesia la lo matavuhi na imana. ¹⁶ Ale vara ka evi leta nike isamim mo isoiso, ha mele evia isana vao kalesia la lo matavuhi Laodicea. Ale mo řuhu vara ha evi leta atu na pete sohaia tiroma moiso isan la haratu Laodicea. ¹⁷ Ale ha vereia isan Archippus vara, "O vaihitea vara o vai mařivisi na vavahinau non Moli sei mo lo silea isamim." ¹⁸ Enau Paul na lo uli la retioloolo nike na limaku haseku.

1 Thessalonians

Tiroma Leta

Paul Mo Uli Isana Mara Thessalonica Leta Nike

Paul mo tapulo na vao kalesia Thessalonica (2.13–14), ale mo sopo kilau matan te mania, pani mo lo hani na masumasuna (2.9). Tiroma, la kalesia atu la lo lotulotu vono (1.9), pani nake la turu filangi hin Moli, ale mata nora ooloo, Retiruhu mo vano falihi hin jara atu (1.8).

Tamlohi hai atu, la turuleji hin Paul, ale mo rovo mo vano Athens, pani mo fule Timothy mo vano vara i rohira Thessalonica (3.1–5). Timothy mara mo mele hilu, mo vereea isan Paul mara la lo turu filangi ale vara la lo hahau na opoia (3.6–10).

Kalesia hai Thessalonica la sopo voko, la lo toho purongo matan la lo fomfomia vara i pa sopo tuai Moli i pa mele pala na varama (4.11–12). Hai la lo romkaka matan te vonara la mate moiso pani Kristo mo sopo lo pala, la pa mele turu teni mo vono? (4.13–15), Paul mo retinanauhira, mo vereea mara la lo hahau usuri na masalon God tarea (5.1–11).

Mo fuhu vara tarea fa lo fomfomi na sava Paul mo vereea akerihi:

‘Ha avulahi tarea, ha lo tatamahu mata usiisi tarea, ha vere meje mata hinau tari, matan harihi enia masalon God hin Kristo Iesu matamim.’ (5.16–18)

Hin Leta Nike

1. Retioloolo (1.1–3)
2. Tovongi mata rasua nona Kalesia Thessalonica (1.4–3.13)
3. Mauri atu God mo avulahi hinia (4.1–12)
4. Vara Moli i mele pala (4.13–5.11)
5. Isoiso Retioloolo (5.12–28)

¹ Enau Paul na uli leta nike isamim vao kalesia sei Thessalonica, na hijan God Tama peresi Moli Iesu Kristo, Silas peresi Timothy la lo toho peresiiau nike.

Romfuhu peresi na tamata i pa toho isamim.

Nora Rasua

² Kama lo vere meje isan God tarea matamim mo isoiso na nomam usiisi, ³ kama lo vere kamim isan nofa God Tamafa, mata nomim voko sei ka lo vaira mata nomim rasua, ale mata nomim vavahinau sei ka lo vaira mata nomim opoia, peresi na nomim turu filangi tarea sei ka lo vaia matan ka lo romtoho matan nofa Moli Iesu Kristo.

⁴ La voraiiku peresi na vevoraiku rufuru, God mo opoi kamim, ale kama

levosahia mo fuhu vara God mo vironi kamim, ⁵ matan nomam Retiruhu mo mai isamim, mo sopo mai na retireti purongo, pani mo mai peresi na suiha matan Tanume Tapu mo tueni kamim matan vara ha pa levosahia i fuhu vara Retiruhu enia mo varafuhu. Kamim ka levosahia mo fuhu vara posimam hin rani atu kama lo toho isamim mo sohena sava matamim, ⁶ ale ka lo tovongi kamam peresi Moli matan kamim ka lavi na Retiruhu, hina purongo vara ka lavi na rongohaji sasati matana, pani ka avulahi na avulahi non Tanume Tapu, ⁷ matan ka mai sohena tovongi matea isana tamlohi rasua tari Macedonia peresi Achaia. ⁸ Mata reti non Moli sei mo lo malue isamim mo roroa Macedonia peresi Achaia, ale nomim rasua hin God mo roroa na jara tari, ale mo vaia kama sopo efi mele vere te hinau mata nomim rasua isara. ⁹ Matan enira hasera la lo mele vereea vara ka lavi kamam na posposi fuhu sohena sava na nomam hahau. La vereea sohena sava ka vahari na tamasi, ale ka posi ka vano isan Moli matan vara ha volitisi isan God varafuhu sei mo lo mauri, ¹⁰ ale ka lo saovi matan Natuna sei i pa tai na tuka, God mo sauteterahia na mateia, Iesu, enia mo jurifa na talai lolokoru non God mata hehe sei mo lo mai.

2

¹ Kamim ka levosahia mo fuhu la voraiiku peresi na vevoraiku rufuru, vara nomam mai isamim mo sopo vano hina purongo. ² Pani hina purongo vara kama lavi na rongohaji moiso na nora vailejeji hin kamam Philippi, sohen ka levosahia, pani kama lo turu filangi hin nofa God vara kama lo vereuli na Retiruhu non God isamim na livuha rani filangi. ³ Matan nomam ngurunguru matamim, mo sopo malue na hinau mo sopo tataholo teni na hina lumiha, teni vara kama vaihitea vara kama halu, ⁴ pani matan kama lo retireti sohena vaharule sei God mo majinga hin kamam vara kama lavi na Retiruhu. Kama sopo vaia matan vara tamlohi la pa avulahi hin kamam, pani vara God i avulahi, enia natu, haratu mo lo arifa vara fa lo vai te vavahinau mata sava. ⁵ Matan kama sopo mai isamim mata haruharu sohen ka levosahia, teni vara kama tapala peresi kamim mata mania, haratu God mo levosahia, ⁶ ale kama sopo ale na hasohaso nona tamlohi, mo sopo isamim teni isan te tinapua, ⁷ hina purongo vara mo tataholo vara kama usi te hinau isamim matan kamam kama vaharule non Kristo. Pani kama mai isamim na posposi malum sohena harai vasusu matea mo lo susui na natuna, ale mo lo kilaura. ⁸ Ale matan kama opoi kamim

mo tavera, mo vai kamam kama avulahi vara kama sile kamim na Retiʻuhuhu non God, ale maurimam sohena, kama silera isamim, matan ka mai ka vorai ruhuʻuhuhu isamam.

⁹ Matan ka levosahia la vorai ku peresi na vevoraiku ruhuʻuhuhu, vara na rani kama lo retivujavujangi isamim, kama voko ŋilangi na rani peresi na vutepongi mata mania matan vara kama sopo tau te tetehi isan te vonamim. ¹⁰ Kamim ka levosahia, ale God mo levosahia vara nomam posposi mo tapu isamim sei ka rasua, ale mo tataholo sohena sava, ale mo sopo te hinai i sati vara tea i pa efi pisuhi kamam hinia. ¹¹ Matan ka levosahia vara mo sohena sava isana tata matea peresi natuna, ¹² kama lo ngurun-guru hin kamim, ale kama lo retituetueni kamim, ale kama lo vere ŋilangi vara ha hahau na mauri sei God i pa avulahi hin kamim hinia, enia natu, mo tovi kamim vara ha mai hin nona mauri atu enia mo supe hinia peresi na hasohasona.

¹³ Ale kama lo vere meje isan God tarea matan hin rani atu ka lavi na reti non God isamam, ka sopo lavia sohena retireti nona tamlohi purongo, pani reti non God varaʻuhuhu, ale mo lo vai na nona vavahinai hin kamim sei ka rasua.

¹⁴ Matan kamim ka vorai kalesia ruhuʻuhuhu, ka tovongi na vao kalesia tinatinapu hin Kʻristo Iesu non God hin Judea, matan ka lavi na rani ŋilangi isana tahisamim mo sohena tamlohi rasua Judea la lo lavia isana Jew.

¹⁵ Enira la haratu sei la vilimatei Moli Iesu peresi na pʻrovet, la levuti narihi kamam, ale God mo sopo avulahi hinira, ale enira la lo turuleji na tamlohi tari, ¹⁶ matan la turuhoro kamam vara kama sopo retireti isana tamlohi ʻoʻroha matan vara la pa juri. Hin posposi akerihi tarea la lo takonahi na nora hehe mo sahe vara i maʻrivi, pani talai lolokoru non God mata hehe i pa jovi vevuhi isara.

Romʻomi Non Paul

¹⁷ Pani la vorai peresi na vevoraiku ruhuʻuhuhu, mo tapulo hin rani atu la lavi narihi kamam isamim mata makomo rani — ka sopo mele hite na nahomam, pani mapumam la lo toho isamim. Ale matan kama opoia mo tavera vara kama efi mele mai isamim, kama vaihitea mo ŋilangi matan vara kama mele mai. ¹⁸ Matan kamam kama opoia vara kama mele mai isamim, varaʻuhuhu enau, Paul na opoia vaha visa, pani Setan mo lo turuhoro kamam. ¹⁹ Matan sava natu, enia nomam ʻomtoho teni avulahi teni ʻongoʻongo nona supe kama pa avulahi tavera hinia na nahon Moli Iesu hin rani atu vara i pala? Enia

kamim. ²⁰ Varaʻuhuhu, kamim ka nomam hasohaso peresi na nomam avulahi.

3

¹ Matan haratu, kama sopo efi mele taurilatia i peravu, ale kama hatihia vara kamam hasemam, kama pa lo toho Athens, ² Ale hitahu kama ʻule Timothy voraimam enia mo tapala na vavahinai non God mata sohahi na Retiʻuhuhu non Kʻristo, vara i vai kamim ha ŋilangi i retituetueni kamim na nomim rasua, ³ matan vara i pa sopo tea i romkaka na rani mata vaihite. Ka levosahi mamahunia vara God mo viʻoni na rani mata vaihite vara la pa vaihiteʻa. ⁴ Ka levosahia, na rani kama lo toho peresi kamim, kama lo vere isamim moiso vara ʻa pa lavi na nora tipahi, ale ka levosahia vara la pala.

⁵ Matan haratu, na sopo efi mele taurilatiau i peravu, ale na lo ʻulea vara i pa to hitea vara nomim rasua mo lo sohena sava. Na matahu vara korong hin te malele Tiapolo mo halu kamim moiso, ale nomam kalvono korong la vano hina purongo. ⁶ Pani Timothy mo pa pala isamam nakerihi, mo tai isamim, ale mo lavi na retiʻuhuhu mo vere mara, nomim rasua peresi na nomim opoia la lo ŋilangi. Mo vere kamam hinia vara tarea ka lo romromi na noʻa rani ruhu, ale vara kamim ka opoia jea vara ha mele hite kamam, sohen kamam kama opoia vara kama mele hite kamim. ⁷ Matan haratu la vorai ku peresi na vevoraiku ruhuʻuhuhu, hina purongo vara kama lo lavi na rani ŋilangi tavera peresi na rongohaji, nomim rasua mo vai kamam kama avulahi. ⁸ Ale nake, mauri mo mele ruhu isamam matan kama levosahia vara kamim ka lo turu ŋilangi hin Moli.

⁹ Kama pa vere meje isan God i tataholo sohena sava matamim, matan ka vai kamam kama avulahi na nahon noʻa God matamim. ¹⁰ Tarea kama lo usiusi ŋilangi vara kama pa efi mele hite kamim, ale kama sile kamim na sava ka vejuveju hinia na nomim rasua. ¹¹ Nake nomam usiusi vara noʻa God Tamaʻa hasena, peresi noʻa Moli Iesu i vai na malele tataholo vara kama mai isamim. ¹² Kama lo usiusi vara Moli i vai na nomim opoia i ulua, ale i maʻrivi savulevule matamim hatehateahi peresi na tamlohi tari tinapua, sohen nomam opoia mo vaia matamim. ¹³ God i pa vai na mapumim la ŋilangi matan vara tea i pa sopo efi tuvai kamim hin te hinai, ale ha tapu na nahon noʻa God enia Tamaʻa hin rani atu noʻa Moli Iesu i pa mai peresi na nona tamlohi tapu.

4

Posposi Atu God Mo Opoia

¹ La voraiku peresi na vevoraiku rufuru, mele hinau matea, hin rani atu kama lo toho peresi kamim, kama vujangi kamim vara ha pa hahau sohena sava na maurimim vara ha vai God i avulahi, ale ka lo usuria sohena. Ale nake na hijan Moli Iesu, kama vere kamim vara ha lo ulua i tavera hinia. ² Matan ka levosahi vujangi atu kama lo taua na limamim moiso na suiha non Moli Iesu. ³ Matan masalon God mo sohen harihi, vara maurimim la vokevoke, ale ha toho asau na mauri maji, ⁴ ale vara kamim hatehateahi ha levosahi na malele mata hase kilau mamahuni na epemim na malele tapu vara tamlohi la pa hasohaso kamim matana, ⁵ mo sopo na masalo epemim sohena tamlohi rofoha la lo vaia.

⁶ Ha sopo vai te hehe sei isan te voraimim kalesia hatea, teni ha halua hin malele ak-erihi, matan God i pa sile na talai isana tamlohi sohena, vara la lo vai na hina sati sohen harihi, sohen kama pete sile na nomam retireti filangi isamim matara moiso. ⁷ Matan God mo sopo toviŋa mata mauri mo lumiha, pani vara fa hahau na mauri vokevoke rufu. ⁸ Matan haratu, vara tea mo rohu hin la vujangi niki, mo sopo rohu na tamlohi, pani mo lo rohu hin God sei mo lo silefa na nona Tanume Tapu.

⁹ Nake, na posposi vorai la opoiopora, kama sopo opoia vara kama mele uli te hinau isamim matana, matan kamim God mo vujangi kamim moiso vara ha opoiopoi kamim. ¹⁰ Ale vararufu, kamim ka opoi na vorai kalesia tari falahi Macedonia. Ale la voraiku peresi na vevoraiku rufuru, sava ka lo vaia mo rufu, pani ha mele ulua i tavera hinia. ¹¹ Ha tau na romimim vara ha usuri na mauri malum, ha sopo sohai na ngalsumim na hinau non tinapua, ha hani na masmasumim hasemim sohena kama vere isamim, ¹² matan vara la haratu la sopo rasua la pa hitevosahia na nomim hahau, ale la hasohaso kamim matana, matan vara ha pa sopo romtoho na tinapua.

Rani Sei Moli I Pa Mele Mai Hinia

¹³ La voraiku peresi na vevoraiku rufuru, kama sopo opoia vara ha sopo levosahia vara i pa sohena sava isan la haratu la mate moiso teni vara ha tangi sohen la haratu sei mo sopo te nora romtoho. ¹⁴ Ra rasua vara Iesu mo mate, ale mo mele turu, ale fa rasua vara God i pa vai la haratu la mate moiso hin Iesu, la pa mai peresi Iesu.

¹⁵ Sohen Moli mo hase vere, kama vere isamim vara enfa sei fa pa lo mauri, vara fa pa toho i tikeli rani atu Moli i mele mai, fa pa sopo tiroma hin la haratu la mate moiso, ¹⁶ matan Moli hasena, i pa tai na tuka i sinai

i ulo na retileu, peresi na leo supe nona angelo matea, ale peresi na roroa trumpet non God, ale la haratu la mate hin Křisto la pa turu tiroma. ¹⁷ Ale hitahun haratu, enfa sei fa pa lo mauri, ale fa pa lo toho, fa pa sahe peresira aulu na telangi vara fa pulutahi peresi Moli na masapa, ale fa pa toho peresi Moli tui tui. ¹⁸ Matana, ha retituetueni kamim hatehateahi hin la reti niki.

5

Isoiso Rani

¹ Ale nake, la voraiku peresi na vevoraiku rufuru, kama sopo opoia vara kama uli-uli isamim matan la rani sei, ² matan ka levosahia mo rufu moiso vara rani atu vara Moli i pa mele mai hinia i pa sohena tamlohi vavanaho matea mo mai na vutepongi. ³ Vara tamlohi la lo vere lara, 'Tamata mo lo toho, ale fa tatamahu!' Vahatea purongo, komokomo i pa jovi isara, sohena hafi varihaji isana hafai mata lavilavi. La pa sopo eri rovo.

⁴ Pani kamim la voraiku peresi na vevoraiku rufuru, ka sopo toho na rofoha matan vara rani atu i vai kamim ha pa hutu kamim sohena ka hutu kamim na tamlohi vavanaho matea. ⁵ Kamim mo isoiso ka natun malarani, ale nomim hahau enia mata rani. Enfa fa sopo mata vutepongi teni mata rofoha. ⁶ ale matana, fa sopo sohena tatuara sei la lo juruvi, pani fa tatamahu, ale fa hase taurilatira. ⁷ Matan la haratu la lo juruvi, la juruvi na vutepongi, ale la haratu la lo putu na wai filangi, la putu hinia na vutepongi. ⁸ Pani matan enfa fa tamlohi mata malarani fa hase taurilatira tarea, fa ru na rasua peresi na opoia sohena ruru mata tingting matea, ale nomim romtoho mata juri i pa sohena hat matea mata vuro. ⁹ Matan God mo sopo vironifa vara i pa sile na nona talai lolokoru mata hehe isaŋa, pani matan vara fa lavi na juri hin noŋa Moli Iesu Křisto. ¹⁰ Enia mo mate matafa matan vara hina purongo vara fa lo kilau teni fa juruvi, fa pa toho peresia. ¹¹ Matan haratu, ha retituetueni, ale ha tueni kamim hatehateahi sohen ka lo vaia nake.

Isoiso Retireti

¹² Nake kama lo usi kamim la vorai peresi na vevorai rufuru vara ha sile na ooloo isan la haratu la lo voko filangi isamim, haratu la aulu hin kamim hin Moli, ale la lo retiŋoŋoahai kamim. ¹³ Matan sava la lo vaia ha silera na ooloo tavera na opoia mata nora voko. Ale ha sopo vasvas peresi na tinapua. ¹⁴ Ale kama lo usia filangi isamim la voraiku peresi na vevoraiku rufuru vara ha retiŋoŋoahai la

haratu la maloko, ha retituetueni la haratu la matahu, ha tueni la haratu la sopo suiha, ha romperavu isan tamlohi tari. ¹⁵ Ha lo kilau matan tea i sopo kele na hehe peresi na hehe, pani tarea ha vaihite vara ha vai na posposi ruhu isamim hatehateahi, ale isana tamlohi la sopo rasua.

¹⁶ Ha avulahi tarea, ¹⁷ ha lo tatamahu mata usiusi tarea, ¹⁸ ha vere meje mata hinau tari, matan harihi enia masalon God hin Křisto Iesu matamim.

¹⁹ Ha sopo vuni na hapu Tanumen God, ²⁰ ha sopo hitelehilehi na sava tamlohi rasua tinapua mo vereha vara Tanumen God mo vujangia isana. ²¹ Pani ha tapurongo hinia, ale ha vaihite na sava mo vereha vara la varařuhu teni, ale ha taurilati na sava mo ruhu. ²² Ha toho asau na hinau tari la sasati.

Usiusi Non Paul

²³ Nake God mata tamata, enia hasena i pa vai kamim ha tapu vevuhi, God i pa vai mamahuni na tanumemim, na maurimim peresi na epemim matan vara la pa toho vokevoke, ale tea i sopo eři tuvai kamim hin te hinau na mele mai nona nořa Moli Iesu Křisto. ²⁴ Haratu sei mo tovi kamim enia i pa sopo eři tope na nona retitauhi, varařuhu enia i pa vaia.

²⁵ La voraiku peresi na vevoraiku ruhuřuhu, ha usiusi matamam.

²⁶ Ha sile na retioloalo mata opoia isana vorai peresi na vevorai ruhuřuhu tari.

²⁷ Na lo retileu isamim na nahon Moli vara ha evi leta nike isana vorai kalesia mo isoiso.

²⁸ Romřuhu non nořa Moli Iesu Křisto i pa lo toho isamim.

2 Thessalonians

Harua Leta

Paul Mo Uli Isana Mara

Thessalonica

Leta Nike

Hin leta nike Paul mo lo vere meje isan God matan nora rasua mo lo ulua (1.3), hina purongo vara la lo lavi na rani rilangi, pani Paul mo vereea mara God mo lo vaihite na nora rasua (1.4–5).

Kalesia hai Thessalonica la lo romromia lara Paul mo sohahi na leta isara moiso mara Moli mo mele pala moiso (2.2). Pani mo vono, Paul mo retihoafoahaira vara la sopo tinafihia vara tea i halura sohena matan Iesu i pa sopo pala matan te hinau la pa masese tako (2.3–12).

Paul sohena mo lo retihoafoahaira matan vara la sopo toho purongo (3.6–10), ale vara la lo kilau vara tea i rohu vara i ooloo na nona reti hin leta nike.

Paul mo vereea mara God i pa sile na talai tavera isan la haratu sei la rohu vara la rasu na nona reti hin pongi atu mo lo mai:

‘Ale matana, God i pa sohahi na hina haluhalu isara, matan vara la pa rasu la hinau haluhalu atu. Matan vara enira mo isoiso la pa lavi na talai matan la sopo rasu na retivararohu, matan la lo avulahi na hehe la lo vaira.’ (3.11–12)

Hin Leta Nike

1. Retioloolo (1.1–2)
2. Moli i pa ari na varama (1.3–12)
3. Moli mo sopo mele pala (2.1–12)
4. Turu rilangi tarea (2.13–17)
5. Ha usiasi, ha voko (3.1–15)
6. Isoiso usiasi (3.16–18)

Tiroma Reti

¹ Enau Paul na uli leta nike isamim vao kalesia Thessalonica hin God Tamafa peresi Moli Iesu Kristo, Silas peresi Timothy la lo toho peresiau nike.

² Romrohu peresi na tamata mo tai isan God Tama peresi Moli Iesu Kristo i pa toho isamim.

Paul Mo Vere Meje

³ La vorai peresi na vevorai, tarea mo tataholo vara kama vere meje isan God matamim, ale mo tataholo matan nomim rasua mo lo ulua mo tavera, ale nomim opoia isamim hatehateahi mo lo tavera jea.

⁴ Mo vai kamam kama lo retihapahapa matamim isana vao kalesia tinapua sei la rasu God mata nomim turu rilangi peresi na nomim rasua na rani tipahi tari peresi na rani rilangi ka lo lavira. ⁵ Harihi mo vujangi na aria tataholo non God, matan vara i vai kamim ha tataholo mata ha lavi

mauri atu God mo aulu hinia, sei ka lo lavi na rani rilangi matana. ⁶ Matan mo tataholo vara God i sile na rani rilangi isan la haratu sei la lo sile na rani rilangi isamim, ⁷ ale God i pa sile na mapu isamim sei ka lo lavi na rani rilangi sohemam hin rani atu Moli Iesu i pala na tuka. Enia i pa mai peresi na nona angelo suiha jea, ⁸ na pepe hapu tavera jea vara i lavi na talai tavera i silea isan la haratu la sopo levosahi God peresi la haratu sei la lo rohu vara la ooloo na Retirohu non nofa Moli Iesu. ⁹ Nora talai i pa vaikomokomora i sopo te isoisoana, la pa toho mata rani tui tui hasera asau na nahon God peresi na mera suihana tavera jea, *Isa 2.10* ¹⁰ hin rani atu vara Iesu i mele mai vara i lavi na hasohaso isana nona tapuhi sei la tau na nora rasua hinia, la pa mafurahi tavera matana, matan ka lo rasu na nomam retisohai isamim.

¹¹ Matan haratu kama lo usiasi tarea vara nofa God i pa vai kamim ha tataholo mata lavi mauri atu mo tovi kamim matana, ale matan vara i tueni kamim na suihana mata vai vevuhi na nomim hinau rohu tari peresi na vavahinau ka lo vaira mata rasua, ¹² matan vara hijan nofa Moli Iesu i pa lavi na hasohaso hin kamim, ale kamim hinia, i usuri na romrohu non nofa God peresi Moli Iesu Kristo.

2

Tamlohi Enia Meresahi Nona Leu

¹ Ale nake, mata mele mai non nofa Moli Iesu Kristo peresi na nofa pulutahi isana, la vorai peresi na vevorai, kama lo usi kamim ² vara ha sopo hisuhisu na romimim teni ha matahu matan ka rongu te reti non te tanume, teni te sorasora, teni te leta la vereea vara mo tai isamam, mo lo vereea vara rani non Moli mo mai moiso. ³ Ha sopo tinafihira vara tea i halu kamim hin te malele, matan rani atu i pa sopo efi mai, i tiroma hin rani tavera atu tamlohi la pa vahari hin God hinia, ale rani pala nona tamlohi vaivaileu atu i pa usuria. Tamlohi atu, God i pa vaikomokomoa. ⁴ Enia i pa hase tahea aulu, ale i pa turuleji isana hinau tari sei tamlohi la tovira vara God teni te hinau mata lotu. Enia i pa sakele na lolo Temple, ale i vereea vara enia God. *Dan 11.36; Ezek 28.2*

⁵ Ka romaliho vara na vere kamim hin la hinau atu hin rani atu na pa lo toho peresi kamim? ⁶ Ale nake natu, ka levosahi na sava mo lo turuhoroa matan i pa sopo efi malue na jara tavera i tikeli rani atu God mo vifonia matana. ⁷ Matan, suiha luhu atu mata vaivaileu mo pete voko moiso, pani i pa lo luhu i tikeli rani atu God i pa lavi

naʻihi haratu sei mo lo turuhoroa nake.*

⁸ Ale nake natu, haratu sei mo lo vaivaileu i pa pala, ale Moli Iesu i pa vilimateia na maromaronu purongo, ale i pa vaikomokomoa na sasarami tavera hin rani atu vara i mele mai.

Isa 11.4 ⁹ Rani non tamlohi vaivaileu atu i pa pala na vavahinau non Setan, i pa pala na suiha tavera peresi na matamata halu tavera peresi na hina maʻurahi, ¹⁰ ale enia i pa vai na hina halu sasati tari matan vara i eʻfi halu la haratu la lo vano na nora komokomo matan la ʻrohu vara la rasu na retivaraʻuhu sei i eʻfi jurira. ¹¹ Matana, God i pa sohai na hina haluhalu isara, matan vara la pa rasu la hinau haluhalu atu. ¹² Matan vara enira mo isoiso la pa lavi na talai matan la sopo rasu na retivaraʻuhu, pani matan la lo avulahi na hehe la lo vaira.

Kamim Ha Turu Rilangi Tarea

¹³ Pani mo tataholo vara tarea kama lo vere meje isan God matamim vorai peresi na vevorai sei Moli mo opoi kamim, matan God mo viʻoni kamim vara kamim ha pa juri tiroma hin malele sei Tanume Tapu mo lo vaifa ʻa tapu hinia, ale matan ka lo rasu na retivaraʻuhu. ¹⁴ God mo tovi kamim hin na nomam Retiʻuhu matan vara ha pa lavi na hasohason noʻa Moli Iesu Kʻristo.

¹⁵ Ale matana, la vorai peresi na vevorai, ha turu rilangi, ale ha taurilati vujangi sei kama lo vujangi kamim hinia moiso, na retireti teni hin te nomam leta. ¹⁶ Ale noʻa Moli Iesu Kʻristo hasena, God Tamafa sei mo opoifa, ale na nona fomʻuhu mo sileʻa na nanau matan tui tui peresi na fomtoho ʻuhu, ¹⁷ i pa nanau na mapumim, ale i turuhi rilangi kamim na vavahinau tari peresi na retireti ʻuhu.

3

Paul Mo Usia Vara La Lo Usiusi Matana

¹ Ale isoiso hinau la vorai peresi na vevorai, ha usiusi matamam, vara reti non Moli i pa vano i vila na jara tari, ale vara tamlohi la pa hasohasoa sohen ka lo hasohasoa, ² ale matan vara God i pa juriʻa isana tamlohi lejileji la sasati, matan mo sopo tamlohi tari la rasua. ³ Pani Moli i pa sopo tope na nona retitauhi, enia i pa turuhi kamim, ale i pa lo matahi kamim matan tamlohi sasati atu Tiapolo. ⁴ Ale nomam fomʻomi mo rilangi hin Moli matamim vara ka lo vai na sava kama retileu hinira isamim moiso, ale vara ha pa lo vaira. ⁵ Kama usia vara Moli i vujangi kamim vara nona opoia isamim vara mo sohena sava, ale ha turu rilangi hin Kʻristo.

Retiʻoaʻoaahi Mata Maloko

⁶ La vorai peresi na vevorai, na hijan Moli Iesu Kʻristo na retileu isamim vara ha toho asau isan te vorai tinapua sei mo tamlohi maloko, mo sopo hani na masmasuna usuri na posposi sei kama lo vereea isamim moiso. ⁷ Matan kamim ka levosahia vara ha pa usuri na nomam tovongi ʻuhu, matan kama sopo toho purongo hin rani atu kama lo toho peresi kamim. ⁸ Ale kama sopo hani te pereti sei vara kama sopo volia, ale kama lo voko mo rilangi tarea, matan vara kama sopo tau te tetehi isan te vonamim hatea. ⁹ Mo sopo matan mo sopo tataholo vara kama usia isamim, pani matan kama opoia vara kama pa sile kamim na tovongi ʻuhu matea mata usuria. ¹⁰ Matan hin rani atu kama lo toho peresi kamim, kama sile retileu akerihi, mara vara tea mo sopo avulahi vara i vai na voko, ha sopo vahania.

¹¹ Matan kama lo rongoa vara tamlohi hai isamim la lo toho purongo, la sopo hahau i tataholo, pani la lo sanga hau. ¹² Ale nake, kama lo retileu, ale kama lo retituetueni na tamlohi sohen harihi hin Moli Iesu Kʻristo vara la pa vai na nora voko na posposi malum matan vara la pa hani na masmasura purongo. ¹³ Pani isamim la vorai peresi na vevorai, ha pa sopo malokoloko mata vai na hina ʻuhu. ¹⁴ Vara tea mo ʻrohu vara i ooloo na sava kama lo vereea hin leta nike, ha lavi na hijana, ale ha sopo mele pulutahi peresia matan vara i pa vaia i mahanuhanu. ¹⁵ Ale, pani, ha sopo kilaua vara enia meresahi matea, pani ha retiʻoaʻoaahia sohena vorai vonamim matea.

Isoiso Reti

¹⁶ Nake, kama lo usiusi vara Moli mata tamata hasena, i pa sile na tamata tarea isamim na malele tari. Moli i pa toho peresi kamim mo isoiso. ¹⁷ Enau Paul, na lo uli retioloo nike na limaku haseku. Na vaia sohena matamata varaʻuhu vara ha pa hitevosahia vara enau na lo uli na noku leta sohena.

¹⁸ Romʻuhu non Moli Iesu Kʻristo i lo toho isamim mo isoiso.

* 27: God i lavi naʻihi: Tamlohi vujangi la sopo levosahia vara Paul mo lo vereea hare mo lavi naʻihi teni hare mo lo turuhoroa, fomʻomi enia vara Paul mo lo vereea God mo turuhoroa hin te malele.

**Tiroma Leta
Paul Mo Ulia Isan
Timothy
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tataholo vara ʻa viʻoni na patu tamlohi hinia, deacon la vai na vavahinau non God (3.1–7; 8–13; 5.17–20).

Reti non Paul akerihi ʻa efi rasua tarea:

ʻReti nike, o efi rasua ale mo tataholo vara o lavi vevuhia, vara, ʻKristo Iesu mo mai na varama vara i juri na tamlohi hehe.ʻ Enau na sasati jea hinira. Pani God mo ʻromopoiu matan hinau sei, matan enau na sasati jea hinira, ale Iesu Kristo mo tauau vara a mai tovongi matea vara i vujangi na nona ʻromperavu isan la haratu la pa rasua mata mauri tui.ʻ (1.15–16)

Hin Leta Nike

1. Retioloolo (1.1–2)
2. Retivujangi mata mauri kalesia (1.3–3.13)
3. Hina aulu na noʻa lotu (3.14–4.5)
4. Paul mo retituetueni Timothy (4.6–6.21)

Reti Tiroma

¹ Enau Paul, vahaʻule matea non Kristo Iesu God mo viʻoniau na nona suiha, Kristo Iesu noʻa Jujuri enia noʻa ʻromtoho.

² Timothy, natuku hin noʻa mauri rasua, na lo usiisi matam vara God Tamaʻa enia Kristo Iesu noʻa Moli, la sileho na ʻromʻuhu, na ʻromopoi peresi na tamata.

Retiʻoroahai Mata Vujangi Haluhalu

³ Sohen na vereea ʻilangi isam hin rani atu na tauho Ephesus vara a vano Macedonia, na vereea vara o pa toho vara o sile na reti isan la tamlohi atu vara la sopo vujangi te vujangi tinapua, ⁴ teni vara la sopo usuri te sorasora halu teni te sorasora vono mata sava pina tuai la tataholo hinira, vuana enia ʻromʻomi vono purongo, la hinau sei la sopo tueni te tamlohi na mauri mata rasua hin God. ⁵ Pani noʻa ʻromʻomi tavera hinia, enia opoia, opoia mo tai isana mapu vokevoke peresi na rongovosahi na hinau tataholo, peresi na rasua varaʻuhu. ⁶ Tamlohi hai, la jalio, la posi la usuri na sorasora vono, ⁷ la opoia vara la mai tamlohi vujangi mata leu, pani la sopo levosahi na sava la lo vereea teni

na hinau sei la vereea vara la levosahira mo ruhu vara la tataholo teni mo vono.

⁸ Ale ʻa levosahia vara Leu mo fuhu, pani vara tea mo lavia na posposi tataholo purongo, ⁹ ha levosahi harihi: God mo sopo sile na leu mata tamlohi tataholo, pani isan la haratu la lo vaivaileu, la haratu la sopo ooloo hin te tamlohi hatea, la haratu la lo usuri na posposi varama, la haratu la lo hehe, la haratu la sopo sile na ooloo isan te hinau mata ooloo, la haratu la lo vilimatei na tamara teni tinara, la haratu la lo vilimatei na tamlohi tinapua, ¹⁰ ale la haratu la lo vai na posposi lumiha, tamlohi la vaivaileu peresi na tamlohi, haʻai la vaivaileu peresi na haʻai, la haratu la lo tauri vanaho na tamlohi mata la hafehira, ale la haratu la lo retihalu tarea, la haratu la lo taviti halu na lolo court, ale na posposi lejileji tari sei la lo turuleji na vujangi ruhu sei, ¹¹ mo lo usuri na Retiʻuhu ruhuʻuhu non God sei enia avulahi tavera, ale Retiʻuhu sei mo taua isaku.

¹² Na vere meje isan Kristo Iesu noʻa Moli, mo sile na rilaʻilangi isaku, matan mo hitea sohena vara a efi vai na masalona, ale mo viʻoniau vara a volitusi isana, ¹³ hina purongo vara tiroma na lo vereleleji Kristo, na lo unuhi na nona tamlohi vara a komora, ale na kerekereera, pani God mo ʻromopoiu mata na sopo lo levosahi na sava na lo vaia matan na sopo rasua, ¹⁴ Ale ʻromʻuhu non noʻa Moli mo maʻivi savulevule matakua na rasua peresi na opoia hin Kristo Iesu. ¹⁵ Reti nike, o efi rasua mo tataholo vara o lavi vevuhia vara: Kristo Iesu mo mai na varama vara i juri na tamlohi hehe. Enau na sasati jea hinira. ¹⁶ Pani God mo ʻromopoiu matan hinau sei, matan enau na sasati jea hinira, ale Iesu Kristo mo tauau vara a mai tovongi matea vara i vujangi na nona ʻromperavu isan la haratu la pa rasua mata mauri tui. ¹⁷ Nake, isan Supe mata tauni tari, i sopo efi tihai, tea i sopo efi hitea, enia God matelete, ʻa pa pa silea na ooloo tavera peresi na hasohaso na rani tui tui tarea. Amen.

Vavahinau Non Timothy

¹⁸ Timothy natuku, reti nike na lo vereea isam, mo lo usuri na retimangovi sei la vereea matam moiso, la pa tueniho vara o efi vai na vuro ruhu, ¹⁹ tarea o tauri ʻilangi na nom rasua peresi na nom rongovosahi na hinau mo tataholo, ale tamlohi hai la tau naʻihira, la komo na nora rasua sohena boti mo vujahi kosahia na paranga. ²⁰ Tatuara sei, Hymenaeus enia Alexander, enau na taura la vano na liman Setan vara i pa vujangira vara la pa sopo mele turuleji hin God na nora vujangi haluhalu.

2

Vujangi Mata Lotu

¹ Tiroma, na lo vereea řilangi vara tamlohi na nora usiusi mata tamlohi tari, la usi God mata tuetueni, la usiusi mata tinapua, ale vara la vere meje isan God. ² Mata supe peresi la haratu sei la lo tauri na suiha, matan vara řa pa efi mauri na mauri mo tamata, ale mo malum vara řa efi usuri na mauri tataholo, ale řa sile na ooloo isan God. ³ Usiusi sohena, mo řuhu na nahon God, nofa Jujuri, ale mo avulahi hinia, ⁴ matan God mo opoia vara i juri na tamlohi tari, ale vara la palevosahi na retivarafuhu.

⁵ Matan God enia matelete purongo, ale tamlohi tuetueni matelete purongo sei enia mo malele tamlohi la mai isan God, tamlohi atu enia Křisto Iesu, ⁶ mo hase silea sohena volituhu mata tamlohi tari, reti sei enia vereulia sei God mo silea na rani tataholo.

⁷ Matana, God mo viřoniau vara a mai vahafule matea, ale vara a mai tamlohi retivujavujangi matea, na lo vere na varafuhu na sopo halu, God mo řuleau vara a vujangi na tamlohi řořoha na malele rasua peresi na retivarafuhu.

Posposi Mata Hařai

⁸ Moiso, na opoia vara tamlohi na jara tari la usiusi, ale la tahe na limara tapu isan God, i pa sopo te lolokoru teni vasvas hinira. ⁹ Sohena, na opoia vara tarea hařai la ruru na ruru na řomřomi řuhu i tataholo na naho tamlohi. Mo řuhu vara la sopo peri na vulura na malele tinatinapua peresi na hiniau mata gold teni huřutavila teni ruru volina mo sahe aulu jea, ¹⁰ pani hin haratu purongo, mo tataholo mata hařai sei mo lo vereea vara enia mo lo usuri posposi atu God mo opoia, peresi na vavahinau řuhu.

¹¹ Hařai la pa toho malum la tapurongo, ale la tatamahua vara la ooloo matan vara la efi lelevesahi. ¹² Tarea, enau na sopo majinga vara hařai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo, ¹³ matan God mo vai Adam tiroma moiso mo pa vai Eve. *Gen 2.7, 21–22*

¹⁴ Ale Tiapolo mo sopo halu Adam, mo halu na hařai, ale mo tope na retileu non God. *Gen 3.1–6*

¹⁵ Pani God i pa juri na hařai na tapetape, vara la lo turu řilangi na rasua, opoia, la hahau na mauri vokevoke peresi na posposi hasera taurilatira.

3

Patu Tamlohi Na Vao Kalesia

* **3:1:** patu tamlohi rasua: faramin reti sei, patu tamlohi enia tamlohi atu mo lo kilau na tamlohi rasua na jara matea.

† **3:11:** hařai: hai la vereea vara hařai mo opoia vara i mai deacon, teni narou deacon. ‡ **3:12:** hařai matea: mo sopo tipahi na narouna hin te rani.

¹ Reti nike o efi rasua, vara tea mo tau na řomina vara i pa patu tamlohi rasua matea mata tamlohi rasua, mo opoi na vavahinau řuhu matea. * ² Ale matana, o kilau vara mo sopo te hiniau na maurina, mo lahi na hařai matelete, mo hase taurilatira, enia tamlohi řomřomi, o hitea vara tamlohi la lo sile na ooloo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo řuhu. ³ Ale, enia mo sopo tamlohi inu hajavua, mo sopo tamlohi valum, pani řomina mo malum, mo sopo tamlohi vasvas, ale mo sopo tamlohi řomjea na mania, ⁴ ale mo lo kilau mamahuni na lolo imana, ale natuna la sile na ooloo isana, ale la ooloo hinia. ⁵ Matan vara tea mo sopo efi kilau mamahuni na imana, i pa kilau mamahuni na vao kalesia non God sohena sava? ⁶ Enia i pa sopo tamlohi matea mo pa mai purongo na mauri kalesia, matan patuna i pa sosohi na mangisi tavera, ale i jovi sivo na talai non Tiapolo. ⁷ Moiso aulu hin haratu, tamlohi na jingoima la vereea vara maurina mo tataholo, ale matan i sopo efi jovi hin te vuna non Tiapolo, ale i mahanuhanu matana.

Malele Viřoni Na Deacon

⁸ Deacon sohena, o hitea vara tamlohi la lo sile na ooloo isara moiso, ale enira la sopo meme masanga, la sopo tamlohi inu hajavua, la sopo řomtutuni na mania. ⁹ Ale la tauri řilangi na hiniau luhu mata rasua na posposi sei tarea řomira la tataholo na nahon God. ¹⁰ Ale o vaihitera tiroma vara ko sopo hite te hiniau na maurira, ale o pa majinga hinira vara la volitusi sohena deacon.

Hařai Deacon

¹¹ Hařai sohena, vara la deacon, o hitea vara tamlohi la lo sile na ooloo isara moiso, la sopo sorasora tamlohi, la lo hase taurilatira, tarea la lo usuri na masalon God na hiniau tari la lo vaira.†

¹² Deacon la lahi na hařai matelete, la lo kilau mamahuni na natura peresi na imara.‡ ¹³ Matan la haratu la lo volitusi řuhu sohena deacon la pa lavi na hija řuhu nora, ale la pa lavi na řomřilangi na nora rasua hin Křisto Iesu.

Posposi Tataholo Na Vao Kalesia

¹⁴ La hiniau sei na lo ulia isam, na lo řomtoho vara a pa vano isam vila, ¹⁵ pani vara te hiniau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale

enia lapiti retivararūhu. ¹⁶ Hina tavera matea kama taviti hinia, pulo nofa rasua enia hina luhu matea:

Kristo, mo pala mo mai tamlohi,

Tanume Tapu mo vujangia vara enia natu Kristo,
angelo la hitea,

ale tamlohi la vereulia na mara jara tinatinapua tari,

moiso tamlohi na varama la rasua,
ale God mo lavia mo sahe aulu na hasohaso na tuka.’

4

Vujangi Nona Tanume Sasati

¹ Pani, Tanumen God mo vere mamahunia vara na pongi hitahu tamlohi hai la pa vahafi na malele rasua matan la pa tapurongo isana tanume haluhalu peresi na vujangi non tanume sasati, ² ale retihaluhalu sei la pa tai isana tamlohi tapnetano, fomira la sulimateira, ale la sopo mele levosahia vara sava mo tataholo, ³ ale enira la tapuhoro na lahi, moiso la horo na tatua hanhani sei God mo vaira matan vara la haratu la rasua la levosahi na retivararūhu la pa lavira na vere meje, ⁴ matan hinau tari God mo vaira la ūhu, ale mo sopo te hinau vara tamlohi la ūhu hinia vara la lavia la vere meje matana moiso, ⁵ matan reti non God peresi na ususi mo lo vai na hanhani la ūhu na nahon God.

Paul Mo Retituetueni Timothy

⁶ Vara o vujangi la hinau sei isana vorai peresi na vevorai, o pa volitusi ūhu non Kristo Iesu, matan ko hase vahaniho na Retiūhu peresi na vujangi ūhu sei ko lo usuria. ⁷ Pani o toho asau na sorasora vono la rongorongo vono, ale o hase vujangiho na posposi sei God mo opoia, ⁸ matan fa levosahia vara, vara ko vai na epem mo filangi, haratu mo ūhu makomona purongo, pani vara tarea o lo usuri na posposi God mo opoia, i pa ūhu jea na maurim tari, mo ūhu mata maurin nake peresi na mauri atu i pa mai hitahu. ⁹ Reti nike o efi rasua, ale mo tataholo vara tamlohi la pa usuri vevuhia. ¹⁰ Matan harihi, fa lo tau na romira mo rilangi na vavahinau matana, fa romtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri vararūhu.*

¹¹ O retileu, ale vujangi na hinau nike. ¹² O sopo tinafihia vara tamlohi la hitesatihio matan ko uluvou purongo, pani tarea o vai na tovongi ūhu isana tamlohi rasua na nom retireti, na nom vavahinau,

na nom opoia, na nom rasua peresi na nom posposi vokevoke. ¹³ Ale i pa tikeli na rani a mai isam, o lo tau na fomim vara tarea o lo evievi na Retitapu na naho tamlohi rasua, o lo vere mamahunira na malele tari mata mauri rasua, ale o lo vujangi na retivararūhu. ¹⁴ O sopo rompurongo hin nom silesilea atu God mo silea isam na retimangovi atu hin rani atu la patu tamlohi rasua na vao kalesia la ususi la tau na limara na patum.† ¹⁵ Tarea o lo hahau usuri la vujangi atu, o tau vevuhi na fomim hinira matan vara tamlohi la pa hitea vara ko lo ulua na mauri rasua. ¹⁶ O hase kilauho, o kilau mamahuni sava ko lo vujangia. O turu rilangi hin la hinau sei matan vara o vaia o pa efi juriho peresi la haratu la lo tapurongo isam.

5

Vavahinau Nona Patu Tamlohi Rasua

¹ O sopo hapuhi na tamlohi taunina mo jeu na taunim, pani o usia i rilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohen tasim. ² Isana haūai taunira la jeu na taunim, o retireti isara sohen ko lo retireti i ūhu isan tinam, ale o retireti i ūhu isana haūai taunira la sopo jeu na taunim sohen vetasim, ale o sopo sile na masapa isam hasem mata o romlumiha hinira.

Ha Lo Kilau Na Haūai Malepu

³ O sile na oloolo isana haūai malepu la haratu la haūai malepu vararūhu, harasei mo sopo te tinapua vara la pa lo kilaura. ⁴ Pani vara te haūai malepu te natura teni nona vajiaha mo lo toho, mo ūhu vara enira la vujangi na nora rasu na vavahinau mata la kilau sohen haūai atu mo lo tapna kilaura tiroma, matan God mo avulahi hin posposi sei. ⁵ Haūai malepu vararūhu mo sohen harihi, mo lo toho hasena, ale enia matea mo tau na fomina isan God tarea, ale posina enia mata ususi mata tuetueni na rani teni na vutepongi, ⁶ pani vara te haūai malepu mo lo romromia enia hasena, mo lo mauri, pani mo mate moiso. ⁷ O retileu hin la hinau nike isara matan i pa sopo te masapa vara tamlohi la pa pisuhira. ⁸ Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahafi na posposi rasua, posina sei mo sati mo jeu la haratu la sopo rasu God.

⁹ O tau na hija haūai matea na pepa sei mo vereea vara sava haūai malepu natu, vao kalesia i pa tuenira, hijan haratu purongo

* **4:10:** reti sei: God enia Jujuri nona tamlohi tari mata enia hasena i pa efi juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri. † **4:14:** patu tamlohi rasua: la posia mo tinapua sohen harihi: patu tamlohi, elda teni bishop. O hite: 5.17, 19

mo lahi vahatelete, ale taunina mo jeu mo ngavulu limarave. ¹⁰ Haʻai atu tamlohi la lo vereea tarea vara enia haʻai matea mo lo vai na vavahinau ruhu, ale vara te natuna, mo kilau mamahunira la mai la tavera, ale tarea mo avulahi vara i lo lavi na vinano la mai na imana, ale posina mo lo sile na ooloo isana tapuhi tinatinapua non God, mo avulahi vara i hoje na palora, ale mo tau na romina vara i vai na vavahinau ruhu tari.* ¹¹ O sopo uli na hija haʻai malepu la sopo vajiaha matan masalora mata lahi mo jeu na romira vara la usuri Kʻristo, ale la pa rovo hinia matana. ¹² Matana, talai i pa mai isara matan la tope na nora retitauhi isan Kʻristo vara la pa sopo mele lahi. ¹³ Mo sopo haratu purongo, pani la haʻai maloko vari purongo, la lo hahau falihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la lo sorasora tamlohi, ale la lo tau na ngalsura hin te hinau mo sopo te nora hinau hinia, ale la lo vereea te hinau la sopo tataholo vara la verera. ¹⁴ Ale na lo vereea vara i pa mele ruhu jea vara haʻai malepu la sopo vajiaha la mele lahi, la mele vasusu moiso, la kilau mamahuni na imara, ale la sopo sile na masapa isan noʻa meresahi teni te masapa vara tea i retirefen hinia matara. ¹⁵ Matan hai la vano la posi moiso, la usuri Setan. ¹⁶ Pani vara te haʻai rasua te haʻai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la haʻai malepu varaʻahu.

Volin Patu Tamlohi Rasu

¹⁷ Na tavaluna, patu tamlohi rasua la ruhu mata tiroma na vao kalesia, mo tataholo vara ha volira i vaha rua, sohen la haratu la lo voko rilangi na nora retivujavujangi peresi na vujangi. ¹⁸ Matan, Retitapu mo vereea vara, 'Na rani buluk mo lo savahi na patu wit, ha sopo lasi na jingona vara i sopo eri hani te wit makomo atu'. *Deut 25.4* Ale mo mele vereea vara 'Mo tataholo vara tamlohi voko i lavi na volina'. *Lk 10.7* ¹⁹ Ale, o sopo tapurongo tiroma isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo ruhu vara tuvai atu mo tataholo, ale nake o eri tapurongo hinira. ²⁰ Vara te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana. ²¹ Na nahon God peresi na nahon Kʻristo Iesu peresi na angelo God mo viʻonira, na lo sile na retileu

isam vara o taurilati la retileu tari sei na lo vereea isam vara o sopo opoi na tatuara purongo, ale o sopo vai te hinau na posposi tametame! ²² Ale o sopo vilavila vara o tau na limam hin te tamlohi matan vara o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komoho na nona hehe. O lo toho na mauri vokevoke. ²³ Ale o sopo inu na wai purongo, pani o lo inu na waen makomona matan pangem peresi na nom rojoa sei la lo toho isam. ²⁴ Hehe nona tamlohi hai la malue na jara tavera la tiro-mara na rani mata aria, pani te hehe nona tamlohi tinapua, la pa pala hitahu. ²⁵ Mo sohen haratu isana vavahinau ruhu nona tamlohi, la memera purongo, pani vara la sopo pala tako, pani la pa pala hitahu.

6

Vavahinau Nona Slev

¹ Haratu la rasua, pani la lo slev, mo tataholo vara la sile na ooloo isana nora tamlohi tatavera tarea matan vara tea i sopo eri retisatihi na hijan God teni na vujangi ruhu. ² Vara slev te nora tamlohi tatavera la vorai rasua, la pa sile na ooloo isara, matan enira la vorai rasua sohera, mo ruhu vara la vai na vavahinau ruhu isara, i jeu na tamlohi tatavera tinapua matan, enira la vorai rasua, ale God mo opoira.

Reti Haluhalu Peresi Na Tavtav Vararuhu

Timothy o vujangi la hinau sei isana tamlohi, o vereea rilangi vara la pa ooloo hinira. ³ Vara tea mo lo vujangi te vujangi tinapua, ale mo sopo majinga na reti tataholo non noʻa Moli Iesu Kʻristo, peresi na vujangi sei mo lo usuri na mauri God mo opoia, ⁴ tamlohi sohen, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo vararuhu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retirefen, la romfomi sati hinira, ⁵ ale tarea la vasvas peresi haratu romira la lejileji, mo sopo te retivarafuhu hinira, ale la romfomia vara posposi mata mauri rasua mo sile na masapa isara vara la tavtav, ⁶ vararuhu, posposi mata mauri rasua i pa vai na maurim i tavtav, pani isan la haratu purongo sei tarea la sopo romusuri te hinau tinatinapua, ⁷ matan fa vora lekoleko na varama, ale vara fa mate, fa pa malue lekoleko. ⁸ Pani vara te haʻa hanhani teni te noʻa ruru, fa pa avulahi matara, ⁹ pani

* **5:10:** Leon Greek mo vereea sohen harihi: vara mo hoje na palo tamlohi viʻoni. Mo vereea matan tuai la lo tau nora Sabbath na jingoima, ale posposi tataholo enia vara engko teni nom volitusi i pa hoje na palora.

la haratu la opoia vara la tavgav, la pa jovi na hina vaihite, ale masalora mo lihora na hinau rongorongono vono peresi na hinau mata komora purongo, ale hinau sei mo putehi na tamlohi na komokomo tavera.¹⁰ Matan, opoia mata mania enia pulo hinau mata hina sasati tari. Matan masalo sohena, mo reve narihi na tamlohi hai na malele rasua moiso, ale la hase sarihira hin te rongosati matuvana.

Isoiso Reti Non Paul Isan Timothy

¹¹ Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, romperavu peresi na rommalum. ¹² O vai na valum fuhu mata rasua, o taurilati mauri tui atu God mo toviho hinia, peresi taviti fuhu atu ko vaia na naho tamlohi matuvana. ¹³ Na lo vereha na nahon God sei mo lo sile na mauri isana hinau tari la mauri, peresi nahon Kristo Iesu sei mo vere na taviti fuhu mata retivarafuhu na nahon Pontius Pilate, ale na lo vereha vara ¹⁴ engko o pa taurilati retileu nika, o sopo malue narihi hinia i tikeli rani atu Iesu Kristo nofa Moli i mele pala:

¹⁵ na nona rani tataholo,
 enia haratu mo avulahi mo tavera jea,
 ale enia hasena mo aulu na hinau tari,
 enia Supe nona supe,
 enia Moli nona moli.

¹⁶ Enia hasena, mo lo toho jejeu,
 mo lo toho hin memera tavera atu
 tamlohi la sopo efi mai mariviti hinia,
 mo sopo lo tea i hitea,
 teni tea i efi hitea.
 Isana, fa pa sile na oloolo,
 ale enia i pa lo tauri na suiha tui tui
 tarea. Amen.

Haratu La Tavtav

¹⁷ Isan la haratu la tavgav nake na varama, o vereha isara vara la sopo tau na romira i sahe aulu teni vara la romtoho na nora tavgav, matan fa sopo levosahia vara la pa toho i tikeli pangisa. Pani o vereha isara vara la lo romtoho hin God hasena, matan enia mo lo sile na hinau tari isafa matan vara fa avulahi hinira. ¹⁸ O vereha isara vara la lo vai na hinau la fuhu, o vereha isara vara la tavgav na nora vavahinau fuhu, la pa hansohai, ale na nora romavulahi la tatamahu vara la asease na nora hinau. ¹⁹ Hin malele sei, la lo takonahi na tavgav tavera matara hasera, sohena pulo fuhu matea matan mauri atu mo lo mai, ale o vereha isara matan vara la efi taurilati mauri atu, enia mauri varafuhu.

Isoiso Reti Non Paul

²⁰ Timothy o matahi la hinau sei God mo lo sile isam moiso. O sopo usuri na sora-sora vono teni te romromi sei la vereha vara enia 'hina lelevosahi' ²¹ matan tamlohi hai la lo turu hinia la lo vano malue na malele rasua moiso.

Noku ususi vara romfuhu non God i pa toho isamim isoiso.

**Harua Leta
Paul Mo Ulia Isan
Timothy
Leta Nike**

Harua leta nike isan Timothy, mo lo reti sohena vara enia taman Timothy, mo lo romfomia na nona ususi (1.2–3) matan mo opoia vara Timothy i mai tamlohi vuro fuhu matea non Kristo ale i tatamahu mata lavi na rani rilangi (2.1, 3).

Paul mo vereea mara tamlohi rasua hai la jovi na hehe, ale matana, Tiapolo mo lo taurilatira na nona vuna, ale mo retiroafoahai Timothy vara i rovo na vaihite sei uluvou la lo tia hinira (2.20–26; 3.1–9). Mo vereea vara i retivujavujangi na retisohai non God, hina purongo vara tamlohi la opoia teni mo vono (4.2). I pa lo kilau mata tamlohi vujangi haluhalu.

Paul mo levosahia vara i pa sopo tuai i pa mate, mo levosahia vara i pa lavi otori mata mauri sei God i pa silea mata nona turu rilangi (4.6–8), ale mo mele vereea vara Timothy i levosahi retivarafuhu akerihi:

Harihi enia retivarafuhu:

Vara fa mate peresia,
fa pa mauri peresia;
vara fa turu rilangi,
fa pa tauri na suiha peresia;
vara fa vunvunia,
i pa vunvuniha,
vara hina purongo vara fa sopo fomturu rilangi,
enia mo lo fomturu rilangi,
matan enia i sopo efi posi na romina.
(2.11–13)

Hin Leta Nike

1. Retioloolo (1.1–2)
2. Ha sopo mahanuhanu hin Moli (1.3–18)
3. Mauri tamlohi vuro fuhu (2.1–26)
4. Posi tamlohi na pongi hitahu (3.1–9)
5. Ha turu rilangi tarea (3.10–4.8)
6. Retituetueni peresi na isoiso retioloolo (4.9–22)

Reti Tiroma

¹ Enau Paul, vahafula non Kristo Iesu usuri na masalon God mo usuri na retitauhi mata mauri sei mo lo toho hin Kristo Iesu.

² Na lo uliuli isam Timothy natuku fuhufuhu; God Tama peresi Kristo Iesu nofa Moli la sile na nora romfuhu, romopoia peresi na tamata isam tarea.

Paul Mo Vere Meje Isan God

³ Timothy, na vere meje isan God matam. Enia God sei na lo volitusi isana sohen piku tuai la lo vaia, na vaia, ale romiku mo

sopo tuvaiau hin te hinau, ale tarea na lo romfomiho na noku ususi vara na rani teni na vutepongi. ⁴ Na opoia mo taverna vara a mele hiteho, matan na lo romfomi rani atu ko lo tangisiau, ale a pa avulahi taverna hin rani atu vara fa mele tapatapai. ⁵ Na levosahi na nom rasua varafuhu, mo lo usuri na rasua non nom pua Lois peresi non nom nana Eunice. ⁶ Matan haratu, na lo mele vereho hin pa silesilea atu God mo lo silea isam hin rani atu na tau na limaku hiniho* na lo vereea vara o iriiria vara i lo pepe, ⁷ matan tanume atu God mo sileha hinihi mo sopo mata matahu, pani mata suiha, opoia peresi na posposi mata hase taurilatiho. ⁸ Ale matana, o sopo mahanuhanu na vereulia non nofa Moli, teni hiniau, matan na lo toho na ima rilangi, pani o pa tatamahu vara o lavi na rani rilangi mata Retiruhu hin suiha atu God mo silea.

⁹ Enia mo juriha moiso, mo virohiha vara fa hahau na mauri tapu tarea. Mo sopo mata nofa vavahinau, pani mata masalona peresi na nona romfuhu mo silea isara hin Kristo Iesu tiroma moiso, varama mo pa tapulo, ¹⁰ pani nake masalon God atu, mo mera na maurin nofa Jujuri, Kristo Iesu, enia mo komo na suihan mateia, ale mo vuhesi mauri atu i pa sopo efi tihai hin rani, sohena Retiruhu mo vereea, ¹¹ God mo virohia matan vara a mai tamlohi retivujavujangi matea, a vahafula, ale a tamlohi vujangi matan Retiruhu atu.

¹² Matana, na lo lavi na rani rilangi nike na ima rilangi. Pani enau na sopo mahanuhanu matana, matan na levosahi haratu na lo rasua, ale na levosahi mahanuhia vara enia i pa efi tau mamahuni na sava mo retitauhi vara a pa lavia, i tikeli rani taverna atu a pa lavia. ¹³ O usuri mamahuni tovongi fuhu atu mata noku vujangi sei ko lo rongora isaku, mo usuri na tovongi mata rasua peresi na opoia hin Kristo Iesu. ¹⁴ Na suihan Tanume Tapu atu mo lo toho hiniha, o matahi mamahuni retivarafuhu fuhufuhu atu God mo silea isam.

¹⁵ Timothy ko levosahia moiso vara tamlohi tari nike na province matan Asia la vahaifi hiniau, ale Phygelus peresi Hermogenes enira tatuara. ¹⁶ Na lo usi God vara i pa romopoi na vao iman Onesiphorus, matan tarea mo lo vai na romiku mo avulahi, ale matan mo sopo matahu vara i mai isaku na ima rilangi, ¹⁷ ale hin rani atu mo pala Rome mo lo aleau vavano mo pa tapai, ¹⁸ na lo usi Moli vara i romopoia hin rani taverna atu. Ale ko levosahi mamahuni

* 1:6 hin rani atu na tau na limaku hiniho: Patu tamlohi mata vao kalesia, la tau na limara hin la haratu la pa lavi te vavahinau non Moli matea. Hite 1 Tim 4.14.

na nona vavahinau tari sei mo lo vaira matakū sei Ephesus.

2

Tamlohi Vuro Non Iesu Kristo

¹ Natuku Timothy, romʻruhu sei mo lo toho isan Kristo Iesu, i pa tueniho na nona suiha, ² ale sava vujangi ko rongoa isaku moiso na naho tamlohi matuvana, o mele silea isana tamlohi sei, la taurilati na nora retitauhi tarea, ale la efi vujangi mamahunia na tinapua hinia, ³ o tatamahu mata lavi na nom rani rilangi sohena tamlohi vuro ruhu matea non Kristo Iesu. ⁴ Mo sopo te tamlohi vuro i lo usuri na mauri tamlohi purongo matan nona romʻromi enia vara i vai haratu mo viʻonia i avulahi. ⁵ Tamlohi roro matea i pa sopo efi lavi na otori mata roro vara mo sopo usuri na leu mata roro. ⁶ Mo tataholo vara tamlohi rilangilangi mata voko na isa i lavi na vua asitauni tiroma. ⁷ O lo romʻromi na sava na lo vereea, matan Moli i pa siloho na lelevosahi matan la hinau tari atu.

⁸ O tau na romim hin Iesu Kristo, tahisan Supe David tuai, enia mo mele turu na mateia sohen na lo retivujavujangi hinia na noku Retiʻruhu, ⁹ matan na lo retivujavujangi hin Retiʻruhu sei, na lo lavi na rani rilangi, la pesiau na jen sohena tamlohi sasati matea. Pani tea i sopo efi taurilati na reti non God! ¹⁰ Ale matana, na lo turu rilangi hin la hinau atu matan vara la haratu God mo viʻonira la pa efi juri, ale la lavi mauri atu hin Kristo Iesu peresi na hasohasona tavera sei mo sopo te isoisona. ¹¹ Harihi enia retivaraʻruhu:

Vara ʻa mate peresia,

ʻa pa mauri peresia;

¹² vara ʻa turu rilangi,

ʻa pa tauri na suiha peresia;

vara ʻa vunvunia,

i pa vunvuniʻa;

¹³ vara hina purongo vara ʻa sopo romturu rilangi,

enia mo lo romturu rilangi,

matan enia i sopo efi posi na romina.

Tamlohi Ruhu Mata Voko

¹⁴ O mele verera hin la hinau nike, ale o retileu isara na nahon God vara la sopo vauriuri mata retireti, matan posposi sei mo sopo vai te hinau i ruhu, pani i pa komo na rasua non la haratu la lo tapurongo hinira. ¹⁵ O lo kilau mamahu vara o lo hahau tataholo na nahon God na posposi mo opoia, sohena tamlohi voko matea mo sopo te hinau vara i pa mahanuhanu matan enia mo vujangi mamahuni na retivaraʻruhu. ¹⁶ Pani o toho asau na retireti vono nona tamlohi varama purongo, matan enia i pa vai la haratu la lo usuria la mele sati

jea na posposi varama, ¹⁷ ale nora retireti la pa varhasahi sohena fanga sola sohen Hymenaeus peresi Philetus, ¹⁸ enira la lo jalio na malele mata retivaraʻruhu la vujangia lara rani sauteterahi mo pete masese moiso, retireti sohena mo komo na rasua nona tamlohi hai.

¹⁹ Pani retivaraʻruhu non God mo sohena pulo vatu matea mo lo turu rilangi, ale uliuli hinia mo vereea vara, ‘Moli mo levosahi na nona tamlohi’ ale ‘la haratu la lo vereea lara enira la tamlohi non Moli, la pa vahari na posposi sasati tari’.

Num 16.5

²⁰ Na iman tamlohi tavera matea, o pa sopo hite na pesin la vaia na gold teni silver purongo, pani o pa hite te pesin la vaia na pahai teni lepa. Hai la tauhasehira mata hanhani tavera purongo, hai mata hanhani purongo.

²¹ Matana, vara tea mo lo toho asau na posposi sasati, i pa sohena pesin la tauhasehia mata vavahinau ruhu purongo, la tapuhia mata vavahinau ruhu non tamlohi tavera matan ima atu, mo lo tatamahu mata vavahinau ruhu tari. ²² Ale matana, o rovo na masalo uluvou, ale o tutungui na posposi tataholo, rasua, opoia peresi na tamata peresi la haratu sei la lo tovi Moli la haratu mapura la vokevoke.

²³ O toho asau na romfomi sei la rongorongo vono, ale sorasora vono, ko levosahia vara vuan hinau atu enia vasvas purongo. ²⁴ Ale volitusi non Moli i pa sopo tamlohi vasvas, pani posina i pa ruhu na tamlohi tari, i pa efi vujangi, i pa romperavu, ²⁵ i pa vaitataholoi la haratu la turuposi hinia na rommalum. Korong God i pa silera na masapa teni i vono vara la efi vahari na nora hehe, ale la levosahi na retivaraʻruhu, ²⁶ ale vara romira la mele mai, la efi rovo na vuna non Tiapolo, matan tiroma enia mo taurilata matan vara la pa vai na masalona.

3

Na Pongi Hitahu

¹ Pani o lo levosahi harihi: na pongi hitahu, rani rilangi sasati la pa mai. ² Matan tamlohi la pa hase opoira, la pa opoi na mania, la pa hase taura aulu, la pa hahapaha, la pa retiretileji, la pa sopo oloolo na tamara teni tinara, la pa sopo vere meje matan te hinau, la pa sopo sile na oloolo isan te hinau mata oloolo, ³ mo sopo te romopoa hinira, romira la pa sopo jovi matan te hina ruhu tea mo vaia isara, la pa verelejeleji na hija tamlohi tinapua, la pa usuri na masalora purongo, la pa rompurongo na mauri, la pa rohu na hina ruhu, ⁴ la pa tamlohi turuposi, la rongorongo vono, la romvono, la romaulu, la pa opoia vara la rongo i ruhu purongo, pani la pa rohu vara la opoi God,

⁵ o pa hitera la vaia sohena la lo usuri na posposi God mo opoia, pani la pa sopo levosahi na suiha matan mauri sei God mo lo silea. Ale o sopo tapala peresi na tamlohi sohen haratu, ⁶ matan vonara hai la lo unu na ima tamlohi vara la haluhalu na haʻai rongorongono vono sei hehe nona haʻai la puhonira, ale masalora sasati tinatinapua la lo revera, ⁷ tarea la haʻai atu la opoia vara la lavi na levosahi, pani la pa sopo eri tikeli na levosahi mata retivararuahu. ⁸ Mo sohen Jannes enia Jambres sei la turuleji hin Moses tuai, ale la tamlohi nike sohena la turuosi na retivararuahu, ale la lo vaikomokomo na fomira, ale na mauri rasua, God mo tipahira. *Exo 7.11* ⁹ Pani la pa sopo eri turu i tuai, matan tamlohi la pa hitevosahia vara nora rongorongono vono mo sohen la tamlohi tupra rua atu tuai.

¹⁰ Pani engko, ko lo usuri na noku vujangi, posiku, fomiku mata mauri, noku rasua, noku fomperavu, noku opoia, posiku mata turu filangi, ¹¹ ale ko levosahia sohena sava tamlohi la pa tipahiau, ale rani filangi sei tamlohi la lo silea isaku hin la jara sei Antioch, Iconium peresi Lystra, la rani tipahi atu la sati jea, pani noku Moli mo juriau hin la hinaiu tari atu! ¹² Vararuahu, na lo vere vara tamlohi la pa tipahi na tamlohi tari sei la opoia vara la usuri mauri atu God mo opoia hin Kristo Iesu. ¹³ Pani tamlohi sasati peresi na tamlohi halu la pa mai la mele sasati jea, la pa lo halu, ale tamlohi la pa halura.

¹⁴ Pani engko o lo turu filangi na hinaiu tari ko lavira moiso, ale ko levosahia mo ruhu vara enira retivararuahu, matan ko levosahi hare mo vujangi hinira, ¹⁵ ale mo tapulo na rani engko ko pa lo natirihiko ko pa levosahi na Retiulia tapu, enira natu purongo la eri vaiho o lelevosahi mata juri na malele rasua hin Kristo Iesu. ¹⁶ God mo mangovi na Retitapu tari, enira la ruhu mata vujangi, mo ruhu mata i vaitataholoi na fomfomi mo sopo tataholo, mo ruhu mata i mele vaitataholoi na posposi tamlohi, ale mo ruhu mata vujangi na malele matan mauri atu mo tataholo, ¹⁷ matan vara tamlohi non God i mai tamlohi erieri matea matan mo tatamahu moiso mata vavahinau ruhu tari.

4

¹ Na nahon God peresi Kristo Iesu, enia haratu sei i pa ari la haratu la lo mauri peresi la haratu la mate hin rani taverna atu i pa pala, ale i pa Supe na varama, enau na lo vere harihi isam, ² o retivujavujangi na Reti non God; o tatamahu tarea vara o vaia, hina purongo vara tamlohi la opoia teni la

rohu hinia, o pisuhi na hehe nona tamlohi, o vere mamahunia na posposi lejileji, o retituetueni, ale o fomfomi peravu hin la hinaiu sei.

³ Matan rani mo lo mai vara tamlohi la pa sopo tapurongo na vujangi ruhu, pani la pa takonahi la tija atu sei la lo vujangi la hinaiu sei mo lo usuri na masalora purongo. La pa usuri na vujangi purongo sei mo memeje na perora. ⁴ La pa pelati na perora la vahafi na retivararuahu, ale la pa usuri na sorasora halu mata hinaiu matan tuai.

⁵ Pani engko, tarea fomim i lo mera, o turu filangi na rani filangi, o vai na vavahinau nona evangelist, o vai vevuhi na nom vavahinau. ⁶ Matan nake mauriku la sureia mo sohena wai silesilea matea isan God, noku rani mate mo mai moiso. ⁷ Na pete vai na valum ruhu peresi na maromaro moiso, matan na turu filangi hin retivararuahu atu na lo vujangia mo tikeli nake. ⁸ Ale nake, God mo tau mamahuni na fongofongo nona supe matakua mata noku mauri tataholo. Moli sei enia haratu mo lo ari tataholo, i pa silea isaku hin rani taverna atu, ale mo sopo isaku haseku, pani isan la haratu fomira mo taverna la lo kilau mata nona mele pala na varama.

Retireti Mata Tueni Timothy

⁹ Timothy, o vaihitea vara o mai isaku vila. ¹⁰ Matan Demas mo opoi varama nike, ale mo rovo hinaiu mo vano Thessalonica, ale Crescens mo vano Galatia, ale Titus mo vano Dalmatia. ¹¹ Luke hasena mo lo toho peresiau.

Mo ruhu vara o lavi Mark i mai matan i pa eri tueniau taverna na vavahinau non Moli. ¹² Na rule Tychicus mo vano Ephesus. ¹³ Vara ko mai, o lavi na noku ruru hamariri sei na taua na iman Carpus na vanua Troas. O lo fomfomia vara o pa lavi na puku atu, ale o sopo fomaliho na viriviri pepa.* ¹⁴ Alexander tamlohi atu mo lo voko na aen kopa, enia mo vaisatihiau, pani Moli i pa volia i tataholo na sava mo vaia. ¹⁵ O lo kilauho hasem matan Alexander, matan enia mo lo turuleji filangi na noʻa retisohai. ¹⁶ Tiroma na noku vaihite na nahon Supe matan Rome, tea mo sopo turu peresiau, pani enira mo isoiso la rovo hinaiu, i pa ruhu vara God i fomira matana. ¹⁷ Pani Moli mo lo turu na pahisaku, mo sileau na suiha matan vara a eri retivujavujangi vevuhi na nona retisohai isana tamlohi foʻoaha, matan vara la eri rongovosahia. Pani Moli mo juriau, vara i vono, la viliau moiso. ¹⁸ Moli i pa juriau na vavahinau sasati tari vara la pa sopo komoau, ale i pa laviau a unu hin mauri atu mo supe hinia

* 4:13: viriviri pepa: Hijan hinaiu sei tuai la lo uli na Retiulia non God hinia la vaia na huri nani, teni pepa.

na tuka. Isana, hasohaso tavera i vano mata rani tui tui, tarea. Amen.

Isoiso Reti

¹⁹ O sile na noku retioloolo isan Priscilla enia Aquila peresi na vao iman Onesiphorus. ²⁰ Erastus mo lo toho Corinth, Trophimus na taua mo rojo na taon Miletus. ²¹ O to vaihitea vara o mai tiroma moiso i pa taro hamariri. Eubulus, Pudens, Linus, Claudia peresi na vorai tari na rasua la sohai na nora retioloolo isam.

²² Noku usiusi vara Moli i pa lo toho na maurim, nona ŀomŀuhu i pa lo toho isamim.

Titus
Leta
Paul Mo Uliā Isan
Titus
Puku Nike

Paul mo lo vere na hijan Titus na nona leta mara mo lo usuria hin rani atu mo lo vavahinau Asia Minor peresi Greece (2Co 2.13; 7.6, 13; 8.6, 16, 23; 12.18; Gal 2.3). Paul mo vereā vara i pa viʻoni na patu tamlohi nona kalesia atu na Uren Crete.

Pani Paul mo vere Titus vara te hināu la pa tataholo tiroma sohen harihi: hijara la pa ʻŕuhu (1.5–9) ale i pa tataholo vara la sopo hase vaira la lumiha na posposi sei la sopo tataholo nona tamlohi non God moiso (1.10–2.9).

Paul mo vereā vara mauri paro nike mo mai matan sava God mo vaia hin Iesu Křisto: God mo jurira, mo hojera na nona reti na suihan Tanume Tapu matan vara la pa tau na nora ʻŕomtoho na mauri tui:

‘Mo jurira, pani mo sopo matan te posposi tataholo ʻra vaia, pani mata nona ʻŕomopoa, mo jurira na malele vora paro, ale mo hoje naʻihi na noʻa hehe, mo vaia ʻra turu na mauri paro, la hināu sei mo vaira na suihan Tanume Tapu. God mo sile purongoi na Tanume Tapu isaʻa hin Iesu Křisto noʻa Jujuri.’ (3.5–6)

Hin leta nike

1. Retioloolo peresi na ususi matan Titus (1.1–4)
2. Retileu mata patu tamlohi kalesia (1.5–16)
3. Retileu mata tamlohi kalesia (2.1–3.11)
4. Retitueteni peresi na isoiso retioloolo (3.12–15)

Retioloolo Isan Titus

¹ Leta nike, enau Paul na ulia, enau volitusi matea non God, ale vahafule non Iesu Křisto, matan vara a tueni na rasua non la haratu God mo viʻonira, vara la pa levosahi na hina varaʻuhu mo lo tuenira vara la pa hahau na malele God mo avulahi hinia, ² i usuri ʻŕomtoho atu mata mauri tui, haratu God mo sopo halu mo retitauhi hinia na pongi tiroma. ³ Na rani tataholo God mo taua moiso, mo vuhesi na nona reti na malele retivujavujangi, haratu God noʻa Jujuri mo silea isaku usuri na nona retileu.

⁴ Leta nike, mo vano isam Titus, natuku tataholo na noʻa rasua, ʻŕomʻuhu peresi na tamata non God Tamaʻa peresi Křisto Iesu noʻa Jujuri la mai isam.

Vavahinau Non Titus

⁵ Hin rani atu na malue na ureuren Crete, na tauho matan vara o pa vai vevuhi tataholoi na sava na sopo isoiso hinia, ale vara o pa viʻoni na patu tamlohi mata vao kalesia na taon tari atu, sohen na vereā isam. ⁶ Patu tamlohi matea mo sopo te hināu na maurina vara tea i eʻri pisuhia matana, narouna matea purongo, natuna la rasu Moli, ale la sopo lavi na hija sati mata lejileji teni matan la sopo oloolo. ⁷ Patu tamlohi atu mata kilau na vavahinau non God, i pa sopo tea i eʻri pisuhia hin te hināu na maurina, enia i pa sopo tamlohi matea mo lo ʻŕompurongo na tinapua, i pa sopo tamlohi lolokoru vila, i pa sopo tamlohi inu hajavua matea, i sopo tamlohi valvalum matea, moiso enia i pa sopo tamlohi haluhalu matea mata mania.* ⁸ Pani i pa tamlohi matea imana mo roi isana tamlohi tari, mo opoia vara i tueni na hināu mo ʻŕuhu, ʻŕomʻomi ʻŕuhu mo lo toho isana, nona aria mo tataholo, mo vokevoke, moiso ʻŕomina mo ʻŕilangi vara i taurilati na masalona. ⁹ Enia i pa tauri ʻŕilangi reti atu ʻra eʻri rasua sei haratu la vujangia moiso matan vara i eʻri tueni na tinapua na vujangi tataholo, ale i turuhoro la haratu la lo turoleji hinia.

Ha Lo Kilau Mata Vujangi Haluhalu

¹⁰ Matan, tamlohi matuvana la ʻŕohu vara la oloolo na tamlohi la lo tauri na suiha, la lo verevere vono, ale la tamlohi halu, na lo vere la haratu na vao taiʻalihu. ¹¹ O sopo tinafihia vara la vujangi matan la lo komo na vao ima matan la lo vujangi na hināu mo sopo tataholo vara la vujangia, la lo vaia matan vara la pa lavi na mania. ¹² Tuai, vonara matea nora ʻpovet matea mara Crete, mo vereā vara, ‘Mara Crete la lo retihalu tarea, la tamlohi sasati, la maloko vari, la lo sohena poi.’

¹³ Retivuhesi sei mo lo vereā mo varaʻuhu. Matan haratu, o hapuhira i ʻŕilangi matan vara nora rasua i mauri i ʻŕuhu, ¹⁴ ale la pa sopo mele tapurongo na sorasora vono nona Jew teni na retileu non la haratu la lo ʻŕohu na retivaraʻuhu. ¹⁵ Isana tamlohi ʻŕomira la vokevoke, hināu tari la ʻŕuhu, pani isana tamlohi ʻŕomira la hehe, ale la sopo rasua, hināu tari la vaia mo sopo ʻŕuhu. Tarea hehe mo tavuni na ʻŕomira, la sopo mele levosahia vara sava mo tataholo teni sava mo sati. ¹⁶ La lo vereā vara la levosahi God, pani nora vavahinau mo lo vujangia mo memera vara enira la sopo levosahia, la sasati, la sopo oloolo hin God, ale la sopo ʻŕuhu matan vara la vai te hināu i ʻŕuhu.

* 1:7: tamlohi mo kilau na tamlohi rasua: Greek mara bishop – patu tamlohi mata tamlohi rasua.

2

Vujangi Tataholo

¹ Pani engko, o pa vujangi na sava hinau mo usuri na retivarafuhu purongo. ² O vujangi na vajiaha vara la pa hase taurilatira, ale posira i tataholo matan vara la lavi na ooloo matana, na nora vavahinau tari, la pa vaira i usuri na posposi lelevosahi, ale nora rasua i filangi varafuhu peresi na nora opoia, ale nora turu filangi tarea. ³ Hafai jea sohena, o vujangira vara la vai na posira i tataholo matan vara la pa lavi na ooloo matana, la sopo sorasora tamlohi, moiso la sopo slev nona wai filangi, pani la pa vujangi na sava hinau mo fuhu, ⁴ moiso la pa tatamahu vara la vujangi na hafai lahi vara la pa opoi na tuara peresi na natura i fuhu, ⁵ vara nora vavahinau tari la pa vaira i usuri na posposi lelevosahi, ale romina i filangi hin tuana purongo, ale la pa hafai fuhu na posposi kilau mamahuni na lolo imara tarea, la romfuhu, tarea la ooloo hin tuara, matan vara i pa sopo sile te masapa vara te tamlohi i veresatihi na reti non God matara. ⁶ Uluvou sohena o pa retituetueni isara vara la vai na posira i tataholo matan vara la lavi na ooloo matana, ⁷ na vavahinau tari la lo vaira, engko o pa vujangira na tovongii fuhu na nom vavahinau vara la efi usurira, ale na nom vujangi o sopo vaia mata masalom, pani mata masalon God na posposi tataholo, ⁸ ale nom reti i pa tataholo varafuhu matan vara i pa sopo sile na masapa vara nom meresahi la pa veresatiho matan vara la haratu la meresahi isam, la pa mahanuhanu matan mo sopo te hinau sasati vara la pa vereea matafa. ⁹ O vujangi na slev vara la ooloo hin nora moli na hinau tari, la pa vaihitea vara la vaira la avulahi tarea, la sopo talai vara nora moli, ¹⁰ ale la sopo vavanaho isara, pani la vujangia isana nora moli vara la eri rasura, matan posira i pa vai na tamlohi la opoia vara la tapurongo na retisohai non God nofa Jujuri.

¹¹ Matan God mo vujangi na nona romfuhu mata juri isana tamlohi tari. ¹² Mo vujangira vara fa isoiso na posposi hehe peresi na nofa masalo varama, ale nake na varama fa lo toho na mauri fa hase taurilatira, fa tataholo, ale fa usuri posposi atu God mo opoia, ¹³ enfa fa pa usuri la hinau atu nake fa lo sasaovi matan nofa romtoho atu, rani atu nofa God sei nofa Jujuri Iesu Kristo i pa mele pala na hasohasona tavera hinia, ¹⁴ enia sei mo hasena silea matafa vara i volituhua na suiha vaivaileu tari, ale vara i onehira matan vara fa mai nona tamlohi, ale matan vara fa romjea tarea mata fa vai na vavahinau fuhu. *Psa 130.8; Exo 19.5*

¹⁵ Enira natu, la hinau atu o pa vujangira. O retituetueni, ale o retitataholoira na nom suiha mata aulu. O sopo tinafihia vara tea i hitelehilehi na nom reti.

3

Mauri Tataholo

¹ O mele vere na tamlohi rasua vara la sile na ooloo isana tamlohi aulu peresi la haratu la lo tauri na suiha, ale vara la pa ooloo hinira, la tatamahu vara la vai na hina fuhu tarea. ² O vujangira vara la sopo veresatihi na tinapua, la vahafi na vasvas, ale la romfuhu, ale posira la vujangi na rommalum isana tamlohi tari, ³ matan tiroma moiso enfa sohera, fa rongorongono vono, fa lejileji, tamlohi la halufa, fa slev na masalo varama peresi na hinau fa opoira jea, fa lo usuri na posposi vaisatihi na tinapua peresi na posposi mereimerei moiso tamlohi la rohu hiniha, ale fa rohu hinira. ⁴ Pani na rani God nofa Jujuri mo vujangi na nona romfuhu peresi nona opoia isafa, ⁵ mo jurifa, pani mo sopo matan te posposi tataholo fa vaia, pani mata nona rompoia, mo jurifa na malele vora paro, ale mo hoje nafihii na nofa hehe, mo vaifa fa turu na mauri paro, la hinau sei mo vaira na suihan Tanume Tapu. ⁶ God mo sile purongoi na Tanume Tapu isafa hin Iesu Kristo nofa Jujuri, ⁷ matan vara fa pa efi mai natuna, ale matan vara fa levosahi mamahunia vara fa pa mauri jejeu, matan nona romfuhu mo vaifa fa tataholo na nahona.

⁸ Reti nike, ha efi rasua, ale na opoia vara o vere mamahuni la reti nike, matan vara la haratu la tau na nora rasua hin God la pa tatamahu vara la tau na romira vara la vai na sava mo fuhu. La reti nike, la fuhu mata tuetueni isana tamlohi tari. ⁹ Pani o vahafi na sorasora vono peresi na sorasora mata mahapira, ale o vahafi na vasvas peresi na vauriuri mata Leu, matan la sopo efi tueni tea, ale enira la sopo fuhu hin te hinau. ¹⁰ Isana tamlohi mo patumasa, o pa retifofoahai vaha rua, pani vara mo sopo tapurongo, o tipahia, ¹¹ o pa efi levosahi mamahunia vara tamlohi sohena, enia mo vahafi na retivarafuhu, mo hehe, mo hase tau na talai isana.

Isoiso Reti

¹² Titus, vara a fule Artemas teni Tychicus isam, na opoia vara o vaihitea vara o mai isaku Nicopolis matan enau a pa toho atu na taro hamariri. ¹³ O tueni Zenas tamlohi lelevosahi mata leu atu peresi Apollos na malelera, o silera na sava la opoia mata malelera. ¹⁴ Mo fuhu vara nofa tamlohi la levosahia vara la tau romira mata tueni na tinapua, isan la haratu la vejuveju, ale o vereea isara vara la sopo toho purongo.

¹⁵ Tamlohi tari nike peresiau, la sohai na retioloolo isam. O sile retioloolo sei isan la haratu la opoi kamam na rasua. Romŕuhu non God i toho isamim mo isoiso.

Philemon
Leta
Paul Mo Uliā Isan
Philemon
Leta Nike

Philemon enia tamlohi tadvavu matea, nona slev la lo kilau na nona ima tavera, ale kalesia matuvana la lo matavuhi ea (1.2). Korong mo lo toho Colossae, matan leta Paul mo ulia isana mara Colossae mo vere na hijan nona slev sei Onesimus (Col 4.9, 17).

Paul mo lo uliuli na ima rīlangi, mo uliuli matan Onesimus mo rovo na iman Philemon. Onesimus mo mai kalesia matea na rani mo tapai Paul, ale Paul mo uliuli isan Philemon vara i mele lavi Onesimus na imana sohena tapala matea hin Moli.

Hin leta nike

1. Retioloolo isan Philemon (1–3)
2. Paul mo vere Philemon hin Onesimus (4–22)
3. Isoiso retioloolo peresi na nona usiisi (23–25)

Tapulo Reti Isan Philemon

¹ Enau, Paul peresi voraiŕa Timothy nike, kama uli leta nike isan Philemon. Nike Rome, na lo toho na lolo ima rīlangi, mata noku vavahinau na lo vaia matan Kristo Iesu. Ale engko tapalamam, kama lo hiteho sohena voraimam matea na vavahinau non Moli. ² Ale leta nike, mo vano isan vevoraiŕa Apphia sohena, ale isan Archippus tamlohi vuro matea mata rasua sohemam hin Iesu, ale isana vao kalesia la lo matavuhi na imam. ³ Romŕuhu peresi na tamata non God Tamaŕa peresi Moli Iesu Kristo i pa toho isamim.

Opoia Rasua Non Philemon

⁴ Tarea na noku usiisi na lo vere meje isan noku God matam, ⁵ mata na rongoa vara nom rasua hin Moli Iesu peresi na nom opoia isan la haratu la tapuhi non God, mo rīlangi. ⁶ Enau na lo usiisi vara nom mauri rasua sei ko lo vujangia isana tamlohi rasua tinapua, i pa ulua, matan vara o pa levosahi mamahuni na hina ruhu matuvana na mauriŕa matan Kristo. ⁷ Voraiku, nom opoia mata tamlohi tinapua mo vaiiau na avulahi mo tavera jea, ale mo tahe na romiku matan ko lo tueni na rom tapuhi non God la mele rīlangi.

Paul Mo Usi Philemon Matan Onesimus

⁸⁻⁹ Ale matan ko opoi na tapuhi non God, enŕa rua ŕa levosahia vara i pa tataholo vara a vereho vara o vai na hinau tataholo purongo, pani na posposi opoia, na lo usiho vara o vai na hinau matea. Enau Paul na

vajiaha nake, ale na lo toho na ima rīlangi matan Kristo Iesu, ¹⁰ ale na lo retireti matan nom slev sei Onesimus, enia mo mai natuku na rani sei mo lo rohiau nike na ima rīlangi. ¹¹ Tiroma mo sopo ŕuhu matan te hinau hatea isam, pani nake mo ŕuhu isaŕa, enfa rua. ¹² Hina purongo vara na opoia mo tavera jea, na lo ŕulea vara i mele hilu mai isam. ¹³ Na pa lo opoia vara i lo toho pere-siau matan vara i lavi na jaram nike, vara i tueniau na noku rani rīlangi mata Retiŕuhu na ima rīlangi. ¹⁴ Pani na sopo opoia vara a vai te hinau ko sopo avulahi hinia, teni matan vara te hina ŕuhu o pa vaia, o pa vaia i usuri na masalom purongo, pani mo sopo matan na lo ngurunguru hinia. ¹⁵ Korong Onesimus mo rovo hiniho mata makomo rani purongo, matan vara i mele mai isam i pa toho jejeu, ¹⁶ pani nake, enia mo sopo slev purongo, pani mo jeu na slev, isaku enia vorai ruhuŕuhu matea, ale varaŕuhu enia i pa sohena isam, i pa mele hilu isam sohena tamlohi tuetueni matea, ale vorai matea hin Moli. ¹⁷ Ale vara ko lo romŕomia vara enŕa ŕa tapala, o mele lavi Onesimus i mai isam sohena ko laviau. ¹⁸ Vara Onesimus mo lejiho teni mo ave hin te hinau isam, enia i pa noku ave. ¹⁹ Enau Paul, na lo hase uliuli isam, na sopo halu, enau a pa voli na nona ave, ale a pa sopo mele vere a vara maurim enia noku, matan ko pa lavi na mauri paro mata Retiŕuhu isaku. ²⁰ Ale voraiku, mo ŕuhu vara, o pa vai te hina ŕuhu hatea isaku matan Moli, o vaiiau a avulahi, ²¹ na lo uliuli isam, na lo levosahia mo ŕuhu, vara o pa vai na sava na lo vere a. ²² Moiso, mele hinau matea, o tatamahuni te jaraku hatea, matan na lo romtoho vara a pa malue na ima rīlangi nike, a pa mele mai isam matan ko lo usiisi matana.

Isoiso Reti Non Paul Isan Philemon

²³ Epaphras enia soheku mo lo toho na ima rīlangi matan Kristo Iesu, enia mo sohahi na retioloolo isam. ²⁴ Ale, Mark, Aristarchus, Demas peresi Luke, la haratu la lo vavahinau peresiauh sohena, la sohahi na nora retioloolo isam, ²⁵ Ale romŕuhu non Moli Iesu Kristo i pa toho na mapumim mo isoiso.

Hebrews Leta Mo Vano Isana Tavitauin Israel Leta Nike

Leta nike, enia mo vano isana tavitauin Israel sei la tau nora rasua hin Iesu Kristo. Hija sei Hebrew enia hija atu Israel la hase tovira hasera hinia. Tatuara la lo romkaka vara la pa usuri Iesu teni vara la mele usuri na leu non Moses. Puku akerihi mo vujangia vara Iesu mo jeu na hinau tari sohena angelo, Moses, p̄ovet tari tuai, teni te p̄ris aulu tuai, vao p̄ris matan Israel. Ale enia mo mafivisi na hinau tari na Retitauhi Tuai (Old Testament). Mo vereva vara ena fa pa sopo romkaka na mauri rasua matan, Iesu enia nofa tovongi ruhu (Heb 12.2–3).

Hin puku nike

1. Natun God mo aulu jea (1.1–4)
2. Iesu mo jeu na angelo (1.5–2.18)
3. Iesu mo jeu Moses (3.1–4.13)
4. Iesu enia P̄ris Aulu (4.14–7.28)
5. Retitauhi ruhu mo mai (8.1–9.22)
6. Mo mate vahatea mata rani tari (9.23–10.31)
7. Tovongi ruhu mata rasua (11.1–40)
8. Tovongi ruhu non Iesu (12.1–13.19)
9. Isoiso usiisi (13.20–25)

Iesu Kristo Enia Natun God

¹ Tuai tiroma, God mo retireti vaha visa moiso, ale na malele matuvana isana nofa pua na nona p̄ovet, ² pani hin la pongi hitahu nike, enia mo pete retireti moiso isafa hin Natuna tataholo, God mo viromia vara hinau tari enira koruna, ale hinia sei God mo vai na varama. ³ Natuna enia sasarami meran God, ale enia tovongina tataholo fa efi hitea, ale enia suiha sei mo vai na hinau tari la lo toho na nona reti suiha. Ale hin rani atu mo isoiso na nona vavahinau mata vai fa fa vokevoke na hehe, mo sahe mo sakele na tavalu liman God mata suiha tavera jea aulu na tuka.

Kristo Enia Mo Jeu Na Angelo

⁴ Harihi mo vujangia vara Natun God enia mo aulu mo jeu na angelo, sohen hija atu sei God mo silea isana sei mo aulu jea na hijara. ⁵ Matan God mo sopo vereva isan te angelo na sava mo vereva isan Iesu sei mara: 'Engko natu, natuku.

Nahapani enau na mai Tamam.'

Psa 2.7

Ale God mo mele vereva mara,

'Enau a pa tamana,

ale enia i pa natuku.'

2 Sam 7.14

⁶ Ale hin rani atu mara mo lavi Natuna vora tiroma mo unu na varama mo vereva mara,

'Angelo tari la pa lotua!'

Deut 32.43

⁷ Ale mo retireti mata angelo mara, 'Mo vai na nona angelo la sohena langi, ale enira la volitusi purongo sei mo vaira na pepe hapu.'

Psa 104.4

⁸ Pani isan natuna mo vere na reti matea mo aulu jea matana mara,

'God, nom jara sakele mata suiha, enia i pa toho tui tui tarea.

Nom suiha mata Supe Aulu mo pala na hinau mo tataholo.

⁹ Engko ko opoi na sava mo tataholo, ale ko rohu na sava mo sasati.

Matan haratu God, enau nom God na viromiho,

na surei na wel mata noku avulahi isam mo jeu na angelo.'

Psa 45.6–7

¹⁰ Ale mo mele vereva mara,

'Moli, na tapulo vavahinau na varama, engko ko tau na pulon varama nike, ale tuka enira vua nom vavahinau.

¹¹ Hina purongo vara enira la pa tihai, pani engko o pa toho jejeu.

Enira la pa rovo sohena ruru tuai.

¹² O pa virivirira sohena tavalu ruru tuai, enira la pa posi,

pani engko o pa lo sohena tarea,

o pa sopo efi vajiaha.'

Psa 102.25–27

¹³ Ale God mo sopo retireti isana angelo sohen mo vereva isan Natuna mara, 'O sakele na jara suiha na matuaku vavano a vai na nom meresahi

la toho na ruhuruhi palom!'

Psa 110.1

¹⁴ Pani mo vereva mata angelo vara enira volitusi purongo sei mo lo rulara vara la lo matahi la haratu sei God i pa jurira.

2

Retiroa'oaahi Mata Vahari Hin God

¹ Matan haratu fa pa tapurongo mamahu na Retiruhu sei fa pete rongoa moiso matan vara fa pa sopo sale nafihini. ² Retisohai matan leu atu God mo lo silea na lima angelo isan Moses mata tamlohi enia mo lo varafuhu tarea, ale mo vai na tamlohi la lavi talai atu mo tataholo mata nora tope na leu peresi na nora lejileji. ³ Ra pa sopo efi rovo na talai tavera vara fa lo romfomi purongo na vavahinau God sei mo vaia mata i jurifa hinia. Retisohai mata jurifa sei Moli mo vereulia isana nona tamlohi usuri tiroma, moiso enira la pa vereulia isa fa. ⁴ God mo tueni na nora retisohai sei na matamata tatavera, peresi na hinau tamlohi la hutura hinira, peresi na hinau mafurahi tinatinapua peresi na otori sei Tanume Tapu mo asera usuri na masalona isana nona tamlohi.

Iesu Mo Mai Tamlohi

⁵ Matan sava kama lo vereulia nakerihi matan varama paro sei i pa mai, i pa sopo

toho na lima angelo. ⁶Matan hin te jara na Retitapu, tamlohi matea mo vereia isan God mara:

‘Tamlohi enia sava hinau
vara o lo romfomia,
ale Natun Tamlohi
vara o lo kilaua?’

⁷Matan ko vaia mo atano
mo jeu na angelo
mata makomo rani,
ale ko mele tahea aulu na hasohaso
tavaera
mata lavi na ooloo tavera.

⁸Ko tau na hinau tari na limana.’

Psa 8.4

Ale reti sei mo vereia vara mo aulu ‘na hinau tari’ mo faramia vara mo sopo te hinau hatea vara mo sopo toho na ruhuruhu limana, pani nakerihi fa sopo lo hitera vara la lo toho na ruhuruhu limana enira mo isoiso.

⁹Pani fa lo hite Iesu sei God, ‘mo vaia mo atano jea na angelo mata makomo rani’. Nake mo mele, ‘tahea aulu na hasohaso tavera mata lavi na ooloo tavera’ matan enia mo vano na mateia matafa, matan vara na romfuhu non God enia i pa lavi na mateia mata tamlohi tari. ¹⁰Matan mo tataholo vara God sei mo lo vai na hinau tari, ale hinau tari enira nona, mo tataholo mata i lavi na natuna matuvana la unu na hasohasona. Hin la rani rilangi atu Iesu mo lavira, God mo vaia mo tataholo mo ruhu mata tiroma na tamlohi, enia natu mo tataholo vara i jurira.

¹¹Ale nakerihi Iesu peresi la haratu mo vaira la tapu, enira Tamara matelete. Matan hinau atu natu, Iesu mo sopo mahanuhanu vara i toviira tasina teni vetasina, ¹²ale mo vereia isan God mara:

‘A pa vereulia vara hijam
mo ruhuruhu jea sohena sava
isana tasiku peresi na vetasiku.’

Psa 22.22

Ale mo mele vereia mara,
‘A pa hasohasoha na livuha vao nom tamlohi.’

¹³Mo mele vereia mara,
‘A pa rasu God!’

Isa 8.17

ale usuri haratu mara,
‘Enau nahai peresi la natuvarihi atu sei
God mo lo silera isaku.’ *Isa 8.18*

¹⁴Matan haratu, matan natuna la vora tamlohi, enia sohena mo mai tamlohi tataholo, matan vara na nona mateia i pa komo na suiha Tiapolo sei mo lo tauri na suiha mata mateia, ¹⁵ale i teri la haratu sei tarea la lo slev isana nora matahu mata mateia.

¹⁶Ra levosahi mamahunia vara Iesu mo sopo mai vara i tueni na angelo, pani matan vara i tueni na mahapin Abraham. ¹⁷Matan haratu, God mo vai Iesu mo mai sohefa

tasina peresi na vetasina na malele tari, matan vara i efi mai nofa Pris Aulu na romopoia, ale mo turu rilangi vara i vai na vavahinau isan God mata i voli nafihi na hehe nona tamlohi. ¹⁸Matan enia sohena mo lavi na rani rilangi na vaihite sei la lo mai isana tamlohi tari, ale nake enia i efi tueni na nofa vaihite.

3

Iesu Mo Aulu Mo Jeu Moses

¹Matan kamim ka vorai peresi na vevorai sei God mo tapuhifa matan na tuka, ha to romfomi Iesu, enia Vahafulu, ale Pris Aulu sei fa lo tau na nofa rasua hinia. ²Enia mo lo turu rilangi na hinau tari God mo vifonia matana, sohen Moses mo lo turu rilangi mata vao iman God. ³Matan mo tataholo vara Iesu i lavi na hasohaso tavera i jeu Moses, sohena tamlohi voro ima matea i pa lavi na hasohaso tavera i jeu ima atu mo lo voroa. ⁴Matan ima tari tamlohi matea mo vorora, pani God enia haratu sei mo voro na hinau tari.

⁵Moses mo turu rilangi na hinau tari God mo taua na limana vara i pa kilaura, pani enia volitusi matea purongo, ale sava mo lo vaira enira tovongi matea mata vujangi na hinau sei God i pa vuhesia hitahu. ⁶Pani Kristo mo lo turu rilangi jea na hinau tari God mo taua na limana vara i pa vaira, matan enia Natuna tataholo sei mo aulu na iman God. Ale enfa fa vao iman God, vara varafuhu vara fa lo turu rilangi na romfilangi peresi na nofa romtoho hin Kristo.

Mapu Tataholo Non God

⁷Matan hinau atu natu, Tanume Tapu mo vereia matana mara:

‘Nohorihhi vara ha rongo na leoku,
⁸ha sopo vai na mapumim i rilangi isaku
sohen Israel la lo vaia hin rani atu la
turuleji hiniaiu,

hin rani atu la lo vaihite na noku
romperavu na tano koru.

⁹Hin jara atu tamamim la vaivaiau la vaihiteau,

hina purongo vara la lo hite
na noku hinau marurahi tavera
mata tauni mo ngavulu vati moiso (40).

¹⁰Ale matana na lolokoru hinira, ale na vereia nara:

Tarea mapura mo lo kaka,
ale la sopo levosahi na masaloku.

¹¹Ale na noku lolokoru tavera mata nora hehe,

na vai na retitauhi matea nara:
La pa sopo efi unu na noku mapu hin te rani.’ *Psa 95.7-11*

¹²Ale matana, la vorai peresi na vevorai ruhuruhu, ha lo kilau mamahu vara te

vonamim i sopo lavi te řomřomi sati mata vai na mapuna i sopo mele rasu God sei mo mauri. ¹³ Pani ha retituetueni kamim hatehateahi na rani hatehateahi tari sei řa lo tovara 'nohorih'i, matan vara i pa sopo tea isamim i jovi na hehe, ale mapuna i mai i řilangi isan God. ¹⁴ Matan řa mai řa tapala peresi Kristo na nona vavahinau, vara vararuhu řa lo turu řilangi hin nořa rasua atu tiroma i tikeli na isoisona. ¹⁵ Pani ha sopo řomaliho hin retiřořoahai nike hin te rani:

'Ha tapurongo na sava mo lo vereea nakerih-i!

Ha sopo vai na mapumim i řilangi isan
God sohen Israel mo vaia hin rani atu
la turuleji

hinia na jara tano koru.' *Psa 95.7-8*

¹⁶ Ale la tamlohi atu sei la lo turuleji hin God enira hare, hina purongo vara la rongo na leona? Enjora, enira pa la tamlohi atu sei Moses mo tiroma hinira la malue Egypt. ¹⁷ Ale hare natu mo vai God mo lolokoru mata tauni mo ngavulu vati? Enjora, enira pa la tamlohi atu sei la lo hehe ale la mate na tano koru. ¹⁸ Ale God mo retitauhi isan hare natu vara la pa sopo eři unu na nona mapu hin te rani? Mo lo retireti isan la haratu la sopo oloolo hinia. ¹⁹ Ale matana, řa levosahia vara la sopo eři unu na nona mapu matan la sopo rasua.

4

Mapu Nona Tamlohi Non God

¹ Matan haratu, řa lo kilau mamahu i fuhu matan, vara i vono, ha pa sopo eři lavi na vua nona retitauhi mata nona mapu sei mo lo turu. ² Matan la retivujavujangi na Retiřuhu isařa sohen la vaia isan Israel tiroma moiso. Pani retisohai atu sei la rongo mo sopo tuenira matan la sopo lavi na vuana peresi la haratu la rasu na sava la lo rongora. ³ Matan enřa purongo sei řa rasua řa lo toho na nona mapu. Pani isan la haratu la sopo rasua, God mo vereea mara, 'Matan na noku lolokoru tavera na vere na retitauhi matea nara:

La pa sopo eři unu na noku mapu!'

Psa 95.11

Hina purongo vara nona mapu mo tatamahunia moiso mo tapulo hin rani atu mo pa vai na varama. ⁴ Ra levosahia vara mo tatamahu moiso matan Retitapu mo retireti na halimaravrua rani sohen harihi vara, 'Ale God mo mapu na halimaravrua rani na nona vavahinau tari'. *Gen 2.2*

⁵ Pani hin pa reti atu tiroma sei God mo lo vereea mara, 'La pa sopo eři unu na noku mapu'.

Psa 95.11

⁶ Matan haratu mapu non God atu enia mo lo turu vara tamlohi la unu hinia. Pani

la haratu la lo rongo na Retiřuhu tiroma la sopo unu hinia matan la sopo oloolo. ⁷ Ale matana, God mo mele tau na rani tinapua matea mata unu na nona mapu, ale rani atu enia nakerih-i. God mo mele vere rani mapu tinapua atu na sava David mo vereea hin rani atu hitahu hin reti atu na vereea isamim moiso sei nara:

'Ha tapurongo nakerih-i na sava mo lo vereea.

Ha sopo vai na mapumim i řilangi isan
God.'

Psa 95.7-8

⁸ Mapu paro nike la sopo lo lavia hin rani atu sei Joshua mo tiromara la lo toho Canaan, matan God mo pa vere nona mapu paro nike hitahu. ⁹ Ale matana, rani mapu tataholo matea mata tamlohi non God mo lo turu. ¹⁰ Matan tamlohi tari sei la unu hin Sabbath nike sei rani mapu non God atu, la pa mapu na nora vavahinau sohen God mo vaia na nona vavahinau. ¹¹ Ale matana, řa vaihitea vara řa unu hin mapu atu. Matan vara tea i usuri na tovongi mata lejileji atu nona tavitavin Israel tuai, i pa jovi sohera.

¹² Matan reti non God mo lo mauri, ale enia mo suiha. Enia mo voro mo jeu te sita vuro tavalu rua, mo unu na lolofa mo ase na řomiřa na masalořa, mo ariřa ale mo vujangifā vara enřa řa sava tamlohi. ¹³ Mo sopo te hina mauri hatea i eři luhu hin God. Enia mo lo hite na hinau tari. Ale enřa mo isoiso řa pa turu na nahona, ale řa pa vereuli na sava řa lo vaira isana.

Kristo Enia Nořa Pŕis Aulu

¹⁴ Matana, řa lo taurilati na nořa rasua hin nořa pŕis aulu sei Iesu, Natun God sei mo sahe na tuka moiso. ¹⁵ Matan nořa pŕis aulu nike mo levosahi na nořa vejuveju, ale na varama enia mo lavi na vaihite tari sei řa lo lavira, pani mo sopo hehe. ¹⁶ Matan haratu, řa řomřilangi mata mai na nahu jara sakele non nořa God fuhuřuhu jea. Atu řa pa lavi na nona řomopoia, ale i pa tuenifā usuri na nona řomřuhu mata nořa vejuveju na maurifā.

5

¹ Matan pŕis aulu tari la viřonira na vao tamlohi matan vara la pa turu na nahon God mata tamlohi, enia i pa lo sile na nora silesile isan God, peresi na malamalai mata hehe. ² Enia i eři řomopoia la haratu la sopo lelevosahi teni la jalio na retivararuhu, matan enia sohena mo sohera. ³ Ale matan haratu, enia i pa sile na silesile mata hehe nona tamlohi peresi na nona hehe. ⁴ Ale tea i sopo eři mai pŕis aulu matea usuri na masalona hasena, pani vara God mo tovia purongo sohen mo tovi Aaron tuai. ⁵ Ale Kristo sohena, mo sopo hase tahea aulu vara i mai Pŕis Aulu, pani God natu mo

tahea aulu, sohen reti nike sei mo lo vereea isana mara,

‘Engko natuku,

nahapani na mai Tamam.’ *Psa 2.7*

⁶ Ale na jara tinapua matea na Retiulia God mo mele vereea isana mara,

‘Engko p̄ris matea usuri na pin

Melchizedek sei i pa toho jejeu.’

Psa 110.4

⁷ Hin rani atu K̄risto mo pa lo toho na varama, mo lo sohāi na usiusi peresi na tangi tavera, ale wai matana la lo jovi, ale nona usiusi mo sahe isan haratu sei i efi juria na mateia. Ale God mo lo rongoa matan K̄risto mo tau na fomina mata lotua na ooloo. ⁸ Hina purongo vara enia natun God, enia mo pa levosahi na ooloo na malele rani rilangi. ⁹ Ale hin malele sei God mo vaitataholoia mo mai P̄ris Aulu matea, ale mo mai pulon juri atu mata rani tui tui isana nona tamlohi tari sei la lo ooloo hinia. ¹⁰ Ale God mo taua vara i P̄ris Aulu usuri na pin Melchizedek.

Ha Ulua Na Mauri Rasua

¹¹ Hināu mo marivi mo pa lo toho sei kama opoia vara kama mele vereulira, pani kama hitea vara peromim la sopo rongo, ale mo rilangi vara kama efi vai kamim ha lelevosahi. ¹² Kamim ka kalesia mo tuai moiso, ale i pa tataholo vara kamim ha lo vujangi na tinapua moiso, pani kama hitea vara kama lo mele vujangi kamim sohen la haratu la pa tapulo purongo na levosahi mata Retitapu. Ka mele sivo leji ka opoi na wai susu, mo sopo hanhāni rilangi. ¹³ Matan tamlohi tari sei la lo mauri na wai susu, la sopo lo levosahi na vujangi mata posposi tataholo matan enira la pa lo pipi. ¹⁴ Pani hanhāni rilangi enia hani la haratu la jea sei la lo hasera vujangira vara la efi hitevosahi na sava mo tataholo ale sava mo sasati.

6

¹ Matana haratu, ʔa ulua i jeu vujangi atu ʔa lavia na noʔa mai paroparo na tapulo mauri rasua, ale ʔa vano ʔa jea, mo sopo matan vara ʔa pa mele vano na vujangi mata posi na vaivai vono, teni mata tau na rasua hin God, ² teni na vujangi mata paptijo, teni tau na limaʔa mata usiusi na tamlohi, teni mata sauteterahi nona mate, ale mata ariā tavera non God. ³ Ale vara na masalon God, ʔa pa mele ulua ʔa vano na lelevosahi mata hināu tinatinapua.

⁴ Matan mo sopo mele te malele tinapua hatea vara tea i efi mele posi na nona hehe hinia, la haratu sei tiroma moiso la lavi na levosahi hin God, teni la hatiforo na otori fuhu sei God mo lo silera, teni la tapala peresi na Tanume Tapu moiso, ⁵ ale

la hatiforo moiso na reti fuhu non God peresi na hināu maruraahi matan pongi atu mo lo mai, ⁶ ale na isoisona la vahāri hin God. Mo sopo te malele hatea isara vara la efi mele posi na nora hehe, matan la lo mele vosae Natun God na talopeilopei na nora tipahia, ale la lo vaia na naho tamlohi.

⁷ Ha lo levosahi harihi: vara lepa sei mo lo himi na wai usa mo lo jovi hinia, mo sile na vuana fuhu isan tamlohi isa matea, lepa atu mo lavi na lefuhu isan God. ⁸ Pani vara lepa atu mo vua na pahai ngāngāriha teni piko, mo sopo fuhu matan te hināu, ale tamlohi isa atu i pa rohu hin isa atu ale i pa sulia.

⁹ Pani isamim la tapala fuhuruahu, hina purongo vara ʔa lo retireti sohen harihi, kama sopo rasua vara reti sei mo lo pisuhi kamim sohen lepa sati atu. Kama levosahia vara kamim ka lo toho mata hina fuhuruahu sei la lo mai peresi na nomim juri. ¹⁰ Matan God mo sopo tametame tea. I pa sopo romaliho sohena sava ka lo voko rilangi nona, ale sohena sava ka lo vujangi na nomim opoia isana na nomim kilau fuhu na kalesia tinapua, sohen ka pa lo vaia nake. ¹¹ Kama opoia mo tavera vara ha lo opoi na tinapua i tikeli na isoiso maurimim, matan vara sava ka lo romtoho hinia i pa masese nomim. ¹² Ale kama sopo opoia vara romimim la mate, pani ha pa usuri na tovongi non la haratu sei la pa lavi na retitauhi non God mata nora rasua peresi na nora romperavu.

Romtoho Mo Tai Na Retitauhi Non God

¹³ Sohen rani atu God mo retitauhi isan Abraham, God mo retitauhi na hijana purongo matan mo sopo te hija tinapua vara i mele ulua jea hinia mara:

¹⁴ ‘Varafuhu a pa leruhu hinihi i tavera jea, ale a pa vai na mahapim la marivi savulevule.’

Gen 22.17

¹⁵ Ale Abraham mo lo sasaovi peresi na romperavu, ale mo lavi na sava God mo retitauhi hinia.

¹⁶ Vara tamlohi la vai na retitauhi matea, la pa vereea na hijan tea sei mo mele aulu jea hinira, hija atu mo lihora vano hin retitauhi atu mo sopo te retiusia hinia vara i pa turu teni i vono. ¹⁷ God sohena, mo lihoa na retitauhi matea matan vara la haratu sei la lavi retitauhi atu la pa levosahi mamahunia vara i pa sopo efi posi na fomina. ¹⁸ Ale God mo sileʔa na nona retitauhi ale mo tau na hijana hinia. La hināu atu mo rua la sopo efi posi matan God enia i sopo efi halu. Matan haratu, enʔa sei ʔa rovo vano isana mata luhu, ʔa efi mele lavi na romrilangi paro, matan ʔa efi taurilati na nona retitauhi mata noʔa rasua hinia.

¹⁹ Noŋa rasua hin retitauhi nike mo sohena matalalavo matea sei mo puhoni ale ŋa efi rasua mata mauriŋa. Rasua nike natu mo vaiŋa ŋa efi unu hin jara tapu sei non God na tuka. ²⁰ Iesu mo pete unu atu tiroma moiso mataŋa. Enia mo mai noŋa Pŋis Aulu matan tui tui usuri na pin Melchizedek.

7

Melchizedek Peresi Abraham

¹ Melchizedek nike enia supe mata taon tavera matan Salem, ale enia Pŋis Aulu non God sei mo aulu jea. Hin rani atu Abraham mo lo mele mule na vuro tavera matea mo vaia peresi na supe matuvana, ale matan mo jeua, Melchizedek mo malue mo vano vara i tapaia ale mo leŋuhu hinia. ² Ale Abraham mo sile na sangavulu hinu tari sei mo lavira na vuro isan Melchizedek. Rarami hijana enia 'Supe Mata Ari Tataholo'. Ale enia sohena mo supe mata tamata matan ŋaramin Salem enia 'tamata'. ³ Tea mo sopo levosahi tamana teni tinana teni te tahisana, mo sopo te tapulo teni isoiso maurina. Enia mo lo toho jejeu sohena pŋis matea, mo sohen Natun God.

Melchizedek Mo Aulu Hin Abraham

⁴ Ha to romŋomia vara Melchizedek mo aulu sohena sava, matan Abraham hina purongo vara enia mo pulo vaon Israel, mo hitevosahia sohena sava Melchizedek mo mele aulu hinia, ale Abraham mo silea na sangavulu hinahinau sei mo lavira na vuro isan Melchizedek. ⁵ Ale pŋis matan Israel la tai na vaon Levi, Leu non Moses mo retileu vara la pa lavi na sangavulu hinu isana tahisara, hina purongo vara la mahapin Abraham sohera. ⁶ Pani Melchizedek, hina purongo mo sopo tahisan Levi, mo lavi na sangavulu hinahinau isan Abraham. Ale Melchizedek mo tau na leŋuhu matea isan Abraham, Abraham mo pete lavi na retitauhi isan God moiso. ⁷ Ale mo sopo te retiusia hatea vara hare mo mele aulu: haratu mo lo sile na leŋuhu enia mo aulu mo jeu haratu mo lo lavi na leŋuhu.

⁸ Ra levosahia vara tamlohi la lo sile na sangavulu hinahinau isana pŋis nona tavitauhin Israel sei la tamlohi purongo ale la pa mate hin te pongi. Pani Melchizedek mo mele aulu mo jeura matan ŋa rasua vara mo pa lo mauri. ⁹ Ale aulu hin haratu ŋa efi vereva vara mahapin Levi, la haratu sei la lo lavi na sangavulu hinahinau, la lo sile na sangavulu nora hinahinau isan Melchizedek hin nora pua Abraham. ¹⁰ Hina purongo vara Levi mo sopo lo vora hin rani atu, enia mo lo toho na epen Abraham moiso hin rani atu sei Melchizedek mo lo lavi na sangavulu hinahinau isan Abraham.

Kristo Mo Sohen Melchizedek Tuai

¹¹ Ale vara pŋis na vaon Levi la efi vai vevuhi na masalon God, ale enira la pŋis usuri na leu, mata sava natu God mo mele sohai na pŋis tinapua matea mo sohen Melchizedek, ale mo sopo lavia isana mahapin Levi sohen Aaron sei tasin Moses?

¹² Ale vara la haratu la lo tauri na vavahinau nona pŋis la sopo mele tauria matan God mo mele viŋoni na tinapua, leu sohena i pa posi matan vara i majinga hinia. ¹³ Matan haratu sei ŋa lo retireti hinia, enia mo malue na tavitavui tinapua matea, mo sopo isan Levi sei la lo volitusi na votavota na lolo Temple.

Kristo Enia Pŋis Aulu

¹⁴ Ale mo memera vara noŋa Moli Iesu enia tavitavuin Judah matea, pani ŋa levosahia vara Moses mo sopo vereva vara te tavitavuin Judah matea i efi mai pŋis matea.

¹⁵ Ale nakerihi mo memera vara Kristo enia natu pŋis tinapua atu i pa pala mo sohen Melchizedek. ¹⁶ Mo mai pŋis matea mo sopo tai na tavitavuin Levi usuri na Leu, pani mo usuri na suihan mauri atu non God sei i pa sopo efi mate hin te rani. ¹⁷ Ale David sei mo lo uli na psalm mo pisuhia hin rani atu God mo lo retireti hin Kristo mara, 'Engko o pa pŋis matea tui tui, sohen Melchizedek.' *Psa 110.4*

¹⁸ Enjora, leu atu matan tuai mata pŋis, God mo tau pahipahia matan i sopo efi mele vai te hinu matan mo sopo mele ŋuhu matan te hinu hatelete. ¹⁹ Matan leu mo sopo efi vai tea i mai i tataholo na nahon God, ale nake romtoho matea mo mele ŋuhu jea mo pete lavi na jarana moiso, matan hin Kristo ŋa efi mai mariviti isan God.

²⁰ God mo retitauhi na hijana hasena vara Kristo i pa pŋis jejeu, pani mo sopo vereva isan te pŋis tinapua. ²¹ Pani isan Iesu hasena purongo God mo vereva mara, 'Moli God mo vai na retitauhi matea na hijana hasena, ale i pa sopo efi tope na nona retitauhi nike:

Engko o pa pŋis matea matan tui tui.'

Psa 110.4

²² Matan God mo vai retitauhi atu na hijana hasena, ale matan Iesu mo lo toho hinia, retitauhi ŋuhu nike mo mele ŋuhu mo jeu retitauhi tuai atu mata Leu, matan i pa vai na sava God mo taua matana.

²³ Ale mele hinu tinapua matea hin hinu nike, enia vara tuai pŋis mo marivi, ale vara matea mo mate nona vavahinau mo hilu atu, ale tinapua i pa mele lavi na jarana. ²⁴ Pani Iesu i pa lo toho sohena pŋis jejeu; matan nona vavahinau mata pŋis i pa sopo isoiso hin te rani. ²⁵ Matan haratu enia i efi juri na tamlohi tari sei la lo mai isan

God mo vaia vahatelete purongo matan tui tui. Enia mo lo mauri jejeu matan vara i pa lo turu na nahon God mata i usiusi matara.

²⁶ Iesu enia Pŕis Aulu tataholo sei ƒa opoia matan enia mo tapu ale tea i sopo eƕi tuvaia hin te hinau, mo sopo te hehe isana. Nake God mo tauhasehia isana tamlohi hehe, ale mo silea na jara aulu mata oloolo mo jeu na tinapua na tuka. ²⁷ Ale enia i pa sopo sile na malamalai na rani hatehateahi sohena pŕis aulu tinapua la lo vaia. Enira la vaia mata nora hehe tiroma moiso la pa vaia mata hehe nona tamlohi tinapua. Pani Iesu mo vaia vahatelete purongo matan tui hin rani sei mo hasena silea sohena malamalai na talopeilopei. ²⁸ La haratu la lo pŕis aulu na ruhuruhu leu non Moses, la sopo eƕi vai na tatua hinau tinapua, matan enira la tamlohi purongo. Pani hitahu hin rani atu haratu sei God mo sile na leu, God mo viƕoni Natuna na retitauhi na hijana hasena, ale God mo vai natuna mo tataholo tui tui.

8

Kŕisto Enia Noŕa Pŕis Aulu

¹ Ale ƕomƕomi tavera kama lo vereea enia nahai:

Noŕa Pŕis Aulu mo sakele na jara aulu mata oloolo mo jeu na tinapua na tuka na tavalu liman God. ² Hin jara atu noŕa Pŕis Aulu Iesu mo lo vavahinau na lolo jara tapu sei Tabernacle varaŕuhu na tuka God sei mo voroa, mo sopo tamlohi.

³ Ale matan pŕis aulu tari la lo sile na sile-silea peresi na malamalai isan God, matan haratu mo tataholo vara noŕa Pŕis Aulu sohera i pa sile te hinau sohera. ⁴ Vara enia i pa lo toho hin varama nike, i pa sopo pŕis matea, matan pŕis la pete toho moiso mata sile na silesilea sei leu non Moses mo vereea. ⁵ La lo volitusi na tent sei la tovia Tabernacle nike na varama, ale enia tovongin haratu na tuka purongo, hina varaŕuhu mo lo toho na tuka. Matan hin rani atu Moses mo tatamahu vara i voro Tabernacle atu, God mo sile retiŕoŕoahai nike isan Moses mara, ‘O lo kilau mamahunia vara ko lo voroa, o voroa usuri tovongŕi atu na vujangia isam nike na vutivuti’.

Exo 25.40; 26.30

⁶ Pani noŕa Pŕis Aulu mo lavi na vavahinau matea mo aulu mo jeu la haratu la lo volitusi usuri na leu tuai. Ale matan enia natu mo lo toho hinia, retitauhi sei God mo silea mo mele ƕuhu jea matan mo turu na retitauhi ƕuhu mo jeu la haratu mo lo silera tiroma.

⁷ Ra levosahia vara retitauhi atu tiroma usuri na leu mo sopo ƕuhu, matan God mo mele vai na harua retitauhi tinapua matea vara i lavi na jarana. ⁸ God hasena mo hitea

vara tiroma retitauhi atu mo sopo ƕuhu hin haratu mo vereea akerihi mara: ‘Rani matea i pa mai, Moli God mo lo vereea vara:

A pa vai na retitauhi paro matea peresi na tavgavuŕin Israel peresi la haratu Judah.

⁹ Retitauhi paro nike i pa sopo sohen haratu na vaia tiroma peresi na nomŕin pua hin rani atu na lo tauri na limara ale na tiroma hinira la malue Egypt. La sopo usuri tataholoŕi na noku retitauhi ale na vahafi hinira, Moli God mo vereea.

¹⁰ Pani matan harihi natu, a pa vai na retitauhi paro sei peresi na tavgavuŕin Israel hin rani atu mo lo mai, enau Moli God na vereea nara:

A pa tau na noku leu na fomira, matan vara la eƕi rongovosahira, ale a pa ulira na mapura, matan vara la eƕi oloolo hinira.

Enau a pa nora God, ale la pa noku tamlohi.

¹¹ Ale la pa sopo mele vujangi na tavgavuira tinapua

teni na voraira hatehateahi lara, ‘Ha levosahi Moli God!’

Matan tamlohi tari, mo tapulo na tamlohi purongo mo tikeli na tamlohi aulu, enira mo isoiso la pa levosahiau.

¹² Ale a pa ƕomi na nora hehe, ale a pa sopo mele ƕomƕomi na nora hehe.’ *Jer 31.31–34*

¹³ Ale hin rani atu God mo retireti hin retitauhi paro nike, mo ƕaramia vara retitauhi tuai atu mo vaia tiroma mo pete isoiso moiso. Enia mo pete vajiaha moiso ale mariviti i tihai.

9

Posposi Lotu Tuai Nona Jew

¹ Ale hin retitauhi atu tiroma God mo vaia peresi Israel, mo tau na riteileu mata lotu peresi na nona tent tapu mata lotu matea na varama. ² Vara la turuhi tent atu, la pa viliroto na jara mo rua na lolon tent atu. Na tiroma jara, peri lamu matea, ale tep matea sei la lo tau na pereti tapu hinia. Tiroma jara nike la tovia Jara Tapu. ³ Ale tavalu ruru matea mo kehohoro na harua jara sei la tovia Jara Tapu Jea. ⁴ Hin jara atu, la tau na votavota mata suli na hasori matea la vaia na gold, peresi na puhoro matea la evea na gold la tovia ‘Puhoro Mata Retitauhi’. Ale na lolon puhoro atu, potele matea la vaia na gold, manna mo lo toho na lolona, tihonin Aaron sei mo lo juliha, peresi la vatu atu Moses mo lo uli la riteileu atu mo sangavulu hinira. ⁵ La vai na tovongi

angelo mo rua na gold la tovara cherubim na pusan puhoro atu. La firahi na hapara vara la tavuni na pusan puhoro atu, jara tataholo atu natu prīs aulu mo lo turusi na rae mata malamalai hinia. Pani nakerihi kama sopo efi vereuli vevuhi la hinau nike.

⁶Vara la tau mamahuni la hinau atu mata lotu moiso, prīs la efi tapulo unu ale la lo malue mata vai na nora vavahinau hin Jara Tapu atu. ⁷Pani prīs aulu hasena i efi unu hin jara atu mo tapu jea, ale vahatelete purongo na tauni matea, ale tarea peresi na rae sei mo lo silea isan God matan vara i tavuni na nona hehe peresi na hehe nona tamlohi tinapua sei la lo vaira pani la sopo levosahira. ⁸Tanume Tapu mo vaia mo memera isaʻa nake vara malele atu sei God mo lo tināhiia vara tamlohi purongo la efi mai mariviti isana hin jara atu sei mo tapu jea mo sopo lo pala hin rani atu tent atu mo lo turu.

⁹Hinai nike enia tovongi matea mo lo pisuhi rani nike nahapani. Matan la otori atu peresi na malamalai sei prīs la lo silera, la sopo efi vai na fomi tamlohi sei la lo lavira la mai mata lotua la vokevoke. ¹⁰Matan retileu matan tuai usuri na leu, enia mata hanhāni peresi na wai, ale hoje na hinai tinatinapua peresi la hinai sei tamlohi la lo vaira na limara purongo, enira la lo toho vavano malele paro mata mai mariviti isan God mo pala.

Kristo Enia Malamalai Tataholo

¹¹Pani nakerihi Kristo mo mai Prīs Aulu mo aulu na hinahinau ruhu tari sei la mai moiso, ale mo unu hin Jara Tapu atu na tuka sei mo tataholo jea, hara sei lima tamlohi la sopo vaia, mo sopo sopesopen varama nike, ¹²ale mo unu hin Jara Tapu Jea atu vahatea mata rani tari, pani mo sopo unu peresi na rae nani teni natu buluk, pani mo unu peresi na faena hasena. Ale na faena mo vai tataholoi na malele mata noʻa juri matan tui tui.

¹³Matan vara posposi tuai mata turusi na rae nani peresi na rae buluk peresi na patmakovi mata natu buluk mo efi vai na epe tamlohi la vokevoke mata nora posposi mata tope na leu sei mo vaira la lumiha, ¹⁴ale ha to fomfomia sohena sava faen Kristo i efi onehi na mapufa na noʻa rasua na noʻa vavahinau purongo, matan vara i vaira fa efi lotu God sei mo mauri usuri na masalona. Kristo na suiha Tanumen God sei mata tui tui, mo hasena silea isan God sohena malamalai tataholo matea mata hehe. ¹⁵Ale matan haratu, enia natu mo vai na malele matan vara retitauhi paro atu i efi mai, matan vara la haratu sei God mo lo tovara la efi lavi na koruna sei la sopo efi tihai God mo retitauhi hinira. Matan Kristo

mo mate vara i vaira la materi na talai mata hehe sei la vaira na ruhuruhun retitauhi atu tiroma.

Matea Non Iesu Mo Vai Na Retitauhi Paro Mo Mauri

¹⁶Ale vara tea mo sile na nona reti matan te koruna ale hitahu i pa mate, i pa sopo tea i efi lavi te koruna i tikeli rani atu la levosahia mo ruhu vara mo mate. ¹⁷Nona reti atu mata koruna i pa lo turu i tikeli rani atu tamlohi atu mo lo ulia mo mate. Vara mo pa lo mauri, tea i sopo efi lavi te koruna sei mo retitauhi hinia isara.

¹⁸Matan hinai atu natu, retitauhi atu tuai mo tapulo peresi na rae. ¹⁹Matan Moses mara mo sile na retileu isana tamlohi tari usuri na hinai tari na leu, mo lavi na rae natu buluk peresi na nani, ale vai peresi na vulu sipsip hahara peresi na bras rihirihī matea la vaia na ranga hyssop vipahai matea, ale mo turusi na puku leu peresi na tamlohi tari na rae, ²⁰ale mo lo vereea mara, ‘Harihi enia rae mata retitauhi sei God mo retileu hinia vara ha lo turu hinia’. *Exo 24.8* ²¹Ale hin malele atu purongo mo turusi na tent peresi na hinai tari sei la lo vavahinau peresira mata lotu God. ²²Vararuhu, ra efi vereea usuri na leu non Moses, mariviti hinai tari la mai la vokevoke na malele turusi na rae, ale God i pa sopo fomi na hehe vara rae i sopo roro.

²³Ale la hinai atu la lo masese na lolo tent, la lo tovongi na hinai na tuka, ale prīs mo vaira la vokevoke na rae maji purongo. Pani hinai atu na tuka, God mo vaira la vokevoke na malamalai ruhu ruhu jea matea, mo jeu na rae maji.

²⁴Matan Kristo mo unu na tuka tataholo vara i turu na nahon God sohena noʻa tuetuēni. Enia mo sopo unu na tent mata lotu nona tamlohi varama matan haratu na varama enia tovongi matea hin Temple atu na tuka. ²⁵Mo sopo unu na tuka matan vara i mele hasena silea tarea sohena prīs aulu matea mo lo vaia hin rani atu mo lo unu na Jara Tapu Jea na tent hin varama nike na tauni hatehateahi vara i lo sile na rae maji. ²⁶Vara i sohena Kristo i pa lo mate vaha visa, i tapulo hin rani atu varama mo tapulo, pani mo vono. Mo mai vahatea mata rani tari hin rani hitahu nike vara i lavi narihi na suiha hehe jejeu na nona malamalai sei mo mate matafa.

²⁷Ale God mo taua vara tamlohi hatehateahi la pa mate vahatea, ale hitahuna la pa turu na aria, ²⁸ale mo sohena purongo, Kristo mo mate vahatelete purongo sohena malamalai matea mata lavi narihi na hehe nona tamlohi matuvana. I pa mele mai, pani mo sopo mata noʻa hehe. Hin rani atu

i pa lavi na juri non la haratu sei la lo kilau matana.

10

Malamalai Non Křisto

¹ Posposi tuai mata leu non Moses enia fofoa hinau purongo mata hinau ruhu sei la pa mai, hina varaŕuhu sei Křisto mo vaia matafa. Malamalai na posposi tuai mata leu, la lo vaia tarea na tauni hatehateahi, la sopo eri vai la haratu sei la lo mai mata lotu vara la vokevoke vevuhi. ² Vara la pa lo efi vai na tamlohi la vokevoke vevuhi, malamalai korong mo isoiso moiso. Matan la haratu la lo lotu la pa vokevoke vahatea mata rani tari, ale puhoni nora hehe mo pete tihai isara moiso. ³ Pani la malamalai atu la lo vai na tamlohi la lo mele romromi na nora hehe na tauni hatehateahi. ⁴ Matan ŕae buluk peresi na ŕae nani la sopo eri lavi nafihi na hehe. ⁵ Matan hinau atu, na rani Křisto mo sinai na varama mo vereea isan God mara,

‘Ko sopo opoi na malamalai
la lo vaia na maji teni na hanhani.
Pani ko sileau na epe matea
vara a mai nom malamalai tataholo.

⁶ Varaŕuhu ko sopo avulahi
na maji la lo sulira na votavota
teni na silesile mata hehe.

⁷ Ale na mele vereea nara:
Ko hiteau, enau nahai na sinai
vara a vai na masalom God
vara a usuri na sava la ulia moiso
na Retitapu matakau.’

Psa 40.6–8
⁸ Sohen Křisto mo vereea moiso mara, ‘Ko sopo opoi na malamalai la vaira na maji teni na hanhani teni na maji la sulira na votavota teni te silesile tinapua mata hehe, ko sopo avulahi hinira.’

(Ko hitea, Iesu mo lo vereea sohen harihi, hina purongo vara leu non Moses mo vereea vara tamlohi la pa vaira.)

⁹ Ale Křisto mo mele vereea mara, ‘Ko hitea, enau na lo mai vara a vai na masalom.’ Iesu mo vai na retitauhi matan tiroma vara i isoiso matan vara harua retitauhi niki i eri turu. ¹⁰ Ale usuri na masalom God enia mo vaifa ŕa tapu na malamalai mata epen Iesu Křisto vahatea mata rani tari.

¹¹ Usuri na retitauhi tuai, pŕis la turu na naho votavota na rani hatehateahi mata sile na malamalai sei la sopo eri lavi nafihi te hehe hin te rani. ¹² Pani nofa Pŕis Aulu mo hasena silea isan God sohena malamalai matea mata hehe sei mo ruhu mata rani tari. Ale nake mo lo sakele na jara ooloo tavera mo aulu mo jeu na tinapua na tavalu liman God. ¹³ I pa lo sasaovi atu vavano i tikeli rani atu God i vai na nona meresahi la toho na ruhuruhu palona.

¹⁴ Matan hin silesile atu matelete purongo, Křisto mo vai tataholoi na nona tamlohi sei mo lo vaira la tapu mata rani tui tui. ¹⁵ Ale Tanume Tapu sohena mo vereulia vara enia mo sohena; matan mo lo vereea na reti non Jeremia mara,

¹⁶ ‘Moli God mo vereea mara: Retitauhi paro akerihi natu,
a pa mele vaia peresi na noku tamlohi hin rani atu.

A pa tau na noku leu na mapura,
matan vara la pa levosahira,
ale a pa ulira na romira, matan vara la pa
eri ooloo hinira.’ *Jer 31.33*

¹⁷ Ale mo mele vereea mara,
‘A pa sopo mele romromi na nora hehe
peresi na nora tope na leu.’ *Jer 31.34*

¹⁸ Ale vara God mo romi na hehe moiso, mata sava natu tea mo opoia vai i mele sile te malamalai mata hehe?

Ra Turu Rilangi Hin Křisto

¹⁹ Ale la vorai peresi na vevorai ruhuruhu, nake romifa i efi rilangi mata unu hin Jara Tapu Jea atu na tuka mata ŕaen Iesu. ²⁰ Mateia non Křisto mo vai na malele paro sei mo lo sile na mauri, ale mo roia vara fa efi jeu tavalu ruru tapu atu fa mai mariviti isan God.

²¹ Ale matan Iesu nofa Pŕis Aulu jea mo lo kilau na iman God, ²² mo ruhu vara ŕa mai mariviti isan God, romifa i sopo romkaka, nofa rasua i rilangi, matan nofa romfomi sasati God mo turusira moiso na ŕaen Křisto, matan vara i vai na romifa la vokevoke, ale mo paptijo na epefa na wai niro.

²³ Ha sopo romkaka, pani ŕa lo taurilati romtoho niki sei ŕa lo vereea vara ŕa lavia moiso, matan ŕa efi rasua vara God i pa sopo tope nona retitauhi paro niki.

²⁴ Ha aleale malele vara ha efi tueni kamim hatehateahi hinya mata vujangi na nomim opoia isana tinapua. ²⁵ Ale ŕa sopo romfomi purongo na nofa pulutahi jara matea sohena tamlohi hai la lo romfomia, pani ŕa retituetueni ale ŕa retiŕoaŕoahaira hatehateahi, ŕa tau na romifa mata nofa pulutahi tarea matan nona mele mai mo lo mai mariviti.

²⁶ La tapala ruhuruhu, vara ŕa lo opoia vara ŕa lo hehe, hina purongo vara ŕa lavi vevuhi na lelevosahi mata retivararuho moiso, mo sopo te mele malamalai tinapua vara i eri tavuhoro la hehe atu. ²⁷ Pani ha lo levosahia vara ŕa pa sopo eri kilau matan te hina ruhu pani ŕa pa lo kilau purongo mata lolokoru sasati sei mata aria non God sei i pa mai sohena hapu rilangi jea matea matan vara i suli nafihi na nona meresahi. ²⁸ Tuai vara tea mo rohu vara i ooloo la leu non Moses, la pa sopo rompoia, ale la pa

vilimateia usuri na vereulia nona tamlohi mo rua teni mo tolu mata nona hehe. ²⁹ Ha lo levosahia vara i pa sati jea isan la haratu sei la rasua moiso ale la mele jovi na hehe, matan la lo varasi Natun God, ale la lo vai na fae mata retitauhi sei mo tapuhira hinia mo sohena hina purongo matea. Tamlohi sohena, la lo vaivai na Tanumen God sei mo lo lavi na fomfuhu non God mo mai isara.

³⁰ Matan fa levosahia vara haratu sei mo lo vereea mara,

‘Enau a pa kele.

Enau a pa mele sile na volira i tataholo na sava la vaira.’ *Deut 32.35*
Ale mo mele vereea mara,
‘Moli i pa ari na nona tamlohi.’

Deut 32.36; Psa 135.14

³¹ Enia hina sasati tavera mata matahu matea vara ko jovi sivo na liman God sei mo lo mauri.

³² Ha sopo fomaliho hin la rani atu tiroma sei ka lavi na lelevosahi hin Křisto hinira. Ha mele fomfomia sohena sava ka lo turu rilangi, hina purongo vara ka levosahia vara ha pa lavi na rani rilangi tavera matana.

³³ Hin la rani atu tamlohi la verelejileji kamim na naho tamlohi, ale la tamaji kamim, ale hin rani atu ka lo tueni na tinapua sei la lo lavi na rani rilangi sohemim.

³⁴ Ka lo lavi na rani rilangi peresi la haratu sei la pulahira na ima rilangi, ale hin la rani atu la lavi narihi na nomim hinahinau tari, ka tinarihia, ale fomimim mo sopo sati matana, matan ka levosahia moiso vara hina fuhufuhu jea hai matan tui tui la lo saovi kamim na pongi hitahu.

³⁵ Ha sopo tinarihi na nomim rasua rilangi hin Moli, hina purongo vara sava i pa masee. Ha fomfomia vara voli nomim rasua sei i pa mai mo tavera jea matana.

³⁶ Ale nakerihi ha fomperavu! Ha turu rilangi mata vai na masalon God, matan hitahu ha pa lavi vevuhi na sava mo retitauhi hinira moiso.

³⁷ Ale God mo vereea vara,

‘I pa sopo tuai haratu sei mo lo mai i pa pala,

ale i pa sopo vai malum.

³⁸ Ale tamlohi sei la tataholo na nahoku la pa hahau na nora rasua.

Pani a pa sopo avulahi hin la haratu sei la vahari hiniau.’ *Hab 2.3-4*

³⁹ Pani enfa fa sopo sohen la haratu sei la vahari hin God, ale la pelati na nora malele mauri tui. Nofa rasua nike mo vaifa fa levosahi mamahunia vara God i pa jurifa.

¹ Rasua enia sava? Enia levosahi mamahuni sei vara sava fa lo fomtoho matana i pa masee. Enia nofa levosahi mamahuni na hinau sei fa sopo lo efi hitera nake. ²⁻³ Na rasua, fa levosahia vara varama nike mo pa pala usuri na reti non God, ale na rasua fa levosahia vara hinau tari fa lo hitera la tai na hinau fa sopo efi hitera.

God mo avulahi na tamlohi matan tuai mata nora rasua.

⁴ Enia mata rasua sei, Abel mo sile na malamalai mo jeu Cain, ale God avulahi hinia ale hinau nike mo vujangia vara Abel mo tataholo na nahon God. Ale hina purongo vara Abel mo mate tuai fuhu moiso, tovongi mata nona rasua mo pa lo retireti isafa nake.

⁵ Enia mata rasua sei, Enoch mo sahe na tuka mo sopo mate — ‘vahatea purongo mo tihai matan God mo lavi narihia, matan God mo avulahi hinia mata nona rasua’. *Gen 5.24* ⁶ Ale ka hitea, o sopo efi vai God i avulahi vara mo sopo te nom rasua. Tea vara mo opoia vara i mai isana, i pa rasua vara God mo lo toho ale enia i pa voli la haratu sei la lo alea varafuhu.

⁷ Enia mata rasu sei, Noah mo voro na aka matea vara i pa juri na vao imana hin wai tatave tavera atu. Matan mo lo lotu God na matahu, mo lo ooloo na nona retifoaroahai mata hinau matea mo sopo lo masee hin te pongi. Sava mo vaia usuri na nona rasua mo sile na talai isana tamlohi tari na varama hin rani atu, ale matan nona rasua sei mo mai mo tataholo na nahon God.

⁸ Enia mata rasua sei Abraham mo ooloo hin God hin rani atu mo tovia vara i malue na jarana vara i vano na jara tinapua matea, jara atu God i pa silea sohena koruna isana. Abraham mo vano pani mo sopo levosahia vara i pa vano tataholo epu. ⁹ Ale mara mo kakau hin jara atu God mo retitauhi hinia isana, mo lo toho atu na rasua matan enia mo sohena vinano matea, ale mo lo juruvi na tent matea. Ale Isaac enia Jacob la juruvi na tent sohena. Retitauhi atu God mo silea isan Abraham enia nora sohena. ¹⁰ Abraham mo pa vaia sohena matan mo lo kilau toho matan taon tavera atu sei mo puloha, ale God sei mo voroa usuri na fomina.

¹¹ Enia mata rasua sei Sarah enia Abraham la efi tape na natirihia matea, hina purongo vara la vajiaha sasati moiso ale Sarah enia mo aroaro. Abraham mo rasua vara God i pa vai na nona retitauhi isan Sarah. ¹² Ale vao tavera sei la malue hin tamlohi nike matelete purongo sei mo vajiaha sasati moiso vara i efi vasusu, mahapina la vao vao sohena vitusarasara na masapa, ale mo sohena piri oneone na pahisa tasi sei tea i sopo efi evira.

11

Tovongi Ruhu Mata Rasua

¹³ La tamlohi tari nike la mate, pani la sopo lo lavi na sava God mo retitauhi hinia isara, pani na nora rasua la kilau vano la hitea mo lo toho asau, ale la avulahi na retitauhi non God. La majinga vara enira la vinano purongo ale mata hahau falih purongo na varama. ¹⁴ Matan tamlohi sei la lo retireti sohen haratu na varama, la lo vujangia mo memera vara enira la lo kilau toho mata jarara tataholo. ¹⁵ Vara la lo fomfomi na jara sei la malue hinia, korong la mele mule moiso. ¹⁶ Pani enira la lo ale na jara fuhu matea aulu na tuka. Matan haratu, God mo avulahi vara la tovia nora God matan enia mo tatamahu na taon tavera matea na tuka matara.

¹⁷ Enia mata rasua sei Abraham mo sile Isaac sohena malamalai matea hin rani atu God mo vaihitea aulu hin vutivuti atu. Pa Abraham atu sei mo lo lavi na retitauhi non God mo tatamahu vara i vilimatei natuna vorahese Isaac sohena malamalai. ¹⁸ God mo retitauhi isan Abraham mara, 'Hin natun Isaac natu mahapim la pa lo tauri na hijam'.

Gen 21.12 ¹⁹ Abraham mo fomfomia mara vara Isaac i mate, God i efi mele vaia i mauri. Ale na malele matea, varafuhu Abraham mo pa mele lavi natuna na mateia.

²⁰ Enia mata rasua sei Isaac mo leruhu hin la natuna atu mo rua, Jacob enia Esau. Enia mo levosahi mamahuni na sava God i pa vaia na pongi mo lo mai.

²¹ Enia mata rasua sei Jacob hin rani atu mo vajiaha ale mariviti vara i mate, mo leruhu na natun Joseph hatehateahi, ale Jacob mo popovitoho mata lotu God, ale mo lo tauri na tihonina.

²² Ale enia mata rasua sei Joseph hin rani atu mariviti vara i mate, mo retireti sohen mo levosahi mamahunia vara God i pa lavi nafih na tamlohin Israel la malue Egypt vara la sahe Canaan. Mo levosahi mamahunia hin rani atu sei mo retileu isara mara vara la malue la pa lavi na suina peresira.

²³ Enia mata rasua sei taman Moses enia tinana la jarohia mata vitu mo tolu. La hitevosahia vara God mo silera na natirih matea mo tinapua, ale la sopo matahuni na sava supe nona mara Egypt i eri vaia isara.

²⁴ Enia mata rasu sei Moses hin rani atu mo ulua, mo fohu vara la kilaua sohena natun venatun supe nona mara Egypt matea. ²⁵ Moses mo tau na fomina vara i pa usuri na malele mata rani filangi peresi na tamlohi non God. Mo sopo opoia vara i avulahi na hehe sei avulahina mo lo toho mata makomo rani purongo. ²⁶ Enia mo levosahia vara i pa mele fuhu jea vara i lavi na rani filangi matan Křisto, mo jeu haratu vara i lavi vevuhi na tavitav matan Egypt, matan mo lo kilau toho mata nona otori

tavera atu sei God i pa silea isana. ²⁷ Enia mata rasua sei Moses mo malue na lepan Egypt hina purongo vara supe nona mara Egypt mo lolokoru hinia. Enia mo turu mo lo vano matan mo lo kilau matan haratu sei tea i sopo eri hitea. ²⁸ Hitahu enia mata rasua sei Moses mo retileu isana tamlohin Israel vara la taurilati na Passover, ale vara la turusi na fae na peri matarua matan vara angelo mata mateia i pa sopo vilimatei na natura vora tiroma.

²⁹ Enia mata rasua sei tamlohin Israel la hahau roto tasi sei la tovia Tasi Hahara sohena vara la lo hahau na lepa mahasa purongo. Pani hin rani atu mara Egypt lara la usurira, enira mo isoiso la pute la mate.

³⁰ Enia mata rasua sei, tamlohin Israel la hahau falih na taon tavera matan Jericho mata rani mo limaravrua, ale rorona la maroe la jovi.

³¹ Enia mata rasua sei, Rahab hařai malele atu mo sopo mate peresi na tamlohi tari hin nona taon tavera atu Jericho sei la fohu vara la ololo hin God. Mo sopo mate matan enia mo avulahi vara i jarohi la tamlohin Israel atu sei la luhu na imana. ³² Vara mo sohen haratu a pa mele vere na sava? I pa mele lavi na rani peravu jea vara a vere vevuhi na sorasora mata rasua non Gideon, Barak, Samson, Jephthah, David, Samuel peresi na přovet tari.

³³ Enia mata rasua sei la tamlohi nike la pulahi na jara nona supe tinatinapua, la aulu na jarara usuri na posposi tataholo, ale la lavi na sava God mo retitauhi hinia isara. La pelati na jingo lion, ³⁴ la vuni na pepe hapu, la rovo na mateia na voro sita vuro. Epera malokoloko, mo posi mai epe filangi. La mai la filangi jea na vuro ale la levuti na vao tamlohi vuro tinatinapua la maro. ³⁵ Hařai la mele lavi la haratu sei la opoira na mateia.

Pani hai la rasu God, tamlohi la vailejlejira, la fomfomia vara mate i pa mele fuhu, i jeua vara la vahafi hin God vara la materi na ima filangi.

La tau na nora fomtoho na sauteterahi mata mauri fuhu jea tinapua matea. ³⁶ Tamlohi la kerehi hai, ale la rupi kotkotira na asi maja. Ale hai la lihora na jen na jara fořoha na lolo ima filangi. ³⁷ Hai la mate matan la parura, ale hai la soara sopera mo rua; hai la vilira na sita vuro, ale hai la pa lo hahau la ru na huri sipsis peresi na nani purongo, la marohati, la lavi na rani filangi jea ale tamlohi la vailejlejira. ³⁸ Enira la fuhu hajavua mata toho hin varama nike. La hahau roto na tano koru peresi na vutivuti, la luhu na papa vatu ale na koko lepa.

³⁹ La tamlohi tari nike sei kama verera moiso, God mo avulahi hinira enira mo isoiso mata nora rasua, pani te vonara

hatea mo sopo lo lavi na hinau tari sei God mo lo retitauhi hinira. ⁴⁰ Matan God mo tatamahuni na hinau ruhu ruhu hai matafa matan vara God i efi vaira la tataholo ruhu peresira nake vahatea.

12

Aria Non God Mo Vujangi Na Nona Opoia

¹ Ale matan fa efi hite vao tavera atu matan tuai sei la tovongi ruhu mata rasua, la lo turu falihira mata vujangi mauri atu mata rasua isafa nake. Ale matana, mo ruhu vara fa pulahi nafihi na hinau tari sei la lo puhoniha ale la vaifa fa sopo efi maro rilangi, fa pulahi nafihi peresi na hehe sei la lo kaluti hiniha, matan vara fa efi maro peravu hin maro matan mauri nike mo lo toho na nahoia. ² Ale fa efi vaia vara fa lo kilau isan Iesu sei enia pulo nofa rasua na tapulona mo tikeli na isoisona. Matan enia mo avulahi vara i lavi na mateia mata mahanuhanu na talopeilopei, matan mo levosahia vara hitahunia i pa avulahi tavera matana. Nake mo lo sakele na jara ooloo tavera mo jeu na tinapua na pahisa jara sakele mata supe non God na tuka. ³ Ha to romfomi na rani rilangi tari mo lavira sei hin rani atu tamlohi hehe la vai na hina sasati jea isana, ha romfomia matan vara ha sopo malokoloko, ale ha tinafihi taleu na nomim rasua hinia. ⁴ Ale kamim ka sopo lo tikeli jara atu vara ha pa mate matan ka lo valum peresi na hehe na nomim turu rilangi mata turuhoroa.

⁵ Ale ka pete formalihio moiso na retituetueni non God isamim, la natuna? Mo vereea mara,

‘Natuku, o sopo kilau purongoi
vara Moli mo vujangiho
matan te hinau ko vaia
mo sopo ruhu.

Teni romim i sopo sati matana,

⁶ matan Moli mo lo vujangi la haratu mo opoira,
ale mo lo reti tataholo isana natuna tari sei
mo lavira.’

Prov 3.11–12

⁷ Vara God mo lo vujangi kamim matan te hinau ka vaia mo sati, ha lo romfomia vara God mo lo vaia sohena matan kamim ka natuna tataholo. Sava natirihio mo vai na hina sati matea, pani la sopo vujangia matana? ⁸ Vara God mo sopo vujangi kamim matan te hinau ka vaia mo sati sohen mo lo vaia isana natuna tari, mo faramia vara kamim natu malele, ale kamim ka sopo natuna tataholo. ⁹ Vara tarea fa lo ooloo na tamafa mata varama sei la lo vujangifa matan te hinau fa vaia mo sati, i pa mele fuhu jea vara fa avulahi

mata lavi na vujangi sei Tamafa na tuka mo lo silea matan te hinau fa vaia mo sati matan vara fa pa toho jejeu.

¹⁰ Matan tamafa mata varama la vujangifa matan nofa hina sati mata tauni mo visaletu purongo usuri na nora lelevosahi. Pani vujangi non God matan te hina sati isafa, enia tarea mo tataholo, ale enia mo ruhu matan mo vaia matan vara fa pa lavi maurina atu sei mo tapu. ¹¹ Na rani fa lo lavi na vujangi matan te hinau fa vaia mo sati, mo sopo rani matea mata avulahi pani fa rongo mo sati matana. Pani hitahu, vuana enia tamata peresi na mauri tataholo isan la haratu la ulua hinia.

¹² Ale matana, ha vai na limamim sei la malokoloko sati moiso vara la mele tautauri i rilangi, ale ha turu tataholo i rilangi na jaramim, hina purongo vara palomim la lo savaravara. ¹³ Ha hahau na malele tataholo, matan vara la haratu la lo usuri kamim, hina purongo vara la malokoloko, teni la pakajangjang moiso, la pa sopo efi tialahalaha vara la jovi, pani la pa mele rilangi. *Prov 4.26*

Ha Tapurongo Hin God

¹⁴ Ha vaihitea vara ha toho na tamata peresi na tamlohi tari, ale ha alea vara ha toho na mauri vokevoke sei mo tapu, matan la haratu sei la sopo tapu, la pa sopo efi hite Moli. ¹⁵ Ha kilau mamahuni kamim hatehateahi, matan vara te vonamim i pa sopo efi jovi nafihi na romfuhu non God. Ha sopo tinafihiha vara te romfomi sasati mata vahafi na rasua i malue hin kamim, vara i vono, i pa komo na vao tavera na honana, ale la pa jovi matana. ¹⁶ Ha sopo tinafihiha vara tea i vai na posposi maji, teni i usuri na posposi varama sohen Esau. Enia mo sile na korun tamana tataholo isan tasina mata peleti hanhani matelete purongo. ¹⁷ Ale hitahunia, mara mo opoia vara i lavi na lefuhu non tamana, tamana mo rohu hinia. Hina purongo vara mo tangisia, pani i sopo efi mele posi na sava mo lo toho moiso.

Retitauhi Mata Leu Na Vutin Sinai

¹⁸ Matan kamim ka sopo mai isan God sohena tavitavuin Israel tuai la lo vaia hin rani atu la lavi na leu isan God na vutivuti Sinai sei mo tapu vara la tikelia, teni na pepe hapu tavera sei mo lo hani aulu hin vutivuti atu, teni na fofoha tavera jea ea, teni na langi poripori tavera ea. ¹⁹ Matan la rongo na roroa trumpet tavera matea peresi na leo matea sei mo lo sile na retiso-hai matea. Ale mo vaira la tangi vara God i pa sopo mele retireti! ²⁰ La rongoa vara nona retileu mo rilangi jea matan mo vereea mara, ‘Hina purongo vara te maji palo vati purongo hatea, i tikeli pulon vutivuti nike, ha pa parumateia’. *Exo 19.12–13* ²¹ Moses

sohena, matahu tavera mo sohonia na sava mo hitea ale mara, 'Na matahu tavera, ale na savaravara'. *Deut 9.19*

Retitauhi Paro Mo Mele Ruhu Jea

²² Pani kamim ka mai na Vutin Zion, taon tavera non God mauri, Jerusalem matan tuka, ale ka mai isana vao angelo tavera sei la lo pulutahi na nora avulahi tavera.

²³ Kamim ka mai na pulutahi nona vora tiroma non God sei hijara la ulia na tuka. Kamim ka mai isan God, hara sei i pa ari na tamlohi tari. Ale ka lo mai isana tanumen la haratu na tuka sei God mo volituhura moiso, ale mo vaira la tataholo fuhu na nahona. ²⁴ Ka mai isan Iesu, hara sei mo lo turu na livuhan God peresi na tamlohi matan retitauhi paro nike, ale ka mai na faena sei la turusia mata romi na hehe, mo sopo sohena faen Abel sei mo lo tangi isan God vara i sile na talai matana.

²⁵ Ha lo kilau mamahunia vara ha ooloo hin God, hara sei mo lo retireti isamim. Matan, vara tadvavin Israel la sopo eri rovo hin rani atu la rohu vara la tapurongo hin Moses sei vahafule matea enia tamlohi purongo, i pa mele sati jea vara fa rohu hin haratu mo lo retireti isafa sei mo tai na tuka! ²⁶ Hin rani atu God mo retireti isara na vutin Sinai, leona mo hisuhi na varama. Pani nake mo mele vai na retitauhi tinapua matea mara, 'Mele vahatea, a pa sopo hisuhi na varama purongo, pani a pa hisuhi na tuka peresia'. *Hag 2.6*

²⁷ Haratu mo faramia vara hinau tari na varama la pa hutehutehi, matan vara hinau matan tui tui purongo, la pa lo toho jejeu.

²⁸ Ale matan fa pa lavi mauri atu God mo aulu hinia sei i pa sopo eri rovo, mo fuhu vara fa vere meje isana, ale fa vai God i avulahi na nofa lotua na ooloo sei mo vai fa fa sile na ooloo tavera jea isana. ²⁹ Matan nofa God enia hapu tavera jea matea mata suli vevuhi na hinau tari. *Deut 4.24*

13

Isoiso Retireti

¹ Ha pa opoiopoi kamim hasemim tarea na opoia varafuhu. ² Ha sopo romaliho vara ha avulahi mata lavi na vinano na imamim, matan hai la vaia moiso isana angelo pani la sopo levosahia. ³ Ha sopo romaliho hin la haratu la lo vailejlejira na lolo ima filangi, ha romromira sohen kamim sohena ka lo toho peresira.

⁴ Ha romfomi i tataholo mata lahi, ha sopo mele juruvi peresi te tinapua, matan God i pa ari la haratu la lo vai na posposi viriu, peresi la haratu la lo vaivaileu peresi na tinapua mo lahi moiso. ⁵ Ha toho asau na opoia mata mania, ha avulahi na sava enia nomim, matan God mo vereea mara,

'A pa sopo tinafihiho hin te rani.

Ale a pa sopo revusehiho hin te rani.' *Deut 31.6; 31.8*

⁶ Matan haratu, fa eri vereea vara, 'Moli enia noku tuetueni, ale matana, a pa sopo matahu. Vara mo sohen haratu natu, tamlohi la pa eri vai na sava isaku?' *Psa 118.6-7*

⁷ Ha mele romfomi la nomim patu tamlohi atu sei la lo vujangi kamim na reti non God tiroma. Ha romfomi na hinau fuhu tari sei la mai isamim na maurira, ale ha rasu Moli sohen enira la rasua.

⁸ Iesu Křisto mo lo sohena nanovi, nahapani, ale jejeu. ⁹ Ha sopo tinafihiha vara te vujangi paro tinapua la haluhalu kamim. Kamim ka lo lavi na suiha na maurimim mata romfuhu non God, mo sopo na posposi tuai usuri na leu mata hanhani sei la sopo eri tueni la haratu la lo usurira.

¹⁰ Enfa nofa rasua paro nike mo sohena votavota paro matea, ale usuri romfomi atu pris mata rasua tuai la sopo eri lavi na hina fuhufuhu hinia matan malelena mo tinapua. ¹¹ Usuri na rasua tuai na leu nona Jew, hin rani atu la lo toho na tano koru, pris aulu mo lo lavi na fae maji mo unu sivo na tent na Jara Tapu sohena malamalai matea mata hehe, pani usuri na leu la suli na tarape maji na tavalu rope jara tamlohi atu matan vara i vai na jarara i vokevoke. ¹² Ale rasua paro nike mo sohena purongo, Iesu mo mate na tavalu ropen taon tavera atu Jerusalem, matan vara i eri vai na nona tamlohi la tapu na faena sei mo roro. ¹³ Ale matana, mo fuhu vara fa malue fa vao isana hin jara sati atu na tavalu ropen taon tavera atu matan vara fa lavi na rani filangi sei mo lo lavia. ¹⁴ Matan varama nike mo sopo jarafa tataholo: Enfa fa lo kilau toho matan nofa taon tavera atu na tuka sei i pa mai.

¹⁵ Hin Iesu, mo fuhu vara tarea fa lo sile na hasohaso isan God na nofa vereea vara enia mo fuhu sohena sava, sohena nofa malamalai fuhu matea fa lo silea isan God. ¹⁶ Ha sopo romaliho vara ha vai na vavahinau fuhu ale ha lo ase na nomim hinahinau peresi la haratu la vejuveju, matan malamalai sohena, enia mo vai God mo avulahi tavera.

¹⁷ Ha ooloo hin nomim patu tamlohi rasua, ale ha ooloo na sava la lo vereea isamim, matan enira la lo kilau na maurimim, ale la levosahia vara la pa turu na nahon God mata nora vavahinau. Mo fuhu vara ha vaira la vaia na avulahi, mo sopo na romsati, matan vara i vono, i pa sopo tueni kamim hin rani atu mo lo mai.

¹⁸ Ha ususi matamam, matan kama levosahia vara romimam la vokevoke, ale

kama opoia vara kama toho na oloolo na hinau tari kama lo vaira. ¹⁹Ale nakerihi, na opoi na nomim usiusi mo tavera jea matan vara a efi mele mai isamim vila.

²⁰⁻²¹ Ale na lo usiusi vara God mata tamata sei mo mele lavi nafihi nofa Moli Iesu Kristo na mateia, vara i vai kamim ha tatamahu na hinau tari mata vai na masalona. Na lo usiusi vara na suihan Iesu Kristo i pa vai kamim ha vua na hinau tari sei i pa vai Iesu i avulahi. Iesu enia Tavui Sipsip aulu mata sipsip usuri na retitauhi matea matan tui tui, enia mo ulia na faena. Ale hasohaso i pa vano isana tarea tui tui. Amen.

²² Na usia filangi isamim la vorai peresi na vevorai fuhufuhu, vara ha tapurongo i ruhu na sava na pete vereea moiso hin noku leta vejuveju nike.

²³ Na opoia vara ha levosahia vara voraira na rasua sei Timothy, mo malue na ima filangi moiso. Ale vara i pala nike vila, a pa lavia peresiau kama mai kama hite kamim.

²⁴ Ha sile na noku retioloole i vano isana nomim patu tamlohi tari na rasua, peresi na kalesia tinapua sei la lo toho atu. Kalesia sei la tai Italy la sohai na nora retioloole isamim.

²⁵ Na lo usiusi vara fomfuhu non God i pa toho isamim mo isoiso.

James Leta James Mo Ulia Leta Nike

Leta nike, enia mo vano isana tavgavuim Israel sei la tau na nora rasua hin Iesu Kristo. Mo vujangia mara vara te rasua vararūhu na maurim, tamlohi la pa hite na vaivaina, vara i vono, nom rasua enia hina purongo.

Mo retireti na hinau sohen harihi: vara ko tilavono, o sopo romatano – o tauri rilangi na nom rasua na rani vaihite la mai isam. O sopo lolokoru vilavila. O sopo kilau na huri tamlohi purongo. O vai na hina ruhu isana tamlohi. O vaitataholoi na memem. O oloolo hin God, o turuhoro Tiapolo. O sopo rethapahapa na nom voko. Vara ko tavgav, o tueni na tilavono. Sopesopen puku nike.

Hin leta nike

1. Retioloolo (1.1)
2. Rasua enia hina lelevosahi na mauri (1.2–18)
3. Tapurongo moiso oloolo hin na reti non God (1.19–27)
4. Vaia i ruhu isana tamlohi tinapua (2.1–13)
5. Rasua peresi na voko (2.14–26)
6. Lelevosahi peresi na retireti (3.1–18)
7. Retiŋoŋoahai isan la haratu la lo tapala peresi na varama (4.1–5.6)
8. Posi malum, ŋomŋuhu peresi na usiusi (5.7–20)

¹ Enau James, slev non God enia Moli Iesu Kristo, na uli leta nike mo vano isamim Jew ka kalesia, ka lo toho hatehateahi hin varama nike.

Rasua Peresi Na Lelevosahi

² La voraiuku peresi na vevoraiku ruhuŋuhu, vara vaihite la mai isamim, ha avulahi matara, ³ matan ka levosahia vara te hinau mo vaihite na nomim rasua, enia i pa vai na nomim rasua i mele rilangi jea, matan vara ha pa turu rilangi tarea. ⁴ Ale vara ha turu rilangi sohena, enia i pa eri vai na maurimim i jejea ruhu, i pa maŋivi na hinau ruhu tari, moiso ha pa sopo vejuveju hin te hinau na mauri kalesia.

⁵ Pani vara te vonamim mo levosahia vara nona lelevosahi mo rihirih purongo, enia i pa usia isan God, enia haratu mo han-sohai isana tamlohi tari, mo sopo hitesatihi tea, ale enia i pa silea isana. ⁶ Pani i pa usia isana na rasua moiso i sopo ŋomkaka matana, matan vara tea mo lo ŋomkaka, enia mo sohena suhusuhu na tasi, langi mo lo serea mo lo pulahia. ⁷ Matan tamlohi

atu i pa sopo ŋomŋomia vara i pa lavi te hinau isan Moli, ⁸ matan enia tamlohi ŋom rua matea, enia ŋomina mo sopo matea na posina tari.

Tamlohi Tilavono Peresi Na Tamlohi Tavtav

⁹ Ale vorai atu na rasua sei mo tamlohi purongo i pa eri rethapahapa matan God mo tahea aulu, ¹⁰ ale haratu mo tavgav i pa eri rethapahapa matan God mo tauv atano, matan enia mo sohena vira ruvu matea, enia i pa tihai. *Isa 40.6–7*

¹¹ Matan alo mo vele peresi na langina tutuni, ale mo vai na ruvuŋuvu peresi na virana la mahoa, la jovi, ale majhira ruhuŋuhu la tihai, ale i pa sohena isana tamlohi tavgav sei la lo tutungui na nora tavgav, la pa tihai.

Hinau Mo Vaihite Na Tamlohi

¹² Avulahi isana tamlohi mo turu rilangi tarea na rani vaihite, matan vara i jeu la vaihite atu, God i pa silea na volina sei enia mauri tui mo usuri na nona retitauhi isan la haratu la lo opoia.

¹³ I pa sopo tea mo lo toho na vaihite i eri vereva vara, “God mo lo vaihiteau!” Matan mo sopo te hina sasati hatea i eri vaihite God, ale God mo sopo vaihite te tamlohi. ¹⁴ Pani vaihite la vora usuri na masalon tamlohi hasena purongo, la lo reve nafihia, ale la lo haluhalua, ¹⁵ moiso, masalona atu mo ulua na lolona, ale hehe mo vora hinia, ale na rani hehe atu mo tavera mo ruhu, mo vasusui na mateia.

¹⁶ La voraiuku peresi na vevoraiku ruhuŋuhu, ha sopo jalio na ŋomimim. ¹⁷ Ha lo levosahia vara otori ruhuŋuhu tari peresi na otori la tataholo ruhu tari, la tai na tuka, la tai isan Tama memera aulu, la sinai atano. Ale enia mo sopo sohera matan mo sopo posposi, ale mo sopo te ŋoŋona. ¹⁸ Ale na masalona, mo vaiŋa ŋa vora na retivararūhu matan vara ŋa pa mai sohena vora tiroma na nona vavahinau tari mo lo vaira.

Ha Vaia Ha Sopo Rongoa Purongo

¹⁹ La voraiuku peresi na vevoraiku ruhuŋuhu, ha levosahi harihi; ha tatamaha i ruhu vara ha tapurongo, pani ha sopo vilavila mata retireti teni lolokoru. ²⁰ Matan posposi tataholo atu God mo opoia, mo sopo vora na lolokoru nona tamlohi. ²¹ Matan haratu, ha pulahi nafihi na posposi lumiha peresi na posposi sasati tari na maurimim, ale na ŋomatano, ha lavi reti atu God mo lavoa na mapumim moiso sei i eri juri na maurimim.

²² Ale nake, ha mai tamlohi mata vai na sava reti mo vereva, ale ha sopo tamlohi mata tapurongo purongo sei la lo hase

halura. ²³ Matan vara tea enia mata tapurongo na reti purongo, ale mo sopo mata vaia, enia mo sohena tamlohi matea mo lo kilau na nahona na titiro, ²⁴ matan enia mo lo kilau na niniuna, ale vara mo mele malue, ale vahatea purongo, mo fomaliho vara enia mo sohena sava. ²⁵ Pani haratu mo lo kilakilau usuri na Leu ruhu ruhu non God mo fuhu, leu atu mo vaia mo materi, ale vara i lo vai na sava leu mo lo vereea, ale i sopo fomaliho na sava mo rongoa, God i pa lefuhu hinia na nona vavahinau.

²⁶ Vara tea mo fomomia vara mo lo usuri na mauri tataholo, pani mo sopo vaitataholoi na memena, enia mo lo halu na mapuna, fomomi mata mauri tataholo non tamlohi nike, mo sopo fuhu hin te hinau hatea. ²⁷ Mauri tataholo vara fuhu sei mo vokevoke na nahon God Tama, enia mo sohen harihi: vara o kilau mamahuni na natu maŋua peresi na malepu na nora rani rilangi, ale vara o toho asau na posposi varama.

2

Ha Sopo Tametame Na Tamlohi

¹ La voraiiku peresi na vevoraiku, ha sopo tametame tea na mauri mata rasua hin nofa Moli Iesu Kristo, enia Moli mata hasohaso tavera jea. ² Matan vara te tamlohi la unu na nomim matavuhi, ale matea enia mo tau na gold ring na limana mo ru na ruru fuhu, ale tamlohi tinapua matea mo tilavono mo unu sohena, pani nona ruru mo maŋafari, ³ ale vara ha sile na oloolo hin haratu sei mo ru na ruru fuhu, ha vereea isana vara, "Tamlohi tavera, o sakele hin jara fuhu nike!" Pani isan haratu sei mo tilavono ha vereea vara, "O turu purongo sevano, teni o sakele purongo nike atano na paloku." ⁴ Harakerihi, enia posposi matahi isamim hasemim, ka mai ka tamlohi aria la lo ari na fomomi sasati.

⁵ La voraiiku peresi na vevoraiku ruhu ruhu, ha tapurongo isaku, God mo viŋoni la haratu la tilavono na varama vara la pa tavgav na nora rasua, ale la pa lavi mauri atu God mo aulu hinia sei mo retitauhi hinia moiso isan la haratu la opoia. ⁶ Pani ka lo kilau purongoi na tamlohi tilavono. Mo sopo la haratu sei la tavgav natu, la lo sile na rani rilangi isamim, teni la lo reve kamim ka vano na court? ⁷ Mo sopo enira natu sei la lo veresatihi na hijan Kristo sei ka lavia?

⁸ Pani vara ka lo oloolo hin Leu atu mo aulu na Retitapu sei mo vereea vara, 'O opoi na tamlohi la lo toho falihio sohen ko lo opoiho hasem.' *Lev 19.18* ⁹ Pani vara ka lo tametame na tinapua, ka lo vai na hehe, ale Leu mo vereea vara ka tamlohi tope na Leu.

¹⁰ Matan hare mo lo oloolo na leu tari, pani mo tope matelete purongo, enia mo ori na leu tari. ¹¹ Matan haratu mo vereea mara, 'Ha sopo vaivaileu peresi na tinapua mo lahi moiso!' Enia haratu mo vereea mara, 'Ha sopo vili na tamlohi!' Vara ka sopo vaivaileu peresi na tinapua, pani ka vili na tamlohi, kamim ka mai tamlohi matea mata tope na Leu moiso.

Exo 20.13-14; Deut 5.17-18 ¹² Ale ha retireti, ale ha hahau sohen la haratu sei la pa lavi na aria non Leu mata materi. ¹³ Matan vara God i ari na tamlohi, i pa sopo fomopoi tea sei mo sopo efi fomopoi na tinapua. Matan fomopoi mo vuni na aria non God.

Rasua Peresi Na Vaivaina

¹⁴ La voraiiku peresi na vevoraiku, mo fuhu sohena sava vara tea mo lo vereea vara enia tamlohi rasua, pani mo sopo te vaivaina? Nona rasua i efi juria teni i vono?

¹⁵ Vara te vorai teni te vevorai hatea mo sopo te nora ruru teni te hara hinau, ¹⁶ ale vara te vonamim matea mo vereea isana mara, "Mo fuhu, o vano, God i pa lefuhu hiniho, o pa sopo hamariri, o pa sopo marohati!" Pani ko sopo sile te hinau hatelete isana matan vara i tueni na epena, sava hinau mo fuhu hinia?

¹⁷ Ale rasua mo lo toho hasena vara mo sopo te vaivaina, enia mo mate.

¹⁸ Pani tea i pa vereea vara, "Engko nom rasua, pani enau na lo vai na hinau matuvana!" Ale a pa vereea isana vara, "O vujangiau na nom rasua mo sopo te vaivaina, ale a pa vujangiu na noku rasua na noku vavahinau."

¹⁹ Ko rasua vara God enia matelete, haratu mo tataholo, vara fuhu tanume sasati sohena la rasua, ale la matahu tavera la lo savaravara matana.

²⁰ Pani ko lo opoia vara a vujangia isam, tamlohi rongorongono vono, vara rasua mo sopo te vaivaina enia hina purongo.

²¹ Ko levosahia vara Abraham tamaŋa mo tataholo na nahon God mata vaivaina, hin rani atu mo sile natuna Isaac na votavota isan God? ²² Ko hitea vara nona rasua mo soŋotahi peresi na nona vavahinau, ale nona vavahinau mo maŋivisi na nona rasua, ²³ ale mo maŋivisi na Retitapu sei mo vereea vara, 'Ale Abraham mo rasu God, ale God mo vereea vara enia mo tataholo na nahona matana'. *Gen 15.6* Ale matana, la tovia tapalan God.

Isa 41.8

²⁴ Ka hitea, tamlohi mo tataholo na nahon God na nona vavahinau, mo sopo mata rasua hasena purongo.

²⁵ Ale sohen haratu purongo Rehab, haŋai malele atu, mo tataholo na nahon God na sava mo vaia, matan enia mo lavi la vahafule atu na imana, moiso mo verera na

malele tinapua vara la mele malue hinia. ²⁶Matan sohena, epe tamlohi mo mate vara tanumena mo malue hinia, ale rasua mo mate vara mo sopo te vaivaina.

3

Ha Lo Kilau Na Nomim Retireti

¹La voraiku peresi na vevoraiku, mo sopo fuhu vara kamim vao tavera ha mai ha tamlohi vujangi, matan ha lo levosahia vara na rani aria, God i pa ari rilangi kamam tamlohi vujangi i jeu na tamlohi purongo.

²Matan enfa mo isoiso fa jalio na malele matuvana, ale vara tea mo sopo jalio na sava mo lo vereea, enia tamlohi tataholo matan i eri taurilati na epena tari. ³Vara fa tau na bit na jingo hos matan vara la ooloo hiniifa, fa eri posi vevuhi na epera sohena. ⁴Ha romfomia, lanis sohena, la tavera hina purongo vara langi rilangi mo lo sohaira vara i vano, pani stiana rihirihitu i eri posi lanis tavera atu i vano na sava jara tamlohini lanis atu mo opoia. ⁵Sohen haratu purongo, meme tamlohi enia mo rihirihitu purongo, pani i eri retimangisi i tavera jea.

Ha romfomia vara te tanume hapu rihirihitu hatea purongo i eri suli na urata tavera. ⁶Ale meme tamlohi enia hapu, hina sasati tari matan varama nika la mafivi matana, enia hina rihirihitu purongo na epera, pani mo sato mo jeu na epera tari, ale mo jilangi na malele mauri mo isoiso, matan hapu sei moruhapu mo lo polopoloo.

⁷Matan tamlohi la eri taurilati na maji tari sohena maji jala, maji haraho, maji avuavu peresi na maji tasi, ale tamlohi la taurilatira moiso, ⁸pani tea i sopo eri taurilati na memena. Enia hina sasati matea mo sopo eri toho malum, mo mafivi na poison sei mo sile na mate. ⁹Ra hasohaso God Tamafa hinia, ale hinia fa lo veresatihi na tamlohi sei God mo vaira la tataholo na nahona. *Gen 1.26* ¹⁰Hin jingo atu matea purongo, lefuhu peresi na lesati la lo malue hinia. La voraiku, hina atu mo sopo tataholo vara la sohen haratu. ¹¹Wai peresi na tasi la eri tia vutvut hin te patu wai hatea purongo? ¹²La voraiku peresi na vevoraiku, pulo fig i eri vua olive teni grape i eri vua fig? Mo sohena purongo, paltungu tasi matea i sopo eri sile na wai purongo.

Lelevosahi Atu God Mo Silea

¹³Hare isamim enia tamlohi lelevosahi matea, ale mo levosahi mamahuni na hinau? Vara tea, na nona posposi fuhu, mo fuhu vara i vujangi na nona vavahinau sei la vora mata nona posposi romatano usuri na lelevosahi vara fuhu. ¹⁴Pani vara ha mafivi na mereimerei sasati, ale ka lo romfomi kamim hasemim na mapumim, ha sopo rethapahapa, ale ha sopo turuleji

na retivara fuhu. ¹⁵Lelevosahi sohen harihi mo sopo tai na tuka, pani enia mata varama, enia nona tamlohi purongo, enia mo tai isana tanume sasati. ¹⁶Matan vara sava jara mereimerei peresi na posposi romfomi kamim hasemim mo lo toho ea, patumasa peresi na posposi sasati tari la pa toho hinia.

¹⁷Pani lelevosahi matan tuka, tiroma hinau hinia, enia mo sopo te romsati hinia, mo usuri na posposi tamata, mo usuri na posposi romfuhu, mo ooloo, mo mafivi na rompoia, ale vuana fuhu mo mafivi, mo sopo tametame tea, ale mo vara fuhu. ¹⁸Ale tamlohi sei la lo vai na tamata, la pa lavo na piri mata tamata, ale la vu na astauni ruhuruhu.

4

Ha Mai Mariviti Isan God

¹Sava hinau enia pulo nomim vauriuri peresi na nomim vasvas? Pulona enia masalomim sei la lo valum na lolomim. ²Ka romusuri te hinau, pani ka sopo eri lavia, ale matana, ka vilimatei na tamlohi. Ka romijea hin te hinau nona tinapua, ale ha sopo eri lavia, ale matana, ka valum, ale ka vasvas. Ka sopo lavi te hinau matan ka sopo usia isan God. ³Ka usia, pani ka sopo lavia matan ka lo usia na romfomi sati matan vara ha pa jalahia na masalomim.

⁴Ka tamlohi vaivaileu! Ka sopo levosahia vara ha tapala peresi na varama i pa vai kamim ha meresahi isan God? Matana, hare mo opoia vara i tapala peresi na varama, mo hasena vaia mo meresahi isan God. ⁵Teni ka lo romfomia vara Retitapu mo vere purongoi vara, 'Romin God tari mo lo toho na Tanumena sei mo taua hiniifa?' ⁶Pani God mo mele sile na romfuhu mo jeu tiroma. Matan Retiulia mo vereea vara, 'God mo lo turuhoro

na tamlohi hapahapa
pani mo sile na romfuhu
isan la haratu la romatano.' *Pro 3.34*

⁷Matan hinau atu, ha hase tau kamim na ruhuruhan God. Ha turuhoro Tiapolo, ale enia i pa rovo isamim. ⁸Ha mai mariviti isan God, ale enia i pa mai mariviti isamim. Ha sopo lavi na hina lumiha na maurimim, ka tamlohi hehe, ale ha onehi na mapumim la vokevoke, ka tamlohi rom rua. ⁹Ha romsati mata nomim hehe, ha tangtangi, ale ha tangi. Ha vai na nomim mana i mai tangtangi, ale nomim avulahi i mai romsati. ¹⁰Ha hase tau kamim atano na nahon Moli, ale enia i pa tahe kamim.

Ha Sopo Ari Na Tamlohi

¹¹La voraiku peresi na vevoraiku, ha sopo veresatihi kamim hatehateahi. Haratu mo lo veresatihi na voraina matea teni mo lo ari na voraina, enia mo lo

veresatiki na Leu, ale mo lo ari na Leu. Pani vara ka lo ari na Leu kamim ka sopo tamlohi vai na Leu, pani ka tamlohi ari na Leu. ¹² God purongo mo sile na Leu, ale enia tamlohi aria, enia natu, i eri juri, ale i eri komo. Pani kamim hare matan vara ha pa ari na tamlohi la lo toho řalihi kamim?

Ha Sopo Hapahapa

¹³ Ha tapurongo, la haratu la lo vereea vara, "Nohorihi teni pavuho řa pa vano hin te taon tavera nike, teni atu matan te tauni hatea, ale řa pa turuhi te bisnis atu mata lavi te mania tavera!" *Pro 27.1*

¹⁴ Pani ka sopo levosahia vara sava i pa masese isamim pavuho? Maurimim enia sava? Matan ka sohena haravu na urata mo sinai mo toho makomona, ale mo mele tihai. ¹⁵ I pa mele řuhu vara ha vereea sohen harihi, "Vara na masalon Moli, řa pa mauri, ale řa pa haranike teni harasevano." ¹⁶ Pani mo sohena natu, ka lo retimangisi na sava ha pa vaira. Retihapahapa tari sohen harihi enia hina sasati.

¹⁷ Matan haratu, hare mo levosahi na hinau tataholo vara i vaia, pani mo sopo vaia, enia hehe isana.

5

Retiřoaoahai Isana Tamlohi Tavtav

¹ Ha tapurongo! Kamim tamlohi tavgav, ha tangi na tangtangi matan la rani řilangi atu la lo mai isamim. ² Nomim tavgav la řovo moiso, ale nomim ruru řuhu pepe la hatifarihira moiso. ³ Nomim gold peresi na silver la řaeha moiso, ale řaehara la pa pisuhi kamim, ale la pa hani na epemim sohena hapu. Ka pete takonahi na tavgav mata pongi hitahu moiso. ⁴ Ka hitea, voli nomim tamlohi voko sei la lo vu na isamim, ka taurilati na sopena, mo lo tangi matamim, ale tangi nona nomim tamlohi vu na isamim, mo tikeli na peron Moli Suiha Tavera Jea. *Deut 24.14–15*

⁵ Ka lo mauri hin varama nike na masalomim peresi na nomim posposi řomřomi hasemim purongo. Mapumim la řavisvis na rani mata vilimatei na tamlohi. ⁶ Ka sile na talai, ale ka vilimatei na tamlohi tataholo sei la sopo turuhoro kamim.

Ha Romperavu Na Nomim Rani Rilangi

⁷ Matan haratu la voraiku peresi na vevo-raiku, ha romperavu i tikeli rani atu Moli i mele mai hinia. Ka hitea sohena sava tamlohi isa mo lo saovi mata vua řuhufuhu mata lepa, mo romperavu matana mo tikeli usa atu mo mai tiroma mo vano mo tikeli usa atu mo pa mai hitahu. ⁸ Ale kamim sohena, ha romperavu. Ha vai na řomimim la turu řilangi matan mele mai non Moli mo lo mai mariviti.

⁹ La voraiku peresi na vevoaraiku, ha sopo retireti varihi hin kamim hatehateahi, matan God i pa ari kamim matana. Ka hitea! Tamlohi aria mo lo turu na matarua.

¹⁰ La voraiku peresi na vevoaraiku, sohena tovongi matea mata lavi na rani řilangi, ale mata romperavu, ha romřomi na provet tuai sei la lo retireti na hijan Moli. ¹¹ Ka hitea, řa lo romřomi la haratu God mo leřuhu hinira sei la turu řilangi mo tikeli na isoisona. Ka pete rongoa sohena sava Job mo turu řilangi moiso, ale ka hitevosahi na romřomi non Moli hinia moiso, ale sohena sava Moli mo vujangi na nona opoia peresi na nona romopoia. *Job 1.21–22; 2.10; Psa 103.8*

Ha Retireti Vararuhu

¹² Pani aulu hin la hinau sei la voraiku peresi na vevoaraiku, ha sopo retitauhi hin te hinau na tuka teni na varama teni hin te hinau tinapua, pani vara ka vereea vara 'io', ale ha vaia, ale vara ka vereea vara 'mo vono', ale ha sopo vaia, matan vara ha sopo lavi na talai matana. *Mt 5.34–37*

Suiha Mata Usiusi

¹³ Te vonamim mo lo lavi na rani řilangi? I pa usiusi matana. Te vonamim mo avulahi? I pa hasohaso God na vete matana.

¹⁴ Te vonamim mo rojo? I pa usi na patu tamlohi na vao kalesia vara la mai la usiusi isan God matana. La pa tau surei na wel hinia na hijan Moli. ¹⁵ Ale usiusi na rasua i pa juri haratu mo rojo, ale Moli i pa tahea. Ale vara mo vai te hehe, God i pa řomia.

¹⁶ Matan haratu, ha tavgiti na nomim hehe isamim hatehateahi, ale ha usiusi matamim hatehateahi matan vara ha pa mele řuhu. Usiusi nona tamlohi tataholo matea, suihana mo tavera jea vara mo lo usiusi. ¹⁷ Elijah, enia tamlohi matea maurina mo soheřa purongo, ale mo usiusi řilangi matan vara i sopo usa, ale mata tauni mo tolu vitu mo limarave, usa mo sopo jovi na lepa. *1Ki 17.1; 18.1*

¹⁸ Moiso mo mele usiusi, ale usa mo mele jovi na tuka, ale isa la mele lavi na vuara. *1 Ki 18.42–45*

Ha Tueni La Haratu La Jovi

¹⁹ La voraiku peresi na vevoaraiku, vara te vonamim hatea mo jalio na retivararuhu, ale tea mo mele lavia mo mai, ²⁰ enia i pa levosahia vara hare mo lavi na tamlohi hehe matea mo jalio mo mele mai, i pa juri na maurina na matea, ale i pa tavuhoro na hehe matuvana. *Pro 10.12; 1Pe 4.8*

1 Peter Tiroma Leta Peter Mo Uli Leta Nike

Hin leta nike Peter mo sorahi mauri atu mo lavi na rani řilangi nona kalesia hinia. Mo vujangia vara hin malele atu Moli mo lo vaihite na rasua nona nona tamlohi hinia. Leta nike mo lo vano isana kalesia tari sei la lo toho řalihu na jara matan Asia Minor. Tamlohi la sopo rasu Iesu, la sile na rani řilangi isara, ale Peter mo vereea vara la pa tatamahu mata turu řilangi matan la pa mele lavia.

Peter mo retituetuenira na nora rani řilangi, ale mo vereea mara mo tataholo vara la avulahi matana, matan vara la jeua God i pa silera na otori fuhu hin rani atu vara Iesu i mele pala na varama (1.6–7).

Peter mo vereea isara mara Křisto sohena mo lavi na rani řilangi na varama, i pa tataholo vara nona tamlohi usuri la lavia pani mata posposi tataholo purongo, mo sopo mata posposi sasati (2.18–25; 4.12–17).

Matan Křisto sohena, mo lavi na rongohaji na rani mo mate mata nofa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i efi laviřa řa mai isan God. Epena mo mate, pani mo mele turu, mo mauri na suihan Tanumen God. (3.18)

Hin leta nike

1. Retioloolo peresi na usiisi (1.1–2)
2. Hinau mata řomtoho (1.3–12)
3. Hahau usuri na posposi tapu non God (1.13–2.17)
4. Tovongi non Křisto (2.18–25)
5. Rani řilangi nona kalesia (3.1–4.19)
6. Retituetueni mata patu tamlohi kalesia (5.1–11)
7. Isoiso retioloolo (5.12–14)

¹ Enau Peter, vahařule matea non Iesu Křisto, na lo uli leta nike, mo vano isan la haratu God mo viřonira la lo toho sohena vinano na province matan Pontus, Galatia, Cappadocia, Asia peresi Bithynia, ² God Tama mo pete viřoni kamim tuai moiso usuri na masalona, ale Tanumena mo tapuhi kamim mata mauri tapu, ale matana, ka lo ooloo hin Iesu Křisto, ale řaena mo vai kamim ka vokevoke. Romřuhu peresi na tamata la pa mařivi savulevule hin kamim.

Mauri Tui

³ Ooloo tavera isan God sei Taman nofa Moli Iesu Křisto! Na nona řomopoia tavera mo vaifa řa mele vora, ale nofa řomtoho mo lo mauri, mo mauri matan Iesu Křisto mo sauteterahi na mateia, ⁴ ale God mo tau

mamahuni mauri atu sei mo řuhuruhu jea matamim na tuka sei i pa sopo efi řovo, i pa sopo efi komo, ale i pa toho jejeu, ⁵ ale God na nona suiha tavera mo lo matahi kamim na malele mata rasua, i vano i tikeli rani atu i vujangia mauri řuhuruhu atu mo tatamahunia moiso matamim na pongi hitahu. ⁶ Ale harihi natu, mo vai kamim ka avulahi tavera, hina purongo vara nake God mo opoia vara ha pa lavi te rani řilangi matan te makomo rani, ⁷ rani řilangi tinatinapua la pa lo vaihite na nomim rasua vara mo řilangi sohena sava. Nomim rasua enia hina řuhu matea mo jeu gold atu sei la sulia na hapu mata řuhina. Ale vara nomim rasua mo lo turu, ha pa lavi na hasohaso peresi na hija řuhu peresi na ooloo tavera hin pongi atu Iesu Křisto i pala hinia, ⁸ hina purongo vara ka sopo lo hitea hin te rani, ale ka sopo hitea nakerihi, pani ka lo opoia, ale ka lo rasua, ka lo avulahi tavera jea matana, avulahi tavera atu na mapumim mo sopo tea i efi vereea, ⁹ mata vua nomim rasua enia maurimim la pa juri. ¹⁰ La přovet atu tuai sei la lo retimangovi na hina řuhuruhu sei vara la pa nomim, enira la alea, ale la vaihite mamahunia, ¹¹ la opoia vara la levosahia vara sava tamlohi natu, teni pongi tataholo natu, Tanumen Křisto hinira mo lo vereea, matan mo lo vereulia tuai moiso vara rani řilangi atu non Křisto i pa sohena sava, ale hasohasona matan pongi hitahu atu la pa sohena sava.

¹² Ale God mo vereea isara vara la hinau sei la pa sopo masese isara, pani isamim nake, ale nake, God na tuka mo řule na Tanume Tapu vara i tueni la haratu la lo retivujavujangi na Retiřuhu isamim, la hinau sei angelo la opoia tavera vara la pa levosahi mamahunira.

¹³ Matana, ha tatamahuni na řomimim mata vavahinau, ale ha hase taurilati kamim, ha tau vevuhi na nomim řomtoho hin řomřuhu atu sei i pa mai isamim hin rani atu Iesu Křisto i pa mele pala hinia.

¹⁴ Sohena natuvarihia la ooloo, ha sopo sarete vara ha mele sivo na masalomim matan tuai, ¹⁵ pani matan God atu sei mo tovi kamim enia mo tapu, ha tapu na nomim hahau. ¹⁶ Matan la ulia na Retiulia moiso vara, ‘Ha pa tapu, matan enau na tapu’.

Lev 11.44

¹⁷ Ale sohena ka tovia Tamamim, ha lo levosahia vara enia mo sopo tametame tea na nona aria mata vavahinau nona tamlohi hatehateahi, i pa řuhu isamim vara ha hahau na nahona na ooloo tavera jea tarea matan nake ka lo vinano hin varama nike, ¹⁸ ka levosahia vara mo volituhu kamim na nomim posposi řomvono sei ka lavia isana pimim tuai. Mo sopo volituhu kamim na hinau la efi řovo sohena silver

teni gold, ¹⁹ pani mo volituhu kamim na raen Křisto, volina mo aulu jea, sohena řae natu sipsip matea mo vokevoke řuhu jea. ²⁰ God mo viřonia tiroma na pulo varama, pani mo pa vuhesia na isoiso rani matamim, ²¹ hin Křisto kamim ka lo rasu God, mo sauteterahi Křisto na mateia, ale mo silea na hasohaso tavera matan vara nomim rasua peresi na nomim řomtoho la pa lo toho isan God. ²² Maurimim la vokevoke matan ka ooloo na retivarařuhu, ale matana, ha opoiopoi kamim varařuhu, ale ha opoiopoi kamim i řilangi na mapu vokevoke, ²³ matan ka mele vora paro, mo sopo na piri mata řovo, pani hin haratu i pa sopo eři řovo matan enia reti mauri non God sei mo lo toho jejeu; ²⁴ mo vereea vara, 'Tamlohi tari la sohena řuvufuvu, nora hasohaso mo sohena vira řuvufuvu. Ale vara řuvufuvu mo mahoa, virana la pa jovi, ²⁵ pani reti non Moli i pa toho jejeu.' *Isa 40.6-8* ale reti nike enia Retiřuhu atu sei la lo retivujavujangia isamim.

2

Vatu Atu Mo Mauri

¹ Matan haratu, ha tau nafihi na posposi vaisatihi na tinapua tari, posposi halu tari, tapnetano, řomusuri peresi na retiřefen tari, ² ale sohena pipi matea mo pa vora, ha pa mařohu matan wai susu varařuhu atu Tanumen God mo lo silea, matan vara hinia, ha pa ulua na mauri řuhu sei ka juri hinia, ³ vara varařuhu ka inu rongorongona řomřuhu non Moli moiso, ⁴ ale ka lo mai isan Křisto. Enia natu, vatu atu mo mauri, tamlohi la tipahia, pani God mo viřonia, mo řuhuřuhu jea, ⁵ kamim sohena, ka sohena vatu sei la mauri, God mo voro kamim sohena iman Tanume Tapu matea, matan vara ha pa vao pñis tapu matea mata sile na silesilea sei God mo avulahi hinira hin Iesu Křisto. ⁶ Matan Retitapu mo lo vereea vara, 'Ka hitea, enau na lo tau na vatu matea hin Zion,*

enia tapulo pulo vatu sei na viřonia, mo řuhuřuhu jea,

ale sava tamlohi mo tau na nona rasua hinia,

řomina i pa sopo eři jovi hin te pongi matana.'

Isa 28.16

⁷ Ale matan haratu, isamim ka lo rasua, enia mo řuhuřuhu jea, pani isan la haratu la sopo rasua, Retiulia mo lo vereea vara,

'Vatu atu tamlohi voro ima la tipahia,

enia mo mai tapulo pulo vatu mata ima.'

Psa 118.22

⁸ Ale,

'Tamlohi la pa tialahalaha hinia,

enia vatu mata vai na tamlohi la jovi hinia.'

Isa 8.14

La tialahalaha hinia matan la sopo ooloo na nona reti, la jovi sohen haratu matan God mo taua sohena matara moiso.

⁹ Pani kamim vao tamlohi matea God mo viřoni kamim isana vao tamlohi tinatina-pua, ka vao pñis matea la supe, ka vao tamlohi tapu matea, ka vao tavera matea God mo tapuhi kamim vara nona, matan vara ha pa vereuli na nona vavahinau řuhuřuhu matuvana, enia mo tovi kamim ka malue na řořoha, ale ka mai na nona malarani řuhuřuhu.

¹⁰ 'Tiroma ka sopo nona vao tamlohi matea, pani nake, ka tamlohi non God,

tiroma ka sopo lavi te řomopoia,

pani nake, ka lavi na řomopoia non God.'

Hos 1.6, 9; 2.23

¹¹ La tapalaku řuhuřuhu, kamim ka sohena vinano hin varama nike, ale na lo retituetueni kamim hinia vara ha toho asau na masalo sasati sei mo lo vai na vuro na maurimim. ¹² Ha vai na posposi tataholo na naho tamlohi řořoha, hina purongo vara la pa vereea vara kamim tamlohi sasati, matan la pa hite na nomim vavahinau řuhu, ale la pa tahe na hijan God aulu matana hin pongi atu vara mo pala.

Ha Sile Na Ooloo Isan La Haratu La Aulu

¹³ Ha vai Moli i avulahi tarea na nomim ooloo na tamlohi tari la aulu, vara isan te Supe nona mara Rome sei mo lo tauri na suiha, ¹⁴ teni isan te nona tamlohi tatavera sei mo lo řulera vara la sile na talai isan la haratu la vai te hehe, ale vara la sile na hasohaso isan la haratu la vai te vavahinau řuhu.

¹⁵ Matan enia masalon God, vara ha vai na vavahinau řuhu matan i pa horo na řomvono non la haratu la rongorongono.

¹⁶ Ha lo toho sohena tamlohi materi, pani ha sopo řomřomia vara enia masapa matea mata vai te hina hehe, pani ha lo toho sohena volitusi non God. ¹⁷ Ha sile na ooloo isana tamlohi tari, ha opoi la haratu la rasua, ale ha matahun God, ha sile na ooloo isan supe matan Rome.

Slev

¹⁸ Volitusi, ha hase tau kamim na liman nomim tamlohi tavera na nomim ooloo tari, mo sopo isan la haratu la řuhu teni la řommalum purongo, pani isan la haratu la tamlohi řilangi sohena. ¹⁹ Matan God mo avulahi hin kamim matan nomim řomřomi hin God mo vai kamim ka lo turu řilangi

na rani ka lo lavi na rani řilangi mata nora posposi řilangi sei mo sopo matan te hinau

* 2:6: Zion: Zion enia Jerusalem

ka vai mo sati. ²⁰ Ka hite na sava hinau mo ruhu hinia vara ka lo turu rilangi na rani ka lavi na talai matan te nomim hehe? Pani vara ha vai na vavahinau ruhu, ale ha lavi na rani rilangi matana, pani ka turu rilangi hinia, haratu natu, God mo avulahi hin kamim matana.

²¹ God mo tovi kamim matan harihi, matan Křisto sohena mo lavi na rani rilangi matamim, mo tau na tovongi matea vara ha pa eri usuri na palona, ²² enia mo sopo vai te hehe teni te halu i malue na jingona. ²³ Na rani la lo veresatia, mo sopo kelera, ale na rani la silea na rongohaji, mo sopo talaira, pani tarea mo lo hase taua na liman God sei mo lo ari tataholo tarea. ²⁴ Enia mo hasena lavi nařihi na nořa hehe na epena hin rani atu mo sevu na talopeiopei matan vara řa pa mate na nořa mauri hehe, ale řa mauri na posposi tataholo. Ka mai ka ruhu matan rongohaji atu mo lo lavia na epena. ²⁵ Matan kamim ka jalio sohena sip-sip, pani nake ka mele mai isan tavuimim, enia haratu mo lo matahi na maurimim.

3

Hařai Lahi

¹ Ale sohena, hařai lahi ha toho na ruhu-ruhu suihan tuamim, hina purongo vara la sopo ooloo na reti non God, la pa rasua, mo sopo matan te reti ka verea, pani hina posimim purongo, ² vara la hite na nomim posposi vokevoke matan ka matahun God.

³ Ha sopo řomřomia vara sava ka vaia na epemim purongo i pa vai kamim ha ruhu, vara hinau sohena peri vulu teni, tau na hinau la vaia na gold, teni ka ruru na ruru ruhu, ⁴ pani ha řomřomi na sava mo vai kamim ka ruhu na lolo mapumim i pa sopo eri řovo sohena posposi řomatano, ale posposi malum, enira la řuhurujea jea na nahon God, ⁵ matan tuai mo sohena, hařai tapu enira la haratu la lo řomtoho hin God, enira la hasera vaira la ruhu na nora posposi ooloo isana tuara, ⁶ sohen Sarah mo ooloo hin Abraham mo tovia mara 'noku tamlohi tavera'. Ale kamim ka mai venatuna tataholo vara ha lo vai na hina ruhu, ale ha sopo matahu, ha turu rilangi vara la ngurunguru hin kamim hin te hinau mo sopo tataholo vara ha vaia.

Tamlohi Lahi

⁷ Tamlohi lahi, sohena, ha toho peresi na naroumim, pani ha sopo řomaliho vara enira la sopo rilangi sohemim, pani la malum matan enira hařai. Ha sile na ooloo isara matan enira sohemim, la lavi mauri paro atu God mo silea moiso, vara i vono, God i pa sopo rongona na nomim usiusi.

Kalesia Tari

⁸ Ale isoisona, kamim mo isoiso, ha matea na řomimim, ha řomřomi na tinapua, ha opoiopoi kamim na řomopoia, ha řomatano, ⁹ ha sopo kele na posposi sasati teni te retileji, mo vono, pani ha leřuhu, matan God mo tovi kamim vara ha pa lavi na nona leřuhu. ¹⁰ Matan Retitapu mo verea vara,

'Vara tea mo opoia vara i opoi na mauri, ale i hite na rani ruhu,

i pa isoiso na nona retiretieleji,
ale i isoiso na nona retiretihalu;

¹¹ i pa vahari na posposi hehe,
ale i vai na vavahinau ruhu,

i pa ale na tamata, i tutungua.

¹² Matan, matan Moli la lo kilau la haratu la tataholo,

ale perona la lo roi na nora usiusi.

Pani Moli mo lo turuleji isan la haratu la lo vai na hehe.'

Psa 34.12-16

¹³ Ale hare natu, i pa komo kamim vara ka opoia rilangi vara ha vai na posposi ruhu?

¹⁴ Pani hina purongo vara ka lo lavi na rani rilangi mata nomim posposi tataholo, God i pa leřuhu hin kamim matana. Ha sopo matahunira teni ha řomkaka. ¹⁵ Pani ha vai Křisto i Moli na maurimim, ale ha tatamahu tarea mata ha řarami tea vara i usi kamim hin te retiusia vara ka lo řomtoho hinia mata sava. ¹⁶ Pani ha vaia na posposi malum peresi na ooloo tavera, ha turu rilangi na posposi ruhu matan vara tea i veresatihi kamim matan te nomim vavahinau ruhu sei ka vaira hin Křisto, ale la pa mahanuhanu matana. ¹⁷ Vara masalon God mo sohena, mo mele ruhu vara ha lavi na rani rilangi mata nomim posposi ruhu ka lo vaira, mo jeua vara ha lavia mata posposi hehe.

¹⁸ Matan Křisto sohena, mo lavi na rani rilangi na rani mo mate, mata nořa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i eri laviřa řa mai isan God. Epena mo mate, pani mo mele turu, mo mauri na suihan Tanumen God.

¹⁹ Ale hin suihana sei, mo sivo mo retivujavujangi isana tanume tamlohi sei God mo lo taurilatira na varama mata mateia, ²⁰ isan la haratu sei la sopo ooloo hin God na pongi tuai sei God mo lo saovira hin rani atu sei Noah mo lo voro na botina. God mo juri na tamlohi mo limaravtolu purongo hin wai tavei tavera atu. ²¹ Wai tavei atu, enia tovongi matea mata malele paptijo vara i juri kamim usuri na suiha sauteterahi non Iesu Křisto. Paptijo enia tovongi matea mo sopo hoje nařihi na lumi epemim purongo, pani mo sohena řomtauhi ruhu matea ka lo vaia na řomimim ruhu isan God. ²² Ale Křisto sei mo sahe na tuka, mo

lo tauri na suiha non God na tavaluna, ale angelo peresi la haratu la lo tauri na suiha peresi la haratu la filangi, enira mo isoiso la lo toho na ruhuruhana.

4

¹ Ale, matan Křisto mo lavi na rongohaji na epena, ha tau na romimim vara ha lavi na rongohaji sohen Křisto, matan haratu mo tatamahu vara i lavi na rongohaji, mo isoiso na hehe, ² matan vara nake, i pa sopo usuri na masalona, pani i pa usuri na masalon God purongo i tikeli na isoiso maurina. ³ Matan tauuni matuvana moiso, ka lo vai na opoia nona masalo tamlohi řořoha, sohena nora posposi viriu, la lo usuri na romromi lumiha, la lo putu na wai filangi, la lo matavuhi mata livilavi na tinapua, la lo matavuhi mata inu na wai filangi, la lo vai na vaivaileu na nora lotu-lotu vono, ⁴ hin harihi, enira la vereea vara kamim ka tinapua, matan ka sopo mele vano peresira na nora posposi lumiha sei, mo mai sohena wai tavei, ale la lo veresatihi kamim matana, ⁵ pani enira la pa turu na nahon haratu sei mo tatamahu vara i ari la haratu la mauri peresi la haratu la mate. ⁶ Varařuhu, matan hinau atu natu, Křisto mo retivujavujangi na Retiřuhu isan la haratu la mate moiso, hina purongo vara la lavi na talai mata mate na epera, pani la pa efi mauri sohen God mo lo mauri.

⁷ Nake, isoiso hinau tari mo lo mai mariviti; ale matana, ha hase taurilati kamim hasemim, ale ha tatamahu mata nomim ususi, ⁸ hina aulu hin la hinau sei, enia vara ha opoiopoi kamim i filangi, matan opoia mo kamoti nařihi na hehe matuvana. ⁹ Ha roi na imamim isamim hatehateahi, ale ha sopo ngutungutu matana.

¹⁰ Ale sohen kamim hatehateahi ka lavi na otori isan God moiso, ha tuetueni kamim hinira, sohena volitusi řuhu sei la lo kilau na otori řuhu matuvana non God; ¹¹ vara tea nona enia mata i retivujavujangi, i pa reti sohen God mo lo retireti hinia, ale vara tea nona enia mata i tuetueni, i pa vaia hin suiha atu God mo silea isana, matan vara na hinau tari, God i pa lavi na hasohaso hin Iesu Křisto. Isan Křisto hasohaso tavera, ale suiha i pa toho na limana mata pongi tari tui tui. Amen.

Mauri Rilangi Nona Kalesia

¹² La tapala řuhuruřuhu, ha sopo mařurahi hin te rani sasati mata vaihite kamim. Ha sopo hitera sohena hina mařurahi hai la pala isamim, ¹³ pani ha avulahi jea na rani ka lo lavi na rani filangi sohen Křisto mo lavia, matan vara ha pa avulahi i tavera jea sohena hin rani atu hasohasona i pala na naho tamlohi.

¹⁴ Vara tamlohi la veresatihi kamim matan ka lo lavi na hijan Křisto, kamim la haratu sei la pa lavi na leřuhu, matan Tanume mata hasohaso tavera sei enia Tanumen God, mo lo taua isamim. ¹⁵ Pani i sopo tea isamim i lavi na rani filangi mata mo ori sohena tamlohi vili tamlohi matea teni te tamlohi vavanaho matea, teni te tamlohi lejleji matea, teni sohena tamlohi matea mo lo sohai na ngalsuna na hinau nona tinapua. ¹⁶ Pani vara tea i lavi na rani filangi matan enia kalesia matea, i pa sopo mahanuhanu matana, mo vono, pani i pa tahe na hijan God aulu na hijan Křisto. ¹⁷ Matan nake, aria i pa tapulo na lolo vaon God tiroma; ale vara i tapulo hinifa tiroma, i pa sohena sava isan la haratu la sopo oloolo na Retiřuhu non God? ¹⁸ Ale, 'Vara mo filangi jea vara tamlohi tataholo la efi juri,

i pa sohena sava isan la haratu

la lo usuri na posposi varama
teni la haratu la lo hehe?' *Prov 11.31*

¹⁹ Ale isan la haratu la lo lavi na rani filangi mata masalon God, mo tataholo vara na nora hahau tari la tau na maurira na limana matan enia mo lo romturu filangi tarea.

5

¹ Ale matan haratu, na opoia vara a sile na retituetueni isana patu tamlohi rasua isamim. Enau patu tamlohi rasua matea sohemim, na hitea sohena sava Křisto mo lavi nona rongohaji, ale enau sohena a pa lavi na hasohaso tavera atu God i pa vujangia i pa sopo tuai, ² ha tavui řuhu mata sipsip non God sei enia mo taura na limamim, ha kilau mamahunira na romavulahi sohen God mo opoia, mo sopo matan vara tea mo ngurunguru hin kamim matana; mo sopo mata mania, pani mata nomim romavulahi, ³ ha sopo vaia i filangi isan la haratu la lo toho na ruhuruřuhu limamim, pani ha vai na tovongi řuhu isana sipsip. ⁴ Ale hitahu vara Patu Tavui sipsip i pala, ha pa lavi na řongořongo nona supe sei řuhuruřuhuna i pa sopo efi tihai.

⁵ Ale kamim uluvou, ha oloolo hin la haratu la kalesia vajjaha. Kamim mo isoiso ha ruru na posposi romatano, matan 'God mo lo turuleji hin la haratu la lo mangisi,

pani mo lo tueni la haratu la lo romatano.' *Prov 3.34*

⁶ Ale matana, ha romatano, ha toho na ruhuruřuhu suiha tavera liman God matan vara na rani tataholo i pa tahe kamim aulu. ⁷ Ha sile vevuhi na nomim romkaka isana matan enia mo lo kilau kamim.

⁸ Ha tatamahu, ha lo kilau matan nomim meresahi Tiapolo, enia mo lo falihhi sohena

paheu matea mo lo aleale tamlohi vara i hanira.* ⁹ Ha turuhoroa, ale ha turu rīlangi na nomim rasua. Ha levosahia vara voraimim rīlihi na varama sohena la lo lavi na rani rīlangi tinatinapua sohen harihi.

¹⁰ Ale ha pa lavi na rani rīlangi mata makomo rani purongo, ale hitahuna, God mata rōmūhu tari, haratu sei mo tovi kamim ka mai na lolo hasohaso tavera non Iesu Kīsto mata rani tui tui, enia hasena i pa vai mamahuni kamim, ale i pa vai kamim ha turu rīlangi na nomim rasua, ale i pa vai kamim ha rīlarīlangi na mapumim, ale i pa vai kamim ha sopo efi juha na nomim rasua. ¹¹ I pa tauri na suiha mata rani tui tui tarea, amen.

Isoiso Retioloolo Non Peter

¹² Silas†, vorai sei mo sopo lo tope na nona retitauhi hin te rani na noku kilakilau, mo tueniau vara a uliuli isamim vara a pa vere vujavujangi kamim, ale vara a vereulia vara rōmūhu vararūhu non God mo sohen harihi. Ha turu rīlangi hinia.

¹³ Ale la haratu la rasu nike Rome, harasei God mo viŋonia sohemim, enira sohena la sohai na retioloolo isamim, ale natuku Mark sohena, mo sohaia isamim.‡ ¹⁴ Ha tapatapapai kamim hatehateahi na retioloolo mata opoia.

Tamata isamim tari sei ka tamlohi non Kīsto.

* 5:8: paheu: Peter mo vere na lion nike. † 5:12: Silas: hin Greek la ulia hija sei vara Silvanus, pani enia Silas sei tapalan Paul. ‡ 5:13: 5.13 Rome: Peter mo lo vere Babylon, Rome enia retilulu matea matan Babylon.

2 Peter Harua Leta Peter Mo Ulia Leta Nike

Peter mo ulia vara kalesia la pa hahau sohena God mo opoia na maurira (1.3), ale vara la pa taurilati na retivararūhu sei la lavia moiso (1.12).

Mo retiōafoahaira mara vara pōvet peresi na tamlohi vujangi haluhalu la unu na vao kalesia matan vara la tikaulejira na retivararūhu, pani Moli i pa sile na talai isana tamlohi sohen haratu (2.1–22). Kalesia la pa turu rilangi hin la rani atu, la pa hahau na mauri tataholo ale la pa tovongi na tovongi rūhu. La pa hase taurilatira, ale la usuri na malele lelevosahi, peresi na romperavu, ale vujangi na posposi opoia isana tamlohi tari.

Hina purongo vara tamlohi na varama la sopo rasua, ƒa pa kilau toho matan rani atu Iesu i pa mele pala hinia (3.1–18)

‘La tapalaku rūhuru, ha sopo kilau purongoi hinau nike, vara isan Moli, rani matea mo sohena tauni mo tari vahatea (1000) ale tauni mo tari vahatea mo sohena rani matea. Moli mo sopo vaimalum vara i mařivisi na nona retitauhi sohena tamlohi hai la lo romromia vara enia mo lo vaimalum, pani mo lo romperavu matamim, matan mo sopo opoia vara tea i tihai, pani vara tamlohi tari la posi na nora hehe.’ (3.8–9)

Hin Leta Nike

1. Reti ooloo peresi na usiisi (1.1–2)
2. Kalesia la pa lo toho sohena sava (1.3–15)
3. Hasohason Kristo (1.16–21)
4. Tamlohi vujangi peresi na Pōvet haluhalu (2.1–22)
5. Vararūhu Iesu i pa mele mai (3.1–18)

Retioloole

¹ Enau Simon Peter, volitusi matea, ale vahařule non Iesu Kristo.

Na lo uliuli isan la haratu sei la lavi na rasua rūhuru sohen kamam. Iesu Kristo sei mo sile rasua sei isařa, enia nořa God, nořa Jujuri, enia natu, mo vaiřa ƒa tataholo na nahon God, ² noku usiisi vara God i pa leřuhu hin kamim na nona romfuhu peresi na nona tamata vara la pa tueni kamim vara ha ulua na nomim lelevosahi hin God peresi Iesu nořa Moli.

Ulua Na Lelevosahi Hin God

³ Suihan God mo sileřa na hinau tari mata mauri, la tueniřa na nořa hahau na mauri sei sohen God mo opoia, la mai isařa na malele lelevosahi hin Iesu, ale enia

haratu mo toviřa matan vara ƒa pa lavi na nona hasohaso peresi na nona posposi rūhuru. ⁴ Hin nona suiha tavera atu, mo sileřa na nona retitauhi tavera matuvana, la rūhuru jea. Mo retitauhi vara ƒa pa hitevosahia vara maurin God sei mo lo mauri na mauriřa mo sohena sava, ale ƒa pete jelu moiso na varama peresi na nona posposi lumiha sei mo lo komo na mauri tamlohi hinia.

⁵ Ale matana, ha vaihitea rilangi vara ha sořotahi na nomim rasua peresi na posposi rūhu, ale nomim posposi rūhu peresi na lelevosahi, ⁶ ale nomim lelevosahi peresi na posposi mata hase taurilati kamim, ale nomim posposi mata hase taurilati kamim peresi na posposi turu rilangi, ale nomim posposi turu rilangi peresi na posposi sei God mo opoia, ⁷ ale nomim posposi sei God mo opoia peresi na nomim opoiopoi kamim, ale nomim opoiopoi kamim peresi na rompoia vararūhu. ⁸ Vara ka lo ulua hin la posposi akerihi, ale la lo vua rūhu jea, i pa vujangia vara ka sopo toho purongo, ale nomim vavahinau mo lo ulua matan ka lo tutungui na lelevosahi isan nořa Moli Iesu Kristo. ⁹ Pani vara tea mo sopo ulua hin la posposi rūhu sei, enia mo matavuso, ale mo sopo kilau vano rove, matan mo romaliho vara God mo hoje nařihi na nona hehe mata maurina tuai moiso.

¹⁰ Ale matana, la voraiuku peresi na vevoraiuku, ha vujangi mamahunia i memera vara God mo tovi kamim, ale vara mo viřoni kamim vararūhu, matan vara ha lo vai la hinau rūhuru sei ha sopo eři tialahalaha hin te rani. ¹¹ Matan hin malele sei God i pa vai na malele i roi i tavera jea vara ha pa unu hin mauri atu God mo aulu hinia sei mo lo toho jejeu, enia nořa Moli, nořa Jujuri Iesu Kristo.

Ha Tapurongo Na Retitapu

¹² Matana, tarea enau na opoia vara a lo vere roħarohai kamim hin la hinau rūhuru sei. Hina purongo vara ka pete lelevosahia moiso, ale ka lo turu rilangi na retivararūhu sei ka pete lavia moiso. ¹³ Pani na lo romromia vara mo tataholo vara a lo vere roħarohai kamim hinia nake na pa lo mauri, ¹⁴ matan na lelevosahia vara a pa mate i pa sopo tuai sohen nořa Moli Iesu Kristo mo vujangi mo mera isaku. ¹⁵ Na opoia rilangi vara hitahu hin rani atu vara na vano, ha pa eři mele romromi la hinau sei.

¹⁶ Matan kamam kama sopo usuri te sora-sora la vere mamahunia mata halu sei tamlohi la opoia vara la rongora hin rani atu kama lo vere mamahuni kamim na suiha peresi na mele mai non nořa Moli Iesu

Kristo, ale kamam kama hitea na matamam epena sei mo memera tavera hin rani atu.

¹⁷ Matan God Tama mo sile na oloolo peresi na hasohaso tavera isana, ale leo matea mo tai isan God na masapa mo memera tavera atu, ale leo sei mo mai isana mara, “Harihi enia Natuku na opoia mo tavera jea, ale enau na avulahi tavera hinia.” ¹⁸ Kamam sohena, kama rongo leo atu mo tai na tuka, matan kamam kama lo toho peresia hin vutivuti tapu atu.

¹⁹ Matana, kama efi mele romfilangi na retisohai nona pfovet. Ha kilau mamahuni na sava la ulia matan nora reti la sohena lamu mo lo memera na jara fofoha i tikeli rani atu Kristo i mele pala hinia, ale sohena majou matea, merana filangi i pa merasahi na mapumim. ²⁰ Tiroma hinau mo aulu, enia vara ha lo levosahia vara mo sopo te retimangovi hatea i tai isana pfovet na romira hasera, ²¹ matan mo sopo te retimangovi hatea na Retitapu i malue na masalon te tamlohi, pani tamlohi la retireti sohena God mo opoia. Ale la retireti matan Tanume Tapu mo mangovira na retireti.

2

Tamlohi Vujangi Haluhalu

¹ Pani pfovet haluhalu sohena la pala isana tamlohi tuai, ale sohena, tamlohi vujangi haluhalu la pa pala isamim, enira la pa lo vujangi luhu na nora halu, vujangi atu i pa komo na mauri tamlohi, enjora, la pa vunvuni na vavahinau non Moli sei mo volituhura, ale matana, talai mata komo na maurira i pa mai vilavila isara. ² Moiso, tamlohi matuvana la pa usuri na nora posposi lumiha, ale matara, tamlohi la pa veresatihi na malele mauri sei mo usuri na retivaraufuhu. ³ Ale mata nora romusuri la pa haluhalu kamim na nora retimemeji. Ale nora talai sei God mo taua tuai tuai moiso mo sopo toho purongo, ale nora rani komo mo sopo peka.

⁴ Matan vara God mo sopo kilau purongoi na angelo tuai mata nora hehe, pani mo pulahira la sivo Tatarus na varama matea, ale hin jara atu mo pesilatira na moru fofoha tavera, la pa toho atu i tikeli na rani aria tavera. ⁵ Ale vara God mo sopo kilau purongoi na tamlohi na varama tuai tuai, pani mo juri Noah sei mo lo retivujavujangi na malele mata mauri tataholo, peresi na tupu limaravrua tinapua hin wai tavei tavera atu mo mai isana tamlohi sasati na varama, ⁶ ale vara God mo posi na taon tavera non Sodom enia Gomorrah la mai patmakovi, enia mo silera na talai matan vara la tihai, mo vaia sohena tovongi matea

vara tamlohi la pa levosahia vara i pa sohena sava isana tamlohi sasati, ⁷ ale vara God mo juri tamlohi tataholo atu Lot mata romina mo kaka jea mata posposi sasati jea nona tamlohi sasati atu, ⁸ matan tamlohi tataholo atu Lot, mo lo toho peresira na rani hatehateahi, ale romina mo lavi na rani filangi na sava mo lo rongora, ale mata nora vaivaileu la lo vaira na nahona.

⁹ Ale Moli God mo levosahia sohena sava vara i pa juri na tamlohi ruhu na nora rani filangi, ale mo levosahia sohena sava vara i pa lo sile na talai isana tamlohi hehe i tikeli na rani aria tavera, ¹⁰ ale, mo mele filangi jea isan la haratu la lo hahau usuri na posposi lumiha sei mo lo komo na maurira, enira la sopo opoia vara tea i aulu hinira. La ngurunguru jea, ale la lo usuri na masalora purongo, la sopo matahu vara la veresatihi la angelo suiha sei la aulu jea na merara tavera na tuka, ¹¹ ale angelo, hina purongo vara la aulu jea na suiha peresi na filangi mo jeu la tamlohi nike, la sopo veresatihi la angelo suiha atu, na nora aria na nahon Moli.

¹² Pani la tamlohi nike, la sohena maji romira mo vono, la vora matan vara la pa taurira la vilimateira, la lo verelehilehi na hinau la sopo levosahi te hinau hinira, ale nora posposi sasati i pa vano i tihai peresira. ¹³ La lo lavi na rani filangi mata nora hehe. La opoia jea vara la vai na hehe na jara tavera. La lo toho isamim sohen hapila sasati sei la komo na nahon tamlohi matea, matan la lo opoia jea na rani la lo hanhani matavuhi peresi kamim na nora halu, ¹⁴ la sopo kilau purongoi na harai, matan matara mo marivi na vaivaileu, la lo marohati mata hehe. La lo jine na tamlohi romira mo lo rua. Mapura la levosahi mamahuni na nora hanmarua pono. God mo pete vi fonira moiso mata komo. ¹⁵ La sopo mele usuri na malele tataholo, ale la jalio, la usuri na malelen pfovet Balaam tuai, natun Beor sei, mo opoia vara i vai na hina sati mata mania purongo. *Num 22.2–20* ¹⁶ Pani God mo reti filangi isana mata nona hehe; mo vai donki atu mo efi retireti, pa donki atu mo reti isana, ale mo horo Balaam pa pfovet atu na nona posposi rongorongono vono.

Num 22.22–35

¹⁷ La tamlohi atu, la sohena patu wai mamasa, ale la sohena haravu sei fofo tavera la lo pulahira la lo vano, God mo tau mamahuni na fofoha puaha matara. ¹⁸ Nora retireti tavera la vuruvuru purongo, la retireti matan vara la reve la haratu la pa jelu purongo na masalo varama, matan vara la usuri na nora posposi lumiha sasati.

* 2:4: Tatarus: Tatarus enia hijan jara atu mo lo toho atano na pulo varama mata matea.

¹⁹ La retitauhi isara vara la pa materi, pani la tamlohi atu, enira la slev matan mauri atu mata komo purongo. Sava hinau mo jeu na tamlohi enia mo slev hinia. ²⁰ Matan, vara la pete rovo moiso na posposi sasati mata varama mata nora levosahi hin nora Jujuri, Moli Iesu Křisto, ale la mele kali na posposi sasati, suihara mo isoiso, maurira la pa mele sati i jeu haratu tiroma. ²¹ Matan i pa mele řuhu isara vara la sopo levosahi na malele tataholo, mo jeu haratu vara la levosahia moiso, pani la mele vaharı na retileu tapu sei God mo silea isara tiroma. ²² Sava retilevosahi varařuhu mo vereia mo masese isara mara, 'Viriu mo mele hani na luana, ale poi sei mo loloso moiso mo mele hilu vano vara i vuluvului na makamaka.' *Prov 26.11*

3

Rani Pala Non Moli Mo Lo Mai

¹ La tapalaku řuhuruřu, ka levosahia vara harihi enia harua leta na ulia isamim. Na lolon la leta nike, na lo retiřořoahai na nomim řomřomi řuhu, ² matan vara ha mele řomřomi na reti nona přovet tapu tuai peresi na retileu non Moli nořa Jujuri atu sei nomim vaharıle la silea isamim.

³ Hinau tiroma vara ha pa levosahia, enia vara na pongi hitahu, tamlohi vaivai na tamlohi la pa vaivai na tamlohi, moiso la pa usuri na masalora sasati, ⁴ la pa vereia vara, 'Nene nona retitauhi sei mo vereia vara i pa mele mai? Hin rani atu tamamam la mate, hinau tari la pa lo toho sohena pongi tiroma sei God mo vai na hinau tari mo tikeli nake.'

⁵ Matan, enira la lo kilau purongoi na retivararuřu sei vara reti non God mo vai na masapa aulu mo lo toho tuai tuai jea, ale mo vai na varama narıhi na wai, ale mo vai na varama hin wai atu, ⁶ ale hin malele atu natu wai tavei mo putehi na varama tuai, ale mo tihai. ⁷ Pani hin reti non God atu natu, nake God mo tatamahuni na masapa peresi na varama mata hapu, la pa toho i tikeli rani aria tavera atu peresi na komokomo nona tamlohi sasati.

⁸ La tapalaku řuhuruřu, ha sopo kilau purongoi hinau nike, vara isan Moli, rani matea mo sohena tauni mo tari vahatea (1000) ale tauni mo tari vahatea mo sohena rani matea. ⁹ Moli mo sopo vaimalum vara i mafivisi na nona retitauhi sohena tamlohi hai la řomřomia vara enia mo vaimalum, pani mo lo řomperavu matamim, matan mo sopo opoia vara tea i tihai, pani vara tamlohi tari la posi na nora hehe. ¹⁰ Pani rani non Moli i pa mai sohena tamlohi vavanaho matea, tamlohi la pa hutura hinia, masapa i pa tihai na řořoa hapu tavera, ale majou peresi na vitusarasara tari la pa koru la

tihai, ale varama peresi na vavahinau nona tamlohi hinia la pa toho na jara tavera.

¹¹ Matan la hinau sei la pa tihai sohen harihi, kamim ha pa usuri na posposi mo tapu, ale la řuhu sohen God mo opoia na maurimim, ¹² ha lo saovia, ale ha vaihitea vara rani non God atu i pala vila. Matan God i pa jilangi na masapa na hapu, ale i pa tihai, ale hinau tari na masapa la pa lolo hin tutuni hapu atu. ¹³ Pani enfa řa lo usuri na nona retitauhi matan tuka paro peresi na varama paro sei mauri tataholo i pa toho hinira.

¹⁴ Matana, la tapalaku řuhuruřu, matan ka lo saovi la hinau sei, ha vaihitea vara i pa sopo vilei te hina lumihia teni te hinau i eri tuvai kamim hinia, ale ha toho na tamata.

¹⁵ Ale ha hitevosahia vara řomperavu non nořa Moli mo lo sile na masapa matan vara tamlohi la pa eri juri hinia. Mo sohen vorarıřa Paul mo uliuli matana moiso usuri lelevosahi atu God mo lo silea isana — ¹⁶ mo sohen mo lo vai na nona leta tari na rani mo lo retireti hin la hinau nike. Te hinau mo ulira la řilangi vara tea i eri levosahira, harihi, tamlohi sei la sopo lelevosahi peresi la haratu la lo řom rua, la lo pori na řaramira, ale la lo pori na řarami retireti na Retitapu sohena — pani la pa vano na nora komo matan posposi sei.

Isoiso Reti Non Peter

¹⁷ Ale matana, la tapalaku řuhuruřu, matan ka levosahi la hinau nike moiso, ha lo kilau! Ha pa sopo majinga vara te tamlohi vaivaileu i tikauleji kamim na nona haluhalu, vara i vono, ha pa jovi na nomim pulo turu řilangi na retivararuřu sei ka lo turu hinia moiso. ¹⁸ Pani kamim ha ulua na hina řuhu peresi na levosahi non nořa Moli, nořa Jujuri Iesu Křisto. Isana, řa pa sile na hasohaso tavera nake pongi tui tarea, amen.

1 John Tiroma Leta John Mo Ulia Leta Nike

John mo opoia vara tamlohi la rasua vara God i pa romiña hin rani atu vara la taviti na noña hehe (1.9).

Tamlohi la vujangia vara la rasua varaŕuhu vara la lo opoi opoira (3.11–24). Matan God enia opoia, nona tamlohi varaŕuhu la pa sohena (4.1–21). Vara tamlohi rasua la jeu na nora hehe la pa hahau na malelen opoiopoira, ale la rasua vara Iesu Natun God enia Jujuri varaŕuhu mo mai tamlohi vara i mate matafa (5.1–12).

'Reti matan mauri atu
mo lo toho tuai tiroma
na pongi tiroma,
... haratu kama hitea na matamam' (1.1)

Hin leta nike

1. Reti non God mo sile na mauri (1.1–4)
2. God enia malarani, Křisto enia noña tovongi (1.5–2.6)
3. Retileu paro (2.7–17)
4. Meresahi non Křisto peresi na tamlohi non God (2.18–3.10)
5. Opoia non God peresi na noña opoia (3.11–4.21)
6. Jeu na varama (5.1–21)

Reti Sei Mo Sile Na Mauri

¹ Kama lo vereuli kamim na reti mata mauri atu mo lo toho tuai na pongi tiroma, haratu kama rongoa, haratu kama hitea na matamam, ale haratu kama kilaua, ale kama tikelia na limamam tataholo, ² mauri atu mo pala, kama hitea, ale kama lo vereuli na sava kama hitea moiso. Nake, kama lo vere kamim hin mauri tui atu, haratu mo lo toho peresi God Tama, ale nake mo asi isaŕa. ³ Kama lo vere varaŕuhu na sava kama hitea, ale kama rongoa matan vara ha pa eri lavi na mauri tui sei peresi kamam, moiso enfa ŕa pa matea peresi Tama enia Natuna, Iesu Křisto. ⁴ Kama lo uli na hinau tari isamim matan vara ha pa avulahi jea.

God Enia Malarani

⁵ Haranike enia Retiŕuhu kama rongoa isana, ale kama lo vereia isamim: God enia malarani, ale mo sopo te ŕofoha hinia.

⁶ Vara ŕa vereia vara ŕa lavi na mauri peresi God, ale ŕa lo toho na ŕofoha, enfa ŕa lo halu, ŕa sopo hahau usuri na retivararuŕu. ⁷ Pani vara ŕa lo hahau na malarani sohen God mo lo toho na malarani, enfa ŕa pete pulutahi hin mauri atu moiso peresi na tatuafa, ale faen Iesu Natuna mo lo hoje nafihi na noña sasati.

⁸ Vara ŕa vereia vara mo sopo te noña sasati, ŕa lo haluŕa hasefa, ale retivararuŕu mo sopo toho isaŕa. ⁹ Vara ŕa taviti na noña sasati isan God, God i pa vai na hina tataholo sohen mo vereia isaŕa moiso mara, i pa romi na noña hehe, ale i pa vai na noña hehe tari la sopo vaiŕa ŕa lumiha na nahona.

¹⁰ Pani vara ŕa vereia vara ŕa sopo vai te hina sasati, ŕa lo vereia vara God enia tamlohi halu matea, ale nona reti mo sopo toho isaŕa.

2

Křisto Mo Tueniŕa

¹ La natuku, na lo uli la hinau sei matan vara ha sopo vai na hina sasati, pani vara ha vai na hina sasati, noña tuetueni matea mo lo toho peresi God Tama, enia Iesu Křisto haratu mo tataholo. ² Křisto mo hase silea vara i voli nafihi na noña sasati, pani mo sopo matan noña hasefa, pani peresi na hina sasati nona tamlohi tari na varama.

³ Ra lo levosahia vara ŕa levosahi God hin malele akerihi: Ra lo levosahi God vara ŕa lo oloolo na nona retileu. ⁴ Vara tea mo vereia vara mo levosahi God, pani mo sopo oloolo na nona retileu, enia tamlohi halu, ale hina varaŕuhu mo sopo toho isana, ⁵ pani haratu mo lo oloolo na nona reti, opoia non God mo jea varaŕuhu isana. Hin malele nike, ŕa pa levosahi i ŕuhu vara enfa ŕa lo toho hinia: ⁶ haratu mo vereia vara enia mo lo toho hinia, enia i pa hahau sohen Křisto mo hahau.

Retileu Paro

⁷ La tapalaku ruhuŕuhu, na sopo uliuli isamim matan vara a mele sile kamim hin te retileu paro, pani enia pa haratu la lo sile kamim hinia tiroma moiso, ale enia retireti atu ka pete rongoa moiso, ⁸ pani retileu atu na lo ulia isamim mo sohena retileu paro matea, ale mo lo toho na maurin Křisto peresi na maurimim, matan ka hite na ŕofoha mo lo majara, ale malarani varaŕuhu mo lo sasarami moiso.

⁹ Haratu mo lo vereia vara mo lo toho na malarani, pani mo lo hitesatihi na voraina, enia mo pa lo toho na ŕofoha mo tikeli nake. ¹⁰ Haratu mo lo opoi na vorain Křisto, enia mo lo toho na malarani, ale mo sopo tea i eri jalio mata nona vavahinau. ¹¹ Pani haratu mo lo hitesatihi na vorain Křisto, mo pa lo toho na ŕofoha, mo lo hahau na ŕofoha, ale mo sopo levosahi na jara mo lo vano ea, matan ŕofoha mo vusohi na matana.

¹² La natuku, na lo uliuli isamim matan nomim sasati God mo romiŕa matan Křisto. ¹³ La haratu la vajiaha, na lo uliuli isamim matan ka levosahi haratu mo lo toho atu tiroma na tapulon vavahinau. La uluvou,

na lo uliuli isamim matan ka jeu Tiapolo enia pulo sasati. ¹⁴ La natuku, na lo uliuli isamim matan ka levosahi Tama moiso, ale la vajiaha, na lo uliuli isamim matan ka levosahi haratu mo lo toho tiroma moiso na tapulo vavahinau. La uluvou, na lo uliuli isamim matan ka suiha, ale reti non God mo lo toho hin kamim, ale ka jeu haratu enia pulo sasati.

¹⁵ Ha sopo opoi na varama teni te hinau non varama. Vara ha opoi na varama, ha pa eri opoi Tama sohena sava? ¹⁶ Matan hinau na varama mo sohen harihi: romjea na masalom sasati, romjea na hinau ko hitea, hapahapa na nom hinau, ale la hinau sei la sopo tai isan Tama, pani la tai na varama purongo, ¹⁷ moiso varama sei mo lo vano vara i tihai peresi na masalona tari, pani haratu mo lo vai na masalon God enia i pa toho jejeu.

Meresahi Non Kristo La Pala

¹⁸ La natuku, nake enia isoiso rani. Sohena ka pete rongoa moiso vara meresahi non Kristo la lo mai, ale meresahi matavana non Kristo la pala moiso, ale matana fa levosahia vara pongi hitahu mo mai moiso. ¹⁹ Hina purongo vara la tamlohi atu la tai na vaofa, pani enira la sopo tatuafa. Vara la pa lo tatuafa varafuhu, la pa lo toho peresifa. Pani la malue isafa matan vara i memera vara enira la sopo tatuafa.

²⁰ Pani kamim mo isoiso ka levosahi harihi moiso, matan God Tapu mo vifoni kamim. ²¹ Na sopo uliuli isamim matan ka sopo levosahi na retivarafuhu, pani matan ka levosahia moiso, ka pete levosahia moiso vara retihaluhalu i pa sopo eri tai isana retivarafuhu. ²² Hare natu, enia tamlohi halu, haratu sei mo lo vereea vara Iesu enia mo sopo Kristo varafuhu sei God mo vifonia. Vara tea mo vereea sohena, enia natu, meresahi non Kristo, matan mo rohu hin Tama peresi Natuna. ²³ Haratu mo rohu hin Natuna mo sopo lavi Tama. Pani haratu mo vereea vara Iesu enia Natun God, Tama mo lo toho peresia. ²⁴ Moiso, vara ha turu filangi tarea na sava retireti ka rongoa tiroma moiso, ale ha pa lo matea na mapumim peresi Tama enia Natuna. ²⁵ Mauri tui enia retitauhi sei mo retitauhi hinia isafa.

²⁶ Enau na lo uliuli isamim matan la haratu la lo tikauleji kamim, ²⁷ pani Kristo mo vifoni kamim na Tanume Tapu, ale mo lo toho hin kamim. Ale kamim ha pa sopo mele opoi te tamlohi vujangi tinapua vara i vujangi kamim. Pani mo ruhu vara ha toho hin Kristo, ale ha usuri na sava hinau Tanume Tapu mo vujangi kamim hinia matan hinau tari mo vujangia mo varafuhu, mo sopo te hina halu hinia.

La Natun God

²⁸ Natuvarihia, mo ruhu vara ha toho jejeu hin Kristo, matan vara hin rani atu i mele mai, fa pa sopo eri matahu, ale fa pa sopo mahanuhanu hin te hinau hin rani atu, ²⁹ matan ka levosahia vara Kristo mo tataholo, ha pa levosahia sohena vara haratu mo lo vai na hinau mo tataholo, enia mo vora isana.

3

¹ Ka hite na opoia tavera non God Tama isafa mo sohena sava, matan mo toviifa vara enfa natuna, ale mo sohen haratu natu. Pani tamlohi varama la sopo levosahia matan la sopo levosahi God Tama. ² La tapalaku fuhufuhu, enfa natuna nake, pani mo sopo pala vara fa pa sohena sava hin pongi hitahu, pani fa levosahia vara hin pongi atu Kristo i mele pala hinia, enfa fa pa sohen Kristo, matan enfa fa pa hitevosahia i ruhu vara enia mo sohena sava. ³ Ale la haratu la romtoho sohen harihi, la hase vaira la vokevoke ruhu, sohen Kristo enia mo vokevoke ruhu.

⁴ La haratu la lo vai na hehe tarea, enira la lo vaivaileu tarea, ale hehe enia vaivaileu. ⁵ Ale ka levosahia vara Kristo mo pala vara i lavi narihi na hehe, ale mo sopo te hehe isana. ⁶ Haratu la lo toho isana la sopo eri vai na hehe tarea, vara tea mo hehe tarea enia mo sopo levosahi Kristo, ale enia mo sopo hitevosahia teni levosahia hin te rani. ⁷ Natuvarihia, ha sopo tinafihia vara tea i halu kamim! Harepu mo vai na hinau tataholo tarea enia mo tataholo mo ruhu sohen Kristo mo tataholo. ⁸ Harepu mo lo hehe tarea enia non Tiapolo. Tiapolo mo lo hehe tiroma na tapulo varama mo tikeli nake. Pani Natun God mo mai vara i pa vaikomokomo na vavahinau non Tiapolo. ⁹ Haratu la vora isan God, la sopo eri vai na hehe tarea matan suiha God mo lo toho na maurira, mo vaira la mai natuna, ale matan haratu la pa sopo eri vai na hehe tarea.

God Enia Opoia

¹⁰ Ha pa levosahi la haratu la natun God isan la haratu la natun Tiapolo sohen harihi: haratu la sopo taura vara la vai na hinau i tataholo tarea la sopo non God, ale sohen haratu, la sopo opoi na voraira. ¹¹ Pani retisohai sei enia retisohai atu ka rongoa moiso na pongi tiroma vara, fa pa opoiopoi, ¹² moiso, vara ha sopo sohen Cain atu tuai sei mo vilimatei tasina, enia non Tiapolo. Mo vilimateia mata sava? Mo vaia matan tarea tasina enia mo lo vai na hinau mo lo tataholo, pani enia mo lo vai na hinau mo lo hehe matan enia tamlohi hehe. *Gen 4.8*

¹³ La voraike peresi na vevoraiku fuhufuhu, ha sopo mafurahi tavera vara tamlohi varama la rohu hin kamim. ¹⁴ Ra

levosahia vara ƒa tai na mateia moiso ƒa vano na mauri moiso matan ƒa opoi na voraiƒa kalesia. Pani haratu mo sopo te nona opoia, enia mo pa lo toho na suiha mateia.

¹⁵ Vara tea mo lo hitesatihu na voraina, enia tamlohi vili tamlohi matea moiso, ale ka levosahia vara mo sopo te tamlohi vili tamlohi hatea vara mauri tui mo lo toho isana. ¹⁶ Ra levosahia vara opoia vararuhu enia hin posposi sei; Iesu mo sile na maurina mataƒa, ale matan haratu, mo ruhu vara ƒa sile na mauriƒa mata vorai kalesia tinapua. ¹⁷ Ale matana, vara tea nona hinau mo matuvana, ale mo hite na vonana matea mo vejuveju na hinau matea, pani mo sopo tuenia, opoia non God mo lo toho hinia sohena sava? ¹⁸ Natuvarihi, ƒa sopo retireti vono purongo, pani ƒa pa opoi na tinapua na noƒa vavahinau peresi na retivarafuhu.

¹⁹ Vara ƒa opoi na tinapua ƒa lo vujan-
gia vara enƒa non retivarafuhu, ale romiƒa la sopo tialahalaha na nahon God, ²⁰ hina purongo vara romiƒa la lo ariƒa hin te hinau, God mo aulu na romiƒa, ale enia mo levosahi na hinau tari la varafuhu. ²¹ La tapalaku ruhuƒuhu, vara romiƒa la sopo hase ariƒa na nahon God, enƒa ƒa pa eri romƒilangi vara ƒa mai mariviti isana, ²² moiso enia i pa sileƒa na sava hinau ƒa usia isana matan ƒa opoia vara ƒa oloolo na nona retileu, ale tarea ƒa lo vai na sava God mo avulahi hinia. ²³ Ale God mo sile nona retileu akerihi: vara ƒa tau na noƒa rasua hin Natuna Iesu Kƒisto, ale ƒa opoiopoiƒa sohena Iesu mo retileu hinia isaƒa moiso. ²⁴ Ale haratu mo lo oloolo na retileu non God, mo lo toho hin God, ale God mo lo toho hinia, moiso hin malele akerihi natu, ƒa levosahia vara God mo lo toho isaƒa, matan Tanumena atu mo silela mo lo toho isaƒa.

4

Ha Pa Rasu Na Sava Hinau

¹ La tapalaku ruhuƒuhu, ha sopo rasu na tanume tari vara la vereea vara la lo retireti na suihan Tanume Tapu, pani ha vaihitera vara la tai isan God teni mo vono, matan pƒovet haluhalu matuvana la vano na varama moiso, ² ale kamim ha pa eri levosahia varafuhu vara sahara mo tai isan God sohen harihi: haratu mo vereea vara Iesu enia Kƒisto, ale vara mo vereea vara Iesu mo mai tamlohi varafuhu, tanume atu natu mo tai isan God. ³ Pani haratu mo sopo taviti vara Iesu enia Kƒisto mo sopo tai isan God, ha pa levosahia vara enia meresahi non Kƒisto sei ka rongoa moiso vara i pa mai, ale nake mo pete toho na varama moiso.

⁴ Natuvarihi, kamim non God, ale kamim ka jeu la meresahi atu moiso matan Tanumen God mo lo toho hin kamim, ale enia

mo suiha mo jeu haratu mo lo toho na varama. ⁵ La meresahi nike, la tai na varama, ale matana, tamlohi na varama mo tapurongo isara matan la lo retireti na masalon varama.

⁶ Enƒa non God, ale la haratu sei la levosahi God la pa tapurongo isaƒa, pani la haratu la sopo levosahi God la pa sopo tapurongo isaƒa. Hin posposi atu natu, ƒa pa eri levosahia i ruhu vara hare mo lo retireti: Tanume Tapu atu mo varafuhu teni te tanume haluhalu.

⁷ La tapalaku ruhuƒuhu, ƒa pa opoiopoiƒa mata opoia mo tai isan God, ale haratu mo lo sile na opoia, enia mo vora isan God, ale mo levosahi God. ⁸ God enia opoia. Ale vara tea mo sopo opoi na tinapua, enia mo sopo levosahi God. ⁹ God mo vuhesi na nona opoia isaƒa sohen harihi: mo rule Natuna vorahese mo mai na varama matan vara ƒa pa mauri hinia. ¹⁰ Pulo opoia varafuhu enia mo sohen harihi; enƒa ƒa sopo opoi God tiroma, pani God mo opoiƒa tiroma. God mo rule Natuna vara i voli naƒihi na noƒa sasati. ¹¹ La tapalaku ruhuƒuhu, matan God mo opoiƒa mo tavera sohen harihi, mo ruhu vara ƒa pa opoiopoiƒa.

¹² Tea mo sopo lo hite God hin te pongi, pani vara ƒa opoiopoiƒa, God mo lo toho hiniƒa, ale nona opoia mo lo toho varafuhu na mapuƒa.

¹³ Matan God mo sileƒa na Tanumena, ƒa levosahia vara enƒa ƒa lo toho hinia, sohen enia mo lo toho hiniƒa. ¹⁴ Ale kama hitea, kama lo vereulia isana tinapua vara God mo rule Natuna vara i mai Jujuri mata varama. ¹⁵ Vara tea mo taviti vara Iesu enia Natun God, God mo lo toho isana, ale enia mo lo toho isan God. ¹⁶ Ale ƒa levosahi mo ruhu moiso, ƒa rasua vara God mo opoiƒa varafuhu. God enia opoia. Vara ƒa lo opoiopoiƒa, enƒa ƒa pa matea na mapuƒa peresi God, ale enia i pa toho pere-siƒa. ¹⁷ Hin malele akerihi, opoia mo jea varafuhu matan vara ƒa pa eri romƒilangi hin rani ariƒa atu, ale matana, ƒa pa hahau sohen Kƒisto mo lo hahau na varama. ¹⁸ Opoia jea sohena, i pa levuti naƒihi na matahu. Ale haratu mo lo matahu enia mo matahu mata romƒomi mata ariƒa, ale mo vujangia vara nona opoia mo pa lo makire.

¹⁹ Ra opoi God matan God mo opoiƒa tiroma. ²⁰ Pani vara tea mo vereea vara mo opoi God, pani mo sopo opoi na voraina, enia tamlohi halu. Mo sopo eri hite God nake, pani mo sohena sava natu, vara mo vere vara mo opoi God, pani mo sopo opoi na voraina mo eri hitera? ²¹ Retileu sei God mo sileƒa hinia mo sohen harihi, “Haratu mo opoi God, enia i pa opoi na voraina.”

5

Jeu na Varama

¹ La haratu la rasua vara Iesu enia Křisto, enira natun God. Ale la haratu la opoi God Tama, la pa opoi na natuna tari. ² Ra levosahia vara řa opoi na natuna tari hin posposi sei: matan řa opoi God, ale matan řa oloolo na nona retileu. ³ Matan řa vujangi na nořa opoia hin God na nořa oloolo na nona retileu, ale mo sopo řilangi mata usurira.

⁴ Haratu la vora isan God la pa eři jeu na varama mata nora rasua, enia natu, mo vaira la jeu na varama. ⁵ Ale haratu mo jeu na varama enia haratu mo rasua vara Iesu enia Natun God.

Iesu Enia Hare

⁶ Iesu Křisto mo mai na malele wai peresi na řae, mo sopo na wai hasena, pani wai peresi na řae.* Tanume Tapu mo vereulia matan Tanume Tapu mo varařuhu. ⁷ Varařuhu, hinau mo tolu la vereulia, ⁸ Tanume Tapu, wai peresi na řae la turu na jara matea purongo.

⁹ Vara řa lo rasu na retireti nona tamlohi purongo, sava God mo vereulia hinia hin Natuna mo mele řuhu jea. Retivuhesi atu mo sohen harihi: ¹⁰ Vara řa tau na nořa rasua isan Natun God, řa lo vujangia vara řa rasu na vereulia non God hin Natuna. Pani vara řa sopo rasu na sava God mo vereulia hinia hin Natuna, řa lo vereia vara God enia tamlohi halu. ¹¹ Ale vereulia atu mo sohen harihi: God mo sile na mauri tui moiso, mauri tui atu mo lo toho isan Natuna. ¹² Ale vara haratu mo lavi Natun God mo lavi na mauri tui, pani haratu mo sopo lavi Natun God, mo sopo lavi na mauri tui.

Vujangi Mata Mauri Tui

¹³ Na lo uliuli isan la haratu la rasu Natun God, matan vara ha pa levosahia i řuhu vara kamim ka lavi na mauri tui moiso. ¹⁴ Ale řa pa levosahia vara řa usiusi i usuri na masalon God, enia i pa tapurongo isařa. ¹⁵ Ale vara řa levosahia vara God mo lo tapurongo na nořa usiusi, řa pa levosahia varařuhu vara řa pa lavi na sava řa usia isana.

¹⁶ Vara tea mo hite na voraina matea mo lo vai na hehe sei mo sopo matan vara i mate matana, i pa eři usiusi vara God i silea na mauri. Pani vara hehe atu enia hehe mata mate, i pa sopo eři usiusi matana. ¹⁷ Lejileji tari enira hina sasati, pani hina sasati tari la pa sopo sile na mateia.

¹⁸ Ra lo levosahia i řuhu vara haratu la vora isan God la pa sopo eři vai na hehe

tarea. Natun God mo lo tingi horora, ale Tiapolo i pa sopo eři komora.

¹⁹ Ra levosahia mo řuhu vara enřa řa tai isan God, pani tatuara tinapua tari na varama la lo toho na suihan Tiapolo.

²⁰ Ra levosahia vara Natun God mo mai mo sile na levosahi vara řa pa eři levosahi God varařuhu. Ale řa lo toho hin haratu mo varařuhu, Natuna Iesu Křisto enia God varařuhu, enia mauri tui.

²¹ Natuvarihii, ha toho asau na posposi mata lotulotu vono.

* 5:6: wai peresi na řaena: wai peresi řaena mo roro hin rani atu tamlohi vuro matea mo urai Iesu. Hite: Jn 19.34. John mo ulia nike, vara řa levosahia vara Iesu mo lavi na epe tamlohi, mo sopo nunua purongo sohenai ha la lo vereia.

2 John Harua Leta John Mo Ulia Leta Nike

John mo uli leta nike, matan vara tamlohi rasua la pa efi levosahia vara opoia enia hina aulu na mauri rasua. Mo vujangia vara opoia peresi na retivaraʻuhuhu la pa toho jara matea na mauri rasua. Mo vujangia vara Iesu enia tamlohi varaʻuhuhu matea. John vujangia vara enʻa fa pa opoiopoiʻa.

Hin leta nike

1. Retioloolo (1–3)
2. Opoia peresi na retivaraʻuhuhu (4–11)
3. Isoiso reti (12–13)

¹ Leta nike, enau patu tamlohi rasua sei John, na ulia isan haʻai sei God mo viʻonia peresi na natuna. * Enau peresi la haratu la levosahi na retivaraʻuhuhu, kama opoi kamim mo isoiso. ² Kama opoi kamim mata retivaraʻuhuhu mo lo toho na mapuʻa, ale i pa toho atu na pongi tui. ³ Moiso na usiisi vara God Tama peresi Natuna Iesu Kʻristo vara la pa romʻuhuhu hiniʻa, ale la romopoiʻa, moiso vara la pa sileʻa na nora tamata, na nora retivaraʻuhuhu, ale na nora opoia. ⁴ Enau na avulahi tavera matan na rongoa vara te natum la lo ooloolo na retivaraʻuhuhu sohen God Tama mo retileu hinia isaʻa moiso.

Tamlohi Vujangi Haluhalu

⁵ Vetasiku ruhuʻuhuhu, na sopo uliuli vara a vereho vara o pa ooloolo hin te retileu paro hatea, mo vono, pani na lo uli haratu mo vereha tiroma moiso vara fa opoiopoiʻa. ⁶ Opoia varaʻuhuhu enia vara fa vai na sava God mo retileu hinia moiso, ale haratu ka rongoa moiso na tapulo rani, vara fa pa ha-hau hinia. ⁷ Matan ka levosahia vara tamlohi haluhalu matuvana la vano na varama moiso. La tamlohi haluhalu atu la retihalu vara Iesu Kʻristo mo sopo mai tamlohi varaʻuhuhu. La tamlohi haluhalu atu enira meresahi non Kʻristo. ⁸ Ha lo kilau matara! Mo sopo ruhu vara sava kama voko filangi matana matamim i vano hina purongo, pani ha vaihitea vara ha lavi vevuhu na nomim otori isana. ⁹ Haratu fomina mo lo vano asau na hinau la vujangia hin Kʻristo moiso, ale mo sopo turu hinia, haratu natu, God Tama mo sopo lo toho peresia. Pani vara tea mo toho jejeu na sava hinau la vujangia moiso, God Tama peresi Natuna la pa lo toho peresia. ¹⁰ Vara tea i mai, pani mo lavi na vujangi tinapua, ha sopo tinaʻihia vara i unu na imamim, ha sopo silea na

retioloolo, ¹¹ matan, vara haratu mo sile na retioloolo isara, enia mo lo tuenira na nora hehe.

Isoiso Retioloolo

¹² Varaʻuhuhu na opoia vara a mele vere kamim na hinau matuvana, pani na sopo opoia vara a uli na leta purongo. I pa mele ruhu vara a mai vara enʻa tolu fa pa sorasora, ale fa pa avulahi tavera matana. ¹³ Reti ooloolo mo lo mai isamim mo tai isan la natun vetasimim nike God mo viʻonia.

* **1:1:** haʻai peresi na natuna: reti sei haʻai peresi na natuna la vereha vara John mo lo faramia vara haʻai atu enia vao kalesia matea, ale natuna enia vao kalesia matan vao kalesia atu.

3 John

Hatolu Leta John Mo Ulia Leta nike

John mo uli leta nike matan vara kalesia la pa romifomi mata tueni la haratu la lo vai na vavahinau non Moli na jara tinatina-pua na varama. Mo ulia isan Gaius, tamlohi tavera matea na rasua ale mo lo usuri posposi akerihi moiso.

Hin Leta Nike

1. Retioloolo isan Gaius (1–4)
2. Kalesia la pa hase tuetuenira (5–12)
3. Isoiso retioloolo (13–15)

¹ Leta nike, enau patu tamlohi rasua sei John na ulia isan tapalaku ruhuruhu sei Gaius, na opoiho na retivarafuhu. ² Tapalaku ruhuruhu, na ususi vara hinau tari la pa fuhu isam, na lo romtoho vara epem i pa suiha sohen ko suiha na nom mauri rasua. ³ Na rani vorai kalesia la rohi kamam nike, la vereea vara engko, ko lo hahau usuri na retivarafuhu, ale enau na avulahi tavera matana. ⁴ Mo sopo te hinau hatea i vaiiau a avulahi tavera sohen harihi hin haratu na rongoa vara natuku la lo hahau usuri na retivarafuhu. ⁵ Tapalaku ruhuruhu, ko vai na hina tataholo mata rasua matan ko lo tueni na vorai kalesia sei la lo mai isam, hina purongo vara enira la tamlohi tinapua, ⁶ enira la vere na nom opoia isan la vao kalesia nike. Ale mo fuhu vara o rulara na nora hahau na posposi mo tataholo na nahon God, ⁷ matan la lo hahau mata hijan Moli, la hatihia moiso vara la pa sopo lavi te tuetueni isan te tinapua vara mo sopo levosahi God. ⁸ Matana, mo fuhu vara ra tueni na tamlohi sohen harihi, matan vara ra efi voko peresira na retivarafuhu. ⁹ Na uliuli mo vano isana vao kalesia atu moiso, pani Diotrefhes mo opoia vara enia i pa tiroma hinira, mo fohu vara i tapurongo hin kamam. ¹⁰ Ale vara a mai, a pa reti isana matan mo lo verelejileji kamam, ale mo sopo haratu purongo mo vaia, pani mo lo turuhoro na vorai ra la lo mai vara la rohi na vorai rasua ea. Ale mo tau nafihi na tamlohi mata vao kalesia matan la opoia vara la sile na retioloolo isara. ¹¹ Tapalaku, o sopo tisuri na posposi sasati, pani o tisuri na posposi fuhu matan haratu la lo vai na hina fuhu enira natun God, pani la haratu la lo lejileji tarea la pa sopo levosahi God. ¹² Tamlohi tari la vereea vara Demetrius enia tamlohi fuhu matea, ale nona vujangi mo varafuhu matan la vujangia vara enia tamlohi fuhu. Kamam sohena, kama lo vereea vara enia tamlohi fuhu matea, ka levosahia vara kama lo vereea varafuhu.

Isoiso Retioloolo

¹³ Varafuhu na opoia vara a mele vere kamim na hinau matuvana, pani na sopo opoia vara a ulia hin leta nike purongo. ¹⁴ Pani na lo romtoho vara a pa mai nohorih purongo, ale ra pa sorasora matavuhi. ¹⁵ Na ususi vara tamata non God i pa toho isam. Tapalam nike, la sohai na nora retioloolo isam, ale o pa sile na retioloolo isana tapalapa hatehateahi atu.

Jude Leta Jude Mo Ulia Leta nike

Jude mo vere na hinau matuvana mata tamlohi vujangi haluhalu, enira tamlohi sasati ale God i pa sile na talai tavera isara, matana, kalesia la pa lo kilau mamahu vara la pa sopo tapurongo na nora vujangi.

Isoiso reti non Jude hin leta nike enia usiusi matea mo lo sile na le'ruhu isan God: 'Ale nake, fa pa sile na ooloo tavera isan God, matan enia hasena i pa eri turuhoro kamim vara ha sopo jovi, ale enia i pa lavi kamim i tau kamim na nahona ha voke-voke, ale ha pa avulahi tavera jea. Mo tataholo vara God nofa Jujuri hin nofa Moli Iesu Kristo, i lavi na ooloo tavera, auluna, suiha, ale suiha mata i aulu na hinau tari. Amen.' (24–25)

Hin leta nike

1. Retioloolo (1–2)
2. Turu filangi na rasua (3–13)
3. Turuhoro na tamlohi vujangi haluhalu (14–23)
4. Isoiso usiusi (24–25)

¹ Leta nike, enau Jude na ulia. Enau slev non Iesu Kristo, enau tasin James. Na uliuli isan la haratu, God Tama mo vi'onira, ale mo taura na nona opoia, Iesu Kristo mo lo matahira.

² Na lo usiusi vara tarea, God i pa le'ruhu hin kamim i tavera jea, ale vara tarea, i pa silea kamim na nona romopoaia peresi na nona tamata peresi na nona opoia!

Tamlohi Vujangi Haluhalu

³ La tapalaku fuhuruhu, a pa vereea vara, tiroma na lo romromia vara a uliuli isamim vara God mo jurifa sohen sava, pani nake, na hitea vara a pa uliuli vara a retituetueni kamim vara ha pa valum rilangi tarea mata taurilati vujangi varafuhu atu, God mo lo silea isana nona tapuhi moiso na rani matea mata rani tui tui. ⁴ Te tamlohi la mai luhu, la unu matan te romira na livuha, ale la lo vereea lara, 'Mo ruhu purongo vara fa vai na hehe peresi na hafai teni fa vai te hina sasati matuvana, matan romfuhu non God i pa vai God i romira.' Posposi sohen harihi, mo lo vujangia vara la vahafi hin Moli Iesu Kristo nofa Tamlohi Tavera, enia sei mo matelete. Pani tuai jea, la ulia moiso, ale Retiulia mo retiroa'oa'hai vara God i pa ari na tamlohi sei la rohu na posposi tataholo non God sohen harihi.

Angelo Sasati Matan Tuai

⁵ Pani nake na opoia vara a mele vereea isamim na sava ka levosahia mo ruhu

moiso, vara sava mo masee isana tamlohi atu Moli God mo jurira tuai Egypt, pani hitahun haratu, enia mo komo la haratu la sopo rasua. *Exo 12.51; Num 14.29–30*

⁶ Ale sohen sava, God mo pesi la angelo atu tuai, haratu la sopo avulahi na suiha sei God mo taua isara, ale la malue na jarara tataholo, ale matana, God mo lo taurilatira na jara ro'roha tavera matea. La pa toho atu, i tikeli na rani tavera mata aria. *2Pe 2.4, 9* ⁷ Ale ha romfomi na sava mo masee isana taon matan Sodom enia Gomorrhah peresi na taon la lo toho mariviti hinira tuai, matan nora tamlohi la vaia sohen la angelo atu tuai, matan la lo hahau usuri na posposi viriu matuvana peresi la haratu la sopo tataholo isara, ale sohen sava God mo komora na hapu, mo vaia sohen tovongi matea isafa mata talai tui tui. *Gen 19.1–24*

Tamlohi Sasati La Mangisi

⁸ Sohen la haratu tuai, la tamlohi nike la unu, la vai na posposi hehe na epera mo sati, matan la vere na tamlohi vara la pa vai na sava la lo mavuhu hinira. Ale la tipahi na suiha tari sei la aulu hinira, ale la verehilehi na angelo aulu. ⁹ Pani Michael moli nona angelo, mo sopo vaia sohen. Hin rani atu mo opoia vara i lavi nafihi na tarapen Moses, enia Tiapolo la vauriuri matana, pani hina purongo hin haratu vara enia mo angelo aulu matea, mo sopo retilehilehi na hijan Tiapolo, mo vono, Michael mo vereea purongo mara, "Moli God i pa sileho na talai!" *Dan 10.13, 21; 12.1; Rev 12.7; Zec 3.2*

¹⁰ Pani la tamlohi nike, la unu, tavalura matea la lo kerekerehi, ale la lo kali na hinau la sopo levosahi te hinau hinira, pani mele tavalura tinapua, la lo usuri na nora rongovosahi purongo sohen maji, ale romira mo vono, pani hitahuna posira i pa komora hasera.

Talai Tavera I Pa Jovi Isara

¹¹ Rani sasati tavera i pa mai isara, matan la lo usuri na sava Cain mo vaia tuai, ale la lo vai na hehe sohen Balaam mo vaia tuai, matan la lo romfomi na mania purongo. Ale sohen posposi sei non Korah tuai, la lo usuri na posposi lejileji atu, mo vaia tuai isan God, ale la pa tihai sei matana. *Gen 4.3–8; Num 22.1–35*

¹² La tamlohi nike, la sohen ratarata sasati na lolo tasi, boti la lo takosa hinira, matan la lo toho na nomim hanhani matavuhi kalesia, pani la sopo mahanuhanu vara la lo romromira hasera purongo. La tamlohi nike, la sohen telangi langi mo lo serera, pani la sopo eri sile te usa na rani alo mo filangi. La mate vevuhi sohen pahai sei, mo marivu mo koru, mo sopo te vuana, mo sopo te rauna. ¹³ Nora hinau mahanuhanu

la pala sohena valval loloputu tavera na tasi langivili. La sohena vitusarasara sei la jalio na malelera, ale la pa toho jejeu na jara roŕoŕoha tavera atu God mo tau mamahunia matara.

Enoch Mo Retimangovi Hin Moli

¹⁴ Ale sohena Enoch sei, enia mo halimar-avrua pina mo usuri Adam, ale enia mo lo retireti hin la tamlohi nike moiso, mo vereea mara, 'Ha hitea! Ha kilau sahe aulu, Moli God mo lo mai peresi na nona vao angelo tapu, tea i sopo eŕi evira, *Gen 5.18, 21-24* ¹⁵ matan vara i ari na tamlohi tari. I pa sile na talai isan la haratu la rohu na posposi tataholo sei God mo opoia, matan nora sasati tari la vaira na nora lejileji vano isan God. Moli i pa sile na talai isan la tamlohi lejileji sei, mata nora retihehe tari sei la vereea isana. ¹⁶ La tamlohi nike, la lo retireti varihi, ale la lo ngutungutu, la lo usuri na masalora purongo. La lo retimangisi hinira hasera, ale la lo haluhalu na tinapua mata lavi te hinau isara.

Pongi Hitahu

¹⁷ La tapalaku ruhuŕuhu, ha sopo ŕomalio na retiŕoafioahai sei vahaŕule nona Moli Iesu Kristo la silea isamim moiso. ¹⁸ La vereea isamim vara mariviti na isoiso rani, tamlohi hanmarua peresi na tamlohi lejileji la pa tapulo kerehi God. ¹⁹ Ale la tamlohi nike, tarea enira la pulo patumasa matan enira tamlohi non varama purongo, ale Tanumen God mo sopo toho isara. ²⁰ Pani la tapalaku ruhuŕuhu, ha tuetueni kamim vara ha ulua na nomim rasua tapu, ale na rani vara ka lo usiusi, ha tinaŕihia vara Tanume Tapu i pa tiroma hin kamim. ²¹ Ha vujangia vara ka opoi God na nomim hahau, ale ha tau na ŕomimim na ŕomopoia non Moli Iesu Kristo sei vuana enia mauri tui. ²² Ha vujangi na nomim ŕomopoia isan la haratu sei, la lo ŕomkaka mata nora rasua,* ²³ Ale ha juri na tinapua, ha reve naŕihira na hapu aria. Ale tatua tamlohi ha pa ŕomopaira, pani ha lo kilau vara ha vaia, ha pa nikei na nora ruru sohena vara nora hehe mo lo kaluti hinira.

Isoiso Reti

²⁴ Ale nake, ŕa pa sile na oloolo tavera isan God, matan enia hasena i pa eŕi turuhoro kamim vara ha sopo jovi, ale enia i pa lavi kamim i tau kamim na nahona ha voke-voke, ale ha pa avulahia tavera jea. ²⁵ Mo tataholo vara God noŕa Jujuri hin noŕa Moli Iesu Kristo, i lavi na oloolo tavera, auluna, suiha, ale suiha mata i aulu na hinau tari. Amen.

* 1:22: vujangi: hai la vereea vara 'vaira la rongovosahi'.

Revelation Puku Nike

Puku nike, John mo ulia hin rani atu mo lo toho na Ureuren Patmos. Patmos mo sohena ima rilingi matea mara Rome la lo tau na tamlohi hinia. La tau John ea matan enia mo retivjavujangi hin Kristo. John mo lo vere na hinau God mo vujangia isana hin rani atu mata vavahinau non Iesu Kristo matan pavuho na pongi hitahu (1.2). Retisohai sei sopena mo tolu. (1) Suiha sasati la lo toho na varama, la lo rohu na tamlohi non God, ale la opoia vara la vilimateira; (2) Iesu enia Moli Aulu, enia i pa jeu na tamlohi tari peresi na suiha aulu sei la lo rohu hin God; (3) God i pa sile na silesilea ruhu jea isana nona tamlohi sei la lo turu rilingi na nora rasua hinia, ale i pa le ruhu tavera hin la haratu la mate matan Iesu.

Retisohai sei mo tueni na tamlohi rasua sei tuai hin rani rilingi atu la mate mata nora rasua. Tamlohi rasua la levosahia vara hina purongo vara suiha na varama sohena nona mara Rome tuai la lo turu, pani God mo vujangia vara Natu Sipsip non God i pa jeu vevuhira. Levosahi atu mo vaira la rom rilingi na maurira.

Na tapulon puku nike, leta mo limaravrua la vano isana vao kalesia mo limaravrua, la lo vujangia na posposi tamlohi na vao kalesia hatehateahi, haratu mo ruhu, haratu mo sati (2.1–3.22).

John mo uli na hinau tari mo hitea sohen God mo vujangia isana. Mo sohena mavuho matea, pani John mo sopo juruvi. Mo hite na hinau matuvana la lo vujangi na suihan God peresi na talai tavera sei i pa silea isan la haratu la lo rohu hinia. Mo hite na jara sakele nona supe non God (4.1–11) peresi na viriviri pepa non Natu Sipsip (5.1–14). Natu Sipsip hasena i efi roi la pulu atu mo limaravrua hin viriviri pepa atu (6.1–8.5), angelo la tiv na trumpet non God (8.6–11.19), la surerei na jilivi mata talai (16.1–21) hin haratu la lo vujangi na aria tavera non God sei i pa mai.

Hitahu vara la rani rilingi atu la isoiso, tamlohi non God sei la jeua, la pa lavi na le ruhu tavera non God sohen harihi:

‘Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. I pa kamoti na wai matara tari na matara, i pa sopo te mateia, fomsasati teni tangi teni epe varihaji, matan hinau matan tuai la tihai.’ (21.3–4)

Hin puku nike

1. Reti mata hinau la pa masese (1.1–8)

2. John mo hite Moli (1.9–20)
3. Leta la vano isan la vao kalesia atu mo limaravrua (2.1–3.22)
4. Haratu la lo lotu na tuka (4.1–11)
5. Viriviri pepa peresi la pulu atu mo limaravrua (5.1–6.17)
6. La lotu God na tuka (7.1–17)
7. Trumpet mo limaravrua (8.1–11.19)
8. Dragon peresi na maji jala sasati mo rua (12.1–13.18)
9. God mo vujangi na nona aria (14.1–15.8)
10. Jilivi mo limaravrua mata talai (16.1–21)
11. God mo jeu na nona meresahi (17.1–20.10)
12. Aria tavera non God (20.11–15)
13. Tuka Paro peresi na Varama Paro (21.1–8)
14. Jerusalem Paro (21.9–22.5)
15. I pa sopo tuai Kristo i pa mele mai (22.6–21)

Reti Mata Hinau I Pa Masese

¹ God mo silea vara Iesu Kristo i vujangi na sava hinau mo vifonia vara la pa masese, i pa sopo tuai, isana nona volitusi hin malele sei; Iesu mo fule na nona angelo vara i vujangia isan nona volitusi John. ² Ale enia mo vereuli na reti non God, peresi na sava hinau Iesu Kristo mo vujangia isana, hinau tari sei mo hitera. ³ Ale avulahi isan haratu mo evi reti sei isana tamlohi, mata hinau la pa masese i vano isana tamlohi tinapua, ale avulahi isana tamlohi tari sei la rongoa, ale la ololo hinia, matan pongi atu mo mariviti. ^{4–5} Ulili non John mo vano isan la vao kalesia atu, mo limaravrua na province matan Asia.

Rom ruhu peresi na tamata la mai isamim, la tai isan God Tama, isan Iesu Kristo peresi la tanume ruhu atu mo limaravrua sei la lo toho na naho jara sakele nona supe non God. God enia mo lo toho nake, mo lo toho tiroma, ale enia i pa mai hitahu. *Exo 3.14; Zec 4.1–10*

Ale Iesu Kristo, haratu sei mo lo turu rilingi na nona vereulia, enia vora tiroma hin la haratu la pa mele turu na mateia, enia mo aulu na supe tari na varama.

Iesu Kristo enia haratu mo opoia tavera, ale faena mo roro, ale mo volituhua na nofa aria mata nofa hehe. *Isa 55.4; Psa 89.27*

⁶ Ale enia mo vai fa ma na vao matea mata pris, fa tauri na suiha aulu isan nona God sei Tamana, i pa lavi na hasohaso, ale suihana i lo turu rani tui tui tarea. Amen. ⁷ Ka hitea! Iesu mo lo mai na telangi, ale tamlohi tari la pa hitea na matara, la haratu la lo ruhu tuai sohena, la pa hitea, ale tavitavi tari na varama la pa tangi matana. Enia i pa sohena natu, amen.

⁸ Ale Moli God mo vereea mara, “Enau pulo hinau tari, enau na isoiso hinau tari, enau na lo toho nake, ale enau na lo toho tiroma, enau a pa mai. Enau suiha aulu atu mo tavera jea.”

Hinau John Mo Hitea

⁹ Enau John, voraimim matea, ale enfa ʔa lo turu matea na rani ʔilangi hin mauri atu God mo aulu hinia, ʔa lo turu ʔilangi na ʔomperavu hin Iesu purongo, enau, la tauau na ureuren Patmos matan na lo retivujavujangi na Reti non God, ale matan na lo sorahi Iesu. ¹⁰ Ale, na rani lotu non Moli, Tanumen Moli mo mafivisiau, ale na rongo na leo matea mo tavera mo memera na haʔiku sohena leo trumpet matea, ¹¹ leo atu mo vereea mara, “O uli na hinau ko lo hitea na lolon te puku hatea, ale o sohaia i vano isan la vao kalesia atu mo limaravrua: isan Ephesus, isan Smyrna, isan Pergamum, isan Thyatira, isan Sardis, isan Philadelphia peresi Laodicea.” ¹² Na posi vara a hitea vara leon hare natu, mo lo retireti isaku, ale na posi moiso, na hite na peri lamu mo limaravrua la vaira na gold la lo turu atu. ¹³ Ale na hite matea mo sohen Natun Tamlohi* mo lo turu na livuhara. Mo ruru na ruru matea mo peravu mo tikeli na palona atano, ale ruru matea la vaia na gold mo eve falihina na ʔumana hinia. *Dan 7.13; Dan 10.5*

¹⁴ Patuna peresi na vuluna la lulu sohena katen, matana, o hitea la mera sohena pepe hapu. *Dan 7.9; Dan 10.6* ¹⁵ Palona la lo angiangi sohena bronze aen sei la tunia na hapu tavera, ale leona mo puhoni sohena ʔum tasi tavera matea. *Ezek 1.24; 43.2* ¹⁶ Mo lo tauri na vitusarasara mo limaravrua na matuana, ale sita matea mo voro tavalu rua mo lo malue na jingona. Nahona mo memera mo sohena alo tavera. ¹⁷ Nara na hitea, na jovi na palona sohena tamlohi matea mo mate, pani mo tau na matua limana hiniau mo vereea mara, “O sopo matahu, enau natu, Pulo Hinau Tari, ale enau Hitahu, ¹⁸ ale enau sei na lo mauri, na mate, pani ko hitea, nake na mele mauri, ale a pa mauri jejeu, ale na lavi na kia mata mate peresi na kia mata varama mata mateia.† ¹⁹ Ale matan haratu o uli na sava ko hitea. Haratu ko hitea moiso, ale na sava mo lo toho nake peresi na sava la pa masese hitahu. ²⁰ A pa vereuli na faramin la vitusarasara atu mo limaravrua sei ko lo hitera na matuaku peresi la peri lamu atu

mo limaravrua sei la vaira na gold. La vitusarasara atu mo limaravrua, enira angelo matan la vao kalesia atu mo limaravrua, ale la peri lamu mo limaravrua atu, enira la vao kalesia atu mo limaravrua.”†

Leta La Vano Isana Vao Kalesia

2

Leta Isan Ephesus

Ale mo vereea vara:

¹ “Hinau akerihi natu, o pa ulia i vano isan angelo mata vao kalesia hin Ephesus: ‘Harihi retisohai sei non haratu mo lo tauri na vitusarasara mo limaravrua na matuana, ale mo lo hahau na livuhan la peri lamu mata gold atu mo limaravrua.’

² Mara, ‘Na levosahi na nom vavahinau, nom voko peresi na nom ʔomperavu vara o lo turu ʔilangi na mauri rasua. Na levosahia vara ko sopo lavi te tamlohi sasati, ale ko vaihite na tamlohi hai sei la vereea lara enira la vahafule, pani mo vono, ale ko vileia vara enira la tamlohi halu. ³ Na levosahia vara ko lo tauri na nom ʔomperavu na rani ʔilangi mata hijaku, ale ko sopo tinafihi na nom rasua.

⁴ Pani hinau matea na sopo avulahi hinia isam! Enia mo sohen harihi: Nom opoia mo sopo mele ʔilangi sohen tiroma. ⁵ Matana, o to ʔomʔomia vara ko jovi epu na nom opoia matan tiroma, o mele posi na nom hehe, ale o vai na nom opoia sohen tiroma. Pani vara i vono, a pa mele sinai a lavi nafihina na nom peri lamu vara o sopo posi. ⁶ Pani mele hinau matea ko vaia mo tataholo, ko rohu na sava hinau tamlohi non Nicholas* la lo vaira, ale enau sohena na rohu hinira.

⁷ Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, haratu mo jeu na suihan sasati, ale mo turu ʔilangi mo tikeli na isoiso maurina, enau a pa majinga vara i hani na vuan vipahai atu mo lo sile mauri sei mo lo toho Paradise na tuka non God.’”

Leta Isan Smyrna

Mo mele vereea mara: *Rev 22.2; Ezek 28.13*

⁸ “Hinau akerihi natu, o pa ulia i vano isan angelo mata vao kalesia hin Smyrna: ‘Harihi retisohai sei non haratu enia pulo hinau tari, enia isoiso hinau tari hitahu, mo mate, pani nake mo mele mauri!’

⁹ Mara, ‘Na levosahia vara ko lavi na rani ʔilangi sohena sava moiso, ale na levosahia

* **1:13:** Natun Tamlohi: enia natu, Iesu. † **1:18:** kia mata mate peresi na kia mata varama mata mateia: Kia mo lo faramin na suihan Iesu matan mo jeu na suihan mate peresi na jara atu mate la lo toho hinia matan i efi vaira la mele turu. † **1:20:** angelo: Angelo akerihi enia angelo teni patu tamlohi, pani la sopo levosahia i ruhu vara mo lo vereea isan hare. * **2:6:** tamlohi non Nicholas: Tamlohi hai la lo ʔomʔomia lara Iesu mo lo retireti na tamlohi non Nicholas mara Antioch (O hite: Acts 6.5).

vara ko tilavono, pani engko ko tadvav, na levosahi la retisasati sei la vereea matam mo tai isan la haratu la vara enira Jew, pani enira la sopo Jew tataholo, mo vono enira vaon Setan.

¹⁰ O sopo matahu matan la hinau rilangi sei la tatamahu moiso vara la mai isam, ale ko hitea, i pa sopo tuai, Tiapolo i pa tau te tatuamim na ima rilangi vara i vaihite kamim, ale ha pa rongo i sati mata rani i sangavulu, pani vara o romturu rilangi, hina purongo vara o mate matana, pani a pa sileho na nom fongofongo nona supe mata mauri.

¹¹ Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, isan haratu mo jeu na suihan sasati, ale mo turu rilangi mo tikeli na isoiso maurina, i pa sopo eri vano na harua mateia! ”

Leta Isan Pergamum

Mo mele vereea mara:

¹² “Hinai akerihi natu, o pa ulia i vano isan angelo mata vao kalesia hin Pergamum: ‘Harihi retisohai non haratu sei mo lo tauri na sita voro tavalu rua mata vuro!’

¹³ Mara, ‘Na levosahia vara ko lo toho na jara sei Setan mo supe ea, pani ko lo taurilati na hijaku, ale ko sopo vuvuni na nom rasua hiniau, hina purongo vara la taurilati Antipas noku tuetueni sei mo lo romturu rilangi, la vilia mo mate hin jara atu sei Setan mo lo toho ea.

¹⁴ Pani na hite na hinai hai ko lo vaia mo sopo fuhu: tatuamim la lo usuri na vujangi non Balaam. Tuai mo vere Balak vara i vujangi na natun Israel vara la eri hani na hanhani sei la silea isana tamasi moiso, ale vara la usuri na mauri maji,¹⁵ ale tatuamim sohena la lo usuri na vujangi non tamlohi non Nicholas,[†] ¹⁶ Ale matana, o posi! Vara i vono, nakerihi purongo vara a mai a pa valum peresi la tamlohi sei la lo usuri Nicholas, ale a pa taira na sita tavalu rua mata vuro na jingoku.

¹⁷ Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, Isan haratu mo jeu na suihan sasati, ale mo turu rilangi mo tikeli na isoiso maurina, enau a pa silea hin hanhani atu sei la tovia mana sei la jarohia.[‡] Moiso enau a pa sile na vatu lulu matea isana, ale hin vatu atu hija paro matea mo lo toho hinia, pani haratu mo lavia enia hasena purongo i pa levosahi na faramin hija atu.’ ”

Leta Isan Thyatira

[†] **2:15:** tamlohi non Nicholas: hite: 2.6. [‡] **2:17:** mana: Hin rani atu tadvavuin Israel la lo hahau na jara tano koru tuai, God mo vahanira hin hanhani sei la tovia mana. Hai la vereea lara matea mo jarohi na sopesopena hai na puhoro tapu, vara i toho i tikeli rani atu Messiah i pa mele mai hinia matan vara i pa vahani na nona tamlohi hinia. [§] **2:28:** majou falavuhu: Rev 22.16 Hija atu Kristo enia ‘Majou falavuhu’.

Moli mo mele mauri mo vereea mara:

¹⁸ “Hinai akerihi natu, o pa ulia i vano isan angelo mata vao kalesia hin Thyatira: ‘Reti nike enira retin Natun God! Matakua la lo hani sohena pepe hapu, paloku la lo angeli sohena bronze aen mo tutuni.’

¹⁹ Mara, ‘Na levosahi na nom vavahinau, nom opoia, nom rasua peresi na nom romperavu mata turu rilangi, ale na levosahia vara ko lo vai na hinai nake mo jeu haratu tiroma.

²⁰ Pani hinai matea na sopo avulahi hinia isam: haiai sei Jezebel sei mo lo hase vereea vara enia pfovet matea, ko majinga vara i lo vujangi na noku volitusi na malele halu matan vara la lo usuri na mauri maji, ale la hani na hanhani sei la silea isana tamasi moiso. ²¹ Na sile na masapa isana moiso vara i posi na nona hehe, pani mo sopo opoia vara i isoiso na nona mauri maji. ²² O lo levosahia vara a pa ari Jezebel na rojo matea na vatana, ale la haratu la lo vaivaileu peresia, la pa lavi na rongohaji tavera vara la sopo isoiso hin nona posposi sei, ²³ ale a pa vilimatei na natuna, ale vao kalesia tari la pa levosahia vara enau haratu mo lo ale na hinai tari na lolo romi tamlohi peresi na lolo mapu tamlohi. A pa sile na volimim i tataholo isamim hatehateahi i tataholo na nomim vavahinau. *Psa 7.9; Jer 17.10*

²⁴ Pani isana tatuamim Thyatira la haratu la sopo lelevosahi teni la usuri na vujangi non Jezebel sei hai la lo vereea vara enia vujangi puhoni non Setan, ale isamim a pa sopo eri mele vere te retileu tinapua hatea isamim matan vara a sopo mele tau te hinai puhoni isamim,²⁵ pani na vereea vara ha lo tauri rilangi na sava ka lo tauria moiso i tikeli pongi atu a pa mele mai hinia.

²⁶ Isan haratu mo jeu na suihan sasati, ale mo lo turu rilangi na noku vavahinau mo tikeli na isoiso maurina, a pa silea na suiha vara i aulu na mara jara tinatinapua, *Psa 2.8-9* ²⁷ ale i pa aulu hinira, i pa kilaura na maja aen, ale i pa viliroiroira sohena jilivi lepa purongo, i pa sohen suiha atu Tamaku mo sileau hinia,²⁸ ale a pa silera na majou ralavuhu.[§]

²⁹ Isan haratu mo lo rongo, o tapurongo na sava Tanume Tapu mo lo vereea isan la vao kalesia atu.’ ”

3

Leta Isan Sardis

Mo mele vereea mara:

¹ “Hinau akerihi natu, o pa ulia i vano isan angelo mata vao kalesia hin Sardis: ‘Harihi enia retisohai non haratu mo lo lavi la tanume ruhu non God atu mo limaravrua peresi la vitusarasara atu mo limaravrua.’

Mara, ‘Na levosahi na nom vavahinau, ale tamlohi tari la lo rasua vara nom rasua mo lo mauri, pani mo mate!’ ² O lo kilau! Na hitea sohena vara nom rasua ko sopo ooloo vara ruhu hin God, ale o mele vai na nom rasua i mele suiha matan vara i vono, i pa tihai. ³ O mele romromi haratu sei ko lavia moiso peresi haratu ko rongoa moiso, o taurilatia i rilangi, ale o posi mata non hehe. Vara o sopo tatamaha, enau a pa mai sohena tamlohi vavanaho matea, o pa sopo levosahia vara a pa mai isam pangisa.

⁴ Pani tatuamim Sardis nomim ruru la sopo lumiha na hehe. La pa hahau peresiau na ruru lulu matan mo tataholo vara la vaia sohena.

⁵ Isan haratu mo jeu na suiha sasati, ale mo turu rilangi mo tikeli na isoiso maurina, i pa ruru na ruru lulu sohera, a pa sopo jarai na hijana na Puku mata Mauri,* pani enau a pa vere na hijana isan Tamaku peresi na nona angelo vara enia noku. *Psa 69.28; Rev 20.12*

⁶ Isan haratu mo lo rongo, o tapurongo na sava Tanume Tapu mo lo vere a isan la vao kalesia atu.’ ”

Leta Isan Philadelphia

Mo mele vere a vara:

⁷ “Hinau akerihi natu, o pa ulia i vano isan angelo mata vao kalesia hin Philadelphia: ‘Harihi retisohai sei non haratu mo tapu, enia mo vara ruhu, ale enia mo lo lavi na kia mata suiha non Supe David, enia mo roi na pelati, i pa sopo te hatea i efi mele pelatia, vara enia mo pelati na matarua, i pa sopo te hatea i efi mele roia.’ *Isa 22.22; Job 12.14*

⁸ Mara, ‘Na levosahi na nom vavahinau, ale ko levosahia, enau na tau na matarua mo lo roi na nahom, i pa sopo te hatea i efi pelatia. Na levosahia vara engko ko sopo rilangi, pani ko lo ooloo na noku reti, ale ko sopo vunvunia vara engko noku tamlohi. ⁹ Ale ko levosahia, a pa vai haratu la vere a vara enira Jew, pani enira tamlohi halu vaon ima lotu non Setan, o pa hitea, enau a pa vaira la mai vara la papaohi na palom matan vara tamlohi la pa hitevosahia vara enau na opoiho. *Isa 49.23; Isa 43.4*

¹⁰ Matan ko lo taurilati na noku reti vara o pa romperavu mata turu rilangi, ale matana, a pa kilau mamahuniho na rani vaihite atu mo lo mai mata tamlohi mo isoiso na varama vara la pa vano hinia. ¹¹ I pa sopo tuai a pa mai, ale o tauri rilangi na

sava ko lo tauria matan vara tea i sopo efi lavi narihi na nom fongo fongo nona supe.

¹² Isan haratu mo jeu na suiha sasati, ale mo lo turu rilangi mo tikeli na isoiso maurina, enau a pa vaia i mai peri tavera matea na ima lotu non noku God, ale i pa toho jejeu atu. A pa uli na hijan noku God peresi na hijan taon tavera atu non noku God hinia, jara atu enia Jerusalem Paro atu noku God i pa sohaia i sevuti na tuka i pa mai na varama. Ale enau sohena a pa uli na hijaku paro hin tamlohi atu.

¹³ Isan haratu mo lo rongo, o tapurongo na sava Tanume Tapu mo lo vere a isan la vao kalesia atu.’ ”

Leta Isan Laodicea

Mo mele vere a vara:

¹⁴ “Hinau akerihi natu, o pa ulia i vano isan angelo mata vao kalesia hin Laodicea: ‘Harihi retisohai non haratu la lo tovia Amen! Enia haratu sei enia tuetueni atu mo lo romturu rilangi enia mo vara ruhu, ale enia pulo vavahinau non God.’ *Prov 8.22*

¹⁵ Mara, ‘Na levosahi na nom vavahinau, pani ko sohena hanhahi mo sopo ruhu hin te hinau, ko sopo noha, ale ko sopo koru, pani enau na opoia vara o noha teni o koru, ¹⁶ ale matan ko sopo noha teni koru, pani ko wai wai purongo, a pa hasorihio na jingoku, ¹⁷ matan, ko vere a kora, “Enau na tavitav, na takonahi na hinau matavana, na sopo mele opoi te hinau hatea.” Pani ko sopo levosahia vara engko tamlohi marua matea, engko tamlohi matea la sopo efi romromiho, engko ko tilavono, engko ko matavuso, ale engko ko malamala.

¹⁸ Ale matana, na lo retituetueni vara o voli te gold isaku, gold sei la kuku narihi na utauta hinia, ale enia i pa vaiho o tavitav, ale vara o voli te ruru lulu isaku matan vara o efi tatavuhoro na nom malamala hinia. O voli te meresin matan vara o efi pasia na matam vara o efi kilau.

¹⁹ Isan haratu na opoira, na vereuli na nora hehe, ale na sile na talai isara. Ale matana, o tuntuni na maurim, ale o posi na nom hehe. ²⁰ O kilau nike! Enau na lo turu na lo firiangi na pelati; vara tea mo rongo na leoku, ale mo roi na matarua, enau a pa unu, ale a pa hanhahi peresia, ale enia i pa hanhahi peresiau.

²¹ Isan haratu mo jeu na suiha sasati, ale mo lo turu rilangi mo tikeli na isoiso maurina, a pa majinga vara i sakele peresiau na noku jara sakele nona supe, sohen enau na jeu na noku meresahi moiso, ale na lo sakele peresi Tamaku na nona jara sakele nona supe.

* 3:5: Puku mata Mauri: Puku atu God mo uli na hijan nona tamlohi hinia.

²² Isan haratu mo lo rongo, o tapurongo na sava Tanume Tapu mo lo vereea isan la vao kalesia atu.’ ”

4

¹ Hitahun la hinau atu na kilau sahe, e! Matarua matea mo roi na tuka. Ale leo atu tiroma sei mo sohena trumpet mo mele retireti isaku mara, “O sinai nike aulu! A pa vujangiho na sava mo viŋonia vara la pa malue hitahu na hinau ko hitera moiso.”

² Vahatea atu suihan Tanume Tapu mo mai isaku, e! Jara sakele non supe matea mo lo turu na tuka, ale na hite haratu mo lo sakele hinia, ³ ale haratu mo lo sakele atu mo lo angiangi, majhina mo sohena vatu ŋuhu sei jasper mo joriha ŋoŋoha, ale sohena vatu ŋuhu sei carnelian mo hahara. Nuenue matea mo ŋalihi jara sakele non supe atu, majhin nuenuue atu mo sohena vatu ŋuhu sei emerald mo heja rau pahai.

⁴ Moiso, jara sakele non supe mo ngavulu rua mo vati tinapua la toho ŋalihi jara sakele non supe atu na livuha jara. Ale hin la jara sakele nona supe hatehateahi atu, tamlohi aulu mo ngavulu rua mo vati la lo sakele hinira, la ruru na ruru lulu, ale la tau na ŋongoŋongo mata gold nona supe na patura. ⁵ Vaha mo vilasi, piri mo roroa la lo malue hin jara sakele non supe atu na livuhan jara atu. Hapu jilangi mo limaravrua la lo hani na nahon jara sakele non supe atu, enira natu, la tanume ŋuhu mo limaravrua atu non God. *Exo 19.16; Ezek 1.13; Zec 4.2*

⁶ Ale na nahon jara sakele non supe atu, lepa mo sohena tasi mata glas mo niro sohena crystal. Ralihi na jara sakele non supe na livuha jara, hinau mauri mo vati la lo turu ea, matara mo lavi vevuhi na epera na nahora peresi na hafira. *Ezek 1.5–10, 22; 10.14*

⁷ Ale tiroman la hinau mauri atu mo sohena Lion, haruana mo sohena natu buluk, ale hatoluna mo lavi na nahora matea mo sohena nahon tamlohi, ale havatina mo sohena mala mo lo avu aulu. ⁸ La hinau mauri atu enira hatehateahi, hapara mo limarave, ale epera tari la maŋivi na matara. Ale la lo lalavete tarea na rani peresi na vutepongi mo sopo te isoisona lara, *Ezek 1.18; 10.12; Isa 6.2–3* “Tapu, tapu, Moli God sei mo tapu,

enia suiha aulu atu mo tavera jea, mo lo toho moiso, ale mo lo toho nake, ale i pa mai!”

⁹ Ale vara la hinau mauri atu la lo sile na hasohaso peresi na oloolo, ale la lo vere meje isan haratu sei mo lo sakele na jara sakele non supe atu mo lo mauri mata rani tui tui tarea, ¹⁰ ale la tamlohi aulu atu mo

ngavulu rua mo vati (24) la lo sakele ŋalihi haratu sei mo lo sakele na jara sakele non supe, la lo papaohi na nahona, ale la lo lotu haratu sei mo lo mauri mata rani tui tui, ale la pulahi na nora ŋongoŋongo mata gold nona supe na nahora jara sakele non supe atu, ale la lo vereea lara,

¹¹ “Nomam Moli, nomam God, mo tataholo vara o lavi na hasohaso, ale oloolo tavera peresi na nom suiha tavera, matan engko ko vai na hinau tari, ale masalom ko vaira la lo toho.”

5

Natu Sipsip Mo Roi Na Viriviri Pepa

¹ Ale na hite na matua liman haratu sei mo lo sakele na jara sakele non supe, na hitea mo lo tauri na viriviri pepa matea sei la uliuli hinia tavalu rua.* ale la puluia na jara mo limaravrua tinatinapua. *Ezek 2.9–10; Isa 29.11*

² Na hite na angelo suiha tavera matea, ale mo vereea na leo tavera matea mara, “Hare mo tataholo vara i roi viriviri pepa nike, ale vara i ŋari na puluna?” ³ Pani mo sopo tea na tuka teni na varama teni na lolo varama mata mateia vara i tataholo vara i roi viriviri pepa atu teni i hite na lolona.

⁴ Ale, na tangi tavera matan mo sopo tea mo tataholo vara i roi viriviri pepa atu teni i hite na lolona. ⁵ Ale vonan la tamlohi aulu atu matea mo vereea isaku mara, “O sopo tangi, o to kilau vano, haratu la tovia Lion sei enia tavgavin Judah matea,† ale enia pin David mo jeu na nona meresahi moiso, ale, enia i eri roi viriviri pepa atu peresi la puluna atu mo limaravrua.” *Gen 49.9; Isa 11.1, 10*

⁶ Ale na hite na natu sipsip matea mo lo turu na livuhan jara atu. Hin jara atu natu, la hinau mauri mo vati atu peresi la tamlohi aulu atu mo ngavulu rua mo vati (24) la lo sakele ŋalihi na jara sakele non supe ea. Ale natu sipsip atu, mo sohena la vili-mateia moiso, pani mo lo turu, ale palana mo limaravrua, ale matana mo limaravrua, enira la tanume ŋuhu atu mo limaravrua non God sei mo lo rulera vara la vano na jara tari na varama. *Isa 53.7; Zec 4.10*

⁷ Ale Natu Sipsip mo sinai mo lavi viriviri pepa atu na matua liman haratu sei mo lo sakele na jara sakele non supe, ⁸ ale mo lavia moiso natu, la hinau mauri mo vati atu peresi la tamlohi aulu atu mo ngavulu rua mo vati

(24) la juruvi popovi na lepa atano na nahon Natu Sipsip, enira hatehateahi la tauri na pue

* **5:1:** viriviri pepa: Scroll la vaia tuai na huri nani teni pepa, ale la tau puluna peresi wax mata kandeli. † **5:5:** Lion: Lion enia puskat jala mo tavera jea la suiha. Vaon Israel enia Judah la tovia Lion, Supe David mo tai isan tavgavin Judah.

tangtangi matematea peresi na puru mata gold la marivi na hasori,[‡] hasori sei natu, enia usiusi non nona tapuhi. *Psa 141.2*

⁹ Ale la lavi na vete paro matea lara, “Engko hasem ko tataholo vara o lavi viriviri pepa atu,

o roi na puluna matan la vilimateiho, ale faem mo volituhu na tavitavi tari, na leo tari,

ale tamlohi purongo peresi na mara jara tinatinapua tari vara la mai non God,

¹⁰ ale ko vifonira la mai na vao matea mata pris

la tauri na suiha aulu isan nofa God, ale la pa tauri na suiha na varama.”

Exo 19.6; Rev 1.6

¹¹ Ale na kilau vano, na rongo na leo angelo matuvana la toho falihi na jara sakele non supe atu peresi na leon hinau mo vati atu peresi la tamlohi aulu atu, peresi la vao tavera hajavua atu, tea i sopo eri evira. *Dan 7.10*

¹² Ale la lo vereea na leo tavera matea lara, “Natu Sipsip la vilimateia, enia mo tataholo matan vara i lavi na suiha, tavitav, lelevosahi, rilangi, ooloo, hija aulu peresi na hasohaso.”

¹³ Ale na rongo na hinau tari la lo mauri na tuka, na varama, na lolo varama, ale na tasi, ale hinau mo isoiso sei la lo toho hinira, la lavete isan la tupra rua atu lara, “Isan haratu sei mo lo sakele na jara sakele non supe,

peresi Natu Sipsip, la pa avulahi fuhu, ale la pa lavi na hasohaso, peresi na hija aulu,

peresi na suiha tavera tarea mata rani tui tui tarea!”

¹⁴ La hinau atu mo vati atu la vereea lara, “Amen!” Ale la tamlohi aulu atu la juruvi popovi na lepa atano, ale la lotu.

6

Mo Roi Na Pulu Viriviri Pepa Atu

¹ Na pa lo kilau na hite Natu Sipsip mo roi na pulu matea vonan la haratu mo limaravrua, ale na rongo vonara matea hin la hinau mauri mo vati atu mo ulo, ale leona mo sohena roroa piri mo vereea mara, “O mai!” ² Ale na kilau sahe, e! Hos lulu matea. Haratu mo lo sakele hinia mo lavi na paka matea, ale la silea na rongoongo matea nona supe. Ale tarea enia mo lo jeu na nona meresahi, ale mo malue vara i mele jeu tea. *Zec 1.8; 6.3, 6*

³ Na hite Natu Sipsip mo roi na harua pulu, ale na rongo na haruan hinau mauri

atu mo vereea mara, “O mai!” ⁴ Ale hos tinapua matea majhina mo hahara mera mo malue. Ale haratu mo lo sakele hinia la majinga vara i lavi nafihi na tamata na varama matan vara tamlohi la pa vilivilira na vuro, ale la silea na sita tavera matea mata valum. *Zec 1.8; 6.2*

⁵ Natu Sipsip mara mo roi na hatolu pulu, na rongo na hatolon la hinau mauri atu mo vereea mara, “O mai!” Ale na kilau sahe, e! Hos viriha matea. Haratu mo lo sakele hinia mo lo tauri na skele matea mo lo keho na limana matea. *Zec 6.2, 6*

⁶ Ale na rongo na hinau matea sohena leo matea mo lo malue na livuhan la hinau mauri mo vati atu, mo vereea mara, “Kilo wit matea volina i pa tataholo na volvoli mata rani matea. Ale kilo barley mo tolu volina i pa tataholo na volvoli mata rani matea. Pani o sopo komo na wel mata olive peresi na waen.”

⁷ Ale Natu Sipsip mara mo roi na havati pulu, na rongo na havatin la hinau mauri atu mo vereea mara, “O mai!” ⁸ Ale na kilau vano, e! Hos matea majhina mo heja joriha. Hijan haratu mo lo sakele hinia enia Mateia, ale varama mata mateia mo lo usuria. La sile na suiha isara vara la vilimatei na tamlohi matea na tamlohi tupu vati na varama. La pa vilira sohen harihi: peresi na sita vuro, peresi na marua, peresi na rojoa sati tinatinapua, ale na maji jala. *Ezek 14.21*

⁹ Ale Natu Sipsip mara mo roi na halima pulu, na hite na pulo votavota na Temple, tanumen la haratu sei la vilimateira na varama mata la lo vereuli na reti non God, ale mata nora rasua. ¹⁰ La ulo rilangi na leo matea lara, “Moli Suiha, engko ko tapu, engko ko vararuhu, pangisa o pa sile na talai isara, pangisa o pa kele na faemam isan la haratu na varama?”

¹¹ Ale la silera hatehateahi na ruru lulu matematea, ale la vereea isara vara la lo mapu makomona tako, i vano tikeli na rani evin la voraira volitusi tinapua peresi na voraira na rasua la mate sohera.

¹² Natu Sipsip mara mo roi na halimarave pulu, ale na kilau vano, e! Mihi tavera matea, ale alo mo posi mo viriha rofoha, ale vitu mo posi mo hahara sohena fae.

¹³ Ale vitusarasara na masapa la jovi na varama sohena poroti vua pahai la jovi na langivili. *Isa 34.4*

¹⁴ Masapa mo mafari mo tihai sohena la viriviri nafihi na epa matea, ale vutivuti tari peresi na ureure tari la juha la rovo na jarara. *Rev 16.20*

¹⁵ Ale supe mata varama peresi na tamlohi la lo lavi na hija tavera, patu tamlohi mata vuro peresi haratu la tavitav peresi la

[‡] 5:8: hasori: Hinau sohena tobak la sulia mata, ale asuna mo hasori mo fuhu.

haratu la suiha, ale tamlohi tari, slev peresi tamlohi materi la luhu na papa peresi na patumalo na vutivuti.

Isa 2.19–21 ¹⁶ La ulo isana vutivuti peresi na patumalo lara, “Ha jovi, ha tatavuhi kamam, ale ha jarohi kamam na nahon haratu mo lo sakele na jara sakele non supe peresi na talai lolokoru mata hehe non Natu Sipsip, *Hos 10.8* ¹⁷ matan rani tavera atu mata talai lolokoru non God mata hehe peresi non Natu Sipsip mo mai, ale hare natu, i pa eri turu hinia?” *Joel 2.11; Mal 3.2*

La Lotu God Na Tuka

7

144,000 Non God

¹ Hitahun haratu na hite la angelo atu mo vati, la lo turu hin la pulo varama atu mo vati, ale la angelo atu la lo taurilati la langi atu mo vati na varama vara i pa sopo te langi hatea i eri sere na varama teni i sere na tasi teni i sere te vipahai hatea. ² Ale na hite na angelo tinapua matea mo lo vele Opaie mo tauri na taipulu non God mauri, ale mo ulo tavera isan la angelo atu mo vati sei la lavi na suiha vara la pa eri komo na varama peresi na tasi, *Jer 49.36; Dan 7.2; Zec 6.5* ³ mo vereha mara, “Ha sopo komo na varama teni tasi teni te vipahai hatea tako matan ra sopo lo tau na taipulu na punghori volitusi non nofa God.” *Ezek 9.4, 6* ⁴ Ale na rongo na evin la tamlohi atu la tau na taipulu hinira, mo tikeli 144,000 ale la tamlohi atu la tai na tavitavui tari matan Israel:

- ⁵ 12,000 na tavitavuin Judah,
- 12,000 na tavitavuin Reuben,
- 12,000 na tavitavuin Gad,
- ⁶ 12,000 na tavitavuin Asher,
- 12,000 na tavitavuin Naphtali,
- 12,000 na tavitavuin Manasseh,
- ⁷ 12,000 na tavitavuin Simeon,
- 12,000 na tavitavuin Levi,
- 12,000 na tavitavuin Issachar,
- ⁸ 12,000 na tavitavuin Zebulun,
- 12,000 na tavitavuin Joseph, peresi
- 12,000 na tavitavuin Benjamin.

Vao Tari Na Varama

⁹ Hitahun haratu na kilau vano, e! Vao tavera matea tea i sopo eri evira, la mara jara tinatinapua tari, tavitavui tari, ale tamlohi purongo tari, peresi na leo tari la lo turu na naho jara sakele non supe, ale na nahon Natu Sipsip. La ruru na ruru lulu peravu, ale la lo tauri na rau viniu na limara, ¹⁰ ale la lo ulo lara,

“Suiha mata juri na tamlohi mo lo toho na liman nofa God, mo lo sakele na jara sakele non supe peresi Natu Sipsip.”

¹¹ Ale angelo tari sei la lo turu falihni na jara sakele non supe peresi la tamlohi aulu tari atu peresi la hinau mauri atu mo vati, enira mo isoiso la juruvi popovi na lepa atano na naho jara sakele non supe, ale la lotu God.

¹² Lara, “Amen! Avulahi isana, hasohasona, lelevosahi, vere meje, ooloo, suiha peresi na filangi, enira non nofa God mata rani tui tui tarea! Amen!”

¹³ Ale vonan la tamlohi aulu atu matea mo usia isaku mara, “Ko levosahi la tamlohi nike sei la lo ruru na ruru lulu peravu? Ko levosahia vara la tai epu?”

¹⁴ Na raramia nara, “Tapala, mo vono, pani engko ko levosahia!”

Ale mo vereha isaku mara, “La haranike natu, la jelu hin pongi filangi tavera atu. La hoje na nora ruru peravu na faen Natu Sipsip ale mo vaira la lulu. ¹⁵ Ale matana, la eri turu na naho jara sakele nona supe non God vara la lotua tarea na nona Temple, ale haratu mo lo sakele na jara sakele nona supe enia i pa lo kilaura. ¹⁶ La pa sopo eri marohati teni la mafohu hin te rani, ale alo i pa sopo eri vilira, teni langi tutuni i komora, ¹⁷ matan Natu Sipsip sei na livuha jara mata jara sakele nona supe i pa kilaura, ale i pa tiromara la vano na patu wai sei la sile na mauri, ale God i pa kamoti na waimata na matara.”

8

Mo Roi Na Halimaravrua Pulu

¹ Ale moiso Natu Sipsip mo roi na halimaravruan la pulu atu, ale mo sopo te vaore na tuka korong mata sope aoa matea. ² Ale na hite la angelo atu mo limaravrua sei la lo turu na nahon God la silera na trumpet matematea.

³ Ale angelo tinapua matea mo lavi na jilivi mata gold matea mata i suli na hasori, mo sinai mo turu na votavota atu. Ale la silea na hasori matuvana matan vara i sohaia peresi na usiusi nona tapuhi tari na votavota sei la vaia na gold na naho jara sakele non supe. ⁴ Ale asu hasori peresi na usiusi nona tapuhi la tai na liman angelo atu, la sahe aulu na nahon God.

⁵ Moiso angelo atu mo sohani na vara hapu hani mata votavota na jilivi hasori, ale mo pulahia na varama, ale piri mo roroa, vaha mo vilasi, ale mihi matea mo hisu.

Trumpet La Tiv

⁶ Ale la angelo atu mo limaravrua la lo tauri na trumpet la tatamahu vara la tiv la trumpet atu.

⁷ Ale tiroma angelo mo tiv na nona trumpet, ale vatu aes peresi na hapu la hoi peresi na fae la jovi na varama, ale mo suli na hatolu vipahai tari peresi na hatolu ruvu ruvu tari na varama.

⁸ Harua angelo mo tiv na nona trumpet, ale hinau matea mo sohena vutivuti tavera mata hapu hani, la pulahia mo sivo na lolo tasi, ale hatolu tasi na varama mo mai fae, ⁹ hatolu maji tasi tari na varama la mate, ale mo komo na hatolu lanis tari sohena.

¹⁰ Hatolu angelo mo tiv na nona trumpet, ale vitusarasara tavera matea mo jovi na masapa mo hani mo pepe tavera mo jovi na hatolu wai roro tari peresi na hatolu patu wai tari na varama. ¹¹ Ale hijan vitusarasara atu enia Hohona, ale hatolu wai tari atu la mai la hohona, ale tamlohi matuvana la mate matan wai hohona atu. ¹² Havati angelo mo tiv na nona trumpet, ale hinau matea mo vili nafihi na hatolu mera alo, peresi na hatolu mera vitu peresi na hatolu mera vitusarasara. Alo mo sopo mera na hatolu rani matea, ale vitu peresi na vitusarasara la sopo mera na hatolu vutepongi matea.

¹³ Ale na hite na mala matea mo hasena avu roto na masapa, mo lo ulo mara, "Rani sasati, rani sasati, rani sasati isana tamlohi tari sei la lo toho na varama matan la angelo atu mo tolu la tatamahu vara la tiv na nora trumpet."

9

¹ Halima angelo mo tiv na nona trumpet, ale na hite na vitusarasara matea matan tuka mo jovi na varama, ale la sile vitusarasara atu na kia mata mataruan koko tavera jea atu sei mo sivo atano jea na lolo varama mata matea. ² Ale mo roi koko tavera jea atu sei mo sivo atano jea na lolo varama mata matea, ale asuna mo lo malue sohena asu hapu tavera matea. Alo peresi na masapa la fofoha na asun koko atu. ³ Ale hatpoha la malue na asun koko atu la tatavu na varama. La silera na suiha mo tataholo na suiha novu lepa.

⁴ La vereea isan la hatpoha atu vara la pa sopo komo na ruvu teni te hinau mo lo ulua teni te vipahai hatea, pani vara la pa komo la tamlohi atu purongo sei la sopo lavi na matamata non God na pungorira. ⁵ La majinga na hatpoha vara la vailejilejira mata vitu i lima, pani la horora vara la sopo vilimateira, ale epe varihaji la silea mo sohena novu lepa mo hatira. ⁶ Hin la rani atu tamlohi la pa opoi na mate, pani la pa sopo eri mate. La pa fomtau mata mate, pani matea i pa rovo hinira.

⁷ La hatpoha atu la sohena hos la tatamahu mata vuro. Na patura la tau na hinau sohena fongo fongo mata gold nona supe, ale la lavi na naho tamlohi. ⁸ vulura mo peravu sohena vulu ha'ai, ale hu'ura la sohena hu'ura lion. ⁹ Na rumara la ruru na ruru vuro la vaira na aen. Rum hapara mo sohena rum palo takonahi hos la lo reve na kartira la maro na vuro. ¹⁰ Vifira la sohena vifi novu lepa, ale suiha varihaji matana, i pa tikeli na vitu i lima. ¹¹ Nora supe enia pa angelo atu sei mo lo aulu hin koko tavera jea atu sei mo sivo atano jea na lolo varama mata matea, hijana na leon tavitavin Israel enia 'Abaddon', ale na leo mara Greek enia 'Apollyon'.*

¹² Ale tiroma rani sasati mo masese moiso, pani ka hitea, rani sasati mo rua la lo usurura la lo mai.

¹³ Halimarave angelo mo tiv na nona trumpet, ale na rongo na leo matea mo malue hin la pala atu mo vati na pingo votavota atu la vaia na gold sei mo lo turu na nahon God, ¹⁴ leo atu mo vereea isan angelo atu mo lo tauri na trumpet mara, "O uli nafihi la angelo atu mo vati sei la pesilatira na pahisa wai roro tavera Euphrates." ¹⁵ Ale la tamahuni la angelo sei mo vati moiso matan aoa akerihi, rani akerihi, vitu akerihi peresi tauni akerihi vara la pa uli nafihi matan vara la pa vilimatei na hatolu tamlohi tari na varama. ¹⁶ Na rongoa vara evin la tamlohi vuro atu la lo sakele na hos mo tikeli 200,000,000.

¹⁷ Na hinau sei God mo vujangiau hinia, na hite la tamlohi atu la lo maro na hos la ruru na ruru vuro mata fumara, majhira mo hahara mera, ale mo heja tasi, ale mo joriha. Patu hos la sohena patu lion, hapu peresi asu hapu peresi na vatu tutuni mata volkeno la lo malue na jingora. ¹⁸ Ale hatolu tamlohi tari na varama la pa mate matan rongohaji sasati mo tolu sei, ale hapu atu peresi na asu hapu peresi na vatu tutuni mata volkeno mo lo malue na jingora. ¹⁹ Matan suihan la hos atu mo lo toho na jingora peresi na vifira matan vifira la sohena mata, ale patura la sile na epe varihaji.

²⁰ Vao tamlohi na varama la sopo mate hin la rongohaji sasati atu, pani la sopo posi na nora vavahinau, ale la sopo isoiso na nora lotu mata tanume sasati peresi na tamasi sei la vaira na gold, silver, bronze, vatu teni laho pahai atu la sopo eri kilau, teni tea i rorongoni teni i hahau. ²¹ La sopo isoiso na nora vilimatei na tamlohi, na nora sui, na nora mauri maji peresi na nora vavahano.

* 9:11: Abaddon: Raramin hija sei Abaddon enia 'Haratu mata komokomo'.

10

Angelo Atu Peresi Na Viriviri Pepa Rihirihī

¹ Ale na mele hite na angelo suiha tina-pua matea mo lo sevuti na tuka. Telangi matea mo leputia, ale nuenuē matea mo lo toho aulu na patuna. Nahona mo sohena alo, ale palona mo sohena peri hapu mo lo hani, ² ale na limana mo lo tauri na viriviri pepa rihirihī matea sei mo roi moiso. Mo lo turu atu, ale matua palona na tasi, ale marau palona na lepa, ³ ale mo ulo na leo matea ūmuna mo puhoni sohena ulo lion, ale na rani mo ulo na rongo la piri atu mo limaravrua la roroa na leora.

⁴ Piri atu mo limaravrua la roroa, ale na pa lo tatamahu vara a uli na sava la vereā, pani leo matea mo tai na tuka mo ulo mara, “O sopo uli na hināu la vereā! O jarohira vara tea i pa sopo levosahia.”

⁵ Ale angelo atu na hitea mo lo turu na tasi peresi na lepa mo tahe na matua limana na tuka, ⁶ Ale mo vai na retitauhi matea na hijan God atu mo mauri mata rani tui tui sei mo vai na tuka peresi na varama peresi na tasi peresi na hināu tari la mauri. Angelo atu mo vereā vara God i pa sopo mele sasaovi, ⁷ ale sava God mo vereā moiso isan la nona volitusi sei la pŕovet mata nona hina luhu tavera, mo vara nakerihī hināu tari la pa masese hin rani atu vara halimaravruan la angelo atu i tiv na nona trumpet.

⁸ Ale leo atu mo tai na tuka mo mele retireti isaku mara, “O vano o lavi viriviri pepa atu mo vuhesi moiso na liman angelo atu mo lo turu na tasi peresi na lepa!”

⁹ Ale na vano isan angelo atu na usia vara i sileau hin viriviri pepa rihirihī atu. Ale angelo atu mo vereā mara, “O lavi viriviri pepa atu o hania! I pa vai na pangem i nini, pani na jingom i pa memeje sohena wai sugabag.” ¹⁰ Ale na lavi viriviri pepa rihirihī atu na liman angelo atu, ale na hania. Memejina mo sohena wai sugabag, pani na pangeku mo nini.

¹¹ Hitahu la vereā isaku lara, “O pa mele vere na hināu la pa masese isana tamlohi purongo matuvana peresi na mara jara tinatinapua matuvana peresi na leo matuvana, ale peresi na supe matuvana.”

11

Tuetueni Mo Rua

¹ Hitahun haratu la sileau na vipahai ava matea, ale la vereā lara, “O turu o ava falihī na Temple non God, ale o sopo ŕomaliho na votavota peresi na evi tamlohi la lo lotu ea. ² Pani o sopo ava na jara mo ŕalihī hin rope atu na jingoima Temple matan God mo majinga vara i pa toho na lima vao tamlohi jara tinapua tari atu na varama sei la sopo

noku tamlohi vara la pa varasi taon tavera tapu atu Jerusalem, i tikeli te vitu i ngavulu vati i rua. ³ A pa sile na suiha isan la noku tuetueni nike mo rua sei la ruru na ruru mata ŕomsati sei mo sohena paki niu, vara la pa retimangovi mata rani i tari vahatea i ngav sangavulu rua i ngavulu limarave (1,260).”

⁴ La tupra rua nike, enira pulo olive mo rua peresi na peri lamu mo rua la vaira na gold sei la lo turu na nahon Moli God non varama. ⁵ Ale tea vara i vaihitea vara i komora, hapu i pa malue na jingora i pa komo na nora meresahi. Ale vara tea mo opoia vara i komora, enia i pa mate. ⁶ Hin rani atu vara la lo retimangovi, la lavi na suiha vara na sava rani la opoia, la pa horo na masapa matan i sopo sile na usa i jovi, ale la eri posi na wai tavera la mai fae, ale la pa eri vili na tamlohi na varama na rongohaji tavera tinatinapu.

⁷ Hin rani atu vara la tamlohi tuetueni tupra rua atu la isoiso na nora vereulia, maji jala sasati atu i pa malue hin koko tavera jea atu sei mo sivo atano jea na lolo varama mata mateia vara i valum peresira, ale i pa jeura i vilimateira. ⁸ Tarapera la plahau hinira na malelen taon tavera atu sei tuai la vosae nora Moli na talopeilopei hinia. Taon tavera atu ŕaramina mo sohen taon sati atu Sodom teni jara tavera atu Egypt.

⁹ Ale ko hitea, mata rani mo tolu peresi na sope rani matea, tatua tamlohi purongo, tavitavi tamlohi, leo tari, ale mara jara tinatinapua la pa lo varoi na tarapen la tamlohi tuetueni tupra rua atu. La pa sopo majinga vara la taura na taptap, ¹⁰ ale tamlohi tari na varama la pa vai na hanhani tavera, ale la pa avulahi moiso la pa silesilera na otori mata sava mo masese isan la tamlohi tuetueni atu mo rua matan la lo sile na rani ŕilangi isan la haratu na varama. ¹¹ Pani rani mo tolu sopena matea mo vano moiso, ale God mo mongovira, ale la mele mauri. La mele turu moiso tamlohi sei la hitera la matahu tavera matara.

¹² Ale la tamlohi tuetueni atu mo rua la rongo na leo tavera matea mo tai na tuka mo vereā mara, “Ha mai nike!” Ale nora meresahi la hitera la sahe aulu na tuka na telangi matea. ¹³ Vahatea mihi tavera matea mo tolu sopena tavera atu matea hin la haratu mo sangavulu. Evi tamlohi la mate hin mihi tavera atu mo tikeli tari vaha limaravrua (7,000). Ale sope vaon taon atu la pa lo mauri, la sile na hasohaso isan God haratu mo aulu na tuka. ¹⁴ Harua rani sasati atu mo masese moiso! Pani ka hitea, hatolu rani sasati mo lo mai vilavila.

Halimaravruan La Trumpet Atu

¹⁵ Halimaravruan la angelo atu mo tiv na nona trumpet, leo tavera hai la retireti na tuka lara, “Suiha mata aulu hin varama nike, nake i pa vano na liman noŋa God peresi nona Kŋristo, ale i pa tauri na suiha mata rani tui tui tarea.”

¹⁶ Ale la tamlohi aulu atu mo ngavulu rua mo vati (24) sei la lo sakele na nora jara sakele nona supe na nahon God, la juruvi popovi na lepa atano, ale la lotu God, ¹⁷ lara,

“Moli God engko suiha aulu atu mo tavera jea,

ko lo toho nake, ale ko toho tuai moiso.

Kama vere meje isam matan

ko tapulo vara o vavahinau na nom suiha tavera

vara o aulu na hinou tari.

¹⁸ Mara jara tinatinapua tari na varama la lolokoru,

pani nom talai lolokoru mata hehe mo mai,

ale nake rani mo mai vara o sile na nom aria isan la haratu la mate,

ale nake rani mo mai vara o sile na otori isana nom volitusi,

haratu la pŋovet peresi na tapuhi,

ale isan la haratu la lo oloolo na hijam,

la haratu la tamlohi purongo,

peresi la haratu la tamlohi aulu jea,

ale rani mo mai vara o komo la haratu la lo komo na varama.”

¹⁹ Ale Temple non God aulu na tuka mo roi, ale o efi hite na puhoro mata nona retitauhi mo lo toho na lolo nona Temple, ale vaha mo vilasi, piri mo roroa, ale mihi tavera mo hisu, ale ŋofo vatu aes tavera la jovi.

12

Haŋai Matea Peresi Na Dragon

¹ Ale matamata maŋurahi tavera matea mo pala na tuka: enia haŋai matea mo ruru na alo sohena ruruna, ale vitu mo lo toho na ruhuruhu palona, ale vitusarasara mo sangavulu ŋomana mo rua la vai na rongoŋongo nona supe matea na patuna, ² mo pangepange, ale mo tangi aulu mata rongohaji tavera, mo lo tangi matan mo tatamahu vara i lavilavi.

³ Ale matamata tinapua matea mo pala na tuka, e! Dragon hahara tavera matea. Patuna mo limaravrua la lavi na rongoŋongo matematea, ale palana mo sangavulu. ⁴ Ale viŋina mo haro na hatolu vitusarasara tari na tuka mo pulahira la sivo na varama. Moiso dragon atu mo turu na nahon haŋai atu mo tatamahu vara i ŋolomi na natuna vara haŋai atu i lavilavi.

⁵ Haŋai atu mo vasusui na natirihi lamane matea sei enia i pa aulu na mara jara tinatinapua tari na varama, ale i pa tamajira na maja aen matea. La reve naŋihi natirihi lamane atu mo sahe isan God, ale mo sakele na nona jara sakele nona supe.

⁶ Ale haŋai atu mo rovo mo vano na jara hasetoho matea sei God mo tatamahunia matana moiso. Ale la pa kilaua atu mata rani i tari vahatea i ngav sangavulu rua i ngavulu limarave (1,260).

Vuro Na Tuka

⁷ Hitahun haratu vuro mo tapulo na tuka, ale Michael patu angelo peresi na nona angelo la valum peresi dragon atu tolu na nona angelo, ale dragon atu peresi na nona angelo la vai na vuro peresi Michael, ⁸ pani enira la jeu na dragon peresi na nona angelo hin vuro atu, ale la titiura na tuka, ⁹ Ale dragon tavera atu, enia mata sasati atu tuai, haratu la tovia Tiapolo teni Setan, tarea enia mo lo halu na tamlohi tari na varama, la pulahia peresi na nona angelo la sivo na varama.

¹⁰ Ale na rongo na leo tavera matea na tuka mo vereea mara, “Nake rani mo mai moiso vara vavahinau mata juri non noŋa God la masese, nake i pa turu na nona ŋilangi peresi na nona suiha mata supe, nake rani vara Kŋristo i tauri na nona suiha, enia sei God mo viŋonia vara enia i pa Jujuri. Ale matana, mo pulahi naŋihi mere-sahi atu vara i sivo na varama, enia haratu mo lo tuvai na voraiŋa na nahon God tarea.

¹¹ Ale la jeu Setan mata ŋaen Natu Sipsip ale mata nora vereulia na retivaraŋuhu matan la tatamahu vara la mate mata nora rasua.

¹² Matana, tuka aulu ha pa avulahi peresi la haratu la lo toho atu, pani varama peresi na tasi ha ŋomsati matan la pulahi Tiapolo mo sivo isamim, ale mo lolokoru patuna matan mo levosahia vara nona rani mo vejuveju.”

¹³ Na rani dragon atu mo hitevosahia vara la titiua mo sivo na varama, mo levuti pa haŋai atu sei mo lo vasusui natuna lamane atu. ¹⁴ Pani la sile na hapa mala tavera mo rua isana vara i avu i rovo i vano hin jara atu God mo tatamahunia matana, vara la pa kilaua hin jara hasetoho atu. Dragon i pa sopo efi komoa hin jara atu mata tauni i tolu peresi na sope tauni matea.

¹⁵ Ale dragon atu mo sosoro na wai sohena wai roro matea, mo malue na jingona mo usuri haŋai atu, ale mo vaihitea vara i tivesi naŋihia hin wai tatave atu, ¹⁶ pani lepa mo tuenia, lepa mo roi, ale mo ŋolomi wai tatave atu sei mo lo malue na jingon dragon atu. ¹⁷ Ale dragon atu mo lolokoru sasati hin haŋai atu. Ale mo malue mo vano vara i vai na vuro peresi te natun haŋai atu tinapua. Enira la tamlohi atu sei

la lo oloolo na retileu non God, ale la lo usuri na vereulia sei Iesu mo vujangia isara. ¹⁸ Moiso dragon atu mo turu na pahisa tasi na oneone.

13

Maji Jala Sasati Mo Rua La Mai

¹ Ale na kilau vano na hite na maji jala sasati matea mo lo malue na tasi. Palana mo sangavulu, ale patuna mo limaravrua. Ale rongoŋongo nona supe mo sangavulu la lo toho na palana matematea. Ale la uli na hija hai na patuna hatehateahi, enira mo isoiso la lo kali God. ² Maji jala sasati atu na hitea mo lavi na epe leopard, palona mo sohena palo bear, ale jingona mo sohena jingo lion. Dragon atu mo silea na nona rilangi peresi na nona jara sakele nona supe vara i tauri na nona suiha tavera. ³ Sola matea mata mate mo lo toho na patuna matea, mo sohena vara i pa mate matana, pani mo mele mavo, ale tamlohi tari na varama la usuria matan la maŋurahi hin maji jala sasati atu, ⁴ ale la lotu dragon atu sei mo lo sile na nona suiha isan maji jala sasati atu, ale la lotu maji jala sasati atu lara, "Mo sopo tea i sohena maji jala sasati nike! Tea i pa sopo eri valum peresia!" ⁵ God mo majinga vara maji jala sasati atu i retihapahapa, ale i kalua moiso mo silea na vitu mo ngavulu vati mo rua

(42)

matan vara i vaihite na suihana. ⁶ Maji jala sasati atu mo kali God, ale mo kali na hijan God, ale mo kali jara atu God mo lo toho ea peresi na tamlohi sei la lo toho atu peresia na tuka. ⁷ Ale God mo majinga vara i vai na vuro peresi na nona tapuhi, ale vara i jeura. God mo silea na suiha vara i aulu na tadvavui tari, tamlohi purongo, leo tari peresi na mara jara tinatinapua tari, ⁸ ale la haratu la lo toho na varama la pa lotu maji jala sasati atu, enira mo isoiso hijara la sopo ulira na Puku mata Mauri sei la ulia tuai tiroma na vavahinau mata varama.

⁹ Haratu mo lo rongo, i tapurongo!

¹⁰ Vara engko mata la pa taurilatihu, la pa taurilatihu,

vara engko mata la pa vilimateiho na sita vuro,

la pa vilimateiho na sita vuro.

Raramina mo sohen harihi: tapuhi non God la pa tatamahu mata turu rilangi na romfomi matea na nora hahau mata rasua.

¹¹ Ale na mele hite na maji jala sasati tinapua matea mo malue na lepa. Palana mo rua mo sohena natu sipsip, ale mo retireti sohena dragon. ¹² Mo lavi na suihan maji jala sasati atu tiroma sei solana mo mavo moiso. Ale mo vai na varama peresi na tamlohi hinia la lotu maji jala sasati atu

tiroma. ¹³ Ale mo vai na hina maŋurahi tatavera tinatinapua, sohen mo vai na hapu mo tai na masapa mo sinai na varama na naho tamlohi, ¹⁴ ale hin la hinau maŋurahi atu God mo majinga hinira vara i vaira na nahon maji jala sasati tiroma atu, mo halu na tamlohi tari la lo toho na varama, ale mo vereea mara la vai na tamasin maji jala sasati atu tiroma sei la vilia na sita vuro, pani mo pa lo mauri, ¹⁵ ale God mo majinga vara harua maji jala sasati atu i mangovi tamasi atu vara i mauri matan vara i eri retireti, ale matan vara tamasin maji jala sasati atu i pa vilimatei la haratu la sopo lotu tamasin maji jala sasati atu, ¹⁶ ale enia mo sile na retileu matea vara tamlohi tari la pa lavi na taipulu na matua limara teni na pungorira. Hina purongo vara la aulu, teni la tamlohi purongo, teni la tadvav, teni la tilavono, teni la tamlohi materi, teni la slev, ¹⁷ matan vara tea i sopo lavi taipulu atu, enia i sopo eri volvoli teni i haŋahi te hinau hatea. Taipulu atu raramina enia hijan maji jala sasati atu peresi na evi hijana.

¹⁸ Hinau nike, mo opoi na lelevosahi. Vara ko opoia vara o levosahi na evin maji jala sasati atu, enia evi hija tamlohi matea, ale evina enia 666.

14

Natu Sipsip Peresi Na Vaona 144,000

¹ Ale na kilau vano, e! Natu Sipsip mo lo turu na vutin Zion, * ale tamlohi mo 144,000 la lo turu peresia. Hijana peresi na hijan Tamana la ulia na pungorira. ² Ale na rongo na vaore matea na tuka, mo sohena rum tasi tavera, ale mo sohena roroa piri tavera. Leo atu na lo rongoa mo sohena leo pue tangtangi sei tamlohi mata roro na pue tangtangi la lo roro hinira, ³ la lo lalavete na vete paro matea na naho jara sakele nona supe non God peresi la hinau mauri mo vati atu peresi la tamlohi aulu atu. Tea i sopo eri levosahi vete atu, pani la tamlohi atu purongo evira 144,000 sei God mo volituhura na varama. ⁴ Enira mo isoiso la lamane, la sopo lo juruvi peresi te haŋahi hin te rani, ale vara Natu Sipsip mo haipu, la lo usuria. God mo volituhura na varama matan vara la mai sohena asitauni mata varama isan God enia Natu Sipsip. ⁵ Enira la sopo eri halu, ale la vokevoke.

Retisohai Nona Angelo Tupu Tolu

⁶ Hitahun haratu na hite na angelo tinapua matea mo lo avu aulu na livuha masapa. Mo lo lavi na Retiŋuhu matan tui tui matan vara i vereea isana mara jara tinatinapua tari, tadvavui tari, leo tari, ale tamlohi purongo tari la lo toho na varama, ⁷ angelo atu mo ulo mara, "Ha sile na oloolo isan

* 14:1: Zion: Zion enia Jerusalem.

God, ale ha tahe na hijana aulu, matan rani mo masese moiso matan vara i ari na tamlohi. Ha lotua matan enia haratu sei mo vai na tuka peresi na varama peresi na tasi peresi na patu wai.”

⁸ Harua angelo mo usuria mo ulo mara, “Babylon mo tavera mo jovi, mo jovi. Mo reve na mara jara tinatinapua tari la inu na waen nona mauri maji tinatinapua.”

⁹ Hatolu angelo mo lo usuri la haratu mo rua tiroma mo pala mo ulo mara, “Hinau nike natu, i pa pala isamim vara tea i lotu maji jala sasati atu teni tamasina teni i lavi na nona taipulu na limana teni na pun-gorina, ¹⁰ ale enia sohena i pa inu waen atu mata talai lolokoru non God mata hehe sei mo sureia na nona paniken mata nona lolokoru, ale i pa rongohaji na hapu peresi na vatu tutuni mata volkeno, pani i pa sopo eri mate. La pa vaia na naho angelo tapu peresi Natu Sipsip. ¹¹ Ale vara tea i lotu maji jala sasati atu peresi na tamasina teni i lavi na nona taipulu mata hijana, ale i pa sopo eri isoiso na nona rongohaji na hapu mata rani tui tui.”

¹² Haranike enia reti matea mo vano isana tamlohi viromi non God vara la turu rilangi, la haratu la lo taurilati na retileu non God peresi na nora rasua hin Iesu.

¹³ Ale na rongo na leo matea na tuka mo vere mara, “O uli harihi: mo tapulo nake, avulahi tavera isan la haratu non Moli la pa mate.”

Ale Tanume Tapu mo faramia mara, “En-jora! Avulahi fuhu isara matan la pa mapu na nora vavahinau la lo kalvono hinira, ale vua nora vavahinau fuhu la pa lavia hitahu.”

Angelo Atu Mo Lo Sakele Na Telangi

¹⁴ Ale na kilau sahe, e! Telangi lulu matea. Na hite matea mo lo sakele hinia sohen Natun Tamlohi. Rongoŋongo matea la vaia na gold mo lo toho na patuna, ale mo lo tauri na sita kole voro matea na limana. ¹⁵ Ale angelo tinapua matea mo malue na Temple mo ulo isan haratu mo lo sakele na telangi mara, “O tapulo taitai na nom sita kole. Rani mata lavi na asitauni na varama la mena.” ¹⁶ Moiso haratu mo lo sakele na telangi mo vuŋahi na nona sita kole, ale mo lavi na asitauni na varama.

¹⁷ Hitahun haratu angelo tinapua matea mo malue na Temple, ale enia sohena mo lo tauri na sita kole voro matea. ¹⁸ Ale angelo tinapua matea mo malue na jara votavota enia mo lo kilau na hapuna, ale mo ulo na leo tavera matea mo vano isan angelo atu mo lo tauri na sita kole voro mara, “Vua grape tari na varama la mena! O vuvu na vurungina na nom sita kole voro.” ¹⁹ Ale angelo atu mo vuŋahi na nona sita kole

na varama, ale mo vu na vua grape mo pulahira la sivo na koko varavarasi mata talai lolokoru non God mata hehe. ²⁰ Ale la varasihira na koko varavarasi sei mo lo toho na jingoiman taon tavera, ale faera la roro la malue hin koko varavarasi atu mo vano mo tikeli 296 kilometre asau hinia, ale puahana mariviti vara i lovi te hos.

15

Isoiso Talai Tavera La Lo Mai

¹ Hitahun haratu na kilau sahe na tuka, na mele hite na matamata tinapua matea, enia hina mafurahi tavera matea, ale angelo mo limaravrua la lo lavi la isoiso rongohaji sasati tavera atu mo limaravrua, ale enira mo isoiso talai lolokoru non God mata hehe.

² Ale na hite na hinau matea mo sohena tasi mata glas mo hoi peresi na hapu, ale la tamlohi atu sei la jeu na suihan maji jala sasati atu peresi na tamasina peresi na evi hijana, la lo turu na pahisan tasi mata glas atu. La lo tauri na pue tangtangi non God, ³ ale la lo lalavete na vete non Moses volitusi non God peresi na vete non Natu Sipsip lara, “Moli God engko suiha aulu atu mo tavera jea,

nom vavahinau la tavera jea,

ale la fuhufuhu jea,

nom vavahinau la tataholo,

ale la varafuhu,

engko ko Supe nona vao tamlohi jara tinatinapua tari na varama!

⁴ Moli, hare natu, i sopo eri sile na oololo tavera isam,

teni i tahe na hijam aulu?

Matan engko hasem ko tapu,

ale mara jara tinatinapua tari

la pa mai la pa lotuho

matan ko vujangi nom aria sei,

mo tataholo mo fuhu.”

⁵ Hitahun haratu, na mele kilau, ale na hite na jara tapu na lolo Temple na tuka mo roi. ⁶ Ale na hite na angelo mo limaravrua sei la lo tauri na jilivi talai mata rongohaji sasati atu mo limaravrua la malue na lolo Temple. La ru na ruru lulu peravu, la eve na fumara na oti la vaia na gold. ⁷ Ale vonan pa la hinau mauri atu matea mo sile na jilivi talai mo limaravrua la vaira na gold matematea isan la angelo atu mo limaravrua, jilivi talai atu la lavi na talai lolokoru non God mata hehe sei mo mauri mata rani tui tui, ⁸ ale Temple mo mafivi na asu memeran God mata suihana, ale tea i sopo eri unu na Temple vavano la hinau rongohaji sasati tavera sei la angelo atu mo limaravrua la lo lavira, la pa vaira i isoiso.

16

Jilivi Talai Mata Lolokoru Tavera Non God

¹ Hitahun haratu na rongo na leo tavera matea mo malue na Temple mo vereea isan la angelo atu mo limaravrua mara, “Ha vano ha surei la jilivi talai mata talai lolokoru non God mata hehe atu mo limaravrua na varama!”

² Ale tiroma angelo mo vano mo surei na nona jilivi na varama, vahatea vosavosa fanga la pala isan la tamlohi atu sei la lavi na taipulu non maji jala sasati atu peresi la haratu la lo lotu na tamasina.

³ Harua angelo mo surei na nona jilivi na tasi, vahatea tasi mo posi mo mai sohena rae tarape moiso hinau tari na lolo tasi la mate matana.

⁴ Hatolu angelo mo surei na nona jilivi na wai roro peresi na patu wai moiso la mai rae.

⁵ Ale na rongo angelo atu sei wai la lo toho na ruhuruu suihana, mo vereea isan God mara, “God, talai ko silea mo tataholo, matan engko hasem ko tapu, ko lo toho nake, ale ko lo toho tuai moiso. ⁶ Mo tataholo vara tamlohi la inu rae sei ko silera hinia matan la vili na tapuhi non God peresi na nom p̄ovet matan faera la roro na varama.”

⁷ Ale na rongo na leo matea mo tai na votavota mara, “Io, Moli God engko suiha aulu atu mo tavera jea, nom talai tari la vokevoke, ale la varaʻfuhu.”

⁸ Ale havati angelo mo surei na nona jilivi na alo, ale alo mo tapulo suli na tamlohi na hapuna. ⁹ Tamlohi tari tutuni alo mo sulira, ale la kali na hijan God matan mo lo vai la rongohaji sasati tavera sei, pani tea mo sopo posi i vano isan God teni i silea na ooloo.

¹⁰ Halima angelo mo surei na nona jilivi na jara sakele nona supe non maji jala sasati atu, vahatea ʻfofoha mo tavuni jara atu mo lo tauri na suiha hinia, ale nona tamlohi la tapulo hatihati na memera matan la lo rongohaji. ¹¹ Ale matan la lo rongohaji tavera peresi la nora vosavosa fanga atu la hajira, la kali God na tuka, pani la ʻfohu vara la posi na nora hehe.

¹² Halimarave angelo mo surei na nona jilivi hin wai tavera atu Euphrates, ale wai atu mo mamasa matan vara la supe atu la tai Opae, la efi hahau rotoa. ¹³ Ale na hite na tanume sasati mo tolu la sohena puroko, matea mo malue na jingon dragon atu, matea na jingon maji jala sasati atu, ale matea isan nona p̄ovet haluhalu. ¹⁴ Matan la tanume sasati atu la lavi na suiha matan vara la vai na hinau maʻfuraʻhi, ale la vano isana supe tari na varama vara la takonahira matan vara la pa vai na vuro peresi

God, enia suiha aulu atu mo tavera jea na nona rani tavera.

¹⁵ Ale Moli mara, “Ha levosahia! A pa mai sohena tamlohi vavanaho matea, avulahi tavera isan haratu mo sopo juruvi, pani mo lo kilau moiso mo tatamahu na nona ruru matan vara i vono i pa hahau ʻralihi i malamala, ale i mahanuhanu matana.”

¹⁶ Ale la tanume sasati atu la takonahira na jara matea la lo tovia Armageddon na leon tavitauin Israel.

¹⁷ Ale halimaravruan la angelo atu mo surei na nona jilivi na masapa, ale leo tavera matea mo tai na jara sakele nona supe aulu na lolo Temple mara, “Mo isoiso!”

¹⁸ Moiso piri mo roroa, ale vaha mo vilasi, ale mihi tavera matea mo sopo lo tea i sohena na varama i jeu haratu, matan enia mo tavera jea. ¹⁹ Mihi atu mo vuhai na taon tavera matan Babylon tavaluna mo tolu, ale mo sohena isana taon tavera tari nona mara jara tinatinapua tari la jovi. God mo mele ʻfoʻfoʻmi na hehe tari non Babylon taon tavera atu, ale mo vaia mo inu vevuhi na waen mata nona lolokoru sasati na nona talai lolokoru mata hehe sei mo maʻfivi hin paniken atu. ²⁰ Ale ureure tari la tihai, ale vutivuti tari la tihai. ²¹ Vatu aes tatavera na tuka la jojovi sivo isana tamlohi, puhonira matematea la tikeli na kilo mo ngavulu vati (40). Pani tamlohi la kali God matan rongohaji sasati atu mo tavera jea.

17

Haʻrai Malele Peresi Pa Maji Jala Sasati Atu

¹ Ale vonan la angelo atu matea hin la haratu mo limaravrua sei la lo tauri na nora jilivi, mo mai isaku mara, “O mai, a pa vujangiho na talai non haʻrai malele atu sei mo lo sakele na wai matuvana, ² ale supe mata varama la vai na mauri maji peresia, ale tamlohi na varama la drong na nona mauri maji tinatinapua.” ³ Ale angelo atu mo laviau na vano na suihan Tanume Tapu na jara hasetoho matea. Hin jara atu na hite na haʻrai matea mo lo sakele na maji jala sasati hahara ʻfofoha matea, ale maji jala sasati atu mo lavi na hija matuvana na epena la lo kali God, ale na hite na patuna mo limaravrua, ale palana mo sangavulu. ⁴ Haʻrai atu mo ruru na ruru peravu majhina mo perpel, ale mo hahara ʻfofoha, ale mo ruru na gold peresi na vatu vilasi ruhuruu peresi na huʻfutavila. Na limana mo lo tauri na paniken waen matea la vaia na gold mo maʻfivi na nona posposi lumiha peresi na nona posposi viriu. ⁵ La uli na hija matea na pungorina ʻfaramina mo vara:

Enau Taon Tavera Matan Babylon

**Tina Ha Rai Malele
Peresi Na Posposi Lumiha
Mata Varama**

⁶ Ale na hite haʻai sati atu mo drong na fae tapuhi non God peresi na fae tuetuenu non Iesu. Na hitea na maʻurahi tavera hinia.

⁷ Pani angelo atu mo vereau hinia mara, “Ko maʻurahi mata sava? A pa vereuliho na faramin haʻai nike peresi maji jala sasati atu mo lo sakele hinia sei patuna mo limaravrua, ale palana mo sangavulu. ⁸ Maji jala sasati atu ko lo hitea mo lo toho, pani nake mo tihai, ale i sopo tuai i pa malue hin koko tavera jea atu sei mo sivo atano jea na lolo varama mata mateia i mai, ale i pa vano na nona komo. Ale tamlohi tari na varama sei God mo sopo uli na hijara na Puku mata Mauri tiroma moiso mo pa tapulo vai na varama, la haratu natu, la pa maʻurahi tavera hin maji jala sasati atu matan mo lo toho tiroma moiso, ale mo tihai, ale i pa mele pala.

⁹ Ale tea vara i tamlohi lelevosahi, i pa levosahi hinau nike. La patuna sei mo limaravrua enira vutivuti atu mo limaravrua sei haʻai atu mo lo sakele hinira. La vutivuti atu la farami na supe mo limaravrua. ¹⁰ Supe mo lima hin la haratu la jovi moiso, ale matea mo lo toho nake, ale matea mo sopo lo mai, ale i pa mai, pani God i pa majinga hinia mata makomo rani purongo. ¹¹ Ale maji jala sasati atu sei mo lo toho tiroma moiso, pani nake mo tihai, enia i pa halimaravtolura, pani enia nonan la haratu mo limaravrua atu, ale enia i pa vano na nona komo. ¹² Ale la palana atu mo sangavulu ko lo hitera enira supe mo sangavulu sei la sopo lo lavi na suiha, pani la pa tauri na suiha sohena supe peresi maji jala sasati atu mata makomo rani purongo. ¹³ La supe atu romira mo matea, ale la sile na nora suiha isan maji jala sasati atu vara i tauri na suiha. ¹⁴ La pa vai na vuro peresi Natu Sipsip, pani Natu Sipsip i pa jeura matan enia Moli nona Moli, ale Supe nona Supe, ale la haratu la lo toho peresia, enia mo tovara, ale mo vifonira, ale romira la romturu rilangi.”

¹⁵ Ale angelo atu mo vereau isaku mara, “Wai matuvana atu ko lo hitera sei haʻai malele atu mo lo sakele hinira, enira tamlohi purongo peresi na vao matuvana, peresi na mara jara tinatinapua peresi na leo tinatinapua. ¹⁶ Ale la palana mo sangavulu atu ko lo hitera peresi maji jala sasati atu, la pa rohu hin haʻai malele atu, ale la pa komoa, ale la pa vaia i malamala, ale la pa hania moiso la pa sulia na hapu. ¹⁷ Matan God mo taua na mapura vara la vai na masalona vara la mai matea na romira, ale la pa sile na nora suiha isan maji jala

sasati atu vara i tauri na suiha, vavano reti non God la masese.

¹⁸ Ale haʻai atu ko lo hitea, enia taon tavera sei suihana mo aulu na supe tari na varama.”

18

Babylon Mo Jovi

¹ Hitahun harihi, na mele hite na angelo tinapua matea mo lo sevuti na tuka. Enia mo lavi na suiha tavera jea, ale sasaramina mo vai na varama mo mera, ² ale enia mo ulo na leo tavera matea mara, “Babylon tavera, mo jovi, mo jovi! Enia mo mai jara luhu nona tanume sasati, jara luhu nona tanume lumiha tari, tau maji avuavu lumiha tari, ale jara luhu nona maji jala sasati sei la lumiha, tamlohi la nikehira. ³ Matan mara jara tinatinapua la inu na waen mata opoia rilangi mata nona mauri maji, supe tari na varama la vai na hehe peresia, ale tamlohi aʻeafehi, la tadvav mata nona mauri maji.”

⁴ Ale na mele rongo na leo tinapua matea mo tai na tuka mara, “Noku tamlohi, ha rovo hinia! Ha sopo pulutahi peresia na nona hehe matan vara ha pa sopo lavi nona rongohaji sasati peresia, ⁵ matan nona hehe la takonahia mo sahe vara la tikeli na tuka, ale God mo tatamahu vara i aria mata nona hehe. ⁶ O vaia isana sohen haratu mo vaia isana nom tamlohi. O mele kelea aulu vaha rua hin haratu mo silea isara. O vaia i inu na mana wai mata rongohaji i vaha rua hin haratu mo lo silea isara. ⁷ Haʻai atu mo romaulu hinia hasena na nona hina tadvav matuvana, ale o vailejilejia, o vai na romina i sati matan enia mo vereau mara, “Na sakele sohena vesupe matea, enau a pa sopo malepu hin te rani teni a pa romsati”. ⁸ Matan hinau atu nona rongohaji sasati la pa mai isana na rani matelete purongo, mateia, romsati, ale marua, hapu i pa komo na tarapena, matan Moli God suiha, enia haratu mo aria.”

⁹ Ale supe mata varama sei la vai na mauri maji peresia, ale la lavi na tadvav matana, la pa tangisia hin rani atu vara la hite na asu tarapena i lo koru. ¹⁰ Ale la lo turu asau hinia matan la matahuni na nona rongohaji, ale lara, “Rani sasati, rani sasati mo mai isam taon tavera, ko taon suiha, Babylon! Matan, vila fuhu purongo, nom talai mo mai isam.” ¹¹ Tamlohi aʻeafehi na varama la pa tangi, ale la tangtang matana, matan tea mo sopo voli na nora hinahinau, ¹² nora gold, silver, vatu fuhuru, hufutavila, ruru fuhu, ruru perpel, silk, ruru hahara rofoha, vipahai pona fuhu tinatinapua, hinau la tai nafihira na huʻu elephant, hinau la vaira na vipahai fuhuru jea, bronze, aen peresi na vatu

19

sei marble, ¹³ cinnamon peresi na spaes sei tamlohi la lo hanhani peresira, hasori, hasori sohena myrrh peresi na frankincense, waen, wel mata olive, flaua ruhu, wit, buluk, sipsip, hos, kart mata vuro peresi na slev, enira tamlohi mauri.

¹⁴ Ale leo atu mo mele vereea mara, “La vua atu sei mapum mo lo opoira la rovo hiniho moiso peresi na nom hina ruhu ruhu peresi na nom lakolako ruhu ruhu la tihai isam, ale o pa sopo efi mele hitera hin te rani.”

¹⁵ Tamlohi afeafehi matan la hinau sei, la tavitav matana, la pa turu asau matan la matahuni na nona rongohaji, la tangi la tangtangi, ¹⁶ lara, “Rani sasati, rani sasati isan taon tavera, haratu sei mo lo ru na ruru ruhu, ale mo lo ru na ruru perpel, ale ruru hahara fofoha. Mo ru na gold peresi na vatu ruhu ruhu, peresi na hu futavila, ¹⁷ pani vila ruhu purongo, nona tavitav la tihai!”

Captain mata lanis tari peresi na tamlohi voko na lanis peresi na tamlohi la lo lingira peresi la haratu la lo vai na mania na tasi la turu asau, ¹⁸ ale la tangi aulu matan la hite na asuna mo lo koru lara, “Sava taon mo sohen taon tavera akerihi!”

¹⁹ Ale la lo tangi aulu, ale na nora fomsati la pulahi na tangotango na patura, ale lara, “Rani sasati rani sasati isan taon tavera! Haratu sei la lo maro na lanis na tasi la tavitav matan nona tavitav, pani vila ruhu purongo, mo maroe, ²⁰ ale matana, tuka o avulahi peresi na tapuhi non God peresi na vaha rule peresi na pfovet, matan God mo sile na talai isana matamim.”

²¹ Ale angelo filangi matea mo lavi na vatu matea sohena vangi tavera matea mata pete na piri wit, ale mo pulahia mo sivo na lololo tasi, ale mo ulo mara, “Hin malele rilangi akerihi natu, taon tavera matan Babylon i pa jovi hinia, ale la pa sopo efi mele hitea hin te rani, ²² ale Babylon, ro-roan la haratu la lo roro na pue tangtangi, ale tamlohi roro, ale haratu la lo roro na flute, ale haratu la lo tiv na trumpet la pa sopo efi mele rongora na lolom, ale tamlohi erieri la lo vai na nora vavahinau hiniho, la pa sopo mele hitera hiniho hin te rani, ale roroa mata pete na wit la pa sopo mele rongoa hiniho hin te rani, ²³ lamu la sopo efi mele memera hiniho hin te rani, ale leo tamlohi i pa lahi peresi na nona ha'ai la pa sopo efi mele rongora hiniho hin te rani, matan nom tamlohi afeafehi tiroma enira tamlohi tatavera mata varama, pani nake sava? Ale nom mahu mo halu na mara jara tinatinapua tari, ²⁴ ale fae pfovet peresi na fae tapuhi non God peresi na faen la haratu ko vilimateira na varama mo lo toho hiniho.”

La Lalavete Na Tuka

¹ Hitahun haratu na rongo na hinau matea mo sohena leo vao tavera matea na tuka mo ulo mara, “Hasohaso God! God enia Jujuri! Hasohasona tavera peresi na suiha, enira non nofa God, ² matan nona aria la tataholo, ale la vokevoke matan enia mo ari tina ha'ai malele atu sei mo lo komo na varama na nona posposi viriu, ale God mo kele na fae nona volitusi sei la lo toho na liman ha'ai malele atu.” ³ Ale vao tavera atu la mele ulo lara, “Hasohaso God! Asun ha'ai malele atu i pa sahe aulu, rani tui tui tarea.”

⁴ Ale la tamlohi aulu atu mo ngavulu rua mo vati (24) peresi la hinau mauri atu mo vati la juruvi popovi atano na lepa, ale la lotu God mo lo sakele na nona jara sakele nona supe. La ulo aulu lara, “Amen! Hasohaso God!”

⁵ Ale leo matea mo tai na jara sakele nona supe mara, “Hasohaso nofa God kamim mo isoiso nona volitusi sei ka lo sile na oloolo isana, haratu la aulu peresi la haratu sei la atano.”

⁶ Ale na rongo na vavaore nona vao tavera matea mo sohena fum tasi tavera, mo sohena roroa piri matuvana, mo ulo mara, “Hasohaso Moli nofa God, enia suiha aulu atu mo tavera jea mo lo sakele na nona suiha. ⁷ Ra avulahi fa avulahi tavera, ale fa sile na hasohaso tavera isana matan lahi non Natu Sipsip mo masese, ale nona ha'ai mo hase tatamahunia. ⁸ God mo silea vara i ruru na ruru lulu mere mo vokevoke.” Matan ruru lulu atu, mo lo farami na vavahinau ruhu nona tapuhi.

⁹ Ale angelo atu mo vereea isaku mara, “O uli harihi: Avulahi isan la haratu la usira vara la pa mai na hanhani lahi non Natu Sipsip.” Ale mo mele vereea mara, “Reti-varafuhu sei la tai isan God.”

¹⁰ Ale na jovi na juruvi popovi atano na palona vara a lotua, pani mo vereea isaku mara, “O pa sopo vai hinau atu! Enau volitusi matea sohem peresi na vorai peresi na vevorai, la haratu la lo taurilati na vujangi non Iesu. O lotu God.” Vara tamlohi la lo vereuli Iesu enira la lo retimangovi na suihan Tanume Tapu.

Reti Non God Mo Vai Na Vuro

¹¹ Ale na hite tuka mo roi, e! Hos lulu matea, ale haratu mo lo sakele na hos la tovia:

**Romturu Rilangi
ale
Vara Ruhu**

ale nona aria mo tataholo, ale mo vai na vuro. ¹² Ale matana mo sohena pepe hapu matea, ale fongofongo matuvana nona

supe aulu jea la lo toho na patuna, ale hija matea mo lo toho hinia, pani enia hasena purongo mo levosahia.

¹³ Mo ruru na ruru peravu matea la ruʻunia na ʻae, ale hija sei la tovia hinia enia:

Reti Non God

¹⁴ Ale vao tamlohi vuro tavera na tuka la lo usuria hin hos lulu atu, la ruru na ruru lulu ruhu la vokevoke. ¹⁵ Na jingona, sita voro tavalu rua matea mo lo malue hinia vara i vilijovjovi na mara jara tinatinapua. I pa kilaura peresi na maja aen mata tamajira hinia, mo varasi na koko varavarasi mata lolokoru sasati mata talai lolokoru non God mata hehe sei enia suiha aulu atu mo tavera jea. ¹⁶ Ale hija matea la ulia na nona ruru peresi na vosena mara:

Supe nona Supe Moli nona Moli

¹⁷ Moiso, na hite na angelo matea mo lo turu na alo, ale mo ulu na leo tavera matea isana maji avuavu tari sei la lo avuavu aulu na masapa mara, “Ha sinai! Ha pulutahi mata hanhani tavera non God, ¹⁸ matan vara ha pa hani na vishon la haratu la supe, peresi la haratu la patu tamlohi mata vuro, peresi la haratu la lo tauri na suiha, peresi na hos peresi na tamlohira, peresi la haratu la materi, haratu la slev, tamlohi aulu peresi na tamlohi purongo.”

¹⁹ Ale na hite pa maji jala sasati atu peresi na supe tari na varama peresi na nora vao tamlohi vuro la mai jara matea vara la vai na vuro peresi haratu mo lo sakele na hos tolu na nona vao tamlohi vuro. ²⁰ Ale la tauri maji jala sasati atu peresi pʻovet haluhalu atu, enia haratu mo lo vai na matamata tavera na nahon maji jala sasati atu sei mo lo halu la haratu la lo lavi na nona taipulu, ale la lo lotu na tamasina. La pulahi maji jala sasati atu peresi pʻovet haluhalu atu la pa lo mauri, la sivo hin tasi hapu sei mo lo hani na vatu tutuni mata volkeno. ²¹ Ale isoisoro, la mate hin pa sita tavalu rua atu sei mo lo malue na jingon haratu mo lo sakele hin pa hos atu, ale maji avuavu tari la masu maʻari na vishora.

20

Tauni 1000

¹ Moiso, na hite na angelo matea mo tai na tuka mo lo lavi na kia matan koko tavera jea atu sei mo sivo atano jea na lolo varama mata mateia na limana, ale mo lo tauri na jen tavera matea. ² Mo taurilati dragon atu, enia mata sasati atu matan tuai sei la tovia Tiapolo teni Setan, ³ ale angelo atu mo pulahia mo sivo hin koko tavera jea atu sei mo sivo atano jea na lolo varama mata mateia, ale mo pelati horoa, ale mo ringea vara dragon atu i pa sopo efi mele halu

na mara jara tinatinapua vavano i tikeli na tauni i tari vahatea (1000) i vano, ale hitahuna i pa mele materi mata makomo rani purongo.

⁴ Ale na hite te jara sakele nona supe peresi haratu la lo sakele hinira sei la silera na suiha vara la ari, ale na hite na maurin la tamlohi atu sei la tai roto na patura matan la lo vereuli Iesu, ale mata reti non God. Enira la sopo lotu maji jala sasati atu teni tamasina teni la lavi na nona taipulu na pungorira teni na limara. Enira purongo la mele mauri vara la tauri na suiha vara la aulu peresi Kristo mata tauni i tari vahatea (1000).

⁵ Haranike enia tiroma sauteterahi. Haratu la sopo mauri la pa sopo efi mele mauri i tikeli na isoison tauni atu mo tari vahatea (1000). ⁶ Avulahi tavera isan la haratu la tapuhi non God sei la turu na tiroma sauteterahi, matan harua mateia i pa sopo efi taurira na suihana. Enira la pa pʻris non God peresi Kristo, ale la pa aulu peresira mata tauni i tari vahatea (1000).

Isoison Setan

⁷ Ale na isoison tauni atu mo tari vahatea (1000), la pa teri Setan na nona ima ʻilangi, ⁸ ale i pa malue vara i halu na mara jara tinatinapua la tovia Gog peresi Magog vara i pulutahira na jara matea vara la vai na vuro; evira mo sohena evi oneone na tasi. ⁹ Ale enira la hahau roto na jara tari na varama vara la falihia vao tapuhi tavera atu la lo toho falihia hin taon tavera atu God mo opoia, pani hapu mo tai na tuka mo jovi isan la haratu la lo mai mo hani tihaira. ¹⁰ Ale la pulahi Tiapolo haratu mo lo halura peresi pa maji jala sasati atu peresi pa pʻovet haluhalu atu, la sivo hin tasi atu sei mo lo hani na vatu tutuni mata volkeno, ale la pa vailejlejira na rani na pongi ea mata rani tui tui tarea.

Aria Tavera Non God

¹¹ Ale na hite na jara sakele mo lulu non God, ale enia mo lo sakele hinia. Varama peresi na tuka la rovo na nahona, la tihai jejeu. ¹² Ale na hite la haratu la mate, haratu la tamlohi aulu peresi la haratu la tamlohi purongo, la lo turu na naho jara sakele nona supe, ale puku la roi, ale puku tinapua matea mo roi enia — Puku mata Mauri. La ari la haratu la mate na sava la ulia hin la puku atu, mo tataholo na hinau tari la lo vaira na maurira.

¹³ Tasi mo sile la haratu la mate hinia, ale mateia peresi na varama mata mateia la sile la haratu la mate hinira. Ale la arira enira hatehateahi usuri na sava la lo vaira na maurira. ¹⁴ Moiso, la pulahi mateia peresi na varama mata mateia na tasi hapu. Nipu hapu atu la tovia Harua Mateia. ¹⁵ Vara tea

hijana la sopo hitea na Puku mata Mauri, enia, la pulahia mo sivo na tasi hapu.

21

Tuka Paro Peresi Na Varama Paro

¹ Hitahuna, na hite na tuka paro matea peresi na varama paro matea. Tuka tuai peresi na varama tuai la tihai moiso, ale mo sopo te tasi hinia. ² Ale na hite taon tapu atu — Jerusalem Paro, mo lo tai aulu na tuka isan God. Mo sohena haʻai matea mo ruru na ruru lahi mo tatamahu matan tuana.

³ Ale na rongo na leo taverna matea mo tai na jara sakele nona supe, mo vereea mara, “Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. ⁴ I pa kamoti na wai matara tari na matara, i pa sopo te matea, romsasaki teni tangi teni epe varihaji, matan hinau matan tuai la tihai.”

⁵ Ale haratu mo lo sakele na jara sakele nona supe mo vereea mara, “Ale ha lev-osahia! Na lo vai na hinau tari la paro.” Ale mo vereea isaku mara, “O uli hinau nike, matan la reti nike, o pa efi rasura, ale la vararuhu.” ⁶ Ale mo mele vereea isaku mara, “Mo isoiso! Enau pulo hinau tari! Enau isoisona! Enau tapulo hinau tari! Enau hitahu hinau tari! Isan haratu mo maʻohu, a pa silea hin patu wai mauri atu, mo sopo te volina. ⁷ Haratu mo jeu na nona meresahi i pa lavi la hinau atu. Enau a pa nona God, ale enia i pa natuku.

⁸ Pani isan la haratu romira mo sopo rilangi; teni haratu la lo vahafi na nora rasua; haratu posira la lumiha; teni haratu la lo vilimatei na tamlohi; teni haratu la lo vai na posposi viriui; teni haratu la lo mahumahu na suiha tanume; teni haratu la lo lotu na hinau mo sopo God, ale haratu la lo halu, jarara enia tasi hapu atu sei mo lo hani na vatu tutuni mata volkeno, enia Harua Mateia.”

Jerusalem Paro Mo Tai Na Tuka

⁹ Ale na hite na angelo matea mo mai isaku, enia vonan la angelo atu mo limaravrua sei, tiroma la lo lavi na jilivi mo limaravrua sei la maʻivi na rongohaji sasati mo limaravrua, ale mo vereea isaku mara, “O mai, a pa vujangiu hin haʻai atu i pa lahi, enia naroun Natu Sipsip.” ¹⁰ Ale angelo atu mo laviau na suihan Tanume Tapu na sahe aulu na patu vutivuti taverna matea. Angelo atu mo vujangiau hin taon tapu atu Jerusalem, mo lo tai aulu na tuka isan God, ¹¹ sasaramin God mo lo malue hinia, mo mera ruhu sohen vatu vilasi ruhuʻuhu matea, sohen vatu atu jasper majhina mo heja rau, ale mo hahara, mo niro ruhu

sohena crystal glas. ¹² Taon taverna atu ropena mo taverna mo aulu, ale mataruana mo sangavulu romana mo rua, ale angelo mo sangavulu romana mo rua la lo turu hin la matarua atu. Hin la matarua atu la uli la hija tavitavin Israel atu mo sangavulu romana mo rua na ¹³ tavaluna vano Opae mataruana mo tolu, tavaluna sahe Auta mataruana mo tolu, tavaluna sivo Tahuna mataruana mo tolu, ale tavaluna sivo Marino mo tolu. ¹⁴ Ropen taon taverna atu, pulona mo sangavulu romana mo rua, ale hija vahafule mo sangavulu romana mo rua non Natu Sipsip la lo toho hinira.

¹⁵ Haratu mo lo retireti isaku mo tauri na ava matea la vaia na gold vara i ava na tavernan taon taverna atu tolu na mataruana peresi na ropena. ¹⁶ Ale avana mo sohen harihi: taverna peresi na peravuna la sohesohera purongo, ale taverna peresi na peravuna peresi na auluna avara mo tikeli 12,000 stadia (2,220 km) enira hateatea. ¹⁷ Moiso mo ava na aulun rope atu mo tikeli 144 cubit (66 m) angelo sei mo ava harihi mo tataholo na tamlohi la lo ava hin pongi atu.

¹⁸ Ropena la voroa na vatu ruhuʻuhu sei jasper, ale taon taverna atu la vaia na gold vokevoke mo niro sohena glas. ¹⁹ La pulo ropen taon taverna atu la lakolakora na vatu vilasi ruhuʻuhu sei majhira la tinatinapua. Tiroma vatu enia jasper, haruana enia sapphire, hatolura enia agate, havatira enia emerald, ²⁰ halimara enia onyx, halimaravera enia carnelian, halimaravruara enia chrysolite, halimaravtolura enia beryl, halimaravatira enia topaz, sangavulura enia chrysoptase, sangavulu romana mateara enia jacinth, sangavulu romana mo ruara enia amethyst. ²¹ La vai la matarua atu mo sangavulu romana mo rua na huʻufutavila taverna mo sangavulu romana mo rua, ale malele na lolon taon taverna atu la vaia na gold mo niro sohena glas.

²² Na sopo hite te Temple na lolon taon taverna atu, matan Moli God enia suiha atu mo taverna jea peresi Natu Sipsip enira natu, nona Temple. ²³ Ale taon taverna atu mo sopo opoi na alo peresi na vitu vara la sasarami hinia matan memeran God mo lo sasarami hin taon taverna atu, ale Natu Sipsip enia nona lamu.

²⁴ Mara jara tinatinapua la pa hahau na memerana, ale supe tari na varama la pa lavi na nora tavitav la sivo hinia, ²⁵ Ale mataruana la pa sopo pelati hin te rani hatea matan mo sopo te rofoha mata vutepongi.

²⁶ Mara jara tinatinapua la pa lavi na nora tavitav peresi nora na nora oloolo la unu na lolona. ²⁷ Pani i pa sopo te hina lumiha hatea i efi unu hinia teni haratu posira mo

lumiha teni haratu la halu, pani la haratu purongo sei la lo uli na hijara na lolu Puku mata Mauri non Natu Sipsip.

22

¹ Ale angelo atu mo vujangiau hin wai roro mata mauri atu sei mo niro sohena glas sei crystal, ale mo lo roro mo lo malue na jara sakele nona supe non God enia Natu Sipsip. ² Ale mo roro usuri na livuha malele tavera hin taon tavera atu. Na tavalun wai roro atu hatehateahi vipahai sei mo lo sile na mauri peresi na vuana mo sangavulu romana mo rua tinatinapua, la mena na vitu hatehateahi na tauni matea, ale raura la pa vai mamahuni na rojoa nona mara jara tinatinapua. *Gen 2.9*

³ I pa sopo te hinau hatea God i pa rohu hinia atu, matan jara sakele nona supe non God peresi Natu Sipsip i pa lo toho ea, ale nona volitusi la pa lotua. *Zec 14.11; Gen 3.17* ⁴ Ale la pa lo hite na nahona, ale hijana i pa toho na pungorira. ⁵ Vutepongi i sopo eri mele pala, ale la haratu la lo toho ea, la pa sopo eri opoi na memera lamu teni alo matan Moli God enia i pa sasarami isara moiso, enira la pa tauri na suiha mata rani tui tui tarea. *Isa 60.19; Dan 7.18*

I Pa Sopo Tuai Kristo I Pa Mai

⁶ Ale angelo atu mo vereea isaku mara, “La reti atu o pa eri rasura, ale la vararuhu. Ale Moli enia God mata tanume p̄rovet, ale enia natu, mo r̄ule na nona angelo vara i vujangi na sava God mo vīonia vara i pa masese i pa sopo tuai isana nona volitusi.”

⁷ Iesu mo vereea mara, “Ha lo levosahia! A pa mele mai i sopo tuai! Avulahi isan la haratu la lo taurilati la reti hin puku mata retimangovi nike.”

⁸ Enau John, enau natu na hitea, ale na rongo la hinau nike, nara na rongora, ale na hitera, na juruvi popovi atano na palon angelo atu mo lo vujangiau hin la hinau sei vara a lotua, ⁹ pani angelo atu mo vereea isaku mara, “O sopo vaia sohena! Enau volitusi matea sohem peresi na voraim la provet tolu la haratu la ooloo la reti hin puku nike. O lotu God!”

¹⁰ Ale mo vereea isaku mara, “O sopo jarohi na reti mata retimangovi hin puku nike, matan i pa sopo tuai la pa masese.

¹¹ Haratu mo lo vai na hehe, i pa lo vai na hehe; haratu romina mo lumiha, romina i pa lo lumiha; ale tamlohi tataholo i pa lo vai na hina tataholo, ale haratu mo tapu i pa lo tapu.”

¹² Ale Moli mara, “Ka levosahia! Enau na lo mai vila, ale a pa sile na voli tamlohi tari i tataholo na sava la vaia moiso. ¹³ Enau na tiroma na hinau tari, enau na isoiso hinau tari, enau pulo hinau tari, enau na hitahu, enau tapulo hinau tari, enau isoiso hinau tari.”

¹⁴ Avulahi isana tamlohi tari sei la lo hoje na nora ruru peravu matan vara la pa tataholo vara la hani na vuan vipahai atu sei mo lo sile na mauri, ale la pa eri unu hin taon tavera atu na mataruana. *Gen 2.9; 3.22* ¹⁵ Pani na jingoima hin taon tavera atu, viriu sei haratu la lumiha peresi na tamlohi mahumahu na suiha tanume peresi haratu posira la lumiha peresi na tamlohi vilimatei na tamlohi peresi la haratu la lo lotulotu vono, ale tamlohi tari sei tarea la opoia vara la lo halu.

¹⁶ “Enau Iesu, enau na r̄ule na noku angelo vara i vereuli la hinau tari sei isamim mata vao kalesia tari. Enau tahisan mahapin Supe David, ale enau na majou ralavuhu sei mo memera.”

Isa 11.1, 10

¹⁷ Ale, Tanume Tapu peresi hāfai atu i pa lahi lara, “O mai!” Ale isan haratu mo eri rongo, o vereea vara “O mai!” Ale isan haratu mo māohu, “O mai!” Ale isan haratu mo opoia, o lavi na wai mata mauri mo sopo te volina.

¹⁸ Haranike enia noku retīofoahai isana tamlohi tari sei la rongo la reti mata retimangovi hin puku nike. *Deut 4.2; 12.32*

Vara tea i mele tau te reti tinapua na sava la ulia moiso, God i pa tau la rongohaji sasati atu puku nike, mo lo vereea isana. ¹⁹ Ale vara tea i lavi nārihi te reti hin retimangovi nike, God i pa lavi nārihi na rungana hin vipahai atu mata mauri peresi taon tapu atu sei la uliuli matana hin puku nike.

²⁰ Ale haratu mo lo vereuli la hinau nike mara,

“Io, enau na lo mai vila!”

Amen! O mai Moli Iesu!

²¹ Rom̄uhu non Moli Iesu i toho isamim mo isoiso. Amen.